


Mbia Cheẽ



New Testament in Sirionó (BL:srq;Sirionó)

Mbia Cheë

New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
eb2687f2-4654-5d43-8ec2-3ee35e8a435e

Contents

SAN MATEO	1
SAN MARCOS	60
SAN LUCAS	96
SAN JUAN	159
HECHOS	205
ROMANOS	266
1 CORINTIOS	293
2 CORINTIOS	318
GÁLATAS	334
EFESIOS	343
FILIPENSES	352
COLOSENSES	359
1 TESALONICENSES	365
1 TESALONICENSES	371
1 TIMOTEO	374
2 TIMOTEO	381
TITO	386
FILEMÓN	390
HEBREOS	392
SANTIAGO	411
1 PEDRO	418
2 PEDRO	426
1 JUAN	430
2 JUAN	436
3 JUAN	437
JUDAS	438
APOCALIPSIS	440

EL SANTO EVANGELIO SEGÚN SAN MATEO

Jesucristo i ñiinda amei

¹ Ñ ndei Jesucristo i ñiinda ã. David rei ei tuchi. Abraham abe no.

² Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru.

³ Judá rei Fares ndu. Zara ru abe no. (Tamar rei ũquĩsi.) Fares ndei Esrom ndu. Esrom ndei Aram ndu.

⁴ Aram ndei Aminadab ndu. Aminadab ndei Naasón ndu. Naasón ndei Salmón ndu.

⁵ Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isaí ru.

⁶ Isaí rei David ndu. David ndei ererecua. David ndei Salomón ndu. (Urías ninisi rei esi.)

⁷ Salomón ndei Roboam ndu. Roboam ndei Abías ru. Abías rei Asa ru.

⁸ Asa rei Josafat ndu. Josafat ndei Joram ndu. Joram ndei Uzías ru.

⁹ Uzías rei Jotam ndu. Jotam ndei Acáz ru. Acáz rei Ezequías ru.

¹⁰ Ezequías rei Manasés ru. Manasés rei Amón ndu. Amón ndei Josías ru.

¹¹ Josías rei Jeconías ru. Jeconías nongue abe ru. Ũquí ngue siqui abae judíos rerao mose Babilóniaa nda.

¹² Jeconías rei Salatiel ndu no. Salatiel ndei Zorobabel ndu.

¹³ Zorobabel ndei Abiud ndu. Abiud ndei Eliaquim ndu. Eliaquim ndei Azor ndu.

¹⁴ Azor ndei Sadoc ndu. Sadoc ndei Aquim ndu. Aquim ndei Eliud ndu.

¹⁵ Eliud ndei Eleazar ndu. Eleazar ndei Matán ndu. Matán ndei Jacob ndu.

¹⁶ Jacob ndei José ru. José quia María quereco nguiã. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jêje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguiriĩ ngue eteatchõ nguie ye ra. Siquiã ndaque José rese. Espiritu Turã ae que eririĩ mondo erie ye ra.

¹⁹ José turãte que eriqui rei ra. Eireĩte que eriqui mae María rio rese ra. — Senisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui rei nguia emo ndese ee reae.

²⁰ José que ndua ndua quia erese ra. Ndua ndua mose que ángel mo ndu eque re cuu ra. Angel que ñee ee ra. —David ririĩ ño nde re. María eisi turã ño nenisirã. ¡Ndeireĩ nguiã ño jê! Emo ngue siqui ãte quia erese ra. Espiritu Turã ae que eririĩ mondo erie ye ra.

²¹ Nguiriĩ nda etea. “Jesús” ere chõ eririĩ je. Ae quia ra mbia sirõ tuchi eicuã si, i que ángel ñee José je cuu ra.

22 Eĩ nda Dios cheẽ io cote. Ae Dios cheẽ mbuchecuasa mbesa cose nae, ùquĩ nda io cote. ã ndei embesa ji ã:

23 ;sã jê! Nyucuaaque ruã nda nguiri tea.

Emanuel, i ra eriiri je.

Dios riqui nanderese co, i ñi Emanuel nde, i que embesa ji cose ra.

24 José que ñumumba cote ra. Angel cheẽ ndui si que María rerequia turã cote ra.

25 José que siqui eã mbei erese ra. Gnguiri ndea chee. Jesús i que José eriiri je ra.

2

Mbia aquiatu nyoi Jesús itãquieĩ ndea

1 Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda.

2 Ûquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nyasitata embae rese ra. Ureico mose ure récuua. Nyebe urechu nguiã erea co. Urecoi rá urenia ndese ñee ee. ¿Ma eriqui ma nde? i que mbia aquiatu ñee judíos je ra.

3 Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra.

4 Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra.

5 Ûquĩ ngue ñee Herodes je ra. —Nyaacuquia ra Belén de Judea. I que embesa ji ra:

6 Sucha ñetẽ tuchi rei Belén.

Belén de Judea.

Mbia ch#cua tuchi ra Belén cote.

Hue jenda mo nda mbia rerecuarã tuchi cote.

Ae ra serimba Israel jenda teaquiato tuchi quia cote,

i que Dios cheẽ embesa ji ra, i que sacerdotes ñee Herodes je ra.

7 Nyebe Herodes “jenyu” i nguiã ùquĩ mbia aquiatu je. Ñee ngue ùquĩ ísaa ra. —¿Manosete nyasitata embae rese jemae nde? i que ñee ee ra.

8 Herodes que ùquĩ mbia aquiatu mondochoi Belén cote ra. —Jêso Belén. Nyaacuquia ramo je rese jêirandu tuchi. Jê erea mose, sembiirandu se. † nda se abe ašo mae erese. † nda acoi senia ndese se abe ñee ee, i rei que Herodes ñee ee ra.

9 Mbia aquiatu que nyoi cote ra. Ae nyasitata rese eriqui mae nyii nae, aque nyasitata que oso bei quia mbia rêta ra. Tiba que ee Belén arõ cote ra.

10 Nyebe mbia aquiatu ia tuchi nguiã mae mose nyasitata tiba rese cote.

11 Mbia aquiatu que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que nguiã ndese eitãquieĩ je cote ra. Ñee turã ngue ee ra. Mbae que esirõ mondo Jesús je cote ra. Oro. Mbae mbushimbusa abe no. Mirra abe no.

12 Dios que ñee mbia aquiatu je cote ra. —Jêsochĩ nda ñee Herodes mbiirandu jê, i que Dios ñee ee cuu ra. Nyebe echoi nguiã Herodes abi nguécuaa.

José nyoi uchã Egípto

13 Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serĩte equia co. Jẽso uchã. ãquẽ jendao sunuña Egĩptoo. Esi rese. Huee jẽingochõ. Acheẽ jee ra ndeje huee, i que Dios ñee José je ra.

14 José que ñumumba juã cote ra. ãquẽ ngue ecuruchoi isa usi rese ra. Nyoĩ que Egĩpto quti ra.

15 Chi arete que Egĩptoo ra. Ererecua Herodes que mano cote ra. Dios cheẽ ngue ique cote ra. Eĩ ngue Dios cheẽ embesa ji ra: Seriiĩ ngue aru Egĩpto si ra, i que embesa ji ra.

Herodes ãquẽ itãquieĩ iquia ja

16 Herodes que paama i tuchi cote ra. —Mbia aquiatu sembĩĩĩ irĩ ñochĩ. Nyebiã ñochĩ ecuaẽ ñee seje, i que ra. Nyebe que soldados mondo mbia riiĩĩ nacue iquia ja cote ra. ãquẽ itãquieĩ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aq ue mosenda ãquẽ itãquieĩ iquia ja.

17 Herodes ũquĩ iquia mose que Dios cheẽ ique cote ra. Ae Jeremías mbesa quia:

18 Mbia Ramá jenda nyeseo tuchi.

Eya eã tuchi nguĩĩĩ ndese.

Emo embia aroneãte.

Eriĩĩ nguia mano jate nguĩã ee, i que embesa ji ra.

19 José chi mose Egĩpto que Herodes mano nyee ra. Nyebe Dios ángel mo mondo nguĩã ñe e José je.

20 —José, echumumba rã. Jẽso Israel cote. ãquẽ abe erao. Esi rese. Ae ãquẽ iquia serĩte quia nae, ũquĩ ngue mano cote ra, i que ángel ñee José je cuu ra.

21 José que ñumumba cote ra. Nyoĩ que nyebi Israel quti cote ra. ãquẽ ngue equerao esi rese ra.

22 Herodes riiĩĩ ngue siqui Judea jenda rerecuarã cote ra. Arquelao, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguĩã Galilea cote.

23 Sucha tubiriã mo ngue chi Galiléaa ra. Nazaret, i que hue je ra. José que nyoĩ bei hue, hue jendarã cote ra. Nyebe Dios cheẽ mbesa ji ique nguĩã cote. f ngue Dios cheẽ nda: Nazaret jenda ra Jesús, i que Dios cheẽ nda.

3

Juan el Bautista Dios chẽ senei senei

1 Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra.

2 —Jendua si jẽicuañ ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda.

3 Sã Isaías embesa nyii no:

Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenye si chõ nguia jẽ abe icoquiātu nandererecua je”, i equia turúquiaa hue, i que Isaías embesa ra. Juan nii si que embesa ra.

4 Quiicuañ mbuaera chõ ngue Juan irao ra. Mbae ire chõ ngue enumbicuasa no nda. Tucu mbuae chõ ngue eu quia no nda. Irao quiaa rĩĩnda abe.

⁵ Jerusalén jenda que ngaë ngaë tuchi quia echeë andu ra. Judea jenda abe no. Ama Jordán nimia nduinda abe no.

⁶ Mbia huicua nenei nenei mose Dios je, ũqui mose que Juan ndiqui bautizar i ee ra. Ama Jordán ye.

⁷ Fariseos tubiriã abe que ngaë ngaë tuchi quia Juan ndea ra. Saduceos tubiriã abe no. Juan ngue ñee asite ũqui je ra. —Mbei rã ño jëingo nguiã ã. Mbae icuã nda tu mbia je nae, ¿ũqui ñi ño jenyu quia uchã serea co re?

⁸ Jë mbae icuã ndecha mose Dios je, mbae turã jësaã saã mbei quiatu quia ee cote.

⁹ “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jë! Dios Abraham ndiirĩ nducucha chao arõte raque sita je.

¹⁰ Ira rã si chõ mbia riqui nguiã ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eĩ serĩ serĩ ño Dios nguiã mbia je co, mbia mbae turã naa eã mose.

¹¹ I je chõ aico nguiã bautizar i mbia je co. Jë ndua ndua si mose Dios rese. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no.

¹² Ae ra mbia umbae mi icuë. Eturã achõ ño embae re. Ae embae eã nae, ũqui nda eséi cote. ũqui ndeisa ra ua eã mbei tata. Sã mbia quiata a chiqui chiqui no. Sã ea mi icuë no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³ Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee.

¹⁴ Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús je ra.

¹⁵ Jesús que ñee ee ra. —Bautizar ere rei seje. Dios cheë ndui si mbae nandesã turã ja quia, i que Jesús ee ra. Juan ngue eno i chee ee ra.

¹⁶ Juan ngue bautizar i ee ra. Jesús que usë oso ama si cote ra. Ibei que nyiequia ee cote ra. Espiritu Turã ngue nguichi nyurushi rã nda. Nguichi que eu Jesús rese ra.

¹⁷ Ibei jenda que ñee nda. —Seriirĩ ño co re. Sechesequa chõ co re. Seyate erese, i que Dios ñee Jesús je ra.

4

Jesús tambicua, i raque Satanás

¹ Turúquiaa que Espiritu Turã Jesús rerao ra. “Tã tae Jesús je”, i sacua diablo Jesús je.

² Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra.

³ Aque mose tuchi que diablo si ee ra. Embicua sacua. —Nde Dios riirĩ mose, mbichae esaã ã sita je. f nda ereu, i rei que diablo ñee ee ra.

⁴ Jesús que ñee ee ra. —Tei. Sã embesa ji ñee no: “Mbia chiu achõ nda mbia mingo eã. Dios cheë nguiã ra mbia mingo nguiã”, i que embesa ji ra, i que Jesús ee ra.

⁵ Aquere que diablo ererao Jerusalén nda. Querao que suruchui ibate Dios chuchua arõ nda.

⁶ Ñee ngue Jesús je ibate ereco mose ra. —Nde Dios riirĩ mose, eo oso íbii no. Dios ra ndereaquiatu. Sã embesa ji riqui i ñee no:

Dios ra ángeles mondo ndereaquiatu sacuã.

Oje ra ndeisi. Nembuquichi mingue rae.

Sita ra cua iã ndei je,

i que embesa ji ra, i rei que diablo ñee Jesús je ra.

⁷ Jesús que ñee diablo je ra. —Sã embesa ji ñee no: “Ma Dios sereaquiatu. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra.

⁸ Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacuquia ja ee.

⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra.

¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra.

¹¹ Diablo que oso erecha cote ra. Angeles que ngaẽ Jesús reaquiato cote ra.

Jesús mbia mbaaquiatu quiatu ramo

¹²⁻¹³ Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabulón abe ji. Neftalí abe ji. Huee que Jesús si siri ra.

¹⁴ Isaías chimbese Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵⁻¹⁶ Mbía hue jenda ja que siqui itondáruu nyii ra.

Zabulón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ñquĩ abe no.

Ñquĩ mbía que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra.

¹⁷ Aque mose bei chõ ngue Jesús riqui ñee mbía je cote ra. —Jendua si Dios rese. Mbía rerecuarã tuchi ra Dios namo jiri, i que Jesús quia ñee mbei mbía je cote ra.

Jëingo serui, i Jesús uchimbaaquiaturã je

¹⁸ Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mondo ii ra. Sira resenda bei rei ñquĩ.

¹⁹ Jesús que ñee ee ra. —iSerui bei chõ jëingo jë! Taembaaquiatu quiatu. Mbía teendu endu bei quia seje cote, i que Jesús ee ra.

²⁰ Nyoj ja que erui ra. Sira mbuasa si que echoi hui ra.

²¹ Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbitirõ tirõ nda. —Jëingo serui, i que Jesús Jacobo je ra. Juan je abe.

²² Jesús cheẽ nduibe tuchi que echoi erui ra. Canoa ndecha. Ngu abe recha.

Jesús mbia tubiriã mbaaquiatu

²³ Jesús que ngata tuchi quia Galilea rĩ nda. Mbia que embaaquiato quiato quia mbia chumunua nuásaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra.

²⁴ Mbia Siri a jenda que jirandu tuchi te chee erese ra. Nyebe eriqui nguia erasi rurucuaẽ cuaẽ jafe ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra.

²⁵ Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uqui jenda siqui ja Jesús rui.

5

Jesús mbia mbaaquiato quiato ibi ibate

¹ Mbia tubiriã ngu e chi Jesús rese ra. Nyebe Jesús nyui nguia ibi ibate mo ndese ra. Ngoi que huee ra. Echimbaaquiato que esiichã ngaẽ nda.

² Jesús que embaaquiato quiato ra.

Ae eyate riqui

³ Eĩ ngue ñee ee ra:

—Ae siqui mingue quia nae, eya chõ ñquĩ nde. Ñquĩ nda siqui Dios rese.

⁴ Ae nyeseo quia nae, eya chõ ñquĩ nde. Dios ra embia tuchi.

⁵ Ae eseteãte riqui nae, eya chõ ñquĩ nde. Ibi ja ra embae cote.

⁶ Ae siqui turã sete quia nae, eya chõ ñquĩ nde. Dios ra embucuata turã nguia.

⁷ Ae eya eãte riqui mbia rese nae, eya chõ ñquĩ nde. Dios ia eãte ra ñquĩ ndese.

⁸ Ae echiã turãte riqui nae, eya chõ ñquĩ nde. Ñquĩ nda mae Dios rese.

⁹ Ae mbia mingo turã nguia nyiese nae, eya chõ ñquĩ nde. “Seriirĩ” i ra Dios ñquĩ je.

¹⁰ Mbia icuã icuã mose jẽturã je, jẽya tuchi rae. Jenderecua tuchi chõ Dios riqui nguia co.

¹¹ Mbia ñee icuã mose jẽje serĩ, jẽya tuchi rae. Mbia icuã icuã mose jẽje serĩ. Mbia ñee ñooño mose jeni, jẽya tuchi rae.

¹² Jeñimbia chõ nguia ñquĩ mose. Dios quia ra mbae turã tuchi mondo jẽje ibate. Mbia icuã icuãnde jẽje nyii. Eĩ ngue mbia icuã icuã nguia Dios rimba je nyii no nda.

Tata rendi rá ndei Dios quiato

¹³ Embiquesa rá ño jẽingo nguia mbia je ã. Sã embiquesa turãte no. Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese.

¹⁴ Tata rá ño jẽingo nguia mbia Dios quiatoã je ã. Mbia sucha cuasu raã mose ibi ibátee, mbia ra mae ja erese.

¹⁵ Sã nandeico lámpara mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguia. Mbia resae ja sacua.

¹⁶ Eĩ jenyee si chõ nguia tata turã na. Mbae resae turã mbia je. Eĩ jenyee mose ra mbia mae jẽturã ndese. Ñee turã nda jendu ibatenda je cote.

Jesús mbia mbaaquiato quiato Moisés chimbesa rã

17 Dios cheẽ ique ja sacua ño achu nguiã co. Moisés cheẽ mbutiã sacua eã ño ngue achu nguiã. Dios cheẽ mbuchecuasa cheẽ mbutiã sacua eã ño ngue achu nguiã.

18 Tacheẽ nyecua jêje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguiã ra ua eã mbei. Ique ja chee rae.

19 Dios cheẽ tubiriãte raque mbia je, mbia echeẽ mumbayã sacua. Emo echeẽ mii mumba mose, Dios biãte ra ùqui, Dios siqui mose ererecuarã tuchi cote. “Dios cheẽ mii emumba”, i mose emo, Dios biãte ùqui. Ae echeẽ mumbayãte quia nae, Diosbi tuchi chõ ùqui nde. Ae ñee nguiã mbia je nae, “Dios cheẽ jemumbayã ja” i quia mbia je nae, Diosbi tuchi chõ ùqui nde.

20 Tacheẽ nyecua jêje. Fariseos uturã saã saã tuchi raque. Embesasa abe uturã saã saã tuchi raque. jÊ nguiã jêingo turã tuchi ùqui si jê! Jê jêingo turã eã mose ùqui si, jêingo eã nda Dios rese, Dios siqui mose mbia rerecuarã.

Paama jenyechi nda emo je, i Jesús

21 Amei ñee ngue jeñandu rei ra. “Mbia mo nda ereiquiachĩ. Nde mbia mo iquia mose, nde abe ra mbia ndeiquia arõte”, i rei que amei nda.

22 Se quia tacheẽ nyecua jêje. Jê paama i chooño mose jenongue je, mbia ra jêiquia arõte. “Ndeaquiatuã nde” jenyemose jenongue je, mbia ra jêiquia arõte. “Ndearacuayã nde” jenyemose jenongue je, jêso arõte ra tata cuasu.

23-24 Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguiã nyii. Aquere quiatu eso nyebi ofrenda mee Dios je cote.

25 Emo mbia rerecuã mbuqueta queta mose nderi, ndeturã ño ee. Echeẽ turã ño ee. Jê ae chõ jeñimbuturã jenyue. f nda ndererao icuã eã. Ndererao mose ra ndetarõ mbei cárcel.

26 Huee ra ereico bei. Nembae mondo ja tuchi chee ee.

Emo mae mose cuña mo oseĩ oseĩ, adulterio i ùqui je

27 Amei ñee ngue jeñandu rei ra. “Emo ninisi rese ra jêingochĩ”, i rei que ra.

28 Se quia tacheẽ nyecua jêje. Emo mae icuã mose cuña mo ndese, “aque rese nda aico raã ña” i mose, ùqui abe eicuãte. Siqui raanguia erese chõ ùqui nde.

29 Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa mii eremombo nguiã. f nda nderete osoã tata cuásuu.

30 Ndeo nemingo mose mbae icuã ndese, echisia mombo. Coche ndeo mombo nguiã. Ndequiato ctinda raque. f nda nderete osoã tata cuásuu.

Jeninisi ra jemombochĩ jê, i Jesús

31 Amei ñee ngue jeñandu rei ra. “Emo ngüinisi mombose mose, sã emombo chõ. Papel mbesa ji emondo ee”, i rei que amei nda.

32 Se quia tacheẽ nyecua jêje. jJeninisi ra jemombochĩ jê! Jeninisi siqui mose emo ndese, ùqui mose mii ño jeninisi jemombo arõte raque. Jê emombo chooño mose, jêingo jeninisi mingo adulterio rese ùqui. Ae emombo ji quereco cote nae, ùqui abe eicuãte no. Adulterio, i chõ ùqui je re.

Jurar jenyemose jirichĩ nda jê

33 Amei ñee ngue jeñandu rei ra. “Jurar jenyemose Dios je, jeñee nda jembuchebichĩ ee”, i rei que amei nda.

34 Se quia tacheẽ nyecua jêje. ¡Jurar jenyee eã mbei tuchi jê! Ibei rĩĩ abe jurar jenyee eã jê. Dios recua chõ ibei re.

35 Ibi rĩĩ abe jurar jenyee eã jê. Dios ironguia chõ ibi re. Jerusalén nĩĩ abe jurar jenyee eã jê. Dios mbae tuchi chõ Jerusalén nde.

36 Jeãquĩ nĩĩ abe jurar jenyee eã jê. Jêa mĩĩ mo jembushĩ aroneate. Co mĩĩ jemondẽ aroneate no.

37 ¡Jurar jenyee eã jê! “Ae” jenyee chõ. “Tei” jenyee chõ. Ũquĩ mĩĩ ño jeñee. Jurar jenyee mose, eicuãte ũquĩ.

Emo icuã mose jêje, jêturã ño ee

38 Amei ñee ngue jeñandu rei ra. “Emo nderesa mungue mose, nde abe aque resa emungue. Emo nderẽ siquio mose, nde abe ereĩ esiquio”, i rei que amei nda.

39 Se quia tacheẽ nyecua jêje. Mbae icuã nda jêsaachĩ mbia icuã je. Emo ucua mose nderitii rese, nderitii ribisho abe eteacucua ee.

40 Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee.

41 “Sembae mbae usi erao jiri seje”, i mose emo ndeje, peebe jiri erao ee.

42 Emo ache ache i mose ndeje, emondo ee. “Mbae mo prestar ere seje” i mose emo, emondo ee.

43 Amei ñee ngue jeñandu rei ra. “Ae eturãte riqui ndeje nae, echesequa erese. Ae ndeucuãyã nguia nae, nde abe eucuãyã” i rei que amei nda.

44 Se quia tacheẽ nyecua jêje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderĩĩ nae, echeẽ turã ño nguia nde ee. Ae eicuãte riqui ndeje nae, ũquĩ nĩĩ eico ñee turã Dios je.

45 Eĩ jenyee mose ra Ibatenda riiĩĩ turã tuchi jê. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe.

46 Ae eturãte riqui mbia jêje nae, ũquĩ achõ je jêturã mose, eicuãte ũquĩ. Mbia icuã abe mbae turã saãte uquiato achõ je. Eĩ jenyechĩ nda jê.

47 Jêquiato achõ je jeñee turã mose, aba biãte ũquĩ. Eĩ ño Dios quiatoã abe nguia ñee turã uquiato je.

48 Jê nguia jêingo turã mbei mbia ja je. Sã jendu Ibatenda turã mbei riqui no.

6

Mbae turã jêsaã nyecuayã ño nguia

1 “Sã mbia mae ja sechiao turã ndese”, jenyechĩ nda mbae turã naa mose. Mbia résaa achõ nda mbae turã jêsaã saachĩ jê. Ũquĩ jêsaã saã mose ra jendu Ibatenda mbae turã mee eã jêje.

2 Jêingo mose mbae mee mee mbaecha reã je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ũquĩ na nda jêingochĩ. Dios ra mbae turã mee eã ũquĩ je. “Sã mbia mae ja sechiao turã ndese”, jenyechĩ nda jê.

3 Mbae turã jêsaã mose, jêsaã mingue chõ.

4 Mbae turã jêsaã nyecuayã ño. Jêingo mose mbae turã naa naa nyecuayã, Dios ae ra mae jêturã ndese. Ae quia ra mbae turã mee nyecua jêje cote.

Eĩ jenyee chõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jëingochĩ. Ũquĩ ndiqui nyoĩ choĩ mbiásaa ñee sacuaã Dios je ũquĩ. “Sã mbia mae ja serese secheẽ mose Dios je”, i equia ũquĩ. Mbia riqui mae jate raque erese. Dios quia ra mbae turã mee eã ee.

⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erechĩ nda jë. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra Dios ureandu”, i rei nguia.

⁸ Ũquĩ na nda jëingochĩ. Ae mbae ãte riqui jëje nae, ũquĩ Dios icuate quia co. Jeñee nonde ee. “Mbae embu ure je”, jë i nonde ee.

⁹ Eĩ jenyee chõ nguia ñee Dios je:

Paba Ibatenda, sã mbia ñee turã mbei quia nderiĩ.

¹⁰ Mbia rere cuarã ja sacuaã echu jei ibii.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ũquĩ embu rã urechiurã.

¹² Ae uresaã icuaã icuaã ndeje nae, ũquĩ embutiã ná uresi. Sã ureico tesarei mbia icuaã icuaã mose ure je no.

¹³ “Mbae icuaã jësaã” jichĩ nda emo ure je jë!

Urereaquiato bei quia mbae icuaã si.

Nde miĩ ño mbia rerecuarã nde.

Nde miĩ ño ndequirãcuã nde.

Nde miĩ je mbia ñee turã sacuaã mbei. Amén.

Eĩ jenyee chõ ñee Dios je.

¹⁴ Mbia icuaã icuaã mose jëje, jëtesarei chõ esi. Eĩ jenyee mose ra Dios Ibatenda abe jeicuaã mbutiã jësi.

¹⁵ Jëtesarei eã mose mbia icuaã si, Dios abe ra jëicuaã mbutiã eã jësi.

“Sã mbia mae ja serese” jenyechĩ nda hui mose jenyiu si

¹⁶ Jenyiu si jëhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jë. Eĩ ño uturã naa naasa nguia. Mbia nda mae ja rei nguia erese. Dios quia ra mbae turã mee eã ee.

¹⁷ Ndehui mose ndechiu si Dios je, ndeya chõ eico.

¹⁸ Sã mbia jiranua nderiãcuã ndese. Sã Dios ae jirandu nderiãcuã ndese. Dios quia mbae icua jate nguia. Ae quia ra mbae mee ndeje cote.

Jembaerã ibatenda rese quia jëingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jë. Chicuaquiareĩ nda eu arõte. Emo embuquiachã arõte jësi. Eichoĩ arõ ndete no.

²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jësi.

²¹ Jembaerã chi mose ibate, Dios rese ra jëingo ndua turã. Jembaerã chi mose íbii, ibi jenda miĩ ndese ra jëingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turã mose, nanderete abe ra oso turã.

²³ Nanderesa icuã mose, nanderete abe ra oso icuã icuã no. Tat a rendi rã jëingo bei. Ūquí mose ra jëingo jiri jiriã itondáruu.

Mbae isiquia Dios quiato eã

²⁴ Erimba mii mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, ūquí siqui aroneate Dios rui. Ae siqui beite quia Dios rese nae, ūquí nguiarei ndua eã jiri mbae isiquia rese.

Dios uquiato teaquiatu bei

²⁵ “¿Mbae ra nandeu re?” jenyechĩ nda quicoi coi jë. “¿Ma tiru ra nandemingue re?” jenyechĩ nda quicoi coi no jë. Mbia chiu ae ra mbia mingo eã. Mbia irao abe ra mbia mingo eã no.

²⁶ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiari quiaru bei. Jë nguiarei Dios queteamba tuchi nguireĩ si. Dios ae jembuquiari nguiã jë no.

²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ nguiã.

²⁸ “¿Ma tiru ra nandemingue re?” jenyechĩ nda pare pare i jë. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque.

²⁹ Dios ae chõ mbae uti mbuturã nguiã. Mbae uti quiarei eturã jiri Salomón si. Salomón turãte raque.

³⁰ Sã Dios quiata mbuturã no. Quiata mano jeite raque. ¿Mañi nda Dios jembuiraõ eã jë nde no? ¿Mbaerã jëingo Dios icuayãte re?

³¹ “¿Mbae ra nandeu re?” jenyechĩ nda pare pare i jë. “¿Mbae ra nandembei re?” jenyechĩ nda pare pare i jë. “¿Ma tiru ra nandemingue re?” jenyechĩ nda eno jë.

³² Eĩ ño Dios quiatoã nguiã. Jë nguia jendu Ibatenda tesareĩã mbeite nguiã jësi.

³³ Jë nguia jëingo tuchi Dios rese jenderecuarã. Sã Dios turãte no. Ūquí na ño jëingo. Ūquí mose ra Dios mbae mee mee mbei jëje. Jenyurã. Jeñimbeirã abe no. Jëiraorã abe no.

³⁴ “Mbae tiã ñochĩ nda seje isamami nde”, jenyechĩ nda pare pare i jë. Isamaminda rese ra jendua nduachĩ namo jë. Namonda mii ndese jendua namo no. Isamami nguiatu jendua isamaminda rese.

7

“Eicuãte que co ra”, jenyechĩ nda emo nü

¹ “Co que eicuãte ra”, jenyechĩ nda emo nü. “Jëicuãte” iã nda Dios jëje chã.

² Mbia icuã mose, jeñeechĩ nda ee. Jëturã mose ee, Dios abe ra eturã jëje. Mbae jeme mee turã mbia je. Dios abe quia ra mbae mee tuchi jëje cote. Jë embisẽ mee mose emo je, Dios abe ra embisẽ mee jëje no.

³ ¿Mbaerã jëingo “eicuã” i emo je re? Jë jëicuã tuchi mose esi. “Mbae ñetẽ ndiqui nderesaa aque”, jenyechĩ nda emo je, jë mbae cuasu rerequia mose jendésaa jë nguiatu.

⁴⁻⁵ “Mbae turã ndese chõ jëingo”, jenyechĩ nda jë jëicuã mose jë. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jë. Jë nguia

jěturā jěsāā saā ñote nguiā aque. Jě nane nguia jěturā ndiqui. Aquere quia jeñee emo mingo turā cote.

⁶ Sā mbia mo ndiqui perro rā si no. Teasu socoi quía rā abe no. Ũquĩ nguiarei mbia icuā mbei Dios cheē andure. Dios cheē isi teā teā. Dios cheē jěsenei eā ũquĩ je cote. Emo je quia jěsenei cote.

Jeñee mose Dios je, mbae ra emondo jěje

⁷ Jeñee mbei mose Dios je, mbae ra emondo jěje. Jě mbae mo ndequia mose, jětea rae. Jě eiquesa mbuu mbuu mose, ũquĩ mose ra embuquiata jěje no.

⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no.

⁹ Jendiirĩ “mbichae embu seje” i mose, ¿sita ra eru mee ee re?

¹⁰ Jendiirĩ “sira embu seje” i mose, ¿mbei ra eru mondo ee re?

¹¹ Mbia icuā nyee mbae turā mondo mondo quia nguiirĩ je ā. Jendu Ibatenda quia ra mbae turā tuchi mee jěje, jeñee mose ee.

¹² Sā jěyate riqui mbia siqui turā mose jěje no. Eĩ jenyee si chō nguia siqui turā mbia je no. Moisés chimbesa tuchi chō ũquĩ nde. Dios quiato cose ndare chimbesa ja chō ũquĩ nde.

Eiquesa chumumbi

¹³ Eiquesa chumumbi rĩ ño jěso ique jě. Aque ñeenda oso quia tata cuasu nae, eicoi chō aque re. Ae eiquesa ngasē nguia tat a cuasu nae, eicoi chō aque no nde. Hue rĩ mbia tubiriā ndiqui nguiā ũquĩ.

¹⁴ Ñeenda nongue rui quiatu ngasē nguiā Dios je. Aque ñeenda quiarei echumumbi. Echumumbi chō aque ñeenda iquesa re. Mbia mii mii ño siqui nguiā aque ñeenda rui. Ũquĩ nguia ra Dios mingo bei.

Sā ira ae ia ae ae no

¹⁵ Ae Dios cheē senei ñooño nguia nae, aba mbirĩ irĩsa chō ũquĩ nde. Ũquĩ ndei Dios quiato raā ñooño. Mbia mbirĩ irĩsa Dios rĩ.

¹⁶ Sā ira ae e a ae ae no. Uva a rā eā nda nyu a ia no. Ea ae eno nde. Higo a rā eā nda isio rashi a no. Ea ae eno nde.

¹⁷ Eĩ si chō mbia no nde. Mbia turā nda siqui mbae turā ndese. Mbia icuā nda siqui mbae icuā ndese no.

¹⁸ Ira turā mose, ea abe ra eturā. Nyiabi aronea. Ira icuā mose, ea abe r a eicuā no. Ei rā si ra ea.

¹⁹ Ira mo ia turā eā mose, nyisia rae. Mendi rae.

²⁰ Dios cheē nenei neneisa chō jěicua rā. Dios cheē ndui si eriqui turā mose, Dios quiato chō ũquĩ nde. Dios cheē ndui eā mose, Dios quiato eā ño ũquĩ no nde.

Mbia ra ique ja eā

²¹ “Sererecua” i rei mbia tubiriā nguiā seje ā. Ũquĩ nguia nda ique ja eā nguiā serécuaa. Ae siqui Seru Ibatenda cheē ndui nae, ũquĩ mii ño nda ique serécuaa.

²² Aque mose ra mbia ñee tuchi seje. “Jesús, ndecheē ngue urembuchecua checua tuchi quia mbia je resē. Aba checuayā ngue urejea jea tuchi quia mbia si nderĩ ndesē. Mbia mae sayā ngue uresaā saā tuchi quia nderĩ ndesē”, i tuch i rei ra mbia seje.

²³ Ũquĩ je ra acheē. “Co aico jěicuyā mbeite co resē. Jěso serecha. Mbae icuā aosa chō jě nde”, ae ra ee.

Tuchua nyeremo

²⁴ Ae siqui serese, ae secheẽ mumbayã nguia nae, ùquĩ nguiarei eturã tuchi. Tuchua ãtã aosa rã ño ùquĩ nde. Sã eaquiato mo tuchua ao sita turã arõ no.

²⁵ Ama nyaaquí mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue uchuchu a ao nguia. Eĩ si chõ secheẽ mumbasa rẽ a nde. Tuchu a ãtã aosa rã si.

²⁶ Ae secheẽ mumba quia eandu mose nae, eaquiataũ na ño ùquĩ nde. Sã eaquiataũ mo uchucharã ao no. Aque quiarei ibi ribicoi tuchiã. Sita quiishi arõchi chõ uchuchua ao nguia.

²⁷ Ama nyaaquí mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eĩ si chõ secheẽ mumbasa re, i que Jesús ra.

²⁸ Jesús que hui ucheẽ si cote ra. Mbia que nyuruira tuchi echeẽ andu ra.

²⁹ Ererecua rã ño ngue eriqui nguia mbia mbaaquiato quiatu.

8*Jesús mbia leproso mbucherõ*

¹ Jesús que nguichi ibi ibate si cote ra. Mbia cuabête que siqui eruí ra.

² Emo ndasi que tu ee ra. Leproso, i que aque erasi je ra. Tu que ngoi ngüiã ndese ñee Jesús je ra. —Sererecua, nde sembucherõse mose, sembucherõ se, i que ñee Jesús je ra.

³ Jesús que oco erese cote ra. —Echerõ cote, i que ee ra. Echeẽ mosebe que nyerõ nda.

⁴ Jesús que ñee ee ra. —¡Erecheẽchĩ nda mbia mo je jẽ! Eso nderasiã ndeaquía sacerdote je cote. Moisés cheẽ ndui si chõ mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherõ

⁵ Jesús que oso sucha tubiriã Capernaum cote ra. Soldado rerecua a mo ngue tu ñee ee ra. Capitán ngue ae ra.

⁶ —Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra.

⁷ —Taso embucherõ, i que Jesús echeẽ mose ra.

⁸ Capitán ngue ñee Jesús je ra. —Seicuãte aico co, Jesús. Sechuchua ra ereiquechĩ. Echeeño. Ndecheẽ achõ ño emondo serimba mbucherõ sacua.

⁹ Se abe sererecua riqui co. Echeẽ amumba aroneate quia co. Se abe soldados rerecua aico nguia co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra.

¹⁰ Echeẽ andu mose que Jesús nyuruirate ra. Ñee ngue nguesenda je ra. —Tacheẽ nyecua jẽje. Capitán ndiqui seicua tuchite co. Seicua tuchite equia judíos mo si co.

¹¹ Tacheẽ nyecua jẽje. Ae judíos eã emo jenda ja nae, ùquĩ tubiriã nda siqui Dios rese. Dios siqui mose mbi a rerecuarã. Ùquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ùquĩ.

¹² Dios quia ra judíos mombo itaicuee. Itondáruu. Huee ra nyeseo tuchi cote. Erasite ra huee cote, i que Jesús ñee judíos rĩĩ nda.

¹³ Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguia nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴ Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra.

¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que échao chao quia mbia chiurã cote ra.

Jesús mbia rasi chumumbara mbucherõ

¹⁶ Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ùqui ndurucuaẽ tuchi Jesús je. Aba checuayã ngue usẽ nguia mbia si Jesús cheẽ mose ra. Erasi chumumbara que mbucherõ cherõ tuchi quia ra.

¹⁷ Ûqui mose que Isaías cheẽ io cote ra. Eĩ ño ngue Isaías embesa cose ra: “Dios rucucha que nandeicuã sirõ nandesí ra. Dios rucucha que nanderasi sirõ nandesí no nda”, i que Isaías embesa ra. Ûqui ngue io cote ra.

Jesús rui taico, i raque emo

¹⁸ Mbía cuabête que Jesús mamate ra. Nyebe Jesús ñee nguia uchimbaaquiatu je. —Ñyao rá sobei, i rei que ee ra.

¹⁹ Aque mosete que embesasa mo ñee ee ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra.

²⁰ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguirei nguia equisa jiri no nde. Se quia sequisayã mbei re, i que Jesús ee ra.

²¹ Echimbaaquiatu mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra.

²² Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³ Jesús que ua canoa ye cote ra. Uchimbaaquiatu rese.

²⁴ Ama ndiit e re mose que quiririã icuã icuã ndu ee ra. I rebera que ique ique tuchi quia canoa ye ra. Jesús que uque oso quia canoa ye ra.

²⁵ Nyebe echimbaaquiatu Jesús mumba nguia. —Urembaaquiatusa, echumumba. Ureraaro nã. Nandemanochi nda re, i que ñee Jesús je ra.

²⁶ Jesús que ñee uchimbaaquiati u je ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe.

²⁷ Echimbaaquiatu que nyurui ra tuchi mae Jesús quiracuã ndese ra. —Quiririã echeẽ mumbayã ñochi. Ama abe echeẽ mumbayã ñochi, i que ñee ñee nyue cote ra.

Jesús aba checuayã icuã jea

²⁸ Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbía raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguia ùqui ñiangui re ra. Aba checuayã ño ùqui mbiacuã tuchi nguia. Nyebe mbía mo hue rurubiã mbei nguia.

²⁹ Ũquiŋgue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasí jei sacua ño erechu aa re? i que ñee tuchi Jesús je ra.

³⁰ Chiasu socoi tubiriãŋgue chi quiaru huee rurubi ra.

³¹ Nyebe aba checuayã icua ñee jate nguiã Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra.

³² —Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rí nda. Ama ndisha ye que echoi ja mano nda.

³³ Chiasu raarõsa mundite que ra. Mae mose erese. Nyoí que mbia mbiirandu jate chiasu rese ra. —Jesús que amei mbucherõ nda. Aba checuayãŋgue ejea esi ra, i que maesa erese ñee mbia ataque je ra.

³⁴ Nyebe hue jenda nyoí ja nguiã ñee Jesús je. —Eso rã urerecha urerecua si, i jate que hue such a jenda ñee Jesús je ra.

9

Jesús emi sayã mo mbucherõ

¹ Jesús que ua canoa ye cote ra. Nyoí que sobei ra. Ngasẽŋgue uchuchúaa cote ra.

² Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ũqui, i que Jesús ñee uchiangui re ra. Nyebe ñee nguiã emi sayã je. —Echimbía chõ, Echo. Ndechisaã mbae icua mbutiãŋguia ndesi a, i que Jesús ñee umi sayã je ra.

³ Embesasa que ñee nyue ra. —Jesús riqui Dios ibatenda rã naa ñochí co, i que ñee nyue ra.

⁴ Jesús que ũqui ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icua nde?

⁵ ¿Ma mbarangiatuã eã jiri jẽje re? ¿Mbia icua mbutiã esi ere? ¿Mbia rasi mbucherõ ere no? ¿Ma mbarangiatuã eã jiri jẽje re?

⁶ Dios rucucha rei se. Mbia chiao icua mbutiã aquiatu chõ se re. Sequirãcuã tateacuquia jẽje, i que Jesús ñee ee ra. Ñeeŋgue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra.

⁷ Emi sayãŋgue juã asi oso ra.

⁸ Mbia que nyuruira ja u mae emi sayã ngata rese ra. Mbia que ñee turã ja Dios quirãcuã ñi cot e ra.

—Serui bei eico, i Jesús Mateo je

⁹ Mateo, i que emo je ra. Ae que impuestos isi isi bei quia mbia rerecua mbaerã nda. Jesús que ngasẽ ee cote ra. Ngoí que huí plata isi isi impuestorã nda. —Serui bei eico, i que Jesús ñee ee ra. Ae Mateo juã oso nguiã eruí.

¹⁰ Emo mose que Jesús nyoí quiaru erese ra. Impuestos isi isiquia ata que chi quiaru erese huee ra. Echimbãaquiatu abe rese. Mbia icua mo abe que chi quiaru erese no nda.

¹¹ Fariseos que ñee icuãte Jesús chimbaaquiatu je ra. —¿Mbaerã Jesús riqui quiaru mbia icuãte rese re? i que ñee nda.

¹² Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no.

¹³ ¿Ã embesa ji jẽicuayãte re?

“Mbae mo jemee seje”, ae eã nguiã jẽje co.

“Jẽya eã ño mbia rese”, ae chõ nguiã jẽje co,

i que embesa ji ra. Ūquĩ embesa ji jēicua jiri ae. “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ñee ee ra.

Jesús chimbaaquiату hui ãte uchiu si

14 Juan ñimbaaquiату que ngasē ñee Jesús je ra. —Ure quia ureico nguiã hui hui urechiu si ã. Fariseos chimbaaquiату abe hui hui quia uchiu si no. ¿Mbaerã ndechimbaaquiату riqui hui ãte uchiu si ã nde? i que ñee Jesús je ra.

15 Jesús que ñee ee ra. —Sã emo ndiqui ngūinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. Sã eru riqui mano emo mose no. Aque mose quiату ra equiату hui uchiu si cote.

16 Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi ra cote.

17 Sã emo mbaeri rasi ramo nderecoquiату eã eriru ima ye no. Mbae ire ima ye ererecoquiату aronea ño ñene. Eri rasi ra ñimatã ño mbae ire ndoro. Eri ra uchē jā. Mbae ire abe mbiicuaṭe ra cote. Mbaeri yasu quia nda equerecoquiату nguiã mbae ire yasu ye. Soroã sacuã, i que Jesús ñee ee ra.

Jesús Jairo riirĩ mbucherõ; ari mo abe mbucherõ

18 Jesús cheē mose que judío rerecua mo ngasē ee ra. Jesús jii que ngoi ñee ee ra. —Qui seriirĩ si mano namote qui. Nyao rã erea. Ndeoco mose erese, quera si rae, i que ñee Jesús je ra.

19 Jesús que juã oso erese ra. Echimbaaquiуiату abe nyoĩ erese.

20 Ari rasi mo abe que oso quia mbia ite rĩ nda. Eruqui nda uchē mbei quia ee ra. Doce años nyee. Eruqui nda tibayã mbei ee ra. Ari que tu Jesús quite quiti erichã nda. Jesús irao ai rese que oco cote ra.

21 —Seoco mose Jesús irao rese ra acherõ, i nda ra.

22 Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, i que Jesús ñee ari je ra. Aque mose tuchi que eruqui tiba ee cote ra.

23 Jesús que ngasē nyee judío rerecua chuchua ra. Mbia que nyeseo seo quia ãquē ndaque rese ra. Mbia que irasei rasei eraaque tiquia nonde ra.

24 Jesús que ñee ee ra. —¡Qui jē! Jēso ja itaicuee. Eriirĩ mano eã ño nguiã. Uque chõ ñene, i que ñee mbia je ra. Mbia que iquia iquia echeē mose ra.

25 Jesús que mbia mondo ja chee itaicuee ra. Oso que i que eraaque rea cote ra. Eraaque o que eisi ra. Quera si que cote ra. Nyuruã ngue cote ra.

26 Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

27 Jesús que oso hue si cote ra. Mbia resayã nyeremo ngue nyoĩ eruĩ ra. Ñee mombo mombo que Jesús je ra. —¡Jesús! ¡David rucucha! ¡Ndeyayã ño urerese jē! i que ñee Jesús je ra.

28 Jesús que oso ique tuchúaa cote ra. Ae eresayã nyoĩ nguiã erurubi. Jesús que ñee ee ra. —¿Sequiracuã jembucherõ arõte rei nguiã jēje re? i que Jesús ñee ee ra. —Ae, i que eresayã ñee ja ee ra.

29 Ae Jesús oco nguiã eresa rese cote. —Seicua mose ra jaembucherõ, i que ra.

30 Eresa que nyerõ ja ee cote ra. —Sã mbia jiranua serese, i tuchi rei que Jesús ñee ee ra.

31 Eresayã ngue Jesús cheē mumba tuchi ra. Nyoĩ que mbia mbiirandu tuchi Jesús rese hue rĩ ja ra.

Jesús echeẽ nguĩã mbucherõ

³² Jesús so mose que mbia echeẽ nguĩã mo curucuaẽ ee ra. Aba checuayã icuã ngue siqui aque chiangui re ra.

³³ Jesús que aba checuayã icuã jea esi ra. Echeẽ nguĩã ngue ñee turã cote ra. Nyebe mbia tubiriãte chi nguĩã nyuruira mae erese. —Emo ngue ũquĩ saã eã mbeite quia aa Israel ra, i que nyuruira jate ra.

³⁴ Fariseos quiatu que ñee icuãte Jesús riĩ nda. —Satanás quirãcuã je chõ Jesús riqui nguĩã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵ Jesús que nyoï sucha mbuchesea sea ja ra. Mbiambaaquiato quiatu ja ra. Mbiamchumunua nuásaa jate. Dios cheẽ ngue esenei senei tuchi quia ee ra. Mbiamrasi chumumbara que embucherõ cherõ nguia ra.

³⁶ Mbiamrasi rasi tuchi que ee ra. Mbiamia eã tuchi que ee ra. Mbiamquiachã je rã ngue ee ra. Sã oveja riqui quiachã jate eraarõ iriã no. Eĩ si chõ mbiamnguĩã Jesús je. Nyebe Jesús ia eã tuchi riqui nguĩã ere.

³⁷ Jesús que ñee uchimbbaaquiato je ra. —Secheẽ andusa reã ndei etubiriã jiri. Secheẽ nenei neneisa quia rei co mĩ jiri.

³⁸ Jeñee nguia Dios je. “Dios, ndecheẽ nenei neneisa mo emondo tuchi. Mbiammbirandu randu sacuã”, jenyẽ chõ nguia Dios je. Sã mbaecha mbiammo mondo mbae a ireĩ ishao shao equiche mose no, i que Jesús ñee ee ra.

10*Jesús mbia doce irabo uchimbbaaquiaturã*

¹ Jesús que “jenyu” i uchimbbaaquiato doce je ra. Uquirãcuã ngue emee uchimbbaaquiato je cote ra. Aba checuayã icuã jea jea sacuã mbiamsi. Mbiamrasi chumumbara mbucherõ cherõ sacuã abe no.

² A ño echimbbaaquiato ã nde:

Simón (Pedro, i abe que mbiamquia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirĩ ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbiamicuã je ra.)

Ūquĩ ja que Jesús irabo ra.

Jesús uchimbbaaquiato doce mondo ucheẽ nenei nenei sacuã

⁵ Jesús que ũquĩ mondo ja ucheẽ nenei nenei sacuã nda. Emondo nonde que ñee ee ra. —Judíos achõ jembbaaquiato quiato quia. Jẽsochĩ nda judíos eã je. Samaria jenda chuchua abe ra jẽsochĩ.

⁶ Israel jenda chõ jembuchesea sea oso. Ovejas quiachã je rã ño Israel jenda re.

⁷ Jẽso mose, secheẽ jẽsenei senei mbei quia ee. “Mbiamrerecuarã tuchi ra Dios cote”, jenyẽ oso secheẽ nenei nenei judíos je.

⁸ Mbia ire rasi jembucherō cherō nguia. Mbia rasi chumumbara jembucherō cherō nguia. Mbia raaque abe jembuquera quera quia. Aba checuayā icuā abe jēja jea quia mbia si. Sequirācuā ngue amee ñooño jėje. “Mbae mo jemee na seje eribishorō”, ae eā tuchi se quia jėje co. Nyebe jē abe mbae turā jēsaā ñooño mbia je. “Mbae embu se”, iā mbia je.

⁹ Mbae mo nda jendaochĩ icua jēso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua.

¹⁰ Mbae riru mo abe ra jendaochĩ no. Jēirao nongue abe ra jendaochĩ no. Jēiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turā jēsaā saā nae, sã ũquĩ ae riqui jembuquiaru quiaru turā mingo.

¹¹ Jengasē mose sucha tubiriā mo, mbia turā mo jētea huee. Aque chuchua mii ño jēingo uque. Tuchua ra jembuchesea seate chĩ jēingo mose huee. Ae ra jengue nyii nae, hue tuchia bei chō jēingo uque.

¹² Jēique mose emo nyuchúaa, hue jenda je jeñee turā no. Saludar jenyete turā ee no.

¹³ Hue jenda siqui turā mose, Dios quirācuā jemee ee. Siqui turā eā mose, Dios quirācuā jēisibe esi.

¹⁴ Hue jenda jēisi sereā nea mose, jēhui chō esi. Hue jenda jeñee andu sereā mose, jēso chō hue si. Jēi tubi jembutomo tomo ee.

¹⁵ Tacheē nyecua jėje. Ae ra jeñee isi sereā nae, ũquĩ nda Dios mbasi tuchi. Uquiatoā nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereā nae, ũquĩ nguia ra embasi tuchi Sodoma jenda si. Gomorra jenda abe si.

Mbia icuā icuā tuchi ra jėje, i Jesús

¹⁶ A aico jemondo secheē nenei nenei sacuā mbia je a. Sã nyacua icuāte riqui oveja je no. Eĩ si ra mbia icuā icuāte jėje. Oveja seteā na ño jēingo. Jēaracua chō nguia jē! Sã mbei aracuate riqui no. Mbae icuā mo nda jēsaāchĩ jē. Sã nyurushi riqui mbae icuā naa eā mbeite no.

¹⁷ Jē! Sã jē! Mbia icuā icuāte ra jėje. Jembuiri iri ndae. Jemee mee icuā nda mbia rerecua je. Jēiruā nua nda mbia chumunuāsaa.

¹⁸ Mbia icuā icuāte ra jėje seriĩ. Mbia rerecua je ra jenderao icuā. Eĩ jenyete mbia rerecua mbiirandu randu seriĩ. Judíos eā abe mbiirandu randu seriĩ.

¹⁹ Jemee mose mbia rerecua je, pare pare jenyechĩ nda jē. “¿Manyae ra ũquĩ ñee ndibishorō nde?” jenyechĩ nda pare pare i jē. Dios ae chō nda jembucheē turā nuia nguia mbia je aque mose.

²⁰ Jē ae ra jeñee eā. Espiritu Turā ae nda jembucheē nguia mbia je.

²¹ Jenongue ra jemondo chee mbia icuā je. Jēiquia sacua. Jendu abe ra jemondo chee mbia icuā je. Jendiiri abe ra jemondo chee mbia icuā je. Mbia icuā nda jemo iquia iquia chee.

²² Mbia ra jēcuayā jate seriĩ. Ae ra siqui bei serese, ũquĩ nda Dios mingo bei.

²³ Mbia icuā icuā mose jėje sucha moo, jēso chō sucha tubiriā nonguee. Tacheē nyecua jėje. Achu jeibe ra se. Sucha Israel jenda jembuchesea sea ja eā mose chō nda achu je.

²⁴ Jengasu ra jēsaā saāchĩ sesi jē. Se chō jembaaquiatusa re. Embaaquiatusa quia ecuasu jiri echimbaquiatusa si re. Ererecua quia ecuasu jiri erimba si re.

²⁵ Coche jēingo nguia se rā si. Sã mbia icuā icuāte riqui seje no. Eĩ si ra icuā icuā jėje no. Sã mbia “Satanás” i ñee icuā seje no. Eĩ si ra ñee icuā icuā jėje no. Serimba je no.

Dios riqui jendeaquiato bei co

²⁶ Jësiquiche quichechĩ nda ñee icuã icuã je si jë. Ae mbia saã nyecuayã cuayã nguia nae, ũquĩ nda nyecua ja cote. Ũquĩ nda mbia icua ja cote.

²⁷ Ae riĩ aico ñee nyecuayã cuayã jëje nae, ũquĩ jësenei senei turã mbuchecua mbia je cote. Ae asenei senei nguia jëisaa nae, ũquĩ jësenei senei turã mbuchecua mbia je cote.

²⁸ Ae “taiquia” i quia jeni nae, jũquĩ si ra jësiquichechĩ jë! Ae aba mombo serite quia tata cuasu nae, aque si quiatu jësiquiche. Aque si quiatu jësiquiche tuchi jë.

²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareĩa nguireĩ mo si. Nguireĩ mo ngoi mose íbii, Dios riqui eicua jate ã.

³⁰ Dios riqui jë mii mii icua jate co. Jëa mii mii abe eicua jate quia co.

³¹ Jësiquichechĩ nda jë. Dios quiatu queteã tuchi nguia jendese nguireĩ mo si.

Jesús quiato chõ se re, jenyê checua chõ nguia mbia je

³² “Jesucristo quiato chõ se re”, ae i quia mbia je nae, ũquĩ nii nda acheẽ turã se abe. “Sequiato chõ ã nde”, ae ra Paba Ibatenda je.

³³ “Jesucristo quiato chõ se re”, ae i ãte quia mbia je nae, ũquĩ nii nda acheẽ turã eã se abe. “Sequiato eã ño ũquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jëje re? Tei. Achu chõ ngue mbia mbuchao chao nyesi resẽ. Mbia icuã icuã nda uchue serii. Emo emo nda siqui serui. Emo emo nda siqui icuã icuãte ee.

³⁵ Emo nda eicuãte ngu je serii. Cuña mo nda eicuãte usi je no. Acuanĩ mo nda eicuãte uchari je serii no.

³⁶ Tuchua jenda ra nyao nyao nyesi. Emo nda siqui serese serimbarã. Eataque ra nyao nyao esi.

³⁷ Ae nysecua tuchi quia ngu rese sesi nae, ũquĩ nda serimbarã eã. Ae nysecua tuchi quia usi rese sesi nae, ũquĩ nda serimbarã eã no. Ae nysecua tuchi quia nguiri ndese sesi nae, ũquĩ abe ra serimbarã eã no.

³⁸ Ae ra siquiã serui, ũquĩ nda serimbarã eã. ãe mano sereãte serii, ũquĩ nda serimbarã eã.

³⁹ Sã mbia nduate quia serese. Ae nduate quia nyiese nae, ũquĩ nda nyoi eãte ibate. Ae ndua eãte quia nyiese nae, ũquĩ nguia ra nyoi ibate.

Dios ra mbae turã mondo mbia turã je

⁴⁰ Ae ra eturã ndiqui jëje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguia.

⁴¹ Ae eturã ndiqui Dios cheẽ mbuchecuasa je nae, Dios ra mbae turã mondo ee. Sã mbae turã mee ucheẽ mbuchecuasa je no. Ae eturã ndiqui echia mbuquishĩ ji je nae, ũquĩ je abe ra Dios mbae turã mondo no.

⁴² Tacheẽ nyecua jëje. Emo sechimbaaquiato iseĩ mbiu turã mose serii, mbae turã abe ra Dios mondo aque je no, i que Jesús ñee uchimbaaquiato je ra.

¹ Jesús que hui ñee uchimbaaquiatu doce je cote ra. Aquere que esi Dios cheẽ nenei nenei hue rurubinda je cote ra.

² Juan ngue chĩ cárcel nda. Hue eñi mose que jirandu Cristo chisaã ndese ra. Uchimbaaquiatu nyeremo ngue emondo Jesús rea ra. Ñee sacuaã ee.

³—Jẽso ñee Jesús je. “ ‘Cristo ra tu’, i beite equia ã nae, ¿ae nde re? ¿Cristo ra uresaarõ arõ mbei quia re?” jenyee oso Jesús je, i que Juan uchimbaaquiatu mondo erea ra.

⁴ Jesús que ñee Juan nimba je ra. —Ae rese jemaee nae, ùquĩ jẽsenei oso Juan je. Ae jeñandu nae, ùquĩ abe no.

⁵ Eĩ jenyee chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheẽ turã ngue esenei senei tuchi quia mbaecha reã je ra”, jenyee oso Juan mbiirandu.

⁶ Emo hui eã mbei mose sesi, aque ia tuchi ra siqui cote, i que Jesús ucheẽ mondo Juan je ra.

⁷ Juan ñimondo que nyebi nyoĩ Juan ndea cote ra. Jesús que ñee mbia ja je Juan ñi cote ra. —¿Mbae rese mae jẽso turúquiaa re? ¿Quiririã idioi ichu ichu rese chõ jẽso mae nde? Quiririã ndese mae eã ngue jẽso rese.

⁸ ¿Emo irao turã ndese jẽso mae nde? Ûquĩ ndese eã ngue jẽso mae ndesẽ. Eirao turã siquiã nguiã turuquia ñi. Ae siqui quia mbia rerecua chuchua nae, ùquĩ nguia eirao turã ndiqui nguiã.

⁹ Juan ndese mae ño ngue jẽso turúquiaa resẽ. Dios cheẽ nenei neneisa tuchi chõ ae mbia mo si re. Ae chõ mbia mingoquiatu quiatu nguiã se ñee sacuaã mbia je.

¹⁰ Sã embesa ji riqui ñee no: Secheẽ nderaosa tamondo ndenonde.

Ae ra mbia mingoquiatu ndeje, nde ñee sacuaã ee, i que embesa ji ñee nda. Juan ñi ño embesa ji riqui nguiã ñee. Nyebe Juan ndu nguiã senonde.

¹¹ Tacheẽ nyecua jẽje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ùquĩ nguia ra i tuchi Juan si cote.

¹² Juan Dios cheẽ nenei nenei namo mosenda bei chõ mbia riqui nguiã ngaẽ ngaẽ Dios cheẽ andu ã. Mbua bite Dios siqui mose mbia rerecuarã.

¹³ Juan tu nonde chõ embesa ji riqui nguiã ñee j a serĩ. “Dios rucucha ra tu emo mose”, i serĩ. Sechu eã mose. Juan nane ngue “co eru quia co” i ñee nda.

¹⁴ Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñi ño eriqui nguiã ñee.

¹⁵ Jẽisa mose, jsecheẽ jeñandu turã na!

¹⁶ Mbua namonda siqui turã eãte quia aba cheẽ ndui ã. Mbua ririĩ na ño eriqui nguiã ã. Sã mbua ririĩ ndiqui ñibusareĩ sareĩ no.

¹⁷ Sã eriqui ñee ñee nyue no. “Flauta que ambucheẽ ñee ndei jẽje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue ambucheẽ ñee ndei jẽje resẽ. ¿Mbaerã jẽyate erese re?” sã i chõ mbia ririĩ nyue no. Ûquĩ na si chõ mbia riqui nguiã aba cheẽ mumba ã.

¹⁸ Juan el Bautista que tu rei mbia je ra. Mbua que eisi turã ã na. “Co eriqui quiaru sereãte nanderese co. Co eriqui mbae mbei sereãte nanderese co”, i chõ mbia quia ee ã. “Aba checuayã ndesenda”, i chõchĩ equia ee ã.

¹⁹ Aquere que achu se abe ra. Aquiaru rei nguiã jendese co. Mbae abe ambei rei nguiã jendese co. Se abe que seisi turãya nda. “Quiaru tuchi je”,

i chōchĩ seje. “Mbae mbeisa”, i abe que seje no nda. “Mbia icuã quiato chō ñene”, i chō ngue seje no nda. Ae earacuate nae, Dios aracua abe ra eicua.

Jesús ia eã mbia sucha tubirĩã jenda rese

²⁰ Ae mbia je Jesús uquirãcuã ndeacucua cuquia tuchi nae, ũquí ngue Jesús isi eã mbei ra. Nyebe Jesús riqui nguiã ñee asi asi mbia hue jenda je.

²¹ —Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbia mae sayã ngue asaã saã jêje nae, ũquí naa mose Sidón jenda je, eĩ nda Sidón jenda huicua secha rei. Eĩ nda Tiro jenda abe huicua secha rei. Eĩ nda eya eãte rei huicua ndese.

²² Jê nguia jêicuã jêsecha sereãte rei. Nyebe ra Dios jembasi mbasi tuchi ũquí si quiatu. Dios mbia icuã mbasi mbasi mose.

²³ Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbia mae sayã ngue asaã saã jêje nae, ũquí naa mose Sodoma jenda je, eĩ nda Sodoma jenda huicua secha rei. Eĩ nda Dios hue sucha cuasu mbutiã eã ndei.

²⁴ Jê nguia jêicuã jêsecha sereãte rei. Nyebe ra Dios jembasi mbasi tuchi Sodoma jenda si. Dios mbia icuã mbasi mbasi mose, i que Jesús ñee nda.

Jesús aba quenea mboseĩ

²⁵ Jesús que ñee Dios je cote ra. —Seyate aico nderese co, Paba. Ibi jenda rerecua ja chō nde re. Ibei jenda abe rerecua ja chō nde no nde. Ndecheẽ ngue erembuchecu a eã mbia aquiatu je ra. Mbia riirĩ naanguia je chō ngue ndecheẽ erembuchecua nguiã.

²⁶ ũquí ño ngue eturã ndeje ra, Paba, i que Jesús ra.

²⁷ —Seru que mbae mondo ja seje ra. Paba miĩ ño seicua tuchi nguiã. Paba riirĩ miĩ tuchi chō se re. Se miĩ ño Paba aicua tuchi nguiã no. Ae je ra Paba atacuquia nae, ũquí miĩ ño nda Paba icua tuchi nguiã serese.

²⁸ Jenguenea mose, jenyu chō seje. Jenguenea tamboseĩ na jêsi. Taambia mingo.

²⁹ Seseteã ño aico nguiã se. Aico mingue chō nguiã se co. Jeñimbaaquiatu jiri serĩ. Jeñimbucha chō serese. Eĩ jenye mose ra jeñia pare pare i eã cote. Jêya bei ra jêingo cote.

³⁰ Ae siqui serimbarã nae, ũquí iate riqui ã. Secheẽ mbaranguiatuã eãte aba je, i que Jesús ñee nda.

12

Jesús chimbaaquiatu mbae a ishao shao sábadu mose

¹ Sábado mose que Jesús si quia mbiaco ite ite rĩ emo mose ra. Echimbaaquiatu riãcuãte que eriqui ra. Nyebe que quiata a ucua miĩ miĩ nyoĩ quia ecuã mose ra. Equiti quitire oo je que echoi quia eachãaña cote ra.

² Fariseos mo ngue ñee ee ra. —¿Mbaerã ndechimbaaquiatu riqui mbae ishao shao sábadu mose re? Co mose chō mbia riqui uquenea ucua resẽ, i que fariseos ñee Jesús je ra.

³ Jesús que ñee ee ra. —¿Embesa ji rese jemaẽ eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda.

⁴ David que icue Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiatu ngue re. Sacerdote achō mbaerã ndaque mbichae.

⁵ ¿Moisés chimbese rese jemae áte sacerdote rñí nde? Sábado mose que quíe quíe rei Dios chuchua ra. “Dios cheë mumbasa”, i áte quia mbia nguiã ñee ee.

⁶ Tacheë nyecua jêje. Secheë nguiã i tuchi jiri nguiã Dios chuchua si co.

⁷ Co embesa ji jêicuayáte quia ã. “Sebite jêya eã jêingo mose mbia rese. Sebiãte ofrenda jemee ñooño mose”, i Dios quia co. Jêingo ùquí icuayáte ã. Eí nda jeñee icuã eãte rei mbia turã je.

⁸ Sábado rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra.

¹⁰ Huee que eo tomei mo ndiqui ee ra. Mbía que Jesús mbucheë icuã sete ra. Nyebe ñee nguiã ee. —¿Eicuãte erasi mbucherõ sábado mose re? ¿í ere? Echeë ure je jê, i que mbía ñee Jesús je ra.

¹¹ Jesús que ñee ee ra. —Sã jenimba oveja mo ndiqui jaã no. Ngoi oso ibicua mo ye no. ¿Sábado mose ra jenosë ibicua si re? Ae. Jenosë jei rae. Sábado mose raque.

¹² Dios queteamba tuchi chõ mbía riqui nguiã oveja si ã. Coche nandeico nguiã mbae turã naa naa sábado mose, i que Jesús ñee mbía je ra.

¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheë mose ra. Aque mosechi que eo nyerõ cote ra.

¹⁴ Nyebe fariseos paama i nguiã Jesús je. Mbía mbucherõ mose sábado mose. —¿Mañi nande ra Jesús je re? Nandeiquia rei ra rae, i tuchi que eu ñee nyue ra.

Isaiás chimbese ique Jesús rñí

¹⁵ Jesús que jirandu ùquí ñee ndese ra. Nyebe esi nguiã hue si. Mbía tubiriã ngue nyoí erui ra. Jesús que mbía rasi mbucherõ cherõ ja quia ra.

¹⁶ —¡Mbía ra jembiiiranduchí serese jê! i que Jesús ñee ee ra.

¹⁷ Aque mose que Isaiás chimbese ique cote ra. Eí ngue Isaiás embesa mii Jesús rñí nda:

¹⁸ Serimba chõ co re. Co que airabo ra. Sechesecua chõ ae re. Seyate aico erese co.

Espíritu Turã tamondo tuchi ee.

Ae ra secheë turã senei senei ja mbía je.

¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbía je.

²⁰ Siqui turãte ra equia equirãcuã nea je.

Siqui turãte ra equia eaquiãtuã je no.

Mbía ra siqui turã nyee erui ererecuã.

²¹ Mbía ja ra ndua turã mbei erese cote, i que Isaiás embesa cose ra. Ûquí ngue ique cote ra.

Aba checuayã quirãcuã Jesús quereco co, i raque mbía

²² Mbía que eresayã mo curucuaë Jesús je ra. Echeë aquiãtuãte abe que ra. Aba checuayã icuã nguiãtu ngue siqui nguiã echiãngui re. Jesús que embucherõ nda. Nyebe mae turã nguiã cote. Ñee turã abe cote no.

²³ Mbía que nyuruirã ja mae erese ra. —David rucucha chõ Jesús riqui re, i chõ ngue mbía quia ndua ndua ra.

²⁴ Fariseos que ehandu ja ra. Nyebe ñee icuã icuã nguiã Jesús je. —Ab a checuayã icuã nderecua tuchi chõ Satanás nde. Satanás quirãcuã je chõ Jesús

riqui nguiã aba checuayã icuã jea jea mbia si co, i rei que fariseos ñee icuã Jesús je ra.

²⁵ Jesús que ùqui ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno.

²⁶ ¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no.

²⁷ “Satanás quirãcuã je chõ Jesús riqui nguiã aba checuayã jea jea mbia si”, jenyẽ chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba je serese re?

²⁸ Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenyẽ eã ñochĩ equia ã.

²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co.

³⁰ Ae siqui ãte quia serese nae, eicuã ño ùqui ndiqui nguiã seje. Ae secheẽ senei senei eãte quia mbia je nae, ùqui icuã ño eriqui nguiã seje.

³¹ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã ñi, ùqui icuã nguia ra Dios mbutiã eã mbei esi.

³² Emo ñee icuã mose seriĩ, Dios echeẽ icuã mbutiã arõte. Emo ñee icuã mose Espiritu Turã ñi, ùqui icuã nguia ra Dios mbutiã eã mbei. Mbae ua ja mose chee ra Dios ùqui ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no.

³⁴ Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ùqui ñi sí ra ñee.

³⁵ Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã.

³⁶ Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose.

³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ùqui je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra.

³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenyẽ beite equia ã. Mbia mae sayã mii ño nda asaã jẽje. Jonás na si.

⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie.

⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose.

⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho si tuchi Salomón ñee andu no. Se quia acheẽ ndaque quia jêje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembsi tuchi mbia icuã ndea rea mose.

Aba checuayã icuã nyebi u mbia chiangui re

⁴³ Aba checuayã icuã usẽ mose emo ñia si, ngata bei chõ nguiã. “¿Mangue ra sequenea aucua que re?” i chõ nguiã. Uquenea ucua sacua mo etea eãte.

⁴⁴ “Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua ti ji raãte que ee ra.

⁴⁵ Aba checuayã icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que eriqui cote ra. Aba checuayã mii ngue siqui eye nyii ra. Etubiriãte cote. Aque icuã tuchi cote nyii si, i que Jesús mbia je ra.

Jesús nongue ngae erea usi resẽ

⁴⁶ Jesús ñee mbei mose que esi ngaẽ ndei ee huee ra. Jesús nongue ja rese. Chichõ ja chõ ngue taicuee ra. Ñee serete que ee ra.

⁴⁷ —Hue ndesi riqui nderequia taicuee huee. Ndenongue rese, i que emo Jesús mbiirandu ra.

⁴⁸ Jesús que ñee umbiirandusa je ra. —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús ñee nda.

⁴⁹ Jesús que o mee uchimbaaquiato cuti ra. —Ã je chõ aico nguiã “taĩ” i. Ã je chõ aico nguiã “senongue” i no.

⁵⁰ Ae Paba Ibatenda cheẽ mumbayã nguia nae, ũquĩ je chõ aico nguiã “senongue” i. Ũquĩ je chõ aico nguiã “taĩ” i no, i que Jesús ñee ee ra.

13

Emo mbae eĩ mombiquia mbiquia

¹ Aque mose sí que Jesús si usẽ tuchua si ra. Tuchua si que esi ngoi ama ndish a nimíaa nda.

² Mbia que ngaẽ ngaẽ ja quia Jesús rea ra. Nyebe Jesús ua oso nguiã ngoi canoa ye. Mbia quiatu que chichõ ama nimíaa ndese ra.

³ Jesús que embaaquiato quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no.

⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no.

⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene.

⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã.

⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi u eriquisã nda.

⁸ Sã emo ndiqui uqui uqui ibi túraã no. Ũquĩ nguiatu que ia turã nda. Sã emo ia cien no. Sã emo ia sesenta no. Sã emo ia treinta no.

⁹ Jêisa mose, ¡secheẽ jeñandu turã na!

Dios riqui ucheẽ mbiasa jaaja jêje co, i uchimbaaquiato je

¹⁰ Jesús chimbaaquiato que ñee nyecuayã Jesús ísaa ra. —¿Mbaerã ejemplos achõ eresenei senei mbia je re? i que echimbaaquiato ñee ee ra.

11 Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheẽ mbiãsa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheẽ mbiãsa eã jiri.

12 Emo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi.

13 Nyebe aico nguiã ejemplos achõ nenei nenei mbia je co. Eanduchõ sacua. Eicua turã ndocoĩ.

14 Mbia eanduchõ mose que Isaías chimbesa ique cote ra:

Mbia ra secheẽ ñandu raque.

Icuayã nguiatu rae.

15 Eãquĩ átãte riqui ã.

Secheẽ andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirõ eã mbei,

i que Dios cheẽ Isaías chimbesa rese ra.

16 Jê nguiatu Dios cheẽ jeñandu turãte nguiã ã. Jê nguiatu jemae serete nguiã Dios chiao rese ã. Nyebe jêyate jêingo nguiã ã.

17 Tacheẽ nyecua jêje. Ae jeñandu quia secheẽ ã nae, Dios cheẽ mbuchecua ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jê ae chõ jêingo nguiã eandu ã cote. Jê ae je chõ echecua riqui nguiã.

Jesús ucheẽ mbiãsa uchimbaaquiatu je mbae eĩ ñi

18 Secheẽ tambiasa jêje cote. Mbae eĩ mombiquia mbiquia ji riĩ.

19 Ae uqui uqui ñeenda rui nae, Dios cheẽ andu chooñosa rã ño ñquĩ nde. Icuã eãte quia ñene. Nyebe diablo ru nguiã Dios cheẽ ndirõ echiangui si.

20 Ae uqui uqui sita arõ nae, mbiã mo na ño ñquĩ no nde. Dios cheẽ andu mose, isi turã ndaque. Eyate raque erese.

21 Mbia icuã icuã mose ee Dios cheẽ ñi, hui jei chõ nguiã esi. Mbae rao eã naanguia chõ ñquĩ nde.

22 Ae uqui uqui nyu réndaa nae, mbiã mo na ño ñquĩ no nde. Dios cheẽ andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee.

23 Ae uqui uqui ibi túraã nae, mbiã mo na ño ñquĩ no nde. Ñquĩ nguiatu Dios cheẽ ñandu turã nguiã. Icuã icuã turã ño nguiã. Nyebe eriqui bei nguiã erese. Ia ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheẽ mbiãsa ñee nda.

Mbae icuã suri trigo turã ndese

24 Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ñquĩ na ño Dios rimba riqui nguiã ã.

25 Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no.

26 Trigo eĩ ngue obo cote ra. Nyu abe que suri erese ra.

27 Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra.

28 Ererecua que ñee ee ra. “Seucuãyãsa chõ ñquĩ nde. Nyu eĩ mombiquia mbiquia chõchĩ trigo eĩ mumbara mbara”, i que ererecua ñee nda. —¿Ureso ra eriqui riqui re? i rei que erimba ñee nguerecua je ra.

²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde.

³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao erereco quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no.

³² Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquia ndese. Eĩ si chõ Dios rimba re. Ũquiĩ mĩi ndaque nyii. Ñimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbaaquiato quiatu ejemplos je ra. Ejemplos achõ ngue esenei senei mbia mbaaquiato sacua nda.

³⁵ Nyebe Dios cheẽ mbuchecuasa chimbasa ique cote. Eĩ ño echimbasa re: Ejemplos je mbia tambaquiato quiatu. Ae mbia icuayã mbeite quia nae, ũquiĩ tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ ñii

³⁶ Jesús que mbia mondo ja cote ra. Aquere que esi ique tuchu a mo nda. Echimbbaquiato que ecurubite ñee ee ra. —Ae ejemplo eresenei mbia je nyu eĩ ñii nae, ũquiĩ embiasa jiri ure je, i que ñee ee ra.

³⁷ Jesús que ñee ee ra. —Ae trigo eĩ mombiquia mbiquia nae, se rã ño ae re.

³⁸ Ae ibii emombiquia mbiquia nae, mbia ja rã ño ũquiĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde.

³⁹ Ae mbae eĩ icuã mombiquia mbiquia nae, aba checuayã nderecua rã ño ũquiĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re.

⁴⁰ Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose no.

⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ũquiĩ sirõ ja.

⁴² Serimba ra ũquiĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi.

⁴³ Ae Dios mbaturã nae, ũquiĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiriĩ ñii ndei eturã tuchi mbae ja si. Eturã tuchi tesoro si no. Sã amei mo tesoro ati ji rea ibii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacua. Tesoro mĩi ndese ndua.

Dios cheë ndei perla turã na

⁴⁵ Dios cheë nguiirĩ nñi ndei eturã tuchi mbae ja si. Sã comerciante mo perlas turã ndequia requia no.

⁴⁶ Perla turã tuchite mo ndea mose, aque mñi ndese chõ eriqui nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷ Sira mbua mbua ji rã ño Dios rimba re. Sã emo tarafa mondo ii no. Sira chumumarate que embua ra.

⁴⁸ Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacuaã.

⁴⁹ Eĩ si ra Dios mbae ua ja mose. Dios ra ángeles mbu mbia icuã mombo sacuaã mbia turã si.

⁵⁰ Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi.

⁵¹ ¿Secheë jëicuate rei quia ã nde? i que Jesús ñee mbia je ra. —Ae, i que ñee Jesús je ra.

⁵² Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³ Jesús que ñqui ejemplos senei ja mbia je ra. Hue si que esi cote ra.

⁵⁴ Oso que ngasẽ nguecua Nazaret cote ra. Oso que mbia mbaaquiato judíos chumunuásaa ra. Nyebe mbia nyuruira tuchi nguiã ñee nyue. — ¿Mangue eriqui ñimbaaquiato tuchite re? Nandemae sayã esaã saã tuchichĩ nguia re.

⁵⁵ Ira mbitirõ tirõsa riirĩ ño ndaque. María abe riirĩ ño ndaque no. Jacobo nongue chõ ndaque. José abe no. Simón abe no. Judas abe no.

⁵⁶ Á echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra.

⁵⁷ Nyebe mbia hue jenda riqui Jesús isiteã nde. Jesús que ñee ee ra. —Dios cheë mbuchecuada ishonda cheë nguia ra mbia isi turã mbei. Nguecua jenda cheë achõ nguia ra eisi turã eã. Ngõngue cheë achõ nguia ra eisi turã eã no, i que Jesús ñee nguecua jenda je ra.

⁵⁸ Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

14*Mbia Juan el Bautista iquia*

¹ Mbia que jirandu ja Jesús rese cote ra. Herodes abe que jirandu erese ra. Ererecua que ae ra.

² Juan el Bautista Jesús riqui reĩ ee reaë. Ae que ñee ngũimba je Jesús rñi nda. —Sechiquia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús rñi nda.

³⁻⁴ Herodes que Juan isi icua nyii ra. Nyucua que mondo tarõ nda. Paama i nda Juan je ra. —iNde ndenongue ninisi erereco aroneate jê! i quiatu que Juan ñee ee nyii ra. Herodes siqui mose nõngue ninisi rese. Herodías, i que onongue ninisi je ra. Felipe, i que onongue je ra.

5 —Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheë mbuchecuaa, i chõ mbia nguiã Juan je. Nyebe Herodes siquiche jiri nguiã Juan iquiayã aque mose.

6 Herodes mbae cumpleaños mose, Herodías ririñ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra.

7 —¿Mbae ra amee ndeje re? Echeë ño seje. “Sebite co” nde i mose, aque tamondo ndeje. Acheë ñooño eã ño nguiã ndeje a, i que Herodes ñee nyucuaaque je ra.

8 Esi quia ñee ñee nguia nyucuaaque je nyii reaë. Nyebe nyucuaaque ñee nguiã Herodes je. —Juan el Bautista aquí emee na seje mbia chiuru riru ye, i que nyucuaaque ñee ererecua Herodes je ra.

9 Ererecua chosoi que oso serí tuchi echeë andu mose ra. —Acheëchí se quia ee. A seresenda chi ja quiaru serese a resë. Ñ seandu ja chõchí. Nyebe ra secheë ambuchebi eã ee, i que ererecua uchiangui re ra. —Juan aquí emee ee, i que ngũimba je cote ra.

10 —Juan aquí jendoso oso cárcel. Jemondo nyucuaaque je, i que ra.

11 —Juan aquí ngue ecurucuaë mbia chiuru riru ye cote ra. Mee ngue nyucuaaque je cote ra. Nyucuaaque que emee usi je cote ra.

12 Juan ñimbaaquiatu que ngaë Juan ndaaque rea ra. Nyati que suruchoi ra. Nyoí que Jesús mbiirandu erese cote ra.

Jesús mbichae tubiriã saã mbichae mñje

13 Jesús jirandu mose Juan ndese que esi turúquiaa ra. Ama ndui que esi canoa ye ra. Mbia que jirandu randu erese ra. Nyebe nyoí ja nguiã eruí ibi rí. Sucha ja ja jenda.

14 Jesús que usë canoa si cote ra. Mbia tubiriã ndese que mae nda. Eya eã tuchite que erese ra. Erasi que embucherõ cherõ nda.

15 Tenda nyesece mose que echimbaaquiatu ñee ndei ee ra. —Mbae ãte a turúquiaa. Tenda abe nyesece. Mbia emondo rá sucha tubiriã nia. Sã echoi beí uchirã isi, i rei que echimbaaquiatu ñee Jesús je ra.

16 —Sã echoi eã. Jeño mbae jemondo ee echirã, i que Jesús ñee ee ra.

17 —Teí. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresë, i que echimbaaquiatu ñee Jesús je ra.

18 —Jembu rá seje, i que Jesús ra.

19 Ñee ngue mbia tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbaaquiatu je ra. Echimbaaquiatu que emee mee mbia ja je cote ra.

20 Mbia que embuquiaru ja tuchi cote ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisë esique sique je ra.

21 Ae mbichae u sira rese nae, etubiriã tuchite que ra. Cinco mil ndobei. Cuña abe etubiriã. Mbia ririñ abe etubiriã no.

Jesús ngata i arõ

22 Aquere que Jesús uchimbaaquiatu mondo ja canoa ye ra. —Jẽ nane jẽso sobei. Mbia tambui turã na mondo uchuchúaa se nyii, i que ra.

23 Jesús que mbia tubiriã mbui turã mondo uchuchúaa cote ra. Ae ae que oso sita ibate rí cote ra. Ñee sacua Dios je. Huee que ae ae riqui itondaru chee ra.

²⁴ Canoa yenda que chi bei quia ama ite rĩ nda. Quiririã ngue tu icuã icuã ee ra. I rebera que tu asi asi tuchi ee ra.

²⁵ Ngaira cheẽ mose que Jesús ngasẽ ee ra. I arõ ngue esi quia ngata ra.

²⁶ Echimbaaquiato que mae erese ra. Echiã ngue cuaãcuã i tuchi ra. Ngata mose i arõ. —Aba checuayã ño tu nguiã aque, i rei que tasẽ tasẽ nda. Siquiche tuchi que ra.

²⁷ —Jësiquichechĩ nguiã. Se chõ nyeresẽ, i jeite que Jesús ñee ee ra.

²⁸ Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra.

²⁹ —Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde.

³⁰ Pedro mae mose quiririã icuã ndese que esiquichete ra. I que oso quia ñiimi nda. —¡Sererecua! ¡Senonosẽ na se! i que ñee Jesús je ra.

³¹ Ae Jesús o mondo nguiã eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra.

³² Ua mose canoa ye que quiririã tiba cote ra.

³³ Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jê! i que ee ra.

Jesús mbia Genesaret jenda mbucherõ cherõ

³⁴ Ngasẽ nyee que sobei cote ra. Genesaret, i que hue ibi je ra.

³⁵ Hue jenda que jirandu ja erese ra. Hue rurubinda abe que mbia mbiirandu erese ra. Mbia que er asi curucuaẽ cuaẽ ja Jesús je cote ra.

³⁶ —Sã mbia rasi oco oco rã ndeirao ai rese, i tuchi que mbia Jesús je ra. Ae oco erese nae, ùquĩ ngue nyerõ nyerõ ja ra.

15

Mbia chiangui renda ae chõ emb#icuã nguiã

¹ Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùquĩ ja re.

² Ùquĩ ngue ñee Jesús je ra. —¿Mbaerã ndechimbaaquiato riqui nanderamei ñee mumba mumba beite re? Eçoi quiiriã mbei chõ quiaru nguiã, i que ñee asite Jesús je ra.

³ Jesús que ñee ee ra. —¿Mbaerã jëingo Dios cheẽ mumba mumba jẽ nde? Jenamei ñee ndese chõte jëingochĩ nguiã ã. Siqui rocoĩ Dios cheẽ ndese.

⁴ Dios que ñee mbia je cose ra. “Jëturã ño jëingo jendu je. Jësi je abe no. Emo ñee icuã mose ngu rii, ùquĩ jëiquia. Emo ñee icuã mose usi abe rii no, ùquĩ abe jëiquia no”, i quia que Dios ñee mbia mbaaquiato cose ra.

⁵⁻⁶ Dios cheẽ jenyabi tuchi chõchĩ nguiã mbia mbaaquiato quiato ã. “Ae nda amee neĩ jêje, ùquĩ ngue amee ja Dios je ra”, i mose emo ñee ngu je, “coche ñene” jenyê chõchĩ nguiã ee. Mbae mee eã mose ngu je. Usi abe je. Nyebe jëingo nguiã mbia mbaaquiato icuã icuã ùquĩ. Jenamei ñee achõ ño jësenei senei nguiã mbia je ùquĩ. Dios cheẽ nenei nenei ndocoi ee.

⁷ Jëturã jësaã ñooño ño nguiã ùquĩ. Jeni tuchi chõ ngue Isaías embesa nguiã cose. Eĩ ngue Isaías embesa cose ra:

⁸ ã mbia ñee turã ndaque quia seje ã. Uchiangui re quia eriquiãte nguiã serese ã.

⁹ Ñee turãte raque equia seje ã.

Amei ñee achõ ño esenei seneichĩ nguiã mbia je.

Dios cheẽ mii nenei nenei ndocoĩ ee,
i que Isaías embesa jeni nda, i que Jesús ñee ucuasu raã naasa je ra.

¹⁰ —Jenyu rã secheẽ andu, i que Jesús ñee mbia tubiriã je ra. —Secheẽ jëicua rã jeñiangui re.

¹¹ Mbia chiũ embiũcuã eã nguiã. Echiangui renda chõ embiũcuã nguiã. Echiangui renda chõ usẽ nguiã echuru rĩ echeẽ mose. Ũqui ño embiũcuã nguiã, i que Jesús mbia mbaaquiату ra.

¹² Echimbaaquiату que ngaẽ ñee Jesús ísaa cote ra. —¿Ereicuayãte ere? Ndecheẽ ngue fariseos mbupaama ite ra, i que echimbaaquiату ñee nye-cuayã ee ra.

¹³ Jesús que ñee ee ra. —Ae ira Paba Ibatenda chutã eã nae, ũqui nda esiqui ja erao resebe. Ũqui ira rã ño fariseos riqui nguiã ã.

¹⁴ Eresayã na ño fariseos riqui nguiã. Sã eresayã mo “ñeenda tateacuquia jêje” i raque emo je no. Quiachã ja chõ ndae, i que Jesús ñee ee ra.

¹⁵ Pedro que ñee ee cote ra. —Erecheẽ ngue namo, “ũqui nda mbia mbiũcuã” ere que, ũqui embuchecua rã ndecheẽ ure je, i que Pedro ee ra.

¹⁶ Jesús que ñee ee ra. —¿Jê abe jëicuayãte quia re?

¹⁷ Ae mbia u quia nae, oso chõ nguiã erie ye. Echiique rui chõ eriqui nguiã oso oso. Usẽ nyee.

¹⁸ Mbia chiangui renda chõ embiũcuã nguiã usẽ mose echuru rĩ.

¹⁹ Aba chiangui renda quia aba mundua icuã icuãte nguiã. Nyebe mbia riqui nguiã emo iquia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icuã icuã no.

²⁰ Mbia chiangui renda ja chõ ũqui nde. Ũqui ño mbia mbiũcuã icuã nguiã ũqui ao ao mose. Uchoi quiiriã mose quiaru, ũqui nguia ra mbia mbiũcuã eã, i que Jesús ñee nda.

Ari mo Jesús icua

²¹ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no.

²² Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. ¡Ndeyayã ño serese jê! Aba checuayã icuã ndiqui seriirĩ mbasi mbasi co, i tuchi que ari ñee Jesús je ra.

²³ Jesús que ñee ãte ee ra. Echimbaaquiату que ngaẽ ñee Jesús je ra. —Ari emondo chõ uchuchúaa. Eñi mbeichĩ ñee nande je a, i que echimbaaquiату ñee Jesús je ra.

²⁴ Jesús que ñee ee ra. —Sã ovejas mo quiachã no. Ũqui na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra.

²⁵ Ari que tu ngoi ngúã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra.

²⁶ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra.

²⁷ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seriirĩ embucherõ seje ae, i que ari ñee ee ra.

²⁸ —Seicuate equia co, Ari. Nderiirĩ tambucherõ ndeje, i que Jesús ñee ari je ra. Aque mosechi tuchi que eriirĩ nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia ndui ra. Ama Ndisha Galilea nimia ndui. Hue si que esi sita ibate cote ra. Huee que ngoi huee ra.

³⁰ Mbia que ngaë ngaë tuchi quia ee huee ra. Erasi chumumbara rurucuaë cuaë tuchi ee. Ecuatayã. Eresayã. Echeë nguïã. Eo icuã. Mbia que ùquï ndasi chono ja Jesús i jii ra. Jesús que ùquï mbucherõ ja ra.

³¹ Nyebe mbia riqui nguïã nyuruira tuchi mae erese. Echeë nguïã ñee turã mose. Eo icuã mbufurã mose. Ecuatayã ngata turã mose. Eresayã mae turã mose. Nyebe mbia ñee turã ja nguïã Dios ríí.

Jesús mbichae tubiriã saã mbichae mii je

³² Jesús que ñee uchimbaaquiato ísaa cote ra. —Seyayãte aico ã mbia tubiriã ndese co. A echi arete serese tres días a. Embae mo eãte echurã aa. Eriãcuã amondo sereãte echuchúaa. Eriãcuã nda eiquia ñeenda cúa, i que Jesús ra.

³³ Echimbaaquiato que ñee ee ra. —Turúquiaa chõ nandeico a resë. ¿Mañi nda aba ã mbuquiaru ja re? Mbae eã tuchi te a resë, i que echimbaaquiato ñee Jesús je ra.

³⁴ —¿Manya mbichae jembae re? i que Jesús ee ra. —Siete mbichae. Sira ñetë mo ndese, i que ee ra.

³⁵ Jesús que mbia mbucoi ja íbii ra.

³⁶ Mbichae que eisi ja o je ra. Sira ñetë abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbaaquiato je cote ra. Ùquï ngue emee mee mbia ja je cote ra.

³⁷ Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisë nyee ra.

³⁸ Mbichaecua rei mbia cuatro mil. Cuña abe abe. Mbia riirí abe abe no.

³⁹ Jesús que mbia mondochoi ja cote ra. Jesús que ua canoa ye cote ra. Oso que Magdala quiti cote ra.

16

Mbia mae sayã eteacuquia ure je, i fariseos

¹ —Tã nande rã Jesús je, i que fariseos ñee nyue ra. Saduceos rese. Nyebe ùquï ngaë nguïã ñee Jesús je. —Mbia mae sayã esaã na ure je. ¶ nda “Dios chumbu” ure tuchi ndeje, i rei que ñee Jesús je ra.

² Jesús que ñee ee ra. —Ibei jëicuate raque ùquï. Ibei ireí ndese jemaee mose eresaitõ, “ama nda nyaaquíã” jenyee chõ nguïã eicua.

³ Ibei ireí ndese jemaee mose eresaitõ ndabe, “nyaaquí rae”, jenyee chõ nguïã eicua ùquï no. Ibei jëicuate raque quia ã. Ae Dios teacuquia jëje nae, ùquï jëicuayã mbei chõchí nguia ã. Ae ra tu icuãte mbia je nae, ¿mbaerã jëingo ùquï nguia tu icuayãte re? ¿Mbaerã jëingo jëaracua raã naa nde?

⁴ Mbia icuã ja chõ ã nde. Ae siqui ibi rí namo nae. Hui jate equia Dios si ã. “Mbia mae sayã esaã ure je”, i chõchí equia seje ã. Aque mii nda asaã jëje. Jonás na si ra asaã jëje, i que Jesús ñee nda. Oso que erecha cote ra.

Fariseos mbia mbaaquiato icuã, i Jesús

⁵ Jesús chimbaaquiato que uchurã curuchoi eã nda. Tesarei que esi nyoi mose sobei ra.

⁶ Jesús que ñee ee ra. —Mbichae mbuchimatãsa rã ndei fariseos cheë. Saduceos cheë abe no. Ùquï ñee ndese ra jëingochí jë, i que Jesús ee ra.

7 —Mbichae quiatu ngue nanderuã nguiã. Nyebe eriqui nguiã ñee nande je ùqui, i rei que echimbaaquiato ñee nyue ra.

8 Jesús que echeë ñee icuate ra. Nyebe ñee nguiã ee. —¿Mbaerã jëingo “mbichae nanderuãchĩ” i re? ¿Mbaerã jëingo seicuayâte re?

9 Ae riĩ aico ñee jêje nae, ¿ùqui jëicuayã mbeite quia re? Se mbichae mbeta mose ¿ùqui si jêtesarei chõ nde? Cinco mbichae mbeta mose mbia cinco mil je, ¿mánya iru jemombisê mbichae sique sique je re?

10 Siete mbichae mbeta mose mbia cuatro mil je ¿mánya iru jemombisê mbichae sique sique je no?

11 Secheë mose jêje nyii, “mbichae mbuchimatãsa rã ndei fariseos cheë”, i mose jêje, secheë jêicua rã. Mbichae riĩ aico ñee âte jêje co. Fariseos cheë ndese jëingo eã sacuañ ño aico nguiã ñee jêje. Saduceos cheë ndese abe jëingo eã sacuañ, i que Jesús ra.

12 Echimbaaquiato que eicua chee ra. —Mbi chae mbuchimatãsa riĩ eã ño eriqui ñee nande je re. Ae fariseos senei senei icuã nguia mbia mbaaquiato nae, ùqui ñi ño eriqui ñee nde. Saduceo ñee ñi abe no, i que echimbaaquiato eicua ramo cote ra.

Cristo chõ nde resê, i Pedro Jesús je

13 Jesús que nyoĩ Cesarea de Filípoo cote ra. Huee que ñee uchimbaaquiato je cote ra. —Mbiarã ngue achu íbii ra. ¿Aba aico reĩ se mbia je re? i que Jesús ñee ee ra.

14 Echimbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Jeremías ereico reĩ nguiã emo je no. Dios cheë nenei neneisa mo ereico reĩ nguiã emo je no, i que echimbaaquiato ñee Jesús je ra.

15 —¿Aba aico reĩ jêje co re? i que Jesús ee ra.

16 —Cristo chõ nde resê. Dios riiriñ ño nde resê, i que Pedro ee ra.

17-18 Jesús que ñee Pedro je cote ra. —Ndeyate ereico co, Simón. Mbía mo nemiirandu eãte quia serese co. Paba Ibatenda mñi ño nemiirandu nguiã serese. Jonás ndiiriñ ndei nde. Tacheë tuchi ndeje. “Pedro” i chõ equia ndeje co. “Sita” i ñi Pedro je re. Aque sita arõ ño nda sembae iglesia achao. Satanás nda esiquisã eãte. Satanás quirãcuãte raque. Mbía iquiasa raque ae no. Ae ra sembae iglesia siquisã eã mbei.

19 Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbía ique sacuañ. Ae je ra erembuqui ata, ùquiñ nda ique. Ae je ra erembuquiata eã, ùquiñ nda ique eã, i que Jesús ra.

20 Jesús que ñee uchimbaaquiato ja je cote ra. —“Jesús rei Dios chimondo” jenyechĩ nda emo mbiirandu jê, i que ee ra.

Mbía ra seiquia, i Jesús

21 Aque mose bei que Jesús umano nonde senei senei uchimbaaquiato je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra.

22 Pedro que Jesús querao pe jiri ñee sacuañ ee ra. —Mbía ra jêi jêichĩ ndeje jê. Mbía ra ndeiquiachĩ jê, i rei que Pedro ñee asi ee ra.

23 Jesús que uba ñee Pedro je ra. —Ehui chõ sesi, Satanás. ¿Mbaerã ereico seriquisã quisã nde? Mbía ndua rã ño ereico nguiã ndua. Dios ndua rã eã, i que ñee Pedro je ra.

²⁴ Jesús que ñee uchimbaaquiato je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote.

²⁵ Emo ndua bei mose nguenco rese, ereco ra ua esi. Emo hui mose nguenco si seje, ñquĩ nda siqui bei.

²⁶ Emo nguenco mumba chooño mose, eya eã mbei rae. Mbaecha rete raque. Emo nguenco mumba chooño mose, mbae mo eãte ereco ribishorõ sacua.

²⁷ Dios ra sembu si íbii uquirãcuã je. Ibatenda rese ra achu ángeles. Ae mbae turã saã saã nguia nae, ñquĩ je ra mbae turã amondo se tu mose. Ae mbae icuã saã saã nguia nae, ñquĩ je ra mbae icuã amondo no.

²⁸ Tacheẽ nyecua jêje. A jengu a nae, jemo nda jemaẽ sechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

17

Jesús nyĩcuabo uchimbaaquiato rêsaa

¹ Tenda seis uare que Jesús uchimbaaquiato mo nderao sita ibátee ra. Pedro. Jacobo. Juan abe no. Jacobo nongue rei Juan. Ñquĩ ngue equerao ja mbia tiãsaã ra.

² Jesús que nyĩcuabo erêsaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshĩ nininya tuchi que ee ra.

³ Mbia nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra.

⁴ Pedro que ñee Jesús je ra. —Sembaaquiatusa, nandecu turãte a. Sucha ñetẽ uresaã saã na, ndebi mose. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra.

⁵ Pedro cheẽ mosete que ibeishĩ ndu eite ñi nda. Abamo ñee mo ngue ehandu ibeishĩ qui re ra. —Co rei sebi tuchi seririĩ co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re ra.

⁶ Echimbaaquiato que siquichete eandu mose ra. Echeẽ mose que echoi nyaara nguẽ quiti ra.

⁷ Jesús que esiichã oco oco erese ra. —Jêhuã na. Jêsiquichechĩ nda jê, i que ñee ee ra.

⁸ Echimbaaquiato soboiba mose que mae Jesús miĩ ndese cote ra.

⁹ I euaẽ nguia nguichi mose sita ibate si que Jesús ñee ee ra. —Ae rese jemaẽ namo nae, ñquĩ nda jêsenei seneichĩ emo je jê. Seraaque quera si mose, aqe mose ramo ño jêsenei senei mbia je cote, i que Jesús ñee ee ra.

¹⁰ Echimbaaquiato que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra.

¹¹ Jesús que ñee ee ra. —Ae bei. Coche Elías rane tu nguã mbae mbitorõ ja.

¹² Elías que tu ra. Mbia que eicuayãte ra. Mbia icuã icuã jate que eriqui ee ra. Eĩ si ra mbia icuã icuã seje no, i que Jesús ee ra.

¹³ Echimbaaquiato que Jesús cheẽ icua ramo cote ra. —Juan el Bautista riĩ ño eriqui ñee nde, i que Jesús cheẽ icua ramo cote ra.

Jesús aba checuayã jea mbia riirĩ mo si

¹⁴ Ngasẽ ngue mbia ja je cote ra. Emo ngue ngoi ngũĩã ndese ñee Jesús je ra.

15 —Seriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite.

16 “Seriirĩ embucherõ na”, ae rei ngue nguiã ndechimbaaquiātu je. Mbia mbucherõ aquiātuã ño eriqui re, i que eru ñee Jesús je ra.

17 Jesús que ñee cote ra. —¿Mañi jenyenye quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ra. —Eriirĩ jendu rã seje, i que cote ra.

18 Jesús que ñee asite aba checuayã je cote ra. Aba checuayã ngue usẽ eriirĩ si cote ra. Aque mose tuchi que eriirĩ nyerõ cote ra.

19 Aquere que echimbaaquiātu ñee Jesús ísaa ra. —¿Mbaerã ureico aba checuayã jea aroneate mbia si re? i que ñee Jesús je ra.

20 Jesús que ñee ee ra. —Seicuayãte jiri quiātu nguiã ã. Tacheẽ nyecua jẽje. Sã mostaza eĩ ñetẽte riqui raque no. Jẽ seicua ñetẽ mose, mbae ra asaã ja jẽje. “Eso pe jiri”, jenyenye mose co sita ibate je, siri ra oso pe jiri jeñee nguire. Jẽ seicua mose, mbae jẽ saã ja arondete.

21 Aba checuayã ngue ajea namo, ũquí nda jẽjea eã jeñee eã mose Dios je. Ũquí nda jẽjea eã, jẽhui eã mose jenyũ si, i que Jesús ñee ee ra.

Mbia ra seiquia, i si Jesús

22 Galilea rĩ ngue Jesús riqui ngata uchimbaaquiātu rese ra. Jesús que embaaquiātu quiātu quia ra. —Mbiarã ngue achu ra. Mbia ra semee mbia icuã je.

23 Mbia icuã nda seiquia. Tres nyaashĩ mose r a aquera si, i que Jesús ra. Echimbaaquiātu ia eã tuchi que echeẽ mose ra.

Jesús mbae isiquia mondo impuestos pagar i sacuã

24 Ngasẽ ja que Capernaum cote ra. Ae impuestos isi isi quia Dios chuchua jenda nae, ũquí ngue nyoi ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra.

25 —Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —I ere, Pedro. ¿Aba je mbia rerecua riqui “impuestos jemee na seje” i re? I eã nda nguiirĩ je. Mbiamo je chõ nda ñee nguiã, i que Jesús ee ra.

26 —Ae. Mbiamo si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ.

27 Dios riirĩ ndaque se. Impuestos nandemee ndei Dios chuchua jenda je. Sã mbia ndua icuã eã nande rese. Quiātu ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacuã. Nembae sacuã abe no, i que Jesús ñee Pedro je ra.

18

Ererecua tuchi ra se, i jaaja Jesús chimbaaquiātu nyue

1 Aque mose que echimbaaquiātu ñee jate Jesús je ra. —¿Aba ra ererecua tuchi ure nderese re? i que ñee Jesús je ra.

2 Jesús que ãquẽ mo mbucoi mĩ eite re ra.

3 Ñee ngue mbia je cote ra. —Tacheẽ nyecua jẽje. Dios quiti jemba eã mose ra jenderecua eã mbei Dios. Mbia riirĩ na jẽingoã mose ra jenderecua eã mbei Dios no.

4 Ae siqui quia cocheete nae, ũquí nda mbia rerecuarã nyee Dios rese. Ae siqui quia mbia ririĩ n a nae, ũquí nda mbia rerecuarã nyee Dios rese.

5 Ae eturã ndiqui mbia ririĩ je seriĩ nae, seje abe chõ eturã ndiqui nguiã.

Mbae icuã nda nandesã uquiachã emo je

6 Ae ra mbae icuã saã uquia seicuasa mo je nae, ũquí nda mbae rasi saã tuchi cote. Ũquí nda aba mombo chõ ama ndisha ye nyii re chã. Sita resebe ecua ji mondo. † nda mbae icuã naa uquia eãte rei seicuasa je.

7 Mbae icuã nguiarei siqui bei tuchi mbia mbeicuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquí nde. Ae “mbae icuã esaã” i nae, ũquí nda mbae rasi saã tuchi cote.

8 Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mii nderequia, siqui bei sacuaã huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei mii nderequia, siqui bei sacuaã huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no.

9 Nderesa nemingo mose mbae icuã ndese, nderesa echoo. Coche rei ra ereso ibate nderesa mii nderequia. Nemombo rocoĩ tata cuásuu, nderesa nyeremo nderao.

Oveja quiachã je

10 Seririĩ ñetẽ mo nda jẽucuyãchĩ jẽ. Angeles riqui eraarõte ã. Angeles riqui Paba rese ibate pe.

11 Se que achu quiachã je rea ra.

12 Sã emo nimba quiachã oveja no. Cien ndei ngue erimba re. Co mii ngue quiachã ee ra. Aque esi quia quiachã je requia aque. Eataque recha. Noventa y nueve recha.

13 Tacheẽ nyecua jẽje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si.

14 Sã jendu ibatenda abe no. —Sã aque mii quiachã eã seririĩ ñetẽ mo, i chõ Dios nguiã co.

Emo mbae icuã naa mbei mose ndeje, etesarei sarei bei chõ

15 Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee eísaa. Ndecheẽ andu turã mose, nderesenda que eremitirõ turã nda.

16 Ndecheẽ andu sereã mose, emo abe erao ñee sacuaã ee. Aque mii nda reae. Nyeremo nda re no ae. Ũquí abe ñee sacuaã ee. Jeñee ja mose ee hue rĩ ja, jẽandu turã arõte.

17 Ũquí andu sereã mose, jeñee mbia chumunuásaa cote. Sã mbia ñumunua je ñee ja ee. Ũquí ñee andu sereã mose, jemombo chõ cote. Dios quiatoã naanguia jesaã ño ee cote. Mbia icuã naanguia jesaã ño nguia ee cote.

18 Tacheẽ nyecua jẽje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no.

19 Tacheẽ nyecua jẽje. Jẽ nyeremo ndua turã mose hue rĩ sí, “co embu ure je” jenyeturã ja mose Dios je, Paba Ibatenda ra emondo jẽje.

20 Jẽ nyeremo ñumunua mose seriĩ, aico chee nguiã jendese jẽite re huee, i que Jesús uchimbaaquiato je ra.

21 Pedro que ñee Jesús je ra. —Seresenda icuã mbei mose seje ¿manya veces ra atesarei eicuã si re? ¿Siete veces ra re? i que Pedro ra.

²² Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jêtesarei

²³ Sã ererecua mo ndiqui no. Dios rã si chõ ererecua re. Sã ererecua a cuenta raã naa ja ngũimba je no.

²⁴ Cuenta raã naa mose que erimba mo ndurucuaẽ ee ra. Aque que deber i tuchi quia ee ra.

²⁵ Mbae ãte que erimba mbae pagar i sacuaã nda. Nyebe ererecua ñee nguiã. “Embae je vender nande ja rã. Eriirĩ abe je vender nande. Eninisi abe no. Ae abe je vender nande. † nda cuenta ua jiri”, i rei que ererecua ñee nda.

²⁶ Erimba ia eã tuchi que echeẽ andu ra. Ngoi que ngũĩã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra.

²⁷ Ererecua ia eã tuchi que erese ra. “Mbae emondo eã ndei seje pagar i sacuaã”, i chõ nyee que ee ra. Hui chõ nyee que esi ra.

²⁸ Erimba que usẽ ndei oso quia ra. Aque mosechi que ngasẽ nguesenda mo je ra. Deber i miite rei ee reaẽ. “Pagar ere rã seje”, i que echosoi isi ra.

²⁹ Eresenda que ngoi ngũĩã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra.

³⁰ “Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaã ee.

³¹ Eresenda ataque ia eã tuchi que mae erese ra. Nyebe echoi nguiã ñee ererecua je.

³² Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, ùqui ñi ngue acheẽ eãte ndeje. Seya eãte que nderese nde ñee mose seje nyii.

³³ ¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra.

³⁴ Ererecua que paama i tuchi ee ra. “Jêiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiату quiatu ra.

³⁵ —Eĩ sí ra Paba Ibatenda paama i jêje, jêtesareiã mose jendesenda icuã si, i que Jesús mbi a je ra.

19

Jesús ñee mbia ngũinisi mombo je ri

¹ Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re.

² Mbia que nyoĩ ja tuchi quia eruĩ ra. Huee que mbia rasi mbucherõ cherõ tuchi ra.

³ Fariseos mo ngue nyoĩ Jesús rĩichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngũinisi jea ubiã mose re? i que ñee Jesús je cote ra.

⁴ Jesús que ñee ee ra. —¿Embesa ji rese jêingo mae ãte re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda.

⁵ Nyebe ra emo ndiqui ngũinisi rese bei. Ngu si isho. Usi si abe no. Ngũinisi rese siqui bei sacuaã. Co mĩ na siqui sacuaã nyiese”, i ñi embesa ji re.

⁶ Nyeremo siqui rã eã ño cote re. Co mĩ siqui rã ño ùqui cote re. Ae Dios mbucha nyiese nae, sã ùqui huĩ eã mbei nyesi, i que Jesús ñee ee ra

7 Fariseos que ñee ee cote ra. —¿Mbaerã Moisés ñee ùquĩ nde? “Jeninisi jea nonde, papel mbesa je jemondo ee”, i ee re, i que ra.

8 Jesús que ñee ee ra. —Jëaquë àtate quiatu ngue re. Nyebe Moisés embesa nguiã jëje ùquĩ. Ùquĩ i àte que Dios mbia ao ramo mose nyii ra.

9 Ae ngüinisi jea nae, eninisi siquiã ndaque emo ndese, eicua tuchi chõ ùquĩ nde. Ae ngüinisirã mo ndeabe mose, adulterio i que ùquĩ je ra, i que Jesús ñee ee ra.

10 Echimbaaquiato que ñee ee ra. —Mbaeiaie mose ngüinisi jea mose ¿mbaerã nguiatu ra ngüinisirã ndea re? i rei que echimbaaquiato ñee nda.

11 Jesús que ñee ee ra. —Mbia ja riqui ùquĩ eicua eãte ã. Ae Dios mbaaquiato quiatu nae, ùquĩ mii ño siqui nguiã eicua ã.

12 Ae eninisi sereã mbeite nae, ùquĩ nda siqui turã, eninisiã ndaque rae. Emo nyia o ji mose, ùquĩ abe ra siqui turã, eninisiã ndaque rae. Emo ngüinisirã nderequia eã mose Dios riĩ, ùquĩ abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi turã turã

13 Mbia que nguiirĩ ngurucuaë cuaë nguia Jesús je ra. Jesús o noono sacuaë eãquĩ arõ. Jesús ñee sacuaë Dios je eriĩ. —¿Mbaerã jendiirĩ jendu quia co re? i rei que Jesús chimbaaquiato ñee mbia je ra.

14 Jesús que ñee nda. —Tei. Jëhui chõ esi. Sã nguiirĩ ndurucuaë cuaë seje. Eĩ ño Dios rimba nguiã. Ucuasu raã naa eã. Mbia riirĩ na, i que Jesús ñee ee ra.

15 Jesús que o chono ñono mbia riirĩ arõ nda. Aquere que esi ngata cote ra.

Acuanindu mbaecha mo ñee Jesús je

16 Acuanindu mo ngue tu ñee Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaë nde? i que ñee Jesús je ra.

17 Jesús que ñee ee ra. —¿Mbaerã ereico eturã i seje re? Dios mii ño eturã ndesë. Nde ndeico beise mose, Dios cheë emumbayã ja, i que Jesús ñee e e ra.

18 —¿Mbae ra amumbayã Dios cheë nde? i que acuanindu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheë ñooñochĩ nda emo niĩ.

19 Ndeturã ño nderu je. Ndeturã ño ndesi abe je. Sã erechesequa ndechiese no nae, eĩ ere si chõ nyesequa nde ji jenda rese”. Dios cheë ja chõ ùquĩ nde. Mbia echeë mumbayã sacuaë, i que Jesús ñee acuanindu je ra.

20 Acuanindu que ñee ndei ee ra. —Ùquĩ ngue amumbayã ja bei quia ra. Señetë mosenda bei. ¿Mbae mo abe ra asaã nde? i que acuanindu ñee Jesús je ra.

21 Jesús que ñee ee ra. —“Taico turã tuchi”, nde i mose, ã abe esaã. Nmbae emondo mondo ja mbia mbaecha reã je. Nde ùquĩ naa mose, mbae tubiriã nda nmbae, ndeico mose ibate. Nmbae mondo ja mose mbaecha reã je, serui eico cote, i que Jesús ee ra.

22 Acuanindu Jesús cheë andu mose que echosoi oso serite cote ra. Eyayãte que oso ra. Mbaecha tuchite quiatu ngue ae re.

23 Jesús que ñee echimbaaquiato je cote ra. —Tacheë nyecua jëje. Mbaranguiatu àte mbaecha je ngasë sacuaë ibate siqui bei sacuaë huee.

24 Sã ticuas mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra.

²⁵ Echimbaaquiatsu que nyuruira tuchi echeẽ andu ra. —¿Aba quia ra oso Dios rea ibate re no? i que echimbaaquiatsu Jesús je cote ra.

²⁶ Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra.

²⁷ Pedro que ñee Jesús je ra. —Ure que urembae uresech a ja ra. Siqui sacua nderui. ¿Mbae ra ereme ure je re? i que Pedro ñee nda.

²⁸ Jesús que ñee ee ra. —Tacheẽ nyecua jẽje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jẽ abe ererecua. Jẽ doce. Trono jaaja ra jembraerã cote. Judíos rerecua ja ra jẽ.

²⁹ Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngüinisi secha. Ae nguiirĩ secha. Ae umbae ibi secha no. Ûquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote.

³⁰ Ae rane eriqui nyii nae, ùquĩ nda siqui mbia rui tuchi cote. Ae siqui quia mbia rui tuchi nyii nae, ùquĩ nane nda cote, i que Jesús ra.

20

Ae rane eriqui nyii nae, ùquĩ nda siqui mbia rui tuchi cote

¹ Jesús que mbia mbaaquiatsu quiatube no nda. —Dios rei mbia rerecua tuchi. Sã mbaecha mo ndiqui no. Sã mbaecha uva tubiriãte riqui embae no. Sã mbaecha mbia mo ndea rea umbae ishao shao sacua no. Nyaashĩ namo mose.

² “Denario mii tamondo mondo ja jẽje. Sembae ishao shao sacua tenda mondo chee”, i que emondochoi úcoo cote ra.

³ Tenda chui mose que mae emo ndecoteã eã ndese ra.

⁴ —Jẽ abe jẽso sembae ishao shao. Mbae mo tamee jẽje, i que ee ra. Nyoĩ que echeẽ mose ra.

⁵ Tenda nandeite re mose que echa emo mondo choi cote ra. Umbae ishao shao sacua. Eĩ si que echa tenda chaara ramo mose no nda.

⁶ Tenda ireĩ mose abe que mae emo ndecoteã eã ndese no nda. “¿Mbaerã jẽingo tenda mondochooño siqui rocoĩ mbae mo ndese a re?” i que echa ñee ee ra.

⁷ “Emo ngue ‘mbae mo esaã seje’ i ãte ure je ra”, i que ee ra. “Jẽso jẽ abe sembae ishao shao. Mbae mo tamee jẽje”, i que echa ee ra.

⁸ Itondaru ramo mose que echa ñee mbia reaquiatusa je ra. “‘Jenyu’ ere sembae ishao shaosa je. Pagar ere rã ùquĩ ja je. Ae ique ramo eresaitõ nae, ùquĩ nane je pagar ere. Ae rane ique nyii nae, ùquĩ je pagar ere hui bei cote”, i que echa ñee nda.

⁹ Ae ique eresaitõ nae, ùquĩ nane je que denario mii mee mee nda.

¹⁰ Ae rane ique nyii nae, ùquĩ ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. Ûquĩ je abe que denario mii mee mee nda.

¹¹ Pagar i mose ee que ñee asi asi echa je ra.

¹² “Ae ique ramo eresaitõ nae, ùquĩ ngue mbae ishao shao eã jiri resẽ. Eresaitõte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia ereme ee ure rã si chõ nde?” i que ñee echa je ra.

¹³ Echa que ñee ũquí mo je ra. “Mbae icuã mo asaã eãte ndeje resê. ‘Denario mii’, nandê que ñee nyii resê.

¹⁴ Quiatu nembae denario rerao cote. Ae ique ramo nae, ũquí je abe denario tamee mee nde rã si.

¹⁵ Sembae ae rese aico nguiã. Sembae amondose mose emo je, çamondo aroneate se re? Se sembae mee mose emo je, çndebiãte ũquí nde?” i que echa ñee ee ra.

¹⁶ Ae rane eriqui nyii nae, ũquí nda siqui mbia rui tuchi cote. Ae siqui quia mbia rui tuchi nyii nae, ũquí nane nda cote. “Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

Mbia ra seiquia, i si Jesús

¹⁷ Jesús que ngata oso quia Jerusalén quitu ra. Uchimbaaquiato que equerao mbia tiãsaã ñee sacuaã ee ra.

¹⁸ —Co nyao quia Jeusalén co. Huee ra mbia semee sacerdotes rerecua je. Embesasa abe je. “Jesús jêiquia”, i ra serii.

¹⁹ Semee nda judíos eã je cote. Seiquia sacuaã. Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

²⁰ Ari mo ngue oso Jesús rĩchã nda. Jacobo si. Juan si. Zebedeo riirĩ ngue ũquí nda. Ari que oso Jesús rĩchã nguiirĩ ndese ra. Ngoi que ngũiã ndese ñee Jesús je ra. —Mbae mo esaã na seje, i que ee ra.

²¹ —çMbae ra aba saã ndeje re? i que Jesús ñee ari je ra. Ari que ñee ee ra. —Ndeico mose ererecua tuchi, sã seriirĩ abe riqui ererecuarã nderese. Sã seriirĩ ngoi ja u ndejii. Enongue chĩ ngoi ndequito cuti. Enongue ndequiato cutiã no, i rei que ari ñee Jesús je ra.

²² Jesús que ñee ee ra. —Ae rii jêingo ñee seje nae, jêirandu turã eãte ũquí ndese. Ae rasi ra asaã tuchi nae, çũquí ndasi ra jêsaã jê abe re? i que Jesús ee ra. “Ae”, i que ari riirĩ ñee ee ra.

²³ Jesús que ñee ee ra. —Ae bei. Ae rasi ra asaã tuchi nae, ũquí ndasi ra jêsaã tuchi raque jê abe. “Ererecuarã ure”, jentye que seje, ũquí asaã aroneate se jêje. Paba ae quiatu ra ũquí saã. Ae ebite, ũquí nda emii ererecuarã, i que Jesús ra.

²⁴ Echimbaaquiato ataque que jirandu erese ra. Echimbaaquiato diez. Paama i que Juan je ra. Jacobo je abe.

²⁵ Jesús que “jenyu” i ñee uchimbaaquiato ja je cote ra. —Mbia ataque rerecua riqui ucuasu raã naa tuchi ngũimba je ũquí.

²⁶ Ũquí nda jêsaachĩ jê. “Ererecua ra se”, i mose jemo, sã aque riquichõ uataque rimbarã.

²⁷ Jemo “se rane jê” i mose, sã ũquí ndiqui bei mbae turã naa naa uataque je.

²⁸ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã mbia je”, ae u nguiã. Co achu quia mano mbia tubiriã ndiquicharõ sacuaã co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchimbaaquiato rese. Mbia tubiriã ngue nyoi quia erui ra.

³⁰ Eresayā nyeremo ngue chi ñeenda jie ee ra. Eresayā ngue jirandu Jesús ucuu rese ra. Ñeemombo mombo que Jesús je ra. —¡Sererecua! ¡David rucucha! ¡Ndeya eã ño urerese jê! i que eresayā ñee Jesús je ra.

³¹ —¡jêquiriri chō jê! i tuchi rei que mbia ñee ee ra. —¡Sererecua! ¡David rucucha! ¡Ndeya eã ño urerese jê! ibe que eresayā ñee Jesús je ra.

³² Jesús que tiba ñee ee cote ra. —Jenyu rã. ¿Mañi ae ra jêje re? i que Jesús ñee eresayā je ra.

³³ —Ureresa embuturã na, Urererecua, i que eresayā ñee ee ra.

³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayā ndesa turã ja cote ra. Mae turã ngue cote ra. Jesús rui que echoi quia cote ra.

21

Jesús ngasē Jerusalén

¹ Jesús que Jerusalén curubite nyoï quia ra. Betfagé, i que hue sucha je ra. Ibi ibate mo abe que chí huee ra. Monte de los Olivos, i que hue je ra. Hue si que Jesús uchimbaaquiatu nyeremo mondo ra.

² Ñee ngue ee ra. —Achi súchaa chō jêso rã. Burro cuasa ra chí nguiirĩ ndese jêje huee. Ũquí jenyura seru seje.

³ Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenyee ee, i que Jesús ñee ũquí nyeremo mondo ra.

⁴ Embesa ji cheë io sacua ño ngue ũquí nda. I embesa ji huĩ a:

⁵ Jeñee Jerusalén jenda je.

“¡sã jê! Jenderecua ru quia jêje burro ato co.

Ucuasu esaã saã eãte u quia co.

Burro riirĩ átoo eru quia co”, jenyee ee,

i que embesa ji huĩ nyii ra.

⁶ Ũquí nyeremo ngue Jesús mondo cote ra. Ae riĩ Jesús ñee ee nae, ũquí ngue nyecua ja ee cote ra.

⁷ Burro que ecuruchoi Jesús je ra. Huĩrao que echono ñono burro quite arō nda. Burro riirĩ quite arō abe. Jesús que nyui eato cote ra.

⁸ Jesús que ngata rei oso quia burro átoo ra. Mbia tubiriã ngue huĩrao mbiitee tee nyoï quia ibi riĩ enonde ra. Emo emo ngue sindo mbiitee tee ee no nda. Jesús oso sacua hue riĩ.

⁹ Mbia ia tuchi que tasē tasē nda. —Co nandererecua ru quia ngasēte co. Co Dios chimbu ru quia ngasēte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoï quia Jesús nonde nae, ũquí. Ae nyoï quia erui nae, ũquí abe no.

¹⁰ Jesús que ngasē Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús riĩ nda.

¹¹ Mbia ataque que echeë sibishorō nda. —Dios chimondo chō co re. Jesús i equia ee. Nazaret de Galilea jenda chō ae re, i que ñee nda.

Jesús mbia mbusē Dios chuchua si

¹² Jesús que oso Dios chuchuaa ra. Huee que mbia riqui mbae isi isi bei ra. Mbae mondo mundo abe mbae isiquia ribishorō. Ũquí ja que Jesús mombo hue si ra. Ae mbae isiquia sibishorō shorō nguia, ũquí mbae abe que embuchiichere chere ja mesa ra. Mesa aronda resebe. Ae nyurushi

cuasu mondo mondo mbia je mbae ribishorō nae, ũquĩ nenda abe que embuchiichere chere ra.

¹³ Jesús que ñee ũquĩ ja je ra. —“ ‘Mbia cheēsa Dios je’, i ra mbia Dios chuchua je”, i rei que embesa ji huĩ nda. Jē nguia jēicuā tuchite Dios chuchu a je re. Mbae mbuquiachāsa chuchua jēsaāte chĩ nguia ee, i que Jesús ñee asite ũquĩ je ra.

¹⁴ Jesús siqui mose Dios chuchúaa, mbia resayā ngue nyoĩ nyoĩ erea huee ra. Mbia cuatayā abe no. Jesús que ũquĩ mbucherō ja ra.

¹⁵ Ererecua cuabēte que chi mae icuā icuā erese ra. Sacerdote rerecua abe no. Embesasa abe no. Jesús chisaā turā ndese mae mose que paama ite ee no ra. —David rucucha turāte riqui co, i mose mbia riirĩ Jesús rĩ, ũquĩ mose que ererecua paama i ja Jesús je ra.

¹⁶ —¿Mbia riirĩ ñee erchandú quia re? i que ũquĩ ñee Jesús je ra. Jesús que ñee ee cote ra. —Ae. ¿Embesa ji rese jemae eāte re? “Dios ra mbia riirĩ mbucheē turā uturā ñi”, i que embesa ji ra, i que Jesús ñee ererecua je ra.

¹⁷ Jesús que oso mbia rerecua recha ja cote ra. Sucha tubiriā abe recha. Oso que Betániaa nda. Huee que itō nda.

Jesús ñee icuā higo i je

¹⁸ Isamamimbe que Jesús choi sí quia sucha tubiriā nda. Eriācuāte abe que nyoĩ quia ra.

¹⁹ Higo i mo ndese que mae ñeenda jie ra. Si chā ndei que oso ra. Ea eāte que ee ra. Ero achōte chō ngue ee ra. Nyebe Jesús ñee nguia higo i je. —Ndea eā mbei r a cote, i que Jesús ñee ee ra. Aque mosebe tuchi que esi quia ñimama mano nda.

²⁰ Echimbaaquiātu que nyuruira tuchi mae erese ra. —¿Mañi higo i quia ñimama asite mano nde? i que ñee Jesús je ra.

²¹ Jesús que ñee ee ra. —Tacheē nyecua jēje. Ae asaā higo i je nae, jē abe ra ũquĩ jēsaā serā sí, jē Dios jēicuā tuchi mose. Jeñee nyee ra sita ibate mo je. “Esi rĩ rá oso am a ndisha ye”, jenyee chee ra sita ibate mo je. Sita ibate ra jeñee mumbayā jē Dios jēicuā tuchi mose.

²² “Ā emondo seje”, jenyee mose Dios je, mondo r a jēje. “Dios ra emondo seje”, jenyee mose jeñiangui re, Dios ra emondo jēje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiātu quiātu ra. Sacerdote rerecua que nyoĩ ñee ee ameĩ ndese ra. —¿Mbaerā ereico mbia mbaaquiātu quiātu Dios chuchúaa re? ¿Aba “ũquĩ esaā saā” i ndeje re? i que ererecua ñee ja Jesús je ra.

²⁴ Jesús que ñee ee ra. —Se rane tacheē jēje. Se rane preguntar tae jēje. Secheē jēsibishorō turā mose, ũquĩ mose quiātu ra jeñee asibishorō turā se abe.

²⁵ ¿Aba ñee Juan je re? “Eso bautizar i mbia je” i ee re. ¿Dios eā ño ere? Jeñee seje, i que Jesús ee ra. Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeē ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerā jéingo eāte erui re no?” i quiarei ra nande je.

²⁶ “Dios eā ngue embu ra”, nande aroneate ñee ee no. Mbia ataque ra paama i tuchi nande je. Juan quiato tuchi quiarei mbia, i que ererecua u ñee ñee nyue ra.

²⁷ Ererecua que ñee nyee Jesús je cote ra. —Ureicuyãte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jêje no. Ae “ã esaã” i seje nae, aque riĩ nda acheẽ eã jêje no, i que Jesús ererecua je ra.

Acuanĩndu ndua ndua si

²⁸ Jesús que ñeembe ee ra. —I ra ã jêje reae. Sã ameĩ mo ndiĩr nyeremo no. “Quiatu rã uvas ishao shao seje”, i que ameĩ nguiĩr ndiqui je ra.

²⁹ “Nya” i rei que eriĩr ndiqui ñee ngu je ra. Aquere que ndua si chõ oso uvas ishao shao ra.

³⁰ “Quiatu rã uvas ishao shao seje”, i rei que ameĩ ñee nguiĩr nduĩnda je cote ra. “Se quiatu taso, Paba”, i rei que ee ra. Osoã ño ngue ra.

³¹ ¿Ma ngu cheẽ mumbayã ũquĩ mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jêje. Cuñandu ata ata riqui Dios cheẽ andu turã jêsi ã. Impuestos isi isiquia abe riqui Dios cheẽ andu turã jêsi ã. Ũquĩ nda siqui tuchi Dios rese jêsi.

³² “Eĩ jenye chõ siqui turã Dios je”, i rei que Juan el Bautista jembaaquiату quiatu ra. Jê nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. Ũquĩ ndese mae mose abe que jêya eã eã jêicua ndese no nda. Jê echeẽ isi turã sacua.

Uva raarõsa icua icua nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jësaarõ”, i que emo je cote ra. Ae que oso isho itõte cote ra.

³⁴ Uva quiche mose que ngũimba mo mondo rei umbaerã ndea ra.

³⁵ Uva raarõsa que erimba mbucuasẽ icua ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echei chei tuchi mbuqui sita je ra.

³⁶ Eĩ eĩ mbei que eraarõsa quia echa rimba ja je ra.

³⁷ Aquere que echa nguiĩr mondo erea cote ra. “Ireĩ ireĩ jiri ra seriĩr si”, i rei que ra.

³⁸ Uva raarõsa mae mose erese que ñee nyue ra. “iCo eriĩr ndu quia co cote jê! iNandeiquia rei jê! f nda uvas nandembaerã ae tuchi cote”, i que ñee nyue ra.

³⁹ Eraarõsa que eriĩr isi icua cote ra. Curuchoi que pe jiri iquia ra. Mano ngue cote ra.

⁴⁰ ¿Mañi nda echa quia eraarõsa je cote re? i que Jesús ñee mbia je ra.

⁴¹ Mbia que ñee ee ra. —Echa ra eraarõsa icua iquia ja cote. Uva i ra emondo emo je eraarõ sacua cote. Ũquĩ nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿Ã embesa ji rese jemae ãte re?

Sã emo ndiqui tuchua ao sita je no.

Sita mo ngue equirirõ mombo ra.

Eicuãte eriqui reĩ nguã ee.

Aquere Dios emundua si erese. “Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiao chõ ũquĩ nde.

Dios chiao turã tuchi riqui nande je ã,

i ñi embesa ji re.

⁴³ Tacheẽ nyecua jêje. Jenderecua eã nyee ra Dios cote. Ae mbiamo nda Dios icua nae, ùquĩ nderecua quia ra Dios cote.

⁴⁴ Ae ra ngoi aque sita arõ nae, ùquĩ nda huẽ. Aque sita ngoi mose emo arõ, ùquĩ nda mano no, i que Jesús ra. —Aque sita rã ndei se, i chõ ngue re.

⁴⁵ Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que ndua ndua ra.

⁴⁶ Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

22

Jenyu quiaru serese, i raque emo uquiato je

¹ Jesús que ejemplo mo senei mbia je ra.

² —“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngüinisi rea ramo mose.

³ Mbae quiche ja mose que ngüimba mo mondo rei mbia mbiirandu ra. Mbia que ngaẽ sereã nea ja chõ erea ra.

⁴ Ngüimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngüinisirã isi ramo ndese jêso mae. Jêso quiaru erese”, i rei que erimba mbia je ra.

⁵ Ae je “jenyu” i nae, ùquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda.

⁶ Mbia que teã teã ja ra. Ererecua rimba iruã nua ño ngue ra. Eiquia chee.

⁷ Ùquĩ mose que ererecua paama i tuchi ra. Soldados que emondo ngüimba iquiassa iquia iquia ra. Echuchua abe rei rei.

⁸ Ererecua que ñee ngüimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ùquĩ ngaẽ eã. Eicuãte quia ñene.

⁹ Jêso ñee mbia ja je. Ishonda ja je. ‘Jenyu ja ererecua rriirĩ ngüinisi rerequia ramo ndese mae’, jenyé oso quia mbia mbuchesea sea”, i que ererecua ñee nda.

¹⁰ Erimba que nyoĩ mbia mbiirandu randu ja ra. Mbia turã mbiirandu. Mbia icuã abe mbiirandu randu no. Mbia que ngaẽ tuchi cote ra. Tuchua itãyã nyee que ra.

¹¹ Ererecua que ique mbia tubiriã ndese mae cote ra. Emo irao icuãte que chí ee huee ra. Tiru ererecua chimondo emingue eã ñochĩ nguia reaẽ.

¹² Ererecua que ñee ee ra. “Seriirĩ ndiqui ngüinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra.

¹³ Ererecua que ñee ngüimba je cote ra. “Co jêisi jê. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda.

¹⁴ “Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵ —Jesús nandembucheẽ icuã na. ñ nda mbia paama i ee, i que fariseos ñee ñee nyue ra.

16 Nyebe fariseos uchimbaaquiatu mo mondochoi nguiã Jesús rea. Herodes chimbaaquiatu rese. Jesús mbucheẽ icuã sacuã ño ùquĩ nde. Uturã ngue esaã ñoño Jesús je ra. —Jesús, co ereico mbia mbaaquiatu quiatu turâte co. Ndeturâte ereico mbia ja je co. Co ereico turât e mbia mbuchiabiã co. Mbia erembaaquiatu quiatu turâte quia Dios icha rĩ co.

17 Nyebe urechu nguiã ñee ndeje a. ¿Coche mbia mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra.

18 Jesús que ùquĩ icuã icuate ra. Nyebe ñee nguiã ee. —¿Mbaerã jëingo “ĩ nda Jesús ucheẽ nyabi”, i serĩ nde?

19 Mbae isiquia mo jêteacuquia imbu seje, i que ee ra. Mbia que eteacuquia ee ra.

20 —¿Aba mbae nombre ñi mbae isiqui a rese a re? ¿Aba ãquĩ aingue abe ñi a re? i que Jesús ee ra.

21 —Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra.

22 Mbia que nyuruira jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

23 —Mbia raaque ra quera eã mbei, i que mbiamo nguia ñee nda. Saduceos i que ùquĩ je ra. Ùquĩ mo ngue nyoi ñee Jesús je ra.

24 —Sererecua, ã ngue Moisés mbesa nande je ra: “Emo mano mose eriiriã, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra.

25 Eriquii mo ngue siqui urerese ra. Seis que eribi ra. Eriquii que ngüinisiã quereco rei ra. Mano ño ngue tiirĩ ndocoĩ ngüinisi recha ra. Enongue que nguiquii checha quereco rei cote ra.

26 Ae abe que mano ño tiirĩ ndocoĩ no nda. Ùquĩ seis que ngõngue cheecha quereco ja rei ra. Mano ja chõ ngue tiirĩ ndocoĩ no nda.

27 Eninisi eru checha que mano nyee chõ cote no nda.

28 Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re.

29 Jesús que ñee ee ra. —¿Mbaerã jëingo Dios cheẽ icua eãte ã nde? Jëingo Dios cheẽ abi tuchi ã. Jëingo Dios quirãcuã icua eãte ã.

30 Ae raaque ra Dios mbuquera si nae, ùquĩ nda ngüinisi quereco eã mbei huee cote. Ùquĩ nda ngu quereco eã mbei huee cote no. Angeles rã mbei ra mbia riqi huee ibate cote.

31 Mbia raaque quera si rĩ ño ngue Dios jembiirandu rei ra. ¿Embesa ji rese jemaẽ ãte re?

32 ã ño Dios cheẽ embesa ji re:

Abraham nderecua chõ aico nguiã se co.

Isaac nderecua abe.

Jacob rerecua abe no,

i que embesa ji ra. ã ngue mano ndei nyii ra. Eresco siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re, i que Jesús ñee mbia je ra.

33 Mbia tubiriã ngue chi nyuruira tuchi eandu ra. Jesús mbae icua ja mose.

Echesecua tuchi quia Dios rese

34 Jesús cheẽ aquiatu tuchi que ra. Nyebe saduceos cheẽ mbutiba nguiã. Fariseos jirandu mose erese que ñumunua ñee nyue ra.

35 —Se chõ tacheẽ Jesús je. Ma Jesús ñee icuã, i rei que fariseo mo nda. Embesasa que ae ra.

36 —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que fariseo ñee Jesús je ra.

37 Jesús que ñee ee ra. —Ã ño Dios cheẽ ndiita ã nde: “Echesequa tuchi quia Dios rese. Ndechiã je. Neaĩ je abe. Nendua ndua je abe”.

38 Ūquĩ ño Dios cheẽ ndiita ũquĩ nde. Ūquĩ ño Dios cheẽ ñiinda ũquĩ nde.

39 ã abe rei ũquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”.

40 Moisés chimbasa tuchi chõ ũquĩ nde. Dios quiato cose ndare chimbasa ja chõ ũquĩ nde, i que Jesús ra.

¿Aba rucucha Cristo re?

41 Fariseos chichõ mose ñumunua ngue Jesús ñee ee ra.

42 —¿Aba rucucha Cristo re? ¿Aba jenyee equia ee re? i que Jesús ñee ee ra. —David nducucha chõ ñene, i que fariseos ñee nda.

43 Jesús que ñee ee cote ra. —¿Mbaerã David “sererecua” i ee re no? Espiritu turã embucheẽ mose.

44 ã ngue David ñee nda:

Dios que ñee Cristo sererecua je ra:

“Ecoi sejii. Nde abe ra ererecua serese.

Ae ndeucuyãte quia nae, ũquĩ je ra ndequirãcuã atecuquia tuchi.

Ndequirãcuã tuchi chee ra ũquĩ si”, i que Dios ñee sererecua je ra,

i que David ra.

45 David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús fariseos je ra.

46 Ūquĩ ngue ñee aquiatuãte Jesús cheẽ ndibishorõ nda. Aque mose bei que mbia preguntar i eã mbei Jesús je cote ra.

23

Jesús ñee asi fariseos je

1 Jesús que ñee uchimbaaquiatu je ra. Mbia tubiriã je abe no.

2 —Fariseos rã nda jëingochĩ jë. Embesasa rã abe ra jëingochĩ jë. “Ure quia Moisés chimbasa ureicuate nguiã ure ã”, i chõ nguiã.

3 Coche jëingo nguiã echeẽ mumbayã ndaque. Erã sí quia nda jëingoã nguiã. Echeẽ turã turãte raque. Siqui turã eãte quiatu nguiã.

4 Dios cheẽ embeta mbeta tuchichĩ nguia mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã.

5 Mbae turã naa mose, mbia mae sacua erese chõ ũquĩ nde. Tiru huñrao ibi quitinda ai mbicoi tuchi equia ã. Dios cheẽ mbesa ji echucua bei quia uchiba cúa rese ã. Mbia mae sacua erese chõ eriqui nguiã ũquĩ naa ã.

6 Aba mbia eã tuchi fariseos. “Serendarã turã nguiatu se jë”, i tuchi equia mbia chumunua nua mose ã.

7 “Sã mbia ererecua i nande je”, i beite equia ã. Ebi tuchi “mbia mbaaquiatu” i mose ee.

8 “Mbia mbaaquiatu rei se”, jenyechĩ nda jë. Se mii ño jembaaquiatu re. Nyiesenda chõ jë nde.

9 “Paba” jenyechĩ nda mbia mo je jë. Jendu mii ño siqui nguiã ibate pe.

10 “Ererecuarã se”, jenyechĩ nda eno. Se mii ño jenderecua re.

11 Jemo siqui mingue mose, mbae raã naa mose uataque je, aque quia ra ererecuarã.

12 Ae ucuasú raã naa nguia nae, mbia ñetẽ nda Dios saã ño ñquĩ je. Ae siqui mingue quia nae, mbia rerecuarã ño nda Dios saã ñquĩ je.

13 Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Jẽingo sereãte quia Dios rese ã. Mbiam siquise mose Dios rese, jẽingo emingo eãte erese ã no.

14 Aba mbia eã tuchite jẽ. Eru cheecha mbae jembutiã tiã ñochĩ nguia ã. Ñquinde jẽingo chõchĩ ñee oco oco Dios je ã no. “I nda mbia mae nanderese” jenyechõchĩ equia ã. Nyebe ra Dios jembasi tuchi cote.

15 Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. “Jẽingo ure rui” jenyechõchĩ equia mbia je ã. Ñquĩ mo siqui mose jendui, eicuã tuchi chõ ñquĩ abe cote re.

16 Aba mbia eã tuchite jẽ. Sã eresayã mo ndiqui emo ndesayã mbuti echiba rese no. Ñquĩ na ño jẽ nde. Jẽaquiãtuã ño mbia mbaaquiãtu quiãtuchĩ nguiaã. “Jurar jenyemose Dios chuchua rii, coche jeñee jembuchebe nguiaã”, jenyechõchĩ nguia mbia je ã. “Jurar jenyemose oro Dios chuchua jenda rii, ñquĩ mose quiãtu jeñee jembuchebe aroneate nguiaã”, jenyechõchĩ nguia mbia je ã.

17 ¿Oro quiãtu i tuchi jiri Dios chuchua si re? ¿Mbaerã jẽaquiãtuãte riqui re?

18 “Jurar jenyemose altar rii, coche jeñee jembuchebe nguiaã”, jenyechõchĩ nguia mbia je ã. “Jurar jenyemose ofrenda altar jenda rii, ñquĩ mose quiãtu jeñee jembuchebe aroneate nguiaã”, jenyechõchĩ nguia mbia je ã.

19 Eresayã na tuchi chõ jẽingochĩ nguiaã. ¿Mbaerã jẽaquiãtuãte riqui re? ¿Ofrenda quiãtu i tuchi jiri altar si re?

20 Jurar jenyemose altar rii, earonda abe rii ño jẽingo nguiaã jurar i ofrenda.

21 Jurar jenyemose Dios chuchua rii, Dios abe rii ño jẽingo nguiaã jurar i. Dios abe quia siqui nguiaã uchuchua huee.

22 Jurar jenyemose ibei rii, Dios renda abe rii ño jẽingo nguiaã jurar i. Dios sí rii abe no.

23 Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Décimo jemeemee ndaque quia Dios je mbae ñetẽ nii. Comino. Menta. Anís. Dios cheẽ ndiita quiãtu jemumba mumbate nguiaã. Dios jẽicua rá nyii. Jẽingo turã na nyii. Jẽya eã na mbia rese nyii. Aquere quiãtu mbae ñetẽ jẽsaã cote.

24 Sã eresayã mo ndiqui emo ndesayã mbuti echiba rese no. Ñquĩ na ño jẽ nde. Mbae ñetẽ jẽsaã turã turãte raque quia ã. Dios cheẽ ndiita quiãtu jemumba mumbate nguiaã.

25 Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Sã emo ndiqui i riru irei irei earonda no. Eimi nguiaãtu eirei quiãtuãte re. Eĩ ño jẽ no nde. Jẽturã aba reã ño jẽaronda no nde. Jeñiangui renda quiãtu eicuã icuãte re. Mbae quia jembuquiachã quiachãte nguiaã. Mbae abe quia jenyosei icuã icuãte nguiaã.

26 Eresayã na tuchi chõ jẽingochĩ jẽ nde, Fariseos. Jeñiangui renda rane nguiaãtu jẽirei. Jẽaronda abe ra equishĩ cote.

27 Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Mbiam raaque tãsa rá ño jẽingo nguiaã. Eati

ji turāte raque. Eimi ye quiatu mbia raaque quiangue chi nguiã hue. Eroo cui abe no.

²⁸ Eĩ si chõ jẽ nde. Jëaronda turāte aba reã ndiqui raque mbia je. Jeñiangui rend a quiatu eicuāte re.

²⁹ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jëcuasu jësaã saāte quia ã. Ae mbia turã mano cose nae, ùquĩ tãsa jemiitã turã mbeite raque quia ã. Dios cheẽ mbuchecuada tãsa abe no.

³⁰ “Cose ureico mose, ïnda ureicuã eāte rei Dios quiato je. Ureramei na eã”, jenyete raque equia ã.

³¹ “Mbia iquia iquiada riirĩ ño ure re”, jenyete equia ùquĩ. Jendu rã si tuchi jẽ. Mbia i quiada.

³² Jenamei icuã na si chõ jëingo no.

³³ Mbei tásie rã tuchi chõ jẽ nde. Eĩ jenyete bei oso quia aque ngasẽ nyee tata cuasu.

³⁴ Nyebe ra Dios cheẽ mbuchecuada amondo mondo quia jëje. Mbia mbaaquiatusa ra amondo jëje. Mbia aracua abe no. Jẽ nda sechimondo emo emo jëiquia. Emo emo nda jëiruã nua mbia chumunuásaa no. Jëico ico ra equia erese eiquia chee.

³⁵ Ae Dios quiato iquia iquia quia cose nae, ùquĩ ñi nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequíada riirĩ ndei aque. Sã mbia Dios quiato iquia iquia bei cose no.

³⁶ Ùquĩ ja rĩ nda Dios jembasi cote. Acheẽ nyecua quia jëje a.

Jesús ia eã tuchi Jerusalén jenda rese

³⁷ Tacheẽ na jëje, Jerusalén jenda. Seya eāte aicochĩ jendese co. Hue jëingo mbia iquia iquia beite hue. Dios cheẽ mbuchecuada iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eĩ tae jendeaquiato”, ae beite rei nguiã jëje co. Secheẽ jëisi sereã mbei chõchĩ nguia ã.

³⁸ ¡Aico jendecha a cote jẽ!

³⁹ Jemae mae eã nda serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jẽ!” i ra mbia seisi turã aque mose cote, i que Jesús ñee nda.

24

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Ecuata mose que echimbaaquiato ñee ee ra. —Sã Dios chuchua turã tuchite jẽ, i que ñee ee ra.

² Jesús que ñee ee ra. —Tacheẽ nyecua rã jëje. Ae rese jëingo mae ã nae, ùquĩ nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiato que ngasẽ ñee eísaa ra. —¿Manosete ra ùquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiato ñee Jesús je ra.

⁴ Jesús que ñee ee ra. —Jëtesa jiri quia jẽ. Mbia mo nda jembairĩ irĩchĩ ñee jëje jẽ.

5 “Cristo chõ se re”, i ra mbia ñee ata atate jêje. Ûqui ñee nda jeñanduchĩ jê. Ûqui nda mbia mbĩrĩ irĩ jate. Ñee ñooño je chõ Ûqui nde.

6 Mbua ra guerras saã saã tuchi. Mbua ra ñee ñee tuchi quia nyiquia iquia je rĩ. Ûqui mose ra jësiquichechĩ jê. Ûqui ja rane nda nyecua raque. Aque mose ra mbae ja ua eã ná.

7 Mbua ra guerras saã tuchi chee. Nyiquia iquia tuchi rae. Mbua riãcuã tuchi ra aque mose no. Emo ñooñoa tuchi ra mbua rasi. Manguê chooñoa tuchi ra ibi nyere nyere.

8 Jembasi ramo mose chõ nda Ûqui nde. Aquere ra jembasi tuchi cote.

9 Mbua icuã icuã tuchi r a jêje serĩ. Nguerecua je ra mbua jenderao rao tuchi. Jëiquia chee rae. Mbua manguê chooñoa jenda ra jëucuyã tuchi serĩ.

10 Ae siqui quia serui nae, Ûqui tubiriã nda hui sesi Ûqui mose cote. Ûqui nda nyiucuyã. Ûqui nda nguerecua mbuqueta queta tuchi ngõngue rĩ.

11 “Dios cheẽ mbuchecuasa chõ se re”, i ra mbua ñee ata atate jêje. Ûqui nda mbua mbĩrĩ irĩ tuchi.

12 Mbua icuã icuã tuchi ra cote. Aba cheẽ mumba mumba beite ra cote. Mbua ra nyesequa eã tuchi nyiese cote.

13 Ae ra siqui bei serese, Ûqui nda Dios mingo bei.

14 Sequiato r a Dios cheẽ turã senei senei ná mbua ja je nyii. Manguê chooñoã jenda ja je. Aquere ra mbae ua ja cote.

15 Dios cheẽ mbuchecuasa rei Daniel. Ae que embesa Mbae Mbutiãsa Icuã nĩ nda. “Dios rendaque re taico se quiatu”, i ra equia huee. (Ae ra mae nguia sechimbese rese nae, sã Ûqui eicua.)

16 Jemaẽ mose Mbae Mbutiãsa Icuã ndese, jeña esi. Ae siqui quia Judéaa, sã Ûqui uchã jei choi ibi ibátee mo.

17 Ae ra siqui tuchia quite rese, sã Ûqui iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ.

18 Ae ra siqui úcoo, sã Ûqui nyebiã ngaẽ huĩrao rea. Sã hue si bei chõ echoi uchã.

19 Aba mbua eã tuchi ra emo ãquẽ ndiru rerequia mose aque mose. Nguirĩ mbuquiambu je abe no.

20 “Nyiseĩ mose eã urechã” jenyẽ Dios je. “Sábado mose eã abe urechã”, jenyẽ abe Dios je no.

21 Mbua ra mbae rasi saã tuchi aque mose. Mbae rasi que mbua saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño Ûqui nde.

22 Ae rasi ra mbua saã tuchi nae, Ûqui nda Dios mbujua jiri uquiato rĩ. I nda emo ñimbirãcuã eã tuchi rei Ûqui ndasi je.

23 “A Cristo riqui a jê” i mose emo jêje, “nyia” jenyechĩ nda Ûqui ñee mose jê. “Hue Cristo riqui hue jê” i mose emo jêje, “nyia” jenyechĩ nda eno jê.

24 “Cristo chõ se re”, ichõiño nda mbua ñee ata atate jêje. “Dios cheẽ mbuchecuasa chõ se re”, ichõiño nda mbua ñee ata atate jêje no. Mbua mae sayã nda esaã saã tuchi mbua mbĩrĩ irĩ sacua. Ûqui Dios quiato abe chee mbĩrĩ irĩ arõte.

25 Ûqui nonde chõ aico nguia jembirandu randu co.

26 “Hue Cristo riqui turuquia hue”, ichõiño nda mbua jêje serĩ. “A Cristo riqui tuchia a”, ichõiño nda emo jêje serĩ no. Ûqui mose ra “nyia” jenyechĩ jê.

27 Sã ama ndiqui pirirã i ibei resae ja no, eĩ nda sechu mose. Mbia ra mae ja serese.

28 Sã urubu riqui mae ja mbae raaque rese no. Eĩ si ra seicuaasa mae ja sechu rese no.

Dios riirĩ nda tube ibate sã

29 Mbia ũquĩ ndasi raã ja mose r a tenda checuayã mbei cote. Nyasi abe no. Nyasitata ra ngoi ngoi. Ibei jenda abe ra quiata quiata chee cote no.

30 Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eã tuchi ra nyeseo mae mose serese.

31 Angeles serimba ra amondo corneta mbucheẽ sacuã. Ũquĩ nda mbia sechiisirõ munua nua ja seje cote. Ishonda ja. Mangue chooñoa jenda ja.

32 Sã higuera riqui no. Sã ira mo ndiqui no. Ero quira usẽ j a mose, “iraro itõ ndacu ra cote”, i chõ mbia nguiã aque mose.

33 Eĩ sí ra mbae ua ja nonde. Ae riĩ aico ñee jẽje nae, ũquĩ ndese jemaee mose, “mbae ra ua ja cote” jenyera cote.

34 Tacheẽ nyecua jẽje. ã mbia riqui ngata ibi ã nae, ũquĩ emo emo nda manoã mbae ua ja nonde.

35 Ibei ra ua. Ibi abe ra ua no. Secheẽ nguia ra ua eã mbei.

36 Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba miĩ ño eicua nguiã co.

37 Sã Noé mosenda mbia siqui sereãte Dios rese cose no. Eĩ si ra mbia siqui sereã Dios rese sechu nonde no.

38 Sã Noé mosenda mbia quiaru chooño no. Ndua rocoĩ Dios rese. Ngũinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde.

39 Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose.

40 Sechu mose ra mbia nyeremo siqui úcco. Co miĩ nda arao. Enongue ra siquichõ.

41 Cuña nyeremo nd a chi raque mbua tocho no. Co miĩ nda arao. Enongue ra siquichõ.

42 Jẽtesa bei quiatu quia serese. Ae mose ra achu, aque tenda rese jẽiranuate riqui ã.

43 Mbaecha mo jirandu mose mbae mbuquiachãsa rese, “co isa ra eru” i mose, ũquĩ mose nda uqueã nde chaẽ. f nda mbae mbuquiachãsa mbae sirõ eã ndei.

44 Jẽingoquiatu bei quiatu quia seraarõ arõ. Jendua eã mose serese ra achu jembuate.

Erimba echeẽ mumbayã mose, eya tuchi rae

45 Dios rimba aba cheẽ mumbayã je aico ñee a. Dios rimba aquiatu je aico ñee a. Sã ererecua mo ñee ngũimba turã je no. “Sembae esaarõ turã ja quia secutiã. Serimba ataque embuquiari quiaru turã secutiã”, i que ererecua ee ra.

46 Erimba echeẽ mumbayã mose, ererecua ia tuchi ra eru mose. Erimba abe ra eya tuchi no.

47 Ererecua ra ngũimba miĩ umbae raarõ mbei sacuã cote.

48 Sã erimba ndua ndua uchiangui re no. “Sererecua ra tu jei ãte” i ndua ndua.

49 Hue ñee icuã icuã uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia icuã ndese cote.

50 Sã ererecua ruchî nguia ngũimba mbuate aque mose cote jê.

51 Ererecua ra eiruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ũquĩ ndese ra mbae rasi raã tuchi cote. Nyeseo seo tuchi ra equia. Urei nda equiti quti tuchi.

25

Nyucuaaque icoquiату je

1 Nyucuaaque icoquiату je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoi ja quia ra.

2 Cinco que icoquiату je ra. Cinco que icoquiатуã je no nda.

3 Ae icoquiатуã nae, ũquĩ ngue mbae quira curuchoi eã umbae lamparina mombisê sacua nda.

4 Ae icoquiату nae, ũquĩ ngue mbae quira curuchoi botella ye ra. Lamparina ye abe.

5 Ae ra ngũinisi isi rei nguia ee, aque que itôte ee ra. Nyucuaaque reesi esi chee que ra. Uque uque ja chee que ra.

6 Itondiite mose que to i andu cote ra. “Co erurã ndu quia co cote jê. Jêso mae erese cote”, i que mbia tasê tasê ee ra.

7 Nyucuaaque que nyuruã ja cote ra. “Nandembae lamparina nandemombisê mbisê ja”, i rei que ra.

8 Ae icoquiатуã nae, ũquĩ ngue ñee ndei icoquiату je ra. “Urembae uque uquete. Mbae quira ñetê jemee mee na ure je”, i rei que uataque je ra.

9 “Ateê. Nande ja chayâte ra resê. Emo jêisi chõ oso icua”, i que icoquiату je ñee ee ra.

10 Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiату je que nyoĩ ique erese ra. Ngũinisirã isi ramo ndese mae. Quiaru abe que echoi erese ra. Eiquesa que ematã cote ra.

11 Icoquiатуã je abe que ngaê nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra.

12 Eru que ñee ee ra. “Tei. Jaêicuayã tuchite se”, i que eru ñee ee ra, i que Jesús ñee mbia je ra.

13 —Jêingoquiату bei quia jê. Ae mose ra achu, ũquĩ jêicuayâte quia ã.

Ererecua a mbae isiquia mbuchao chao ngũimba je

14 Sã ererecua mo mbae isiquia mee mee ngũimba je no. Eĩ si chõ Dios nguia mbae mee mee ngũimba je. Ererecua oso serĩ mose que umbae mbae isiquia mee mee ngũimba je ra. Embaata ata sacua ño ngue emee nguia ee.

15 Cinco mil que emee emo je ra. Dos mil enongue je no. Un mil que enongue je no nda. “Jenya chõ tamee mee jêje jê”, i que ñee ee ra. Secha que oso isho cote ra.

16 Ae je ererecua cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra.

17 Ae je ererecua dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda.

18 Ae je ererecua un mil mondo nae, aque que ibi sibicoi mbae isiquia rerecoquiату sacua nda.

19 Emo mose tuchi que ererecua ru cote ra. Ñee ngue ngũimba je cote ra. “Jenyu sembiirandu sembae mbae isiquia rese cote”, i que ñee ee ra.

²⁰ Ae je cinco mil mondo nae, aque rane ngue tu ñee nguerecua je ra. “Cinco mil que eremee ndei seje nae, ñquĩ ngue ambaata ra. Cinco mil que aisibe ra”, i que emee ja nguerecua je ra.

²¹ Ererecua que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiatu seje cote. Ndeya bei tuchi ra ereico serese cote”, i que ererecua ñee ee ra.

²² Ae je ererecua dos mil mondo nae, aque que tu ñee nguerecua je cote ra. “Dos mil que eremee ndei seje nae, ñquĩ ngue ambaata ra. Dos mil que aisibe ra”, i que emee ja nguerecua je ra.

²³ Ererecua que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiatu seje cote. Ndeya bei tuchi ra ereico serese cote”, i que ererecua ñee ee ra.

²⁴ Ae je ererecua un mil mondo nae, aque que tu rei ñee nguerecua je cote ra. “Nde que ere queteãte quiatu nguiã mbae rese. Ndechitiquia eã abe ereishao shaote quia co.

²⁵ Nyebe asiquiche tuchi nguiã mbae isiquia mee mose seje. Nyebe achati nguiã ibi je. Co é co rese”, i que ñee nguerecua je ra.

²⁶ Ererecua que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re?

²⁷ Sembae mbae isiquia eremonaã ñochĩ banco. fnda eata jiri sechu mose cote re chã”, i que ererecua ñee asite ee ra.

²⁸ Ererecua que ñee mbi a hue jenda je cote ra. “Mbae isiquia jēsirõ na esi un mil. Ae diez mil quereco nae, aque je jemondo.

²⁹ Ae embae tubiriãte nae, aque je mbae tamondobe. Ae embae ãte nae, embae ñetê tasirõ ja esi.

³⁰ Co que serimba icuã tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Urei nda equiti quiti tuchi”, i que ererecua ñee nda.

Jesús ra mbia emo emo mingo icúe umbaerã

³¹ Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose.

³² Mbia manguie chooñoa jenda ja ra chi ñumunua huee aque mose. Mbia emo emo nda achono icúe sembaerã aque mose. Sã oveja rarõsa riqui ovejas no icúe chivos si no.

³³ Uquiato cuti ra ovejas no. Uquiato cutiã nda chivos no no.

³⁴ Eĩ ae ra se mbia rerecua tuchi mose. Acheẽ nda mbia sequiatio cutinda je. “Jenyu serese. Jenderecua turã tuchi ra aico jêje. Paba turãte riqui jêje co. Paba que jêirabo nyii mbae ao nonde ra. Jêingo sacua serese.

³⁵ Seriaãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda.

³⁶ Seirao eã mose que tiru jemee seje ra. Serasi mose que jêso mae serese ra. Seico mose cárcel que jêso mae serese no nda”, ae ra ñee sequiatio cutinda je.

³⁷ Sequiatio cutinda ra ñee seje cote. “¿Manose mbae uremee ndeje nderiaãcuã mose re? ¿Manose ureso nembui ndeisei mose re?

³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re?

³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seje.

⁴⁰ Aque mose ra acheẽ ee. “Tacheẽ nyecua jêje. Senongue mo mbaech a reã ndaque. Ae turã jêsaã senongue mo je nae, seje eraã naanguia chõ ùquĩ nde”, ae ra ñee ee.

⁴¹ Acheẽ nda sequiato cutiã quitinda je cote. “Jêso sesi. Mbae turã nda jêisiã seo jenda. Jêso tata cuásuu. Ae Dios chiao tata, diablo mbasi sacuã. Diablo rimb a abe mbasi sacuã. Ûquĩ tata ra uqueã mbei.

⁴² Seriaãcuã mose que mbae mo jemee eãte seje ra. Seisei mose que sembiu eãte no nda.

⁴³ Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jêso eãte mae serese ra. Seico mose cárcel que jêso eãte mae serese no nda”, ae ra sequiato cutiã quitinda je.

⁴⁴ Sequiato cutiã quitinda ra ñee seje cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?” i ra sequiato cutiã quitinda ñee seje.

⁴⁵ Acheẽ nda ee. “Mbae turã jêsaã eã mose emo je, seje eraã eã naanguia chõ ùquĩ nde”, ae ra sequiato cutiã quitinda je.

⁴⁶ Ûquĩ nda nyoi ja tata cuasu cote. Huee ra mbae rasi raã mbei tuchi cote. Sequiato cutinda quia ra siqui turã mbei ibate cote, i que Jesús ñee nda.

26

Jesú nandeisi tarõ, i ja ererecua nyue

¹ Aquere que Jesús ñee uchimbaaquiato je cote ra.

²—Dos días mose ra fiesta de la pascua cote. Aque mose ra mbia icuã semee ererecua je seiquia sacuã, i que Jesús ñee nda.

³ Sacerdote rerecua que ñumunua ja cote ra. Amei ja rese. Embesasa rese abe no. Ûquĩ ngue ñumunua ja u Caifás itaicuee ra. Caifás rei sacerdote rerecua tuchi.

⁴ Caifás itaicuee que ùquĩ nyi ñee ñee Jesús riĩ nda. —Jesús nandembiriĩ irĩ jẽ. Eisi sacuã. Etarõ sacuã. Eiquia sacuã cote, i que u ñee ñee nyue ra.

⁵—Fiesta mose eã ño nandeisi jẽ. Mbía ra paama i tuchi nande je, i que u ñee ñee nyue ra.

Cuña mo aba mbusimbusa turã ichusẽ Jesús ãquĩ ndese

⁶ Jesús que siqui Simón Leproso chuchúaa ra. Betania, i que hue je ra.

⁷ Cuña mo ngue tu erea hue ra. Aba mbusimbusa mo ngue equeru Jesús je ra. Embisẽ tuchi que equeru ra. Mbae isiquia mumbasa tuchi que ùquĩ nda. Ichusẽ ja que Jesús ãquĩ ndese equiaru mose ra.

⁸ Echimbaaquiato que chi ja mae erese ra. Paama i que cuña je ra.

⁹—¿Mbaerã eichusẽ ñooño nde? Mbae isiquia ribishorõ ño nda aba emondo re. Mbaecha reã je emee mee sacuã, i que echimbaaquiato ñee nyue ra.

¹⁰ Jesús que echeẽ ñandu ra. Ñee ngue ee ra. —¿Mbaerã jẽingo ñee ùquĩ nde? Sã cuña ae riqui ae. Ae esaã seje nae, eturãte seje ùquĩ.

¹¹ Mbaecha reã nguia ra chi arete íbii a. Se quia nda aico bei eã nguia jendese aa.

¹² Seati nonde chõ ngue cuña aba mbusimbusa ichusẽ nguia serese.

¹³ Tacheẽ nyecua jêje. Mbía Dios cheẽ turã nenei nenei mose mangue chooñoa jenda ja je, cuña nyisaã abe ra esenei senei. Mbía ndua turã ja sacuã echisaã abe rese, i que Jesús ñee uchimbaaquiato je ra.

Jesús tamee jêje, i Judas mbia icuã je

¹⁴ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra.

¹⁵ —Jesús tamee jêje. ¿Mbae ra jemee seje eribishorõ nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra.

¹⁶ —Mbia eãsa quiatu Jesús tamee jêje, i que Judas ñee ee ra.

Jesús quiaru uchimbbaaquiato rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbbaaquiato ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra.

¹⁸ Jesús que ñee ee ra. —Jẽso sucha cuasu. Jeñee aque je. “Jesús que urembu ñee ndeje ra. ‘Ndechuchua oveja tau sequiato rese semana nonde’, i que Jesús ucheẽ mbu ndeje ra”, jenye aque je, i que Jesús ñee nda.

¹⁹ Echimbbaaquiato que nyoĩ erea Jesús cheẽ nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbbaaquiato rese huee cote ra.

²¹ Quiaru mose que Jesús ñee ee cote ra. —Tacheẽ nyecua jêje. Jemo nda semondo mbia icuã je, i que ñee uchimbbaaquiato je ra.

²² Echimbbaaquiato ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra.

²³ Jesús que ñee ee ra. —Ae chĩ quiaru serese aque plato ye sí a nae, aque tuchi ra semondo mbia icuã je.

²⁴ Dios cheẽ ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra.

²⁵ —¿Se ra aremondo mbia icuã je re? i que Judas ñee Jesús je ra. Jesús rĩ ñeende mbia icuã je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jêu. Serete chõ ã nde, i que Jesús ñee ee ra.

²⁷ Vino mbeisa que esirõ cote no nda. Gracias i que Dios je ra. Mondo que uchimbbaa quiato oo cote ra. —Jembeĩ mbei ja.

²⁸ Seruqui chõ ã nde. Mbia icuã mbutiã sacua ño seruqui re. Dios cheẽ yasu rui si chõ seruqui riqui nguia mbia icuã mbutiã co.

²⁹ Tacheẽ nyecua tuchi jêje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia jendese cote, i que Jesús ñee nda.

Jesús aicuayãte resẽ, ichõĩño nda Pedro serĩ, i Jesús

³⁰ Irasei rasei que cote ra. Nyoĩ que Monte de los Olivos ra.

³¹ Jesús que ñee uchimbbaaquiato je ra. —Jẽireĩ ireĩte ra serĩ co isa. Jeñimboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoĩ cote”, sã embesa ji riqui i no.

³² Seraaque quera sire ra aso se rane jendaarõ Galilea, i que Jesús ra.

³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireĩã mbei ndesi, i rei que Pedro ñee ee ra.

³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra.

³⁵ Pedro que ñee ee ra. —Mbia seiquia arõte raque nderĩ, acheẽ ñooño eã nda nderĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemaní cote ra. Uchĩmbaaquiato rese. —Jengoi rã u aa. Taso rã ñee Paba je pe jiri se, i que Jesús ee ra.

³⁷ Pe quiti jiri que Pedro rerao ra. Zebedeo riirĩ nyeremo ndese. Eya eã ndasi tuchi que tu ee aque mose ra.

³⁸ Ñee ngue ũquí je ra. —Seya eã ndasi tuchi aico co. Seya eã ndasi ra seiquia chee. Jenguchõ na jẽ aa. Jẽtesa tesa bei u aa, i que Jesús ñee ee ra.

³⁹ Jesús que oso pe quiti jiri cot e ra. Nyibi que u ngũĩã ndese ñee Dios je ra. —Paba, ũquí ndasi asaã sereãte raque quia co. Ae sebite riqui nae, ũquí ndese semingo eã. Ae ndebite riqui nae, ũquí ndese quiatu semingo, i que Jesús ñee Dios je ra.

⁴⁰ Nyebi que u uchĩmbaaquiato je cote ra. I que eu uque ja ee cote ra. Ñee ngue Pedro je ra. —Jẽingo areã ñochĩ tesa serese se ñee mose Dios je.

⁴¹ Jẽtesa tesa u. Jengue eã u ñee Dios je. Mbae icuã tã i eã sacua jẽje. Jẽingo serete raque serese. Mbae icuã nguiatu jembuti mbutite nguiã, i que Jesús ee ra.

⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra.

⁴³ Nyebi que u uchĩmbaaquiato je cote ra. I sí que u uque ee no nda. Eresa quiatu ngue eshiu shiute nguiã.

⁴⁴ Jesús que osobe erecha ñee Dios je ra. Tres veces que aque cote ra. Hue rĩ si que ñee Dios je ra.

⁴⁵ Uchĩmbaaquiato jii que esi ñee ee cote ra. —Jengue cote. Jenguenea jẽucua cote. Semondo ra mbia icuã je cote. Seiquia sacua.

⁴⁶ Jẽhuã cote. Nyao cote. Ae ra semee mbia icuã je, co eru quia semee sacua co cote, i que Jesús uchĩmbaaquiato je ra.

Mbia icuã Jesús isi suruchoi

⁴⁷ Jesús cheẽ mosebe tuchi que Judas ru erea ra. Jesús chĩmbaaquiato rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ũquí mbucuaẽ nguia reaẽ. Amei abe.

⁴⁸ Judas ñee nyecua yã nguiatu quia ũquí je nyii reaẽ. —Ae ritii ra asiite, aque chõ ñene. Aque jẽisi serao, i quia equia ee nyii reaẽ.

⁴⁹ Jesús rĩchã ngue esi saluda i ee cote ra. Jesús ritii que esiite ee cote ra.

⁵⁰ —¿Mbaerã erechu serea re? i que Jesús ee ra. Mbia que ngaẽ Jesús isi ecua cote ra.

⁵¹ ũquí mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra.

⁵² Jesús que ñee ee ra. —Ndechuuru emingue chõ eriru ye. Nde emo nyisha mose tiquise je, nde abe ra emo ndeisha.

⁵³ ¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaẽ. Serequiato sacua.

54 “Angeles embu rã sereaquiutu”, ae eã nda Paba je. Ûquĩ mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra.

55 Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiutu quiutu bei rei quia huee resẽ. ¿Mbaerã seisiã nyucua aque mose re?

56 Embesa ji ique sacua ño jẽicuã icuã ndiqui nguiã seje ã, i que Jesús ra. Echimbaaquiutu que nyoi ja chee uchã Jesús recha ra.

Jesús mbia curuchoi mbia rerecua je

57 Ae Jesús isi nae, ùquĩ ngue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe.

58 Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que huĩ ngoi eraarõ arõ nda.

59 Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús rĩcharã nde? i rei que u ñee ñee nyue ra.

60 Emo emo ngue ngaẽ ndei ñee icuã icuã Jesús rĩ nda. Ûquĩnde que mbia nyeremo ngaẽ ñee ñooño Jesús rĩ nda.

61 —Jesús que ñee ñooño Dios chuchua rĩ nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ùquĩ ñee ñooño Jesús rĩ nda.

62 Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que Jesús je ra.

63 Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Diósaa echeẽ ure je, i que sacerdote rerecua ñee ee ra.

64 Jesús que ñee ee ra. —Ae. Dios rucucha chõ se re. Tacheẽ nyecua jẽje. Jemae nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra.

65 Sacerdote rerecua que paama i tuchi Jesús cheẽ mose ra. Huĩrao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re.

66 ¿I jẽje re? ¿Mañi nande ra equia re? i que sacerdote rerecua ñee ererecua ataque je ra. —Eicuã tuchi que ra jẽ. Sã mbia equia, i jate que ererecua ñee Jesús rĩ nda.

67 Mbia que ñinimbu nimbu Jesús ruba rese cote ra. Ucuu ucua abe que erese ra. Emo emo ngue eritii mbeete ete o je ra.

68 Ñee ngue ee ra. —“Cristo chõ se re”, ere ñi equia. Aba chõ ucua nderese chã. Ma icua no, i que mbia ñee icuã icuã ee ra.

Jesús aicuayãte reseẽ, ichõĩño Pedro

69 Pedro que chĩ mbeite ngoi itaicuee ra. Nyucuaaque mo ngue tu ñee ee mbia rimba mo nda. —Jesús resenda que nde abe ra. Galilea jenda, i que nyucuaaque ñee ee ra.

⁷⁰ Pedro que ñee ee ra. —Tei. Ndecheẽ aicuayãte, ichõĩño ngue Pedro mbia résaa ñee ee ra.

⁷¹ Pedro que oso quia eiquesa cuti cote ra. Nyucuaaque nongue que ñee mbia je erĩ nda. —Co abe que Jesús resenda ra. Nazaret jenda, i que ñee mbia je ra.

⁷² —Tei. Jesús aicuayãte, ibe que Pedro ñee icuã ee ra.

⁷³ Ae chi huee nae, ñquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chĩcuate resẽ, i que ñee ee ra.

⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra.

⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces serĩ, sã Jesús i ee nyii no. Ñquĩ ndese que Pedro ndua cote ra. Nyebe esi nguĩã usẽ nyeseo tuchi.

27

Mbia Jesús curuchoi Pilato je

¹ Nyaashĩ namo mose que sacerdote rerecua ndua hue rĩ ja ra. Amei mbia rerecua ja abe no. Hue rĩ ja ndua Jesús iquia sacuaã.

² Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchosoi mumbi nyĩquia

³ Mbia ra Jesús iquia, i mose Judas je, eya eã tuchi que ñquĩ mose ra. —Jesús amee jirichĩ nguĩã mbia je, i que ra. Nyebe mbae isiquia mondo be nguĩã sacerdote rerecua je. Amei ererecua je abe no.

⁴ —Mbae icuã tuchi asaãchĩ. Jesús seteã tuchi ameechĩ jẽje. Eiquia sacuaã, i que Judas ñee nda. —Nde quia rei. Ure eã ñene, i ja que ererecua ñee ee ra.

⁵ Judas que mbae isiquia mbaba asi mombo mondo íbii ra. Dios chuchúaa. Oso que uchosoi mumbi nyĩquia cote ra.

⁶ Sacerdote rerecua que mbae isiquia sirõ ibi si cote ra. —Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra.

⁷ Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacuaã nda. Ñionga, i que hue ibi je ra.

⁸ Nyebe eriqui nguĩã “mbia ruqui rua” i bei hue je. Namu nyee.

⁹ Aque mose que Jeremías ñimbese ique cote ra. ã ndei Jeremías ñimbese ã:

Ñquĩ mbae isiquia treinta que eisi cote ra.

Ñquĩ ndei mbia ribishoronda ñquĩ.

¹⁰ Ñquĩ mbae isiquia que emondo hue ñionga ribishorõ cote ra.

Dios ñee nguia erĩ seje nyii nae, ñquĩ ndui si, i que Jeremías embesa cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra.

¹² Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra.

¹³ —¿Erechuanãte equia ñee mose nderĩ nde? i que Pilato ñee Jesús je ra.

14 Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jêiquia mbucha ira rese, i ererecua

15 Pilato que mbia tarõ ji mo mbusẽ mbei quia pascua mose ra. Co mõi ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra.

16 Barrabás, i que etarõ ji mo je ra. Mbia chũcua tuchi que ae ra.

17 Mbia ñumunua ja mose que Pilato ñee ee ra. —¿Aba ra ambusẽ mondo jêje re? ¿Barrabás ra re? ¿Jesús ra re? i que Pilato ñee ee ra.

18—Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra.

19 Pilato que chí ngoi ndua ndua ngũenda tose ra. Eninisi que ucheẽ mondo ñee ee ra. —Ehui chõ Jesús si jê. Mbae icuã ngue esaã eãte resẽ. Atea que seque re isa ra jê. Seque re icuã tuchi que aa ra jê, i que Pilato ninisi ñee ngu je ra.

20 Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee.

21 Pilato que ñee si mbia je ra. —¿Aba ra ambusẽ mondo jêje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra.

22—¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra.

23—¿Mbae icuã esaã nde? i que Pilato ee ra. —Embucha ira rese jê, i be que mbia tasẽ tasẽ ee ra.

24—Mbia riqui “Jesús eiquia” i i tuchi chí, i que Pilato ndua ndua ra. —I mo embu seje, i que mbia je cote ra. Nyoï que mbia résaã cote ra. —A aico nyoï a. Se ra Jesús aiquiayã. Eseteãte quiatu ngue re. Jê nguiatu jêingo erese, i rei que Pilato ñee mbia je ra.

25 Mbia que ñee ja Pilato je ra. —¡Eiquia jê! Eicuãte que eriqui ra jê. Dios ra paama i eã eiquia mose. Dios paama i mose, sã ure je quiatu paama i. Ureririĩ re je abe no, i jate que mbia Pilato je ra.

26 Pilato que Barrabás mbusẽ mondo cote ra. Jesús cuasa quiatu que chíño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

27 Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda.

28 Jesús irao que embui esi ra. Tiru ireĩ nguiatu ngue emingue nguiã ee cote.

29 Nyu ritiméi uma ji que emõi eãquĩ ndese corona nda. Ira ñetẽ mo abe que emondo éoo ra. Ngoi ja que u ngũiã ndese Jesús nonde ra. Ñee icuã icuã ngue u eriĩ nda. —Judíos rerecua tuchi chõ nde re, ichõiño ngue soldados Jesús je ra.

30 Ñinimbu nimbu abe que erese ra. Ira abe que euru uru eãquĩ ndese no nda.

31 Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

32 I rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacuã pe, i que soldados ee ra. Nguerao que ee cote ra.

³³ Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je.

³⁴ Huee que vino ñimocondo tuchi mo mondo Jesús je ra. Ubi rei que erese ra. Aquere que embei eã cote ra.

³⁵ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra.

Seirao que embuchao chao nyue ra.

Sita ñetẽ mbaba mbabare o je,

i que embesa ji ra.

³⁶ Aquere que soldados chi ngoi Jesús raarõ cote ra.

³⁷ Mbia que letrero mii Jesús ãqui nguiti ibate ra. JESUS REI JUDIOS RERECUA, i que embesa mii nda. Ûqui ñii ño eriqui nguiã equia hue.

³⁸ Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ùqui nda.

³⁹ Mbia que iquia iquia chõ nguia echeẽ naa naa ecuã nda. Ñee icuã icuã ee.

⁴⁰ —“Dios chuchua ra ambucoi. Tres días mose ra ambuchuruambe” ere que equia. Ndequiracuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra.

⁴¹ Sacerdote rerecua abe que iquia iquia chõ nguia ee ra. Embesasa abe no. Amei ererecua abe no. Ûqui ngue ñee icuã icuã ja quia erii nda.

⁴² —Mbia que embuquera quera rei nyii ra. Ae si quia quera aroneate nguiã aque. Judío rerecua mose ae, sã ae ae nguichi ira si. † nda ureicu a cote, i ja que ererecua ñee icuã icuã e erii nda.

⁴³ —“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã erii nda.

⁴⁴ Ae mbuchai chi ira rese mbae mbuquiachãsa nae, ùqui abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra.

⁴⁶ Tenda cheseco mose que Jesús ñeemombo cote ra. —Elí, Elí, ¿lam a sabactani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguiã.

⁴⁷ —Elías je eriqui “quiatuchu” i reae, i rei que echeẽ andusa mo nda.

⁴⁸ Aque mose tuchi que emo esponja monde vinagre ye ra. Ira ai rese que embia ji mondo rei Jesús chúruru cote ra.

⁴⁹ —Esecha rei. ¡Sã Elías ruãte quia erea! i que eataque ñee ee ra.

⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite ri nda.

⁵² Mbia tâsa mo abe que nyeequia equia ra. Dios quiato raaque mo ngue quera quera ra.

⁵³ Jesús quera si mose que ùqui ndaaque usẽ nyoï cote ra. Nyoï que Jerusalén cote ra. Mbia tubiriã ngue mae u erese ra.

⁵⁴ Soldados rerecua que chi mae Jesús rese ra. Soldados abe no. Ûqui ngue siquichete Jesús mano mose ra. Ibi chere mose. Mae mose mbae ja rese. —Dios riiir ño eriqui re, i jate que soldados ñee erii cote ra.

55-56 Cuña ngue chi jate mae Jesús rese isho ra. María Magdalena abe que chĩ huee ra. María abe no. María rei Jacobo si. José abe si. Zebedeo ririĩ si abe que chĩ erese huee ra. Ūquĩ ngue siqui bei quia Jesús rui ra. Echĩurã ngue emĩ mĩ mbei quia ee ra. Galilėaa eico mose bei.

Mbia Jesús raaque chati cote

57 José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra.

58 —Jesús raaque emee na seje, i que oso ñee Pilato je ra. Pilato que “eno” i ee ra.

59 José que eraaque curuchoi cote ra. Ñuma ngue tirushĩ mo je ra.

60 Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoĩ que erecha cote ra.

61 María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

62 Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra.

63 Ūquĩ ngue nyoĩ ñee Pilato je Jesús rĩĩ nda. —Urendua nduachĩ nguiã ñeeñoño je rese. “Tres días mose ra aquera si”, i que equia mano nonde ra.

64 Soldados emondo rã eatiquia raarõ. Sã echĩ bei tres días eraarõ huee. ĩ nda echĩmbaaquiātu eraaque siroã suruchoi. “Quera si que ra” jichĩ nda ñee ñooño mbia je jê! Ūquĩ mose ra mbia mbiĩĩ irĩ tuchi cote, i que ñee Pilato je ra.

65 Pilato que ñee ee ra. —Soldados jendao rã. Eraaque raarõ tuchi sacua, i que ee ra.

66 Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jėsaarõ tuchi jê, i rei que soldados je cote ra.

28

Jesús raaque quera si

1 Jesús raaque ati ji que chibe sábado mose ra. ĩ nyaashĩ oso quia domingo mose, aque mose que cuña mo nyoĩ mae eatisa rese ra. María Magdaalena, i que emo je ra. María, i que enongue je ra.

2 Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra.

3 Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda.

4 Soldados que titi titi i tuchi chõ mae ūquĩ ndese ra. Emundi tuchi que ra.

5 Angel que ñee cuña je ra. —Jėsiquiche quichechĩ nguiã. Jėingo raque Jesús raaque requia ã.

6 Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae.

7 Jėso asi rã echĩmbaaquiātu mbiirandu equera si rese. “Jenonde ra esi Galilea. Jemae nda erese huee”, jenye embiirandu. Ūquĩ ae chõ ngue u nguiã jêje, i que ángel quia je ra.

8 Cuña ngue siquichete echeẽ andu ra. Eyate abe que ra. Uchã ndei que echoi quia Jesús chĩmbaaquiātu mbiirandu ra.

9 Ñeenda cúa chõ ngue Jesús nyecua saludar i ee ra. Cuña ngue nyoĩ oo erese ra. Jesús i que equiaama ama nda.

10 Jesús que ñee ee ra. —Jēsiquichechĩ nguiã sesi. Jēso ñee seresenda je. “Jēso rã Galilea. Hue ra jemaee Jesús rese”, jenyee oso ee, i que Jesús ñee cuña je ra.

Soldados ñee ñooño Jesús raaque rĩ

11 Soldados eraaque raarõsa que nyoĩ sacerdotes rerecua mbiirandu Jesús quera rese ra. Ae rese mae nae, ũquĩ ngue esenei ja ee ra.

12 Sacerdotes rerecua que nyoĩ ja ñee amee ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je.

13 —Jeñee ñooño mbia je jē. “Ureque mose Jesús resenda eraaque suruchoi rei sirõ”, jenyee chooño mbia je jē.

14 Pilato jirandu mose jendese, urecheẽ nda ee. Paama iã nda jēje chã, i que ererecua ñee ja soldados je ra.

15 Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chimbaaquiato que eraaque sirõ cose ra, nyebe eriqui nguiã i bei ã cote.

Jesús uchimbaaquiato mondo mbia mbiirandu

16 Jesús chimbaaquiato once que nyoĩ ja Galilea ra. Ibi ibate mo ngue echoi Jesús cheẽ nguire ra.

17 Jesús que nyecu a ee huee ra. Jesús rese mae mose que ngoi nguiã ndese ñee ee ra. —Jesús eã ño co reae, i rei que emo emo ñee uchiangui re ra.

18 Aguerre que Jesús si erĩchã ñee ee cote ra. —Sequirãcuã tuchi chõ se re. Se rei ibi jenda rerecua ja. Ibatenda abe rerecua ja.

19 Jēso mbia mbaaquiato quiato ja serĩ. Mbiamangue chooñoa jenda ja. Bautizar jenyee ee Paba rĩ. Serĩ abe. Espíritu Turã nũ abe no.

20 Jembaaquiato quiato tuchi secheẽ nũ. Ae asenei senei nguia jēje nae, ũquĩ jēsenei senei ja ee. Secheẽ mumbayã sacua. Aico bei ra se quia jendese. Mbae ua j a chee, i que Jesús ñee ee ra. Amén.

EL SANTO EVANGELIO SEGÚN SAN MARCOS

Juan el Bautista Dios cheẽ senei senei

¹ Á tasenei na jêje. Dios cheẽ turã Jesucristo rĩĩ. Jesucristo rei Dios rĩĩrĩ.

² Sã Isaías Dios cheẽ mbesa cose no:

Secheẽ nderaosa amondo quia nderêta aque.

Ae ra ñeenda mbuquiche nembraerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eĩ jenye si chõ nguia jê abe ico quiatu nandererecua raarõ arõ”, i equia turúquiaa hue,

i que Isaías embesa ra.

⁴ Juan el Bautista que tu ũquí ñee nguire cote ra. Dios cheẽ ngue esenei senei nguia turúquiaa cote ra. —Jendua si Dios rese. Jêhui chõ jêicuã si. Dios jêicuã mbutiã sacua. Ũquí mose nda bautizar ae jêje chã, i beite que Juan nguia ñee nda.

⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Mbia huicua nenei nenei mose Dios je, ũquí mose que Juan ndiqui bautizar i ee ra. Ama Jordán ye.

⁶ Quicuã mbuaera chõ ngue Juan irao ra. Camello. Mbae ire chõ ngue enubicuasa no nda. Tucu mbuae chõ ngue eu eu quia ra. Irao quiaa rĩnda abe.

⁷⁻⁸ Dios cheẽ ngue esenei senei nguia ra: —I achõ je chõ aico nguia bautizar i mbia je co. Co chi emo ndu quia serui co. Dios rĩĩrĩ tuchi chõ ae re. Ae quia equirãcua tuchi sesi re. Ae quia eturã tuchi sesi no nde. Ae quia tura bautizar i mbia je Espíritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye.

¹⁰ Jesús que usẽ oso ama si cote ra. Ibei que nyeequia ee cote ra. Espíritu Turã ngue nguichi u erese cote ra. Nyurushi rã ngue eru nguichi erese ra.

¹¹ Ibei jenda que ñee ee ra. —Serĩĩrĩ ño nde re. Sechesequa chõ nde re. Seyate nderese, i que Dios ñee ee ra.

Jesús tambĩ cuã, i raque Satanás

¹² Espíritu Turã ngue Jesús querao turúquiaa cote ra.

¹³ Huee que Jesús riqui arete ra. Cuarenta días. Nyacua risha ite re. Mbia rĩichare ja ite re. Satanás que tu rei tã i ee cote ra. Angeles que ngaẽ ngaẽ nguia ereaquiatu ra.

Jesús mbia mbaaquiату quiatu ramo

¹⁴ Mbia rerecua que Juan tarõ cárcel cote ra. Aquere que Jesús si Galiléaa ra. Dios cheẽ turã ngue esenei senei nguia huee ra.

¹⁵ —Achite Dios ñi tu mbia rerecuarã a. Jendua sí Dios rese. Jêhui chõ jêicuã si. Dios cheẽ turã jêicua. † nda Dios jemingo bei, i que Jesús quia ñee mbia je ra.

Jẽingo serui, i Jesús uchĩmbaaquiaturã je

16 Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ũqui.

17 Jesús que ñee ee ra. —Serui bei chō jēingo jē. Taembaaquiату quiatu. Mbia teendu endu bei quia seje cote, i que ee ra.

18 Nyoï ja que erui ra. Sira mbuasa si que echoi hui ra.

19 Pe jiri que mae Jacobo rese ra. Enongue rese abe. Juan, i equia ee. Zebedeo riirĩ ja rei ũqui. Huee que echi ja canoa ye sira mbuasa mbitirō tirō nda.

20 —Jēingo serui, i que Jesús ñee ee ra. Echeē nduibe tuchi que echoi erui ra. Ngu que esecha choi ra. Eru que siquichō canoa ye ngũimba rese ra.

Jesús aba checuayã icuã jea mbia mo si

21 Nyoï que sucha tubiriã Capernaum nda. Sábado mose que Jesús si judíos chumunua nuásaa ra. Mbia mbaaquiату quiatu sacuã.

22 Mbia rerecua rã ño ngue eriqui mbia mbaaquiату quiatu ra. Embesasa rã eã. Nyebe mbia riqui nguã nyuruira tuchi echeē andu.

23 Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra.

24 —¿Mbaerã erechu urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chō nde re. Areicuate se, i rei que aba checuayã ñee asite ee ra.

25 Jesús que ñee asi ee cote ra. —¡Equiriri chō jē! Esē oso amei ñiangui si, i que ee ra.

26 Jesús cheē mose que aba checuayã amei mburirite cote ra. Tasē ngue oso usē amei si cote ra.

27 Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiату quiatu ucheē namonda je co. Equiracuã ae ñee nguã. Mbia rerecua rã ño eriqui nguã ñee aba checuayã icuã je co. Sã aba checuayã echeē mumbayãte jē, i que mbia ra.

28 Mbia que jirandu jei Jesús rese Galilea jenda ja cote ra.

Jesús Simón ninisi si mbucherō

29 Jesús que usē nyoï mbia chumunuasa si cote ra. Nyoï que Simón nyuchua ra. Andrés abe que siqui rei huee tuchia ra. Jesús que ique nyoï huee ra. Jacobo rese. Juan ndese abe no.

30 I que Pedro chari rasi u nyaara ee ra. Eracu tuchi que ra.

31 Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherō

32 Itondaru ramo mose que mbia erasi rurucuaē cuaē tuchi Jesús je ra. Ae aba checuayã quereco quia nae, ũqui abe que ecurucuaē cuaē tuchi quia ee ra.

33 Sucha tubiriã jenda ja que chi ñumunua eiquésaa ra.

34 Mbia rasi chumumbara que embucherō cherō ja ra. Aba checuayã icuã tubiriã ngue ejea jea quia mbia si ra. Aba checuayã ngue Jesús icuate rei ra. Nyebe Jesús riqui nguã echeē ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, a que mose que Jesús juã oso mbia tiãsa ra. Ñee sacua Dios je itondaru bei mose.

³⁶ Simón ngue oso erui emuña nda. Nguesenda rese.

³⁷ Ngasẽ ngue ee ra. —Pe mbia chi nderequia jate pe, i que ee ra.

³⁸ Jesús que ñee ee ra. —Nyao sucha tubiriã mbuchesea sea achi jenda. Dios cheẽ nda asenei senei ee chã. Nyebe achu nguiã, i que ee ra.

³⁹ Galilea jenda que embuchesea sea ja cote ra. Dios cheẽ nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰ Emo ndasi que ngasẽ Jesús je ra. Leproso, i que ùqui erasi je ra. Tu que ngoi nguiã ndese ñee Jesús je ra. —Nde sembucherõse mose, sembucherõ se, i tuchi que ñee ee ra.

⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra.

⁴² Echeẽ nduibe tuchi que nyerõ cote ra.

⁴³⁻⁴⁴ Jesús que ñee ee ra. —Sã jẽ. Erecheẽchĩ nda emo je jẽ. Eso nderasiã ndeacuquia sacerdotje cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra.

⁴⁵ Mbia que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

2

Jesús emi sayã mo mbucherõ

¹ Emo mose jiri que Jesús nyebi Capernaum nda. Echuchua ereco mose que mbia jirandu erese ra.

² Mbia tubiriã ngue ñumunua ee ra. Mbia chayã tuchi que ra. Ei quesa abe itãyã tuchi que ra. Dios cheẽ ngue esenei senei tuchi quia ee ra.

³ Mbia cuatro que erasi mo curucuaẽ ee ra. Emi sayã.

⁴ Mbia tubiriã ngue tuchia mbiitãyãte eriquisã nda. Nyebe erasi ruruchoi nguiã sui tei quite arõ. Tei que endoro cote ra. Erasi que embuquichi imbu quisa ye Jesús je cote ra.

⁵ —Erurucuaẽsa riqui seicuate ùqui, i que Jesús ñee uchiangui re ra. Nyebe ñee nguiã emi sayã je. —Echo, ndechisaã mbae icuã ambutiã nguia ndesi a, i que ee ra.

⁶ Embesasa mo abe que chi echeẽ andu ra. Mae icuã icuãte que equia Jesús res e ra.

⁷ —¿Mbaerã Jesús riqui ñee ùqui nde? Ñee icuã icuã ñochĩ equia Dios rĩ co. Dios íbatenda ae mbi a chiao icuã mbutiã tiã nguia esi resẽ, i rei que ñee icuã icuã Jesús rĩ nda.

⁸ Jesús que ùqui ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde?

⁹ ¿Ma mbarangiatuã eã jiri jẽje re? ¿Mbia icuã mbutiã esi ere? Mbias rasi mbucherõ ere no ae. ¿Ma mbarangiatuã eã jiri jẽje re?

¹⁰ Dios rucucha rei se. Mbias chiao icuã mbutiã aqiatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra.

¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra.

12 Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbia resa rae ja. —Ã ndese que ureico mae eã tuchi emo mose ra, i tuchi que mbia u mae nyuruira erese ra. Mbia que ñee turã jate Dios quirãcuã ñi cote ra.

Serui bei eico, i Jesús Leví je

13 Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiato quiato ra.

14 I que Jesús oso quia ra. Mae ngue Leví rese ra. Alfeo riirĩ ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguã eru.

15 Jesús que nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiato abe rese. Mbia icuã mo abe que chi quiaru erese no nda. Ũquĩ tubiriãte que siqui eru ra.

16 Fariseos que ñee icuãte Jesús chimbaaquiato je ra. Embesasa abe que ñee icuãte ee ra. —¿Mbaerã Jesús riqui quiaru mbia icuãte rese re? i que ñee nda.

17 Nyebe Jesús ñee nguã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguã mbia turã je. Mbia icuã je chõ ngue achu nguã “jenyu seje” i, i que Jesús ra.

Jesús chimbaaquiato hui ãte uchüu si

18 Juan ñimbaaquiato que hui uchüu si aque mose ra. Fariseos chimbaaquiato abe no. Nyebe mbia ngaẽ nguã ñee Jesús je. —¿Mbaerã ndechimbaaquiato abe riqui hui ãte uchüu si re? i que ñee Jesús je ra.

19 Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchüu si aque mose no.

20 Sã eru riqui mano emo mose no. Aque mose ramo nguiauto ra equiato hui uchüu si cote.

21 Sã emo ndiqui tiru yasu mñ aroneate tiru ima sorei rese no. Eyasu ra nyaacua quiata eima si. Soro icoi tuchi chõ nda cote.

22 Sã emo mbaeri rasi ramo nderecoquiato eã eriru ima ye no. Mbae ire ima ye ererecoquiato aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiãcuãte ra cote. Mbaeri yasu quia nda equerecoquiato nguã mbae ire yasu ye. Soroã sacuã, i que Jesús ñee ee ra.

Jesús chimbaaquiato mbae a ishao shao sábado mose

23 Sábado mose que Jesús si quia mbiaco ite ite rĩ emo mose ra. Echimbaaquiato que quiata a nyiqui nyiqui choi quia eru ra.

24 Fariseos mo ngue ñee ee ra. —¿Mbaerã ndechimbaaquiato riqui mbae ishao shao sábado mose re? Co mose chõ mbia riqui uquenea ucuã resẽ, i que fariseos ñee Jesús je ra.

25 Jesús que ñee ee ra. —¿Embesa ji rese jemae eã David rñ nyii re? David riãcuãte que aque mose ra. Eresenda abe riãcuãte que eriqui aque mose no nda.

26 David que ique Dios chuchua aque mose ra. Abiatar que sacerdote rere cua aque mose ra. Mbichae Dios chuchua jenda que David u ra. Mee mee ngue nguesenda abe je ra. Eriãcuãte quiato ngue re. Sacerdote mbaerã ja chõ ndaque mbichae, i que Jesús fariseos je ra.

27 —Sábado que Dios chao mbia mbaerã nda. Sábado mbaerã eã ño Dios mbia ao nguã.

28 Sábado rerecua bei chõ se re, i que Jesús ñee fariseos je ra.

3

Jesús emo o tomei mo mbucherō

¹ Jesús que oso mbia chumunuásaa cote ra. Huee que eo tomei mo ndiqui ee ra.

² Mbia que mae nguiatute quia Jesús rese ra. —Ma Jesús eo tomei mbucherō. Sábado mose raque co. Sã embucherō. Nandechēē icuã icuã nda ee chã, i que eu mae nguiatute Jesús rese ra.

³ Jesús que ñee eo tomei je cote ra. —Ehuã na u aa mbia ite re, i que ee ra.

⁴ Jesús que ñee mbia je ra. —¿Mbae eturãte jêje co tenda sábado mose re? ¿Coche nandeiico mbae turã naa naa sábado mose re? ¿Coche nandeiico mbae icuã naa naa co mose re no? ¿Coche mbia mbucherō co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee ãte echēē mose ra.

⁵ Jesús que paama i mae mbia rese ra. Eya eãte que eriqui mbia chiã ãtã ndese ra. Ñee ngue eo tomei je cote ra. —Ndeo emee secuti, i que ee ra. O que emee Jesús cheē mose ra. Aque mosechi que eo nyerō cote ra.

⁶ Nyebe fariseos paama i nguiã Jesús je. Mbia mbucherō mose sábado mose. Ndua ndua ja que Jesús i quia nonde ra. —Jesús nandeiquia rei, i tuchi que equia Herodes resenda ja je ra.

Mbia tubiriã nyoí Jesús rui

⁷ Jesús que oso ama ndisha quiti ra. Uchimbaaquiaturã rese. Mbia tubiriã Galilea jenda que nyoí quia eruí ra.

⁸ Mbia que jirandu ja tuchi Jesús chisaã turã ndese ra. Nyebe eriqui nguiã ngaē ngaē erea. Judea jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ūquí ja que ngaē ngaē nguia erea ra.

⁹ Nyebe Jesús ñee nguiã uchimbaaquiaturã je. —Canoa mo jendu rã ino mbuquiche co rĩ, i que ee ra. Mbia quiaturã ngue emumbite nguiã.

¹⁰ Mbia que embucherō cherō tuchi quia nyii ra. Nyebe erasi ataque riqui nguiã “taoco erese” i raque. Nyebe eriqui nguiã ñimaña maña tuchi. “Nandeco Jesús rese” i.

¹¹ Aba checuayã icuã mae mose Jesús rese que ngoi ngoi quia nguiã ndese ñee ee ra. —Dios ririĩ ndei nde, i que equia ñeemombo mombo ee ra.

¹² Jesús que ñee asite ee ra. —“Co rei Dios ririĩ co” jenyechĩ nda jê, i que ee ra.

Jesús mbia doce irabo uchimbaaquiaturã

¹³ Jesús que nyui oso sita ibate mo ndese ra. “Jenyu” i que uchiirabobi je ra. Nyoí que erea ra.

¹⁴ Ūquí doce que eirabo nguesendacuã nda. Embuchao chao sacuã mondo Dios cheē nenei nenei.

¹⁵ Uquirãcuã ngue emondo ee ra. Aba checuayã jea jea sacuã mbia si. Mbia rasi chumumbara mbucherō cherō sacuã.

¹⁶ ã ndei mbia echirabo ã:
Simón (Pedro, i abe que ee ra.)

¹⁷ Jacobo (Zebedeo ririĩ ndei Jacobo.)

Juan (Jacobo nongue rei Juan. Boanerges, i que ūquí ja je ra. “Ama sieu je ririĩ” i chō nguiã ee.)

¹⁸ Andrés
Felipe

Bartolomé

Mateo

Tomás

Jacobo (Jacobo rei Alfeo riiri.)

Tadeo

Simón el Cananista

¹⁹ Judas Iscariote (Aque que Jesús mondo mbia icuã je ra.)

Ũquĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoi que ique tuchúaa cote ra. Uchĩmbaaquiату rese.

²⁰ Mbía que ngaẽ ngaẽ tuchi quia erea no nda. Equiaru mose rocoĩ. Echĩmbaaquiату abe quiaru mose rocoĩ.

²¹ Jesús nongue jirandu mose que echoi erea ra. Equiachã eriqui reĩ nguiã ee. Nyebe eriqui rei nguiã “nanderao” i raque.

²² Embesasa ngaẽ nguia Jerusalén si nae, ũquĩ ngue ñee ñee mbia je ra. Mbía mbuqueta queta Jesús riĩ. —Satanás quirãcuã je chõ Jesús riqui nguiã aba checuayã icuã jea jea mbia si co, i rei que ñee icuã Jesús je ra.

²³ —Jenyu rã tacheẽ jêje, i que Jesús ee ra. —¿Mañĩ nda Satanás aba checuayã icuã jea mbia si re? Erimba chõ nyeresẽ.

²⁴ Gobierno icuã icuã mose nyue, ua rae.

²⁵ Tuchuamo jenda icuã icuã mose nyue, ua ra eno.

²⁶ Satanás icuã icuã mose nyue, equirãcuã nda ua no.

²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõt e quia esi co. Dios Satanás quirãcuã mbutiã ja arõte quia co.

²⁸ Tacheẽ nyecua jêje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no.

²⁹ Emo ñee icuã mose Espiritu Turã nñi, ũquĩ icuã nguiatu ra Dios mbutiã eã mbei esi, i que Jesús ee ra.

³⁰ —Jesús chiangui re aba checuayã icuã ndiqui co, i quiatu ngue mbia nguiã. Nyebe Jesús ñee nguiã ũquĩ.

Jesús nongue ngaẽ erea usi rese

³¹ Jesús nongue que ngaẽ ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra.

³² Mbía que chi jate ngoi Jesús jii ra. Ũquĩ ngue ñee ee ra. —Hue ndesi riqui nderequia itaicuee hue. Ndenongue rese, i que ee ra.

³³ —¿Aba je chõ aico “taĩ” i chã? ¿Aba je chõ aico “senongue” i no ñã? i que Jesús mbia je ra.

³⁴ Jesús que mae ucheẽ andusa rese ra. —Ã je chõ aico nguiã “taĩ” i. Ã je chõ aico nguiã “senongue” i no.

³⁵ Ae Dios cheẽ mumbayã nguia nae, ũquĩ je chõ aico nguiã “senongue” i. Ũquĩ je chõ aico nguiã “taĩ” i no, i que Jesús ñee ee ra.

4

Emo mbae eĩ mombiquia mbiquia

¹ Jesús que mbía mbaaquiату quiatu si ama nimia ndese ra. Mbía que ñumunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbía mbaaquiату quiatu ra. Mbía que chi jate ama nimia ndese ra.

² Jesús que mbia mbaaquiату quiату tuchi quia ra. Ejemplos que esaã saã tuchi ee ra.

³ —Jenyisaquia rã serese. Sã emo si rei mbae eĩ mombiquia mbiquia no.

⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no.

⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene.

⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã.

⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaẽ eriquisã nda. Nyebe ia eã ño nguiã.

⁸ Sã emo ndiqui uqui uqui ibi turã no. Ûqui nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no.

⁹ Jëisa mose, secheẽ jeñandu turã na, i que Jesús ra.

Jesús ucheẽ mbiassa uchimbaaquiату je mbae eĩ ñi

¹⁰ Mbia ataque nyoi mose que Jesús ji jenda ñee ee ra. Echimbaaquiату doce rese. —Ndecheẽ embiassa tuchi rã ure je mbae eĩ ñi, i que ñee Jesús je ra.

¹¹ Jesús que ñee ee ra. —Mbia rerecua tuchi quiarei Ibatenda. Ae chõ asenei senei nguiã jëje ã. Secheẽ ambiassa asa bei tuchi quia jëje co. Mbia ataque quia siqui sereã erese co. Mbia ataque je aico ejemplos achõ naa naa mbei co.

¹² Eanduchõ sacua eicua turã nonde rocoi. Sã eriqui uba eãte Dios icha rui no. Dios eicua mbutiã eã sacua esi, i que Jesús ñee nda.

¹³ Jesús que ñee ee ra. —¿Secheẽ jëicuayãte mbae eĩ ñi ñee mose jëje re? ¿Mañi jenye quiату ra ejemplos ataque icua re no?

¹⁴ Ae mbae eĩ mombiquia mbiquia nae, Dios cheẽ nenei neneisa rã ño aque re.

¹⁵ Ae uqui uqui ñeenda rui nae, mbia Dios cheẽ andu chooñosa rã ño ùqui nde. Ae Dios cheẽ andu chooñote quia nae, ùqui ñiangui si chõ Satanás ndiqui nguiã Dios cheẽ ndirõ.

¹⁶ Ae uqui uqui sita arõ nae, mbia mo na ño ùqui no nde. Dios cheẽ andu mose, isi turã ndaque. Eyate raque erese nyii.

¹⁷ Mbia icua icua mose ee Dios cheẽ ñi, hui jei chõ nguiã esi. Mbae rao eã naanguia chõ ùqui nde.

¹⁸ Ae uqui uqui nyu réndaa nae, mbia mo na ño ùqui no nde. Dios cheẽ andu turã ndaque. Siqui bei eã ño nguiã erui.

¹⁹ Umbaerã achõ ndese chõ eriquichi nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee.

²⁰ Ae uqui uqui ibi túraã nae, mbia mo na ño ùqui no nde. Ûqui nguiatu Dios cheẽ ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emii eã mbaequi re no. Erendi checua chõ nda nandemii. Mbia resae ja sacua.

²² Mbae checuayã nda nyecua ja emo mose. Mbia chiangui renda checuayã nda nyecua emo mose no.

²³ Jëisa mose secheẽ jeñandu turã na.

²⁴ Secheẽ nda jeñandu chooñoohĩ jẽ. Jẽ secheẽ mumbayã mose, taembaaquiatsu i i tuchi.

²⁵ Emo umbae rerequia mose, Dios ra embaerã mo mondoobe ee. Emo embae eã mose, Dios ra embae sirõ ja esi.

Dios rimba ñimbeta chõ nguiã mbae eĩ na

²⁶ Dios rimba ñimbeta chõ nguiã mbae eĩ na. Sã emo mbae eĩ tiquia tiquia no.

²⁷ Suri ra itõ mocoinde cote. Eruri cuasu tuchi ra cote. Echa embusuriã ndaque.

²⁸ Dios ae chõ embusuri nguiã. Eracói rane. Iã chee. Ea ñetẽ nane. Ea cuasute cote. Ea ireĩ cote.

²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jẽje.

³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si.

³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ñquĩ miĩ ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiatsu ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiatsu quiatsu ejemplos je ra. Mbiam quenea tuchi chee que ra.

³⁴ Ejemplos achõ ngue esenei senei mbia mbaaquiatsu sacua nda. Uchimbaaquiatsu je quiatsu que embiasa turã turã nda.

Jesús quiririã icuã icuã mbutiba; ama ndebera abe

³⁵ Itondaru ramo mose que ñee uchimbaaquiatsu je ra. —Nyao ama ndisha robei, i que ee ra.

³⁶ Ae canoa ye Jesús ñi mbia mbaaquiatsu quiatsu nae, aque ye sí que echimbaaquiatsu Jesús rerao ra. Mbiam tubiriã ndecha. Canoa mo abe que nyoi quia erese ra.

³⁷ Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñiimi serĩ tuchi ee.

³⁸ Jesús que uque rei oso quia canoa ndiita quiatsu ra. Uãquĩ ndua arõ ngue esi rei quia ra. Echimbaaquiatsu que emumba ra. —Urembaaquiatusa, echumumba. Nandemanochĩ nda re, i que Jesús je ra.

³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra.

⁴⁰ Ñee ngue uchimbaaquiatsu je cote ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra.

⁴¹ Siquiche bei que equia ra. Nyuruira tuchi que mae Jesús quirãcuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

5

Jesús aba checuayã icuã jea

¹ Ngasẽ ngue ama ndobei cote ra. Gadara, i que hue ib je ra.

² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra.

³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra.

⁴ Nyucua mocoĩte rei nda cadenas je raẽ. Ei nda echucua rei raẽ. Eo abe. Ucuasa nda endoso ndoso bei quia ra. Emo nda embutiba aronea tuchi quia ra.

⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra.

⁶ Isho que mae Jesús rese ra. Uchã asi que eu ngoi ngũĩã ndese enonde ra.

⁷⁻⁸ Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios ririĩ ño nde re. ¡Sembasichĩ nda se jẽ! i tuchi que ee ra.

⁹ —¿Mañi ndeje re? i que Jesús ee ra. —Etubiriã, i chõ nguiã seje. Ure cuabẽte quia ñene, i que ñee Jesús je ra.

¹⁰ —Isho ra uremondochĩ, i tuchi que aba checuayã ñee Jesús je ra.

¹¹ Chiasu socoi tubiriã ngue chi quiaru huee ibi ibátee ra.

¹² Nyebe aba checuayã icuã ñee ja nguiã Jesús je. —Uremondo ja rã chiasu socoi chiangui re, i tuchi que equia Jesús je ra.

¹³ Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu ri nda. Ama ndisha ye que echoi ja mano nda.

¹⁴ Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngaẽ ngaẽ nguia jirandu turã cote ra.

¹⁵ Ngasẽ ngue euaẽ Jesús je ra. Ae aba checuayã icuã nguereco uchiangui re nyii nae, aque abe que siqui huee ee ra. Huiirao resebe que eñi ngoi ra. Earacuate que ee cote ra. Nyebe mbia riqui nguiã siquichete.

¹⁶ Ae mae erese nae, ũquí ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no.

¹⁷ —Eso rã urerecha urereca si, i jate que hue jenda ñee Jesús je ra.

¹⁸ Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra.

¹⁹ Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui serese ra”, ere oso nderesenda mbiirandu, i que Jesús ee ra.

²⁰ Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sembucherõ nguiã, i ja jate que equia mbia je ra. Mbia que nyuruirate quia mae erese ra.

Jesús Jairo ririĩ mbucherõ; ari mo abe mbucherõ

²¹ Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erea ra. Ama nimiaa eriquibe mose.

²² Judíos rereca mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi ngũĩã ndese ñee ee ra.

²³ —Qui seriirĩ si quia mano qui. Nyao rã ndeo terechono earõ. Embucherõ sacua, i tuchi que equia Jesús je ra.

²⁴ Jesús que oso erese cote ra. Mbia tubiriã abe que nyoï quia ñimajaã tuchi erui ra.

²⁵ Ari rasi mo abe que oso quia erui ra. Eruqui nda uchẽ mbei quia ee ra. Doce años nyee.

²⁶ Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra.

²⁷ Jirandu chee que Jesús rese ra. Equite quiti que esi mbia joõ nda. Oco que oso eirao rese ra.

²⁸ —Eirao achõ ndese se oco mose, acherõ nda se, i nda ra.

²⁹ Aque mose tuchi que eruqui ti i ee cote ra. Ngasiã ngue eicua uchiangui re cote ra.

³⁰ —Sequirãcuã ngue mbia mo mbucherõ nda, i que Jesús uchiangui re ra. —¿Aba oco seirao rese re? i que mae uquite quiti ra.

³¹ Echimbaaquiatu que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i que ee ra.

³² Jesús que nyuruba ruba mae nda. —¿Aba oco serese re? i.

³³ Ari que jirandu tuchi ucherõ ndese ra. Eireite que titi titi i huĩ ee ra. Ngoi que ngũã ndese Jesús resa quiti ra. Mbae que esenei ja ee cote ra.

³⁴ Jesús que ñee ee ra. —Seicuate que se ra. Nyebe arembucherõ nguiã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngaẽ Jairo chuchua si ra. —Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra.

³⁶ Jesús que echeẽ ñandu ra. Ñee ngue Jairo je cote ra. —Ndeya eã techĩ nda jẽ. Seicua chõ se jẽ, i que Jesús ee ra.

³⁷ Jesús que oso eraaque rea cot e ra. Uchimbaaquiatu tres que equerao ra. Pedro. Jacobo abe. Juan abe no. Jacobo nongue que Juan nda. Ûqui mi ño ngue equerao area ra.

³⁸ Ngasẽ ngue Jairo chuchua cote ra. Mbia que chi ja nyeseo ãquẽ ndaaque rese ee ra. Nyiibu tuchi que u ra.

³⁹ Ique que oso ñee mbia je ra. —¿Mbaerã jẽingo nyiibute re? ¿Mbaerã jẽingo nyeseo re? Æquẽ manoãte resẽ. Uque chõ u co resẽ, i que Jesús ñee mbia je ra.

⁴⁰ Mbia que iquia iquia chõ ee ra. Jesús que mbia mondo ja chee itaicuee ra. Eru rese que esi ique eriirĩ ndaaque rea ra. Esi abe rese. Nguesenda abe rese.

⁴¹ Eraaque o que eisi ñee ee ra. —Echuruã, Æquẽ, i que ee ra.

⁴² Echeẽ mose tuchi que ãquẽ juã ngata cote ra. Etiarõte que ra. Doce años que ra. Mbia que nyuruirã tuchi mae erese ra.

⁴³ —“Jesús que co raaque mbuquera ra”, jenyechĩ nda emo je jẽ, i que Jesús mbia je ra. —Nderiirĩ embuquiaru cote, i que ee cote ra.

6

Mbia Nazaret jenda Jesús isiteã

¹ Hue si que esi nguécuaa ra. Echimbaaquiatu abe que nyoï erese ra.

² Sábado mose que mbia mbaaquiatu quiatu judíos chumunuásaa ra. Mbia que nyuruirã ja tuchi u echeẽ andu ra. Ñee ñee ngue u nyue ra. —¿Mangue eriqui ñimbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ.

³ Ira mbitorō tirōsa chō ndaque. María ririñi ño ndaque. Jacobo nongue chō ndaque. José abe no. Judas abe no. Simón abe no. Ñ echari enongue riqui ja raque nanderese ñ, i que mbia ra. Nyebe mbia Jesús cheẽ andu sereã nea nguiã.

⁴ Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguécua jenda cheẽ achō nguia ra eisi turã eã. Ngōngue cheẽ achō nguia ra eisi turã eã no, i que Jesús ñee nguécua jenda je ra.

⁵ Jesús que mbia mae sayã saã saã aroneate quia huee ra. O que echono mbia rasi mii mii arō embucherō nda.

⁶ Hue jenda mbia que chi Jesús icua eãte ra. Nyebe Jesús nyuruira tuchi nguiã mae erese. Sucha tubiriã mbuchesea sea que equia mbia mbaaquiātu quiātu ra.

Jesús uchimbaaquiātu doce mondo ucheẽ nenei nenei sacuiã

⁷ “Jenyu” i que uchimbaaquiātu doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacuiã mbia chiangui si.

⁸⁻⁹ —Mbae mo nda jendaochĩ icua. Mbae riru mo abe ra jendaochĩ. Jenyurã mo abe ra jendaochĩ no. Mbae isiquia abe ra jendaochĩ. Jëiyao nongue mo nda jendaochĩ. Jëirao nongue mo abe ra jendaochĩ no. Jenyitochoquia mii ño jendaõ.

¹⁰ Jengasẽ mose sucha tubiriã mo, aque tuchia mii ño jëingo uque. Tuchua ra jembuchesea seate chĩ jëingo mose huee. Ae ra jengue nyii nae, hue tuchia bei chō jëingo uque.

¹¹ Sucha tubiriã jenda mo jëisi sereã nea mose, jëhui chō esi. Hue jenda jeñee andu sereã mose, jëso chō hue si. Jëi tubi jembutomo tomo ee. Hue jenda huicua icua sacuiã. Tacheẽ nyecua jëje. Ae ra jeñee isi sereã nae, ñquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ñquĩ nguia ra embasi tuchi Sodoma jenda si. Gomorra jenda abe si, i que Jesús ñee uchimondobi je ra.

¹² Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra.

¹³ Aba checuayã icuã ngue ejea jea tuchi quia mbia chiangui si ra. Mbae eĩ quira que equiti quiti quia mbia rasi rese ra. Mbucherō ja que ra.

Mbia Juan el Bautista iquia

¹⁴ Mbia que jirandu ja Jesús rese cote ra. Herodes abe que jirandu erese ra. Errecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera si ra. Nyebe eriqui nguiã mbae raã jate, i rei que Herodes ra.

¹⁵ Elías Jesús riqui reĩ emo je reaẽ. Dios cheẽ mbuchecuasa ñiinda Jesús riqui reĩ emo je re no aẽ.

¹⁶ Herodes que jirandu Jesús rese ra. Juan el Bautista eriqui reĩ nguiã ee. —Juan ño eriqui re. Ae ñquĩ achisia. Quera si chōchĩ ere, i rei que Herodes ra.

¹⁷⁻¹⁸ Herodes Juan mondo quiātu quia carcel nyii reaẽ. Nyucua nda cadena je ra. Paama i nda Juan je ra. —iNde ndenongue ninisi ereroco aroneate jëi i quiātu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra.

¹⁹ Herodías que Juan ucuayãte quia ra. —Taiquia, i rei que equia ra.

20 Herodes bite rei que Juan ñee andu ra. Icuayã jiri rei que ra. —Juan turâte que ra jê, i que equia Juan nã nda. Nyebe eriqui nguiã ireĩ ireĩte esi. Nyebe Herodías Juan iquia aroneate nguiã.

21 —Co mose chõ jê, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je.

22 Aque mose que Herodías riirĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae rá amee ndeje re? Echeẽ ño seje.

23 “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguiã ndeje a, i que Herodes ñee nyucuaaque je ra.

24 Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista ãquĩ ño embu seje”, ere chõ ee, i que esi ra.

25 Nyebe que esi ñee Herodes je cote ra. —Juan el Bautista ãquĩ emee na seje plato ye, i que ñee ee ra.

26 Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. Á seandu ja chõchĩ. Nyebe ra secheẽ ambuchebi eã ee, i que Herodes uchiangui re ra.

27 Soldado mo ngue emondo cote ra. —Quiatu Juan iquia. Eãquĩ eru seje, i que ñee soldado je ra.

28 Cárcel que esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra.

29 Juan ñimbaaquiatsu jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mõi je

30 Ae Jesús mondo quia uchimbaaquiatsu, ùquĩ ngue ngaẽ si ee cote ra. Uchisaã ngue esenei senei cuaẽ ee ra. —Eĩ ure que mbia mbaaquiatsu quiatsu ra, i que ecuaẽ Jesús mbiirandu ra.

31 Mbía tubiriãte que ngaẽ nguiã ñindecua ndecua erea ra. Equiaru mose rocoĩ abe. Nyebe ñee nguiã uchimbaaquiatsu je. —Nyao rá mbia eãsaa, jenguenea ucua mbirĩ, i que ra.

32 Ae ae que nyoĩ canoa ye mbia eãsaa ra.

33 Mbía tubiriã tuchi ngue mae ñochĩ nguiã echoi rese. Jesús icua chõ ngue ra. Mbía que nyoĩ uchã ibi rĩ nda. Sucha jenda ja. Ûquĩ nane ngue nyoĩ ngasẽ Jesús raarõ ama nimia nda.

34 Jesús que usẽ canoa si cote ra. Mbía tubiriã ndese que mae nda. Eya eã tuchite que erese ra. Oveja raarõ iriã na nguiatsu que mbia chi ee ra. Mbía que embaaquiatsu quiatsu tuchi cote ra.

35 Tenda oso mose que echimbaaquiatsu ñee ndei ee ra. —Tenda osote resẽ. Mbía chuchua mo ãte a resẽ.

36 Mbía chiurã eã abete a resẽ. Mbía embui mondo uchaurã ndequia requia sacuaã sucha achi jenda rea rea, i que ñee Jesús je ra.

37 —Jeño mbae jemondo ee echaurã, i chõ ngue Jesús ñee ee ra. —Tei. Mbae quia ra aba mondo ee. Mbía tubiriã tuchite quia ñene. Mbae isiquia tubiriã tuchi je quia nda aba mbae isi rei nguiã ña. Mbía chayãte chõ enõ nde, i que ñee Jesús je ra.

38 —¿Manya mbichae jendeco ùquĩ nde? Jẽso mae erese no, i que Jesús ee ra. Emo ngue oso mae erese eicua ra. —Cinco mbichae riqui i co. Sira nyeremo abe, i que echimbaaquiato mo ñee ee ra.

39 —Sã mbia ngoi ngoi ja quiata tose. Echesea sea, i que Jesús ra.

40 Mbía que ngoi ngoi ja nyesea sea cote ra. Cincuenta jaaja. Cien abe no.

41 Jesús que mbichae cinco sirõ cote ra. Sira nyeremo abe no. Ibei rese que mae graciãs i Dios je ra. Mbichae que esiquio quio cote ra. Mee mee ngue uchimbaaquiato je ra. —Jemee mee mbia je, i que uchimbaaquiato je ra. Sira nyeremo abe que esiquio quio mbia ja je ra.

42 Mbía ja que eu tuchi ra. Ñimbio chee que ra.

43 Mbía chiú sique tubiriã tuchi que ra. Mbichae rire. Sira rire abe no. Doce iru que mbia mombisẽ esique sique je ra.

44 Cinco mil hombres que mbia mbichaecua ra.

Jesús ngata i arõ

45 Aquere que Jesús uchimbaaquiato mondo ja canoa ye ra. —Jẽ nane jẽso Betsaida sobei. Mbía tambui turã na mondo uchuchúaa se nyii, i que ra.

46 Jesús que mbía mbui turã mondo cote ra. Ae ae que oso sita ibátee cote ra. Ñee sacua Dios je.

47 Huee que ae ae riqui itondaru chee ra. Canoa yenda que chi bei ama ndiite rĩ nda.

48 Echimbaaquiato que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Nguira ñee mose que esi eriichã nda. I arõ ngue esi quia ngata ra. Nyucuaño nda eña nde.

49 Mbía aingue eriqui reĩ nguiã echimbaaquiato je. Ngata mose i arõ. Nyebe tasẽ tasẽ nguiã.

50 Echimbaaquiato chiã ngue cuãacuã i tuchi mae erese ra. —Jẽsiquichechĩ nguiã. Jẽya chõ ae. Se chõ nyeresẽ, i que Jesús ñee ee ra.

51 Ua que canoa ye embirõ cote ra. Quiririã ngue tiba cote ra. Echimbaaquiato que nyuruira tuchi u mae erese ra.

52 Jesús mbichae mbeta quia nae, ùquĩ ngue echimbaaquiato icuayãte uchiangui re ra. —Dios riirí ño eriqui reaẽ, i ãte que eicuayã nda. Eãquĩ ãtãte chõ ngue ra.

Jesús mbía Genesaret jenda mbucherõ cherõ

53 Ngasẽ nyee que sobei cote ra. Genesaret, i que hue ibi je ra.

54 Jesús usẽ mose canoa si que mbía eicua jei ra.

55 Mbía que nyoj ja uchã tuchia mbuchesea sea ra. Erasi rurucuaẽ cuaẽ sacua Jesús je, erua resebe.

56 Jesús cuatásaa que mbía riqui erasi rurucuaẽ cuaẽ ee ra. Sucha tubiriã jenda jaaja. Sucha mii mii jenda jaaja abe no. Turuquia jenda abe no. Ûquĩ ja que erasi curucuaẽ cuaẽ nguiã ñono Jesús jii ra. —Sã erasi oco oco ja rã ndeirao ai rese, i jaaja que ñee Jesús je ra. Ae oco erese nae, ùquĩ ngue nyerõ ja ra.

7

Mbía chiangui renda ae chõ embicua nguiã

1 Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si.

² Jesús chimbaaquiatu mo ngue quiaru quiaru echoi quiiriã ee ra. —¿Mbaerã jëingo quiaru jenyoi quiiriã nde? Nanderamei ñee ndui si eã ño jëingochi nde, i que ñee asite ee ra.

³ Fariseos quiarei nyoï bei quiaru nonde. Judíos ja abe no. —Nandechoï eã mose ra nandechiã mondeite, i rei equia ã. Ngãmei ñee nguire eriqui ùqui naa naa mbei ã.

⁴ Echoï quiiriã mose eriqui quiaruã ã. Ngaë mose plaza si eriqui nyoï nyoï tuchi quiaru nonde ã. Ngãmei ñee nguire chõ eriqui nguiã mbae raã ja ã. Sã eriqui uyuquia irei irei no. Ñio abe no. Irachaë abe no. Uquisa abe no.

⁵ Nyebe fariseos ñee nguiã Jesús je. —¿Mbaerã ndechimbaaquiatu riqui eï eã nanderamei ñee nguire re? ¿Mbaerã eriqui quiaru uchoï quiiriã nde? i que fariseos ñee Jesús je ra. Embesasa abe no.

⁶ Jesús que ñee ee ra. —Isaías que embesa jeniï cose ra. Eï ngue embesa ra: ã mbia riqui ñee turãte raque seje ã. Uchiangui re quia eriquiãte nguiã serese ã.

⁷ Ñee turãte raque equia seje ã. Amei ñee achõ ño esenei seneichi nguiã mbia je.

Dios cheë mü nenei nenei ndocoï ee,
i que Isaías embesa jeniï nda.

⁸ Jenamei ñee achõ ño jesenei seneichi nguiã mbia je ùqui. Dios cheë nenei nenei ndocoï ee.

⁹ Dios cheë jemumba mumba chõ chí nguiã ã. Nanderamei ñee ndese chõ jëingochi oote ã.

¹⁰ Moisés cheë ndui turã eã ño jëingochi ã. Sã Moisés ñee mbia je no: “Jëturã ño nguiã jendu je jë. Jësi je abe no. Emo ñee icuã mose ngu je, ùqui jëiquia chõ. Emo ñee icuã mose usi abe je, ùqui abe jëiquia no”, sã i Moisés no.

¹¹ Jë nguiã jëingo nguiã Moisés cheë abi abite ã. Sã jëingo ñee no. “Ae nda amee nei jëje, ùqui ngue amondo ja Dios je ra”, i mose emo ñee ngu je, “coche ñene” jenye chõchí nguiã ee. Mbae mee eã mose ngu je. Usi abe je. Nyebe jëingo nguiã mbia mbaaquiatu icuã icuã ùqui.

¹² ¿Mbaerã jëingo mbia riqisã quisãte mbae meese mose usi je re? Ngu je abe no.

¹³ Nanderamei ñee achõte jësenei seneichi nguiã jendiiri je ã. Nyebe jëingo nguiã Dios cheë mbuquiachãte jendiiri si ã. Mbae icuã atate jësaã saã nguiã ã, i que Jesús fariseos je ra. Embesasa abe je.

¹⁴ —Jenyu secheë andu, i que Jesús mbia ja je ra. —Secheë jëicua rã.

¹⁵ Mbïa chiü embiicua eã nguiã. Echiangui renda chõ embiicua nguiã. Echiangui renda chõ usë nguiã echuru rï echeë mose. Ùqui ño embiicua nguiã.

¹⁶ Jëisa mose, secheë jeñandu turã na, i que Jesús ra.

¹⁷ Jesús que mbïa secha oso ique tuchúaa ra. Echimbaaquiatu que ñee ee cote ra. —Erecheë ngue namo, “ùqui nda mbïa mbïicua” ere que, ùqui embuchecua rã ndecheë ure je, i que ñee Jesús je ra.

¹⁸ Jesús que ñee ee ra. —¿Jë abe jëicuayãte quia re? Ae mbïa u quia nae, ùqui mbïa mbïicua eã nguiã.

¹⁹ Iqueã nda oso echiangui re. Erie ye chõ eriqui nguiã oso. Echique rui chõ eriqui nguiã oso. Usë nyee, i que Jesús ñee uchimbaaquiatu je ra. —Mbïa chiü turã ja, i chõ nguiã.

²⁰ —Mbïa chiangui renda chõ embiicua nguiã usë mose echuru rï.

²¹ Aba chiangui renda quia aba mundua icuã icuãte nguiã. Nyebe eriqui nguiã siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia iquia.

²² Mbae abe mbuquiachã quiachã no. “Aque raã nda sembaerã ña”, i emo mbae je no. Mbae icuã ñumumbara raã naa ja. Mbia abe mbiri iri no. Mbae icuã osei osei bei. “Se quiatu ae”, i mbae je. Ñee icuã icuã no. Ucuasu abe raã naa no. Mbae icuã naa ja chooño.

²³ Mbia chiangui renda icuã ja chõ ùqui nde. Ûqui ño mbia mbicuã icuã nguiã ùqui ao ao mose, i que Jesús ra.

Ari mo Jesús icua

²⁴ Jesús que nyoi hue recha cote ra. Ngasẽ ngue Tiro jii cote ra. Sidón jii abe no. Ique que oso tuchia mo nda. —Sã mbae jiranua serese, i rei que ra. Mbia qu e jirandu chõ erese ra.

²⁵ Ari mo abe que jirandu erese ra. Eriiri ngue aba checuayã nguereco uchiangui re ra. Ari que tu Jesús rea ra. Ngũiã ndese que ngoi ejii ra.

²⁶ Sirofenisia jenda que ae ra. Judío eã tuchi que ae ra. Griego cheẽ ño ngue echeẽ nde. —Aba checuayã icuã eja raã seriiri si, i tuchi que Jesús je ra.

²⁷ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra.

²⁸ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure je abe chõ mbae esaã ae. Seriiri embucherõ seje ae, i que ari ñee ee ra.

²⁹ Jesús que ñee ee ra. —Erecheẽ turãte. Quiatu rei. Nderiiri ngue nyerõ no, i que ee ra.

³⁰ Ari que oso uchuchúaa cote ra. I que eriiri u ngua ye ee cote ra. Aba checuayã icuã usẽ ño ngui a esi reaẽ.

Jesús eisayã mbucherõ

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra.

³² Eisayã mo ngue mbia curucuaẽ ee ra. Echeẽ aquiatuãte abe que ra. —Ndeo echono earõ embucherõ, i tuchi que mbia Jesús je ra.

³³ Jesús que eisayã nguerao pe jiri mbia recha ra. O que emingue mondo eisacua rereco chobei ra. O que embia ngũendi je ra. Mondo que echuru rĩ cote ra.

³⁴ Soboiba que ibate cote ra. Jiabute que ñee ee ra. —Esoro, eisacua, i que ee ra.

³⁵ Eisacua que soro cote ra. Echuru abe que nyerõ cote ra. Ñee ngue cote ra.

³⁶ —Emo nda jembiiRANDUCHI jẽ, i rei que Jesús ñee mbia je ra. Mbia que ñambiirandu i i tuchi ra.

³⁷ Mbia que ñee ñee nyue Jesús rĩ nda. —Mbae raã turã turã ja tuchiCHI equi a co. Eisayã abe isa ndoro chee no. Echeẽ ngũiã abe mbucheẽ nyee no, i ja tuchi que mbia quia nyuruira mae erese ra.

8

Jesús mbichae tubiriã saã mbichae mü je

¹ Mbia que ñumunua tuchi Jesús je aque mose ra. Ñee ngue uchimbAAQUIATU je ra.

²—Seya eâte aico ã mbia tubiriã ndese co. A echí arete serese tres días a. Echíurã mo eâte mbae mo aa.

³Eriãcuã amondo sereãte echuchúaa. Ngasẽ äte chõ ndae. Ishote si ecuaẽ aa resẽ. Nandambuquiaru chõ aa, i que Jesús ra.

⁴Echĩmbaaquiatsu que ñee ee ra. —Turuquia re chõ nandeico a resẽ. ¿Mañĩ nda aba ã mbuquiaru ja re? i que ñee Jesús je ra.

⁵—¿Manya mbichae jendeco re? i que Jesús ee ra. —Siete, i que ee ra.

⁶Jesús que mbia mbucoi ja íbii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quió mee uchĩmbaaquiatsu je cote ra. Ûquĩ ngue embuchao chao mbia tubiriã je cote ra.

⁷Sira ñetẽ mĩi abe que equereco ra. Gracias i que Jesús Dios je cote ra. —Sira abe jembuchao chao mbia je, i abe que ee ra.

⁸Mbia que eu ja ñimbio chee ra. Echíu sique que emunua nua ja ra. Siete iru que emombisẽ nyee ra.

⁹Mbichaecua rei mbia cuatro mil. Jesús que embui turã mondo cote ra.

¹⁰Canoa ye que Jesús ua uchĩmbaaquiatsu rese cote ra. Nyoĩ que Dalmanútaa ra.

Mbia mae sayã eteacuquia ure je, i fariseos

¹¹—Tã nande rã Jesús je, i que fariseos cuaẽ ñee ñee ee ra. —Mbia mae sayã esaã na ure je. † nda “Dios chĩmbu” ure tuchi ndeje, i rei que ñee Jesús je ra.

¹²Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheẽ nyecua jẽje. Mbia mae sayã mo nda ateacuquia eã tuchi jẽje, i que Jesús ñee ee ra.

¹³Oso que mbia recha cote ra. Iasa que echoi sobei cote ra.

Fariseos mbia mbaaquiatsu icuã, i Jesús

¹⁴Jesús chĩmbaaquiatsu que uchĩurã curuchoi eã nda. Tesarei que esi ra. Mbichae mĩi tuchi que equeru huee ra.

¹⁵Jesús que ñee ee ra. —Mbichae mbuchimatãsa rã ndei fariseos cheẽ. Herodes chĩmbaaquiatsu cheẽ abe no. Ûquĩ ñee ndese ra jẽingochĩ jẽ, i que Jesús ee ra.

¹⁶—Mbichae quiatsu ngue nanderuã nguã. Nyebe eriqui nguã ñee nande je Ûquĩ, i rei que echĩmbaaquiatsu ñee nyue ra.

¹⁷Jesús que echeẽ ñee icuate ra. Nyebe ñee nguã ee. —¿Mbaerã jẽingo “mbichae nanderuãchĩ” i re? ¿Ae riĩ aico ñee jẽje nae, Ûquĩ jẽicuayã mbeite quia re? ¿Jẽña atã mbeite eriqui re?

¹⁸Jẽisate raque. ¿Secheẽ jẽñanua mbeite quia re? Jendesate raque. ¿Sechisaã jẽicuayã mbeite quia re?

¹⁹Se mbichae cinco mbeta mose mbia cinco mil je, ¿manya iru jemombisẽ mbichae sique sique je re? i que Jesús ee ra. Doce, i que ee ra.

²⁰—Mbichae siete mbeta mose mbia cuatro mil je, ¿manya iru jemombisẽ esique sique je re no? i que Jesús ee ra. Siete, i que ee ra.

²¹—¿Jẽingo secheẽ icuayã i ite ã nde? i que Jesús ee ra.

Jesús eresayã mo mbucherõ

²²Nyoĩ que Betsaida cote ra. Mbia que amei ndesayã mo ngurucuaẽ Jesús je ra. Oco sacua erese embucherõ.

²³Jesús que eo isi serao pe jiri sucha si cote ra. Ngũendi que equiti eresa rese ra. O que echono earõ nda. —¿Eremaete mbae rese cote re? i que ee ra.

²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda.

²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra.

²⁶ Jesús que embui mondo uchuchúaa ra. —Eresochĩ nda sucha ite rĩ jê, i que ee ra.

Cristo chõ nde resê, i Pedro Jesús je

²⁷ Jesús que nyoĩ Cesarea de Filípoo cote ra. Huee que ñee uchĩmbaaquiatsu je cote ra. —¿Aba aico reĩ mbia je re? i que ee ra.

²⁸ Echĩmbaaquiatsu que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echĩmbaaquiatsu ñee Jesús je ra.

²⁹ —¿Aba aico reĩ jêje co re? i que Jesús ee ra. —Cristo chõ nde resê, i que Pedro ñee ee ra.

³⁰ —Jeñeechĩ nda mbia mo je ũquí jê, i que Jesús ee ra.

Mbia ra seiquia, i Jesús

³¹ Jesús que umano nonde senei senei uchĩmbaaquiatsu je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra aquera si, i que ñee uchĩmbaaquiatsu je ra.

³² Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ũquí nde? Mbia ra ndeiquiyã, i rei que Pedro ñee asite Jesús je ra.

³³ Jesús que uba mae uchĩmbaaquiatsu rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchĩmbaaquiatsu ja je cote ra. Mbia abe je. —Emo siquise mose seruí, sã hui ja mbae ubi si. Sã cruz rui umbaerã se rã si. Sã eriqui serui bei cote.

³⁵ Emo ndua bei mose nguenco rese, ereco ra ua esi. Emo hui mose nguenco si seje, ũquí nda siqui bei.

³⁶ Emo nguenco mumba chooño mose, eya eã mbei rae. Mbaecha rete raque.

³⁷ Emo nguenco mumba chooño mose, mbae mo eãte ereco ribishorõ sacua.

³⁸ Emo ireĩ ireĩ mose sesi mbia icuã ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si ibii uquirãcuã je aque mose. Ibatenda rese ra achu ángeles, i que Jesús ee ra.

9

¹ —Tacheẽ nyecua jêje. A jengu a nae, jemo nda jemae sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús nyĩcuabo uchĩmbaaquiatsu résaa

² Tenda seis uare que Jesús uchĩmbaaquiatsu mo nderao sita ibátee ra. Pedro. Jacobo. Juan abe no. ũquí ngue equerao ja mbia tiãsaa ra. Jesús que nyĩcuabo erésaa huee ra. Enininya tuchi que ee ra.

³ Eirao abe nininya tuchi que ra. Eiraoshĩ nininya tuchi que ee ra.

4 Mbia nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ùquĩ nda. Elías rese.

5 Pedro que ñee Jesús je ra. —Sererecua, nandecu turâte a. Sucha ñetẽ uresaã saã na. Enongue nembraerã. Enongue Moisés mbaerã. Enongue Elías mbaerã no, i rei que Pedro ñee Jesús je ra.

6 Echimbaaquiату siquichete quiату ngue re. Nyebe Pedro riqui nguiã “mañi nda aba re” ite.

7 Ibeishĩ ngue tu nguichi eite re cote ra. Moisés mbuchecuayã ee. Elías abe no. Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra.

8 Echimbaaquiату mae mose que Jesús mñi ndiqui ee cote ra. Moisés que nyecuayã asi ee ra. Elías abe.

9 Ecuãẽ mose nguichi sita ibate si que Jesús ñee ee ra. —Ae rese jemaee namo nae, ùquĩ je jenyecuachõ jẽ. Sequera si mose quiату teñee ñee mbia je cote. Semano nonde eã, i que Jesús ñee uchimbaaquiату je ra.

10 Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra.

11 Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra.

12 Jesús que ñee ee ra. —Ae bei. Coche Elías rane tu nguiã mbae mbitirõ ja. ¿Mbae i chõ embesa ji quia Cristo riĩ ña? “Mbae rasi ra esaã tuchi”, i chõ nguiã. “Mbia ra eucuyã tuchi”, i chõ nguiã no.

13 Elías que tu no. Mbia icuã icuã tuchi que ee ra. Sã embesa ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia riirĩ mo si

14 Ngasẽ ngue echoi echimbaaquiату атаque je cote ra. Mbia tubiriã tuchi que chi echimbaaquiату mama huee ra. I que embesasa u ñee icuã icuã echimbaaquiату je huee ra.

15 Jesús ngasẽ mose que mbia nyuruira tuchi mae erese ra. Oo tuchi que erese ra.

16 —¿Mbae riĩ jẽingo ñee icuã icuãte jenyue re? i que Jesús ñee mbia je ra.

17 Emo ngue ñee Jesús je ra. —Sererecua, seriirĩ aru quia ndeje co. Nde embucherõ sacua. Aba checuayã icuã equereco uchiangui re co. Nyebe eriqui nguiã ñee eãte co.

18 Aba checuayã icuã ndiqui seriirĩ isi isi beite co. Mbucoi coi beite equia ibii co. Echuru abe mbichoite. Urei abe quititi quitite. Nyebe equirãcuã neate riqui nguiã co. “Aba checuayã jẽjea seriirĩ si”, ae rei que ndechimbaaquiату je ra. Eaquiатуãte chõ ngue ra, i que eru ñee Jesús je ra.

19 Jesús que ñee cote ra. —¿Mañi jenyee quia seicuayãte re? ¿Ñimbirãcuã mbeite ra aba quia jẽje re? i que Jesús ra. —Eriirĩ jendu rã seje, i que cote ra.

20 Eriirĩ ngue ecurucuaẽ ee cote ra. Aba checuayã ngue eriirĩ mburirite Jesús rese mae mose ra. Mbucoi que ibii ra. Mbuchiashao shao tuchi que ra. Echuru mbichoite tuchi que ra.

21 —¿Manosete aba checuayã ndiqui ererequia re? i que Jesús eru je ra. —Eñetẽ mosebe bei, i que eru ra.

22 —Tátaa eriqui emondo mondo beite co. Ama ye abe. Eriicharã. Nde ejea aquiату mose, ejea rã esi ure je, i que eru ñee Jesús je ra.

23 Jesús que ñee ee ra. —¿Mbaerã ereico “ndeaquiato mose” i seje re? Ae seicua quia nae, ñiquĩ je aico mbae raã aquiato jate co resẽ, i que Jesús ee ra.

24 Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra.

25 I que mbia cuaẽ nguia ñumunua nua tuchi huee ra. Nyebe Jesús ñee asi nguia aba checuayã icuã je. —Aba cheuayã, mbia isa erembũtaote quia hue. Erebuchoẽ nguiaãtã abe equia hue. Esẽ oso esi. Ereqiue sichĩ nda oso echiangui re jẽ, i que Jesús ee ra.

26 Aba checuayã ngue tasẽte eriirĩ mburiri cote ra. Usẽ oso cote. Eraaque rã ngue eriirĩ nyĩ cote ra. Mano nei nguia mbia je.

27 Jesús que emua eo rese ra. Juã turã ngue cote ra.

28 Jesús que oso ique tuchúaa cote ra. Echimbaaquiato que ñee ee mbia tiámbaa cote ra. —¿Mbaerã aba checuayã useã oso urecheẽ mose ure re? i que ñee ee ra.

29 Jesús que ñee ee ra. —Jeñee eã mose Dios je, ã jẽjea aroneate. Jẽhui eã mose jenyũ si, ã jẽjea aroneate no, i que Jesús ee ra.

Mbia ra sei quia, i si Jesús

30 Galilea rĩ ngue echoi hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiato je ra.

31 Uchimbaaquiato ae que embaaquiato quiato oso quia ñeenda rui ra. —Emo nda semee mbia icuã je sei quia sacua. Sei quia ji ra aquera si tres días mose, i que equia embaaquiato quiato ñeenda rui ra.

32 Echimbaaquiato que echeẽ icuayãtã quia ra. —Ndecheẽ embiasa asa tuchi rã ure je, i ãte que equia ee ra. Ireĩ ireite quiato que equia esi ra.

Ere recua tuchi ra se, i jaaja Jesús chimbaaquiato nyue

33 Ngasẽ ngue Capernaum nda. Tuchúaa ique mose que ñee uchimbaaquiato je ra. —¿Mbae rĩ jenyu quia ñee icuã icuãtã jenyue ñeenda rui re? i que ee ra.

34 Quiriri ja chõ ngue u ñee ndocoĩ ee ra. —Ere recuarã nda se cote, i jaaja chõ equia nyue ñeenda rui reaẽ. Nyebe eriqui ireĩ ireite Jesús si re.

35 Jesús que ngoi cote ra. —Jenyu ja rã. Tacheẽ jẽ ja je, i que uchimbaaquiato doce je ra. —“Ere recuarã se” i mose emo, sã uataque rimbarã ño eriqui, i que Jesús ee ra.

36 Ñaquẽ mo ngue emũ eite re cote ra. Sui que ñee uchimbaaquiato je ra.

37 —Ae siqui turã nguia mbi a riirĩ je serĩ nae, seje abe chõ eriqui nguia siqui turã. Ae eturã ndiqui seje nae, semondosa abe je chõ eturã ndiqui nguia, i que Jesús ee ra.

Emo icuã eã mose nande je, nanderesenda chõ ñiquĩ nde

38 Juan ngue ñee Jesús je ra. —Pe emo nyĩ aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguia, i que Juan Jesús je ra.

39 Jesús que ñee ee ra. —Tei. ¡Jẽsiquisã quisãchĩ nda jẽ! Emo mbia mae sayã naa mose serĩ, ñee icuã eã nda seje aquere.

40 Emo icuã eã mose nande je, nanderesenda chõ ñiquĩ nde.

41 Emo sechimbaaquiato iseĩ mbiu turã mose serĩ, Dios abe ra mbae turã mondo aque je.

Mbae icuã nda nandesã uquiachĩ emo je

⁴² Ae ra mbae icuã saã uquia seicuasa mo je nae, ũquĩ nda mbae rasi saã tuchi cote. Ũquĩ nda aba mombo chõ ama ndisha ye nyii re chã. Sita resebe ecua ji mondo. † nda mbae icuã naa uquia eãte rei seicuasa je.

⁴³ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mii Nderequia, siqui bei sacuã huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re.

⁴⁴ Mbae rosei ra manoa mbei huee. Tata ra uqueã mbei huee no.

⁴⁵ Ndei nemingo mose mbae icuã ndese, ndei echisia mombo. Coche rei ra ereso ibate ndei mii nderequia, siqui bei sacuã huee. Nemombo rocoĩ tata cuásuu, ndei nyeremo nderao. Tata mungue aronea tuchi chõ hue jenda re.

⁴⁶ Mbae rosei ra manoa mbei huee. Tata ra uqueã mbei huee no.

⁴⁷ Nderesa nemingo mose mbae icuã ndese, nderesa echoo. Coche rei ra ereso Dios recua nderesa mii nderequia. Nemombo rocoĩ tata cuásuu, nderesa nyeremo nderao.

⁴⁸ Mbae rosei ra manoa mbei huee. Tata ra uqueã mbei huee no.

⁴⁹ Tata ra mbia sei bei huee.

⁵⁰ Embiquesa rã ño jẽingo nguĩã mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jẽingo mbia je. Jẽingo turã ño nguia jenyiese, i que Jesús ee ra.

10

Jesús ñee mbia ngũinisi mombo je rĩ

¹ Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiату quiату que equia ra. Sã eriqui mbia mbaaquiату quiату beite no.

² Fariseos mo abe que ngaẽ erea ra. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngũinisi jea ubiã mose re? i que ñee Jesús je cote ra.

³ —¿Mbae i Moisés embesa re? i que Jesús ee ra.

⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra.

⁵ Jesús que ñee ee ra. —Jeãquĩ átãte quiату ngue re. Nyebe Moisés ũquĩ mbesa nguĩã jẽje.

⁶ Ũquĩ i ãte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda.

⁷ Nyebe ra emo ndiqui ngũinisi rese bei. Ngu si isho. Usi si abe no. Ngũinisi mii ndese siqui bei sacuã.

⁸ Co mii na siqui sacuã nyiese cote. Nyeremo siqui rã eã ño cote re. Co mii siqui rã ño ũquĩ cote re.

⁹ Ae Dios mbucha nyiese nae, sã ũquĩ hui eã mbei nyesi, i que Jesús ñee fariseos je ra.

¹⁰ Ngasẽ mose tuchúaa que echimbaaquiату ñeembe ee ra. —Ndecheẽ embiasa turã na ure je, i que ee ra.

¹¹ Jesús que ñee ee ra. —Ae ngũinisi jea nae, emo ndese siqui sacuã nae, eicuã tuchi chõ ũquĩ nde. Adulterio i que ũquĩ je ra.

¹² Cuña mo ngu jea mose siqui sacuã emo ndese, eicuã tuchi chõ ũquĩ no nde, i que Jesús ee ra.

Jesús mbia riirĩ isi turã turã

¹³ Mbia que nguiirĩ ngurucuaẽ cuaẽ nguia Jesús je ra. Jesús oco oco sacuaẽ erese. —¿Mbaerã jendiirĩ jendu quia co re? i rei que echimbaaquiato ñee mbia je ra.

¹⁴ Jesús que paama i ñee uchimbaaquiato je ra. —Jeñeechĩ nguiã ee. Sã ae ae riqui nguiirĩ ndurucuaẽ cuaẽ seje. Eĩ ño Dios rimba nguia. Ucuasu raã naa eã. Mbia riirĩ na.

¹⁵ Mbia riirĩ na ño jëingo Dios isi turã. f mose ra Dios rimba tuchi jë cote, i que Jesús ra.

¹⁶ Mbia riirĩ ngue esui sui ra. O que echono ñono earõ nda. Ñee turã ngue Dios je erĩ nda.

Acuanindu mbaecha mo ñee Jesús je

¹⁷ Acuanindu mo ngue tu Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaẽ nde? i que ñee Jesús je ra.

¹⁸ Jesús que ñee ee ra. —¿Mbaerã ereico “eturã” i seje re? Dios miĩ ño eturã ndesẽ.

¹⁹ Dios cheẽ emumbayã. Echeẽ ereicuate quia co resẽ: “Emo ninisi rese ra ereicochĩ. Mbia ra ereiquiachĩ. Mbae ra erembuquiachãchĩ. Erecheẽ ñooñochoĩ nda emo niĩ. Emo nda erembĩirĩ irĩchĩ. Ndeturã ño nderu je. Ndesi abe je”, i que Dios cheẽ nda, i que Jesús ñee ee ra.

²⁰ Acuanindu que ñee ndei ee ra. —Ūqui ngue amumbayã ja bei quia ra. Señetẽ mosenda bei, i rei que ñee Jesús je ra.

²¹ Jesús que nyeseua tuchi mae mose erese ra. —Ã miĩ mo abe eresaã eãte. Nembae emondo mondo ja mbia mbaecha reã je. Nde ũqui naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, i que Jesús ee ra.

²² Acuanindu Jesús cheẽ andu mose que echĩã ndoso tuchi cote ra. Eya eã tuchi que oso Jesús recha ra. Mbaecha tuchi te quiato ngue ae re.

²³ Jesús que mae mbia rese ra. —Mbaranguiato ãte mbaecha je ngasẽ sacuaẽ ibate, siqui bei sacuaẽ huee, i que ñee uchimbaaquiato je ra.

²⁴ Echimbaaquiato que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiato ãte ũqui je oso sacuaẽ ibate Dios rese.

²⁵ Sã ticuasu no ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra.

²⁶ Echimbaaquiato que nyuruira tuchi be u eandu no nda. —¿Aba quiato ra oso Dios rea ibate re no? i que ñee nyue ra.

²⁷ Jesús que mae erese ñee ee ra. —Ae mbia saã aroneate quia nae, Dios miĩ ño nda esaã, i que Jesús ee ra.

²⁸ Pedro que ñee Jesús je ra. —Ure que urembae uresecha ja ra. Siqui sacuaẽ nderui, i que Pedro ñee nda.

²⁹ Jesús que ñee ee ra. —Tacheẽ nyecua jëje. Emo umbae secha ja mose siqui sacuaẽ serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguiirĩ secha. Ae umbae ibi secha no.

³⁰ Ūqui mbae ja ra asibishorõ tuchi cien veces ereco mose ibi. Echuchua ata. Enongue ata. Esi ata. Eriirĩ ata. Ibi ata abe no. Ūqui ja ra asibishorõ tuchi ee. Mbia icuaĩ icuaĩ tuchi ra ee serĩ. Aquere ra siqui bei tuchi Dios rese ibate cote.

³¹ Ae ererecua saã saã nguia namo nae, ererecua eã tuchi ra ùquĩ m o cote. Ae ererecua eã namo nae, ùquĩ mo nda ererecua cote, i que Jesús ra.

Mbia ra seiquia, i si Jesús

³² Jerusalén ngue echoi quia ra. Jesús que oso quia enonde ra. Echimbaaquiatu que siquichete nyoĩ quia ra. Nyebe Jesús ererao nguia mbia tiãsaã ñee sacuaã ee.

³³ —Co nyao quia Jerusalén co. Huee ra mbia semee sacerdotes rerecua je. Embesasa abe je. “Jesús jẽiquia”, i ra seriĩ. Semee nda judíos eã je cote. Seiquia sacuaã.

³⁴ Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵ Jacobo que oso Jesús riichã ngõngue rese ra. Juan, i equia ee. Zebedeo riirĩ ndei ùquĩ. —Urechu ñee ndeje aa, Urembaaquiatusa. Ae riĩ nda urecheẽ ndeje nae, ùquĩ je “eno” ere rã ure je, i rei que ee ra.

³⁶ —¿Mbae ra aba saã jẽje re? i que Jesús ee ra.

³⁷ —Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co mui chĩ ndequiato cuti. Enonge chĩ ndequiato cutiã no, i rei que ñee Jesús je ra.

³⁸ Jesús que ñee ee ra. —Ae riĩ jẽingo ñee seje nae, jẽirandu turã eãte ùquĩ ndese. Ae rasi ra asaã tuchi nae, ¿ùquĩ ndasi ra jẽsaã jẽ abe re? Bautizar i ra seje, ¿eĩ nda bautizar i jẽ abe je re? i que Jesús ee ra.

³⁹ “Ae” i que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ùquĩ ndasi ra jẽsaã tuchi rei jẽ abe. Bautizar i ra seje, eĩ si rei ra bautizar i jẽje no.

⁴⁰ “Ererecuarã ure”, jentye rei que seje, ùquĩ asaã aroneate se jẽje. Paba ae quiatu ra ùquĩ saã. A e ebite, ùquĩ nda emui ererecuarã, i que Jesús ra.

⁴¹ Echimbaaquiatu ataque que jirandu erese ra. Echimbaaquiatu diez. Paama i que Jacobo je ra. Juan je abe.

⁴² Jesús que “jenyu” i ñee uchimbaaquiatu ja je cote ra. —Mbia ataque rerecua riqui ucuasu raã naa tuchi ngũimba je ùquĩ.

⁴³ Ùquĩ nda jẽsaã eã jẽ. “Ererecua ra se”, i mose jemo, sã ùquĩ siquichõ uataque rimbarã.

⁴⁴ Jemo “se rane jẽ” i mose, sã ùquĩ ndiqui bei mbae turã naa naa uataque je no.

⁴⁵ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguia. Co achu quia mano mbia tubiriã ndiquicharõ sacuaã co, i que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbaaquiatu rese. Jesús ngata mose huee si, mbia tubiriãte que nyoĩ quia erui ra. Eresayã mo ngue chĩ ñeenda jie huee ra. Ache ache i que huĩ nda. Bartimeo, i equia ee. Timeo ndiirĩ ngue ae ra.

⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jẽ! i que ee ra.

⁴⁸ —¡Equiriri chõ jẽ! i tuchi rei que mbia ñee ee ra. —¡Sererecua! ¡David nducucha! ¡Ndeya eã ño serese jẽ! ibe que eresayã ñee Jesús je ra.

⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jẽ. Ehuã. Jesús riqui ñee ndeje a, i que ee ra.

⁵⁰ Juã asi que oso oo Jesús rese ra. Uchiatiquia recha.

⁵¹ —¿Mañi ae ra ndeje re? i que Jesús ñee ee ra. —Seresa embuturã na, Sererecua, i que ra.

⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

11

Jesús ngasẽ Jerusalén

¹ Jesús que Jerusalén curubite nyoï quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que Jesús uchimbaaquiatu nyeremo mo mondo ra.

² Ñee ngue ee ra. —Achi sucha chõ jẽso rã. Jengasẽ namo mose ra burro ririĩ cuasa mo ñi jẽje huee. Emo ngue nyui eãte eátoo ra. Jenyura seru seje.

³ Emo ñee mose jẽje, “¿mbaerã nda jenyura re?” i mose jẽje, jeñee ee. “Nandererecua que ‘jendu’ i ra. Mondo jeibe ra jẽje”, jenye ee, i que Jesús ñee ũqui nyeremo mondo ra.

⁴ Nyoï que erea cote ra. Burro ririĩ ngue etea Jesús cheẽ nguire cote ra. Ecuasa que chĩ taicuee eiquesa jii ra. Nyura que cote ra.

⁵ Ae mbia chi huee nae, ũqui mo ngue ñee ee ra. —¿Mbae rese jẽingo hue re? ¿Mbaerã jẽingo era era re? i que ee ra.

⁶ Jesús cheẽ ndui si que ũqui ñee ee ra. “Eno” i que mbia ee cote ra.

⁷ Burro ririĩ ngue ecuruchoi Jesús je cote ra. Huĩrao que echono ñono earõ nda. Jesús que nyui eátoo cote ra.

⁸ Jesús que ngata oso quia burro átoo cote ra. Mbia tubiriã ngue huĩrao mbiitee tee nyoï quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ.

⁹ Mbia ia tuchi que tasẽ tasẽ nyoï quia enonde ra. Eruï abe no. —Co nandererecua ru quia ngasẽte co. Co Dios chimbu ru quia ngasẽte nande je co.

¹⁰ David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda.

¹¹ Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbaaquiatu rese cote ra. Tenda quiatu ngue osote nguiã ee.

Jesús ñee icuã higo i je

¹² I que Jesús choi quia Betania si isamami nda. Eriãcuãte que oso quia ra.

¹³ Isho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda.

¹⁴ Jesús que ñee higo i je cote ra. —Mbia ra ndea u eã mbei cote, i que ee ra. Echimbaaquiatu abe que echeẽ ñandu ra.

Jesús mbia mbusẽ Dios chuchua si

¹⁵ Ngasẽ ngue Jerusalén cote ra. Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. ũqui ja que Jesús mbusẽ mondo ra. Ae mbae isiquia sibishorõ shorõ nguia, ũqui mbae abe que embuchiichere chere ja mesa ra. Mbae ja

resebe. Ae nyurushi cuasu mondo mondo mbia je mbae ribishorō nae, ũquí nenda abe que embuchiichere chere ja ra.

16 Jesús que ñee ũquí je ra. —Dios chuchua ite rĩ jēingochĩ nguiã mbae rerao rao.

17 “ ‘Mbia cheësa Dios je’, i ra mbia Dios chuchua je”, i rei que embesa ji huĩ nda. Jē nguiã jēicua tuchite Dios chuchua je re. Mbae mbuquiachãsa chuchua jēsaãte chí nguiã ee, i que Jesús ñee asite ũquí je ra.

18 Sacerdote rerecua que chí Jesús cheë andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiatu que oote Jesús cheë ndese ee ra. Nyebe eriqui nguiã Jesús ucuayãte.

19 Hue sucha qu e Jesús secha oso eresaitō cote ra.

Higo i mano cote

20 I que Jesús nyoĩ quia isamami nda. Higo i cutite que echoi quia ra. Higo i ñimama ño nguiã reaë. Erao abe mano ño nguiã re nõ aë.

21 Pedro que ndua ñee Jesús je ra. ¡—Sã Sererecua! Higo i je que erecheë asi nae, mano ño equia cote reaë, i que ñee Jesús je ra.

22 Jesús que ñee ee ra. —Dios jēicua tuchi.

23 Tacheë nyecua jēje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheë mumbayã” i tuchi mose uchiangui re, Dios ra echeë mumbayã. Sita ra siri ee.

24 “A emondo seje”, jenye mose Dios je, mondo ra jēje. “Dios ra emondo seje”, jenye mose jeñiangui re, mondo ra jēje.

25 Emo mbae icua naa mose jēje, ũquí ñee chí mose jendese, jētesarei chō ũquí si. Jētesarei chō esi ñee nonde Dios je. Ũquí mose ra jendu ibatenda abe jēicua mbutiã no.

26 Jētesareiã mose emo icua si, Dios abe ra jēicua mbutiã eã mbei jēsi, i que Jesús ee ra.

¿Aba nembu re? i mbia ñee Jesús je

27 Nyebibe que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoĩ ñee ee ra. Embesasa rese. Amei ndese.

28 —¿Mbaerã ereico mbia mbaaquiātu quiātu Dios chuchuaa re? ¿Aba “ũquí esaã saã” i quia ndeje re? i que ũquí ererecua ñee ja Jesús je ra.

29 Jesús que ñee ee ra. —Se rane tacheë jēje. Se rane preguntar tae jēje. Secheë jēsibishorō na nyii. Aquere quiatu ra jeñee asibishorō cote.

30 ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra.

31 Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeë ndibishorō nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jēingō eãte erui re no?” i quiarei ra nande je.

32 “Dios que embu eã nda”, nande aroneate ee no. Mbia ataque ra paama i tuchi nandé je. Juan quiatote quia mbia re, i que ererecua ñee ñee nyue ra.

33 Ñee nyee que Jesús je cote ra. —Ureicuayãte. Aba chō Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiatu tacheë eã jēje no. Ae “ã esaã” i seje nae, erĩ nda acheë eã jēje no, i que Jesús ũquí ererecua je ra.

12

Uva raarōsa icuã icuã nguerecua je

1 Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etaró no. Uva rique rirurã abe que echao ra. Sucha ibate mo abe que echao no nda. Uco raarō turã ja sacuã. Ibicha que “sembae uvas jësaarō” i emo je cote ra. Al partido. Ae que oso isho itōte cote ra.

2 Uva quiche mose que ngũimba mo mondo rei umbaerã ndea ra.

3 Uva raarōsa que erimba mbucuasë icuã ño nda. Iruã nua ño ngue ra. Eochi chō ngue emondo mbuchebi ra.

4 Echa que ngũimba mo mondo rei ereabe no nda. Aque abe que embucuasë icuã no nda. Sita que emombo mombo erese no nda. Eãquĩ nduquĩ tuchi que ra.

5 Ngũimba mo ngue emondobe aquere no nda. Aque quiatu que eiquia tuchi cot e ra. Eĩ eĩ mbei que eraarōsa quia echa rimba je ra. Emo emo ngue eiruã nua nda. Emo emo ngue eiquia no nda.

6 Aque mii tuchi que siquichō echa rese cote ra. Eriirĩ tuchi chō ngue aque re. Nyesecua tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra.

7 Eriirĩ ngasë mose que uva raarōsa ñee nyue ra. —¡Co eriirĩ ndu quia co cote jê! ¡Nandeiquia rei jê! † nda uvas nandembaerã ae tuchi cote, i que ñee nyue ra.

8 Eraarōsa que eriirĩ isi icuã cote ra. Curuchoi que iquia pe jiri ra. Mano ngue cote ra.

9 ¿Mañi nda echa quia eraarōsa je cote re? Echa ra eraarōsa icuã iquia ja cote. Uva i ra emondo ja emo je eraarō sacuã cote.

10 ¿Ã mbesa ji rese jemaë ãte re?

Sã emo ndiqui tuchua ao sita je no.

Sita mo ngue equirirō mombo ra.

Eicuãte eriqui rei nguiã ee.

Aquere ndua si erese.

“Earonda sacuã turambi chō eriqui re”, i ndua si uchimombo rese.

Uchimombo que esirō si cote ra.

11 Dios chiao chō ñquĩ nde.

Dios chiao turã tuchi riqui nande je ã,

i ñi embesa ji re, i que Jesús ee ra.

12 —Nanderĩ ño eriqui nguiã ñee, i que ñquĩ ererecua ra. —Nandeisi rei serao jê, i rei que nyue ra. Jesús isi aronea tuchi que mbia résaa ra. Eireĩte quiatu ngue mbia tubiriã si re.

¿Impuestos ra uremee ererecua je re? i mbia ñee Jesús je

13 Ñquĩ ererecua que fariseos mo mondochoi ñee Jesús je ra. Herodes chimbaaquiatu abe mondochoi erea. —Jesús nandembucheë icuã na. † nda mbia paama i ee, i rei que ra.

14 Uturã ngue esaã ñooño Jesús je ra. —Jesús, co ereico mbia mbaaquiatu turãte co. Mbia jaje ndeturãte riqui co. Co ereico turãte mbia mbuchiabiã co. Mbia erembaaquiatu quiatu turãte quia Dios icha rĩ co. Nyebe urechu nguiã ñee ndeje a. ¿Coche mbia mbae isiquia mee mee Romanos nderecua je re? Impuestos.

15 ¿Uremee mee nda ee re? ¿Uremee eã nda ee re no? i que ñee Jesús je ra. Jesús que ñquĩ icuã icuate ra. Nyebe ñee nguiã ee. —¿Mbaerã jëingo “i nda

Jesús ucheẽ nyabi”, i serĩĩ nde? Mbae isiquia jẽteacuquia imbu seje. Tamae erese, i que ee ra.

¹⁶ Mbia que eteacuquia ee ra. —¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. Romanos nderecua, i que mbia ee ra.

¹⁷ Jesús que ñee ee cote ra. —Romano s nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbia que nyuruĩra jate u Jesús cheẽ andu ra.

Mbia raaque ra quera si, i Jesús

¹⁸ —Mbia raaque ra quera eã mbei, i que mbiamo nguia ñee nda. Saduceos i que ñquĩ mbia je ra. Ñquĩ mo ngue nyoi ñee Jesús je ra. Tã i sacua ee.

¹⁹ —Sererecua, ã ngue Moisés mbesa nande je ra: “Emo ndiiriã mano mose, sã enongue mano je ninisi rerequia erendaque re. Sã tiirĩ ngõngue raaque riĩ”, i que Moisés embesa nande je ra.

²⁰ Eriquii mo ngue siqui urerese ra. Seis que eribi ra. Eriquii que ngũinisiã quereco rei ra. Mano ño ngue tiirĩ ndocoĩ ngũinisi recha ra.

²¹ Enongue que nguiquii checha quereco rei cote ra. Ae abe que mano ño tiirĩ ndocoĩ no nda. Enongue que equereco no nda.

²² Ñquĩ seis que ngõngue checha quereco ja rei ra. Mano ja chõ ngue erecha tiirĩ ndocoĩ no nda. Eninisi eru checha que mano nyee chõ cote no nda.

²³ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re.

²⁴ Jesús que ñee ee ra. —Jẽingo Dios cheẽ icuayãte ã. Jẽingo Dios cheẽ abi tuchi ã. Jẽingo Dios quirãcuã icuayãte ã.

²⁵ Ae raaque ra Dios mbuquera si nae, ñquĩ nda ngũinisi quereco eã mbei huee cote. Ñquĩ nda ngu quereco eã mbei huee cote no. Angeles rã mbei ra mbia riqui huee ibate cote.

²⁶ ¿Moisés chimbese rese jemae ãte re? Mbia raaque quera si riĩ ño ngue embesa nguia. Ira ruri sendi quia, aque mose que Dios Moisés mbiirandu ñquĩ ndese ra. “Abraham nderecua chõ aico nguia se co. Isaac nderecua abe. Jacob nderecua abe no”, i que Dios Moisés je aque mose ra.

²⁷ ã ngue mano ndei nyii ra. Ereo siqui beĩ chõ nguia namo ã. Mbia raaque rerecua eã ño Dios re. Mbia reco rerecua chõ ae re. ¿Ñquĩ jẽicua eãte quia ã nde? i que Jesús ñee mbia je ra.

Echesequa tuchi quia Dios rese

²⁸ Embesasa mo ngue chĩ echeẽ andu ra. —Jesús ñee turã tuchi chĩ saduceos je, i que uchiangui re ra. Nyebe esi nguia ñee ee. —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra.

²⁹ Jesús que ñee ee ra. —Ã ño Dios cheẽ ndiita ã nde: “Secheẽ jeñandu rã, Israelitas. Dios mĩ tuchi chõ nandererecua re.

³⁰ Echesequa tuchi quia Dios rese. Ndechiã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguia.

³¹ ã abe rei ñquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”, i. Ñquĩ nyeremo ndei Dios cheẽ i tuchi ñquĩ, i que Jesús ee ra.

³² Embesasa que ñee Jesús je cote ra. —Ae bei, Sererecua. Dios m̄i tuchi chō nandererecua re. Emo abe mo eâte.

³³ Nandehesecua tuchi mose Dios rese, ũquĩ eturâte ee. Nandehesecua tuchi mose nandechiã je. Nandendua ndua je. Nandeaĩ je. Nandequirãcuã je abe no. Nandehesecua tuchi mose mbia rese, ũquĩ eturâte Dios je mbae mo si. Sacrificio mo si. Ofrenda mo si, i que embesasa ñee Jesús je ra.

³⁴ —Ñee aquiatute equia seje co, i que Jesús uchiangui re ra. —Dio s rimbarã tuchi chee rã nde, i que ee cote ra.

¿Aba rucucha Cristo re?

³⁵ Jesús que mbia mbaaquiato quiato quia Dios chuchúaa ra. —¿Mbaerã embesasa riqui ñee nde? “David rucucha chō Cristo re” i re.

³⁶ David abe que “sererecua” i Jesús je ra. Sã embesa ji ñee no: Dios que ñee Cristo sererecua je ra: “Ecoi seji. Nde abe ra ererecua serese.

Ae ndeucuayâte quia nae, ũquĩ je ra ndequirãcuã atecuquia tuchi. Ndequirãcuã tuchi chee ra ũquĩ si”, i que Dios ñee sererecua je ra, i que Espíritu Turã David mbucheẽ nda.

³⁷ David sí chō “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheẽ chandu turã jate ra.

Jesús ñee asi embesasa je

³⁸ Jesús que uchimbaaquiato mbaaquiato quiato ra. —Embesasa rã nda jëingochĩ jë. Ũquĩ ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã.

³⁹ Mbia renda turã abe eirabo rabo beite quia mbia si ã. “Fiestacha jii quia tai jë”, i abe beite equia ã no.

⁴⁰ Ari eru cheecha mbae abe embutiã tiãte quia ã no. Ucheẽ oco abe esaã saã mbeite quia Dios je ã no. “Ƒnda mbia mae nanderese”, i chō nguiã. Ũquĩ nda Dios mbasi tuchi cote, i que Jesús mbia je ra.

Eru cheecha mbaecha reã mo mbae mee Dios je

⁴¹ Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue m̄i mbia mbae isiquia mondo mondo mose eriru ye rese ra. Mbaecha atate que mbae isiquia tubiriã mondo mondo quia eriru ye ra.

⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo m̄i mbuchecha tuchi que ra.

⁴³ Jesús que ñee uchimbaaquiato je ra. —Jenyu. Tacheẽ nyecua jëje. Eru cheecha mbaecha reã ngue mbae isiquia mondo tuchi mbia ataque si ra.

⁴⁴ Mbaecha quiato que umbae rire ñetẽ mondo mondo ra. Eru cheecha quiato que umbae m̄i mondo ja ra, i que Jesús ra.

13

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Echimbaaquiato mo ngue ñee ee ra. —Sã Dios chuchua turã tuchite jë. Eao ji turã tuchi sita je, i que echimbaaquiato mo ñee ee ra.

² Jesús que ñee ee ra. —Ã ndese jëingo mae ã nae, ũquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasẽ ñee ee ra. Pedro. Jacobo. Juan. Andrés. Ũquí ja que ñee eĩsaa ra.

⁴ —¿Manosete ra ũquí nde? ¿Mañi ure ra equia jirandu mbae ua nonde re? i que ñee Jesús je ra.

⁵ Jesús que ñee ee ra. —Jẽtesa jiri quia jẽ. Mbia mo nda jembĩrĩ irĩchĩ ñee jẽje jẽ.

⁶ “Cristo chõ se re” i ra mbia ñee ata atate jẽje. Ũquí nda jeñanduchĩ jẽ. Ũquí nda mbia mbĩrĩ irĩ jate. Ñee ñooño je chõ ũquí nde.

⁷ Mbia ra guerras saã saã tuchi. Mbia ra ñee ñee tuchi quia nyĩiquia iquia je rĩ. Ũquí mose ra jẽsiquichechĩ jẽ. Ũquí ja rane nda nyecua raque. Aque mose r a mbae ja ua eã nã.

⁸ Mbia ra guerras saã tuchi chee. Nyĩiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangu chooñoa tuchi ra ibi nyere nyere. Jembasi ramo mose chõ nda ũquí nde. Aquere ra jembasi tuchi cote.

⁹ ¡Sã jẽ! Mbia icuã icuãte ra jẽje. Jembĩrĩ irĩ ndae. Jemee mee icuã nda mbia rerecua je. Jẽiruã nua nda mbia chumunuãsaa. Nguerecua je ra mbia jenderao rao tuchi. Ererecua abe je chee ra secheẽ jẽsenei senei.

¹⁰ Sequiato ra Dios cheẽ turã senei senei nda mbia ja je nyii. Mangu chooñoa jenda ja je. Aquere ra mbae ua ja cote.

¹¹ Jemee mose mbia rerecua je, pare pare jenyechĩ nda jẽ. “¿Manyae ra ũquí ñee ndibishorõ nde?” jenyechĩ nda pare pare i jẽ. Espĩritu Turã ae chõ nda jembucheẽ turã nguã mbia je aque mose. Jẽ ae ra jeñee eã. Espĩritu Turã ae chõ nda jembucheẽ nguã.

¹² Jenongue ra jemondo chee mbia icuã je. Jẽiquia sacuã. Jendu abe ra jemondo chee mbia icuã je. Jendiĩrĩ abe ra jemondo chee mbia icuã je. Mbia icuã nda jemo iquia iquia chee.

¹³ Mbia mangu chooñoa jenda ra jẽucuyã tuchi serĩ. Ae ra siqui bei serese, ũquí nda Dios mingo bei.

¹⁴ Daniel que embesa Mbae Mbutiãsa Icuã nĩ nda. Mbae Mbutiãsa Icuã nda siqui nguecuãyaã. “Dios rendaque re taico se quiatu”, i ra equia huee. (Ae ra mae nguia sechimbesa rese nae, sã ũquí eicua.) Jemae mose Mbae Mbutiãsa Icuã ndese, jeña esi. Ae siqui quia Judéaa, sã ũquí uchã jei choi ibi ibátee mo.

¹⁵ Ae ra siqui tuchia quite rese, sã ũquí iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ.

¹⁶ Ae ra siqui úcoo, sã ũquí nyebiã ngaẽ huĩrao rea. Sã hue si bei chõ echoi uchã.

¹⁷ Aba mbia eã tuchi ra emo ãquẽ ndiru rerequia mose aque mose. Nguĩrĩ mbuquiambu je abe no.

¹⁸ “Nyĩiseĩ mose eã urechã” jenyẽ Dios je.

¹⁹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ũquí nde.

²⁰ Ae rasi ra mbia saã tuchi nae, ũquí nda Dios mbujua jiri uquiato rĩ. I nda emo ñĩmbirãcuã eã tuchi rei ũquí ndasi je.

²¹ “A Cristo riqui a jẽ” i mose emo jẽje, “nyia” jenyechĩ nda ũquí ñee mose jẽ. “Hue Cristo riqui hue jẽ” i mose emo jẽje, “nyia” jenyechĩ nda eno jẽ.

²² “Cristo chō se re” ichōiño nda mbia ñee ata atate jēje. “Dios cheē mbuchecuasa chō se re” ichōiño nda mbia ñee ata atate jēje no. Mbia mae sayā nda esaā saā tuchi mbia mbiriri sacua. Ūqui Dios quiato abe chee mbiriri arōte.

²³ Ūqui nonde chō aico nguiā jembiiirandu randu co.

Dios riiri nda tube ibate si

²⁴ Mbia ūqui ndasi raā ja mose ra tenda checuayā mbei cote. Nyasi abe no.

²⁵ Nyasitata ra ngoi ngoi. Ibei jenda abe ra quiata quiata chee cote no.

²⁶ Aque mose ra achu ibei rese. Senininya tuchi ra sechu mose. Sequirācuā tuchi ra sechu mose no.

²⁷ Angeles serimba ra amondo mbia sechiisirō munua nua sacua. Ishonda ja. Mangue choñoa jenda ja. Mbia sechiisirō nda emunua nua ja seje cote.

²⁸ Sā higuera riqui no. Sā ira mo ndiqui no. Ero quira usē ja mose, “iraro itō ndacu ra cote”, i chō mbia nguiā aque mose.

²⁹ Eī sī ra mbae ua ja nonde. Ae riī aico ñee jēje nae, ūqui ndese jemaē mose, “mbae ra ua ja cote” jenye ra cote.

³⁰ Tacheē nyecua jēje. Ā mbia riqui ngata ibi ā nae, ūqui emo emo nda manoa mbae ua ja nonde.

³¹ Ibei ra ua. Ibi abe ra ua no. Secheē nguiā ra ua eā mbei.

³² Manosete chō nda mbae ua ja. Aico eicuayāte co. Mbia mo abe eicuayāte quia ā no. Angeles abe eicuayāte quia ā no. Paba mii ño eicua nguiā co.

³³ Nyebe jēingo quiatu quia eraarō arō mbei. Jētesa tesa bei quia. Ma nyaashī ño nda equeru. Jēicuayāte equia ā.

³⁴ Sā ererecua mo oso isho itōte no. Sā ñee ngūimba je oso nonde no. — Sembae jēsaarō ja. Ā ndese jēingo. Co rese eico nde. Qui rese eico nde no, i que ñee ngūimba mii mii je ra. —Etesa tesa bei quia, i que eiquesa raarōsa je ra.

³⁵ Manosete chō nda tuchuacha ru. Jēicuayāte equia ā. Itondaru ramo mose eru arondete. Itondii mose eru arondete. Ngaira cheē mose eru arondete no. Eresaitō ndabe mose eru arondete no. Nyebe jētesa tesa bei quiatu quia.

³⁶ Jengue mose ra eruchi jembuate jē.

³⁷ “Jētesa tesa bei quia” ae chō nguiā mbia ja je co. Jē mii je eā, i que Jesús ra.

14

Jesús nandeisi tarō, i ja ererecua nyue

¹ Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacua. ¿Mañi nande ra embiriri iri nde? i que equia ñee ñee nyue ra. Achite que fiesta de la pascua ñi tu ee cote ra. Dos días.

² —Fiesta mose eā nandeisi jē. Mbia ra paama ichi nande je jē, i que u ñee ñee nyue ra.

Cuña mo aba mbusimbusa turā ichusē Jesús āquī ndese

³ Jesús que siqui Simón Leproso chuchúaa ra. Betania, i que hue je ra. Cuña mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisē tuchi que equeru ra. Mbae isiquia mumbasa tuchi que ūqui nda. Eri ru churui que esiquio eichusē nonde Jesús āquī ndese equiaru mose ra.

⁴ Mbia que chi ja mae erese ra. Paama i que cuña je ra. —¿Mbaerã eichusê ñooño nde?

⁵ Mbae isiquia ribishorõ ño nda aba emondo re. Mbaecha reã je emee mee sacua, i que ñee icua icua cuña je ra.

⁶ Jesús que ñee cote ra. —¿Mbaerã jëingo ñee ùquĩ nde? Sã cuña ae riqui ae. Ae esaã seje nae, eturãte seje ùquĩ.

⁷ Mbaecha reã nguia ra chi arete íbii a. Jê mbae raãse mose ee, mbae jësaã turã mbei ee ae. Se quia nda aico bei eã nguia jendese aa.

⁸ Seati nonde chõ ngue cuña aba mbusimbusa ichusê ja nguia serese.

⁹ Tacheë nyecua jêje. Mbia Dios cheë turã nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacua echisaã abe rese, i que Jesús ñee mbia je ra.

Jesús tamee jêje, i Judas mbia icua je

¹⁰ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. Jesús mee nonde ee.

¹¹ Sacerdote rerecua ia ja que ùquĩ andu ra. —Mbae isiquia uremee tuchi ndeje jê, i que ee ra. Nyebe Judas riqui nguia ndua ndua. —Mbia eãsa quiato Jesús tamee ee, i.

Jesús quiaru uchimbaaquiato rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbaaquiato ñee Jesús je ra.

¹³ Ñee ngue uchimbaaquiato nyeremo je ra. —Jêso sucha cuasu. Huee ra jemae emõ i rerao rese. I ra equerao quia irasa mo ye. Aque rui jêso.

¹⁴ Eique mose, aque tuchuacha je jêñee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbaaquiato rese’, i que Jesús ñee ndeje ra”, jenyé tuchuacha je.

¹⁵ Tuchuacha ra cuarto cuasu mee jêje. Mbia quesa ibatenda ra emee jêje. Embuquiche ji. Huee chõ oveja jembuchi nandequiaru sacua, i que Jesús ñee ee ra.

¹⁶ Nyebe echimbaaquiato nyo i nguia sucha cuasu. Jesús cheë ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbaa quiato ataque rese ra.

¹⁸ Quiaru mose que Jesús ñee ee cote ra. —Tacheë nyecua jêje. A jëingo quiaru serese a nae, jemo nda semondo mbia icua je, i que ñee uchimbaaquiato je ra.

¹⁹ Echimbaaquiato ia eã tuchi que echeë mose ra. —¿Se ra aremondo ee re? i ja jate que ñee Jesús je ra.

²⁰ Jesús que ñee ee ra. —Doce jëingo quiaru serese a nae, jemo ño ñene. Ae chí quiaru serese aque plato ye sí a nae, aque chõ ñene.

²¹ Dios cheë ndui sí tuchi ra amano ndague. Ae ra semee mbia icua je, aque ra mbae rasi saã tuchi quia. Aba mbia eã tuchi ra aque. “Taĩ sembuecua jirichĩ nguia curi”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jêu. Serete chõ ã nde, i que Jesús ñee ee ra.

²³ Vino mbeisa que esirõ cote no nda. Gracias i que Dios je ra. Mondo que uchimbaaquiato oo cote ra. Mbei mbei ja que cote ra.

24 Jesús que ñee ee ra. —Seruqui chõ ã nde. Mbia icuã mbutiã sacuã ño seruqui re. Dios cheẽ yasu rui si chõ seruqui riqui nguiã mbia icuã mbutiã ã.

25 Tacheẽ nyecua jêje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã cote, i que Jesús ñee nda.

Jesús aicuayãte resẽ, ichõñõ nda Pedro serĩ, i Jesús

26 Irasei rasei que cote ra. Nyoĩ que ibi ibate mo cote ra. Monte de los Olivos, i que hue ibi je ra.

27 Jesús que ñee uchimbaaquiato je huee ra. —Jẽireĩte ra eriqui serĩ. Jẽimboseĩ mboseĩ nda oso serecha. Sã embesa ji riqui ñee no: “Mbia ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no.

28 Seraaque quera sire ra aso se rane jendaarõ Galilea, i que Jesús ee ra.

29 Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra.

30 Jesús que ñee ee ra. —Tacheẽ nyecua ndeje. Ngaira cheẽ nyeremo nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra.

31 Pedro que ñee ee ra. —Mbia ra seiquia arõte raque nderĩ, acheẽ ñooño eã nda se nderĩ, i rei que Pedro ra. Eĩ ja que ñee nda.

Jesús ñee ngu je

32 Jesús que oso Getsemaní cote ra. Uchi mbaaquiato rese. —Jengoi rã u aa. Tacheẽ na oso Paba je pe jiri se, i que Jesús ee ra.

33 Pe quti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra.

34 Ñee ngue ñquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jẽ aa. Jẽtesa tesa bei u aa, i que Jesús ñee ee ra.

35 Jesús que oso pe quti jiri cote ra. Nyibi que u ngoi ngũiã ndese ñee Dios je ra. —Mbae rasi asaã sereãte, i rei que ñee Dios je ra.

36 —Paba, mbae eresaã ja arõte nde. Ñquĩ ndasi asaã sereãte raque quia co. Ae sebi riqui nae, ñquĩ ndese semingo eã. Ae ndebite riqui nae, ñquĩ ndese quiato semingo, i que Jesús ñee Dios je ra.

37 Nyebi que u uchimbaaquiato je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je.

38 Jẽtesa tesa u. Jengue eã u ñee Dios je. Mbae icuã tã i eã sacuã jêje. Jẽingo serete raque serese. Mbae icuã nguiato jembuti mbutite nguiã, i que Jesús ee ra.

39 Nyebi si que oso ñee Dios je ra. Hue rĩ si que ñee ee ra.

40 Nyebi que u uchimbaaquiato je cote ra. I sí que u uque ee no nda. Eresa quiato ngue eshiu shiute nguiã. —¿Mañi nda aba ñee nde? i ja tuchi que echimbaaquiato ra.

41 Osobe que ñee Dios je pe jiri cote ra. Tres veces que aque cote ra. Uba rei que u ñee uchimbaaquiato je ra. —Jengue tuchi cote. Jenguenea jẽucua cote. Semondo ra mbia icuã je cote. Seiquia sacuã.

42 Jẽhuã cote. Nyao cote. Ae ra semee mbia icuã je, co eru quia semee sacuã co cote, i que Jesús uchimbaaquiato je ra.

Mbia icuã Jesús isi suruchoi

43 Jesús cheẽ mosebe tuchi que Judas ru erea ra. Jesús chimbaaquiato rei que ae ra. Aque rese que mbia cuaẽ tuchi quia ra. Tiquise abe que ecurucuaẽ

nguia ra. Ira jua abe no. Sacerdote rerecua chõ ùquĩ mbucuaẽ nguia reaẽ. Embesasa abe. Amei abe.

⁴⁴ Judas ñee nyecuayã nguia tu quia ùquĩ je nyii reaẽ. —Ae ritii ra asiite nae, aque chõ ñene. Aque jëisi quiatu tuchi serao, i quia equia ee nyii reaẽ.

⁴⁵ Jesús riichã ngue esi saludar i ee cote ra. Jesús ritii que esiite ee cote ra.

⁴⁶ Mbia que Jesús isi cuaẽ ecua cote ra.

⁴⁷ Ùquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra.

⁴⁸ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co.

⁴⁹ Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? Embesa ji ique sacua ño jëicua icua ndiqui nguia seje ã, i que Jesús ñee ee ra.

⁵⁰ Echimbaaquiato que nyoĩ ja chee uchã Jesús recha ra.

⁵¹ Acuanindu mii mo ngue oso erui ra. Tiru mii ngue equereco nyiati ra. Mbia que acuanindu abe isi rei ra.

⁵² Huiirao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³ Mbia que Jesús curuchoi sacerdote rerecua je cote ra. Huee que sacerdote rerecua ja chi ñumunua nda. Embesasa abe. Amei ererecua ja abe no.

⁵⁴ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que hui huee ra.

⁵⁵ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandëiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra.

⁵⁶ Emo emo ngue ñee icua icua nde Jesús riĩ nda. Ucheẽ ngue etasa tasa tuchi chõ nda.

⁵⁷ Mbia mo abe que juã ñee ñoño erĩ nda.

⁵⁸ —Jesús cheẽ ngue urechandu ra. Ñee icuãte que Dios chuchua riĩ nda. “Dios chuchua tambocoi mbia chiao. Tres días mose ra Dios chuchuarã asaã no. Mbia chiao eã nda ùquĩ cote”, i que urechandu Jesús cheẽ nda, i que ùquĩ ñee ñoño Jesús riĩ nda.

⁵⁹ Ucheẽ ngue etasa tasa bei chõ nda.

⁶⁰ Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que ñee Jesús je ra.

⁶¹ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra.

⁶² Jesús que ñee ee ra. —Ae. Dios rucucha chõ se re. Jemae nda serese s e coi mose Dios quiracua jii. Sechu mose abe ibeishĩ ndese, i que Jesús ee ra.

⁶³⁻⁶⁴ Sacerdote rerecua que paama i tuchi Jesús cheẽ mose ra. Huiirao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndeĩ ngue erese re. ¿i jëje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicua tuchi que ra jë. Sã mbia equia, i jate que ererecua ñee Jesús riĩ nda.

⁶⁵ Mbia que ñinimbu nimbu Jesús ruba rese cote ra. Eresa que echati mbae mo je ra. Úcua ucua tuchi que erese cote ra. —¿Aba ucua ucua u nderese a re? Eicua no, i que equia eresa ati ji je ra. Soldados abe que ucua ucua tuchi eresa rese ra.

Jesús aicuayâte resê, ichõïño Pedro

⁶⁶ Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra.

⁶⁷ Pedro que chĩ nyee tata jii ee huee ra. —Jesús resenda que nde abe ra, i que nyucuaaque ñee mae Pedro rese ra.

⁶⁸ —Tei. Ndecheẽ aicuayâte, ichõïño ngue Pedro ñee ee ra. Hue si que esi eiquesa quitu cote ra. Usẽ mose que nguira ñee cote ra.

⁶⁹ Nyucuaaque que maembe erese ra. —Co abe que Jesús resenda ra, i que mbia ataque je ra.

⁷⁰ —Tei. Aicuayâte se, ichõïño ngue Pedro ee no nda. Ae chi huee nae, ùquĩ mo ngue ñee ee cote ra. —Jesús resenda chõ nde abe resê. Galilea jenda chõ nde resê, i que ñee Pedro je ra.

⁷¹ Pedro que jurar i tuchi ñee ee ra. —Aicuayã tuchite se resê, i que ñee ñooño si no nda.

⁷² Aque mose tuchi que nguira ñee sí cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces serĩ, sã Jesús i ee nyii no. Ñquĩ ndese que Pedro ndua cote ra. Nyebe nyeseo tuchi nguĩã cote.

15

Mbia Jesús curuchoi Pilato je

¹ Nyaashĩ namo mose que sacerdote rerecua ñmunua ja ra. Amei ererecua abe no. Embesasa abe no. Mbia rerecua jate que ñmunua nda. Jesús que echucua suruchoi Pilato je ra. Pilato rei mbia rerecua hue jenda ja.

² —¿Judíos rerecua chõ nde re? i que Pilato ñee ee ra. —Ae. Judíos rerecua chõ se re, i que Jesús ee ra.

³ Sacerdote rerecua que ñee ñooño tuchi Jesús rĩ nda. Ñee icuã tuchi que erĩ nda.

⁴ —Sã ñee icuã icuãte nderĩ jẽ. ¿Echeẽ nda eresibishorõ eã nde? i que Pilato ñee Jesús je ra.

⁵ Jesús que ñee ãte echeẽ mose ra. Nyebe Pilato nyuruira tuchi nguĩã echeẽ eã mose.

Jesús jẽiquia mbucha ira rese, i ererecua

⁶ Pilato que mbia tarõ ji mo mbusẽ mbei quia pascua mose ra. Co mĩ ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra.

⁷ Barrabás, i que etarõ ji mo je ra. Emo abe que chi huee erese ra. Mbia iquiasa que ùquĩ nda.

⁸ Mbia que ñee ngaẽ Pilato je ra. —Mbia mĩ tarõ ji que erembusẽ mbeite quia, einyere si emõ mbusẽ namo, i ja que mbia ñee Pilato je ra.

⁹ —¿Judío rerecua ra ambusẽ mondo jẽje Jesús re? i rei que Pilato ra.

¹⁰ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangu re ra.

11 —Sã Pilato Barrabás mbusẽ mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra.

12 —¿Mañi ae quia ra Jesucristo je re no? i que Pilato ñee ee ra.

13 —Embucha ira rese, i ja que mbia ñee ee ra.

14 —¿Mbae icuã esaã nde? i que Pilato ñee ee ra. —;Embucha ira rese jê! i bei bei que mbia ra.

15 —Mbia turã jiri nda seje chã, i chee que Pilato ra. Nyebe Barrabás mbusẽ mondo nguiã. Jesús quiatu que eiruã nua cote ra. —Jembucha iquia ira rese, i que mbia je cote ra.

16 Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda.

17 Tiru ireĩ ngue emingue ee cote ra. —Ererecua chõ nde re, ichõ:ño iquia iquia ee. Nyu ritime i uma ji que emi eãquĩ ndese corona nda.

18 —Judío rerecua tuchi chõ nde re, ichõ:ño ngue iquia iquia ee ra.

19 Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que ngũã ndese erimba raã naa ee ra.

20 I quia iquia tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

21 I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aquere que soldados isi ira mbuchicandasa ji rerao sacuã ee ra. Cruz, i equia ee. Nguerao que cote ra.

22 Ngasẽ ngue pee cote ra. Gólgota, i que hue je ra. Eresa cuare, i chõ nguiã hue je.

23 Huee que vino mondo rei Jesús je ra. Mirra je emumbarai. Mbei eã ngue ra.

24 Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra.

25 Tenda chui ite ramo mose que embucha ira rese ra.

26 Mbia que letrado mii Jesús aãquĩ nguiti ibate ra. JESUS REI JUDIO RERECUA i que embesa mii nda. Ñquĩ nii ño eriqui nguiã eiquia hue.

27 Mbia nyeremo abe que embucha ira rese Jesús chabe ra. Jesús rereco chobei que emi ira rese ra. Mbae mbuquiachãsa tuchi que ñquĩ nda.

28 Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no.

29 Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia.

30 Equiche u nde ae hue si no, i tuchi que mbia quia iquia iquia ee ecuã mose ra.

31 Sacerdote rerecua abe que iquia iquia chõ nguia ee ra. Embesasa abe no. Ñquĩ ngue ñee icuã icuã ja quia erĩ nda. —Mbia que embuquera quera rei nyii ra. Ae sí quera aroneate nguiã aque.

32 Judío rerecua mose ae, sã ae ae nguichi ira si. Cristo mose ae, sã ae ae nguichi no. I nda uremae erese. I nda ureicua cote, i ja que ererecua ñee icuã icuã erĩ nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra.

³⁴ Tenda chesece mose que Jesús ñeemombo cote ra. —Eloi, Eloi, ¿lama sabactani? i que ñee mombó ra. —Dios sererecua, ¿mbaerã ereico hui sesi re? i chõ ngu ñee nguã.

³⁵ —Elías je eriqui “quiatuchu” i reae, i rei que echeẽ andusa mo nda.

³⁶ Emo ngu esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruât e quia erea, i que emo ñee ee ra.

³⁷ Jesús que tasẽ mano mbei cote ra.

³⁸ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra.

³⁹ Soldado rerecua que chí Jesús nonde mae erese ra. Emano ndese que eñi mae nda. —Dios riirĩ ño eriqui re, i que cote ra.

⁴⁰ Cuña ngu chi jate ma e Jesús rese isho ra. María Magdalena abe que chí huee ra. Salomé abe no. María abe no. María rei José si. Jacobo Ñetẽ si abe no.

⁴¹ Ñquĩ ngu e siqui bei quia Jesús rui ra. Echiurã ngu emi mii mbei quia ee ra. Galiléaa eico mose bei. Cuña tubiriãte abe que chí mae Jesús mbuchai rese huee ra. Ae nyoĩ Jesús rese Jerusalén, ñquĩ.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda.

⁴³ Aque eresaitõ mose que José si ñee Pilato je ra. Judío turã ngu ae ra. Arimatea jenda que ae ra. Judío rerecua que ae no nda. —Dios ra ererecua, i beite que equia eraarõ arõ nda. Aque que ireĩ ireĩ ãte oso ñee Pilato je ra. —Jesús raaque emee na seje, i que oso ñee ee ra.

⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra.

⁴⁵ —Mano ngu cote ra, i que soldado rerecua ñee ee ra. Nyebe Pilato eraaque mondonguiã José je cote.

⁴⁶ José que Jesús raaque mbuquichi cote ra. Tirushĩ turã mo ngu eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra.

⁴⁷ María Magdalena ngu e mae mi eati rese ra. María rese. José si que ae ra.

16

Jesús raaque quera si

¹ Jesús raaque ati ji que chibe sábado mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdalena. Salomé abe no. María abe no. Jacobo si rei ae. Ñquĩ ja que aba mbushimbusa isi rei eichusẽ chusẽ sacua Jesús raaque rese ra.

² Tenda nyui ramo mose que echoi eatísaa ra.

³ —¿Aba ra sita curuba nande je eatiquia re? i rei que echoi quia ñee ñee nyue ra.

⁴ I que sita rurubai u ee cote ra. Sita cuasute quiatu ngu re.

⁵ Ique rei que echoi sita imi ye ra. Acuanindu mo ngue chĩ ngoi huee equiatocuti quti ra. Huiiraoshi oco tuchi que ecunui huee ra. Cuña ngue siquiche tuchi ra.

⁶ Acuanindu que ñee ee ra. —¿Mbaerã jẽingo siquiche re? Jesús raaque jẽsequia raque quia ã. Emoate a resẽ. Eraaque que quera si no. Jemae eatisa rese ae.

⁷ Jẽso asi rã echimbaaquiato mbiirandu erese. Pedro abe jembiirandu. “Jenonde ra esi Galilea. Jemae nda erese huee. Sã ñee jẽje nyii no”, jenyẽ embiirandu, i que acuanindu ee ra.

⁸ Cuña ngue siquichete echeẽ andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashi namo mose domingo mose ra. María Magdalena nane jẽ que nyecua ra. Aque si chõ eriqui siete aba checuayã icuã jea nyii reaẽ.

¹⁰ Ae que oso Jesús quiato mbiirandu ja cote ra. Ngasẽ mose ee que echi nyeseo jate eya eã ee ra.

¹¹ —Jesús que quera si ra. Amae ngue erese ra, i rei que embiirandu ra. Quera aroneate que ũquĩ je ra.

Jesús nyecua uquiato nyeremo je

¹² Aquere que nyecua uquiato nyeremo je ra. Ishote que sucha tubiriã si ra. Emo na tuchi que ee ra.

¹³ —Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiato mondo mbia mbiirandu

¹⁴ Aquere que Jesús nyecua uchimbaaquiato ja je no nda. Once je. Ũquĩ quiaru mose que nyecua ee ra. Ñee asi asi que ee ra. —¿Mbaerã jeñia ãtãte rĩqui re? ¿Mbaerã “nyia” jenyẽ eã jembiirandu mose sequera rese re? i que ñee ee ra.

¹⁵ —Jẽso secheẽ nenei nenei mbia ja je. Mbiamangue chooñoa jenda ja je.

¹⁶ Mbiamo nda seicua icua. Ũquĩ je bautizar jenyẽ. Ũquĩ nda siqui bei cote. Ae ra seicuayã, ũquĩ nda mbae rasi saã mbei.

¹⁷ Seicuasa ra mbiamae sayã saã saã tuchi. Aba checuayã icuã nda ejea jea mbia si seriĩ. Mbiamcheemo nda esaã.

¹⁸ Mbei ra eisi isi o je. Aba iquiasa mbei mose ra erasiã. O ra echono ñono erasi arõ embucherõ sacuã, i que Jesús uchimbaaquiato mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacuã Dios jii cote.

²⁰ Echimbaaquiato que nyoĩ Dios cheẽ nenei nenei mbia ja je ra. Mangue chooñoa jenda ja je. Dios que siqui tuchi quia erese ra. Mbiamae sayã tuchi que esaã saã nguia ra. Mbiam Dios cheẽ icua sacuã. Amén.

EL SANTO EVANGELIO SEGÚN SAN LUCAS

Lucas ucheẽ mbesa Teófilo je

¹ Jesucristo que mbae saã saã tuchi quia huico mose íbii ra. Mbia atate que echisaã mbesa mbesa rei ra.

² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembiirandu cote ra.

³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ũquí tambesa ja ndeje, Teófilo. Tasenei turã ja embuchiabiã ndeje.

⁴ Ae rese ereirandu randu nae, ũquí ereicua tuchi sacuaã ño aico nguiaã embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra.

⁶ Zacarías turãte que eriqui Dios je ra. Ngūinisi rese. Ũquí ngue Dios cheẽ mumbayã mbei quia ra. Eicuãte, i aroneãte que mbia mo nguia eriĩ nda.

⁷ Eriirĩã mbei que eriqui ra. Tiiriã je rei Elisabet. Ari chee. Zacarías abe que ameite chee ra.

⁸⁻⁹ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacuaã embushimbu.

¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee Dios je ra.

¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee ra.

¹² Zacarías mae mose ángel rese, siquiche tuchi que ra.

¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra. Elisabet nda tiirĩ ndeje cote. Juan, ere nderiirĩ je nyaacuquia mose.

¹⁴ Ndeyate ra cote. Nderiirĩ nyaacuquia mose ra mbia ia tuchi cote.

¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espiritu Turã nda siqui tuchi erese. Esi rie ye ereco mose bei.

¹⁶ Nderiirĩ nda mbia Israel jenda mbuchebi ja Dios je. Dios ra ũquí nderecuarã.

¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquirãcuã no, eĩ si ra Dios uquirãcuã mee nderiirĩ je. Nderiirĩ nda mbia mbuturã turã nyiese. Eru mbuturã turã nguiirĩ ndese. Eriirĩ mbuturã turã ngu rese no. Nderiirĩ nda aba cheẽ mumbasa mbaaquiato quiatu. Aba cheẽ mumbayã sacuaã cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra.

¹⁸ Zacarías que ñee ángel je ra. —¿Mañi nda ũqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra.

19 Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguia ñee turã sacua ndeje.

20 “Nyia” ere eã ñochi secheẽ je. Nyebe ra ndeisyã. Ndecheẽ nguia nda eno. Nderiiri nda nyaacuquia chee. Nderiiri nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra.

21 Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia ñee jate ra.

22 Zacarías que usẽ nyee ra. Echeẽ nguia. O que emumbate mbate chõ nguia mbia je ra. —Zacarías mbae mo tea cuu Dios chuchua reae, i que mbia ñee ñee nyue ra.

23 Zacarías que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacarías que oso uchuchua cote ra.

24 Aquere qu Eya uchi que cote ra. Eninisi que useã mbei tuchua si cinco meses ra.

25 —Dios seriirina meeñi seje cote. Mbia ra iquia iquia eã seje cote, i que Elisabet ra.

“Dios riiri nda nyecua u mbia je”, i que ángel mo nda

26 Nyasi nongue mose que Dios ibatenda mondo mbia mo je ra. Gabriel, i que aque ángel je ra. Aque que emondo sucha Nazaret ra. Galilea, i que aque ibi je ra.

27 —Eso rã ñee nyucuaaque María je, i que Dios ángel mondo ra. Emo ngue siquia tuchi María rese ra. Eruã mbei. José ninisibi rei María. José siquia ndaque erese. David riiri nducucha rei José.

28 Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuaní mo si, i que ángel María je ra.

29 María mae mose ibatenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra.

30 Angel que ñeembe ee ra. —María, siquichechĩ nda sesi re. Dios turã tuchi riqui ndeje co.

31 Dios cheẽ turã ngue asenei u ndeje ra. Nanĩmbae ra nde cote. Nderiirina nda eretea cote. Jesús, ere nderiiri je.

32 Nderiiri quirãcuã tuchi rae. Dios quirãcuã ndiiri nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiiri mbia rerecua tuchi cote.

33 Nderiiri nda judíos rerecua bei cote. Ua eã mbei rae, i que ángel ñee María je ra.

34 María que ñee ángel je ra. —¿Mañi nda serío re? Seru eãte nyeresẽ, i que María ee ra.

35 Angel que ñee María je ra. —Espíritu Turã ae ra Dios riiri mondo nderie ye. Espíritu Turã nda ndereaquiato bei quia. Dios quirãcuã nda siqui bei nderese. Nyebe ra Dios mbaerã tuchi nderiiri. Dios rucucha, i ra nderiiri je.

36 Ndesi nongue ndiiri abe ra tiiri cote. Elisabet, i equia ee nae, aque abe ra tiiri. Arite raque. Erie cuasu cote. Tiiri mbae, i mbia quia ee nyii nae, aque ra tiiri cote.

37 Dios quiarei mbae ao ja, i que ángel ñee María je ra.

38 María que ñee ee ra. —Dios rimba chõ aico nguia co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je.

⁴⁰ María que ngasẽ Elisabet ndu chuchúaa ra. Zacarías, i equia eru je. Ique que ñee Elisabet je ra.

⁴¹ Elisabet María cheẽ andu mose, erie yenda que umi nda. Espíritu Turã ngue ique tuchi Elisabet chiangui re cote ra.

⁴² Elisabet que ñee nyecua tuchi María je ra. —Nde rese chõ Dios ia tuchi acuanĩ mo si re. Dios ia tuchi nderie yenda rese abe no.

⁴³ ¿Mbaerã Cristo si ru serea se re? Mbia rerecua eã ño se resẽ.

⁴⁴ Se ndechẽ andu mose que serie yenda ia tuchi umi nda.

⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra.

⁴⁶ María que ñee cote ra.

Acheẽ turã mbei quia Dios rĩ co.

⁴⁷ Seya bei riqui Dios rese co.

Ae que serirõ mbae icuã si ra.

⁴⁸ Dios que nduate quia serese ra.

Seaquiatuã ndaque.

Nyebe ra mbia ia jate serese cote.

⁴⁹ Dios quirãcuã ngue mbae turã saã tuchi seje ra.

Ae mii ño eturã tuchi emo si re.

⁵⁰ Ae ndua turã nguia Dios rese nae, ñquĩ ndese chõ Dios ia eã tuchi riqui nguã.

Eĩ mbei chõ Dios nguia mbia je co.

⁵¹ Dios quirãcuã ngue mbae saã ja ra.

Ucuasu raã naasa chõ Dios mboseĩ nguia.

⁵² Siqui mingue je chõ Dios mii mii nguia mbia rerecuarã.

Ae ererecua uaquiatsu saã saã nguia nae, ñquĩ ño Dios sirõ nguia.

Ererecua eã ño ñquĩ cote re.

⁵³ Dios que mbae mee mee nguia mbaecha reã je ra.

Mbaecha quia emboochi nguia.

⁵⁴ Dios que siqui tuchi judíos rese ra.

Tesareia mbei esi.

Eyayã mbei erese no.

⁵⁵ Sã Dios ñee Abraham je no, ñquĩ ngue embuchebiã mbei ra.

Ae ucheẽ mondo judíos jaje nae, ñquĩ ngue embuchebiã mbei no nda, i que María ñee turã Dios rĩ nda.

⁵⁶ María que siqui arete Elisabet rese ra. Tres meses. Aquere que eru nyebi uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra. Nyaa cuquia que cote ra.

⁵⁸ Mbia que nyoĩ ja Elisabet ndea cote ra. Ejii jenda. Eresenda ja. —Dios turã tuchi riqui ndeje co. Ñquẽ mondo ndeje, i ja que ee ra. Eya ja tuchi que erese ra.

⁵⁹ Ocho días mose que circuncisión naa eriirĩ je ra. Zacarías, i nda mbia eriirĩ je chã nde. Eru rã si.

⁶⁰ Esi quia que ñee nda. —Tei. Juan nande chõ ee, i que esi ra.

61 Mbia que ñee esi je ra. —¿Mbaerã nda “Juan” ere nderiirĩ je re? Juan mo eã nderesenda mo aa resẽ, i rei que mbia esi je ra.

62 Mbia que o mbaaba aba Zacarías je ra. —¿Mañi nda nderiirĩ je re? i ee.

63 Zacarías que ñomee mbia je ra. Nyebe mbia embesa sacua mee nguiã ee. —Juan, i chõ seriirĩ je, i que Zacarías embesa ra. Mbia que nyuruira ja u mae erese ra.

64 Aque ruibe que Zacarías ñee aquiatu cote ra. Ñee turã tuchi que equia Dios riĩ cote ra.

65 Zacarías cheẽ andure que mbia nyuruira jate ndua ndua hue jenda ra. Nyebe mbia ñimbiirandu ja nguiã sita ibate bate jenda. Judea, i que hue ibi je ra.

66 Ae jirandu quia erese, ñquĩ ngue ndua tuchi quia erese ra. —Mañi nda Zacarías riirĩ nguia reae. Nandemae nguia erese no, i que mbia quia ndua ndua ra. Dios que siqui tuchi Zacarías ndiirĩ ndese ra.

Zacarías ia tuchi ñee Dios je

67 Espíritu Turã ngue siqui tuchi Zacarías rese ra. Nyebe Zacarías Dios cheẽ nenei nguiã.

68 Sã mbia ñee turã Dios riĩ judíos rerecua riĩ.

Uturã ngue eteacuquia nande je ra.

Nanderirõ ngue mbae icuã si ra.

69 Nanderirõ sacua nandeicuã si que Dios mondo nande je ra.

David riirĩ nducucha que nanderirõ sacua nda.

70 Sã Dios ñee cose no.

“Mbia rirõ sacua nda ambu íbii”, i cose no.

Ucheẽ nenei neneisa que embuchecua mbia je cote ra.

71 “Jëucuãyãsa si ra jendirõsa jendeaquiatu bei”, i que Dios nande je ra.

72-73 Dios turãte que eriqui nandei ñiinda je ra.

Abraham je abe que eturãte riqui ra.

Ae Dios ñee Abraham je nyii nae, echeẽ ngue io cote ra.

74 Dios que ñee Abraham je nanderiĩ nyii ra.

“Taendeaquiatu jëucuãyãsa si, jësiquicheã sacua ico mose serese”, i que Dios nanderiĩ cose ra.

75 Nyebe ra nandeico turã mbei Dios je.

Ae ra nandemingo bei icúe umbaerã.

76 Nde ra Ibatenda cheẽ esenei senei nguia mbia je, Ñquẽ.

Dios riirĩ ndetã nda Dios cheẽ eresenei senei nguia mbia je, Ñquẽ.

Mbia icoquiatu sacua Dios riirĩ je.

77 Eĩ mose ra Dios mbia rirõ eicuã si.

Eĩ mose ra Dios mbia icuã mbutiã esi.

78 Dios turãte quia eriqui nguiã nande je.

Eriirĩ nda tu ibate si mbae mbuchecua nande je.

79 Nandeaquiataũ mbaaquiatu sacua ño eru nguiã aque.

Nandemingo sacua nyaashĩ naanguia chõ eru nguiã aque, i que Zacarías ñee ñquẽ je ra.

80 Ñquẽ ngue tiarõ i i oso quia cote ra. Dios rese que eriqui i i cote ra. Siqui bei que equia turúquiaa ra. Dios cheẽ ngue esenei senei nyee mbia je cote ra.

¹ Aque mose que ererecua ñee nda. Augusto, i que ee ra. —Censo nandesaã na mbia ja je, i que ra. Mbia mbae nombre mbesa mbesa ja mose, “censo” i que ũquí je ra.

² Censo raã namo mose rei ũquí. Cirenio ngue Siria jenda rerecua aque mose ra.

³ —Jenyusua sua jêso ja pueblo. Nombre mbesa mbesa ja sacua jembae, i que ererecua mbia ja je ra.

⁴ Nyebe José choi nguiã Judea. Belén, i que sucha je ra. Belén ño David chusua re. José i chõ David re. Nyebe José choi nguiã Belén. Umbae ibi recha. Nazaret recha. Galilea abe recha no.

⁵ José que nyoĩ Belén umbae nombre mii sacua nda. María rese. María que eninisibi ra. María riote que ra.

⁶ Siqui mose Belén ngue ãquẽ ndasi rasite María je ra.

⁷ Aque ramo ngue María nguiĩ mbua ra. Ñuma ngue tiru je ra. Ticusu quiarusa ye que eno nda. Mbia chuchua quiatu que eitãyãte ee ra.

Oveja raarõsa ngaẽ mae Jesús itãqueĩ ndese

⁸ Hue jii que oveja raarõsa mo nyi isa ra. Ovejas que esaarõ arõ nguia turuquia rĩ nda.

⁹ Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguiã esi.

¹⁰ Angel que ñee ee ra. —¿Mbaerã jêsiquichete riqui re? Mbae turã ñi ño achu nguiã ñee jêje co. Ae ra asenei jêje, mbia mbia sacua tuchi chõ ũquí nde.

¹¹ Dios ririĩ ngue nyaacuquia namo Belén nda. Cristo, i equia ee. Mbia rirõsa mbae icua si chõ ae re.

¹² Aque echi ticusu quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jenye ra cote, i que ángel ñee oveja raarõsa je ra.

¹³ Angeles tubiriãte que nyecua oveja raarõsa je cote ra. Angel ñiinda ndese. Ñee turã ja que Dios rii nda.

¹⁴ Sã mbia ñee turã ja Dios ibatenda rii.

Sã Dios uquiato mbia ja ibi jenda, i que ángeles ñee nyecha ee ra.

¹⁵ Angeles que nyoibe ibate cote ra. Oveja raarõsa que ñee ñee nyue cote ra. —Nyaso rã Belén. Ae Dios senei senei nguia nande je nae, nyaso rã mae erese. Ae nyaacuquia namo nae, nyaso rã mae erese, i que oveja raarõsa ñee nyue ra.

¹⁶ Nyoĩ asi tuchi que mae erese ra. Ngasẽ ngue María je ra. José abe je. ãquẽ abe je. I que ãquẽ u ticusu quiarusa ye ee ra.

¹⁷ Oveja raarõsa que mbia mbiirandu ja erese ra. Ae ángel senei senei nguia ee María ririĩ ñi, ũquí ngue oveja raarõsa senei senei tuchi mbia je cote ra.

¹⁸ Eandusa que nyuruira ja tuchi eandu ra.

¹⁹ María que ndua ndua tuchi quia ũquí ja rese uchiangui re ra.

²⁰ Oveja raarõsa ia tuchi que nyoĩ nyebi ovejas je ra. Ñee turã turã tuchi que echoi quia Dios rii nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa ãquẽ je cote ra. Jesús, i que ãquẽ je cote ra. Angel cheẽ ndui si tuchi chõ “Jesús” ichĩ ãquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María ririĩ je.

²² Aquere que María ñimbitirõ Moisés cheë ndui si cote ra. Aquere que ãquë nduruchoi Jerusalén cote ra. Ñquë mee sacua Dios je.

²³ Embesa ji cheë ndui si que ãquë mee Dios je ra. —Ae eririĩ i erãcuë nae, ñquĩ jemondo tuchi Dios je, i quiatu ngue embesa ji rese re.

²⁴ Jerusalén José riqui mose que sacrificio mee Dios je ra. Embesa ji cheë ndui si. Sã embesa ji riqui ñee no: —Nyurusĩ nyeremo jemee Dios je. Ñquĩ eã mose, nyurusĩ ñetẽ jemee ee no ae, i que embesa ji cheë nda.

²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riirĩ saarõ arõ tuchi quia ra. Judíos mbui sacua mbae icua si. Espiritu Turã abe que siqui Simeón ndese ra.

²⁶ Espiritu Turã nguia ñee ndei Simeón je nyii. —Eremae nda Dios riirĩ ndese. Ndemano nonde ra eretea. Dios ra embu ibii, i que Espiritu Turã ñee Simeón je nyii ra.

²⁷ Espiritu Turã ngue Simeón querao Dios chuchúaa ra. Embesa ji cheë ndui si que José ãquë nduruchoi Dios chuchúaa aque mose si ra. María reses.

²⁸ Simeón ngue ãquë sui ra. Eya tuchi que erese ra. —¡Co chõ jê! i que Simeón ñee turã Dios je ra.

²⁹ Dios, ndecheë ngue io seje cote ra.

Seyate aico co cote Sererao se cote.

³⁰ Nderiirĩ ndese que amae cote ra.

³¹ Ae erembu mbia rirõ sacua mbae icua si nae, aque rese aico mae co cote.

³² Mbia resae sacua tuchi chõ nderiirĩ ndiqui re.

Judíos eã abe ra etesae tuchi.

Judíos abe je ra eturã tuchi no,

i que Simeón ñee Dios je ra.

³³ Simeón ñee mose María riirĩ ñii, José que nyuruira tuchi echeë andu ra. María rese.

³⁴ Simeón ngue ñee turã María je ra. —Nderiirĩ nda judíos tubiriã mingo turã. Ae siqui sereãte quia erese, ñquĩ nguia ra emingo icua. Mbia ra ñee icua icua nguia nderiirĩ turã je. Eicua je rocoĩ.

³⁵ Ae ndua turãte quia nderiirĩ ñii nae, ñquĩ ndua ndua turã nda nyecua mbia je cote. Ae ndua ndua icua nguia, ñquĩ ndua ndua abe ra nyecua mbia je cote no. Mbia icua nda nemundite nderiirĩ ndese, i que Simeón María je ra.

³⁶ Hue que arite mo ndiqui ra. Dios cheë nenei neneisa que ae ra. Ana, i equia ee. Fanuel, i que eru eiruã siasa je ra. Aser, i que ei ñiinda je ra. Ana yasú mose que ngurã ndea nyii ra. Siete años que eriqui ngu rese nyii ra.

³⁷ Eru eã ngue cote ra. Eru cheecha que siqui beite ra. Ochenta y cuatro años. Dios chuchúaa que eriqui beite ra. Ñee ñee mbei Dios je. Quiaru rocoi. Isa abe.

³⁸ Ana ngue mae ãquë Jesús rese Dios chuchua cote ra. —¡Co chõ jê! i tuchi que Dios je ra. Ñee turã tuchi que ãquë ñii mbia jaje cote ra. Ae Dios riirĩ saarõ arõ nguia nae, ñquĩ jaje que Ana ñee turã turã ãquë ñii nda.

José nyebi Jesús rerao Nazaret

³⁹ José que mbae saã ja embesa ji cheë nguire ra. Aquere que echoi nyebi Galiléaa ra. Nazaret, i equia echuchua je.

⁴⁰ María ririĩ ngue tiarõ cote ra. Ñimbaaquiatsu quiatu que equia cote ra. Ñimbirãcuã nacuañte que equia cote ra. Dios turã ngue siqui tuchi quia erese ra.

Jesús ñimbaaquiatsu quiatu Dios chuchúaa

⁴¹ Aque tenda bei que José riqui nyoĩ choi Jerusalén nda. Fiesta de la pascua mose bei. María rese.

⁴² Jesús tiarõ namo mose, doce años mose que echoi si fiesta de la pascua mose no nda. Jerusalén.

⁴³ Fiesta ua mose que euañ ndei quia nyebi ra. Jesús que siquichõ Jerusalén nda. Jesús abe oso reĩ nguiã usi je. Ngu abe je.

⁴⁴ Jerusalén ño eriquichõ neaẽ. Mbia ataque rese eru reĩ nguiã esi je. Mbia que ngaẽ ngaẽ bei quia tenda mumba chee ra. —Ma Jesús ñi, i rei que nguesenda je ra.

⁴⁵ Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote.

⁴⁶ Tres días mose que erea huee cote ra. Dios chuchúaa que eriqui ee ra. Ñimbaaquiatsu quiatu. Mbia mbaaquiatusa cheẽ andu andu que Jesús riqui ngoi huee ra. —¿Mañi equia re? Tachandu tuchi rã, i i que equia ee ra.

⁴⁷ Jesús cheẽ aracua tuchi que eriqui mbia je ra. Nyebe mbia nyuruira nguiã echeẽ aracua andu.

⁴⁸ Eru erea mose huee, ae abe que nyuruira ra. Esi abe nyuruira no. Esi que ñee ee ra. —¿Mbaerã eresoã urerese re, Echo? Ureya eã tuchi que eriqui nderequia asi asi ra, i que María nguiĩrĩ je ra.

⁴⁹ Jesús que ñee ee ra. —¿Mbaerã serequia mámbii re? Paba chuchua chõ ngue aico resẽ, i que Jesús usi je ra.

⁵⁰ María que Jesús cheẽ icuayãte ra. José abe echeẽ icuayã no.

⁵¹ Jesús que oso uchuchua erese cote ra. Nazaret, i equia sucha je. Usi cheẽ ngue emumbayã mbei quia ra. Ngu cheẽ ngue emumbayã mbei quia no nda. Esi que ndua ndua bei quia ũqui Jesús chisaã ndese ra.

⁵² Jesús rete que siri siri oso quia cote ra. Ñimbaaracua racua que equia no nda. Dios iate que eriqui erese ra. Mbia abe iate que eriqui erese no nda.

3

Juan Dios cheẽ senei senei mbia je

¹⁻² Aquere que Dios ñee Juan je ra. Zacarías ririĩ je. Tiberio siqui bei mose mbia ja rerecuarã. Quince años ereco mose mbia rerecuarã. Poncio Pilato que Judea jenda rerecu a que mose ra. Herodes que Galilea jenda rerecu ra. Felipe que Herodes nongue ra. Felipe que Iturea jenda rerecu ra. Traconite jenda rerecu abe que Felipe no nda. Lisaniás que Abilinia jenda rerecu ra. Anás que sacerdote rerecu ra. Caifás abe que sacerdote rerecu ra. Ũqui ererecu si que mose que Dios ñee Juan je turuquia re ra.

³ Nyebe que Juan Dios cheẽ senei senei nguiã mbia je ra. Ama Jordán ndurubinda jaje. Eĩ ño ngue Juan nguiã ñee mbia je ra. —Jẽhũ chõ jẽicuã si. Dios jẽicuã mbutiã sacua. Ũqui mose nda bautizar ae jẽje chã, i que Juan nguiã ñee mbia ja je ra.

⁴ Isaías chimbasa io sacua ño ngue Juan Dios cheẽ nenei nenei nguiã. Isaías chimbsa chõ ã nde:

Emo nda ñeemombo mombo quia mbia je turúquiaa.

“Ñeenda nandererecu mbaerã jembuquiche.

Jëingo quiatu nandererecua tu nonde.

⁵ Ñeenda jembuturã turã nandererecua mbaerã.

Ibi cuaacua jembato mbato.

Ibi ati ati jësimiambo ambo.

Ñeenda chaa chaa jeñeengo.

Ibi rashĩ ndashĩ jëiti iti.

⁶ ‘Mbia mingo beisa’, i ja ra mbia ñee Dios je cote”, i ra emo nguia turúquiaa, i que Isaías embesa cose ra.

⁷ Mbia que nyoĩ nyoĩ ja quia Juan ndea ra. Juan bautizar i sacua ee. Juan ngue ñee ee ra. —Mbei rã ño jëingo nguia. Mbae icua nda jeĩ jeĩ mbia je, ¿ũqui si jenyu quia seje co re?

⁸ Jë mbae icua ndecha mose Dios je, mbae turã jesaã saã mbei quia ee cote. “Abraham ndiirĩ nducucha chõ nande re. Nyebe ra Dios nandëmingo bei” jjenyechĩ nda jë! Dios Abraham ndiirĩ nducucha chao arondete raque sita je.

⁹ Ira rã si chõ mbia re. Sã ira mo ia eã no. Sã ea eã maña ño no. Sã eréi chõ no. Eĩ serĩ serĩ ño Dios mbia je, mbia mbae turã naa eã mose, i que Juan ñee mbia je ra.

¹⁰ —¿Mbae rese ra ureico Dios je re? i que mbia Juan je ra.

¹¹ Juan ngue ñee ee ra. —Ndeirao nyeremo mose, enongue emondo eirao eã je. Ndechurã mose, emo emondo mbaecha reã je, i que Juan mbia mbaaquiату quiatu ra.

¹² Impuestos isi isiquia mo abe que nyoĩ Juan je ra. Juan bautizar i sacua ee. —¿Mbae rese ra ureico ure re? i que ñee Juan je ra.

¹³ —iMbae ra jembatachĩ jë! ¡Cobrar jenyu turã ño jë! Jëcua quiatu chõ, i que Juan ee ra.

¹⁴ Soldados mo abe que ñee Juan je ra. —¿Mbae rese ra ureico ure re no? i que soldados ñee Juan je ra. Juan ngue ñee ee ra. —iMbia mbae ra jëisi chooñochĩ jë! “Co que mbae icua saã nda” jjenye chooñochĩ nda emo je jë! Jembae ae chõ jendeco, i que Juan ñee soldados je ra.

¹⁵ Mbia que mae quiatu quiatu quia Juan ndese ra. —Cristo chõ co reae, i raque mae quiatu quiatu erese.

¹⁶ Juan ngue ñee mbia jaje ra. —I achõ je chõ aico nguia bautizar i mbia je co. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqũ mbae mbitirõ no.

¹⁷ Ae ra mbia umbae mii icúe. Eturã achõ ño embae re. Ae embae eã nae, ùqui nda esei cote. Ñqui ndeisa ra ua eã mbei tata. Sã mbia quiata a chiqui chiqui no. Sã ea mii icúe no. Sã echurique mombo tátaa no, i que Juan ñee mbia je ra.

¹⁸ Eĩ ngue Juan nguia Dios cheẽ turã nenei nenei mbia je ra. Mbia mbaaquiату tuchi.

¹⁹ Ererecua Herodes je que Juan ñee nyee ra. Felipe ninisi rese siqui mose. —¿Mbaerã ereico ndenongue ninisi rese re? i que Juan ererecua je ra. —Mbae icua ersaã saã ja techĩ nguia re, i tuchi que Juan ee ra.

²⁰ Ererecua que Juan ñee mumba bei chõ nda. Ererecua que Juan tarõ nyee cárcel nda.

Juan bautizar i Jesús je

²¹ Juan bautizar i mose mbia jaje, Jesús je abe que bautizar i ra. Jesús que ñee ñee nguia ngu je ra. Ibei que obo ee ra.

²² Espíritu Turã ngue nguichi Jesús rese ra. Nyurusí rã ño nguichi checua erese. Ibatenda que ñee ee ra. —Seriirĩ ño nde re. Sechesequa chõ nde re. Seyate nderese, i que Ibatenda Jesús je ra.

Mbia ñiinda Jesús i

²³ Jesús treinta años mose que mbia mbaaquiату quiatu ramo nda. —José riirĩ, i ja que mbia Jesús je ra. Elí riirĩ nguia José re.

²⁴ Elí rei Matat ndiirĩ. Matat ndei Leví riirĩ. Leví rei Melqui riirĩ. Melqui rei Jana ndiirĩ. Jana ndei José riirĩ.

²⁵ José rei Matatías riirĩ. Matatías rei Amós ndiirĩ. Amós ndei Nahum ndiirĩ. Nahum ndei Eslí riirĩ. Eslí rei Nagai riirĩ.

²⁶ Nagai rei Maat ndiirĩ. Maat ndei Matatías riirĩ. Matatías rei Semei ndiirĩ. Semei ndei José riirĩ. José rei Judá riirĩ.

²⁷ Judá rei Joana ndiirĩ. Joana ndei Resa riirĩ. Resa rei Zorobabel riirĩ. Zorobabel rei Salatiel riirĩ. Salatiel rei Neri riirĩ.

²⁸ Neri rei Melqui riirĩ. Melqui rei Adi riirĩ. Adi rei Cosam ndiirĩ. Cosam ndei Elmodam ndiirĩ. Elmodam ndei Er riirĩ.

²⁹ Er rei Josué riirĩ. Josué rei Eliezer riirĩ. Eliezer rei Jorim ndiirĩ. Jorim ndei Matat riirĩ.

³⁰ Matat rei Leví riirĩ. Leví rei Simeón ndiirĩ. Simeón ndei Judá riirĩ. Judá rei José riirĩ. José rei Jonán ndiirĩ. Jonán ndei Eliaquim ndiirĩ.

³¹ Eliaquim ndei Melea riirĩ. Melea rei Mainán ndiirĩ. Mainán ndei Matata riirĩ. Matata rei Natán ndiirĩ.

³² Natán ndei David riirĩ. David rei Isaí riirĩ. Isaí rei Obed riirĩ. Obed rei Booz riirĩ. Booz rei Salmón ndiirĩ. Salmón ndei Naasón ndiirĩ.

³³ Naasón ndei Aminadab riirĩ. Aminadab rei Aram ndiirĩ. Aram ndei Esrom ndiirĩ. Esrom ndei Fares riirĩ. Fares rei Judá riirĩ.

³⁴ Judá rei Jacob riirĩ. Jacob rei Isaac riirĩ. Isaac rei Abraham ndiirĩ. Abraham ndei Taré riirĩ. Taré rei Nacor riirĩ.

³⁵ Nacor rei Serug riirĩ. Serug rei Ragau riirĩ. Ragau rei Peleg riirĩ. Peleg rei Heber riirĩ. Heber rei Sala riirĩ.

³⁶ Sala rei Cainán ndiirĩ. Cainán ndei Arfaxad riirĩ. Arfaxad rei Sem ndiirĩ. Sem ndei Noé riirĩ. Noé rei Lamec ndiirĩ.

³⁷ Lamec ndei Musalén ndiirĩ. Musalén ndei Enoc ndiirĩ. Enoc ndei Jared riirĩ. Jared rei Mahalaleel riirĩ. Mahalaleel rei Cainán ndiirĩ.

³⁸ Cainán ndei Enós ndiirĩ. Enós ndei Set riirĩ. Set rei Adán ndiirĩ. Adán ndei Dios riirĩ.

4

Satanás tã i Jesús je

¹ Jesús que nyebi Ama Jordán sí ra. Espíritu Turã ngue siqui tuchi quia erese ra. Turúquiaa que Espíritu Turã Jesús rerao ra.

² Huee que eriqui arete ra. Cuarenta días. Mbae mo ngue eu eã mbei aque mose ra. Eriacuãte que cote ra. —Tã tae rã Jesús je. Ma Jesús mbae icuã naa, i rei que diablo Jesús riĩ nda.

³ —Nde Dios riirĩ mose, mbichae esaã co sita je no, i rei que diablo Jesús je ra.

⁴ Jesús que ñee ee ra. —Tei. Eĩ ngue embesa ji ñee nda: “Mbia chiú achõ nda mbia mingó eã. Dios cheẽ nguia ra mbia mingó nguĩã”, i que embesa ji ra, i que Jesús diablo je ra.

⁵ Aquere que diablo Jesús rerao ibi ibate mo nda. Ibate tuchi. Diablo que ibi teacuquia ja Jesús je ra. Ishonda abe reacuquia ja ee. Aque mose bei que ereacuquia ja ee ra.

⁶⁻⁷ Diablo que ñee Jesús je ra. —Sembae ja chõ ibi re. Se emondose mose emo je, amondo ra ee. Tamondo tuchi ndeje. Mbia ja rerecuarã nda aremii. Ndeico mose serese, tamondo ja ndeje. Serimbarã mose nde, tamondo ja ndeje no, i rei que diablo ñee Jesús je ra.

⁸ Jesús que ñee diablo je ra. —Quiatúae sesi ae, Satanás. ¿Mañi nda nderimba se re? “Dios ae rese chõ jëingo”, i que embesa ji ñee ndesë, i que Jesús diablo je ra.

⁹ Aquere que diablo Jesús rerao Jerusalén nda. Querao que suruchui ibate Dios chuchua arõ nda. Ibate tuchi echuchua. —Nde Dios ririĩ mose, eo oso ibii. Dios ra ndereaquiato. Eremanoã nda oso ngoi.

¹⁰ Sã embesa ji riqi ñee no:
Dios ra ángeles mondo ndereaquiato sacuã.

¹¹ Oje ra ndeisi.
Nembuquichi mingue rae.
Sita ra cua iã ndei je,

i que embesa ji ra, i rei que diablo Jesús je ra.

¹² Jesús que ñee diablo je ra. —Sã embesa ji ñee no: “ ‘Ma Dios sereaquiato. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra.

¹³ Diablo Jesús mbiicua aronea mose, secha chee que oso ra. —Emo mose jiri ra tã aebe ndeje jë, i rei que uchiangui re ra.

Jesús mbia mbaaquiato quiato ramo

¹⁴ Jesús que oso nyebi Galiléaa cote ra. Espíritu Turã quirãcuã ngue siqui tuchi quia erese ra. Mbia hue jenda ja que jirandu ja tuchi quia erese ra.

¹⁵ Judíos chumunuásaa que Jesús riqi mbia mbaaquiato quiato ra. Mbia que ñee turã ja quia eriĩ nda.

Nazaret jenda Jesús isiteã

¹⁶ Jesús que ngasë Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ngue embesa ji renei nonde mbia je ra.

¹⁷ Mbia que Isaías chimbesea mundo Jesús oo ra. Isaías chimbesea que eequia cote ra. ã embesa ji que esaã saã mbia je ra:

¹⁸ Espíritu Turã ndiqui tuchi serese co.

Dios que sererecúe ra.

Echeẽ turã nenei nenei sacuã mbaecha reã je.

Etarõi mbusë sacuã ño ngue Dios sererecúe ra.

Eresayã ndesa ira sacuã ño ngue sererecúe no nda.

Ae je ererecua icuãte riqi nae, ũqui mbusë sacuã ño ngue Dios sererecúe nguiã no.

¹⁹ Mbia je ñee ñee sacuã ngue Dios sererecúe no nda.

“Namo ño Dios turã ndiqui nguiã”, i sacuã mbia je,

i que Jesús embesa ji mbuchecua mbia je ra.

²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbia que mae mbei quia erese ra.

²¹ Jesús que ñee mbia je ra. —Embesa ji que ambuchecua jëje namo, aque io quia jëje a cote, i que Jesús mbia je ra.

²² Mbia que ñee turã ja quia Jesús riĩ nda. —Jesús cheẽ turã tuchi quia eriqui re, i ja tuchi que mbia nyuruira ra. —¿José ririĩ ño co re? i que mbia quia ee ra.

²³ Jesús que ñee mbia je ra. —“Mbia mae sayã ngue eresaã saã Capernaum nae, ũquí mo esaã aa ndechuchúaa no”, jenyẽ arõte seje sechuchúaa.

²⁴ Tacheẽ nyecua rá jêje. Dios cheẽ mbuchecuaa ishonda cheẽ nguia ra mbia isi turã mbei quia. Nguẽcua jenda cheẽ nguia ra eisi turã eã.

²⁵ Tacheẽ nyecua rá jêje. Elías reco mose íbii, ama ngue nyaaquíã mbei ra. Tres años ndobei. Mbia riãcuã ja que aque mose ra. Eru cheecha tubiriãte que chi rei hue Israel jenda ra.

²⁶ “Ūquí eru cheecha mo je mbae echao turã”, i ãte que Dios quia Elías je ra. “Sarepta jenda je quia mbae echao eru cheecha je”, i quiatu que Dios ee ra. Judío eã je quiatu que Dios Elías mondo ra.

²⁷ Eliseo reco mose íbii, leprosos tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguiatu que embucherõ Siria jenda ra. Naamán, i que ee ra, i que Jesús ñee mbia je ra.

²⁸ Judíos chumunuasa que Jesús riqui ñee mbia je ra. Mbia Jesús cheẽ andu mose que paama i ee ra.

²⁹ Mbia paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbia Jesús rerao rei ra. Hue si nda emombo nguĩã ñã.

³⁰ Jesús que oso chee mbia tubiriã ite re si ra.

Jesús aba checuayã icuã jea amei mo sí

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbia mbaaquiatu quiatu ra.

³² Ererecua rá ño ngue Jesús riqui mbia mbaaquiatu quiatu ra. Nyebe mbia riqui nguĩã nyuruira tuchi echeẽ andu.

³³ Huee que amei mo ndiqui mbia chumunuásaa ra. Aba checuayã icuã nyireco rei ae. Aque que ñee asite Jesús je ra.

³⁴ —¿Mbaerã erechu quia urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã icuã Jesús je ra.

³⁵ Jesús que ñee ee ra. —Equiriri chõ jẽ. Esẽ oso amei ñiangui si, i que Jesús ee ra. Jesús cheẽ mose que aba checuayã amei mombo íbii ra. Mbia tubiriãsaa. Usẽ ngue u amei mbasiã cote ra.

³⁶ Mbia tuririã ngue nyuruira ja u erea ra. —Jesús quirãcuã ae ñee nguĩã. Mbia rerecua rá ño eriqui nguĩã ñee aba checuayã icuã je. ¡Sã aba checuayã echeẽ mumbayã jẽ! i tuchi que mbia nyuruira erea ra.

³⁷ Mbia que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherõ

³⁸ Jesús que usẽ mbia chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherõ na, i tuchi que mbia Jesús je ra.

³⁹ Jesús que oso nyibi earõ nda. Ñee ngue eracu je ra. —Etiba, i que ee ra. Eracu que hui esi Jesús cheẽ nguire ra. Ari que juã cote ra. Mbae que echao chao mbia chiurã cote ra.

Jesús mbia rasi chumumbara mbucherõ

⁴⁰ Tenda ireĩ mose que mbia nguesenda rasi rurucuaẽ cuaẽ ja Jesũs je ra. Erasi chumumbara tuchi que ra. Jesũs que o chono ñono ja erasi arõ embucherõ cherõ ja ra.

⁴¹ Aba checuayã icuã ngue usẽ usẽ nguia mbia si Jesũs cheẽ mose cote ra. —Nde rei Cristo Dios riirĩ, i que usẽ usẽ mbia si ra. —jẽñee eã ño jẽ! i tuchi que Jesũs quia aba checuayã icuã je ra. Ũquĩ ngue Cristo icua chõ nda.

Jesũs mbia Galilea jenda mbuchesea sea

⁴² Nyaashĩ namo mose que Jesũs si turuquia a. ra. —Se ae taico mbirĩ na, i rei que ra. Mbia que nyoĩ erui erea chee ra. —jEresochĩ nda urerecha jẽ! Ure rese bei chõ eico, i rei que mbia ñee Jesũs je ra.

⁴³ Jesũs que ñee ee ra. —Dios cheẽ tasenei senei pe quitinda je abe. Nyebe sembu nguĩã, i que Jesũs ra.

⁴⁴ Jesũs que mbia mbuchesea sea quia Galilea jenda ra. Dios cheẽ nenei nenei judĩos chumunuãsaa.

5

Jesũs sira tubiriã mbua uquia mbia je

¹ Emo mose que Jesũs riquĩ ama ndisha rimia ndese ra. Genesaret, i que ama ndisha aque je ra. Mbia cuabẽ ngue ngaẽ ee huee ra. Dios cheẽ anduse rete que ra. Nyebe mbia tubiriã Jesũs mumbi i i tuchi nguĩã.

² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra.

³ Jesũs que ua canoa nongue ye ra. Simõn mbae que aque canoa nda. —Ama nimia ndecha jiri sererao mingo, i que Jesũs Simõn je ra. Canoa ye que Jesũs ñi erimia ndesenda mbaaquiato quiato ra.

⁴ Mbia mbaaquiato jare que ñee Simõn je ra. —Eriquirasa rĩ canoa jendao. Huee tarafa jemondo ii. Sira mbuasa jemondo ii, i que Jesũs ee ra.

⁵ Simõn ngue ñee ee ra. —Nyaashĩ nyee que ureico rei embuasa rerequia isa ra. Emo ngue uresiroã mbei ra, Sererecua. Ma ndecheende tasaambe no, i que Simõn Jesũs je ra.

⁶ Mbia que tarafa mondo ii cote ra. Sira tubiriã mbua nonde. Tarafa soro serĩ sira usi je.

⁷ Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñĩmi sira usi je.

⁸ Sira tubiriãchĩ sira eande nyii. Nyebe Simõn Pedro nyuruira tuchi nguĩã mae Jesũs chimondo rese. Ngoi que nguĩã ndese ñee ee ra. —Seicuãte aico co, Sererecua. Serecha rei se ae, i rei que Simõn Pedro ñee Jesũs je ra.

⁹ Echiã nguia cuaãcuã i tare nguĩã. Eresenda abe chiã cuaãcuã i ja. Sira tubiriã ndea. Sira mbua eande nyii.

¹⁰ Zebedeo riirĩ abe que chi ja Simõn ndese huee ra. Jacobo, i que enongue je ra. Juan, i que enongue je no nda. Ũquĩ chiã abe que cuaãcuã i ra. Jesũs que ñee Simõn je ra. —jEresiquichechĩ nda jẽ! Sira rese ra ereicoã cote. Mbia ra ereru reru bei quia seje cote, i que Jesũs ee ra.

¹¹ Canoa yenda ngasẽ mose ama nimiaa, umbae que esecha ja nyoĩ bei nonde Jesũs rese cote ra.

Jesũs mbia leproso mbucherõ

¹² Jesús que siqui tuchia mo nda. Hee que emo ndasi riqui ee ra. Leproso. Jesús rese mae mose que ngoi ngũĩã ndese ee ra. Nyibi que ñee Jesús je ra. — Sererecua, nde sembucherõse mose, sembucherõ se, i que leproso ñee Jesús je ra.

¹³ Jesús que oco erese ra. —Echerõ cote, i que ee ra. Echeẽ mosebe que nyerõ nda.

¹⁴ Jesús que ñee ee ra. —¡Erecheẽchĩ nda mbia mo je jê! Eso nderasiã ndeacuquia sacerdote je cote. Moisés cheẽ ndui si mbae mo emondo Dios je. Eĩ nda mbia jirandu nderasiã ndese cote, i que Jesús ñee ee ra.

¹⁵ Mbia que ñimbiirandu i i tuchi quia Jesús rese ra. Ngaẽ ngaẽ ja que equia echeẽ andũ ra. Umbucherõ cherõ sacuaã abe que eriqui ngaẽ ngaẽ erea ra.

¹⁶ Jesús que oso oso quia mbia tiãmbaa ra. Ñee ñee Dios je.

Jesús emi sayã mo mbucherõ

¹⁷ Emo mose que Jesús riqui mbia mbaaquiato quiatu ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ùquí nde. Judea jenda abe no. Jerusalén jenda abe no. Huee que echi ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacuaã.

¹⁸ Mbia que erasi mo curucuaẽ quisa ye ra. Emi sayã ngue ae ra. — Nandemingue serao Jesús je, i rei que ra.

¹⁹ Tuchua mbaranguiatuãte que ee ra. Mbia tubiriã ngue tuchia mbiitãyã ee ra. Nyebe erasi ruruchoi nguiã sui tuchia arõ. Tei que endoro ra. Erasi que embuquichi imbu quisa ye Jesús rimbe ra. Mbia ite rĩ.

²⁰ —Ererucuaẽsa riqui seicua ùquí, i que Jesús ñee uchiangui re ra. Nyebe ñee nguiã emi sayã je. —Ndechisaã mbae icuã ambutiã nguiã ndesi co, i que Jesús ee ra.

²¹ Fariseos que ñee ñee nyue ra. Embesasa rese. —Jesús ñee icuã ñochĩ nguiã Dios rĩ co. Dios ibatenda ae mbia chiao icuã mbutiã nguiã esi. Jesús aquiatuã ño ñene, i rei que eu ñee ñee nda.

²² Jesús que ùquí ndua icuã icuate ra. Nyebe ñee nguiã ee cote. —¿Mbaerã jẽingo ndua icuã nde?

²³ ¿Ma mbaranguiatuã eã jiri jêje re? ¿Mbia icuã mbutiã ere? ¿Mbia rasi mbucherõ ere no? ¿Ma mbaranguiatuã eã jiri ùquí jêje re?

²⁴ Dios riirĩ ndei se. Mbia chiao icuã mbutiã aquiato chõ se re. Sequirãcuã tateacuquia jêje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra.

²⁵ Jesús cheẽ ndurucha reã ngue emi sayã juã nda. Mbia que mae ja tuchi u erese ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios rĩ nda.

²⁶ Mbia que nyuruira ja u mae emi sayã ngata rese ra. —Emi sayãte rei nyii. Ngata chõchĩ cote, i ja que mbia u mae nguiatu erese ra. Mbia ñee turã ja Dios rĩ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasẽ ee emo mose ra. Huee que eñi ngoi plata isi isi ra. — Serui bei eico, i que Jesús ñee ee ra.

²⁸ Ae Leví juã oso nguiã Jesús rui. Mbae recha ja umbae.

²⁹ Leví que fiesta saã tuchi Jesús je ra. Embuquiaru turã sacua uchuchua. Impuestos isi isiquia ata que chi quiaru erese huee ra. Mbiamo abe que chi no nda.

³⁰ Fariseos que ñee icuãte Jesús chimbaaquiato je ra. Embesasa rese ñee icuã ee. —¿Mbaerã jëingo quiaru impuestos isi isiquia rese re? Mbia icuã ndese abe jëingochí nguiã quiaru, i que ñee nda.

³¹ Jesús que ñee ee ra. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no.

³² “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i. “Jëicuã si jëhui”, ae chõ ngue u nguiã eicuã je, i que Jesús ee ra.

Jesús chimbaaquiato hui ãte uchiu si

³³ Mbia que ñee Jesús je ra. —Juanñimbaaquiato hui hui uchiu si. Ñee nonde Dios je. Fariseos chimbaaquiato abe hui hui uchiu si no. ¿Mbaerã ndechimbaaquiato riqui hui ãte uchiu si re? i que mbia Jesús je ra.

³⁴ Jesús que ñee ee ra. —Sã emo ngüinisirã isi ramo mose no. Sã eresenda iate riqui quiaru erese no. Sã hui aroneate uchiu si aque mose no.

³⁵ Sã eru riqui mano emo mose no. Aque mose quia ra equiato hui uchiu si cote, i que Jesús ñee ee ra.

³⁶ Jesús que ejemplo saã mbia je ra. —Sã emo ndiqui tiru yasu mii aroneate tiru ima sorei rese no. Ñquã mose eicuãte cote. Eyasu ra quiata chõ esi.

³⁷ Sã emo eri rasi ramo nderecoquiato eã eriru ima ye no. Mbae ire ima ye erecoquiato aronea. Eri rasi ra ñimatã ño mbae ire ndoro. Eri ra uchë ja. Mbae ire abe mbiacuãte ra cote.

³⁸ Eri yasu quia nda equerecoquiato nguiã mbae ire yasu ye. Soroã sacua.

³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote. Nyebe mbia riqui nguiã secheë yasu isi sereãte, i que Jesús ñee mbia je ra.

6

Jesús chimbaaquiato mbae a ishao shao sábado mose

¹ Sábado mo mose que Jesús si quia mbiaco ite rí nda. Uchimbaaquiato rese. Echimbaaquiato que quiata a ucua mii mii nyoí quia ecuã mose ra. Equiti quitire oo je que echoi quia eachãaña cote ra.

² Fariseos mo ngue ñee ee ra. —¿Mbaerã jëingo mbae ishao shao sábado mose re? Co mose chõ mbia uquenea ucua resë, i que fariseos ee ra.

³ Jesús que ñee ee ra. —¿Embesa ji rese jemaë eã David rí nde? David riãcuã que aque mose ra. Eresenda abe riãcuã ngue aque mose ra.

⁴ David que ique Dios chuchúaa ra. Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae.

⁵ Sábado rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sábado nongue mose que Jesús si judíos chumunuasa ra. Mbia que embaaquiato quiato huee ra. Huee que eo tomei mo ndiqui ee ra. Equiato cutinda tomei ngue ra.

⁷ Fariseos que mae nguiato quia Jesús rese ra. Embesasa abe que mae nguiato quia erese ra. —Mañi nda Jesús quia eo tomei je reae. Co sábado mose

reae. Sã embucherõ jê. Nandechẽ ìcuã nda ee chã jê, ì que eu mae nguiatu Jesús rese ra.

⁸ Ûquĩ ndua ìcuã ngue Jesús ìcuã ra. Ñee ngue eo tomei je cote ra. —Ehuã na u mbia ite rĩ, ì que Jesús ee ra. Eo tomei ngue juã uã cote ra.

⁹ Jesús que ñee mbia je ra. —¿Mbae eturãte jêje co tenda mose re? Sábado mose bei. ¿Coche mbae turã naa naa sábado mose re? ¿Coche mbae ìcuã naa naa co mose re no? ¿Coche mbia mbucherõ co mose re no? ¿Coche mbia ìquia co mose re no? ì que Jesús ñee mbia ja je ra.

¹⁰ Jesús que mae mbia ja rese cote ra. —Echomee secuti, ì que eo tomei je cote ra. Eo tomei ngue ñomee Jesús cheẽ mose ra. Aque mosechi que eo nyerõ cote ra.

¹¹ Nyebe fariseos paama ì tuchi nguĩ Jesús je. Sábado mose mbia mbucherõ mose. —¿Mañi nande ra Jesús je re? Nandequia chõ nda reae, ì tuchi que eu ñee nyue ra.

Jesús mbia doce irabo uchimbbaaquiaturã

¹² Jesús que oso mbia tiãmbaa ra. Sita ibátee. Huee que eñi ñee mbei Dios je nyaashĩ nyee ra.

¹³ Nyaashĩ mose que uchimbbaaquiату munua ja cote ra. Ûquĩ doce mo ngue eirabo ra. —Sechimondo sacua jê. Jaemondo ra secheẽ nenei nenei sacua mbia je, ì que ùquĩ doce je ra.

¹⁴ ã mbia que eirabo ra:

Simón (Pedro, ì abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo ririĩ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia ìcuã je ra.)

Ûquĩ ja que Jesús irabo ra.

Jesús mbia tubiriã mbaaquiату

¹⁷ Jesús que nguichi u sita si cote ra. Uchimbbaaquiату rese. Ibi túraã ngue ecuaẽ ngasẽ cote ra. Mbia tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ùquĩ. Ûquĩ ngue ngaẽ nyiisaquia Jesús cheẽ ndese ra. Jesús embucherõ abe sacua ngue ecuaẽ nda.

¹⁸ Ae rese aba checuayã ìcuã ndiqui nae, ùquĩ abe que Jesús mbucherõ nda.

¹⁹ Jesús quirãcuã ngue mbia mbucherõ ja quia ra. Nyebe mbia riqui nguĩ ocose ja Jesús rese.

Ae eyate riqui

²⁰ Jesús que mae uchimbbaaquiату rese ñee nonde ee ra. —Jeyate riqui ã. Jẽ mbaecha reã ndaque. Dios quiату ra jenderecuarã tuchi cote.

²¹ Jẽyate riqui ã. Jeniãcuã ndaque. Jendio rete ra cote. Jẽyate riqui ã. Jenyeseo seo raque. Jẽiquia ìquia ra emo mose cote.

22 Mbia jemo ucuãyã mose, jemo mombo mose, ñee icuã mose jêje serĩ, jêyate jêingo ũquĩ.

23 Jeñimbía tuchi chõ aque mose. Mbia icuã mose jêje. Dios quia ra mbae turã mondo jêje ibate. Mbia icuande jêje nyii. Eĩ si que mbia icuã nguia Dios rimba ñiinda je no nda.

Ae aba mbia eãte quia

24 Aba mbia eã tuchichĩ jê, Mbaecha. Mbae icuã nda tu jêje. Jêyare nyii.

25 Aba mbia eã tuchichĩ jê, quiaru tuchi je. Jeniãcuã tuchi ra cote. Aba mbia eã tuchichĩ jê, iquia iquia je. Jenyeseo ra cote.

26 Aba mbia eã tuchichĩ jê mbia ñee turã mbei mose jeniã. Eĩ si rei que equia ñee turã turã dios abareã nimba je cose ra.

Jêingo turã ño nguia jêucuãyãsa je

27 Aico ñee jêje a. Ae eicuãte riqui jêje, ũquĩ ndese jenyeseo chõ. Jêingo turã ño nguia jêucuãyãsa je.

28 Emo ñee icuã mose jeje, jeñee turã ño ee. Jeñee turã ño Dios je erĩ.

29 Emo ucuã mose jenditii rese, “tasaã se abe”, jenyechĩ ndae. Jenditii ribisho abe jêteacuquia ee. Emo jêirao rirõ mose jêsi, jêirao nongue abe rese jengueteã eã ño ee.

30 Emo ache ache i mose jêje, jemondo chõ ee. Emo jembae reraochõ mose, “emondobe seje”, jenyechĩ nda ee.

31 Sã jêyate riqui mbia siqui turã mose jêje no. Eĩ jenyee si chõ nguia siqui turã mbia je no.

32 Ae eicuãte riqui jêje nae, ũquĩ ndese jenyeseo chõ. Ae nyeseo quia jendese nae, ũquĩ mii ndese jenyeseo mose, eicuãte ũquĩ. Mbia ja rese quiatu jenyeseo.

33 Jêingo turã nguiau quia mbia ja rese. Ae eturã ndiqui jêje, ũquĩ mii ndese jêingo turã mose, eicuãte ũquĩ. Jesús quiatoã abe chee siqui turã quiato je.

34 Emo prestar i mose jembae je, jemondo chõ ee. Ae mbae mondo aroneate eribishorõ nae, jemondo bei chõ ee. “Cobrar tae ee”, jenyechĩ ndae. Jesús quiatoã abe chee mbae mondo eribishorõsa je. “Mbae mo nda emondobe seje”, i.

35 Eĩ jenyechĩ nda jê abe. “Mbae mo nda emondobe seje chã” jenyechĩ nda jê abe jê! Jemondochõ ño ee. Ae eicuãte riqui jêje, ũquĩ ndese jenyeseo chõ. ũquĩ mose ra Dios mbae mee tuchi jêje. Dios rã tuchi ra jê cote. Dios ia eãte quia eriqui nguia eicuã ndese. Dios turãte quia eicuã je re. Eicuã ñee turã eã ndaque ee.

36 Jêyayã ño mbia rese. Sã Dios abe eya eãte nanderese no.

“Eicuãte que co ra”, jenyechĩ nda emo niii

37 “Co que eicuãte ra”, jenyechĩ nda emo niii. “Jêicuãte”, iã nda Dios jêje chã. ¡Condenar jenyechĩ nda emo je jê! Dios nda condenar iã jêje chã. Emo icuã mose jêje, jêtesarei chõ eicuã si. Dios nda tesarei jêicuã si no ña.

38 Mbae jeme mee ño mbia je. Dios quia ra mbae mee tuchi jêje cote. Mee turã nda jêje. Eñetê nda emee eã jêje. Embisê ño nda emee jêje. Jê embisê mee mose emo je, Dios ra embisê mee jêje no, i que Jesús mbia mbaaquiato quiatu ra.

39 Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda echoi ibicua rie.

40 Embaaquiatusa quiarei earacua tuchi uchimbaaquiatsu si. Embaaquiatsu ja ji mose, earacua tuchi cote. Umbaaquiatusa rã si cote.

41 ¿Mbaerã nda “eicuã” jenyemo je re? Jê jêicuã tuchi mose esi. “Mbae ñetê ndiqui nderésaa aque”, jenyechĩ nda emo je. Mbae cuasu siqui mose jendésaa jê quiatu.

42 “Mbae turã ndese chõ jêingo”, jenyechĩ nda jêingo icuã mose jê. Jêturã nda jêsaã ñoñoñochĩ jê. “Mbae ñetê tasirõ nderesa si”, jenyechĩ nda mbae cuasu siqui mose jendésaa jê. Jê nane nguia jêturã ndiqui. Aquere quiatu jeñee emo mingó turã cote.

Sã ira ae ia ae ae no

43 Ira turã mose, ea abe turã ndae. Ira icuã mose, ea abe icuã ño nda eno.

44 Sã ira ae ea ae ae no. Higo a rã eã nda nyu a no. Ea ae eno nde. Uva a rã eã nda isio rashĩ a no. Ea ae eno nde.

45 Eĩ si chõ mbia no nde. Mbia turã nda ñee turã. Echiangui renda quia eturãte re. Nyebe eriqui nguia ñee turã. Mbia icuã nda ñee icuã no. Echiangui renda quia eicuãte riqui nguia. Nyebe eriqui nguia ñee icuã. Nandechuru achõ ñee eã nguia. Nandechiangui renda quia ñee nguia.

Tuchua nyeremo

46 “Sererecua” jenyemo chõchĩ seje secheẽ mumba mumbare.

47 Ae siqui serese secheẽ mumbayã nae, eturã tuchi chõ ùquĩ nde.

48 Sã emo uchuchuarã ao no. Sã ibi ribicoi tuchi no. Sita je ngasẽ nyee. Sita arõ tuchia ao cote. Nyebe echuchua átãte riqui nguia. Ama ndicuasú mose, iãcuã irãtã ndaque echuchua ite rĩ. Tuchua mbuquiata aroneate iãcuã irãtãte raque. Sita arõ nguia ngue uchuchua ao nguia. Eĩ si chõ secheẽ mumbasa reã nde. Tuchua átã aosa rã si.

49 Sã emo uchuchuarã ao no. Aque quiarei ibi ribicoi tuchia. Ibi arõchi chõ uchuchua ao nguia. Iãcuã ngasẽ mose aque chuchua, mbucoi asi que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

7

Jesús soldados rerecua rimba mbucherõ

1 Jesús cheẽ ngue tiba mbia je cote ra. Oso que Capernaum cote ra.

2 Soldados rerecua mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serĩte que equia ee ra.

3 Capitán ngue jirandu Jesús rese cote ra. Ñee ngue judíos ramei je ra. — “Echu serimba mbucherõ”, i que capitán ñee ndeje ra”, jenyemo oso Jesús je, i que capitán nda.

4 Judíos ramei ngue ngasẽ Jesús je ra. —Capitán nimba embucherõ na oso ee. Capitán turãte quiatu ngue eriqui nguia ure je.

5 Nandequiatio turã tuchi que aque ra. Judíos quiatio ja. Urechumunua nua sacua ngue ae chao tuchia ra, i que amei ñee Jesús je ra.

6 Jesús que oso amei ndese ra. Capitán nyuchua rurubi mose que capitán uquiatio mo mondo Jesús robeishĩ nda. —Seicuãte se, Jesús. Sechuchua ra ereiquechĩ.

7 Nyebe se asoã nguia nderea. Ndecheẽ achõ je chõ nda serimba erembucherõ.

⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra.

⁹ Echeẽ andu mose que Jesús nyuruirate ra. Uba que ñee nguesenda je ra. —Tacheẽ nyecua jêje. Capitán seicua tuchite quia co. Israel jenda mo embuchecha aroneate quia co, i que Jesús ra.

¹⁰ Capitán nyimondo que nyebi nyoi uchuchúaa cote ra. Erimba mbucherõ ji que ee cote ra.

Jesús eru cheecha riirĩ ndaaque mbuquera

¹¹ Isamami ngue Jesús choi quia Naín cote ra. Echimbaaquiату abe que nyoi quia erese ra. Mbia tubiriãte que nyoi quia erese ra.

¹² Sucha ata rurubi mose que ngasẽ mbia tubiriã je ra. I que eraaque ruruchoi quia etã sacua nda. Aque mi tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoi jate quia esi rese ra. Eraaque rui.

¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jê! i que ee ra.

¹⁴ Jesús que oco eraaque rese ra. Eruruchoisã que tiba ee cote ra. —Echuruã, Acuanindu, i que ñee eraaque je ra.

¹⁵ Eraaque que nyuruã ñee cote ra. Jesús que embuquera ji mondo esi je cote ra.

¹⁶ Mbia que nyuruira ja erea ra. Ñee turã ja Dios riĩ. —Dios chimondo chõ co re, i que mbia quia ñee Jesús riĩ nda. —Dios riqui tesareia nande si co, i que mbia quia nyue ra.

¹⁷ Jesús chumbucherõ ndese que mbia riqui ñimbiirandu jate ra. Judea jenda jirandu ja erese. Erobeindã ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiao rese ra. Erimba quiatu ngue embiirandu nguiã erese.

¹⁹ Nyebe Juan ñee nguiã ngũimba nyeremo je. —Nyeremo jẽso ñee Jesús je. “‘Cristo ra tu’, i bei equia nae, ¿ae chõ nde re?” jenyẽ oso ee. “¿Cristo ra uresaarõ arõ si quia re?” jenyẽ oso Jesús je, i que Juan ngũimba mondochoi ra.

²⁰ Juan ñimondo que nyoi ngasẽ Jesús je ra. —Juan el Bautista que urembu ñee ndeje ra. ¿Cristo chõ nde re? ¿Cristo ra uresaarõ arõ si quia re no? ¿Ae chõ nde re? i que Juan nimba ñee Jesús je ra.

²¹ Juan nimba ngasẽte mose que Jesús riqui mbia rasi mbucherõ cherõ nda. Erasi chumumbara. Erasi cuabẽ. Aba checuayã icuã abe que embusẽ mbusẽ nguia mbia si ra. Eresayã abe que embu cherõ nyerõ nguia ra. Juan nimba que mae ja quia ũqui mbucherõ ndese ra.

²² Jesús que ñee Juan nimba je ra. —Ae rese jemae nae, ũqui jẽsenei oso Juan je. Ae jeñandu nae, ũquiabe no. “Jesús que eresayã mbucherõ nyerõ nguia ra. Ecuatayã abe mbucuata cuata. Eire ndasi abe mbucherõ nyerõ. Eisayã abe mbucherõ nyerõ. Eraaque abe mbuquera. Ucheẽ turã esenei senei tuchi mbaecha reã je”, jenyẽ oso Juan mbiirandu.

²³ Emo hui jei eã mose sesi, aque iate ra siqui cote, i que Jesús ucheẽ mondo Juan je ra.

24 Juan ñimondo que nyoĩ nyebi ee cote ra. Jesús que ñee mbia ja je Juan ñii cote ra. —¿Mbae rese mae jëso turúquiaa re? ¿Quiñiriã idioi ichu ichu rese jëso mae nde?

25 ¿Mbae rese mae jëso re? ¿Emo irao turã ndese jëso mae nde? Tei. Eirao turã siquiã nguiã turuquia ñi. Ae siqui quia mbia rerecua chuchua nae, ũqui ño eirao turã ndiqui nguiã.

26 Juan ndese mae ño ngue jëso turúquiaa resë. Dios cheë nenei neneisa tuchi chõ ae emo si re. Ae chõ mbia mingoquiato quiatu nguiã se ñee sacua e aque.

27 Sã embesa ji riqui ñee no: Secheë nderaosa tamondo nderëta.

Ae ra mbia mingoquiato ndeje, i que embesa ji ñee nda. Juan ñii ño embesa ji ñee nguiã.

28 Juan el Bautista quiarei i tuchi raque mbia ñiinda ja si. Dios cheë nenei neneisa ataque si. Ae ra siqui tuchi Dios rese erimbarã cote nae, ũqui nguia ra i tuchi Juan si cote, i que Jesús ñee nda.

29 Mbua que Jesús cheë ñandu turã ja ra. Impuestos isi isiquia abe chee que echeë ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra.

30 Fariseos achõ ño ngue Jesús cheë isi sereã nda. Embesasa rese. Ũqui ngue siqui sereãte Dios cheë ndese ra. Nyebe Juan bautizar i eã nguiã ee.

31 Jesús que ñeembe ee ra. —Mbua namonda siqui turã eãte quia aba cheë nduã. Mbua riiri na ño eriqui nguiã.

32 Sã mbua riiri ndiqui ñumbusarei sarei no. Sã eriqui ñee ñee nyue no. “Flauta que asaã saã ndei jëje ra. ¿Mbaerã jenyuruqui sereã nea nde?” sã i chõ nyue no. “Mbae aba mbua eã ngue asaã ndei jëje resë. ¿Mbaerã jëyate erese re?” sã i chõ mbua riiri nyue no. Ũqui na si chõ jëingo nguiã aba cheë mumba ã.

33 Juan el Bautista que tu rei jëje ra. Jëisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jeny chõchĩ ee. “Aba checuayã ndesenda”, jeny chõ ngue ee ra.

34 Se abe que achu rei jëje ra. Aquiaru rei quia jendese co. Mbae abe ambei rei quia jendese co. Se abe que jë seisi turãya nda. “Quiaru tuchi je”, jeny chõchĩ seje. “Mbae mbeisa”, jeny chõ ngue seje no nda. “Mbua icuã quiato chõ ñene”, jeny que seje resë.

35 Ae earacuate nae, Dios aracua abe ra eicua, i que Jesús mbua je ra.

Jesús quiaru fariseo chuchua

36 —Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra.

37 Cuña icuã mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushimbua que equerao erea ra. (Sita ao ji rei aba mbushimbua riru.)

38 Jesús quite quti que eñi nyeseo ra. Nguesari je que Jesús i irei irei ra. Ua je que embiiru iru cote ra. Uchuru que embucha Jesús i rese eriite ra. Aba mbushimbua que eicherë ei rese cote ra.

39 Jesús mbuquiarusa que ñee nguia uchiangui re ra. —¿Mbaerã Jesús ñee asiã cuña icuã je re? Jesús Dios riiri mose, i nda ñee asi rei ee, i que fariseo uchiangui re ra.

40 Jesús que ñee fariseo je ra. —Tacheë ndeje, Simón, i que ee ra. —Eno. Echeë seje no, Sererecua, i que fariseo ee ra.

⁴¹ Jesús que ñee ee ra. —Sã mbia nyeremo deber i ererecua mo je no. Sã enongue deber i ee quinientos no. Sã enongue deber i ee cincuenta no.

⁴² Ūquí ja que pagar i aronea ja. Nyebe ererecua ñee nguiã ee. “Mbae jemondo eã ño seje”, sã i chõ ererecua ee no. ¿Aba eya tuchi nguerecua rese re? i que Jesús ñee Simón je ra.

⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra.

⁴⁴ Jesús que mae cuña ndese ñee Simón je ra. —Ndechuchúaa seique mose que sei ereirei eã nda. Co cuña nguiatu que sei irei nguesari je ra. Ūa je que sei mbĩru ra.

⁴⁵ Nde quiatu que seritii eresiite eã ndesẽ. Cuña nguiatu que sei siite nguiã.

⁴⁶ Nde que aba mbushimbusa ereichereã sea rese resẽ. Cuña nguiatu ngue aba mbushimbusa icherẽ nguiã sei rese.

⁴⁷ Tacheẽ nyecua ndeje, Simón. Cuña icuã tuchi raque. Eicuã ngue ambutiã ee namo nda. Nyebe eriqui nguiã nyesecua tuchi serese a. Ae “seicuã eã jiri se”, i quia nae, ũquí nguia ra nyesecua eã jiri serese. Se eicuã ambutiã ndaque, i que Jesús Simón je ra.

⁴⁸ —Ndeicuã ngue ambutiã ndesi ra, i que Jesús ñee cuña je cote ra.

⁴⁹ Ae que chi quiaru erese nae, ũquí ngue ñee nyecuayã cuayã u nyue ra. —¿Mañi nda Jesús mbia icuã mbutiã esi re? i que eu ñee ñee nyue ra.

⁵⁰ Jesús que ñee cuña je ra. —Seicuasa chõ nde re. Nyebe arerirõ nguiã ndeicuã si. Ereico bei ra cote. Ndeya eso cote, i que Jesús cuña je ra.

8

Cuña mo nyoĩ ngata Jesús rui mbae raã naa ee

¹ Jesús que sucha tubiriã mbuchesea sea quia ra. Dios cheẽ turã ngue esenei senei nguia mbia je ra. Echimbacquiatu doce abe que ngata quia erese ra.

² Cuña echimbucherõ mo abe que ngata quia erese ra. Ae si aba checuayã icuã ndirõ nyii, ũquí mo abe que ngata quia erese ra. María Magdalena que ngata quia erese ra. Ae si aba checuayã siete rirõ nyii nae.

³ Juana abe que ngata quia erese ra. Chuza ninisi que aque ra. Herodes resenda rei Chuza. Susana abe que ngata quia erese ra. Cuña ata que ngata quia erese ra. Ūquí ngue umbae mee mee mbei quia Jesús je ra.

Emo mbae eĩ mombiquia mbiqui

⁴ Mbia que ngaẽ ngaẽ ja quia Jesús rea ra. Suchamo jenda abe. Mbia ñumunua ja mose que Jesús ejemplo raã ee ra.

⁵ —Sã emo si mbae eĩ mombiquia mbiquia no. Emombiquia mbiquia mose sã emo uqui uqui ñeenda rui no. Sã mbia riqui irõ irõ erese no. Sã nguireĩ abe eu chee no.

⁶ Sã emo uqui uqui sita arõ no. Sita aronda suri raque. Ibi irute quia ee re. Nyebe ñimama nguiã mano.

⁷ Sã emo ndiqui uqui uqui nyu réndaa no. Sã nyu abe suri erese no. Nyu ruri que echati asi u eriquisã nda.

⁸ Sã emo uqui uqui ibi túraã no. Ūquí nguiatu que ia turã nda, i que Jesús mbia je ra. Aqere que ñee asite mbia je ra. —Jëisa mose jsecheẽ jeñandu turã na! i que Jesús mbia je ra.

⁹ —Eresenei ngue mbae eĩ nii, ũquí embiasa turã na ure je, i que echimbacquiatu ñee ee ra.

¹⁰ Jesús que ñee ee ra. —Mbia rerecua tuchi quiarei Dios. Ae riqui nguiã ucheẽ mbiãsa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheẽ mbiãsa eã jiri. Ejemplos achõ esenei senei nguiã ee co. Eanduchõ sacua. Eicua turã ndocoĩ.

Jesús ucheẽ mbiãsa uchĩmbaaquiatsu je mbae eĩ ñĩ

¹¹ Secheẽ tambiasa jêje cote. Dios cheẽ na si chõ mbae eĩ nde.

¹² Ae uqui uqui ñeenda rui nae, ũqui ndei mbia Dios cheẽ andu chooñoso rã ũqui. Ae Dios cheẽ andu chooño nae, ũqui ñiangui si chõ diablo riqui nguiã Dios cheẽ ndirõ. Nyebe eriqui nguiã Dios icuayã mbei. Nyebe Dios riqui nguiã emingo bei eã.

¹³ Ae uqui uqui sita arõ nae, mbia mo na ño ũqui no nde. Dios cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ũqui nde.

¹⁴ Ae uqui uqui nyu réndaa nae, mbia mo na ño ũqui no nde. Dios cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñĩmbusarei sarei bei chõchĩ nguiã. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbei ee.

¹⁵ Ae uqui uqui ibi túraã nae, mbia mo na ño ũqui no nde. Echĩã quishĩ ño ũqui nde. Dios cheẽ andu mose, siqui bei erese. Ia ia bei raanguia cote.

Tata rendi mbiã resae ja

¹⁶ Sã nandeico lamparina mendi no. Sã nandeico eati eã no. Sã nandeico emĩ eã mbaequi re no. Erendi checua chõ nda nandemĩ nguiã. Mbiã resae ja sacua.

¹⁷ Mbae checuayã nda nyecua ja emo mose. Ñeminde ra nyecua ja.

¹⁸ Secheẽ jeñandu tuchi. Aba mo umbae rerequia mose, Dios ra emo mondoobe ee. Emo embae eã mose, Dios ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbiã tubiriãte que esiquisãte esi ra.

²⁰ —Hue ndesi riqui nderequia taicuee hue. Ndenongue rese, i que mbiã Jesús mbiirandu ra.

²¹ Jesús que ñee mbiã je ra. —Ae Dios cheẽ andu turã nae, ae Dios cheẽ mumbayã nguiã nae, ũqui je chõ aico nguiã “senongue” i. Ũqui je chõ aico nguiã “taĩ” i no, i que Jesús ñee nda.

Jesús quiririã icuã icuã mbutiba; ama ndebera abe

²² Emo mose que Jesús ua canoa ye ra. Uchĩmbaaquiatsu ja rese. —Nyao ama ndisha robei, i que Jesús ee ra. Nyoĩ que cote ra.

²³ Ama ndisha rasa mose que Jesús si quia uque ra. Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ñĩmi serĩ tuchi nguiã ee.

²⁴ Nyebe mbiã Jesús mumba nguiã. —Urembaaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe que ti i no nda.

²⁵ —¿Mbaerã jẽingo siquichete re? ¿Seicuayãte equia re? i que Jesús uchĩmbaaquiatsu je ra. Siquiche bei que equia ra. Nyuruira tuchi Jesús

quirãcuã ndese mae. —Quiririã Jesús cheẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea Gadara jenda mo si

²⁶ Ngasẽ nyee que sobei ra. Gadara, i que hue ibi je ra. Galilea mbuchecha tuchi que huee ra. Ama ndisha rasa.

²⁷ Canoa si Jesús nguichi mose, hue jenda amei mo ngue tu ee ra. Aba checuayã icuã ngue siqui quia echiangui re ra. Cosete ngue eriqui rei nguiã echiangui re. Eirao eã mbei que eriqui ra. Tuchuaqui re que eriqui uqueã nda. Mbia raaque tãsa bei chõ eriqui nguiã.

²⁸ Tu que ngoi nguiã ndese Jesús resa quiti ra. Ñee asite que eu ee ra. —¿Mañi ere ra seje re, Jesús? Dios ibatenda riiri ño nde re. ¡Sembasichĩ nda se jê! i que ñee tuchi Jesús je ra.

²⁹ —Esẽ esi, i chõ Jesús aba checuayã icuã je reaẽ. Aba checuayã ño aque amei isi isi bei quia embiicuã icuã neaẽ. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaẽ.

³⁰ —¿Mañi ndeje re? i que Jesús ñee ee ra. —Etubiriã, i que seje ra. Ure cuabête quia ure re, i que aba checuayã ñee Jesús je ra.

³¹ —Uremondochĩ nda tata cuasu, i que aba checuayã ñee tuchi Jesús je ra.

³² Chiasu socoi tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra.

³³ Aba checuayã icuã ngue usẽ ja amei ñia si cote ra. Chiasu chiangui re que ehoi ra. Chiasu que uchã ja choi nyiichere ama nimia mbucu rĩ nda. Ama ndisha ye que ehoi ja mano nda.

³⁴ Chiasu raarõsa que chi mae erese ra. Emundite que ra. Nyoi que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no.

³⁵ Mbia que ngaẽ ja mae erese ra. Huee que Jesús riqui beite ra. Ae rese aba checuayã ndiqui nyii amei nae, aque abe que chĩ ngoi Jesús i jii ra. Huiãrao resebe cote. Earacuate que mbia je cote ra. Nyebe mbia nyuruira tuchi nguiã erea.

³⁶ —Jesús que amei mbucherõ aba checuayã ndirõ esi ra, i que maesa erese ñee mbia ataque je ra. Maesa erese que esenei ja mbia je ra.

³⁷ Mbia hue jenda que siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguiã canoa ye. Oso que nyebi sobei cote ra. Gadara recha.

³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra.

³⁹ —Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo riiri mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ñquĩ nguiatu que eisi turãte ra.

⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa.

42 Seriiṛi nguasu jiri si quia mano serĩte seje qui. Seriiṛi m̄i tuchi se, i tuchi que Jesús je ra. Jesús que oso erese ra. Mbia cuabē ngue nyoi ja eru ra. Jesús mbiitāyāte que echoi quia ra.

43 Ari mo abe que oso quia mbia ite rĩ nda. Eruqui nda uchē uñe mbei quia ee ra. Doce años nyee nda eruqui tibayā mbei ee ra. Aba mbucherōsa abe nda embucherō aroneate quia ee ra. Ari umbae mondo mondo ja raque quia ee.

44 Ari que tu Jesús quite quti erĩchā nda. Eirao ai rese que oco ra. Aque mose tuchi que eruqui tiba ee cote ra.

45 —¿Aba oco serese re? i que Jesús mbi je cote ra. —Tei. Aba āte, i ja rei que mbia ee ra. Pedro que ñee ee ra. —Mbia tubiriāte nyeresē. Mbia cuaē nguia ñimaña maña jate co resē. ¿Mbaerā ereico “¿aba oco serese re?” i re? i que echimbaaquiātu ñee ja ee ra.

46 Jesús que ñee ee ra. —Tei. Emo ngue oco serese ra. Sequirācuā ngue emo mbucherō nda i que Jesús ra.

47 —Jesús jiranduchĩ serese, i que ari uchĩangui re cote ra. Nyebe ngoi nguia ngũiā ndese Jesús resa quti. Titi titi i ete que ra. Ñee nyecua que ee ra. —Sembucherō sacuí ño aoco nguia nderese. Aque mose tuchi chō acherōchĩ, i que ari erenei ja Jesús je ra. Mbia que echandu ja u ra.

48 Jesús que ñee ee cote ra. —Seicuasa chō nde re. Nyebe arembucherō nguia. Ndeya tuchi eso cote, i que Jesús ee ra.

49 Jesús cheē mosete que emo ndu Jairo chuchua si ra. —Nderiiṛi ngue mano cote ra. ¿Mbaerā nda Jesús ererao ndechuchua cote re? i que ñee Jairo je ra.

50 Jesús que echandu ra. Ñee ngue Jairo je ra. —iNdeya eā techĩ nda jē! Seicua chō se. Nderiiṛi nda quera si, i que eru je ra.

51 Ngasē ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Ũqui achō ngue emingue ra.

52 Mbia que chi ja nyeseo āquē ndese ra. —Jenyeseochĩ nguia. Mano eā ño ñene. Uque chō ñene, i que Jesús ñee mbia je ra.

53 Mbia que iquia Jesús cheē mose ra. —Eraaque nyeresē. ¿Mañi nda nyuruā nde? i que mbia ra.

54 Jesús que eraaque o isi ra. —Echuruā na, Echo, i que ñee asite ee ra.

55 Quera si que nyuruā cote ra. —Nderiiṛi embuquiāru cote, i que Jesús ee ra.

56 Eru que nyuruira tuchi mae erese ra. Esi abe nyuruira tuchi. —iEmo nda jembiiṛanduchĩ jē! i que Jesús ee ra.

9

Jesús uchimbaaquiātu doce mondo ucheē nenei nenei sacuí

1 —Jenyu, i que Jesús uchimbaaquiātu doce je ra. Uquirācuā ngue emee mee ee ra. Aba checuayā icuā jea jea sacuí mbia si. Mbia rasi mbucherō cherō sacuí.

2 —Jēso Dios cheē nenei nenei mbia je. Jēso mbia rasi abe mbucherō cherō. “Mbia rerecuarā tuchi ra Dios cote”, jenyē oso secheē nenei nenei mbia je.

3 Mbae mo nda jendaochĩ icua. Jenyitochoquia ra jendaochĩ. Mbae riru mo abe ra jendaochĩ no. Jenyirūā mo nda jendaochĩ no. Mbae isiquia mo abe ra jendaochĩ no. Jēirao nongue abe ra jendaochĩ no.

⁴ Emo nyuchúaa jengue mose, hueechō ño jēingo uque. Jemba jembatechĩ nda uque tuchua raamba amba. Hue si chō jēso sucha tubiriã mo secheẽ nenei nenei cote.

⁵ Sucha tubiriã mo jenda jēisi sereã mose, jēsecha chō. Jēi tubi jembutomo tomo ee. Hue jenda huicua icua sacua, i que Jesús uchimbaaquiato je ra.

⁶ Echimbaaquiato que nyoĩ choi bei quia sucha tubiriã mbuchesea sea ra. Dios cheẽ turã nenei nenei mbia ja je. Mbia rasi mbucherō cherō no.

Mbia Juan el Bautista iquia

⁷ Herodes abe que jirandu Jesús chiaio rese ra. Embusiquichete que ra. Emo ngue ñee ndei ee ra. —Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui rei nguiã mbia je.

⁸ Elías Jesús riqui rei nguiã emo je no. —Dios cheẽ nenei neneisa ima quera si je chō ñene, i rei que emo emo Jesús riĩ no nda.

⁹ Herodes que ñee nda. —Juan ãquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchite. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ñ ngue uresaã saã nda, i que mbae renei ja Jesús je ra. Mbia tiãmbaa que Jesús ũquĩ nderao ja rei ra. Betsaida rurubi jiri.

¹¹ Mbia atae que jirandu mose que nyoĩ eruĩ ra. Jesús que eisi turã Dios cheẽ nenei nenei ee ra. Erasi abe mbucherō cherō ee.

¹² Tenda oso mose que echimbaaquiato ñee ndei ee ra. —Mbia emondo rã sucha tubiriã nia. Sã echoi bei quiaru huee. Uque bei abe huee no. Mbae ãte nandecu a, i rei que echimbaaquiato Jesús je ra.

¹³ —Jeño mbae jemondo ee echiaurã, i que Jesús ee ra. —Tei. Mbae quia ra aba mondo ee. Cinco chō ngue mbichae ra. Sira abe nyeremoñote nyeresẽ, i que echimbaaquiato Jesús je ra.

¹⁴ Mbia tubiriã tuchi que chi ra. Cinco mil ndobei. —Mbia jembucoi ja ino ibii. Eata jaaja jeño mbucoi. Sã echĩ ngoi icúe cúe cincuenta jaaja, i que Jesús uchimbaaquiato je ra.

¹⁵ Jesús cheẽ nguire que ngoi ja cote ra.

¹⁶ Jesús que mbichae sirō cote ra. Sira abe rirō. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiato je cote ra. —Jembuchao chao mbia tubiriã je cote, i que Jesús ra.

¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chō nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echimbaaquiato abe que chi huee ra. —¿Aba aico rei mbia je re? i que Jesús ee ra.

¹⁹ Echimbaaquiato que ñee ee ra. —Juan el Bautista ereico rei nguiã emo je co. Elías ereico rei nguiã emo je no. Dios cheẽ nenei neneisa quera si je ereico rei nguiã emo je no, i que echimbaaquiato ee ra.

²⁰ —¿Aba aico rei jēje co re? i que Jesús ee ra. —Cristo chō nde resẽ. Dios riirĩ ño nde resẽ, i que Pedro Jesús je ra.

Mbia ra seiquia, i Jesús uchimbaaquiatu je

21 —Ūquiŋ nda jeñeechĩ emo je jẽ, i tuchi que Jesús ee ra.

22 Jesús que uchimbaaquiatu mbaaquiatu quiatu ra. —Mbiarã ngue Dios sembu ra. Mbia ra sembasi mbasi tuchi. Ameiŋ nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra seiquia chee. Tres tenda mose ra aquera si, i que Jesús mbia eiquia nonde ra.

23 —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote.

24 Emo ndua bei mose ngueco rese, ereco ra ua esi. Emo hui mose ngueco si seje, ūquiŋ nda siqui bei.

25 Emo ngueco mumba chooño mose, eya eã mbei rae. Mbaecha rete raque.

26 Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã. Dios quirãcuã nda sembu. Angeles rese ra achu aque mose.

27 Tacheẽ nyecua jẽje. Á jẽingo serese ã nae, jemo nda jemae Dios quirãcuã ndese jemano nonde. Mbia rerecua tuchi ra Dios, jemo mano nonde, i que Jesús ee ra.

Jesús ny#cabo uchimbaaquiatu je

28 Ocho tendare que Jesús choi sita ibátee ra. Ñee sacua Dios je huee. Pedro que oso erese ra. Jacobo abe. Juan abe.

29 Jesús ñee mose Dios je que eruba ñimbiasu ra. Eirao abe que enininya ra. Eiraoshĩ nininya tuchi que ra.

30 Mbia nyeremo ngue nyecua u ibate si ra. Jesús nininya mose que eriqui ñee ñee nyue erese ra. Moisés que enongue ra. Elías que enongue no nda.

31 Ūquiŋ ja que enininya Jesús rese ra. —Mbia ra Jesús iquia mbucha ira rese Jerusalén, i que equia ñee nyue ra.

32 Pedro reesite raque. Eresenda abe reesi esite raque. Uqueã mbei quera. Jesús nininyate quiatu ngue ee re. Moisés abe nininyate quiatu ngue ee re. Elías abe nininya no.

33 Ibatenda que nyoĩ quia Jesús recha cote ra. —¿Manyae ra ñee Jesús je re? i que Pedro ra. Nyebe ñee iru chõ nguiã ee. —Nandecu turãte aa, Sembaaquiatusa. Sucha ñetẽ uresaã saã na. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra.

34 Pedro cheẽ mosete que ibeishĩ ndu eite ñi nda. Ibeishĩ ngue Moisés mbuchecuayã ee ra. Elías abe mbuchecuayã ee. Nyebe esiquiche nguiã.

35 Echeẽ mo ngue ehandu ibeishĩ qui re ra. —Co rei sebi tuchi seriĩrĩ co. Echeẽ jeñandu bei quia, i que Dios ee ibeishĩ qui re ra.

36 Aquere que Jesús mii ndiqui uchimbaaquiatu rese ra. Umaesa que esenei eã ja emo je ra. Ñee áte que emo je ra.

Jesús aba checuayã jea mbia riĩrĩ mo si

37 Isamamimbe que ecuaẽ nguichi sita ibate si ra. Mbia tubiriã ngue ngaẽ Jesús rea ra.

38 Ūquiŋ mo ngue ñee Jesús je ra. —Seriĩrĩ ndese emae, Urembaaquiatusa. Seriĩrĩ maite que se co ra.

39 Aba checuayã icuã ndiqui eisi isi co. Embaasẽ asẽ mbei. Emburiri riri. Echuru mbichoĩ. Erete munumbi numbi. Aba checuayã hui sereã mbei seriĩrĩ si.

40 “Aba checuayã embusẽ seriirĩ si”, ae rei ngue ndechimbaaquiatsu je re. Embusẽ aroneate esi, i que eru ñee Jesús je ra.

41 —¿Mañi jenyẽ quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ñee ee ra. —Nderiirĩ eru rã seje, i que eru je cote ra.

42 Jesús rurubite mose que aba checuayã eriirĩ mbucoi mondo ra. Mburiri tuchi que ra. Jesús que ñee asite aba checuayã icuã je ra. Eriirĩ ngue embucherõ nda. Embucherõ ji que emondo eru je cote ra.

43 Dios quirãcuã ndese mae ngue mbia nyuruira tuchi ra.

Mbia ra seiquia, i si Jesús

Jesús chiao rese mae ngue mbia nyuruira tuchi ra. Mbia nyuruira mose que Jesús ñee uchimbaaquiatsu je cote ra.

44 —Mbiarã ngue achu ra. Mbia ra semee mbia icuã je. Sericharã. Ûqui si ra jẽtesareichĩ, i rei que Jesús uchimbaaquiatsu je ra.

45 Echimbaaquiatsu que Jesús cheẽ icuayãte ra. Echecuayãte que ee ra. —Ndecheẽ embiasa ure je, iã ngue ñee ee ra. Ireĩ ireĩ ño ngue ñee ee ra.

Ererecua tuchi ra se, i jaaja Jesús chimbaaquiatsu nyue

46 —Se quia ra ererecuarã tuchi jẽsi, i jaaja que echimbaaquiatsu ñee nyue ra. Ñee icuã icuã nyee nyue.

47 Jesús que ùqui ndua ndua icuate ra. Nyebe ãquẽ mo mbucoi mĩ nguia ujji.

48 Jesús que ñee ee ra. —Sã ãquẽ mo ndiqui siqui mingue no jẽ. Ae eturã ndiqui mbia riirĩ je seriĩ nae, seje abe chõ eturã ndiqui nguia. Ae eturã ndiqui seje nae, semondosa je abe chõ eturã ndiqui nguia. Ae ererecua sereãte riqui jemo nae, ùqui nguia sebi re. ¿Mbaerã jẽingo “ererecuarã se” i nyue re? i que Jesús ee ra.

Emo icuã eã mose nande je, nanderesenda chõ ùqui nde

49 Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguia, i que Juan Jesús je ra.

50 Jesús que ñee ee ra. —Tei. ¡Jẽsiquisã quisãchĩ nda jẽ! Emo icuã eã mose nande je, nanderesenda chõ ùqui nde, i que Jesús ñee ee ra.

Jesús ñee asi Jacobo je; Juan abe je

51 —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra.

52 Jesús que mbia mo mondo unonde ra. Ûqui ngue ngasẽ sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra.

53 Hue jenda que Jesús isi turã sereãte ra. —Jerusalén Jesús si quia qui reae. Nyebe ureico nguia eisi sereã aa, i que hue jenda ñee icuã Jesús chimondo je ra.

54 Jacobo jirandu mose que paama i hue jenda je ra. Juan abe que paama i hue jenda je ra. Ûqui ngue ñee Jesús je ra. —Sã Elías tata mbu ibate si mbia icuã je cose no. ¿Eĩ ure si ra tata mbu ã quia sacuã nde? i que echimbaaquiatsu ñee Jesús je ra.

⁵⁵ Jesús que uba ñee asite ee ra. —Jēsecha chō. Aba mingosa riirī ño jēingo ã ndesē. ¿Jētesarei chō nguia ũquí si re?

⁵⁶ Mbia iquia sacuañe nguie achuañe ndesē. Mbia mingo bei sacuañe ño nguie achu nguia, i que Jesús ra. Sucha tubiriã mo nguie echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra.

⁵⁸ Jesús que ñee ee ra. —¿Mbae rasi ra eresañe sañe serese re? Eoita quia ecua jiri re. Ngureñe nguia equisa jiri no nde. Se quia sequisayã mbei re, i que Jesús ee ra.

⁵⁹ —Serui eico bei, i que Jesús emo je ra. —Sã seru mano na. Aquere quia ra aico bei nderui, i rei que aque ñee Jesús je ra.

⁶⁰ Jesús que ñee ee ra. —Sã mbia ataque chō nderu chati. Nde quia eso Dios cheñe nenei nenei mbia je, i que Jesús ee ra.

⁶¹ Emo nguie ñee Jesús je ra. —Aico jee ra nderui. “Co acua quia co”, taerã oso sechuchua jenda je, i que ñee Jesús je ra.

⁶² Jesús que ñee ee ra. —“Achu jirichĩ nguia Jesús rui”, i mose sequiato mo, aque ra ngaseñe Dios je, i que ra.

10

Jesús mbia setenta mondo ucheñe nenei nenei sacuañe

¹ Aquere que Jesús mbia setenta irabo no nda. —Serēta chō jēso jēso quia sucha mbuchesea sea, i que ee ra. Nyeremo nemo nguie embuchao chao quia mondo ra.

² —Secheñe andusa reã ndei etubiriã. Secheñe nenei neneisa rei co mui jiri. “Dios, ndecheñe nenei neneisa mo emondo tuchi. Mbia mbiirandu randu sacuañe”, jenyechō nguia Dios je. Sã echa mbae a ishao shaosa mondo ea ireñe mose no.

³ Jēso cote. Sã nyacua icuañe ndiqui oveja je no. Eñe si ra mbia icuañe icuañe jēje. Nyacua rã si.

⁴ Jēochi chō jēso. Mbae riru ra jendaochĩ. Mbae isiquia abe ra jendaochĩ no. Jēiyao abe ra jendaochĩ. Jēitō itōchĩ nda ñeenda cúa ñee sacuañe mbia je.

⁵ Jēique mose emo nyuchua, jeñee turã huee tuchia jenda je. “Dios nda jembia bei quia chã”, jenyechō nguia Dios je.

⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee.

⁷ Jemba jembatechĩ nda uque tuchia raamba amba. Jengue mocoñe jiri quia huee. Ae hue jenda u u quia nae, jē abe jēu quia erese. Jēingo mose secheñe nenei nenei mbia je, sã mbia mbae mondo mondo jēje.

⁸ Sucha tubiriã jenda jēisi turã mose, jēquiaru quiaru erese.

⁹ Hue jenda ndasi jembucherō nyerō ee. Hue jenda je secheñe jēsenei senei. “Namo jiri ra jenderecuarã Dios cote”, jenyechō hue jenda je.

¹⁰ Sucha tubiriã jenda mo jēisi sereã nea mose, jeñee asi ee etacúee.

¹¹ “Urei tubi urembutomo nguia jendique jie a. Jētesareiã sacuañe urecheñe si. Jenderecuase rete raque Dios. Jēisiã ñochĩ”, jenyechō hue jenda mbiirandu.

¹² Se mbia icuañe mbasi mbasi mose, hue jenda ra ambasi mbasi tuchi Sodoma jenda si.

Jesús ia eã mbia sucha tubiriã jenda rese

13 Seya eãte jendese, Corazín jenda. Seya eãte jendese, Betsaida jenda. Jendasi tuchi chõ ndae. Mbia mae sayã ngue asaã saã jêje nae, ũquĩ naa mose Sidón jenda je, eĩ nda hue jenda huĩcuã ndecha rei. Eĩ nda Tiro jenda abe huĩcuã ndecha rei. Eĩ nda eya eãte rei huĩcuã ndese.

14 Jê nguia jêicuã jêsecha sereãte rei. Nyebe ra Dios jembasi mbasi tuchi ũquĩ si quiatu. Dios mbia icuã mbasi mbasi mose.

15 Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu.

16 Secheẽ nenei neneisa chõ jê nde. Ae ra jeñee ñandu quia nae, secheẽ abe ra echandu. Ae ra jêucuãyãte quia nae, se abe ucuãyã ndae. Ae ra seucuãyãte quia nae, sembusa abe ucuãyã nda eno, i que Jesús ñee uchimondo setenta je ra.

Jesús chimondo mbia setenta nyebi ngaẽ ee

17 Ũquĩ setenta nyebi si mose que eyate ra. —Aba checuayã icuã urecheẽ mumbayã ñochĩ nderĩ, Urererecua, i que ñee Jesús je ra.

18 Jesús que ñee ee ra. —Satanás que ngoi tuchi u ibei si ra. Sã ama piriã i asi no, eĩ si que eu ngoi ra. Amae tuchi que ecoi rese ra.

19 Sequirãcuã ngue amee tuchi jêje ra. Jendeaquiato sacua. Jêirõ sacua mbei tásie rese. Quiraẽ ndese. Seucuãyãsa riquisã sacua. Sequirãcuã nda jendea quiatu mingo.

20 Ũquĩ ndesechĩ nda jêya. Serese quia jêya. Aba checuayã jeñee mumbayã mose jũquĩ ndesechĩ nda jêya no jê! Paba que nombre jembae mbesa mbesa mii ibate ra. Ũquĩ ndese quia jêya, i que Jesús ee ra.

Jesús ia tuchi

21 Aque mosete que Espíritu Turã Jesús mbia tuchi ra. Ñee ngue ngu je ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecuayã mbia aquiato tuchi je ra. Mbia riirĩ naanguia je chõ ngue erembuchecua nguiã. Ũquĩ ño ngue eturã ndeje ra, Paba, i que Jesús ra.

22 —Seru que mbae mondo ja seje ra. Paba mii ño seicua tuchi nguiã. Paba riirĩ mii ño se re. Se mii ño Paba aicua tuchi nguiã no. Ae je ra Paba ateacuquia nae, ũquĩ mii ño nda Paba icua tuchi nguiã serese, i que Jesús ñee nda.

23 Jesús que uba mae uchimbaaquiato rese ra. Eísaa que ñee nda. —Coche jemae nguiã ã sechiao rese.

24 Mbia rerecua ñiinda mae ja bite raque ã sechiao rese. Dios cheẽ nenei neneisa abe mae ja bite raque ã ndese. Mae eã mbei que equia sechiao rese ra. Secheẽ andu bite raque. Secheẽ ngue echanuate ra, i que Jesús ra.

Samaria jenda mo turã erasi je

25 —Ma Jesús ucheẽ nyabi, i que embesasa mo ñee oso Jesús rea ra. —¿Mbae rese ra aico siqui bei nonde re? i que ñee Jesús je ra.

26 —¿Mañi ño Voisés chimbesa re? i que Jesús ee ra.

27 Embesasa que ñee ee ra. —Eĩ ño ngue Moisés embesa ra: “Echesequa tuchi quia Dios rese. Ndechiã ja je chõ eico nyesequa erese. Neaĩ abe je. Ndequirãcuã abe je. Nendua ndua abe je. Sã erechesequa ndechiese no, eĩ ere si chõ nyesequa nde ji jenda rese”, i que embesa ji ñee ndesẽ, i que embesasa ñee Jesús je ra.

²⁸ Jesús que ñee ke ra. —Erecheẽ turãte. Ndkico mose ñquĩ ndese, Paba ra nemingõ bei, i que Jesús ee ra.

²⁹ Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? i que ñee Jesús je ra.

³⁰ Jesús que ñee ee ra. —Sã emo oso quia Jericó quiti no. Jerusaén si. Sã mbia icuã nyarõ erese ñeenda cúa no. Ucuu ucua tuchi que erese ra. Embae que embuquiachã ja ra. Eirao abe rirõ ja esi no. Ecura curái que esecha ino ñeenda cúa rĩ nda.

³¹ Aque ñeenca aui que sacerdote mo si ra. Maeño ngue ecura curái rese ra. Nyucuaño ngue oso ra.

³² Levita mo abe que oso rei hue rĩ no nda. Aque abe que maeño si erese no nda. Ñeenda ibi chõ esi nguiia kcuãno no.

³³ Aquere que Samaria jenda mo oso hue rĩ nda. Aque mae mose ecura curái rese, eya eã tuchi que aque quiatu ra. Aque quia echucuaño eã nguiã cote.

³⁴ Aque que tiba erese ra. Mbae quira que equiti quiti eiruã nua ji rese ra. Vĩno abe quiti erese. Esia ji que echucua chucua ee ra. Caballo umbae rese que erasi mbuchui cote ra. Tuchua mo ngue ererao ra. Huee que eriqui eraarõ isa ra.

³⁵ Isamami ngue ñee tuchuacha je ra. —Taso cote. Ecura curái embucherõ nguia aa. Co mbae isiquia nyeremo tamondo ndeje. Embucherõ sacua eisi co je. Co nyeremo chayã mose, mbae isiquia mo nda amondobe ndeje sechube mose, i que Samaria jenda ñee tuchuacha je ra.

³⁶ ¿Aba nyesequa ecura curái rese re? ¿Sacerdote ere? ¿Levita ere? ¿Samaria jenda ere? i que Jesús embesasa je ra.

³⁷ Embesasa que ñee ee ra. —Samaria jenda chõ ngue nyesequa erese resẽ, i que embesasa ñee Jesús je ra. Jesús que ñee ee ra. —Ae rã si chõ eico nyesequa, i que ee ra.

Jesús oso Marta rea; María abe rea

³⁸ Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, i equia ee.

³⁹ María, i que Marta nongue je ra. Jesús i ji bei que María riqui ngoi ra. Jesús cheẽ ndese nyiisaquia bei.

⁴⁰ Marta que mbae chão chão ja tuchi quia ra. Erecoteã tuchi que eriqui ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, i rei que Marta Jesús je ra.

⁴¹ Jesús que ñee Marta je ra. —¿Mbaerã ereico siqui jate mbae rese re, Marta?

⁴² Aque miĩ ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, i que Jesús Marta je ra.

11

Jesús mbia mbaaquiato quiatu ñee tura sacua Dios je

¹ Emo mose que Jesús chi ñee ngu je ra. Hui mose que echimbaaquiato ñee ee cote ra. —Urererequa, urembaaquiato rã ñee Dios je. Sã Juan uchimbaaquiato mbaaquiato no, i que Jesús chimbaaquiato ñee ee ra.

² Jesús que ñee ee ra. —Eĩ jenyẽ chõ nguia Dios je ñee mose: Paba ibatenda, sã mbia ñee turã ja bei quia nderiĩ.

Mbia rerecuarã ja sacua echu jei íbii.

Sã mbia ibatenda siqui beite ndebi rese no.

Sã mbia ibi jenda abe riqwi ndebi rese.

³ Ae ra ureu namo, ùquĩ embu rã urechiurã.

⁴ Ae uresaã icuã icuã ndeje nae, ùquĩ embutiã ná uresi.

Sã ureico tesarei mbia icuã icuã mose ure je no.

“Mbae icuã jêsaã” jichĩ nda emo ure je jê!

Urereaquiatu mbae icuã si.

Eĩ jenye chõ ñee mose Dios je, i que Jesús embaaquiatu ra.

⁵ Jesús que ñeembe ee ra. —“Mbae embu seje”, jê i mose jêquiato je, ¿mee nda jêje re? Sã jêingo oso jêquiato rea itondiite rete mose no. “Mbichae prestar ere rã seje.

⁶ Sequiatio mo ngue tu serea ra. ¿Mbae ra amee ee re?” jenye chõ ee.

⁷ Ae je jêingo ñee nae, ¿mee eã nda jêje re? Sã ñee jêje no. “Jêso rei. Seiquesa átãte. Co achu seriirĩ ndese quisa ye co. Sehuã sereãte. Mbae mo amondo aronea tuchite ndeje”, ¿i ra jêje re?

⁸ Mondo eã aroneate jêje jeñee mbei bei mose ee. Nyuruã sereãte raque uquiato je. Ñee mbei mose ee, nyuruã nda mbae mondo turã ee.

⁹ Eĩ si chõ Dios no nde. Jeñee i i mose Dios je, mbae ra emondo jêje no. Jê mbae mo ndequia i i mose, jêtea rae. Jê eiquesa mbu i i mose, mbuquiata ra jêje cote.

¹⁰ Ae ñee i ite quia Dios je nae, mbae ra Dios mondo ee. Ae mbae mo sequia i ite quia nae, tea rae. Ae eiquesa mbu i ite quia nae, equia ra ee.

¹¹ Jendiirĩ “mbichae embu seje” i mose, ¿sita ra eru mee ee re? Jendiirĩ “sira embu seje” i mose ¿mbei ra eru mondo ee re?

¹² Jendiirĩ “nguira chia embu seje” i mose, ¿quiraẽ nda eru mondo ee re?

¹³ Mbia icuã nyee mbae turã mondo mundo quia nguuirĩ je ã. Jendu Ibatenda quia ra mbae turã tuchi mee jêje. Jendu ra Espiritu Turã mee jêje, jeñee mose ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiatuãte nguia. Jesús embusẽ mose que ñee cote ra. Ñee mose que mbia nyuruira tuchi mae erese ra.

¹⁵ Emo emo ngue ñee nda. —Aba checuayã icuã nderecua tuchi chõ Satanás nde. Satanás quirãcuã je chõ Jesús riqwi nguia aba checuayã icuã mbusẽ mbusẽ mbia si co, i rei que emo emo nda.

¹⁶ —Ma Jesús aquiature, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra.

¹⁷ Jesús que ùquĩ ndua ndua icuate ra. Nyebe ñee nguia ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno.

¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguia seje ã. “Satanás quirãcuã je chõ Jesús riqwi nguia aba checuayã mbusẽ mbusẽ mbia si”, jenye chõchĩ nguia seje ã.

¹⁹ ¿Aba jeñimbaaquiatu mbirãcuã jê nde? Aba checuayã icuã mbusẽ nonde re. ¿Satanás jeñimbaaquiatu mbirãcuã serese re?

²⁰ Dios quirãcuã je quiatu aico aba checuayã mbusẽ mbusẽ mbia si ã. “Dios quirãcuã ndese chõ ureico nguia mae”, jenye eã ñochĩ nguia ã.

²¹ Satanás quirãcuã tuchite raque. Umbae raarõ tuchite raque. “Sembae chi turãte a”, i raque.

²² Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co.

23 Ae siqui âte quia serese nae, ũquĩ icuã ño eriqui nguiã seje. Ae mbae a ishao shao raanguia eâte quia seje nae, ũquĩ icuã ño eriqui nguiã seje.

Aba checuayã icuã nyebi u mbia chianguĩ re

24 Aba checuayã icuã usẽ mose emo ñia si, ngata bei chõ nguiã. “¿Mangue ra sequenea aucua que re?” i chõ nguiã. Uquenea ucua sacua ngue etea eâte ra. “Tasobe rei nyebi. Ae si achu usẽ, aque chiã ye si taso”, i que aba checuayã nda.

25 Aba checuayã nyebi si mose u, mbia chiã ndecoteã eâte que ee ra. Tuchua tii ji raâte que ee ra.

26 Aba checuayã icuã ngue nguesenda siete queru cote ra. Ique ja que echoi aque chianguĩ re cote ra. Ae chianguĩ re aba checuayã icuã siete riqui nae, aque icuã i i tuchi que cote ra. Ñiinda si. Aba checuayã mii ngue siqui eye nyii ra. Etubiriâte cote, i que Jesús ee ra.

Dios cheẽ andusa je quiatu mbae roonde

27 Jesús cheẽ mose que cuña mo tasẽ tuchi ñee mombo ra. —Mbae roonde tuchiñi ndesi je nye. Ae nembuquiambu quia, i que cuña mo ñee mombo Jesús je ra.

28 Jesús que ñee ee ra. —Dios cheẽ andusa je quiatu mbae roonde riqui nguiã. Dios cheẽ mumbasa reã je quiatu mbae roonde riqui nguiã, i que Jesús ra.

Mbia mae sayã esaã ure je, i bei mbia Jesús je

29 Mbia que ngaẽ tuchi Jesús riichã nda. Jesús que ñee mbia je ra. —Co mosenda mbia icuãte riqui ã. “Mbia mae sayã esaã ure je”, i beite equia seje ã. Mbia mae sayã mii ño nda asaã ee. Jonás na si.

30 Sã Jonás ndiqui raque sira rie ye tres días nae, sã mbia Nínive jenda echeẽ andu cote nae. Jonás na si ra asaã mbia je. Mbia co mosenda je mae sayã tasaã.

31 La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho tuchi si Salomón ñee andu no. Se quia acheẽ ndaque quia jêje. Searacua tuchi raque se quiatu Salomón si. Secheẽ jemumbate chõchĩ NGUIA ã: Nyebe ra Dios jembasi tuchi mbia icuã ndea rea mose.

32 Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jêje, co mosenda je. Jẽ secheẽ jemumbate chõchĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose.

Nanderesa quiarei mbae resae nanderete je

33 Nande lámpara mendi mose, nandemii aroneate mbaequi re. Nandemii aroneate mbae mo ye. Nandemingo quia ibate erenda rese. Mbia resae ja sacuaã.

34 Nanderesa quiarei mbae resae nanderete je. Nanderesa turã mose, nanderete abe ra oso turã. Naneeresa icuã mose, nanderete abe ra oso icuã no.

35 Tata rendi rã jẽingo bei.

36 Tata rendi rã jẽingo bei mose, jemae turã nda mbae ja rese cote. Sã tata rendi riqui nanderesae no, i que Jesús mbia mbaaquiату ra.

Jesús ñee asi fariseos je

³⁷ Jesús ñee jare que fariseo mo ñee ee cote ra. —Nyao rã sechuchúaa. Terequiaru serese, i que ñee Jesús je ra. Jesús que oso erese ra. Ngoi que quiaru cote ra.

³⁸ Fariseo que ñee uchiangui re ra. —Jesús choi quiiriã ño quiaruchĩ, i que uchiangui re ra.

³⁹ Jesús que ñee asi ee cote ra. —Jẽo achõ ño jẽirei ireichĩ nguiã. Jeñiangui renda quia eicuãte re. Jeñiangui renda quia jẽirei ãte nguiã. Abei chiãte chõ jẽingochĩ jeñiangui re.

⁴⁰ Nandeo achõ eã ño ngue Dios saã nguiã. Nandechiangui renda abe chõ ngue Dios saã ndesẽ.

⁴¹ Abei chiãte chõ jẽingochĩ jeñiangui re ã. Jeñiangui renda turã mose, eĩ nda jẽturã ja rei.

⁴² Aba mbia eã tuchichĩ jẽ, Fariseos. Mbae a jemondo mondo tuchi raque Dios je. Jenyeseuca eãte quia erese jeñiangui re re. Jẽingo turã eãte quia mbia rese no nde. Ũquĩ jẽsaã jiri ae. Mbae a abe jemondo Dios je.

⁴³ Aba mbia eã tuchichĩ jẽ, Fariseos. “iSerendarã turã nguiatu se jẽ!” jenyete chĩ nguiã mbia ñumunua mose. “Sã mbia serereuca i nande je”, jenyete chĩ nguiã no.

⁴⁴ Aba mbia eã tuchichĩ jẽ, Fariseos. Embesasa abe no. Jenguasu jẽsaã saã techĩ nguiã mbia je. Mbia raaque tãsa rã ño jeñiangui renda re. Jeñiangui renda soõ ño nguiã. Erondeite. Sã eraaque tãsa yenda soõ no. Mbia jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no.

⁴⁵ Embesasa mo ngue ñee Jesús je cote ra. —¿Mbaerã ereico ñee ure abe je re? i que ra.

⁴⁶ Jesús que ñee ũquĩ abe je ra. —Aba mbia eã tuchichĩ jẽ abe. Jeñee tuchite quia mbia je ã. Dios cheẽ jembeta mbeta tuchichĩ nguiã mbia je ã. Mbia echeẽ mumbayã aroneate chee quia ã. Jẽ si chõ jeñee jemumba mumba nguiã ã.

⁴⁷⁻⁴⁸ Cose ndare rã si jẽingo nguiã ã. Jenamei na si. Sã ñi jenamei icuã icuã ndiqui Dios cheẽ mbuchecuasa je cose no. Eĩ jenye si chõ nguiã ã no.

⁴⁹ Dios quiarei earacua tuchi. Ae que ñee jẽje ra. “Secheẽ mbuchecuasa emo emo nda amondo mbia je. Mbia icuã icuãte ra secheẽ mbuchecuasa je. Secheẽ mbuchecuasa mo iquía chee, i que Dios ñee nda.

⁵⁰⁻⁵¹ Ae Dios quiato iquía iquía quia cose nae, ũquĩ ñi nda Dios jembasi cote. Sã mbia Abel iquía cose no. Sã mbia Zacarías abe iquía altar jii no. Sã mbia Dios quiato iquía iquía bei cose no. Ũquĩ ja riĩ nda Dios jembasi cote.

⁵² Aba mbia eã tuchichĩ jẽ. “Ure mi ño Dios cheẽ ureicua nguiã ã”, jenye chooño ño nguiã ã. Dios cheẽ jẽisi turã eãte quia ã. Mbia siquise mose Dios rese, jẽingo emingo eãte erese ã no. Jẽ abe chee jẽingo eãte erese ã no, i que Jesús ñee embesasa je ra.

⁵³⁻⁵⁴ Jesús ñee jare que fariseos paama i tuchi ee ra. Embesasa abe paama i nguiã ee no. Ũquĩ ngue ñee ñee tuchi Jesús je ra. —Sã Jesús ucheẽ tasa tasa nande je no. Ũquĩ mose nandeisi serao policíaa, i tuchi que ra. Nyebe eriqui nguiã Jesús rea chemi ñemi.

¹ Mbia tubiriã ngue ngaẽ ngaẽ nguia Jesús rea cote ra. Cuaacua i tuchi que equia nyuera. Mbia tubiriã tuchi. Jesús que ñee uchimbacuaquiato je cote ra. —¡Fariseos rã nda jẽingochĩ jẽ! Uturã naa ñooño mbei.

² Ae mbia saã nyecuayã cuayã nguia nae, ùquĩ nda nyecua ja cote. Ûquĩ nda mbia icua ja cote.

³ Ae jeñee nguia itondaru jẽingo mose, ùquĩ nda nyecua ja mbia je cote. Jeñee equia nyiisa isa nae, ùquĩ abe ra nyecua ja mbia je no.

Dios riqui jendeaquiato bei co

⁴ Tacheẽ nyecua jẽje, Sequiatio. Ae “taiquia” i quia jeni nae, jũquĩ si ra jẽsiquichechĩ jẽ!

⁵ Ae aba mombo serĩte quia tata cuasu nae, aque si quiato jẽsiquiche. ¡Aque si quiato jẽsiquiche tuchi jẽ!

⁶ Nguireĩ ndei aba queteamba eã jiri. Mbae isiquia mumba eã jiri raque. Dios quia nguireĩ icua jate nguia. Dios ra tesareia nguireĩ mo si.

⁷ Dios riqui jẽ mĩ mĩ icua ja co. Dios riqui ngueteã jiri jendese nguireĩ si co. Nyebe jẽsiquicheã mbae mo si.

Jesús quiato chõ se re, jenyechecua chõ nguia mbia je

⁸ “Jesucristo quiato chõ se re”, ae i quia mbia je nae, ùquĩ ni nda acheẽ turã se abe. “Sequiato chõ ã nde”, ae ra se. Angeles ra ambiirandu ja ùquĩ ndese.

⁹ “Jesucristo quiato chõ se re”, ae iã nguia mbia je nae, ùquĩ ni nda acheẽ turã eã. “Sequiato eã ño ùquĩ nde”, ae ra se. Angeles nda ambiirandu ja sequiatio eã ndese.

¹⁰ Emo ñee icuã mose serĩ, Dios ra echeẽ icuã mbutiã arõte. Emo ñee icuã mose Espíritu Turã ni, ùquĩ icuã nguia ra Dios mbutiã eã mbei.

¹¹ Mbia icuã icuã nda jẽje serĩ. Jenderao mose mbia rerecua je, jẽquicoi coichĩ nda jẽ! “¿Mañi nande ra ñee ee re?” jjenyechĩ nda jẽ!

¹² Huee quia ra Espíritu Turã ñee nguia jẽje jembucheẽ sacua, i que Jesús ñee uchimbacuaquiato je ra.

Mbaecha aracuayã

¹³ Emo ngue ñee Jesús je ra. —Sererecua, senongue icuã icuãte seje. Echeẽ na senongueje. Ae ureru secha ure je nae, senongue embuchecha turã eãte seje, i que mbia mo ñee Jesús je ra.

¹⁴ Jesús que ñee ee ra. —¿Mbaerã nda re? “Mbia mbae embuchecha turã turã ee”, iã ngue Dios seje ra, i que Jesús ee ra.

¹⁵ —¡Emo mbae rese ra jemaẽ maechĩ eosei sacua jẽ! “Sembacua tubiriã mose ra seyate cote”, jjenyechĩ nda jẽ! i que Jesús ee ra.

¹⁶ Jesús que ñee ee ra. —Sã mbaecha mo ndiqui no. Ibicha. Sã embae ia tuchite no.

¹⁷ “¿Mañi ae ra se re? ¿Mangue ra aba ererecoquiato re?” i tuchi que mbaecha uchiangui re ra.

¹⁸ “Sembacua ruacuã tambucuasua tuchi. Quiata a ruacuã. f nda sembae ique ja tuchi huee. Ae arecoquiato quia ã nae, ùquĩ nda tenda ata jiri tea seje chã.

¹⁹ Aquei quiete eã mbei ra se quia cote. Aquliaru quiaru chõ nda se quia cote. Mbae ra mbei mbei chõ nguia cote. Achimbacua mbia chõ nda se quia cote”, i raque mbaecha ñee uchiangui re.

²⁰ Dios que ñee ee ra. “Ndearacuayâte ereico co. Co isa chõ nda eremano. Ae ererecoquiatute quia nae, aba je chio nda ùquĩ cote”, i que Dios ñee mbaecha je ra.

²¹ Ae mbae munua nua mbei quia nae, ererecoquiatu sacua nae, earacuayã tuchi chõ ùquĩ nde. Dios quiato eã ño ùquĩ nde, i que Jesús mbia mbaaquiato quiatu ra.

Dios uquiato reaquiato bei

²² Jesús que ñee uchimbaaquiato je ra. —“¿Mbae ra nandeu re?” ijenyechĩ nda quicoi coi jê! “¿Ma tiru ra nandemingue re?” ijenyechĩ nda quicoi coi jê!

²³ Mbia chi u ae ra mbia mingo eã. Mbia irao abe ra mbia mingo eã no.

²⁴ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae. Dios quiarei embuquiaru quiaru. Jê nguiarei Dios queteamba tuchi nguireĩ si. Nguireĩ ja si. Jê abe Dios ae jembuquiaru nguiã jê no.

²⁵ Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ arõ nguiã.

²⁶ Jê mbae ñetẽ naa aquiatuã mose, ¿mbaerã jëingo “mbae cuasu tasaã” i re? Dios quia ra mbae saã ja jêje.

²⁷ Sã mbae uti turãte riqui no. Mbae ao ao eã ndaque. Ñinyu mburirã eã ndaque. Mbae uti quiarei eturã jiri Salomón si. Salomón turãte raque.

²⁸ Sã Dios quiata mbuturã no. Quiata mano jete raque. ¿Mañi nda Dios jembuiraõ eã jê nde no? ¿Mbaerã jëingo Dios icuayãte re?

²⁹ “¿Mbae ra nandeu re?” ijenyechĩ nda pare pare i jê! “¿Mbae ra nandembei re?” jenyechĩ nda quicoi coi no jê.

³⁰ Eĩ ño Dios quiatoã nguiã. Jê nguia jendu tesareia mbeite nguiã jësi.

³¹ Jê nguia jëingo tuchi Dios rese jenderecuarã. Ùquĩ mose ra Dios mbae mee mee mbei jêje. Jenyurã. Jefimbeirã abe no.

Jembae jemondo ja Dios je

³² Jësiquichechĩ nda mbae mo si, Seririĩ. Jendu ra umbae mondo ja jêje. Dios iate ra umbae mondo mose jêje.

³³ Jembae jemondochõ ño mbaecha reã je. I nda jembae tubiriã jëingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãya huee. Chicuaquiareĩ eãte ra huee no.

³⁴ Jê jembae mondo mondo mose ibate, jendua ra ibatenda rese cote. Jê jembae monoã mose emo je, ibatenda rese ra jendua eãte.

Jëingoquiato bei chõ nguia

³⁵ Jëingoquiato bei quia jê! Itondaru abe jëingoquiato quia.

³⁶ Sã ererecua mo no. Oso ngüinisirã nderequia no. Huee erimba mo ndiqui echuchua raarõ huee. Aque ererecua ru quia eiquesa mbuu mbuu aque cote. Erimba eequia asi ee cote.

³⁷ Erimba uqueã mose nguerecua tu mose, ererecua ia tuchi ra erese. Ererecua ra embuquiaru turã. Ae sí chõ echara chara nguiã ngüimba je hue no.

³⁸ Ererecua ra tu arõte itondáruu. Itondiite mose abe no. Erimba uqueã mose nguerecua tu mose, ererecua ia tuchi ra erese.

³⁹ Sã emo ñee ndeje no. “Co mose ra mbae mbuquiachãsa ru nembae rirõ”, i ndeje no. Ùquĩ mose ra erequeã. Nembae ra ersaarõ mbei esi.

40 Eĩ jenyje jê abe icoquiatsu. Eĩ ae ra u ibate si. “Tu eãte rei rae”, i mose quia ra achu, i que Jesús ra.

Erimba echeẽ mumbayã mose, eya tuchi rae

41 Pedro que ñee Jesús je ra. —¿Aba je ereico ñee ùquĩ nde? ¿Ure mii je ere? ¿Mbia ja je ere? i que Pedro ee ra.

42 Jesús que ñee ee ra. —Dios rimba aba cheẽ mumbayã nii aico ñee co. Dios rimba aracua riãico ñee co. Sã ererecua ñee ngũimba turã je no. “¿Sembae esaarõ ja jê!” i ee. “Serimba ataque embuquiaru quiaru ja quia no”, i ee.

43 Erimba echeẽ mumbayã mose, ererecua ia tuchi ra tu mose. Erimba abe ra eya no.

44 Ererecua ra ngũimba mii mbei cote, umbae raarõ sacua.

45 Sã erimba ndua ndua uchiangui re no. “Sererecua ra tu jei ãte”, i ndua ndua. Hue ñee icuã icuã uataque je huee cote. Iruã nua cote. Quiaru chooño cote. Mbae mbei chooño abe cote. Quiacua quiacua cote.

46 Sã ererecua ru quia ngũimba mbuate aque cote no. Ñee ee. “Mbae ra eresaarõ mbei seje cote”, i ngũimba je cote. Ngũimba iruã nua tuchi cote. Ae aba cheẽ mumbate quia, ùquĩ ndese ra mbae rasi raã naa cote.

47 Ae nguerecua cheẽ icuate quia nae, ùquĩ nda ererecua mbasi mbasi bei ucheẽ mumba mose.

48 Ae nguerecua cheẽ icua eãte quia nae, ùquĩ nguia ra ererecua mbasi mbasiã jiri ucheẽ mumba mose. Ae Dios cheẽ icua tuchi quia nae, ùquĩ je ra Dios “mbae esaã tuchi seje”, i. Ae je Dios mbae mondo tuchi nae, ùquĩ je ra Dios “mbae esaã tuchi seje”, i.

Achu chõ ngue mbia mbuchao chao nyesi resẽ, i Jesús

49 Ibate si que achu ibii ra. Mbia mae sacua sequirãcuã ndese. Mbia sequirãcuã icua eã ñochĩ namo nyee.

50 Mbia ra sembasi tuchi cote. Pare pare aete se quia ndua erese co.

51 ¿Achu rei mbia mbuturã turã sacua serimba je jêje re? Tei. Achu chõ ngue mbia mbuchao chao nyesi resẽ.

52 Mbia chuchua jenda ra ñimbuchao chao nyesi. Nyeremo nda siqui serese serimbarã. Eataque ra ñimbuchao esi.

53 Emo nda eicuãte ngu je serĩ. Emo nda eicuãte nguiirĩ je serĩ no. Emo nda eicuãte usi je serĩ no. Acuanĩ abe ra eicuãte uchari je no. Ari mo abe ra eicuãte nguiirĩ ninisi je no. Eĩ si ra mbia icuã icuã uchue serĩ no, i que Jesús ra.

Ae ibatenda ra tu icuãte mbia je nae, aque jêicua eãte chõchi

54 Jesús que ñeembe mbia je ra. —“Ama nda nyaaqui”, jenyje bei quia pã i mose ã. Ibei jêicuate raque quia ã.

55 “Tenda rasite ra cote”, jenyje bei quia quiririã ichu ichu mose ã no.

56 Ibei jêicuate raque quia ã. Tenda abe jêicuate raque quia ã no. Ama abe no. Dios rucucha ra tu mbia je, ¿mbarã jêingo ùquĩ icuayãte quiatu re? ¿Mbarã jêingo jêaracua raã naa nde?

Ae eicuãte riqui jêje nae, “nandeico turã ño nguia”, jenyje chõ nguia ee

57 ¿Mbarã jêingo mae sereãte mbae turã ndese re?

58 Emo ñee icuã mose jeni mbia rerecua je, jêturã ño ee. Jeñee turã ño ee. Jê ae chõ jêñimbuturã nguia erese. † nda jenderao icuã eã. Jenderao mose ra jêtarõ mbei cárcel.

59 Huee ra jêingo bei. Jembae mondo ja tuchi chee ee, i que Jesús ra.

13

Jēhui chō jēicuā si

¹ Aque mose que mbia Jesús mbiirandu Pilato rĩ nda. Pilato nda mbia Galilea jenda mo iquia iquia ra. Mbia ticuasu iquia iquia mose Dios mbaerã.

² Jesús que ñee mbia je ra. —Ae Pilato iquia iquia quia nae, ¿ũquĩ icuãte riqui reĩ mbia ataque si re? Tei. Jēicuā ja chō jēingo nguiã ã no.

³ Jēhui eã mose jēicuā si, jemano ja chō nda jē abe. Ũquĩ na si.

⁴ Sã torre de Siloé ngoi mbia ati no. Dieciocho iquia. ¿Ũquĩ eicuãte riqui reĩ mbia ataque si re? Tei.

⁵ Eĩ ja chō ñene. Jēhui eã mose jēicuā si, jemano ja chō nda jē abe. Ũquĩ na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chō ee no. “Ma taso erea no. Ia cote reae”, i rei que amei nda. Ei oreãte que ee ra.

⁷ Nyebe amei ñee nguiã ngũimba je cote. “Ira a rea ngue aso rei nguiã. Ia eã mbei chōchĩ seje tres años. ¡Echisia chō oso jē! Ibi riquisã ñooño uã aque”, i que amei ngũimba je ra.

⁸ Sã erimba ñee amei je no. “Co tenda mose nandechisia eã na. Equi tambuturã. Mbae ruusi tachono ñono erao rese.

⁹ Ma ia eãte co tenda. Ia eã mose, nandechisia chō cote”, i que erimba amei je ra, i que Jesús mbia mbaaquiatu ra.

Jesús ari rasi mbucherõ

¹⁰ Sábado mose que Jesús chi mbia mbaaquiatu quiatu ra. Judíos chumunuásaa.

¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguiã. Ari que nguete isoã mbei quia ra.

¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra.

¹³ Jesús que o chono erese ra. Aque mose tuchi que ari nguete iso turã cote ra. Ari que ñee turã turã Dios je cote ra.

¹⁴ Ererecua judíos munuasa que paama i tuchi Jesús je ra. Ari mbucherõ mose sábado. —Sábado eã mose chō nandeico mbae rese ae. Sábado eã mose chō nandeico erasi mbucherõ ae. Sábado mose chō Dios mbae resẽ. Erasi mbucherõ aroneate co mose resẽ, i rei que ererecua mbia je ra.

¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jēingo ticuasu mbui eã mbei embiu sacuã nde?

¹⁶ ¿Mañi nande ra cuña ndasi mbucheroã co sábado mose re? Judía sí chō nyeresẽ. Jē na si. Satanás que embasi cosete ra. Dieciocho años chee. ¿Mañi ae ra erasi mbui eã esi sábado mose re? i que Jesús ñee nda.

¹⁷ Mbia ataque iate que Jesús cheẽ mose ra. Jesús chiao rese abe eyate no. Ae Jesús ucuãyãte quia, ũquĩ ngue eireĩ tuchi Jesús cheẽ mose ra.

Mbae eĩ na ño Dios rimba re

¹⁸⁻¹⁹ Jesús que ñeembe mbia je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbia mostaza eĩ tiquia no. Ieĩ ñetẽte raque etiquia ramo mose. Suri oso quia cote. Ecuasu tuchi chee cote. Nguireĩ uquisa saã nyee erãquiã ndese. Eĩ si chō Dios rimba re. Ũquĩ miĩ ndaque nyii. Ñimbeta tuchi cote. Mbae eĩ na.

Levadura rã ño Dios rimba re

²⁰⁻²¹ ¿Mbae rã ño Dios rimba chã? Levadura rã ño Dios rimba re. Sã mbia levadura ñetẽ mondo mbichae ao ramo mose no. Levadura oso quia mbichae mbuchimatã ja no. Eĩ si chõ Dios rimba re, i que Jesús ra.

Eiquesa chumumbi

²² Jesús que oso quia Jerusalén nda. Tiba tiba que oso quia mbia chuchua mbucheseã sea ra. Mbia mbaaquiату quiату.

²³ Emo ngue ñee Jesús je ra. —Sererecua, ¿mbia mii mii ño nda siqui ibate nderese re? i que emo ñee Jesús je ra.

²⁴ Jesús que ñee ee ra. —¡Eiquesa chumumbi rĩ ño jeso ique jê! “Hue rĩ nda aso se abe ique”, i ja jate raque rae. Tei. Ique ja eã nguia nda re.

²⁵ Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã urẽ je”, jenyeraque ra seje cote. Acheẽ nda jêje. “¿Mangue jenda jê nde? Jaëicuayãte se”, ae ra jêje cote. Eiquesa ra ambuquiatayã mbei jêje cote.

²⁶ Jeñee tuchi raque ra seje cote. “Urequiaru que equia nderese. Nde que urembaquiату quia. ¿Mañi ere ra urerecha re?” jenyeraque ra seje cote.

²⁷ Acheẽ nda jêje cote. “Jaëicuayãte se. Jeso serecha. Mbae icuã ngue jesaã saãte quia resẽ”, ae ra se hue cote.

²⁸ Hue ra jenyeseo seo seje huee cote. Jeñee nda seje. “Abraham ño siquichĩ nderese hue. isaac abe no. Jacob abe no. Dios cheẽ mbuchecuasa ja abe no. Ure chõ urecuchĩ taicuee a”, jenyera nyeseo seo seje huee.

²⁹ Mangue jenda choõnoa nda ngaẽ ngaẽ Dios riichã aque mose. Quiaru quiaru ra equia Dios rese.

³⁰ Ae equiatute riqui raque namo nae, ñquĩ mo nda eñetẽ na pee cote. Ae equiatuãte riqui raque namo nae, ñquĩ mo nguia ra siqui ecuasurã tuchi pee cote, i que Jesús ñee nda.

Jesús ia eã tuchi Jerusalén jenda rese

³¹ Aque nyaashĩ mose que fariseos ngaẽ ñee Jesús je ra. —¡Eso a si jê! Herodes ndeiquia serĩte quia co, i que Jesús mbiirandu ra.

³² Jesús que ñee ee ra. —Eoita rã ño Herodes re. Jeso ñee ee. “Jesús que ñee ndeje ra. Taico mbirimbe rã aba checuayã icuã jea jea mbia si. Taico mbirimbe rã mbia rasi mbucherõ cherõ. Namó. Isamami abe. Isamami nongue ra ahui erecha cote”, i que Jesús ndeje ra”, jenyeraoso Herodes je.

³³ Taicobe jiri namo. Isamami. Isamami nongue abe no. Jerusalén nguia nda seiquia nguia. Sã Dios cheẽ mbuchecuasa mano ja Jerusalén no.

³⁴ Tacheẽ na jêje, Jerusalén jenda. Seya eãte aicochĩ jendese co. Hue jẽingo mbia iquia iquia beite hue. Dios cheẽ mbuchecuasa iquia iquia. Dios chimondo abe iquia iquia no. Sã nguira riqui nguire reaquiату mondo ujeoqui re no. “Eĩ tae jendeaquiату”, ae beite rei nguia jêje co. Secheẽ jëisi sereã mbei chõchĩ nguia ã.

³⁵ ¡Aico jendecha a cote jê! Jemae mae eã nda serese cote. “¡Co chi Dios rucucha ru quia co cote jê!” jenyera mose, hue ramo nguia ra jemae serese cote.

14

Jesús mbia rete ruru mbucherõ

¹ Jesús que oso rei quiaru fariseo rerecua mo nyuchúaa ra. Sábado mose. Fariseos mo ngue chi erea chemi ñemi nda.

² Huee que emo ndasi riqui Jesús je ra. Erete ruru ja que ra.

³ Jesús que ñee fariseos je ra. Embesasa je abe. —¿Eicuâte se erasi mbucherō mose sábadō mose re? I ere. Jeñee seje, i rei que Jesús ee ra.

⁴ Jesús cheē mose que mbia mo ñee eâte ee ra. Jesús que erasi mbucherō mondo cote ra.

⁵ Jesús que ñee fariseos je ra. —Sã jenimba ticuasū riqui jaã no, ngoi oso ibicua rie. ¿Sábadō mose ra jēsiquiã nde? i que Jesús ee ra.

⁶ Fariseos que ñee sereâte echeē mose ra.

Jēcuasu ra jēsã saãchĩ, i Jesús mbia je

⁷ Mbia que erenda turã isirō sirō nguia ra. Ngoi sacua ererecua ji. Ucuasu raã naa sacua. Nyebe Jesús ñee nguia ee.

⁸ —Jēingo mose fiesta, i erenda turã mo nda jēsirōchĩ jē! Mbia chiucate mo nda tu arō ndeje cote.

⁹ Fiestacha ra ñee arōte ndeje. “Ehuã na nde. Erenda turã tamondo sequiatio je”, i arōte ra ndeje. Ndeireite ra huee cote. Pe quiti jiri ra nembucoi cote.

¹⁰ Jēingo mose fiesta, pe quiti jiri chō jengoi. Erenda turã isirō nocoĩ. I nda fiestacha ñee ndeje. “Quiatuchu a jiri, Sequiatio. Erenda turã tose”, i sacua ndeje. I nda mbia mae ja nderese.

¹¹ Ae ererecua saã saã nguia nae, ũqui nda siqui eñetē na cote. Ae siqui mingute quia nae, ũqui nda siqui ererecuarã cote, i que Jesús mbia je ra.

¹² Fiestacha abe je que ñee cote ra. —Nde fiesta raã mose, “jenyu quiaru serese”, i erechĩ nda mbaecha jiri je jē! Erechĩ nda ndenongue je. Erechĩ nda ndequiatio tuchi je. Ũqui mose ra embuchebe ndeje. Dios quia ra embuchebiã ndeje cote.

¹³ Nde fiesta raã mose, “jenyu quiaru serese”, ere chō mbaecha reã je. Ere chō mbia rasi rasi je. Mbia cuatayã je. Mbia resayã je.

¹⁴ Nde fiesta raã naa mose ũqui je, ũqui nda embuchebiã ndeje. Dios quia ra embuchebe ndeje, Dios quiatio quera si mose. Ũqui mose ra ndeya tuchi, i que Jesús fiestacha je ra.

Ererecua quiaru mbaecha reã ndese

¹⁵ Ũqui andu mose que emo ñee Jesús je ra. —Ababi tuchi siqui Dios rese ae ererecua tuchi mose, i que emo ñee Jesús je ra.

¹⁶ Jesús que ñee ee ra. —Sã emo fiesta raã no. “Jenyu quiaru serese”, i sacua mbia tubiriã je. Mbia chiurã ngue esaã tuchi ra.

¹⁷ Echiurã quiche ja mose que ngũimba mo mondo cote ra. “Ae je acheē, sã ecuaē quiaru cote”, i que ngũimba je ra.

¹⁸ “Ateē. Aso eã nda se. Serecoteâte chōchĩ”, i ja ja que ra. “Ibi mo ngue aisi ramote ra. Taso rã erea”, i que emo ucheē mondo fiestacha je ra.

¹⁹ “Ticuasū mo ngue aisi ramote ra. Cinco yuntas. Taso rã erea”, i que emo ucheē mondo no nda.

²⁰ “Seninisirã mo areco ramote co. Nyebe ra asoã quiaru nderese huee”, i que emo ee no nda.

²¹ Erimba que tu nyebi ñee nguerecua je ra. “Erecoteã ja jate que ra. Quiaru eã nda nderese”, i que erimba embiirandu ja ra. Ererecua que paama i ra. Ngaē eã mose erea. Ae ñeembe nguia ngũimba je. “Eso ñee ũqui je quiatu no. Mbaecha reã je. Mbia rasi rasi je. Mbia cuatayã je. Mbia resayã je. Ũqui ja je echeē. Sã ecuaē quiaru serese”, i que ererecua ra.

²² Emo mose jiri que erimba ru ñee nyebi ee ra. “Acheẽ ñee ja que ee ra. Co euaẽ ndaque nguiã co. Mbia mĩte que ra”, i que erimba ñee fiestacha je ra.

²³ Ererecua que ñeembe ee ra. “Esobe ñee ñee emo je no. Eru ja sechuchua. Quiaru sacua serese. Fnda sechuchua mbiitãya jiri.

²⁴ Ae je acheẽ nyii, ũqui nda quiaruã tuchi serese cote”, i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriã ngue siqui quia Jesús rui ra. Jesús que uba ñee ee ra.

²⁶—Ae nyesequa tuchi quia ngu rese sesi, ũqui nda serimba eã. Ae nyesequa tuchi quia usi rese sesi, ũqui nda serimba eã no. Ak nyesequa tuchi quia ngüinisi rese sesi, ũqui nda serimba eã no. Ae nyesequa tuchi quia ngüirĩ ndese sesi, ũqui nda serimba eã no. Ae nyesequa tuchi quia ngõngue ndese sesi, ũqui nda serimba eã no. Ae nyesequa tuchi quia ngueco rese sesi, ũqui nda serimba eã no. Ũqui ja ra serimba eã.

²⁷ Ae mano sereãte seriĩ, ũqui nda serimba eã no. Ae siqui sereãte quia serui, ũqui nda serimba eã no.

²⁸ Sã emo ñee no. “Sechuchua tasaã na”, i. “¿Manya mbae isiquia ra amumba sechuchua raã sacua nde?” i nyii eao nonde.

²⁹ Sã uchuchua raã naa ndaque no. Hhuaẽ tiquia tiquia raque. Hui bei chõ esi cote. Hue mbia iquia iquia ee cote.

³⁰ “Co uchuchua saã saã ndei cose. Saã ja eã mbei chõchĩ nae”, i ra mbia iquia iquia ee.

³¹ Sã soldados rerecua icua icua emo je no. Guerra raã serĩ ee. Guerra raã nonde ra ndua ndua. “Ae quiatu que soldados tubiriãte embae sesi ra”, i uchiangui re cote.

³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. “¡Nandeico turã ño nyiese jê!” i ee.

³³ ¡Eĩ jenyee si chõ nguia jê! Jendua rã nguia nyii. Jê jembae recha ja eã mose, serimbarã eã nda jê.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicua tuchi cote.

³⁵ Ñio ye echã aronea cote. Eicuãte cote. Emombo bei chõ cote. Ae eisate riqui, secheẽ jeñandu, i que Jesús ra.

15

Oveja quiachã je

¹ Mbia icua ngue Jesús siçhã nguia ra. Ae impuestos isi isi quia, ũqui abe que Jesús siçhã nguia ra. Echeẽ andu sacua.

² Nyebe fariseos ñee icua icua nguiã Jesús riĩ. Embesasa abe ñee icua icua nguiã eriĩ no. —¿Mbaerã Jesús riqui mbia icua isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra.

³ Nyebe Jesús ñee nguiã ee. Embaaquiatu sacua.

⁴—Sã emo nimba quiachã oveja no. Cien ndei erimba. Co mi ngue quiachã ee ra. Aque esi quia quiachã je requia aque. Eataque recha. Noventa y nueve recha.

⁵ Quiachã je rea mose, sui cote. Equiaama cote. Eya tuchi erese cote.

⁶ Tu uchuchua cote. “Quiatuchu rã”, i uquiato je cote. Nguesenda je abe no. “Quiachã je que atea cote ra. ¡Sã jê! Jêya tuchi serese cote”, i que uquiato je ra.

⁷ Tacheẽ nyecua jêje. Quiachã je mo nyebi mose, Dios iate riqui co. Mbia icuã tu mose ee, Dios iate riqui erese co. Ae uturã saã saã nguia nae, ae huicua secha sereãte quia nae, uqui ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque mii quiachã ndaque ee no. Lamparina ngue emendi eresae sacua nda. Sã uchuchua tii no. Mbae isiquia rea chee.

⁹ Ereare que ñee uquiato ja je ra. “Quiachã je que atea cote ra. ¡Sã jê! Jêya tuchi serese cote, i que uquiato je ra.

¹⁰ Aico ñee nyecua jêje a. Mbia mo hui mose huicua si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. —Sã amei mo eririĩ nyeremo no.

¹² Eriiriĩ ndiqui que ñee ngu je ra. “Paba, mbae isiquia ataque embu rã se sembaerã. Ndemano nonde”, i que ñee ngu je ra. Ae eru mbae isiquia mbuchecha nguiã ee. Mondo eo cotê.

¹³ Isamami nongue que eririĩ nduinda umbae rerecoquiato ra. Ae oso nguiã isho cote. Ngu recha. Huee que mbae isiquia umbae mumba chooño ja ra. Mbae icuã ndibishorõ.

¹⁴ Hue jenda mbia chiũ que uate cote ra. Amei ndiriĩ abe riãcuã nyee que ra. Umbae mumba chooño jare.

¹⁵ “Taguieĩ quieĩ rã oso ererecua mo je”, i chee. “Teasu socoĩ esaarõ na serimba”, i chee ererecua mo ee.

¹⁶ “Teasu chiũ au chõ mbichĩ ira a. Seriãcuã tuchichĩ”, i chee amei ndiriĩ. Emo ngue embuquiãruã mbei ra.

¹⁷ “Paba rimba chichĩ quiaru turãte sechuchua huee, seriãcuã mose aa.

¹⁸ Tasobe rei Paba rea. Tacheẽ ndei oso ee. ‘Seicuã tuchite que ndeje curi ra, Paba. Paba ibatenda je abe no.

¹⁹ Seririĩ ere eã seje cote. Nderimbarã taico cote’, tae rã oso Paba je”, i que ndua ndua uchiãngui re cote ra.

²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiiriĩ ndese oo ra. Equiaama. Eriti riite no.

²¹ Ngu je que eririĩ ñee ndei cote ra. “Seicuã tuchite que ndeje curi ra, Paba. Paba ibatenda je abe no. Seririĩ ere eã seje cote”, i rei que ngu je ra.

²² Eru que ñee ngũimba je cote ra. “Eirao turã mo emondo seriiriĩ je. Eiyaorã abe mo emingue ee. Anillo mo abe emingue eo rese.

²³ Ticuasũ quira mo jêquishĩ echo je. Nandequiaru tuchi erese. Fiesta nandesã ee.

²⁴ Seririĩ ngue mano naanguia oso curi resê. A eru quera si raanguia seje a. Quiachã tuchi que oso serecha ra. A erube seje a cotê”, i que amei ngũimba je ñee nda. Eya tuchi cote. Nyebe fiesta raã nguiã nguiiriĩ je.

²⁵ Amei ndiriĩ nongue que siqui úcoo ra. Ngasê ndaque u quia uchuchúaa cote. Tõotõ i que echandu ra. Mbia cheĩ cururi abe andu.

²⁶ Ñee ngue erimba mo je ra. “¿Mbaerã eriqui toõtõ i re? ¿Mbaerã mbia riqui nyuruqui re?” i que amei ndiriĩ ndiqui ra.

²⁷ Erimba que ñee ee ra. “Ndenongue que tu ngasẽ nderu je ra. Nyebe ticuasú iquia nguiã ee”, i que erimba ñee ee ra.

²⁸ Ae enongue paama i nguiã ngu je. Ique sereã nea ngu chuchúaa. Ae eru tu nguiã usẽ ñee ee taicuee. “Eique rá mae ndenongue rese”, i rei que eru ee ra.

²⁹ Eriirĩ ngue ñee ngu je ra. “Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacua sequiato rese.

³⁰ Ae tu ramo nderiirĩ, ¿mbaerã ticuasú mo ereiquia ee re? Umbae que emumba choõño oso curi resẽ. Siqui siqui cuña icuã ndese. ¿Mbaerã ereico fiesta raã ee re?” i que eriirĩ ngu je ra.

³¹ Eru que ñee echeẽ mose ra. “A ereico beite serese a resẽ, Echo. Sembae ja chõ nembraerã ndesẽ.

³² Ndenongue quiatu que quiachã nandesí resẽ. Mano naanguia oso nandesí. A eru sí quera raanguia nande je a. Nyebe fiesta nandesã ee. Nandeya tuchi rá erese”, i que eru nguiirĩ nongue je ra, i que Jesús mbia je ra.

16

Ererecua rimba mo icoquiatu

¹ Jesús que ñee uchimbaaquiatu je ra. —Sã ererecua mo mbaechate riqui no. Erimba mo ngue embae saarõ ja quia ra. “Nderimba que nembrae mbuquiachã quiachã nguiã ra”, i que mbia mo ererecua mbiirandu cote ra.

² Ererecua que ñee ee ra. “¿Mbaerã mbia riqui ñee nderiĩ seje re? ¡Cuentas esaã saã mbia mbae ja jê! Sembae raarõsa eã nda nde cote”, i que ererecua ngũimba je ra.

³ Erimba que ndua ndua uchiangui re cote ra. “¿Mañi ae ra sequia sererecua se mombo mose re? Sequirãcuã neate quiei quiei sacua ndesẽ. Seireite ache ache i mbia je.

⁴ Ũqui ño nda asaã ee nda. † nda mbia seisi turã uchuchúaa sembae eã mose”, i que erimba uchiangui re ra.

⁵ Ae deber i quia ererecua je, ũqui je que erimba ñee nda. Co mii mii je. “¿Manya deber ere sererecua je re?” i que erimba emo je ra.

⁶ “Cien latas de aceite que deber ae ee ra”, i que erimba je ra. Erimba que ñee ee ra. “Nembrae cuenta nandemombo chõ. Emo nandesã asi. Cien eã nda cote. Cincuenta achõ ño nda cote”, i que erimba ee ra.

⁷ Ae deber i quia ererecua je, ũqui mo je que erimba ñee no nda. “¿Manya deber ere sererecua je re?” i ee. “Cien bolsas de trigo que deber ae ee ra”, i que erimba je ra. Erimba que ñee ee ra. “Nembrae cuenta nandemombo chõ. Emo nandesã asi. Cien eã nda cote. Ochenta achõ ño nda cote”, i que erimba ñee ee ra.

⁸ Ererecua que jirandu erese cote ra. “Serimba aracua chõ eriquichĩ nde no”, i que ererecua ra. Mbia ibi jenda aracua tuchi chõchĩ Dios quiato sí.

⁹ Acheẽ tuchi quia jêje co. ¡Mbae isiquia jemondo mondo quia ibatenda je jê! Eĩ nda jêquiato jiri. Eĩ nda Dios jëisi quiatu turã ibate jembrae ua mose. Huee ra jëingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguiã. Ae mbae ñetẽ saarõ turã eãte quia, mbae tubiriã abe ra esaarõ turãya nguiã no.

¹¹ Jê jembrae mondo turã eã mose Dios je, Dios ra mbae turã mondo eã jêje ibate.

12 Jē Dios mbae raarō turã eã mose, ¿aba quia ra mbae mondo jēje jembraerã tuchi cote re?

13 Co mī erimba siqui aronea ererecua nyeremo ndese. Ererecua nyeremo mose, huee ra erimba nguerecua nongue ucuãyã. Ererecua nongue ra ebite. Ae ndua beite quia mbae isiquia rese nae, ũquī siqui aroneate Dios rese. Ae siqui beite quia Dios rese nae, ũquī ndei ndua eã jiri mbae isiquia rese, i que Jesús ra.

14 Fariseos que chi Jesús cheẽ andu ja ra. Mbae isiquia quiato tuchi que ũquī nda. Nyebe ñee icuã nguiã Jesús cheẽ mose.

15 Nyebe Jesús ñee asite nguiã ũquī je. —Jē nguiarei jēturã jembuchecua tuchi mbia résaa. Dios quiarei jeñiangui renda icua tuchi quia co. Ae eturã abareãte riqui mbia je nae, ũquī Dios ucuãyãte quia co.

Dios cheẽ nda io ja

16 Moisés chimbesa que mbia mbaaquiato quiato nyii ra. Dios cheẽ mbuchecuasa chimbesa abe que mbia mbaaquiato quiato nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguiã ñee. “Dios rimba ra se”, i tuchi mbia quia ã cote.

17 Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja rae.

Eicuãte ngũinisi mombo mose

18 Mbã ngũinisi mombo mose, ngũinisirã mo nderequia mose, eicuã tuchi ũquī. Adulterio, i que ũquī je ra. Ae eru mombo, emo aque rerequia mose, eicuãte ũquī abe no.

Mbaecha mo oso tata cuasu

19 Sã mbaecha tuchi mo ndiqui no. Huĩrao turã mingue mingue bei. Huĩrao nininya mingue mingue bei. Fiesta que esaã saã mbei quia ra. Umbae mbae isiquia mumba chooño mbae rese.

20 Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chí mbei ngoi ra. Mbaecha chuchua taronda jii.

21 Lázaro riãcuã ngue ñee mbei quia ra. “Mbaecha chiu rire nda au rã ña”, i tuchi que equia uchiangui re ra. Ñooñoõ ngue ngaẽ ngaẽ nguia erete reechu rere rere ra.

22 Lázaro mbaecha reã ngue mano cote ra. Angeles que equerao mbae turãsa Abraham ndea ra. Mbaecha abe que mano nda. Mbã que echati ra.

23 Mbaecha que oso tata cuasu cote ra. Isho que mae Abraham ndese ra. Lázaro abe.

24 Sã ñeemombo mombo Abraham je no. “Paba Abraham, ndeya eã jiri serese ae. Serasite aico tata réndii a. Lázaro embu rã. Sã o mbia rã i je sechuru mbia sacuã”, i rei que mbaecha ñeemombo Abraham je ra.

25 Abraham ngue ñee ee cote ra. “Mbae tubiriãte que nembae nyii resẽ. Lázaro quiatu que mbae rasi saã tuchi quia nyii ra. A eriqui turãte a cote, nde nderasi rasi mose cote.

26 A jenda mo oso aroneate erasa ndeje hue. Hue jenda abe tu aroneate erasa ure je aa no”, i que Abraham mbaecha je ra.

27 Mbaecha que ñeemombobe Abraham je ra. “Lázaro chõ emondo Paba chuchúaa no, Abraham.

²⁸ Hue senongue cinco chi hue. Sã Lázaro si ñee ee. Embiirandu. ƒnda ecuaẽ eã mbae rasi raã a”, i rei que mbaechea ñee Abraham je ra.

²⁹ Abraham ngue ñee ee ra. “Ndenongue Moisés chimbesa rerequia hue. Dios cheẽ mbuchecuasa cheẽ abe rerequia hue no. Sã ũquí mumbayã”, i que Abraham ee ra.

³⁰ Mbaechea que ñeembe Abraham je ra. “Embesa ji rerequia raque. Mano je oso mose ñee ee, aque cheẽ nguia ra emumbayã cote. Hũicuã nda esecha cote”, i rei que mbaechea ñee Abraham je ra.

³¹ Abraham ngue ñee ee ra. “Ndenongue Moisés chimbesa mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no”, i que Abraham ñee mbaechea je ra, i que Jesús ra.

17

Mbae icuã nda nandesã uquiachĩ emo je

¹ Jesús que ñee uchimbaaquiato je ra. —Mbae icuã nguiarei sigui bei tuchi mbia mbĩcuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquí nde. Ae “mbae icuã esaã” i nae, ũquí nda mbae rasi saã tuchi cote.

² Ae ra mbae icuã saã uquia seicuasa mo je nae, ũquí nda mbae rasi saã tuchi cote. ũquí nda aba mombo chõ ama ndisa ye nyii re chã. Sita resebe ecua ji mondo. ƒnda mbae icuã naa uquia eãte rei seicuasa je.

³ ¡jẽingo chooñoa ño nguia jẽ! Nderesenda icuã mose ndeje, echeẽ ño ee. “Nandeico turã ño”, ere ee. Hui mose huĩcuã si, eicuã si etesarei chõ nde.

⁴ Sã nderesenda mbae icuã naa naa siete veces ndeje no. Sã ñee ndaque siete veces ndeje no. “Mbae icuã nda asaã eã ndeje cote”, sã i raque ndeje no. Eicuã si etesarei chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbaaquiato que ñee ee ra. —Dios eicua tuchi rã ure je, i que ñee Jesús je ra.

⁶ Jesús que ñee ee ra. —Jẽ Dios icua jiri mose, ƒnda mbae mo jeñee mumbayãte rei. ƒnda jeñee ndei ira je. “Nde ae echisiqui. Nde ae si echitiquia ama ndisha ite re”, i ira je. ƒnda ira jeñee mumbayãte rei, jẽ Dios icua jiri mose.

Dios rimbachõ ño nande re, jenyẽ chõ nguia

⁷ Sã emo nimba mo ndiqui bei turuquia rĩ ticuasu raarõ arõ no. Ecuasẽ mose tuchúaa, ¿mañi nda ererecua ñee jei ee re? “Equiaru rã”, i jei ee re.

⁸ Tei. I jei eã nda ee. “Sechiurã esaã naa seje. Sequiaru eteaquiato rã nyii. Aquere quia terequiaru nde”, i chõ nda ererecua ee.

⁹ Ererecua ra gracias i eã ngũimba je. Erimbachõ ño ñene.

¹⁰ Eĩ si chõ jẽ no nde. Dios rimbachõ ño jẽ no nde. Ae rĩ Dios riqui ñee jẽje, ũquí naa ja mose, ¡jẽingo mingue chõ nguia ee jẽ! “Ae rĩ Dios ñee nande je nae, ũquí mĩ ño ngue nandesã nda. Erimbachõ ño nande re”, jenyẽ chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue écoi quia ra. Samaria rĩ abe que écoi quia ra.

12 Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ũquĩ mbia rasi je ra. Erasi que chi icũe isho jiri Jesús si ra.

13 Ũquĩ mbia rasi que ñeemombo mombo Jesús je ra. —¡Jesús! ¡Mbia mbaaquiatusa! Urembucherõ na ae, i que ñeemombo mombo ee ra.

14 Jesús que mae erese cote ra. Ñee ngue ee ra. —Eno. Jẽso jendete reacuquia sacerdotes je, i que Jesús ee ra. Ecuata mose chõ ngue nyerõ ja ra.

15 Ucherõ ndese mae mose que co mĩ ndu nyebi ñee Jesús je ra. Eya tuchi que ñeemombo mombo Dios rĩĩ nda.

16 Ngoi que ngũĩã ndese Jesús resa quitu ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra.

17 Jesús que ñee nda. —Eatate que ambucherõ. ¿Ma eataque ma nde? ¿Ma nueve ma nde? Nyebiã ñochĩ ecuaẽ gracias i seje.

18 Co mĩ tuchi chõ tuchi nyebi gracias i Dios je co. Judío eã ndaque, i que Jesús ra.

19 Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguiã, i que Jesús ee ra.

Mbia chiangui re quiatu Dios riqui nguiã mbia rerecurarã

20 —¿Manosete ra Dios ru íbii mbia rerecurarã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese.

21 “¡Aa chõ Dios riqui mbia rerecurarã jẽ!” iã ndae. “¡Pee chõ Dios riqui mbia rerecurarã jẽ!” iã nda eno. Mbia chiangui re quiatu Dios riqui nguiã mbia rerecurarã, i que Jesús ra.

22 Jesús que ñee uchĩmbaaquiату je cote ra. —Namo jiri ra jẽ seosei osei setiã mose cote. “Jesús nda siqui mbirĩ na nanderese chã”, jenyere rei nda re.

23 “Hue Cristo riqui hue”, ichõĩño nda mbia jẽje serĩ. “Pe eriqui pe”, ichõĩño nda jẽje no. “Nya” jenyechĩ nda ee jẽ. Ñeeñoño ndae.

24 Sechecuayã ngui ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mumae ja.

25 Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ũquĩ nda seririrõ tuchi rã.

26 Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no.

27 Sã Noé mosenda mbia quiaru chooño no. Ndua rocoĩ Dios rese. Sã ngũinisirã nderequia chooño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuasú tu cote no. Sã mbia mano ja no.

28 Sã Lot mosenda abe mbia no. Sã quiaru chooño no. Sã mbae isi isi chooño no. Sã mbae eĩ tiquia chooño no. Sã uchucharã naa ñooño no. Sã mbae raã ñooño no. Ndua rocoĩ Dios rese no.

29 Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aqúe mose no.

30 Eĩ si ra mbia mbae raã ñooño. Seru mose chee. Ndua rocoĩ serese.

31 Emo siqui mose taicuee se tu mose, ique eã nda uchuchua umbae rerecoquiату. Ae siqui úcoo, nyebiã nda u uchuchua no.

32 ¡Lot ninisi rã nda jẽingochĩ jẽ!

³³ Ae ngueteãte quia ñgüeco rese nae, ereco ra quiachã esi. Ae ngueteã eãte quia ñgüeco rese nae, aqúe reco quia ra quiachãyã esi.

³⁴ Sechu mose, aqúe isa ra nyeremo chí uqúe quisa ye. Co mii nda arao. Enongue ra siquichõ.

³⁵ Cuña nyeremo nda chí mbua tocho no. Co mii nda arao. Enongue ra siquichõ no.

³⁶ Mbia nyeremo nda chí úcoo no. Co mii nda arao. Enongue ra siquichõ no, i que Jesús ra.

³⁷ —¿Mangue ra ñquĩ mangue re, Jesús? i que echimbaaquiatu ra. Jesús que ñeembe ee ra. —Ae rĩ mbae raaqúe riqui chí nae, huee ra urubu choi ja tuchi, i que Jesús ra.

18

Eru cheecha ñee chíbe ibe ererecua mo je

¹ Jesús que ñee uchimbaaquiatu je ra. —Sã mbia riqui ñee mbei Dios je. Sã tesareia mbei ñee Dios je.

²⁻³ Sã eru cheecha mo ndiqui no. Oso chíbe ibe ñee ererecua je no. “Ae sembae quereco nae, sã aqúe sembae meembe seje”, i chíbe ibe ererecua je. Dios quiatoã ndaque ererecua. Mbia quiato biãte raque aqúe ererecua.

⁴⁻⁵ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. “Ari riqui ñee chíbe ibe tuchi chí seje co. Echeẽ tamumbayã na”, i chee que ererecua ra, i que Jesús ñee uchimbaaquiatu je ra.

⁶ Ñeembe que ee ra. —Sã ererecua ari cheẽ mumbayã nyee no. Ererecua icuãte raque.

⁷ Eĩ nda Dios uquiato cheẽ mumbayã no. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuãyãsa rĩsu isu raque co.

⁸ Dios ra uquiato cheẽ mumbayã nyee cote. Se tube mose íbii manya sequiatio ra chí bei ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ñgue chí Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguiã ñquĩ je.

¹⁰ —Sã mbia nyeremo nyoĩ ique Dios chuchua no. Ñee Dios je no. Co mii ñgue fariseo ra. Enongue que impuestos isi isi quia ererecua mbaerã nda. Mbia mbĩrĩ irĩsa que ae ra.

¹¹ Fariseo que ñee ndei Dios je ra. “Dios, seturãte se. Mbia icuã na eã ño se re. Co mbia mbĩrĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia ambĩrĩ irĩ ãte quia co.

¹² Aquiaruã mocoĩte quia ndua bei nderese co. Diezmos amee mee mbeite quia ndeje co”, i rei que fariseo ñee Dios je ra.

¹³ Aba mbĩrĩ irĩsa que chí isho ra. Uãquĩ ñgue embucheseo ibi quiti ra. Uchiã ñgue eisi ñee Dios je ra. “Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchi chí seicuã ndese”, i que ñee Dios je ra.

¹⁴ Tacheẽ nyecua rã jêje. Dios que aba mbĩrĩ irĩsa cheẽ isi turã nda. Ico mingüete quiatu nguiã ñee ñee Dios je. Fariseo quiatu ñgue uturã saã saã mbeite nguiã ñee Dios je. Nyebe Dios echeẽ ñanuate nguiã. Ae ucuasu saã saã

nguia nae, ũquí nda Dios isiâte. Ae ico tochei quia Dios je, ũquí nguiatu ra Dios isi, i que Jesús ra.

Jesús mbia riirĩ isi turã turã

15 Mbia que nguiirĩ ngurucuaẽ cuaẽ nguia Jesús je ra. Jesús oco oco sacuaẽ erese. —¿Mbaerã jendiirĩ jendu quia co re? i rei que Jesús chimbaaquiato ñee mbia je ra.

16 Jesús quiatu que ñee nda. —Tei. Jêsecha. Sã nguiirĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã.

17 Mbia riirĩ na ño jêingo Dios isi turã. Eĩ jenyese mose, Dios rimba tuchi ra jê cote, i que Jesús ra.

Acuanĩndu mbaecha mo ñee Jesús je

18 Ererecua mo ngue ñee Jesús je ra. —Mbia mbaaquiatusa turãte nde. ¿Mañi ae ra se siqui bei nonde ibate re? i que ererecua ñee Jesús je ra.

19 Jesús que ñee ee ra. —¿Mbaerã ereico eturã i seje re? Dios mii ño eturã ndesẽ.

20 Dios cheẽ ereicuate resẽ: “Emo ninisi rese ra ereicochĩ. Mbia mo nda ereiquiachĩ no. Mbae ra erembuquiachãchĩ. Erecheẽ ñooñoichĩ nda emo nã. Ndeturã ño nderu je. Ndeturã ño ndesi abe je”, i que Dios cheẽ nda, i que Jesús ñee ererecua je ra.

21 Ererecua que ñee ndei Jesús je ra. —Ũquí ngue amumbayã ja bei quia ra. Señetẽ mosenda bei, i rei que ererecua ra.

22 Jesús eandu mose que ñee ee ra. —Mbae mii mo abe eresaã eãte. ã abe esaã. Nembae emondo mondo ja mbia mbaecha reã je. Nde ũquí naa mose, mbae tubiriã nda nde, ndeico mose ibate. Nembae mondo ja mose mbaecha reã je, serui eico cote, i que Jesús ee ra.

23 Ererecua Jesús cheẽ andu mose que echosoi oso serĩte cote ra. Mbaecha tuchite quiatu ngue ae re.

24 Jesús que mae mbaecha ia eã ndese ra. Ñee ngue mbia je cote ra. —Mbaranguiatu ãte mbaecha je ngasẽ sacuaẽ ibate Dios rese.

25 Sã ticuasú mo ndiqui oso aroneate aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra.

26 —¿Aba quia ra oso Dios rea re no? i que mbia Jesús je cote ra.

27 Jesús que ñee ee ra. —Ae mbia saã aroneãte quia nae, Dios mii ño nda esaã, i que Jesús ee ra.

28 Pedro que ñee Jesús je ra. —Ure que urembae uresecha ja ra. Siqui sacuaẽ nderui, i que Pedro ee ra.

29 Jesús que ñee ee ra. —Emo umbae recha ja mose Dios rĩ, Dios ra esibishorõ tuchi ee. Ae uchuchua secha. Ae ngu secha. Ae usi secha. Ae ngõngue secha. Ae ngũinisi secha. Ae nguiirĩ secha.

30 Ũquí mbae ja ra Dios sibishorõ tuchi. Ibii mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

31 Jesús que ñee icúee uchimbaaquiato doce je ra. —Co nandeso quia Jerusalén co. Ae Dios cheẽ mbuchecuasa mbesa mbesa quia serĩ nyii nae, ũquí nda io ja cote.

32 Mbia ra semee judíos eã je cote. Mbia ra secheẽ naa naa. Ñee icua tuchi ra seje. Ñinimbu nimbu ra serese.

³³ Seiruã nua ndae. Seiquia ra cote. Tres nyaashĩ mose ra aquera si, i que ñee ee ra.

³⁴ Echimbaaquiatsu que echeẽ icuayãte ra. —¿Mbae rĩĩ eriqui ñee nande je re? i que nyue ra.

Jesús eresayã mo mbucherõ Jericoo

³⁵ Jesús Jericó rurubi mose que eresayã mo ndiqui ee ra. Ñeenda jie que eñi ache i mbia je ra.

³⁶ Eresayã ngue mbia tubiriã quicoi chandu ra. —¿Mbae ere? i que eresayã emo je ra.

³⁷ —Co Jesús coi quia co. Nazaret jenda coi quia co, i que emo eresayã je ra.

³⁸ Eresayã ngue ñee mombo ra. —¡Jesús! ¡David rucucha! ¡Ndeya eã ño serese jê! i que eresayã ñee Jesús je ra.

³⁹ Ae rane nyoĩ quia, ùquĩ ngue ñee ndei eresayã je ra. —¡Equiriri chõ jê! i rei que ee ra. —Jesús, indeya eã ño serese jê! i bei bei que Jesús je ra.

⁴⁰ Jesús que tiba cote ra. —Eresayã jendu rã, i que mbia je ra. Eresayã ngue oso Jesús rĩichã cote ra.

⁴¹ —¿Mañi ae ra ndeje re? i que Jesús ñee ee ra. —Seresa embuturã na, Sererecua, i que eresayã nda.

⁴² Jesús que ñee ee ra. —Nderesa que cote ra. Seicuate quiatsu ngue se re. Nybe arembucherõ nguiã, i que Jesús ee ra.

⁴³ Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã turã tuchi que equia Dios rĩĩ cote ra. Ae mae erese nae, ùquĩ abe que ñee turã ja quia Dios je cote ra.

19

Taico nderese, i Zaqueo Jesús je

¹ Jesús que ngasẽ Jericoo cote ra. Sucha tubiriã ite rĩĩ ngue esi quia ra.

² Mbia mbaecha mo ngue siqui ee huee ra. Zaqueo, i que ee ra. Aba mbiĩrĩ iĩrsa que ae ra. Impuestos isi isiquia rerecua que ae ra.

³ —Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nybe mae aroneate nguiã Jesús rese.

⁴ Zaqueo que oso uchã Jesús nonde ra. Nyui que oso ira mo ñi nda. Jesús ucu rëse mae sacua.

⁵ Jesús que ngasẽ Zaqueoqui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra.

⁶ Zaqueo que nguichi asi u cote ra. Eyate que Jesús rerao uchuchúaa ra.

⁷ Mbia que ñee ñee tuchi Jesús rĩĩ cote ra. —¿Mbaerã Jesús si quia mbia icuã nyuchúaa aque re? i tuchi que mbia ñee nda.

⁸ Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite rĩĩ mondo sacua mbia mbaecha reã je. Ae asirõ ñooño mbia si nae, ùquĩ tambuchebibe ee. Eata tambuchebibe ee, cuatro veces, i que Zaqueo Jesús je ra.

⁹ Jesús que ñee ee cote ra. —Arerirõ ngue mbae icuã si namo nda. Judiate quiatsu nde re.

¹⁰ Quiachã je requia chõ achu nguiã ibate si co. Quiachã je mingo bei sacua abe chõ achu nguiã ibate si co no, i que Jesús ra.

Mbae isiquia jembaata, i ererecua ngũimba je

11 Mbia que Jesús cheê ñandu turã nguia ra. Jerusalén ndurubite que echoi quia ra. —Mbia rerecuarã ja ra Jesús cote reae, i rei que mbia quia ndua ndua ra. Nyebe Jesús ñee nguia ee.

12 —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote.

13 Sã ñee ja nguimba je oso nonde no. Diez rei erimba. Mbae isiquia atate que embuchao chao nguimba je ra. “Ã mbae isiquia jembaata ata oso quia. Sechu mose chee”, i que nguimba je ra.

14 Sã hue jenda mbia aque ucuâyãte no. Comisión ngue emondo ra. “Aque urebiãte urererecuarã”, i rei que comisión mondo ra.

15 Gobierno ngue emi mbei chõ ererecuarã nda. Nyebe uba bei u nguia uchuchua cote. Nguimba je que ñee cote ra. Uqui diez. Ae je eriqui mbae isiquia mondo nae, uqui. “¿Sechimee mbae isiquia jembaata ata rei re?” i jaaja que nguimba je ra.

16 Erimba mo ngue ñee ee ra. “Ae. Aque mi ngue ereme ndei seje nyii, ambaatate que se cote ra. Diez que cote ra”, i que nguerecua je ra.

17 Ererecua que ñee ee ra. “Coche ñene. Serimba turãte nde. Mbae ñetẽ ngue eresaã turãte quia secheẽ nguire ra. Nyebe mbae cuaso tamondo ndeje cote. Diez pueblos rerecuarã nda nde cote”, i que ererecua nguimba ñiinda je ra.

18 Erimba nongue que tu ñee ee cote ra. “Aque mi ngue ereme ndei seje nyii, ambaatate que se cote ra. Cinco que cote ra”, i que nguerecua je cote ra.

19 Ererecua que ñee ae abe je no nda. “Eno. Cinco pueblos rerecuarã nda nde cote”, i que aque nguimba je ra.

20 Erimba nongue que tu ñee ee cote ra. “Co nembae mbae isiquia co. Tiru ye que areco bei ra.

21 Sesiquichete quiatu ngue ndesi re. Erequeteãte quiatu nguia mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchõ ño nguia ndeje”, i que aque nguerecua je ra.

22 Ererecua que paama i tuchi ñee ee ra. “Serimba icuã tuchichĩ nde re. Nde sí chõ erecheẽ nguia sembiirandu. ‘Nembae que ambaata eãte ra’, ere chõchĩ. ‘Areco quiatuchõ ño nguia’, ere chõchĩ. Se ngueteã mose mbae rese ndeje ¿mbaerã secheẽ eremumba re?

23 ¿Mbaerã sembae mbae isiquia eremondo eã banco re? I nda ñimbaata jiri rei seje”, i que ererecua ñee asi aque nguimba je ra.

24 Ae chi huee, uqui je que ererecua ñee nda. “Ae sembae quereco chooño nguia nae, jēsirõ nã esi. Ae diez quereco quia nae, aque je jemondo”, i que ererecua ra.

25 Mbia que ñee ererecua je ra. “¿Mbaerã nda re? Eatate ae resẽ. Diez que ae resẽ. ¿Mbaerã nda emo abe eremondo ee re?” i que mbia ñee ererecua je ra.

26 Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirõ ja esi.

27 Seucuâyãsa jendu ja rã. Ae ñee nguia seriĩ. ‘Aque urebiãte urererecuarã’, ae i quia seriĩ. Uqui jendu ja. Uqui jẽiquia ja sésaa”, i que ererecua ra, i que Jesús ñee mbia mbaaquiatu ra.

Jesús ngasẽ Jerusalén

28 Jesús cheê jare que ngata si Jerusalén icha rui ra.

29 Jerusalén ndurubite que echoi ngasẽ nda. Betfagé, i que hue sucha je ra. Betania, i que hue sucha erurubinda je no nda. Ibi ibate abe que chí huee ra.

Monte de los Olivos, i que ee ra. Hue si que uchimbaaquiatsu nyeremo mondo cote ra.

³⁰ —Aichi súchaa chõ jêso rã. Burro riirĩ cuasa ra chĩ jêje hue. Ae ato emo nyui âte. Jenyura seru seje.

³¹ “¿Mbaerã nda jenyura re?” i mose emo jêje, jeñee ee. “Nandererecua que jendu i ra”, jenyee ee, i que Jesús ũquí nyeremo mondo ra.

³² Nyoĩ que súchaa ra. Ae riĩ Jesús ñee ee nae, ũquí ngue nyecua ja ee cote ra.

³³ Burro riirĩ ngue etea ra. Era mose que echa ñee ee ra. —¿Mbaerã jêingo era era re? i que ee ra.

³⁴ Jesús chimbaaquiatsu que ñee ee ra. —Nandererecua que jendu i ra, i que echa je ra.

³⁵ Burro riirĩ ngue ecuruchoi Jesús je cote ra. Echimbaaquiatsu que huĩrao chono ñono burro arõ nda. Mbia que Jesús mbuchui burro ato cote ra.

³⁶ Jesús ngata mose burro ato, mbia que huĩrao mbiitee ee ibi rĩ nda. Jesús nonde. Jesús oso sacua hue rĩ.

³⁷ Jesús quiato tubiriã tuchi que nyoĩ quia erese ra. Monte de los Olivos icha re ngasẽ mose, Jesús quiato que tasẽ tasẽ tuchi ra. Eya tuchi que ra. Ñee mombo mombo turã ngue Dios je cote ra. —Jesús riqui mbia mae sayã naa naa tuchi mbia je co, i que ñee mombo mombo turã Dios je ra.

³⁸ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. Dios turã tuchite nande je, i que mbia ia tuchi ra.

³⁹ Fariseos mo abe que chi huee ra. Ũquí ngue ñee ndei Jesús je ra. —Ndechimbaaquiatsu embaasẽ asẽ eã jiri ae, i rei que Jesús je ra.

⁴⁰ Jesús que ñee ee ra. —Sequiato ñeemombo mombo eã mose serĩ, eĩ ndei ra sita ñeemombo mombo serĩ cote, i que ñee nda.

⁴¹ Jesús que ngasẽ serĩte oso quia Jerusalén cote ra. Sucha checuate que esi quia ee cote ra. Jesús ia eã tuchi que Jerusalén ndese ra. Nyeseo que erese cote ra.

⁴² Jesús que ñee sucha tubiriã je cote ra. Jerusalén je. —Seyayã tuchi aico nderese co, Jerusalén. Mbia mbiassa ereicuayã mbei chõchĩ nguia co. Echecuayã mbei chõ eriquichĩ ndeje co.

⁴³ Mbae rasi ra eresaã tuchi cote. Ndeucuayãsa ra nderiquisã tuchi cote. Nemama nda ecuãe.

⁴⁴ Sucha ra embucoi ja ndeyenda. Sita ra embucoi ja tuchi mbia chuchua si. Mbia ra mano ja ndeyenda cote. Dios quiatsu ngue ereisiã mbeite nguia. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbia mbusẽ Dios chuchua si

⁴⁵ Jesús que oso Dios chuchúaa ra. Huee que mbia riqui mbae isi isi querabe ra. Mbae mondo mundo abe mbae isiquia ribishorõ. Jesús que ũquí mombo ja Dios chuchua si ra.

⁴⁶ Jesús que ñee mbia je ra. —“ ‘Mbia cheẽsa Dios je’, i ra mbia Dios chuchua je”, i que embesa ji ra. Jẽ nguia jêicuã tuchite Dios chuchua je re. Mbae mbuquiachãsa chucharã ño jêsaãte chĩ nguia Dios chuchua je, i que Jesús ũquí je ra.

⁴⁷ Jesús que mbia mbaaquiatsu quiatsu bei quia Dios chuchúaa ra. Ererecua cuabête que mae icuã icuã nguia erese ra. Sacerdote rerecua. Embesasa abe

no. Mbia rerecua ja. Ũquí ererecua ja que ñee ñee nguia nyue ra. —¿Mañi nande ra equia Jesús iquia sacua nde? i que ererecua quia ñee ñee nyue ra.

⁴⁸ Ererecua que Jesús iquia aroneate ra. Mbia tubiriâte quiatu que Jesús chandu quia ra.

20

¿Aba nembu re? i mbia ñee Jesús je

¹ Emo mose que Jesús riqui mbia mbaaquiatu quiatu Dios chuchúaa ra. Ererecua que ngaẽ ja ñee ee ra. Sacerdote rerecua. Embesasa abe no. Amei abe no.

² Ũquí ngue ñee ja Jesús je ra. —¿Mbaerã ereico mbia mbaaquiatu quiatu re? ¿Aba “mbia embaaquiatu quiatu” i ndeje re? i que ererecua ja Jesús je ra.

³ Jesús que ñee ee ra. —Se rane tacheẽ jêje. Se rane preguntar tae jêje.

⁴ ¿Aba ñee Juan je re? “Eso bautizar i mbia je” i ee re. ¿Dios eã ño ere no? Jeñee seje, i que Jesús ee ra.

⁵ Ererecua que ndua ndua ja u ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jẽingoãte erui re no?” i quiare ra nande je.

⁶ Jesús eã ngue embu ra”, nande aroneate no. Mbia ataque ra paama i tuchi nande je. Nandeĩ ei ra sita je. Juan quiato tuchi que mbia, i que ererecua ñee ñee nyue ra.

⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacua, i que ererecua ñee ja ee ra.

⁸ Jesús abe que ñee ee cote ra. —Se abe ra acheẽ eã jêje no. Aba chõ “ã esaã” i seje. Acheẽ eã nda jêje no, i que ererecua je ra.

Uva raarõsa icuã icuã nguerecua je

⁹ Jesús que mbia mbaaquiatu quiatu cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jẽsaarõ”, i emo je no. Sã eriqui oso itõte no.

¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ũquí ngue eisi icuã tuchi ra. Ucuu ucua que erese ra. Eochi que emondo mbuchebi ra.

¹¹ Echa que ngũimba mo mondo rei ereabe no nda. Aque abe que eraarõsa isi icuã no nda. Ucuu ucua que aque abe rese no nda. Eochi que emondo mbuchebi ra.

¹² Echa que emo abe mondo rei ra. Aque abe que eiruã nua mondo mbuchebi no nda.

¹³ Echa ia eãte que ra. “¿Mañi ae ra se re? Seririĩ quiatu tamondo erea cote. Ũquí nda ireĩ ireĩ jiri esi cote reae”, i rei que echa ra.

¹⁴ Uva raarõsa mae mose erese que ñee nyue ra. “iCo eririĩ ndu quia co cote jê! iNandeiquia rei jê! f nda uvas nandembaerã ae cote”, i que ñee nyue ra.

¹⁵ Eraarõsa que eririĩ querao pe jiri eiquia ra. Eriiriĩ ngue mano cote ra. ¿Mañi nda echa quia eraarõsa je cote re?

¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacua, i que Jesús mbia je ra. —¿Ũquí nda iquechĩ jê! i que mbia ra.

¹⁷ Jesús que mae erese ñee ee cote ra. —¿Ã embesa ji rese jemae ãte re? Sã emo ndiqui tuchua ao sita je no.

Sã sita mo ndirirõ mombo no.

Eicuãte eriqui reĩ nguia ee.

Aquere Dios emundua si erese.

“Earonda sacua turambi chõ eriqui re”, i ndua si uchimombo rese.

Sã uchimombo rirõ si cote no,
i que embesa ji ra.

¹⁸ Ae ra nyoï ngoï aque sita arõ nae, ùqui nda huẽ. Aque sita ngoï mose emo arõ, ùqui nda mano, i que Jesús ra. —Aque sita rã ndei se, i chõ ngue re.

¿Impuestos ra uremee ererecua je re? i mbia ñee Jesús je

¹⁹ —Nanderiñ ño Jesús riqui nguiã ñee a. Nandeisi rei serao jẽ, i rei que sacerdotes rerecua ñee nyue ra. Embesasa abe no. Ûqui ngue paama i ja Jesús je ra. Jesús isi aronea tuchite que mbia résaa ra. Eireíte quiatu ngue mbia tubiriã si re.

²⁰ Ererecua que mbia icuã mundo mundo quia Jesús cheẽ andu andu ra. —jẽturã jësaã saã oso Jesús je jẽ! ¡Echeẽ ndese jenyiisaquia quiatu ure je jẽ! Mbae mo nii ñee icuã mose, jnandeisi rei jẽ! Ererecua tuchi je nandemondo cote, i ja que ererecua ñee nda.

²¹ Ae chi uturã naa naate Jesús je nae, ùqui ngue ñee ee ra. —Jesús, co ereico mbia mbaaquiату quiatu turâte co. Mbja jaje ndeturâte riqui co. Mbja erembaaquiату quiatu turâte quia Dios icha rñ co.

²² Nyebe ureico nguiã ñee ndeje a. ¿Coche mbia mbae isiquia mee mee mose Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra.

²³ Jesús que ùqui icuã icuate ra. Nyebe ñee nguiã ee. —¿Mbaerã jëingo “i nda Jesús ucheẽ nyabi”, i seje re?

²⁴ Mbae isiquia mo jëteacuquia imbu seje. ¿Aba mbae nombre ñi mbae isiquia rese a re? ¿Aba ãqui aingue abe ñi a re? i que Jesús ee ra. —Romano nderecua, i que ñee Jesús je ra.

²⁵ Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee, i que Jesús ee ra.

²⁶ Jesús que ucheẽ nyabi aroneate ee ra. Ûqui ngue nyuruira jate u Jesús cheẽ andu ra. Nyebe eriqui ñee eã ee cote.

Mbia raaque ra quera si, i Jesús

²⁷ —Mbja raaque ra quera eã mbei, i que mbiamo nguia ñee nda. Saduceos i que ùqui je ra. Ûqui mo ngue nyoï ñee Jesús je ra.

²⁸ —Ã ngue Moisés mbesa nande je ra: “Emo eriiriã mano mose, ngūinisi recha mose, sã enongue mano je ninisi rerequia. Sã tiirĩ ngõngue raaque rñ”, i que Moisés embesa nande je ra.

²⁹ Sã eriqui mo ndiqui no. Eribi que seis ra. Eriqui que ngūinisirã quereco rei ra. Mano ño ngue tiirĩ ndocoĩ ngūinisi recha ra.

³⁰ Enongue que nguiqui cheecha quereco rei cote ra. Ae abe que mano ño tiirĩ ndocoĩ no nda.

³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ûqui seis ja que ngõngue cheecha quereco ja rei ra. Mano ja tuchi chõ ngue tiirĩ ndocoĩ no nda.

³² Eninisi eru cheecha abe que mano ño nyee cote ra.

³³ Siete que eru nyii resẽ. Mbja raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbja riqui nguiã ngūinisi rerequia querabe. Siqui mose íbii.

³⁵ Ae raaque ra Dios mbuquera si nae, ae ra Dios mingo bei nyiese nae, ũquĩ nda ngũinisi quereco eã mbei huee cote. Ũquĩ nda ngu quereco eã mbei huee cote no.

³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riiri tuchi ra eriqui huee mose cote. Embuquerá quiatu ra cote.

³⁷ Moisés abe que mbia mbiirandu ra. “Mbia raaque quera quera bei quia co”, i que Moisés ra. “ ‘Se rei Dios. Abraham nderecua chõ aico nguiã co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ũquĩ ndese ra.

³⁸ Ũquĩ mano ndaque nyii. Ũquĩ ndeco siqui bei chõ nguiã ũquĩ. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguiã Dios je ã, i que Jesús ee ra.

³⁹ —Ndecheẽ turãte, i que embesasa mo ñee Jesús je ra.

⁴⁰ Ae “Jesús nandembũicũã” i rei quia, ũquĩ ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheẽ jẽje cote. ¿Mbaerã mbia riqui ñee nde? “David rucucha chõ Cristo re” i re.

⁴² David si que “sererecua” i Cristo je ra. Sã David chimbasa Salmos no: Dios que ñee Cristo sererecua je ra. “Ecoi sejii.

Nde abe ra ererecua serese.

⁴³ Ae ndeucuãyãte quia nae, ũquĩ je ra ndequirãcũã ateacuquia tuchi.

Ndequirãcũã tuchi chee ra ũquĩ si”, i que Dios sererecua je ra, i que David embesa ra.

⁴⁴ David si chõ “sererecua” i nguiã Cristo je. ¿Mañi nda David rucucha Cristo re? Jeñee ño seje, i que Jesús ũquĩ je ra.

Jesús ñee asi embesasa je

⁴⁵ Mbia ja résaa que Jesús ñee uchimbaaquiatu je cote ra.

⁴⁶ —¡Embesasa rã ño nda jẽingochĩ je! Ũquĩ ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe bei equia ã no.

⁴⁷ Ari eru cheecha mbae abe embutiã tiã nguiã ã no. Ucheẽ oco abe esaã saã mbeite quia Dios je ã no. “Ƴ nda mbia mae nanderese”, i chõ nguiã. Ũquĩ nda Dios mbasi tuchi cote, i que Jesús uchimbaaquiatu je ra.

21

Eru cheecha mbaecha reã mo mbae mo mee Dios je

¹ Jesús que nyoĩ nyoĩ quia Dios chuchúaa ra. Hue que mbia mbaecha riqui ofrenda mondo mondo ofrenda riru ye ra.

² Eru cheecha abe que siqui ra. Ae que centavos nyeremoño mondo ofrendarã nda. Mbaecha reãte quiatu ngue ae re.

³ Jesús que ñee nda. —Tacheẽ tuchi jẽje. Eru cheecha mbaecha reã ngue mbae mondo tuchi mbia ataque si ra.

⁴ Mbaecha quiatu que umbae rire ñetẽ mondo mondo ra. Eru cheecha quiatu nbbbbknnnknnnnnnn gue umbae mĩ mondo ja nguiã, i que Jesús ra.

Mbia ra Dios chuchua mbucoĩ ja, i Jesús

⁵ Mbia que ñee ñee Dios chuchua turã nñi nda. Tuchua mbarõ ji sita turã nñi. Mbae aba queteamba riñi abe no, Dios chuchua jenda. Jesús que ñee mbia je cote ra.

⁶ —Ae rese jëingo mae nae, ùquĩ nda mbiamo mbutiã ja cote. Sita mo nda chi eã nyuchuarõ cote. Mbia ra tuchua mbucoi ja tuchi. Dios chuchua ra chi eã juã cote, i que Jesús ra.

Mbae ua ja nonde

⁷ —¿Manose ra ùquĩ nde? ¿Mañi ure ra equia irandu mbae ua nonde re? i que Jesús chimbaaquiato ee ra.

⁸ Jesús que ñee ee ra. —Jëtesa jiri quia jë. Mbia ra jembiiĩ irĩchi jë. “Cristo chõ se re”, i ra mbia ñee ata atate jëje. “Co rei é co cote”, i ra mbia ñee ata atate jëje no. Ùquĩ nda jëñanduchi. Ñeeñoño je chõ ùquĩ nde.

⁹ Mbia ra ñee ñee tuchi nyiquia quia je riñi. Guerra riñi abe no. Ùquĩ mose ra jësiquichechi jë. Ùquĩ ja rane nda nyecua raque. Aque mose ra mbae ja ua eã ná, i que Jesús mbia mbaaquiato ra.

¹⁰ —Mbia ra guerra saã tuchi chee. Nyiquia quia tuchi rae.

¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei ri cote.

¹² Ùquĩ nonde ra mbia icuã icuã tuchi jë je seriñi. Nguerecua je ra mbia jenderao rao tuchi. Ererecua abe icuã icuã tuchi ra jëje. Jëtarõ tarõ tuchi ra seriñi.

¹³ Ùquĩ mose nda secheë jëseni senei tuchi mbia je chã.

¹⁴ ¿Manyae ra ùquĩ ñee ndibishorõ nde? jenyechi nda ñee ùquĩ nonde jë.

¹⁵ Se chõ nda jaembucheë turã nguã aque mose. Nyebe ra jëucuyãsa jeñee ndibishorõ aroneate aque mose.

¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jëquiato abe no. Ùquĩ nda jemo quia chee no.

¹⁷ Mbia ra jëucuyã tuchi seriñi.

¹⁸ Jësiquichechi nda esi. Jaendeaquiato tuchi ra aque mose.

¹⁹ Jeñimbirãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote.

²¹ Sã Judea jenda choi uchã ibi ibate riichã aque mose. Sã Jerusalén jenda abe choi uchã hue si. Ae chi isho isho Jerusalén si nae, sã ùquĩ nyebibe eã Jerusalén ndiichã aque mose.

²² Aque mose ra mbia mbae icuã ja irara tuchi huicuã nñi. Embesa ji cheë nda ique ja aque mose.

²³ Aba mbia eã tuchi ra emo ãquë ndiru rerequia mose aque mose. Nguiriĩ mbuquiambu je abe no. Mbia ra mbae rasi saã tuchi aque mose. Mbae icuã nda irara tuchi huicuã nñi.

²⁴ Aque mose ra mbia guerra raã tuchi. Mbia ra nyiquia quia aque mose. Jerusalén jenda ra sasë tuchi aque mose. Mbia ra ecuruchoi choi tuchi tarõ isho. Judíos eã nda chi tuchi Jerusalén aque mose. Dios ra emondochoi chee hue si cote.

Dios riiriĩ nda tube ibate si

²⁵ Mbia mae sayã ndese ra mbia mae tuchi ibei rĩ cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbia ra titi titi i tuchi aque mose. Quiachã tuchi rae.

²⁶ Mbia chiã nda cuaãcuã i tuchi aque mose. “Mbae rasi ra nandesã tuchichĩ nde”, i tuchi ra titi titi i. Ibei jenda abe chee ra quiata quiata cote.

²⁷ Aque mose tuchi ra achube ibii cote. Ibeishĩ ndese ra achu. Senininya tuchi ra achu. Sequirãcuã tuchi ra achu.

²⁸ Ũquĩ ndese jemae mose, jẽo jẽo tuchi aque mose jẽ. Dios ra jendirõ jei mbae icuã si aque mose cote, i que Jesús ra.

²⁹ Jesús que ñeembe ee ra. —Sã higuera riqui no. Sã ira mo ndiqui no.

³⁰ Ero quira usẽ ja mose, “iraro itõ ndacu ra cote”, i chõ mbia nguiã aque mose cote.

³¹ Eĩ si chõ nda mbia mae mbae ja rese cote. Ũquĩ ndese mae mose, “achite Jesús ñi tu a cote”, jenyẽ rae. “Mbia rerecua tuchi ra Dios cote”, jenyẽ ra aque mose.

³² Ae siqui quia mbia aque mose nae, ũquĩ nda manoã mbae ua ja mose chee.

³³ Ibei ra ua. Ibi abe ra ua. Secheẽ nguia ra uayã mbei.

³⁴⁻³⁵ Mbia ndua eã mose serese ra achu cote. Ibi jenda ja ra ambua tuchi u. Jẽ nguia seraarõ arõ mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ũquĩ icuã ndese jẽingo mose, jaembuate ra u.

³⁶ Jẽtesa bei quiatu quia serese. Jeñee mbei quiatu quia Dios je. ã mbae icuã jei eã sacua jẽje. Jẽingo turã sacua serese sechu mose, i que Jesús ra.

³⁷ Nyaashĩ mose que Jesús riqui mbia mbaaquiato quiatu Dios chuchua ra. Isa que eriqui oso oso bei Monte de los Olivos ra.

³⁸ Isamamimbe que mbia riqui ngaẽ ngaẽ ja bei echeẽ andu ra. Dios chuchúaa.

22

Jesús nandesi tarõ, i ja mbia rerecua ñee nyue

¹ Achite que fiesta de la pascua cote ra. Mbichae mbuchimatã iriã ngue mbia u u quia aque fiesta mose querabe ra.

² Sacerdotes rerecua que ñee ja nyue ra. Embesasa abe no. —Jesús nandei quia. ¿Mañi nande ra equia equia nonde re? i que equia ñee ñee nyue ra. Eireite que eriqui mbia tubiriã si ra.

³ Judas Iscariote, i que Jesús chimbaaquiato mo je ra. Satanás que ique aque chiangui re cote ra.

⁴ Nyebe aque si nguiã ñee sacerdotes rerecua je. Dios chuchua raarõsa je abe no. —Jesús tamondo jẽje. ¿Mañi nande ra equia ee re? i que Judas ñee ee ra.

⁵ Ũquĩ iate que Judas ñee mose ee ra. —Mbae isiquia ra uremee ndeje, i que Judas je cote ra.

⁶ Judas que eno i mbia ñee mose ee ra. —Jesús tamondo rã jẽje mbia tiãsa, i que ñee nda.

Jesús quiaru uchimbaaquiato rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda.

⁸ Jesús que ñee Pedro je ra. Juan abe je. —Jẽso oveja mbuchi nande je, i que Jesús ee ra.

9 Ũquí ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra.

10 Jesús que ñee ee ra. —Jengasẽ mose sucha cuasu, emo i rerao rese ra jemaẽ. I ra equerao quia irasa mo ye. Aque rui jẽso bei quia ique chee echuchua.

11 Tuchuacha je jeñee. “Jesús que urembu ñee ndeje ra. ‘¿Ma cuarto ra urecu quiaru oveja u que re? Sechimbaaquiato rese’, i que Jesús ñee ndeje ra”, jenyẽ tuchuacha je.

12 Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiato sacua, i que Jesús ñee ee ra.

13 Pedro que nyoĩ cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

14 Mbae quiche ja mose que Jesús ngoi uchimbaaquiato rese quiaru sacua cote ra.

15 Jesús que ñee ee ra. —Co oveja que ause tuchi quia jendese semana nonde ra. Co mose pascua mose.

16 Pascua mo nda au eã mbei jendese cote. Dios mbia rerecua tuchi mose chee, i que Jesús ee ra.

17 Jesús que vino mbeisa isi cote ra. Gracias i que Dios je ra. Ñee ngue uchimbaaquiato je cote ra. —Co jẽisi. Jembei jaaja jẽ.

18 Vino mo nda ambei eã mbei cote. Dios mbia rerecua tuchi mose chee, i que Jesús ra.

19 Jesús que mbichae isi cote ra. Gracias i que Dios je ra. Siquio que mbuchao chao ee cote ra. Ñee ngue ee cote ra. —Ã ndei serete rã ã. Serete ra mano jẽje cote. Jendua serete riquio ji rese ã mbichae u mose, i que Jesús ñee ee ra.

20 Eĩ si que Jesús vino mbeisa isi no nda. Quiaru jare. —Ã ndei seruqui rã ã. Mbia icua mbutia sacua tuchi chõ seruqui re. Dios cheẽ yasu rui si chõ seruqui riqui nguia mbia icua mbutia co.

21 Ae ra semee mbia icua je nae, aque abe riqui quiaru serese a.

22 Co acua raque quia mano nonde co. Dios cheẽ ndui si co. Ae semee nguia mbia icua je a nae, aque ra mbae rasi saã tuchi. Aba mbia eã tuchi rae, i que Jesús ee ra.

23 Echimbaaquiato que mae jaaja nyiese ra. —Aba tuchi ra emee mbia icua je reae, i ja jate que nyue ra.

Jesús chimbaaquiato mbia rerecua saã saã tuchi nyue

24 Aquere que Jesús chimbaaquiato ñee icua icua tuchi nyue ra. —Se quia ererecua tuchi ndesi re, i jaaja que nyue ra.

25 Jesús que ñee ee ra. —Mbia ataque rerecua riqui ucuasu raã naa tuchi ngũimba je ũquí.

26 Eĩ jenyechĩ nda jẽ jẽ. “Ererecuarã se”, jenyechĩ nda jẽ. Ae eaquiato jiri jemo nae, sã ũquí ndiqui uñetẽ naa naa ño. Sã ũquí ndiqui tochei chõ nguia. Ae ererecua jemo nae, sã ũquí ndiqui ererecua rimba rã tuchi chõ.

27 Ererecua ngoi chõ nguia. Erimba mbae mee mee ño nguia ee. Eĩ eã ño se re. Se quia mbae amee mee nguia jẽje co.

28 Jẽ nguia tuchi ngue jẽingo beite nguia serese. Se mbae icua irara tuchi mose.

29 Nyebe ra jaemũ tuchi mbia rerecuarã. Sã seru semũ tuchi mbia rerecuarã no.

³⁰ Jëingo tuchi ra serese, se ererecua tuchi mose. Jëquiaru ra serese. Mbae mo abe ra jembei serese no. Israel ndiirĩ nderecua ja ra jë. Judíos rerecua ja ra jë, i que Jesús ee ra.

Jesús aicuayâte resë, i ra Pedro serĩ, i Jesús

³¹ Jesús que ñee Pedro je cote ra. —Simón, Satanás que ñee jenĩ nda. “Ndechimbaaquiato emee na seje. Tã tae rã ee. Ma siquĩ beite Dios rese”, i rei ngue Satanás jenĩ nde.

³² Acheë tuchite que Dios je nderĩ nda. Nde Dios icua tuchi sacua. Nde ubabe mose serese, nderesenda abe je echeë emingo sacua serese, i que Jesús Pedro je ra.

³³ Pedro que ñee ee ra. —Sererecua chõ nde re. Aico bei ra se quia nderese. Mbia nda sematã ndei nguiã. Mbia nda sei quia rei nguiã nderese, i que Pedro ra.

³⁴ Jesús que ñee ee ra. —Tacheë nyecua ndeje, Pedro. Nguira cheë nonde ra erecheë ñooño tres veces serĩ namo, Pedro. “Jesús aicuayâte resë”, ere chooño ño nda serĩ, i que Jesús Pedro je ra.

Embesa ji chee nda ique ja serĩ cote, i Jesús

³⁵ Jesús que ñee uchimbaaquiato je ra. —Jaemondo que mbia mbaaquiato quiato sacua nyii, jëochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jëiyao eã abe no. ¿Aque mose mbae eãte jëje re? i que Jesús ee ra. —Tei. Urembae tubiriãte que ra, i que echimbaaquiato ñee Jesús je ra.

³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huĩrao ribishorõ ae.

³⁷ Sã embesa ji riqui ñee serĩ no. “Mbia icua ndese ra Dios riirĩ mingo chee”, i. Ûqui nda ique cote. Embesa ji cheë nda ique ja tuchi serĩ cote, i que Jesús ñee nda.

³⁸ —Co tiquise nyeremo ñi co resë, i que echimbaaquiato echeë mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usë taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbaaquiato que nyoi erese ra.

⁴⁰ Ngasë mose que ñee uchimbaaquiato je ra. —Jeñee tuchi Dios je. Satanás tã i eã sacua jëje, i que Jesús ñee ee ra.

⁴¹ Jesús que oso pe quiti jiri esi ra. Ngoi que nguiã ndese ñee Dios je ra.

⁴² —Paba, ndebi mose sereaquiato se, mbae rasi raã eã sacua. Ae sebite nae, ùqui esaã eã seje. Ae ndebite nae, ùqui nguiato esaã, i que Jesús Dios je ra.

⁴³ Aque mose que ángel mo tu ibate si ee ra. Embirãcua sacua.

⁴⁴ Jesús ia eã tuchite que ra. —Mbae rasi ra asaã tuchichĩ nde, i tuchi que ndua ndua ra. Ñee tuchi que Dios je ra. Eiriei ruqui que tiqui tiqui tuchi quia íbii ra.

⁴⁵ Jesús ñee jare Dios je que juã cote ra. Uchimbaaquiato rea que esi ra. I que u uque ee ra. Eya eãte quiatu ngue re.

⁴⁶ Ñee ngue ee ra. —¿Mbaerã jëingo uque a re? Jenyuruã eae. Jeñee na Dios je. Satanás tã i eã sacua jëje, i que Jesús ee ra.

Mbia Jesús nyucua serao

47 Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chĩmbaaquiату raque que ae ra. Ae que Jesús siichã u ritii riite sacua nda.

48 Jesús que ñee Judas je ra. —¿Ereico seritii riite mbia icuã je sereacuquia sacua a re? i que Jesús ee ra.

49 Jesús resenda que mae u erese ra. Ñee ngue Jesús je ra. —Urererecua, ¿tiqise ra ureuru uru mbia rese re? i que ñee Jesús je ra.

50 Jesús resenda mo ngue tiqise uru sacerdote rerecua rimba rese ra. Eisa sia. Eisa equiatocuti quitinda.

51 —Jẽhũ esi ae. Coche ñene, i que Jesús ee ra. Oco que eisa rese embucherõ nda.

52 Jesús rerao sacua ño mbia ngaẽ nguia reaẽ. Sacerdotes rerecua. Policía abe no. Judíos rerecua abe no. Nyebe Jesús ñee nguia ee. —¿Mbaerã jenyu quia tiqise reru serea co re? Ira jua abe no. Mbae mbuquiachãsa isi rã ño jenyuchĩ nguia serea co.

53 Tenda que amumba mumba beite rei quia jendese resẽ. Mbia mbaaquiату quiatu Dios chuchúaa resẽ. ¿Mbaerã jẽingo seisiã secua aque mose re? Isa chõ jenyuchĩ serea co, mbia mae eã sacua jendese. Itondaru rĩnda chõ jẽ nde, i que Jesús ee ra.

Jesús aicuayãte resẽ, ichõiño Pedro

54 Mbia que Jesús isi nyucua cote ra. Sacerdotes rerecua chuchua que eruruchoi cote ra. Pedro que oso quia ishote erui ra.

55 Itaicuee que mbia tata mbucha ra. Huee que echĩ ngoi tata jii ra. Pedro abe que ngoi embirõ nda.

56 Nyucuaaque mo ngue chĩ mae nguiatu tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra.

57 Pedro que ñee ee ra. —Tei. Jesús aicuayãte resẽ, ichõiño ngue Pedro nyucuaaque je ra.

58 Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resẽ, ichõiño ngue Pedro ee ra.

59 Emo mose jiri que emo ñee ee no nda. —Jesús resenda chõ nde resẽ. Galilea jenda chõ nde abe resẽ, i tuchi que Pedro je ra.

60 Pedro que ñee ee ra. —Tei. Ndecheẽ aicuayãte resẽ, ichõiño ngue Pedro ee ra. Pedro cheẽ mose tuchi que nguira ñee cote ra.

61 Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñooño tres veces serĩ, sã Jesús i Pedro je nyii no.

62 Pedro ndua mose ùqui ndese que esi nyeseo pe jiri ra.

Mbia iquia chooño Jesús je

63 Ae Jesús isi mĩ nae, ùqui ngue iquia iquia tuchi u Jesús je ra. Ucuu ucuu tuchi que u erese ra.

64 Jesús resa abe que echati ra. Eruba rese que ucuu ucuu tuchi ra. —¿Aba ucuu ucuu quia nderuba rese a re? i abe que equia Jesús resa ati ji je ra.

65 Ùqui mĩ eã ngue eriqui ñee ee ra. Mbae ja rĩ ngue embuqueta ra.

Mbia Jesús ruruchoi ererecua chumunua mose

66 I que nyaashĩ u quia ra. Aque mose que ererecua ñumunua ja ra. Judíos rerecua. Sacerdotes rerecua abe no. Embesasa abe no. Ñquĩ ñumunua mose que Jesús ruruchoi ee cote ra. Ererecua que ñee ja Jesús je cote ra.

67 —¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jêje, “nyia”, jenyẽ ãte ra secheẽ mose.

68 Se abe preguntar i mose jêje mbae mo ñii, jeñee ãte chõ nda secheẽ ndibishorõ. Jêhui eã abe ra sesi no.

69 Namõ jiri ra acõi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra.

70 Ñee ja que Jesús je cote ra. —¿Dios rucucha chõ nde re? i ja que ñee Jesús je ra. —Ae. Dios rucucha rei se, i que Jesús ee ra.

71 Ererecua que ñee ja nyue ra. —¿Mbaerã nda mbia Jesús icuã nenei i ite nande je re? Jesús cheẽ icuã ngue nandechandu rei nande abe resẽ. Sã mbia eiquia, i que ererecua ñee ja nyue ra.

23

Mbia Jesús ruruchoi Pilato je

1 Judíos rerecua que juã ja cote ra. Jesús que ecuruchoi Pilato je cote ra.

2 Ñquĩ ngue ñee icuãte Pilato je Jesús rĩĩ nda. —Jesús que mbia mbaaquiату icuã icuãte quia ra jê. “Impuestos ra jemee meeçhĩ mbia rerecua je”, i chõ ngue equia mbia je ra jê. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús rĩĩ nda.

3 —¿Judíos rerecua nde re? i que Pilato ñee Jesús je ra. —Ae. Judíos rerecua chõ se re, i que Jesús ee ra.

4 Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate eriĩ, i que Pilato ra.

5 Judíos que ñee asite ee ra. —Jesús riqui mbia mbaaquiату icuã icuã tuchi co. Mbia mbesa chooño. Judíos mbaaquiату icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

6 Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra.

7 —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguã Herodes je. Galilea jenda rerecua quiату ngue Herodes re. Herodes que siqui Jerusalén aque mose ra.

8 Herodes que maese beite quia Jesús rese ra. Jesús rese que eriqui jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguã mae mose Jesús rese cote.

9 Herodes que ñee atate rei Jesús je ra. Jesús que ñeeã mbeite echeẽ ndibishorõ nda.

10 Sacerdotes rerecua abe que chi ra. Embesasa abe no. Ñquĩ ngue ñee icuã icuãte quia Jesús rĩĩ nda.

11 Herodes que iquia iquia chõ nguia Jesús rĩĩ nda. Erimba soldados abe no. Jesús ririrõ tuchi que equia ra. Tiru nininya tuchi que emingue Jesús je ra. Ererecua raã naa tuchi Jesús je. Aquere que Herodes embuchebi mundo Pilato je cote ra.

12 Aque mose ramo ngue Herodes quiato Pilato cote ra. Eicuã icuã mbeite que eriqui nyue nyii ra.

Jesús jēiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbía ja abe no.

¹⁴ Ñee ngue mbia je cote ra. —Jē ngue Jesús jendu rei seje ra. “Mbía mbĩĩrĩ ĩrĩa chō Jesús re”, jenyē rei que seje ra. Acheē ocote rei que ee jēsaa ra. Ae jeñee ndei seje nae, ũquĩ icuã mo eãte seje Jesús rĩĩ.

¹⁵ Herodes je abe mbae icuã mo eãte Jesús rĩĩ. Herodes que Jesús mbube chō nande je ra. ¿Mbaerã nda nandēiquia re? Mbae icuã mo ngue esaã eãte resē.

¹⁶ Tairuã nua ño. Aquere tambui mondo, i rei que Pilato ñee mbia je ra.

¹⁷ Pascua mose bei que Pilato riqui mbia matã ji mĩĩ mbui bei ra.

¹⁸ Mbía que tasē tasēte ñeemombo mombo Pilato je ra. —Jesús eiquia. Barrabás quia embui ure je, i tuchi que mbia quia Pilato je ra.

¹⁹ Barrabás tarō ji que chĩ nda. Mbía iquiasa tuchi que ae ra. Romanos nderecua je abe que eicuã icuã tuchi riqui ra.

²⁰ —Jesús quia tambui, i rei que Pilato ñeembe mbia je ra.

²¹ —Jesús embucha ira rese, i tuchi que mbia quia tasē i i ra.

²² Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacuã. Tairuã nua ño. Aquere tambui mondo, i rei que Pilato ra.

²³ Mbía que ñee mombo mombo tuchite ee ra. —¡Eiquia jē! ¡Ira rese embucha jē! i tuchi que mbia quia tasē tasē ee ra. Sacerdotes rerecua abe que tasē i ĩte ra. Eno i chee que Pilato cote ra.

²⁴ Pilato que mbia cheē mumbayã nyee ra.

²⁵ Pilato que Barrabás mbui mondo cote ra. Mbía iquia iquiasate raque ae. Ñee icuã icuãstate raque ererecua je. Pilato que Jesús mee mbia je cote ra. Eiquia sacuã.

Mbia Jesús mbuchesecco ira rese

²⁶ Soldados que Jesús curuchoi eiquia sacuã cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira mbuchicuandasa ji rerao sacuã Jesús rui. Cruz, i equia ee.

²⁷ Mbía tubiriã ngue nyoĩ quia erui ra. Cuña abe tubiriã. Ũquĩ ngue nyoĩ quia tasē tasē tuchi nyeseo erese ra.

²⁸ Jesús que uba mae ñee ee ra. —Cuña, jenyeseochĩ nguiã serese. Jenyeseo quia jenyeseo. Jendiĩrĩ abe rese quia jenyeseo, Jerusalén jenda.

²⁹ Mbae icuã nda tuutu tuchi jēje cote. Ae erĩrĩ nderecua nae, ũquĩ nda mbae rasi saã tuchi aque mose cote. Aque mose quiatu bichĩ mbia riĩrĩ eã ja mbite re. Mbae icuã tuchite quia nda aque mose cote re.

³⁰ “Amano ño mbichĩ se”, i tuchi ra mbia aque mose cote. “Sita ibate tu chō mbichĩ seati”, i tuchi ra mbia aque mose cote.

³¹ Se chee mbia riquichĩ sembasi mbasi a. Seicuã eã ndaque se. Mbía quiatu ra mbae rasi saã tuchi huĩcuã nĩĩ cote, i que Jesús ñee nda.

³² Soldados que mbia icuã nyeremo curuchoi Jesús rese eiquia sacuã nda.

³³ Ngasē ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. Ũquĩ mbia icuã abe que embucha ira rese ra. Enongue que emĩ Jesús quiatocuti ra. Equiatocutiã ngue enongue mĩĩ no nda.

³⁴ Mbia Jesús mbucha mose ira rese que Jesús ñee Dios je ra. —Paba, ã icuã embutiã esi. Ñimbaaquiatuãte equia seiquia ã, i que Jesús Dios je ra. Soldados que sita ñetẽ mbaaba aba o je ra. —Aba ra ja. Aba mbaerã nda Jesús irao reae, i que nyue ra.

³⁵ Mbia que chi ja tuchi mae erese ra. Ererecua abe chee que chi iquia iquia Jesús je ra. —Ma ndequirãcuãte. Mbia que erembucherõ cherõ tuchi quia. ¿Mbaerã ereico eĩ ãte ndechue nde abe re? Dios riirĩ nde reaẽ, i que ererecua u iquia iquia Jesús je ra.

³⁶ Soldados abe que iquia iquia chõ nguia ee ra. Vinagre chiquino ngue emee ndei ee echimbei sacuaã nda.

³⁷ —¿Mbaerã ereico nguichi ãte ira si nde ae re? Judíos rerecua rei nde reaẽ, i que soldados iquia iquia Jesús je ra.

³⁸ Mbia que embesa ji mi Jesús ãquĩ quiti ibate ra. JUDIOS RERECUA CHÕ CO RE, i que embesa ji huĩ nda. Griego cheẽ. Latín ñee abe no. Hebreo cheẽ abe no.

³⁹ Ae mbia icuã mbucheseco ji chi Jesús rese nae, ùquĩ mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios riirĩ nde reaẽ, i que ùquĩ mo ñeemombo Jesús je ra.

⁴⁰ Enongue que ñee ee ra. —¿Mbaerã ereico ñee ùquĩ Jesús je re? ¿Ndesiquiche ãte eriqui Dios si re? Ereico mano Jesús rã si a resẽ.

⁴¹ Nandeico mano nandeicuã ni a resẽ. Jesús quiatu que mbae icuã saã eãte rei resẽ, i que enongue ñee ee ra.

⁴² Aque sí que ñee Jesús je cote ra. —Jesús, endua serese nde ererecuarã mose, i que ñee Jesús je ra.

⁴³ Jesús que ñee ee ra. —Tacheẽ nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chí mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyesecco chee. Tres horas que ra.

⁴⁵ Tenda cuute que aque mose ra. Tiru mbucheseco ji Dios chuchua jenda que nyisia turã nda.

⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra.

⁴⁷ Soldado rerecua que mae tuchi huĩ erese ra. Ae que ñee turã Dios riĩ cote ra. —Mbae icuã naasa eã tuchi chõ Jesús riqui re, i que maende erese ra.

⁴⁸ Mbia tubiriã chi quia mae ja erese nae, ùquĩ ia eã tuchi que nyoĩ quia uchiã isi cote ra.

⁴⁹ Mbia Jesús chücuja ja que chi isho mae erese ra. Ae cuña nyoĩ beite quia erese Galilea si nae, ùquĩ abe que chi isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecua mo ngue ae ra.

⁵¹ José ia eãte que ererecua ataque rese Jesús iquia mose ra. Ae que Dios quiatote ra. —Dios ra ererecua, i beite que equia eraarõ arõ nda.

⁵² —Jesús raaque emee na seje, i que José oso ñee Pilato je ra.

⁵³ José que Jesús raaque mbuquichi cote ra. Tiru je que ema nda. Sita ribicoĩ ji imi ye que emondo ra. Mbia raaque mo ngue emondo eãte huee nyii ra.

⁵⁴ Viernes que aque mose ra. Mbia que iocoquiatu ja quia sábado nonde ra.

⁵⁵ Ae cuña nyoï beite quia Jesús rese Galilea si nae, ũquí ngue nyoï sita imi ndese mae nda. Jesús raaque iti ji rese que mae tuchi ra.

⁵⁶ Nyebi que echoï uchuchua ra. Aba mbushimbusa que esaã nyoï ra. Sábado mose que ũquí uquenea ucua cote ra. Dios cheë si.

24

Jesús raaque quera si

¹ Isamamimbe tuchi que cuña nyoï domingo mose sita imi ndese mae nda. Aba mbushimbusa que ecuruchoï rei eichusë chusë sacua Jesús raaque rese ra. Cuña mo abe que nyoï quia erese ra.

² I que sita eraaque atiquia ruruba ji u ee ra.

³ Cuña ngue ique rei nyoï sita imi ye ra. Jesús raaque oreäte que ee ra.

⁴ Tiri i tuchi que ra. —¿Mañi nda aba re? i tuchi que ra. Aque mose que mbia nyeremo chi juã ee ra. Eirao nininya tuchi que chi ee ra.

⁵ Cuña ngue titi titi i tuchi u ra. Nyebe echï nguiã nyibi beite. Angeles que ñee ee ra. —¿Mbaerã jëingo Jesús raaque requia requia a re? Quera si que resë.

⁶ Emoate a resë. Quera si que resë. Sã ñee jëje siqui mose Galilea no.

⁷ “Mbia icua nda seisi iquia. Sembucha ra ira rese. Tres días mose ra aquera si”, i que jëje nyii resë, i que ángeles ñee cuña je ra.

⁸ Ũquí ndese que cuña ndua cote ra.

⁹ Cuña ngue nyebi cuaë mbia mbiirandu ja cote ra. Jesús chimbaaquiato once abe mbiirandu.

¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra.

¹¹ Nyia iã ñochi Jesús chimbaaquiato cuña ñee mose ee. Cuña ñee ñooño nei nguiã ee.

¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chi ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quiato nyeremo nyoï quia aque mose ra. Emaús quiti que echoï quia ra. Dos leguas que Jerusalén si ra.

¹⁴ Ũquí ngue nyoï quia ñee ñee nyue ra. Jesús mano nii. Jesús raaque oreã nii abe no.

¹⁵ Ũquí ñee ñee ndiichã ngue Jesús si ra. Erese que Jesús si quia ngata cote ra.

¹⁶ Ũquí ngue mae ndei Jesús rese ra. Icuã eäte chõ ngue ra. Mbiamo nda eriqui reï ee raë.

¹⁷ Jesús que ñee nyee ee ra. —¿Mbae rñi jëingo ñee nyue ã nde? ¿Mbaerã jëya eäte riqui re? i que Jesús ñee ee ra.

¹⁸ Ũquí mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde miñ ño ereiranua erese ndeico mose Jerusalén nde? i que Cleofas ñee ee ra.

¹⁹ —¿Mbae rese? i que Jesús ee ra. Ũquí ngue ñeembe ee ra. —Jesús rese. Nazaret jenda rese. Dios cheë nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra.

²⁰ Mbia rerecua que Jesús iquia cote ra. Sacerdotes rerecua abe chõ ngue Jesús iquia nguiã. Nyebe soldados eiquia nguiã mbucha ira rese cote.

21 Israel jenda rerecua reĩ nda ure je. Tres días chee namo cote emano mosenda bei.

22 Ureresenda cuña mo ngue ñee uremundi tuchi ra. Ñquĩ ngue nyoĩ rei eatísaa nyaashĩ namo mose ra.

23 Jesús raaque oreãte nda ee ra. Nyebe ecuaẽ nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra.

24 Aquere que ureresenda mo abe nyoĩ eatísaa ra. Cuña ñee ndui si que Jesús raaque oreãte ee ra. Jesús rese quiatu que mae eã nda, i que Cleofas ñee Jesús si je ra. Jesús eã nda eriqui reĩ ee raẽ.

25 Jesús que ñee ee cote ra. —¿Mbaerã jëaquiatuãte riqui re? ¿Mbaerã jëingo Dios cheẽ icuayãte re? ¿Mbaerã jëingo Dios cheẽ nenei neneisa chimbasa icuayãte re?

26 Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra.

27 Jesús que Dios cheẽ mbuchecua ja ee cote ra. Ngasi riĩ. Umano nñi abe no. Uquera riĩ abe no. Moisés chimbasa que embuchecua ee ra. Aquere que Dios cheẽ nenei neneisa abe mbuchecua ja ee ra.

28 Ngasẽ ngue ñquĩ nyuchúaa cote ra. Jesús que ngata i abareã oso ra.

29 Jesús ngata i abareã mose que ñquĩ eriquisã nda. —Eitõ urerese aa ae. Tenda osote resẽ. Itondarute ra ndeje resẽ, i que ñee ee ra. Nyebe Jesús ique nguiã echuchúaa erese.

30 Ngoi ja que quiaru nonde cote ra. Jesús abe que ngoi erese ra. Mbichae que esirõ o je cote ra. Gracias i que Dios ibatenda je mbichae riĩ nda. Mbichae que esiquio mondo ee cote ra.

31 Ñquĩ mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra.

32 Ñquĩ ngue ñee ñee nyue cote ra. —Jesús chõ eriqui reaẽ. Nyebe nandeya tuchite riqui nguiã Dios cheẽ mbuchecua checua mose nande je ñeenda cúa, i que equiã ñee ñee nyue ra.

33 Nyebe ehoi jei nguiã nyebi si Jerusalén. Huee que Jesús chimbaaquiatu chi ñmunua ee ra. Eresenda mo abe rese.

34 Ñquĩ ñmunua je que ñee ee ra. —Jesús que quera si ra. Ae bei. Simón ngue mae erese ra, i que ñmunua je ee ra.

35 Aquere que ñquĩ nyeremo ñee mbia chumunua je cote ra. —Jesús rese que uremae ñeenda cúa ra. Urembaaquiatu quiatu que umano nñi nda. Uquera riĩ abe no. Mbichae riquio mose ure je, aque mose ramo ngue Jesús urecua ra, i que mbia mbiirandu ja ra.

Jesús nyecua uchimbaaquiatu je

36 Ñquĩ ñee ua eã mose que Jesús nyecua ee ra. Mbia ite re. —Jëya chõ serese, i que ñee ee ra.

37 Mbia que titi titi i tuchi u mae erese ra. Aba checuayã nda Jesús riqui reĩ ee raẽ.

38 Jesús que ñee ee ra. —¿Mbaerã jësiquichete riqui re? ¿Mbaerã “Jesús chõ eriqui re” jenyee eã seje re?

39 ¡Sã jël! Jemae seo rese. Jemae sei abe rese ae. Jëoco serese ae. ¡Sã se si chõ jël! Aba checuayã nguiã eroo eã nde. Equiangue eã abe no. Se rã eã, i que Jesús ee ra.

40 O que etecuquia ee cote ra. Hui abe que etecuquia ee ra.

41 —Jesús chõ eriqui re, i eã ngue ra. Ndua ndua chõ erese. Eyate raque erese. Jesús que ñeembe ee ra. —¿Mbae mo ndei eu sacuaã aa re? i que ee ra.

42 Sira resi ji que emee ee ra. Irao abe que emee ee eretã ndesebe ra.

43 Jesús que eisi eu bei ñqui ndésaa cote ra.

44 Jesús que ñee ee cote ra. —Sã acheẽ jêje seico mose jendese nyii no. “Ae Moisés mbesa serĩ nae, ñqui nda ique ja serĩ cote. Dios cheẽ nenei neneisa chimbasa abe ra ique ja cote. Salmos ndesenda cheẽ abe ra ique ja serĩ cote”, ae que se quia jêje nyii. Ñqui ngue ique ja semano mose cote ra. Sequera mose abe no, i que Jesús ñee ee ra.

45 Dios cheẽ ngue embuchecua checua ee cote ra.

46 Jesús que ñeembe ee ra. —Sã embesa ji riqui ñee no: “Cristo ra mbae rasi saã tuchi mano nonde. Tres días mose ra quera si.

47 Mbia ra echeẽ senei senei tuchi cote. Jerusalén jenda je rane nda erenei nenei. Mbia ja je ra erenei nenei cote. ‘Jêicuã si jêhui rã. Cristo jêicuã mbutiã sacuaã’, i tuchi ra mbia ja je Cristo rĩ cote”, i que embesa ji quia nae.

48 Ñqui ique quia ã cote. Jemae nguia erese ã cote.

49 Ae je Paba ñee jêje nae, “Espíritu Turã tamondo jêje”, i equia jêje nae, a que tamee jêje cote. A jenguchõ na Jerusalén. Paba ibatenda uquirãcuã mee nyee jêje, i que Jesús ñee uchimbaaquiату je ra.

Jesús nyui oso ibate

50 Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbaaquiату je cote ra. —Sã Dios jendeaquiату turã, i ee.

51 Aque mose tuchi que Jesús si nyui ibate erecha cote ra.

52 Ñqui ngue ñee turãte Jesús rĩ nda. Eya tuchi que nyebi nyoi Jerusalén nda.

53 Dios chuchua que eriqui bei nyoi ñee turã Dios rĩ nda. Amén.

EL SANTO EVANGELIO SEGÚN SAN JUAN

Jesucristo rane ngue siqui nyii ra

¹ Dios cheë nane tuchi que nyii ra. Mbae ja si. Dios cheë ndei Jesús. Ae que siqui bei Dios rese ra. Dios si rei Jesús.

² Ae chõ ngue siqui bei Dios rese nyii ra.

³ Dios que mbae chao eã ae ae ra. Jesús rese ae mbae ao ja nguiã.

⁴ Jesús chõ mbia mingo nguiã ã. Nandemíngosa chõ nanderesae nguiã ã.

⁵ Nandemíngosa chõ mbae tesae tuchi nguiã itondaru. Itondaru quia ra emungue aroneãte.

⁶ Dios que emo mbu cote ra. Juan, i que ee ra.

⁷ Juan ngue tu aba resaesa renei nenei mbia je ra. Mbia mbiirandu randu ja. f nda mbia aba resaesa icua ja, Juan ñee nguire.

⁸ Aba resaesa eã ño Juan nde. Emo mii ño Juan ndiqui nguiã ñee. —Ae chõ nanderesae nguiã co, i que Juan nda.

⁹ Aba resaesa que tu ibi cote ra. Aba resaesa chooñoã tuchi que ra. Ae chõ aba resae ja nguiã ã.

¹⁰ Aba resaesa que siqui íbii cote ra. Mbia que eicua eãte chõ nda. Mbae aosa ja raque ae.

¹¹ Aba resaesa que tu rei nguesenda mbirõ nda. Eresenda que eisiteã ñochĩ nguiã.

¹² Mbia mii mii ño ngue eisi turã turã nguiã. Mbia mii mii ño ngue eicua icua nguiã. Ūquĩ je quia Dios riqui nguiã “seriirĩ” i.

¹³ Mbia riirĩ na eã ño Dios riirĩ ndiqui nguiã nyaacuquia cuquia ã. Ñquẽ nyaacuquia rá eã ño Dios riirĩ ndiqui nguiã nyaacuquia cuquia ã cote. Sã emo ndiqui ngüinisi rese embiirĩ nae, ũquĩ na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose.

¹⁴ Jesús rei Dios cheë. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Eturã tuchi chõ ae re. Ngu rá si chõ ae re. Ichõiñosa reã tuchi chõ ae re.

¹⁵ Juan ngue Jesús senei senei nguia mbia je ra. —Co rĩ ngue acheë jẽje resë. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jẽje resë. Ae siqui co cote, i que Juan mbia je ra.

¹⁶ Jesús turã tuchi que ra. Nyebe eriqui nguiã mbae turã mee mee mbei nande je.

¹⁷ Dios cheë mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheë ñoñoa senei senei nguiã nande je no.

¹⁸ Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rá si.

Juan el Bautista ñee turã Jesús rĩ

¹⁹ Judíos Jerusalén jenda que mbia mondochoi ñee Juan je ra. Sacerdotes mondo erea. Levitas mo ndese. —¿Aba nde re? i sacua Juan je.

²⁰ Juan ngue ñee nyecua tuchi ee ra. —Christo eã ño se re, i que ee ra.

21 —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecuaa ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra.

22 Judíos chimondo que ñeembe Juan je ra. —Ndecheẽ embuchecua ure je. ¿Abate nde re? I nda ndecheẽ uresenei ũquí je, ae urembu. ¿Mañi ure ra nderĩ nde? i que Juan je ra.

23 Juan ngue ñee ee ra. —Tacheẽ jẽje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbasa rui si chõ Juan ñee nguiã.)

24 Ae ñee ñee nguiã Juan je nae, ũquí ndei fariseos chimondo ũquí.

25 Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecuaa eã ño nde resẽ, i que Juan je ra.

26 Juan ngue ñee ee ra. —I je chõ aico nguiã bautizar i. Emo nguiã siqui raque quia jẽite re. Aque quia jẽicuayãte nguiã co.

27 Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

28 Betábara, i que hue sucha je ra. Huee quia fariseos chimondo ñee nguiã Juan je. Ama Jordán ndobei. Ae Juan ndiqui bautizar i, huee.

29 Isamami nongue que Juan mae Jesús rese ra. Jesús que tu quia Juan ndiichã nda. —Co mbia icuã ndiquicharõ sacua ndu quia co. Oveja riirĩ na eriqui Dios je. Ae ra nandecuã mbutiã nandes.

30 Erĩ ngue aico ñee jẽje. “Ae ra tu serui, aque quiarei ererecua tuchi sesi. Ae rane nguiã siqui rei seã mose nyii”, ae que se quia jẽje. Co chi eru quia co cote.

31 Se sí que aicuayãte nyii ra. I je que bautizar ae quia mbia je cote ra. I nda Israel jenda Cristo icua, i que Juan nda.

32 Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusĩ rã ngue eru nguichi earõ nda. Ibate si.

33 “¿Aba ra Cristo re?” ae beite que se quia ra. Dios que ñee seje ra. “iI je eico bautizar i mbia je jẽ! Ae arõ nda Espiritu Turã ndu nguichi bei nae, ae quiatu bautizar i sacua mbia je Espiritu Turã je”, i que Dios seje ra.

34 Atea que se cote ra. Ae rei Dios riirĩ. Aicuate se cote, i que Juan nda.

Jesús mbia irabo uchimbaaquiaturã

35 Isamami nongue que Juan ndiqui hue sí no nda. Nguesenda nyeremo ndese que eriqui ra.

36 I que Jesús ucua quia ra. —Qui mbia icuã ndiquicharõ sacua coi quia qui. Oveja riirĩ na eriqui Dios je, i que Juan Jesús riĩ nda.

37 Juan ndesenda nyeremo ngue Juan ñee ñandu ra. Nyoĩ que Jesús rui cote ra.

38 Jesús que mae nguique quiti ra. —¿Mbae jẽsequia quia re? i que mae erese ra. ũquí ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra.

39 —Jenyu mae erese, i que Jesús ee ra. Nyoĩ que mae echuchua rese ra. Tenda nyesecote mose que echoi erese ra. Tendã oso cheete que echĩ erese cote ra.

40 Ñquĩ nyeremo ngue Juan ñee ñandu ra. Siqui que Jesús rui cote ra. Andrés, i que ñquĩ mo je ra. Simón Pedro nongue que ae ra.

41 Andrés que oso asite ngõngue requia ra. Simón ndequia. —Dios chimondo que uretea ra. Cristo que uretea ra, i que Andrés ngõngue je ra.

42 Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiirĩ ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

43 Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra.

44 Betsaida jenda que Felipe ra. Hue jenda si chõ Andrés re. Pedro rese.

45 Felipe que oso Natanael ndequia cote ra. —Ae riĩ Moisés riqui embesa mbesa cose, aque que uretea ra. Ae riĩ Dios cheẽ mbuchecuaa riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José ririĩ ño eriqui re, i que Felipe Natanael je ra.

46 Natanael que ñee Felipe je ra. —¿Mbae turã mo nda tu Nazaret jenda re? i que ra. —Echũ erea ae, i que Felipe ee ra.

47 Natanael que tu Jesús rĩchã nda. Jesús que mae erese ra. —Co israelita turã tuchi mo ndu quia co. Aba mbĩrĩ irĩsa reã tuchi mo ndu quia co, i que Jesús Natanael nĩ nda.

48 —¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatuchu’ i nondẽ ndeje. Iraqui re que amae nderese ra. Higo iqui re, i que Jesús ee ra.

49 Natanael que ñeembe ee ra. —Mbia mbaaquiatusa, Dios ndiirĩ ño nde riqui re. Israel jenda rerecua tuchi chõ nde riqui re, i que Natanael Jesús je ra.

50 Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turã tuchi rese ra eremae cote, aque si, i que Jesús Natanael je ra.

51 Jesús que ñee si ee ra. —Tacheẽ nyecua jẽje. Ibei ra obo jẽje. Angeles nda nguichi quichi quia seje. Nyoĩ nyoĩ si ra equia ibate. Angeles ibatenda. Dios rimba. Jemae nda erese, i que Jesús ee ra.

2

Emo ngũinisirã nguereco

1 Tres días mose que emo ngũinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngũinisirã isi mose ra. Jesús si abe que siqui huee ra.

2 Jesús abe que siqui huee no nda. Uchĩmbaaquiatu rese.

3 Mbia que uva rique mbei u huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra.

4 Jesús que ñee ee ra. —¿Mbaerã ereico ñee seje ñquĩ nde, Tai? Achecua jei eã nda mbia je, i que Jesús usi je ra.

5 Esi que ñee mbia rimba je ra. —¡Jesús cheẽ ndui si chõ jẽingo jẽ! i que ee ra.

6 Cántaro atate que chi ra. Seis que cántaro ra. Sita ao ji. Ñquĩ jie que judíos riqui nyoĩ nyoĩ querabe ra. Ñquĩ cántaro jie que cien litros jaaja ra.

7 Jesús que ñee mbia rimba je ra. —Cántaro jemombisē mbisē ja i je, i que Jesús ee ra. Nyebe emombisē ja nguiã.

8 Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra.

9 Uva rique rã si chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngũinisirã isi quia nae, aque je que fiesta raã naasa ñee nda.

10 —Mbia ja quiarei uva rique turã nane mee mee nguia mbia je querabe. Eturã mbei ja mose, ereã jiri mbei ruquia ruquia mbia je cote. Nde quia eturã tuchi ererecoquiatu nguiã. Hui bei sacuã cote, i que ra. Jesús chisaã ñi ño eriqui nguiã ñee.

11 Ūquí nane ngue Jesús saã mbia mae sayã nyii ra. Uva rique rã si tuchi que i raã nda. Ūquí ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbaaquiatu que Jesús icua tuchi cote ra.

12 Huesi que Jesús choi Capernaum nda. Usi rese. Ngõngue rese. Uchimbaaquiatu abe rese. Hue que echi itõ mocoite ra.

Jesús oso Dios chuchúaa

13 Fiesta rurubite mose que Jesús si Jerusalén nda. Pascua, i que judíos aque fiesta je ra.

14 Jesús que oso Dios chuchúaa ra. Huee que mbia chi ticuasuu mee mee nyue mbae isiquia ribishorõ nda. Ovejas abe no. Nyurusu cuasu abe no. Emo ngue chi ngoi ra. Mbae isiquia que esibishorõ shorõ u ra.

15 Mbia iruã nuãsa que Jesús saã nda. Esa nderecua. Aque je que Jesús mbia mbusē ja mondochoi Dios chuchua si ra. Ticuasuu abe. Ovejas abe. Ae mbae isiquia sibishorõ shorõ nguia, ũquí mbae abe que embuchiichere chere ja mesa ra. Mbae isiquia mombo mombo íbii.

16 Ae nyurusu cuasu mee mee nguia mbia je nae, ũquí je que Jesús ñee asite ra. —Ā nyurusu cuasu jendao Dios chuchua si. Mbae isi isisa jësaã saã ñochi u Paba chuchúaa a, i que Jesús ñee ee ra.

17 Jesús chimbaaquiatu que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ūquí ndese que echimbaaquiatu ndua ndua ra. Jesús mbia icuã mbusē mondochoi mose Dios chuchua si.

18 Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacuã. “Ererecua chõ eriqui re”, ure nda ndeje chã, i que judíos ñee Jesús je ra.

19 Jesús que ñee ee ra. —Jë Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra.

20 Judíos que ñeembe Jesús je ra. —Tenda atate que nanderu riqui itõte Dios chuchua ao ao resē. Cuarenta y seis años. ¿Mañi ere ra tres días eao ja nde re? i que judíos Jesús je ra.

21 Nguete riñ ngue Jesús riqui ñee nda. Mbia chumunuasa riñ eã ño ngue ñee nguiã.

22 Jesús quera si mose ramo ngue echimbaaquiatu ndua aque echeẽ ndese cote ra. Embesa ji rese ndua. —Í nguia equia re, i que echimbaaquiatu ndua ndua cote ra. Jesús quera si mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra.

²⁴ Jesús que mbia ndua ndua icuate quia ra. Nyebe ñee tuchi eã nguiã mbia je.

²⁵ —Ëi ño mbia nguiã ã, i aronea mbia mo Jesús mbiirandu. Jesús quiatu que mbia chiã icuate quia ra.

3

Nicodemo oso ñee Jesús je

¹ Mbia mo ngue siqui ra. Nicodemo, i que ee ra. Fariseo que ae ra. Judíos rereua que ae ra.

² Itondaru mo ngue esi Jesús rea ra. —Mbia mbaaquiatusa chõ nde re. Dios chimbu chõ nde re. Ureicuate que ra. Mbia mae sayã nda mbia mo saã eã, Dios siquiã mose erese, i que Nicodemo Jesús je ra.

³ Jesús que ñee ee ra. —Tacheẽ nyecua ndeje. Ae nyaacuquia si eã, ñquiã nda siquiã Dios rese, i que Jesús ee ra.

⁴ Nicodemo que ñee Jesús je ra. —¿Mañi nda mbia cuasu nyaacuquia si re? ¿Usi riequi rĩ nda esi si re? ¿Nyaacuquia si nonde re? i que Nicodemo Jesús je ra.

⁵ Jesús que ñee ee ra. —Tacheẽ nyecua ndeje. Ae nyaacuquia i achõ je nae, ñquiã nda siquiã Dios rese. Ae nyaacuquia Espiritu Turã abe je nae, ñquiã nguia ra siqui Dios rese cote.

⁶ Mbia nyaacuquia mose, mbia sí chõ eririĩ nde. Emo nyaacuquia mose Dios riirina, Dios rã si chõ eno nde.

⁷ “Nducuã”, erechĩ nda secheẽ mose jẽ. “¡Jenyaacuquia si ja chõ jẽ!” se i mose.

⁸ ¿Mbaranguiti si quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eĩ si chõ Dios riirĩ nde. Ae nyaacuquia Dios je nae, i que Jesús ee ra.

⁹ —¿Mañi ñquiã nde? i que Nicodemo Jesús je ra.

¹⁰ Jesús que ñee ee ra. —¿Secheẽ ereicuayãte quia re? Mbia mbaaquiatusa raque nde. Judíos mbaaquiatusa raque nde.

¹¹ Tacheẽ nyecua ndeje. Ae ureicua, ñquiã ño uresenei senei ndei nguiã jẽje. Ae rese uremae, ñquiã ño uresenei senei ndei nguiã jẽje. “Ichõiño nguiã”, jenyẽ chõchĩ nguiã urecheẽ mose.

¹² “Ichõiño nguiã”, jenyẽ chõchĩ nguiã secheẽ mose. Ibi jenda renei nenei mose jẽje. Secheẽ nda jemumba tuchi cote, ibatenda nenei nenei mose jẽje.

¹³ Emo nguichiãte ibei si. Se mii ño ngue achu nguiã nguichi ibei si. Mbiarã ño ngue achu nguiã. Asobe ra ibei. Ibei jenda chõ se re.

¹⁴ Sã Moisés mbei raanguia mbuchecua mbia je turuquia re cose no. Eĩ si ra mbia sembuchu ira rese.

¹⁵ † nda seicuada quichã eã mbei sesi. † nda seicuada siqui bei ibate serese.

Dios nyesequa ja mbia rese

¹⁶ Dios que nyesequa tuchite mbia ja rese ra. Nyebe nguiirĩ mii mbu nguiã mbia je. Eriirĩ icua sa ra manoa. Siqui bei rae.

¹⁷ Mbia mbasi sacua eã ngue Dios nguiirĩ mbu ibii ra. Mbia rirõ sacua mbae icua si quia ñi ngue Dios nguiirĩ mbu nguiã.

¹⁸ “Eso tata cuasu”, i eã nda Dios nguiirĩ icuada je. “Eso tata cuasu”, i Dios quia nguiirĩ icuada reã je ã. Jesús icua eãte quia ñene.

19 “Eso tata cuasu”, i Dios quia nguiirĩ icuasa reã je. Ebite quia ñi itondaru nyaashĩ si re. Nyaashĩ tu mose íbii, isiteã ngue ra. Mbae icuã ndese quia eriqui beite nguiã.

20 Ae siqui beite quia mbae icuã ndese, ùqui nguia siquichete nguiã nyaashĩ si. Nyaashĩ ndiichã sereãte quia ñene. “Ƒnda mbia mae eã nandechisaã ndese mbae icuã ndese”, i ñene.

21 Ae mbae turã saã mbeite quia nae, ùqui nguiatu nyaashĩ siichã sete nguiã. Ƒnda echisaã saã nyecua mbia je. Ƒnda mbia ñee, “Dios quirãcuã nguia siquite nguiã erese”, i ra mbia ñee, i que Jesús ra.

Juan el Bautista ñee turã Jesús rĩ

22 Jesús que nyoí Judéaa cote ra. Uchimbaaquiato rese. Huee que eriqui mocoite ùqui ndese ra. Huee que eriqui bautizar i mbia je ra.

23 Juan abe que bautiza r i quia mbia je ra. Enón, i que sucha tubiriã je ra. Salim ndurubí que ra. Hue quiato ngue i tubiriãte re. Mbia que ngaẽ ngaẽ nguia erea ra. Juan ngue bautizar i quia ee ra.

24 Mbia Juan tarõ nonde mĩ ngue eriqui bautizar i huee nyii ra.

25 Judío mo ngue ñee icuã icuã Juan ñimbaaquiato je ra. Bautizar i rĩ. —¿Aba quia ra bautizar i mbia mbitirõ sacuã nde? i que ñee icuã icuã nyue ra.

26 Nyebe Juan ñimbaaquiato nyoí nguiã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñimbaaquiato ñee ee ra.

27 Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose.

28 Cristo tu nonde que Dios sembu resẽ. Mbae mbuquiche ja sacuã Cristo tu nonde. “Cristo eã ño se resẽ”, ae checua rei que jẽje resẽ.

29 Jesús rui ra mbia siqui ja. Sã emo ngũinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui.

30 Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

31 Jesús rei ibatenda. Nyebe eaquiato riqui nguiã mbia si co. Ibi jenda chõ nande re. Ibi jenda rese achõ ño nandeaquiato nande re. Ae quiarei ibatenda.

32 Ibatenda umaesa senei senei nguia mbia je co. Ae echandu ibate nae, ùqui abe esenei senei nguia mbia je co. Mbia mĩ jiri riqui echeẽ andu andu ã.

33 Ùqui mĩ mĩ ño Jesús cheẽ isi turã nguiã ã. Ùqui mĩ “Dios ichõiñosa reã”, i tuchi nguiã ã.

34 Dios quiato que Jesús mbu ra. Nyebe Jesús riqui Dios cheẽ nenei nenei co. Dios que Espiritu Turã mondo tuchite Jesús je ra.

35 Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguiã ee. Ƒnda Jesús riqui mbae rerecuarã ja.

36 Ae Dios rucucha icua nae, ùqui nda siqui bei Dios rese. Ae Dios rucucha icuayã nae, ùqui nda siquiã tuchi erese. Nyoí eã mbei ra ibate. Dios ra ùqui mondo tata cuásuu.

4

Jesús ñee acuani mo je

¹⁻² Mbia que siqui tuchite Jesús rui cote ra. Bautizar i sacua mbia je. Jesús sí que bautizar i eã nda. Echimbaaquiatu quia ngue bautizar i nguiã ee. — Fariseos riqui ndeucuãyãte ã. Mbia siqui tuchi mose nderui, i que mbia mo Jesús mbiirandu ra.

³ Jesús jirandu mose que esi Judea recha cote ra. —Tasobe Galilea, i que ra.

⁴ Samaria ni ngue esi ra.

⁵ Ngasê ngue Samaria ra. Sucha tubiriã mo ngue ngasê nda. Sicar, i que hue je ra. Jacob chimee ibi ndurubite que huee ra. Ae emee nguiirĩ José je.

⁶ Jacob chibicoi ibi que chĩ huee ra. Noria. Jesús que ngoi huĩ uquenea ucua huee ra. Noria ji. Tenda nandeite re mose. Ñeenda ishote que ee ra.

⁷⁻⁸ Jesús ae que tiba huee ra. Echimbaaquiatu que nyoĩ sucha tubiriã nda. Mbae mo isi uchirã. Acuani mo ngue tu ngasê i rea huee ra. Samaria jenda que ae ra. —I embu rã. Tayu, i que Jesús ñee ee ra.

⁹ Judíos que ñee eã mbei quia mbia Samaria jenda je querabe ra. Isho bei que eriqui nyesi ra. Nyebe acuani ñee nguiã Jesús je. —Judiotte nde resê. ¿Mbaerã ereico ñee seje re? ¿Mbaerã ereico “i embu” i seje re? Samaria jenda chõ se resê, i que acuani Jesús cheẽ ndibishorõ nda.

¹⁰ Jesús que ñee ee cote ra. —Dios chimee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingo beisa amee ndeje, i que Jesús acuani je ra.

¹¹ Acuani ngue ñee si Jesús je ra. —Noria cuate nyeresê. I arasa ereru eãte quia a resê. Ma je quia ra i raanguia erechara seje.

¹² Nanderu ñiinda abe nda íu íu quia a yenda ye resê. Jacob. Nguiirĩ ndese. Erimba abe nda íu íu quia a yenda ye resê. ¿Ndeaquiatute ae si nde re? i que acuani Jesús je ra.

¹³ Jesús que ñee acuani je ra. —Mbia íu mose a yenda jie, eisei jei chõ nda eno.

¹⁴ Ae i raanguia mbei quia nae, ñquĩ nda eisei chiã mbei cote. I raanguia sechimee nguia ra siqui bei echiangui re. Uchi uchi bei ra equia echiangui re. Emingo bei sacua, i que Jesús acuani je ra.

¹⁵ Acuani ngue ñeembe Jesús je ra. —I raanguia embu nembae seje no. Eĩ nda seisei chiã mbei. Eĩ nda achu achu eã a jenda ara, i que acuani ee ra.

¹⁶ —Eso nderu rea. Eru seje a, i que Jesús ee ra.

¹⁷ —Seru eãte nyeresê, i que acuani nda. Jesús que ñee ee ra. —Ae beite. Nderu eãte que ereico namo co ra.

¹⁸ Nderurã ngue eretea mocoite rei resê. Cinco. Ae erereco co nae, nderu tuchi eã ño aque re. Erecheẽ ñoño ãte rei nguiã seje a, i que Jesús acuani je ra.

¹⁹ Jesús cheẽ mose que acuani ñeembe ee no nda. —Mbae mbuchecuasa nde reae. Dios resenda nde reae.

²⁰ Uramei nda ngaẽ ngaẽ nguia a ibi ato ra. Ñee ñee sacua Dios je. “Jerusalén quiatu mbia cheẽsa Dios je re” jenye chõchĩ nguiã judíos, i que acuani Jesús je ra.

²¹ Jesús que ñee acuani je ra. —Tacheẽ nyecua ndeje. Mangue choño ãte ra mbia ñee Dios je cote. Namu jiri. Jerusalén mui eã. A ibi ato mui eã no.

²² Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icua si.

23 Namo jiri ra Dios quiatote ñee turã turã Dios rĩũ uchiangui re. Manguue chooñoa cote. Dios quiatote ra ñee turã bei quia Dios rĩũ cote. Echeẽ nguire.

24 Dios rei espíritu. Mae aronea erese. Nandechiangui re chõ nandeico Dios andu ã. Nandechiangui re nandechẽ turã turã Dios rĩũ. Dios cheẽ nguire, i que Jesús ra.

25 Acuanĩ ngue ñee Jesús je ra. —Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ūquĩ aicuate quia co, i que acuanĩ nda.

26 —Cristo chõ se re. Ae je ereico ñee, i que Jesús acuanĩ je ra.

27 Aque mose que Jesús chimbbaaquiato ngaẽ ngasẽ cote ra. —Jesús riquichĩ ñee acuanĩ je a re, i que eu nyuruirate mae erese ra. —¿Mbae jenyẽ quia ñee nde? i eã ngue emo nda. Ireĩ ireĩte quiatu ngue ñee Jesús je re.

28 —Se rei Cristo, i mose que acuanĩ ía tuchi ra. Ñio ngue esecha oso ra. Mbia mbiirandu randu sucha tubiriã jenda.

29 —A emo ndiqui a. Semumbusẽ ja que ra. Cristo chõ ae reae. Nyao rã mae erese, i que acuanĩ mbia je ra.

30 Nyebe mbia nyoĩ ja nguĩã ícuua. Jirandu mae Jesús rese. Acuanĩ ñee nguire.

31 —Mbae mo eu, i chũbe ibe que echimbbaaquiato Jesús je ra. Acuanĩ oso mose sucha tubiriã.

32 —Tei. Sechiu jẽicuayãte jẽ, i que Jesús ee ra.

33 —Emo mbae mo queru echĩurã ndeae, i que echimbbaaquiato ñee ñee nyue ra.

34 Jesús que ñee ee ra. —Ae rĩũ Paba ñee seje nae, ũquĩ tasaã mbei quia ee. Paba cheẽ mumbayã mose, ũquĩ ño sechiu riqui nguĩã.

35 “Pete mbae ishao shao ñi pe”, jenyẽ chõchĩ nguĩã ã. Mbiaco yenda ea ireĩ ishao iriã na ño mbia riqui nguĩã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru reru seje. Serese siqui sacua.

36-38 Sã emo ndiqui mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ũquĩ ia jate nyiese cote. Ae emo ndiqui secheẽ nenei nenei nyii, huee jaemondo quia aque. Mbia reru reru sacua seje. Se mbia mingo bei sacua. Emo nane serenei nenei nguĩã ee nyii. Jẽ jẽingo ereru reru seje ã cote. Jẽya jate riqui jenyiese ã cote. Ae secheẽ nenei nenei quia nyii, ũquĩ ndese jẽya jate, i que Jesús ra.

39 —Jesús que semumbusẽ ja ra, i que acuanĩ ñee sucha tubiriã jenda je ra. Nyebe mbia tubiriã siqui nguĩã Jesús rui hue jenda cote.

40 Samaria jenda que nyoĩ Jesús rea cote ra. —Eico are jiri ure rese, i que mbia Jesús je ra. Nyebe Jesús itõ nguĩã nyeremo huee.

41 Jesús sí que mbia mbaaquiato quiatu cote ra. Nyebe mbia tubiriã siqui tuchi nguĩã eruĩ cote.

42 Mbia que ñee acuanĩ je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguĩã eicua tuchi ã cote. Erecehẽ ñooñoa ngue ra. Cristo tuchi chõ ae re. Mbia rirõsa mbae icua si chõ ae re, i que mbia ñee acuanĩ je ra.

Jesús ererecua mo ndiirĩ mbucherõ

⁴³ Huee que Jesús itō nyeremo nda. Samáриаa. Hue si que esi si nyuruã Galilea quiti ra.

⁴⁴ —Mbia ra Dios cheñ nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa.

⁴⁵ Jesús que ngasẽ Galiléaa cote ra. Mbia hue jenda que embucuasẽ turã nda. Mae nguiatu equia erese Jerusalén neaẽ. Pascua mose. Mbia mae sayã nguiatu ngue Jesús saã saã nguiã ee nyii. Nyebe eyate nguiã Jesús cuasẽ mose cote.

⁴⁶ Jesús que oso si Caná de Galilea no nda. Ae eriqui i mbuchiicabo uva rigue rã mbia je nyii nae, huee que esi si ra. Hue rurubi que ererecua mo ndiriĩ ndasi riqui ra. Capernaum, i que hue je ra.

⁴⁷ —Jesús ru Judea si a cote, i que mbia ererecua mbiirandu ra. Nyebe ererecua si nguiã Jesús rea cote. —Seriirĩ chí mano serĩte qui. Nyao terembucherõ seje, i que ererecua ñee ee ra.

⁴⁸ —Mbia mae sayã naa eã mose ra jẽ seicuayã ñochĩ nde, i que Jesús ee ra.

⁴⁹ —Nyao jei rã. Seriirĩ nda mano nyee re, i que ererecua Jesús je ra.

⁵⁰ —Esobe nyebi ndechúaa. Nderiirĩ ngue nyerõ nda, i que Jesús ee ra. —Jesús ñee ñooño aroneate, i que ererecua oso nyebi ra.

⁵¹ Echuchua rurubi que erimba ngaẽ erobeishĩ ñee nda. —Nderiirĩ ngue nyerõte ra, i que ñee embiirandu ra.

⁵² —¿Ma tenda seriirĩ ngasi ucua re? i que ererecua ra. —Tenda nyiichere ramo mose que nderiirĩ ngacu ucua curi ra, i que mbia ñee ee ra.

⁵³ —Hue tenda tuchi que Jesús ñee seje curi ra. “Nderiirĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra.

⁵⁴ Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquerã nyii ra. Ererecua riirĩ ngue embucherõ namo no nda.

5

Jesús Amei mbucherõ

¹ Aquere que judíos mbae fiesta ra. Jesús que oso Jerusalén fiesta mose ra.

² Oveja iguesa que chí huee ra. Mbia icua abe que chí huee ra. Cinco tei que chí hue eicua mama nda. Betesda, i que judíos hue mbia icua je ra.

³ Mbia rasi que chí jate nyaara huee ra. Taiqui re. Eresayã. Ecuatayã. Echaacua. Mbia rasi chumumbara que chí huee ra. I rebera raarõ arõ.

⁴ Angel mo nda nguichi quichi quia ra. I mumbera sacua mbia rasi je. —Ae rane nda ua ama ndebera mose nae, aque rane nda nyerõ, i que mbia ra.

⁵ Amei ndasi ima mo ngue chí bei aque rĩ nda. Treinta y ocho años que amei ndasi ra.

⁶ Aque que chí nyaara Jesús je ra. —Aa chõ erasi riqui bei a cose re, i que Jesús uchiangui re ra. —¿Erecherõ sete ere? i que ee ra.

⁷ Amei ndasi que ñee ee ra. —Aba quia ra sembua i ye, i rebera mose. Mbia rane ngue secuã secuã nguia ra. I rebera mose, i que erasi Jesús je ra.

⁸ Jesús que ñee ee ra. —Èhuã. Ndequisa erao. Eso, i que Jesús ee ra.

⁹ Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda.

¹⁰ Nyebe judíos paama i nguiã embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? i que judíos Jesús chimbucherõ je ra.

11 —Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra.

12 Judíos que ñee ee ra. —¿Aba aque re? ¿Aba “ndequisa erao”, i ndeje re? i que ra.

13 —Aicua eãte se. Aba chõ sembucherõ. Mbia tubirĩate quiatu ngue re, i que erasi judíos je ra. Jesús oso rei.

14 Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —¡Sã jê! Arembucherõ ngue se resê. ¡Mbae icuã nda eresaã sichĩ jê! Mbae mo nda jêĩ tuchi ndeje cote, i que Jesús ee ra.

15 Amei ngue oso judíos mbiirandu cote ra. —Jesús chõ sembucherõ nguia reaẽ, i que judíos je ra.

16 Nyebe judíos paama i nguiã Jesús je. Nandeiquia, i. Sábado mose quia Jesús riqui nguiã mbia mbucherõ cherõ judíos je. Judíos uquenea ucua mose. Nyebe judíos paama i nguiã ee.

17 Jesús que ñee judíos je cote ra. —Paba recoteã mbeite riqui co. Namó abe. Se abe Paba rã si serecoteã teã mbeite riqui co, i que Jesús ee ra.

18 Nyebe judíos riqui nguiã paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbia rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguiã ee.

Jesús rei Dios rucucha

19 Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguiã mbae raã naa se abe co. Ae Paba saã saã nguia, ùquiã asaã saã ja quia se abe co.

20 Dios rucucha rei se. Paba riqui nyesequa tuchi serese co. Paba riqui uchiao reacuquia tuchi seje co. Uchiao ra eteacuquia tuchi seje cote. Mbia mae sayã tuchi. Jenyuruira tuchi ra mae erese cote.

21 Paba mbia raaque mbuquera quera. Se abe ra mbia raaque ambuquera quera. Ae amingo bei sete, ùquiã abe ra amingo bei.

22 Paba ra mbia mo mondo eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra.

23 I nda mbia ñee turã serĩ. Sã mbia riqui ñee turã Paba rĩ no. Ae ñee turã eã nguia serĩ, ùquiã ñee turã eãte Paba abe rĩ no. Dios rucucha rei se. Dios chimee ndei se.

24 Tacheẽ nyecua jêje. Secheẽ andusa ra siqui bei. Paba icuasa ra siqui bei. Nyoĩ eã mbei ra tata cuásuu. Paba ra emingo bei cote.

25 Tacheẽ nyecua jêje. Namó jiri ra mbia raaque secheẽ andu. Secheẽ mumbasa reã nda siqui bei.

26 Paba quiarei mbia mingo beisa. Se abe rei mbia mingo beisa Paba rui si.

27 Se abe ra mbia amondo tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. Se chĩ erucucha.

28 ¡Jenyuruira techĩ nda secheẽ mose jê! Mbia raaque ra secheẽ ñandu ja chee.

29 Júã ja ra ngua si. Ae siqui turã, ùquiã nda Dios mingo bei cote. Ae siqui icuã icuã nguia, ùquiã nda nyoĩ tata cuásuu.

Serĩ ño embesa ji ñee, i Jesús

³⁰ Se ae ra mbae asaã eã. Paba cheẽ ndui si chõ aico nguiã mbia mondo tata cuásuu. Paba cheẽ ndui si chõ aico nguiã mbia mingo bei no. Paba cheẽ nda achabiã. Paba cheẽ nguire chõ aico nguiã mbae raã naa co. Se ae eã ño ñene.

³¹ Se ae eã ño acheenei enei nguiã mbia je co. † nda “ichõ:ño” jenyere rei seje.

³² Aque emo ndiqui serenei nenei mbia je aque. Aque eriqui ñee ñooño eã serĩ aque.

³³ Jemo ngue jemondo Juan je. Jẽirandu sacua serese. Juan ngue ñee ñooño eãte jẽje ra.

³⁴ Ae mbia ñee ñee serĩ, ùqui ñee ndeseã aico nguiã se. “Dios riirĩ eã ño co re”, i mose mbia serĩ, Dios riirĩ mbei chõ se re. Jẽicuã mbutiã sacua ño aico rei nguiã ñee jẽje.

³⁵ Tata rendi rã ndei Juan. Mbae resae ja raque. Huee que jengu mbirĩ ndei erese ra. Jẽhui jei chõchĩ esi.

³⁶ Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheẽ nguire ae aico nguiã mbae ao ao co. Sechisaã ndese mae jee mbia jirandu nguiã serese cote. “Dios chimondo quiarei Jesús”, i mbia cote.

³⁷ Paba abe riqui serenei nenei mbia je co. Paba cheẽ jeñauate raque. Jemaesayãte raque Paba no.

³⁸ Jẽ nguia seicuyãte nguiã co. Paba chimondo chõ se re. Nyebe Paba cheẽ chĩ eãte jendese.

³⁹ Embesa ji rese jẽingo mae tuchite raque. “Embesa ji ra nandemingo beite”, jenyechĩ nguiã. Serese jembirandu sacua ño embesa ji re. Se quiatu mbia mingosa tuchi re.

⁴⁰ Jẽ nguia jẽingo sereãte nguiã serese. † nda se jaemingo beite rei.

⁴¹ Jẽingo eã mose Dios rese, sebiãte jeñee turã turã mose serĩ.

⁴² Co aico jẽicuate co resẽ. Jenyesequa eãte quia Dios rese co resẽ.

⁴³ Paba que sembu resẽ. Jẽo eã ñochĩ serese. Paba chimondo eã tu mose, aque rese quia ra jẽo tuchite cote.

⁴⁴ Mbiasa rae jẽingochĩ nguiã jẽturã naa naa. Dios je quiarei jẽturã eãte. ¿Mañi jenyere quiatu ra equia seicua re?

⁴⁵ Se quia ra jẽicuã ambuchecua eã Paba je. Moisés chimbesa quia jẽicuã mbuchecua nguiã. “Moisés chimbesa rei mbia mingo beisa”, jenyechĩ nguiã.

⁴⁶ Moisés chimbesa jẽicua eãte quia ã. Nyebe jẽingo nguiã seicua eãte ã. Serĩ ngue Moisés embesa ra.

⁴⁷ “Nya” jenyere eã mose Moisés chimbesa je, “nya” jenyere eã nda secheẽ mose abe no, i que Jesús judíos je ra.

6

Jesús mbichae mbeta tuchi

¹ Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra.

² Mbiasa que nyoĩ tuchite Jesús rui ra. Mbiasa mae sayã ngue Jesús saã saã nguia ra. Echisaã ndese que mbiasa mae mae nda. Mbiasa rasi mbucherõ cherõ mose.

³ Sita ibate rĩ ngue Jesús choi ra. Huee que echi ngoi uchimbaaquiatu rese ra.

⁴ Fiesta de pascua rurubi que ra.

⁵ Mbia tubiriã ngue ngaẽ nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echürã nandeisi mangue re? i que Jesús ee ra.

⁶ Jesús eicuate raque. —Mañi nda Felipe quia secheẽ mose reae, i que Jesús ra.

⁷ Felipe que ñee ee ra. —Doscientos plata mbia chayãte mbia chiurã isi sacua. Echayã tuchite, i que Felipe ra.

⁸ Andrés abe que chi ra. Jesús chimbbaaquiату. Simón Pedro nongue. Ae que ñee nda.

⁹ —A ãquẽ mo ndiqui a. Cinco mbichae rerequia a. Sira nyeremo abe rerequia a. Echayãte quiату nda re. Mbia tubiriãte quia ñene, i que Andrés Jesús je ra.

¹⁰ —“Jengoi ja”, jentye mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabẽ. Cinco mil que mbia ra.

¹¹ Jesús que mbichae isi cote ra. Iaanye, i que ngu je cote ra. Mbichae riã. Mbichae que embuchao chao cote ra. Uchimbbaaquiату je que emondo mondo ra. Echimbbaaquiату que emondo mondo mbia je cote ra. Ae chi ngoi. Sira abe que embuchao chao mbia je ra. Mbia que eu ja ra. Mbia que echosei chiã chiã nyee ra.

¹² Mbia rio ja mose que Jesús ñee uchimbbaaquiату je cote ra. —iMbia chiu sique jemunua nua jẽ! jendecoquiату ja jẽ! i que ra.

¹³ Echiu sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aẽ.

¹⁴ Mbia que mae tuchi Jesús rese ra. Mbichae mbeta rese ra. Ñquĩ ndese que mbia riqui mae eã tuchi nyii ra. —Dios cheẽ nenei neneisa chõ co riqui re. Ae uresaarõ arõ nguia, ae chõ eriqui re, i que mbia Jesús riã nda.

¹⁵ Jesús que mbia icua ra. —Mbia ra seisichĩ suruchoi ererecuarã nde, i que ra. Nyebe esi si nguia mbia recha. Sita ibate ri ngue esi erecha ra.

Jesús ngata i arõ

¹⁶ Itondaru ndaru que Jesús chimbbaaquiату choi ama ndísaa ra.

¹⁷ Nyui nyui que canoa ye cote ra. Aque echoichĩ nguia iasa Capernaum aque. Jesús que nyebi eã mbeite u ee ra. Itondaru chee. Nyoi chee que erecha ra.

¹⁸ Quiririã ngue tu icua icua ee ra. Ama ndiite re mbia reco mose. I rebera que tu asi asi tuchi ra.

¹⁹ Mbia que nyoi choi bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echia ngue cuaãcua i tuchi ra.

²⁰ —Se chõ nyeresẽ. ¿Mbaerã jẽingo siquiche sesi re? i que Jesús ee ra.

²¹ Canoa yenda que oote erese cote ra. Mbua que canoa ye ra. Ngasẽ asi que ecuaẽ ibii cote ra.

Mbia cuabẽ Jesús requia

²² Mbia cuabẽ ngue chi sobei ra. Isamami ngue Jesús tiãte ee ra. Nyebe ñee nguia nyue. —Canoa mĩ ño ngue chi resẽ. Canoa ye eã ño Jesús si iasa resẽ. Echimbbaaquiату achõ ño ngue nyoi iasa canoa ye resẽ. ¿Mangue Jesús riqui mangue re? i que mbia cuabẽ u ñee Jesús requia ra.

²³ Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbia mbichae usa rurubi que ecuaẽ tiba ra.

24 Jesús tiã mbei que mbia je huee ra. Mbichae úsaa ra. Echimbaaquiatu abe tiã ngue mbia je ra. Nyebe mbia choi nguiã erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

25 Mbia cuabẽ ngue ngaẽ ama ndasa coquimo ngote ra. Ngasẽ ngue Jesús je cote ra. —Mbia mbaaquiatusa, ¿manose erechu ngasẽ aa re? i que mbia cuabẽ Jesús je ra.

26 Jesús que ñee ee ra. —Tacheẽ nyecua jêje. Se jembuquiarure chõ jẽingo nguiã serese. Se jembiore chõ jẽingo nguiã serese. Sechisaã icuare rocoi. Jemae sayã ngue asaã saã ndei quia resẽ.

27 Jenyurã ndese jẽingochĩ nguiã ndua tuchite. Ũquí nda ua jeite. Ae ua eã mbeite quia, ũquí ndese quiatu jendua. Mbia mingo beisa rese quiatu jendua. Se rei mbia mingo beisa. Se rei Dios rucucha. Paba que uquirãcuã mondo seje ra, i que Jesús ee ra.

28 Mbia que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra.

29 Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra.

30 —¿Mbae mo nda eresaã na ure je re, uremae sayã nde? I nda uremae nderese. Eĩ ure ra ndeicua cote.

31 Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra.

32 Jesús que ñee ee ra. —Tacheẽ nyecua jêje. Moisés eã ño ngue mbichae mondo nguiã mbia je ibei si. Paba chõ ngue emondo nguiã ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote.

33 Dios riqui mbichae mbuae mondo mondo mbia je co. Ae Dios mondo mondo nguiã mbia je co nae, aque que tu ibei si ra. Aque rei mbia mingo beisa, i que Jesús ra.

34 Mbia que ñee Jesús je ra. —Aquembichae mbichae emondo mondo bei quia ure je, Urererecua, i que mbia Jesús je ra.

35 Jesús que ñee ee cote ra. —Mbichae rã ño se re. Mbia mingo beisa chõ se re. Serese siqui mose ra jeniãcuã eã mbei. Serese siqui mose ra jẽisei eã mbei. Jẽya bei rae.

36 Jemae ndei que equia serese resẽ. Seicuayã mbei chõchĩ nguiã ã. Acheẽ ndei que jêje nyii resẽ.

37 Ae Paba mee seje mbia nae, ũquí nda siqui bei serese. Ũquí nda aisi teã eã mbei.

38 Paba que sembu ibei si resẽ. Secheẽ nguire eã ño aico nguiã mbae raã naa. Paba cheẽ nguire ae chõ aico nguiã mbae raã naa co.

39 “Ae amondo ndeje nae, ũquí mo nda quiachãchĩ”, i que Paba seje ra. Ambuquera ja ra se, se tube mose ibii.

40 Se rei Dios rucucha. Paba que sembu ra. Ae seicuate nae, ũquí nda siqui bei. “Ũquí nda amingo bei”, i que Paba ra. Ũquí nda ambuquera ja, se tube mose ibii, i que Jesús ra.

41 Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra.

42 —Jesús chõ co re. José ririĩ ño co re. Eru rese que nandemae ndesê. Esi abe rese que nandemae ndesê. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra.

43 Jesús que ñee ee cote ra. —¿Mbaerã jêingo ñee icuã icuã serii nde?

44 Mbía ae ra siqui eã serese. Paba mingo mose serese, aque mose ra eriqui tuchi serese cote. Ũquí nda ambuquera si mingo sechube mose íbii.

45 “Dios ra mbía mbaaquiату ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese.

46 Emo ngue mae eãte Paba rese ra. Se mii ño ngue amae erese ra. Esi chõ ngue achu resê.

47 Tacheẽ nyecua jêje. Ae seicuate quia nae, ũquí nda siqui bei.

48 Se rei mbichae rã. Mbía mingo beisa rei se.

49 Nanderamei ngue maná u u turã ndei quia turuquia re ra. Emo mose que mano mano ja ra.

50 Mbichae mbuae chõ asenei senei nguiã jêje co. Mbía mingo beisa rei mbichae mbuae. Aque que tu ibei si ra. Ae mbichae mbuae u nae, ũquí nda siqui bei. Ũquí nda ua eã mbei.

51 Se rei mbichae. Ibei si que achu ra. Mbía mingo beisa rei se. Ae seu nae, ũquí nda siqui bei. Mbichae ra amee mbía mingo bei sacua. Aque mbichae rei serete sí. Seroo sí, i que Jesús judíos je ra.

52 Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra.

53 Jesús que ñee ee cote ra. —Tacheẽ nyecua jêje. Mbiarã ngue achu ra. Serete jêu eã mose, jêingo bei eã ndae. Seruqui jembei eã mose, jêingo bei eã ndae.

54 Ae serete u quia nae, ũquí nda siqui bei. Ae seruqui mbei quia nae, ũquí nda siqui bei. Ũquí nda ambuquera si mingo, sechube mose íbii.

55 Serete rei mbía chiú rã. Seruqui rei mbía chimbei rã.

56 Ae serete u quia nae, ae seruqui mbei quia nae, ũquí nda siqui bei sechiangui re. Se abe ra aico bei echiangui re.

57 Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se.

58 Mbichae mbuae chõ asenei senei nguiã jêje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbía mingo bei eã nda. Emo mose que mano ja chõ nda. Ae sechimée u quia nae, ũquí nguia ra siqui bei, i que Jesús judíos je ra.

59 Eĩ ngue Jesús quia judíos mbaaquiату quiatu ra. Capernaum. Judíos chumunuásaa.

Mbía tubiriã huí Jesús si

60 Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re. Echeẽ nandemumba eã aroneate quiatu quia re, i que nyue ra.

61 —Mbía riqui ñee icuã icuã tuchi chĩ secheẽ nii, i que Jesús uchiangui re ra. Nyebe ucheẽ mbuchecua ee cote. —¿Mbaranguiatuãte secheẽ jêje re?

62 ¿Mañi jenyé ra mae mose serese re? Sesó si mose ibate re.

63 Nande rete nandemingo eã nguiã. Nande aĩ ño nandemingo nguiã. Secheẽ nguia ra mbía mingo bei íbatee.

⁶⁴ Seicua ja eãte quiatu nguiã ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchiangui re ra. —Ã nda seicua. ã nda seicua eã. Co ra semondo mbia icuã je, i que Jesús mbia icua uchiangui re nyii ra.

⁶⁵ —Acheẽ ngue jêje nyii, ùquĩ sí aico ñee jêje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶ Aque mosebe bei que mbia tubiriã hui Jesús si cote ra. Ae siqui erese nyii nae, ùquĩ mo ngue hui ja esi cote ra. Ngatayã ngue equia erui cote ra.

⁶⁷ Jesús que ñee uchimbaaquiato je cote ra. Doce je. —¿Jê abe ra jêhui sesi re? i que uchimbaaquiato je ra.

⁶⁸ Simón Pedro que ñee ee ra. —Tei, Urererecua. Aba rui quia ra ureico cote. Ndecheẽ ño mbia mingo beisa resẽ.

⁶⁹ Ureico ndeicua ã cote. Cristo rei nde. Dios rucucha rei nde, i que Pedro ra.

⁷⁰ Jesús que ñee ee cote ra. —Jê doce que jaẽirabo rei ra. Sechimbaaquiato sacua. Jemo ngue diablo rã nda, i que ra.

⁷¹ Judas Iscariote riĩ ngue eriqui ñee nda. Diablo, i. Simón ndiirĩ ndei Judas. Ae quia Jesús mee nguiã mbia icuã je. Jesús chimbaaquiato mo ndaque.

7

Jesús nongue siquiã Jesús rese

¹ —Jesús nandeiquia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra.

² Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra.

³ Jesús nongue que ñee ja ee ra. —Eso rã Judea. † nda ndechimbaaquiato mae ja ndechisaã ndese Judea jenda.

⁴ Mbae esaã nyecua chõ mbia resa rae jê! † nda mbia ndeicua ja. Co ereico mbia mae sayã naa naa co. Mbia resa rae quiato esaã saã, i que enongue ee ra.

⁵ Jesús nongue abe que Jesús icuayãte ra. Nyia, i eã Jesús cheẽ je.

⁶ Jesús que ñee ee cote ra. —Emo mose quia ra aso nyecua mbia je cote. Jê jêso jê ae ae, jêsose mose.

⁷ Dios cheẽ mumbasa riqui jêucuyã eãte raque jê. Se quia eriqui nguiã seucuyãte ã. “Jenyisaã saã nguiã eicuãte riqui nguiã”, ae quiato nguiã ee co. Nyebe eriqui nguiã seucuyãte ã.

⁸ Jê ño jêso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra.

⁹ Jesús que siqui are jiri Galilea cote ra.

Jesús mbia mbaaquiato quiato fiesta mose

¹⁰ Jesús nongue que nyoi fiesta rea cote ra. Aquere que Jesús abe si mingue cote ra. Ngasẽ nyecuyã ño ngue oso ra. —Mbia ra jiranduchĩ serese re, i que uchiangui re ra.

¹¹ Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra.

¹² Mbia que ñee ata atate Jesús riĩ nda. —Jesús turãte que, i que emo emo nda. —Jesús turã eã ngue ra. Mbia mbiirĩ irĩte que equia no nda, i que emo emo no nda.

13 Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús rĩĩ.

14 Fiesta ite mose que Jesús si Dios chuchua mbia mbaaquiato quiatu cote ra.

15 Judíos que nyuruira tuchi Jesús cheẽ andu ra. —Eaquiature quia eriqui re. ¿Mangue eriqui ñimbaaquiato mangue nyii re? i que mbia ra.

16 Jesús que ñee ee ra. —Secheẽ ae eã asenei senei nguiã jêje co. Paba cheẽ ño asenei senei nguiã jêje. Ae sembu.

17 Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee serĩĩ.

18 “¡Sã mbia ñee turã mbe i serĩĩ jê!” i ra emo ucheẽ achõ nenei nenei. “¡Sã mbia ñee turã mbei Dios rĩĩ nguiatu jê!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambiriĩ irĩ eã ño nguiã co.

19 Moisés que Dios cheẽ mbesa rei nande je ra. Nande emumbayã sacua. Jê ngua rei Dios cheẽ mumba. ¿Mbaerã jêingo seiquia serĩte re? i que Jesús ee ra.

20 Mbia que ñee ee cote ra. —Emo ndiqui ndeiquia serĩ eãte co. Aba checuayã icua ae nembicua ndeae, i que mbia Jesús je ra.

21 Jesús que ñee ee cote ra. —Mbia rasi mo ngue ambucherõ sábado mose. Aque mui ño ngue asaã ndei nguiã. Aque mui je chõ jêingochĩ nguiã nyuruirate mae serese.

22 Moisés que circuncisión teacuquia jêje ra. Nanderamei nane ngue circuncisión saã nguiĩĩ je ra. Nyebe jêingo nguiã sábado mose abe circuncisión naa naa jendiĩĩ je.

23 Moisés cheẽ nguire chõ jêingo nguiã circuncisión naa naa jendiĩĩ je ã. Sábado mose abe. ¿Mbaerã jêingo paama i seje mbia mbucherõ mose sábado mose re?

24 “Aque eicuãte”, jenyje jei chõchĩ nguiã. Jêirandu turã na erese nyii, i que Jesús ee ra.

Ibatenda chõ se re, i Jesús

25 Jerusalén jenda que ñee ñee Jesús rĩĩ cote ra. —A Jesús riqui ñee mbia je a. ¿Nandererecua ra Jesús icua eã si chõ nde?

26 A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui reĩ nandererecua je re?

27 Cristo eã ño Jesús re. Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda.

28 Jesús que echeẽ ñandu ja ra. Dios chuchúaa eriqui mose mbia mbaaquiato quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jê seicuate re? Se ae achu eã nguiã co. Sembu ji ae aico nguiã co. Ichõñosa reã ae ngue sembu nguiã. Ae rese jemae ãte nae, ae chõ sembu nguiã.

29 Se ae que amae erese ra. Esi que achu ra. Ae chõ sembu nguiã co, i que Jesús ee ra.

30 Mbia que paama i Jesús cheẽ mose ra. —Jesús nandeisi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i ãte quiarei Dios ee.

31 Mbia tubiriã ngue Jesús icua icua ramo nguia cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiatu

mo nda tuãte rei. Co mii tuchi chõ ndei Dios chimbu co, i que mbia tubiriã nguia ñee ñee Jesús riñ nda.

Fariseos paama i Jesús je

³² Fariseos que nyiisaquia mbia cheẽ ndese ra. Mbia ñee turã turã mose Jesús riñ. Nyebe fariseos paama i nguia Jesús je. Policía jenda mo ngue emondo rei Jesús isi sacuañ nda. Sacerdote rerecua abe que policía jenda mondo rei Jesús isi sacuañ nda.

³³ Jesús que ñee nda. —Aico mbirí ño nguia jendese a cote. Aquere ra aso si Paba rea. Aẽ sembu.

³⁴ Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra.

³⁵ Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ũquí ndea ra esi reae. Griegos mbaaquiato sacuañ ndeae.

³⁶ “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiañ nande je. ¿Mbaerã eriqui ñee nande je ũquí nde? i que judíos u ñee nyue ra.

Jesús icuasa rei i riõ na

³⁷ Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se.

³⁸ Ae ra seicua nae, i riõ na nda ũquí. Iãcuã turã na nda ũquí”, sã embesa ji riqui i no, i que Jesus ucheẽ mbirãtãte mbia je ra.

³⁹ —Ae ra seicua nae, ũquí je ra Espiritu Turã amondo, i ñene. Espiritu Turã mbu nonde chõ eriqui nguiañ ñee. Jesús oso eã mose ibate chõ eriqui nguiañ ñee.

Mbia ñee atate Jesús riñ

⁴⁰ Mbia tubiriã ngue chi Jesús cheẽ andu ra. ũquí mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguia co, i que u ñee Jesús riñ nda.

⁴¹ Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ.

⁴² “David riirĩ nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra.

⁴³ Hue ri ja mbia ñee eãchĩ Jesús riñ. Mbia que ñee ata ata Jesús riñ nda.

⁴⁴ —Jesús nandeisi serao tarõ, i rei que emo emo ñee nda. Isiã si que ra.

Fariseos Jesús icuayã

⁴⁵ Policía jenda ochi que nyoĩ nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra.

⁴⁶ Policía jenda que ñee ee ra. —Aque Jesús riqui mbia mbaaquiato turã tuchi aque. Ae rã si emo mbia mbaaquiato turã aronea, i que policía jenda ñee mbia rerecua je ra.

⁴⁷ Fariseos que ñee policía jenda je cote ra. —¿Jẽ abe chee chõ Jesús jembĩrĩ irĩ nguia re?

⁴⁸ Nandererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ.

49 ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra.

50 Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra.

51 —Emo nandembasi mbasi chooño aroneate. Echeẽ nandechandu rane nguiatu. Nandeirandu ja rã nguiatu erese. Embasi nonde. Eĩ ngue Moisés embesa mii nande je ra, i que Nicodemo uataque je ra.

52 Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra.

53 Mbia que nyoi ja uchuchua cote ra.

8

Cuña mo siqui emo ndu rese

1 Jesús que oso Monte de los Olivos ra.

2 Isamami ngue Jesús si nyebi si Dios chuchúaa ra. Eresaitõ ndabe. Mbiam que esichã tuchi ra. Jesús que ngoi ra. Mbiambaaquiātu quiatu.

3 Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbiam je ra. Mbiam ite re que fariseos cuña mii nda.

4 Ae cuña curucuaẽ nae, uqui ngue ñee Jesús je ra. —Urembaaquiatusa, mbiam que mae cuña ndese ra. Emo ndu rese siqui mose.

5 Moisés que ñee nande je ra. “Ã jẽiquia sita je”, i que Moisés quia ã mbiam rii nda. ¿Mañi ere ra ã nii ñee nde re? i que cuña ndurucuaẽsa ñee Jesús je ra.

6 —Jesús nandembiiĩ. I nda ñee icua. I nda mbiam nandembiiicua Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra.

7 —¿Mañi ere ra nde cuña je re? i bei que mbiam quia Jesús je ra. Jesús que juã ñee mbiam je cote ra. —Jemo turã mbeite mose, sã aque rane cuña chei sita je, i que Jesús ee ra.

8 Nyatiquio si que ibi mbesa ra.

9 Jesús cheẽ andu mose que mbiam rerecua ireĩ ireĩ ja chõ nda. —Nandeciua jate que, i ja chõ ngue ñee uchiangui re ra. Nyebe echoi nguiã usẽ ja. Amei nane ja que ra. Eataque quia usẽ nguiã erui cote. Ererecua que usẽ ja ra. Jesús ae que siquichõ nda. Cuña ndesechõ.

10 Jesús que juã mbiam rerecua ruibe cote ra. Cuña je que ñee cote ra. —¿Manderurucuaẽsa ma nde? “Nandechiã rã sita je”, ¿iate emo nguiã nderii co re? i que Jesús ñee cuña je ra.

11 —Tei. Emo ñeeãte, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje. Eso rei. ¡Mbae icua nda eresaã sichĩ jẽ! i que Jesús cuña je ra.

Tata rendi rã ndei Jesús

12 Jesús que ñee si mbiam je ra. —Mbiam ja mbaaquiatusa chõ se re. Tata rendi rã ño aico nguiã mbiam je co. Ae siqui serui nae, uqui nda siquiã itondáruu. Uqui amingo bei quia querabe co, i que Jesús mbiam mbaaquiātu ra.

13 Fariseos que ñee Jesús je cote ra. —Ndechue chõ ereico nguiã ñee mbiam je. Nyebe mbiam “coche rei” i aronea ndecheẽ je, i que fariseos ñee Jesús je ra.

14 Jesús que ñee echeẽ ndibishorõ nda. —Sechue acheẽ ndaque mbia je. “¿Ae bei jê!” i chõ mbite raque aba secheẽ mose. Ae si achu nae, huee jêicuayâte. Ae ra aso nae, hue abe ra jêicuayâte no. Se ae aicua nguiã co.

15 Jeñee icuã jei chõchĩ nguiã aba rĩĩ. Mbae mumbusẽ ja mose rocoĩ. Eĩ ae eã ño nguiã se.

16 “Co eicuãte”, ae eã nguiã se ae co. Paba rese chõ aico nguiã mbia mumbusẽ ja co. Nyebe aico nguiã ñee Paba cheẽ ndui si co.

17 “Mbia nyeremo ñee mose hue rĩ si, ‘ae beite’ jenyê chõ”, i que Moisés jêje ra.

18 Sã ure nyeremo ure no. Paba rese. Ae sembu. Sã ureico ñee serĩĩ Paba rese no. Ure nyeremo, i que Jesús fariseos je ra.

19 —¿Ma nderu riqui ma nde? i que fariseos Jesús je ra. Jesús que ñee ee ra. —Paba jêicuayâte quia ã. Se abe seicuayâte quia ã. Jê seicua mose, Paba abe ra jêicua, i que Jesús ra.

20 Eĩ ngue Jesús quia mbia mbaaquiату quiату Dios chuchúaa ra. Ofrenda no noga jii que eriqui mbia mbaaquiату quiату ra. Emo ngue Jesús isi ãte etarõ sacuã nda. —Aque mose ra eremano, i ãte quiarei Dios ee.

Aso si ra ibate Paba rea, i Jesús

21 Jesús que ñee si fariseos je ra. —Aso si ra Paba rea cote. Serequia requia rei nda se re. Jêicuã mbei ra jemano nyee. Ae ra aso nae, huee jengasẽ aroneate, i que Jesús ee ra.

22 Judíos que ñee ñee nyue ra. —¿Mbaerã nda nandecuasẽ aroneate ee re? Nyiĩquia ra reae, i rei que ñee nyue ra.

23 Jesús que ñee ee ra. —Ibi jenda chõ jê nde. Ibatenda chõ se re. Ibi jenda eã ño se re.

24 Nyebe aico nguiã ñee jêje nyii. “Jêicuã mbei ra jemano nyee”, ae que jêje nyii. Seicuayã mbei mose ra jemano nyee jêicuã mosebe, i que Jesús ee ra.

25 —¿Aba tuchi nde re? i que mbia Jesús je ra. Jesús que ñee ee ra. —Cose ndare bei chõ aico nguiã serenei nenei jêje co.

26 Mbae ra asenei tuchi jêje reae. Secheẽ nda jêicuã mbuchecua tuchi jêje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra.

27 Mbia rerecua que Jesús cheẽ icuayã mbei ra. —Dios rĩĩ ño eriqui nguiã ñee, iã mbei que mbia ra.

28 Jesús que ñeembe ee ra. —Mbiarã ngue achu ra. Jê nda sembucha ira rese cote. Aque mose ra mbae jêicua jiri serĩĩ cote. “Dios cheẽ nguire chõ eriqui mbia mbaaquiату quiату re”, jenyê ra serĩĩ cote. “Dios rucucha chõ eriqui re”, jenyê ra serĩĩ cote.

29 Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra.

30 Jesús cheẽ mose que mbia Jesús icua icua cote ra.

Jêingo bei mose serui, sechĩmbaaquiату tuchi chõ jê nde

31 Ae Jesús icua quia judíos nae, ũqui je que Jesús ñee nda. —Secheẽ si jêhui eã mose, sechĩmbaaquiaturã tuchi ra jê.

32 Jê nda ichõĩñosa reã jêicua tuchi cote. Mbia icuã nderecua rimba eã nda jê cote, i que Jesús ee ra.

33 Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴ Jesús que ñee ee cote ra. —Ae mbae icuã saã saã nguia nae, ùquí ndiqui bei eicuã nimbarã ã.

³⁵ Erimba ra siqui bei eã nguerecua rese. Nguirĩ tuchi quiatu ra equereco bei nyiese.

³⁶ Se jembui mose mbae icuã si, eicuã nimbarã eã nda jëingo cote.

³⁷ Abraham nducucha raque jë. Ûquí aicuate raque. ã jëingo secheë isi turã eãte ã. Secheë jëucuyã nguia ã. Nyebe jëingo nguia seiquia serite ã.

³⁸ Ae Paba teacuquia seje nae, ùquí ño asenei senei nguia jëje co. Ae jendu teacuquia jëje nae, ùquí ndese chõ jëingo nguia jë ã no, i que Jesús ee ra.

³⁹ —Abraham ño ureru resë. Urei resë, i que mbia Jesús je ra. Jesús que ñee ee cote ra. —Abraham nducucha turã mose jë, eĩ nguia nda jëingo turã nguia ña. Abraham ndui si.

⁴⁰ Dios que sembaaquiutu ra. Dios quiarei ñee ñooño eã. Echeë ño asenei senei nguia jëje co. Ûquí je chõ jëingo nguia seiquia serite ã. I ãte que Abraham quia seje ra.

⁴¹ Jendu rã si chõ jëingo nguia ã, i que Jesús ee ra. Mbia que ñee Jesús je cote ra. —Ureru ata ata eãte nyeresë. Dios mi ño ureru re, i que ñee Jesús je ra.

⁴² Jesús que ñeembe ee ra. —Dios jendu tuchi mose, eĩ nguia nda jëingo nguia nyesecua serese chã. Ae quiarei sembu. Se ae eã achu nguia.

⁴³ ã jëingo secheë andu sereãte ã. Nyebe jëingo nguia secheë icua aroneate ã.

⁴⁴ Aba checuayã nderecua rei jendu. Erese bei chõ jëingo nguia ã. Echeë jemumbayã mbei chõ nguia ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheë achõ ño esenei senei nguia mbia mbirĩ irĩ querabe co. Ñee ñooñosa rerecua chõ aqre re.

⁴⁵ Se quia acheë ñooño ãte rei nguia jëje. Secheë jëucuyãte chõchĩ nguia.

⁴⁶ Mbae icuã ngue asaã eãte ra. Ûquí jëicuate raque. Acheë ñooño ãte sequia co resë. ¿Mbaerã jëingo secheë andu sereã neate ã nde?

⁴⁷ Dios quiato quia Dios cheë ñandu turã nguia. Dios quiato eã ño jë nde. Nyebe jëingo nguia Dios cheë andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra.

⁴⁹ Jesús que ñee ee ra. —Aba checuayã nyireco eã ño se resë. Co aico ñee turã tuchi Paba rii co resë. Jë nguia jeñee icuã mbeite nguia serii.

⁵⁰ “¿sã mbia ñee turã serii jë!” ae eã ño nguia se co. Paba quia siqui nguia ñee turã turãte serii co. Ae quia ra mbia icuã mbasi.

⁵¹ Tacheë nyecua jëje. Ae secheë mumbayã nguia nae, ùquí nda amingo bei. Ûquí nda manoã mbei, i que Jesús ra.

⁵² Judíos que ñee Jesús je ra. —Aba checuayã nyireco tuchi chõ ereico nguia co. ¿Mbaerã ereico ñee nde? “Mbia ra manoã, secheë mumbayã mose”, i re. Abraham ngue mano. Nandei. Dios cheë nenei neneisa que mano ja resë.

⁵³ ¿Nde ndeaquiutu tuchi Abraham si re? Ae chee que mano. Dios cheë nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra.

⁵⁴ Jesús que ñee ee cote ra. Se ae secheẽ turã mose seriĩ, mbia ra seanduchõ. Paba quia ñee turã mbei nguiã seriĩ co. Ae je jẽingo ñee. “Dios urererecua” i raque eriĩ.

⁵⁵ A jẽingo Dios icuayãte ã. Se quia aicuate nguiã co. “Dios aicuayã”, se i mose, eĩ nda acheẽ ñooñote rei jẽ na si. Dios aicua tuchite. Echeẽ ndui chõ aico bei nguiã co.

⁵⁶ Abraham ngue seraarõ arõ mbei quia ra. “Tu rae”, i bei que equia ñimbria seriĩ nda. Secuasẽ mose que eyate mae serese cote ra, i que Jesús mbia je ra.

⁵⁷ Mbia que ñee Jesús je ra. —Cosete que Abraham mano ndesẽ. ¿Mañi ere mae erese re? Cincuenta años eãte nde resẽ, i que ra.

⁵⁸ Jesús que ñee ee ra. —Tacheẽ nyecua jẽje. Cose ndare bei chõ aico nguiã co. Abraham tiã mosenda bei, i que Jesús ra.

⁵⁹ —¿Sita je Jesús nandechei jẽ! i rei que mbia sita isi isi ra. Jesús que ñimi ñimi oso ra. Usẽ Dios chuchua si.

9

Jesús emo ndesayã mbucherõ

¹ Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra.

² Jesús chĩmbaaquiatsu que ñee ee ra. —Urembaaquiatusa, ¿abate mbae icuã saã nyii re? Co resayã nonde re. Eru ereae. Esi ere no ae. Ae si ere no ae. ¿Abate ere? i que Jesús je ra.

³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quirãcuã ndese chã. Embucherõ mose. Nyebe eresayã nyaacuquia nguiã.

⁴ Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote.

⁵ Seico mose íbii, aico mbia resaete co, i que Jesús ra.

⁶ Jesús que ñinimbu íbii cote ra. Tuchu que esaã ngũendi je ra. Nguiti que eresayã ndesa rese cote ra.

⁷ —Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra.

⁸ Hue jenda que nyuruirã jate mae erese ra. Ae mae nguia erese nyii nae, ñuĩ ngue nyuruirã tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra.

⁹ —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresẽ, i que ñee mbia je ra.

¹⁰ —¿Mañi nderesayã mae nde? i que mbia ee ra.

¹¹ Eresayã ngue ñee nda. —Ae eriqui “Jesús” i nae, a que que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra.

¹² —¿Ma nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

¹³ Mbia que eresayã curuchoi fariseos je cote ra.

¹⁴ Ae mose Jesús eresayã mbucherõ nae, sábado mose que ra. Tuchu que esaã, a que mose que ra.

15 —¿Mañi ere nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda.

16 Fariseos mo ngue ñee nyue ra. —Ae eresa mbucherõ sábadó mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda.

17 Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde erĩ co re? i que ra. Eresayã ngue ñee nda. —Dios chimondo que ae ra, i que eresayã nda.

18 Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rá erese, i que ra.

19 —¿Co nderiĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emumae nguia co cote re? i que ñee eru je ra. Esi je abe.

20 Eru que ñee ee ra. —Co rei seriĩ co. Eresayã ngue nyaacuquia rei ra.

21 Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jẽje, i que eru ñee judio rerecua je ra. Esi abe.

22 Judíos rerecua quia ñee nguia nyue nyii reaẽ. —Emo ñee turã mose Jesús rĩ, ũquí nandemombo bei mbia chumunuasa si. “Dios chĩmbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguiã ñee turã Jesús rĩ. Esi abe no.

23 Nyebe eru riqui nguiã ñee ererecua je. —Jeñee nguia seriĩ je. Etiarõte nyeresẽ, i ee. Esiquichete quia ñene.

24 —Quiatuchu, i si que judíos rerecua eresayã je no nda. —Echeẽ turã Dios mĩ je. ¡Jesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra.

25 Eresayã ngue ñee ee ra. —Aicuayãte se. Eicuãte ereae. Eturãte ere no ae. Aicuayãte se. Seresayã ngue nyii ra. Co aico mae co cote. Ũquí mĩ ño aicua nguiã co, i que eresayã judíos rerecua je ra.

26 —¿Mañi equia ndeje re? ¿Mañi nderesayã ira re? i si que eresayã je no nda.

27 Eresayã ngue ñeembe ererecua je ra. —Acheẽ ndei que jẽje resẽ. Secheẽ ngue jemumb resẽ. ¿Mbaerã jẽingo “echeembe” i seje ã nde? ¿Jẽ abe jẽingose rete sembucherõsa rui re? i que eresayã judíos rerecua je ra.

28 Ererecua que ñee icuãte ee cote ra. —Ae rui chõ ereicochĩ nguiã nde co. Moisés rui chõ ureico nguiã ure ã.

29 Moisés je quiatu que Dios ñee nyii resẽ. Ũquí ño ureicua nguiã ã. Ae nembucherõ nae, ma si quiatu ñi ae ru. Ae quia ureicuayãte nguiã, i que judíos rerecua ra.

30 Eresayã ngue ñee ee ra. —Serese que embucherõ ndesẽ. “Dios chĩmbu”, jenyẽ eã ñochĩ equia ã. Seresa mbucherõsa raque ae.

31 Dios ra mbia icuã ñee ñanuã. Ae Dios cheẽ ngue mumbayã nguia nae, ũquí ñee nguia ra Dios ñandu.

32 Seresayã ngue achaacuquia rei nyii ra. Ae que sembucherõ nda. Emo abe ra ũquí saã eã.

33 Dios chĩmbu eã mose, eĩ nguia nda mbae raã eãte nguiã ña, i que eresayã judíos rerecua je ra.

³⁴ Judíos rerecua que ñee eresayã je ra. —Ndechaacuquia mosenda bei chõ ndeicua ndiqui nguiã co. ¿Mbaerã ereico urembaaquiatu sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiatute ure, i chõchĩ fariseos

³⁵ Jesús que jirandu erese ra. Emombo mose. Nyebe esi nguiã ñee eresayã je. —¿Dios rucucha ereicuate quia co re? i que ee ra.

³⁶ —¿Aba chõ Dios rucucha re? Aicua sete quia co, i que eresayã nda.

³⁷ —Ae chõ se resẽ. Ae je chõ ereã ñee a resẽ. Eremae ndei serese resẽ, i que Jesús ee ra.

³⁸ Eresayã ngue ngoi nguiã ndese Jesús ji cote ra. —Areicua tuchi se cote, i que Jesús je ra.

³⁹ Jesús que ñee ee ra. —Achu que íbii ra. Mbia icua mbuchecua mbia je ra. Achu que eresayã ndesa mumae mae nda. Ae eresa nae, ùquiĩ mumae eã sacua abe que achu ra, i que ra.

⁴⁰ Fariseos mo abe que chi hue ra. Jesús cheẽ andu que ñee Jesús je ra. —¿Uresesayã ureico ure abe ã nde? i que fariseos ee ra.

⁴¹ Jesús que ñee ee ra. —Jendesayã mose, eĩ nda jëicua ambuchecuayã ndei. “Seaquiatute”, jenyechĩ equia ã. Nyebe aico nguiã jëicua mbuchecua jëje co, i que Jesús judíos rerecua je ra.

10

Ovejas ucha cheẽ icuate

¹ Jesús que ñee nda. —Tacheẽ nyecua jëje. Ae iqueã nguiã oveja chiquesa rĩ nae, mbae mbuquiachãsa chõ ùquiĩ nde. Echiquesa eã ñi ique ique mose.

² Ae ique ique quia oveja chiquesa rĩ nae, aque quia oveja raarõsa aque re.

³ Ae echiquesa saarõ nguiã nae, aque ra echiquesa equia oveja raarõsa je cote. Eique sacua. Oveja raarõsa cheẽ nda oveja icua ja. Ñee miĩ miĩ nda umbae oveja je. Oveja icua ja. Ae ra oveja nyoi usẽ erui.

⁴ Eraarõsa embusẽ ja mose etaronda si, ae rane nda ngata oso quia erëta. Oveja ra nyoi ja quia erui. Echeẽ nguiã eicuate nguiã.

⁵ Emo ndui ra ehoi eã. Uchã ño nda emo si. Echeẽ nguiã eicuayãte nguiã, i que Jesús ñee nda.

⁶ Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷ Jesús que ñee si ee ra. —Tacheẽ nyecua jëje. Oveja chiquesa rã ño se re.

⁸ Ae ngaẽ senonde nyii nae, mbae mbuquiachãsa ja chõ ùquiĩ nde. Nyebe ovejas eche siichã eã nguiã.

⁹ Oveja chiquesa chõ se re. Ae seicua quia nae, ùquiĩ nda ateaquiatu bei mingo. Sã oveja mo ndiqui oso quiaru quiaru no. Sã eriqui cuaẽ nyebi chebi bei utaronda no. Eĩ si ra seicua quia siqui bei serese.

¹⁰ Mbae mbuquiachãsa quia ra tu mbae rirõ sacua. Mbae mbutiã sacua. Mbae iquia sacua. Se quia ni achu nguiã mbia mingo bei sacua. Mbia mbia tuchi nõnde que achu ra.

¹¹ Oveja raarõsa rei se. Ovejas ateaquiatu bei quia co. Amano nda emingo bei sacua.

12 Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia.

13 “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã.

14-15 Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacuaã nda amano.

16 Ovejas mo abe que sembae no nda. A jenda eã ño ùquiã nde. Ùquiã abe ra aru a. Ùquiã nda secheẽ mumbayã no. Sembae oveja ra chi ja serese cote. Se mii ño nda asaarõ ja cote.

17 Sesiquiche eã semana ndese. Sembae ovejas mingo sacuaã. Nyebe Paba iate riqui nguiã serese co. Semanonde ra aquera si.

18 Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbia je ra.

19 Judíos que ñee ata atate nyue ra. Jesús cheẽ mose. Hue rĩ si ñee ja eã.

20 —Aba checuayã siquite Jesús rese co resẽ. ¿Mbaerã jẽingo echeẽ andu re? i que emo emo uataquẽ je ra.

21 Emo emo ngue ñee no nda. —Ae rese aba checuayã ndiqui nae, ùquiã nda ñee turã eã ndesẽ. Aba checuayã nda mbia resayã mbucherõ eã ndesẽ, i que emo emo no nda.

Judíos Jesús osei chiã

22 Mbia que ñumunua nua nguia Jerusalén cote ra. Dios chuchua ao mosenda ndese ndua ndua. Nyiiseite que aque mose ra.

23 Jesús que oso Dios chuchúaa ra. Portal de Salomón ngue eriqui ngata ra.

24 Judíos que ngaẽ Jesús mama nda. Ñee ngue ee ra. —Ureico ndeicuayãte ã. ¿Manosete ra erecheẽ tuchi ure je re? Nde rii. Echimbu checua jiri ure je. Nde Cristo mose, ndecheẽ embuchecua ure je, i que judíos ñee Jesús je ra.

25 Jesús que ñee ee ra. —Acheẽ ndei que jẽje resẽ. Secheẽ jẽñanuã ño nguiã ã. Paba quirãcuã je chõ aico nguiã mbia mae sayã naa naa co. ã ndese mae nda seicua nguiã ña.

26 Acheẽ ndei que jẽje nyii resẽ. Serimba eã ño jẽ nde. Nyebe jẽingo nguiã secheẽ anuã.

27 Serimba secheẽ icua ja quia ã. Serimba aicua ja quia ã. Serui ja serimba riqui ã.

28 Serimba amingo bei quia co. Serimba ra quiachã eã mbei. Emo eisi aronea tuchi sesi.

29 Paba que emee serimbarã nda. Emo eisi aroneate Paba o si. Ae quiarei equirãcuã tuchi.

30 Aque mii ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

31 Nyebe judíos paama i nguiã ee. Sita que esirõ sirõ nda. —Jesús nandechei, i rei que ra.

32 Jesús que ñee ee ra. —Paba que sembuquirãcuã tuchi ra. Nyebe jemaie sayã asaã saã tuchi nguiã jẽje. ¿Ùquiã mo nii jẽingo “nandechei” i seje re? i que Jesús judíos je ra.

³³ Judíos que ñee Jesús je ra. —Ndechiao turã mo je eã ño ureico nguiã “nandechei” i ndeje. Erecheẽ icuãte que Dios rĩ ndesẽ. Dios eresaã saãte quia ure je co resẽ. Mbia si chõ ndaque nde, i que judíos Jesús je ra.

³⁴ Jesús que ñee ee ra. —Sã embesa ji riqui i no: “Jẽ ndei dioses, i que Dios ra”, sã embesa ji riqui i no.

³⁵ Embesa ji ñeeñoño aronea. “Dioses rei jẽ”, i que Dios ucheẽ nenei neneisa je ra.

³⁶ Dios que seirabo ra. Sembu que íbii cote ra. ¿Mbaerã jẽingo paama i secheẽ mose re? “Dios ririĩ ño se re”, i mose re. “Ndeicuãte chõchĩ Dios je”, jenye chõchĩ nguiã seje.

³⁷ Se mbae raã naa eã mose Paba rã si, ũquí mose quia secheẽ jeñanua.

³⁸ Paba rã si mose, “coche ñene” jẽnye chõ sechisaã je. Secheẽ jeñandu sereã ndaque. Paba riqui serese co. Se abe aico Paba rese co. Ũquí nda jẽicua cote, “coche ñene” i mose sechisaã je, i que Jesús ee ra.

³⁹ —Jesús nanderao etarõ sacua, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra.

⁴¹ Mbia que nyoi nyoi tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembiirandu turã tuchichĩ Jesús rĩ. Ichõiño eã ño equia ñee nande je reaẽ, i que mbia ñee nyue ra.

⁴² Mbia tubiriã ngue Jesús icuua huee ra.

11

Lázaro mano

¹ Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ũquí nda. Betania jenda ja que ũquí nda.

² María rei aba mbushimbusa ichusẽsa Jesús i rese. Ua je que esi esi ra. Enongue quia erasi re. Lázaro, i que ee ra.

³ Nyebe echari mbia mo mondo nguiã Jesús mbiirandu sacua. —Ndequiato rasi que chi aque rĩ nda, i que echoi Jesús mbiirandu ra.

⁴ Jirandu mose que Jesús ñee cote ra. —Mano sacua eã ño erasi chi nguiã aque. Dios quirãcuã ndese mbia mae sacua ño erasi chi nguiã aque. Se abe sequirãcuã ndese mae sacua ño erasi chi nguiã aque, i que Jesús ra.

⁵ Jesús que nyesecua tuchi Marta rese ra. María rese. Lázaro rese abe no.

⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra.

⁷ —Nyaube Judea cote, i que uchimbaaquiату je cote ra.

⁸ Echimbaaquiату que ñee ee ra. —Namote que judíos ndeiguia serĩte sita je. ¿Mbaerã nda ereso si huee re? i que Jesús je ra.

⁹⁻¹⁰ Jesús que ñee ee ra. —Dios quiату que sembu ra. Mbae raã naa sacua ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbaaquiату je ra.

¹¹ Aquere que ñee si uchimbaaquiату je ra. —Nandequiато que uque cote ra. Lázaro. Taso emumba cote, i que ra.

¹² —Uque mose u, ae ae ra ñumumba rei, i que echimbaaquiату ee ra.

13 —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbaaquiatu je.

14 Jesús que ucheẽ mbuchecua ramo ee cote ra. —Lázaro que mano nda.

15 Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbaaquiatu je ra.

16 Tomás que ñee echimbaaquiatu ataque je ra. —Nyao erese nande abe no. Sã mbia nandeiquia nande abe rô, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

17 Ngasẽ ngue Betania cote ra. Mbua hue jenda que ñee Jesús je cote ra. —Co Lázaro ati ji chi itõ mocoõite co resẽ. Cuatro días tuchite nyeresẽ, i que mbia ñee Jesús je ra.

18 Aichite que Betania Jerusalén si ra. Tres kilómetros que ra.

19 Nyebe judíos rane ngaẽ jate nguiã ngasẽ Jerusalén si. María mbia jiri sacua. Marta abe no. Enongue raaque ati ji mose.

20 Marta jirandu mose Jesús rese que esi erobeishĩ nda. Oo que erese ra. María quiatu que siquichõ tuchúaa ra.

21 Marta que ñee Jesús je ra. —Sererecua, ndeico mose a, eĩ nda senongue manoãte rei.

22 Dios ra ndecheẽ ñandu. “Mbae mo embu seje”, i mose, i que Marta Jesús je ra.

23 —Ndenongue ra quera si, i que Jesús ee ra.

24 Marta que ñee ee cote ra. —Ae bei. Mbua raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra.

25 Jesús que ñee ee ra. —Mbua raaque mbuquerasa rei se. Mbua mingosa rei se. Ae seicua quia nae, ùqui nda mano ndaque, quera si rae.

26 Ae seicua quia nae, ùqui nda uayã mbei. ¿Ùqui ereicua quia co re? i que Jesús ee ra.

27 Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbia quia nyii nae, ae chõ nde re, i que Marta Jesús je ra.

Jesús nyeseo

28 Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísaa ra.

29 Echeẽ nduibe tuchi que María si juã asi Jesús rea ra.

30 Jesús ngasẽ mose rocoĩ mbia chuchua ite re. Marta erobeishĩsa bei que Jesús riqui ra.

31 Maríaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui.

32 María que ngasẽ Jesús je ra. Ngoi que nguiã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra.

33 María que nyeseo ra. Judíos que chi erese, ùqui abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra.

34 —¿Mangue jenyati mangue re? i que Jesús mbia je ra. —Nyao erea ae, i que mbia ee ra.

35 Jesús que nyeseo ra.

³⁶ Judíos que ñee nyue ra. —¡Sã jê! Nyesecua tuchi Lázaro rese. Eya eâte riqui erese co, i que mbia ra.

³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaë. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eâte que ngasë Lázaro atigua ra. Sita imi ye. Sita chõ ngue eatiquia no nda.

³⁹ —¡Sita eatiquia jêjea jê! i que Jesús mbia je ra. Marta que ñee Jesús cheë mose ra. —¡Enete ra nande je jê! Curite que mano ndesë. Cuatro días tuchi que ra, i que Jesús je ra.

⁴⁰ Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra.

⁴¹ Sita eatiquia que mbia jea cote ra. Jesús que mae ibate quiti ra. Ñee Dios je. —Paba, secheë ngue erchandú. “¡aanye”, ãe bei quia ndeje co.

⁴² Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã serĩ ña, i que Jesús ñee Dios je ra.

⁴³ Jesús que ñeemombo Lázaro raaque je cote ra. —Lázaro, jechu usë! i que ra.

⁴⁴ Eraaque que usë u juã cote ra. Eo cuasa resebe que usë nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandequia, i judíos

⁴⁵ Judíos que nyoí María rese, ùquĩ ngue mae ja Jesús rese ra. Lázaro mbuquera mose. Ûquĩ tubiriã ngue Jesús icua cote ra.

⁴⁶ —Jesús que Lázaro raaque mbuchuruã nda, i que emo nyoí fariseos mbiirandu ra.

⁴⁷ Fariseos que ñmunua ja cote ra. Sacerdotes rerecua ja rese. Mbia rerecua ja. Ñee tuchi Jesús riĩ. —¿Mañi nande ra equia ee re? Mbia mae sayã naa naa tuchichĩ equia aque.

⁴⁸ Nande ereachõ mose ra mbia siqui ja techĩ eruĩ re. ¡Roma jenda ra nandembae isichĩ ibi jê! ¡Dios chuchua ra embucoichĩ ngaë jê! i que ererecua ñee nyue ra.

⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jêicuayã tuchichĩ nguia ã.

⁵⁰ Jendua eã ñochĩ equia ã. Aque mii ño nda mano nguia nande ja je chã. Eĩ nda judíos ua tuchi eã, i que Caifás uataque je ra.

⁵¹ Caifás ae que ñee eã nda. Dios ae quiatu ngue embucheë nguia ùquĩ. Sacerdote rerecua tuchite quiatu ngue ae re. Nyebe Dios embucheë nguia. —Jesús ra mano judíos mingó ja sacua.

⁵² A jenda achõ je eã nda Jesús mano. Dios riirĩ mangué chooñoa jenda je abe chõ nda Jesús mano nguia. Dios riirĩ munua ja sacua, i que Caifás ñee nda.

⁵³ Aque mose bei que judíos rerecua ñee ñee nyue ra. —¡Jesús nandequia rei jê! i que equia ñee ñee nyue ra.

⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbaaquiatu rese cote ra.

⁵⁵ Fiesta de la pascua que ecurubite ra. Nyebe judíos nyoí choi ja nguia Jerusalén. Suchamo jenda emo emo ngue nyoí jate ra. Pascua nonde que echoi huicua mbitirõ sacua nda.

⁵⁶ Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jêje re? i que mbia ñee ñee nyue Jesús riñ nda. I que mbia u ñee Dios chuchúaa ra.

⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ mii, i que sacerdote rerecua ñee nyii ra. Fariseos abe no.

12

María aba mbushimbusa ichusẽ Jesús i rese

¹ —Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si.

² Mbia que ñio mii Jesús chiurã nda. Marta que echiurã mondo mondo ee ra. Mbia je abe. Lázaro abe que chí quiaru erese ra.

³ María que aba mbushimbusa queru Jesús je cote ra. Medio litro. Nardo, i que ùqui je ra. Mbae isiquia mumba tuchi que ùqui nda. María que eichusẽ Jesús i rese ra. Ua je que esi esi ra. Tuchua mbushimbu ja que ra.

⁴ Judas Iscariote abe que siqui ra. Simón ndiirĩ ngue aque ra. Jesús chimbaaquiato mo ndei que aque ra. Ae quiato que Jesús mee mbia icuã je emo mose cote ra. Ae que ñee nda.

⁵ —¿Mbaerã eichusẽ ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacua, ùqui mbae isiquia, i que Judas ra.

⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda.

⁷ Jesús que ñee Judas je ra. —¡Erechechĩ nda María je jê! ¡Sã ae ae riqui jê! Seati nonde chõ aba mbushimbusa icherẽ nguia serese.

⁸ Mbaecha reã nguia nda chí are jiri nguia a. Se quia nda aico bei eã nguia jêje a, i que Jesús ra.

Lázaro nandeiquia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyojate que erea ra. Lázaro abe rea. Ae Jesús mbuquera erua si.

¹⁰ Nyebe judíos rerecua ñimbiirandu nguia. —¡Lázaro abe nandeiquia rei jê! i que ererecua ñee nyue ra.

¹¹ Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. Ùqui mbei bei que nyii ra. Jesús oso Jerusalén

¹² Mbia tubirã ngue nyoj Jerusalén nda. Pascua raã naã sacua huee. Jesús abe que oso ra. Mbia que jirandu erese ra. Ecuasẽ nonde.

¹³ Mbia yate que Jesús cuasẽ mose ra. Sindo que ecuruchoi erobeishĩ nda. Mbia que tasẽ tasẽ tuchi ra. —Eturã tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra.

¹⁴ Jesús que ngasẽ burro riirĩ mo je ra. Nyui que eato ra. Embesa ji rui si.

¹⁵ I que embesa ji quia nyii ra:

jêreĩ ireichĩ nda, Sion jenda!

Co jenderecua ru quia co.

Co eru quia burro átoo co,
i que embesa ji quia nyii ra.

16 Jesús chimbaaquiatsu que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiatsu eicua ramo cote ra.

17 Jesús que Lázaro mbuquera, ùquĩ ndese maesa que mbia mbiirandu randu tuchi quia ra.

18 Nyebe mbia nyoi ja tuchi nguiã Jesús robeishĩ. Jirandure Lázaro raaque mbuquera rese.

19 Fariseos que ñee ñee si nyue no nda. —Jesús rui ja tuchi chĩ mbia. ¿Mañi nda aba mbia je re? i que ñee nyue ra.

Griegos mo Jesús requia

20 Griegos mo abe que nyoi Jerusalén nda. Pascua raã naa Dios je.

21 Ûquĩ ngue nyoi ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra.

22 Felipe que oso Andrés mbiirandu ra. Ûquĩ ja que nyoi Jesús mbiirandu cote ra.

23 Jesús que ñee ee ra. —Mbiarã ngue achu ibate si ra. Semano nonde arubite coté. Sequera si nonde arubite cote.

24 Tacheẽ nyecua jêje. Ibasĩ eĩ tiquia eã mose ra ia eã mbei. Chĩ chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia.

25 Ae nduate quia nyiese nae, ùquĩ nda nyoi eãte ibate. Ae ndua eãte quia nyiese nae, ùquĩ nguia ra nyoi ibate. Siqui bei sacua huee.

26 Ae secheẽ mumba sereãte quia nae, sã ùquĩ ndiqui bei serui. Ae ra aico nae, huee ra ùquĩ abe riqui. Ae secheẽ mumba sereãte quia nae, ùquĩ ñii nda Paba ñee turã.

Amano nda se, i Jesús mbia je

27 Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. Á sacua ño ngue achu resẽ. Sembasi sacua ño ngue achu resẽ.

28 Paba, ndequirãcuã eteacuquia mbia je, i que Jesús ra. Ûquĩ mose que echeẽ mo ndu ee ibate si ra. —Sequirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra.

29 Mbia que ibatenda cheẽ ñandu ja rei ra. Ae chĩ Jesús rese, ùquĩ. —Ama ndieu ereae, i que mbia ra. —Tei. Angel mo ño ngue ñee nguiã Jesús je, i que emo no nda.

30 Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacua ño ngue ñee ndesẽ.

31 Paba ra seicuaa reã mbasi ja cote. Mbia icuã nderecua ra Paba mombo ibi jenda cote.

32 Sembucha mose mii ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra.

33 —Mbia ra seiquia mii sembucha ira rese, i ñene.

34 Mbia que ñee Jesús je cote ra. —“Cristo ra siqui bei”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra.

35 Jesús que ñee ee ra. —Taico mbirimbe jendese jembaaquiatsu quiatsu. Jendesaebe mbirĩ. Tata rendi rãte aico co. Tata rendi siqui mose jendese,

ijengata turã ño nguia jê! Seicuaa reã ño siqui nguia itondaru. Ûqui quiachã ño nguia ùqui.

³⁶ Tata rendi raãte aico co. Seico beebe mose jendese, seicua tuchi rã. Eĩ nda jëngo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda.

³⁸ Ae Isaías mbesa mii nyii nae, ùqui na si chõ ngue mbia Jesús icuayã cote ra. Eĩ ngue Isaías embesa mii nda:

Sererecua, ae uresenei senei nguia mbia je nae, ùqui mbia icua sereãte quia ã.

Ndequirãcuã mbia tea sereãte quia ã, i que Isaías embesa ra.

³⁹ Mbia que Jesús icua aroneate ra. Isaías chimbese rã si chõ ngue ra. Eĩ ngue Isaías embesa mii no nda:

⁴⁰ Dios que mbia chiã matã nda.

Nyebe eriqui mbae icuayãte ã.

Nyebe eriqui nguia uba eãte serese.

Se embitorõ sacua,

i que Isaías chimbese huĩ nda.

⁴¹ Isaías que Cristo quirãcuã tea nyii ra. Nyebe ã mbesa mii nguia Jesús rii a.

⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiatu ngue fariseos si re. —iFariseos ra nandemombochĩ mbia chumunuasa si jê! i que ra.

⁴³ —Dios cheẽ nandemumbayã jê, iã ñochĩ ngue re. —iMbia cheẽ nguiatu nandemumbayã jê! i chõchĩ ngue re.

Secheẽ nguia ra seucuayãsa mbasi, i Jesús

⁴⁴ Jesús que ñee irãtã mbia je ra. —Ae seicua quia nae, se mii icua eã. Paba abe icua. Ae sembu ibate si.

⁴⁵ Ae mae nguia serese co nae, Paba abe rese mae.

⁴⁶ Mbia resae sacua ño achu nguia co. Eĩ nda seicuaa siquiã itondáruu.

⁴⁷ Jëngo secheẽ andu ã. Jemo secheẽ mumba mose, se ra ambasiã. Secheẽ ae ra embasi. Mbia mingo bei sacua ño achu nguia co. Mbia mbasi sacua eã ño achu nguia.

⁴⁸ Secheẽ nguia ra seucuayãsa mbasi, mbae ua mose. Ibi ua mose. Secheẽ ae ra secheẽ mumbasa mondo tata cuasu. Secheẽ andu chooño nguiatu ngue re.

⁴⁹ Se ae eã ño acheẽ nguia mbia je. Paba quia ñee nguia seje. “Eĩ ere mbia mbaaquiatu quiatu”, i que Paba sembu ra.

⁵⁰ Paba cheẽ ndei mbia mingo beisa. Echeẽ mumbayã mose. Nyebe aico nguia Paba cheẽ nenei nenei co. Secheẽ ae eã ño ñene.

13

Jesús mbia i irei irei

¹ —Namo jiri ra Paba sererao ibate ibi si cote, i que Jesús uchiangui re ra. Nyesequa tuchi que equia uchimbaaquiatu rese ra. Mano nyee.

² Jesús que quiaru u uchimbaaquiату rese isa ra. Pascua nonde. —Jesús emondo mbia icuã je, i que diablo Judas Iscariote je nyii ra. Simón ndiirĩ ndei aque.

³ Jesús que mbae icua jate ra. —Dios si chõ achu nguiã co. Asobe ra area. Paba que uquirãcuã mee tuchi seje ra, i que Jesús uchiangui re ra.

⁴ Quiaru jare que Jesús juã huĩrao mbui ra. Ngũmbi que echucua toalla je ra.

⁵ I que eichusẽ mbae mo ye ra. Uchimbaaquiату i que eirei irei ra. Mbĩru iru que toalla je ra.

⁶ Pedro i nda eirei nguiã cote chã. —Sererecua chõ nde resẽ. ¿Mañi ere ra sei irei re? i que Simón Pedro ñee Jesús je ra.

⁷ Jesús que ñee ee ra. —Ã ereicuayãte. Ae asaã saã nguia ã. Ereicua rei ra cote, i que Jesús ñee Pedro je ra.

⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra.

⁹ —Sei achõ eã eirei rõ. Seo abe eirei no. Seãquĩ abe no, i chee que Pedro ee cote ra.

¹⁰ Jesús que ñee ee ra. —Ae echasu quiite, equishĩte ùquĩ ndesẽ. Jẽi miĩ ño tairei. Jẽquishĩ ja eãte raque. Aque miĩte raque echĩã nondei, i que Jesús uchimbaaquiату je ra.

¹¹ Jesús que jirandu Judas rese ra. Nyebe eriqui nguiã ñee. —Aque miĩte raque echĩã nondei, i.

¹² Ei irei jare que huĩrao mingue cote ra. Ngoi si que ra. Ae ñee nguiã nguesenda je. —Jẽi que airei, ¿ũquĩ jẽicuate rei quia re?

¹³ Nyebe jẽingo nguiã ñee seje. “Sererecua, Sembaaquiatusa”, i seje. Coche jẽñee nguiã seje. Ererecua rei se.

¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae.

¹⁵ Nyebe que atecuquia jẽje resẽ. Serui sichõ jẽingo emo i irei irei ae.

¹⁶ Tacheẽ nyecua jẽje. Se rei jenderecua. Se chõ aemondo mondo nguiã mbia mbaaquiату sacuã. Jengasu ra jẽsaã saãchĩ sesi jẽ.

¹⁷ Jẽ secheẽ icua mose, secheẽ mumbayã mose, jẽya tuchi ra jẽingo.

¹⁸ Jẽ ja je eã aico nguiã ñee a. Jaẽirabo que se resẽ. Jaẽicuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese.

¹⁹ ¡A aico ñee jei jẽje a jẽ! Eicuã nonde seje. Eicuã mose seje, jẽ nda seicua cote. “Dios nducucha” jenyete tuchi ra seje cote.

²⁰ Tacheẽ nyecua jẽje. Ae secheẽ nenei neneisa isi quia nae, ùquĩ nda seisi se abe. Ae seisi quia nae, Paba abe isi rae, i que Jesús uchimbaaquiату je ra.

Jemo nda semondo mbia icuã je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icuã je cote, i que ñee nyecua uchimbaaquiату je ra.

²² Echimbaaquiату que mae mae ja chõ nyiese ra. —¿Aba ra re? ¿Aba ra re? i jaaja nyue.

²³ Jesús chesecua tuchi que chĩ ngoi ejii ra.

²⁴ Aque je que Simón Pedro o mee mee nda. —“¿Aba ra re?” ere ee, i que Pedro ra.

²⁵ Jesús chesecua que ñimbucha i i ñee Jesús je ra. —¿Aba ra re? i ee.

²⁶ Jesús que ñee ee ra. —Mbichae monde ji ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra.

²⁷ Judas mbichae u mose que Satanás ndu embicuã tuchi cote ra. Jesús que ñee ee ra. —Ae ra eresaã nae, iũqui esaã jeichõ jê! i que Jesús Judas je ra.

²⁸ —¿Mbae rî Jesús riqui ñee Judas je re? i que eataque ra. Mbia iranuã ja que ra.

²⁹ Judas que mbae isiquia quereco ja quia ra. —Mbae mo eisi rã nandechiurã, i reí Jesús quia Judas je uchimbaaquiato je. —Mbae mo emondo rã mbaecha reã je, i reí Jesús quia Judas je uchimbaaquiato mo je. Echeẽ ngue eicuayã ja ra.

³⁰ Mbichae ure que Judas si usẽ cote ra. Itondarوقي rî.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote.

³² Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote.

³³ Seresenda, aico mbirî ño nguiã jendese a cote. Serequia rei ra se cote. Acheẽ ngue judíos je, ũqui sí aico ñee jêje a. Ae ra aso nae, huee jengasẽ aroneãte.

³⁴ Aico secheẽ yasu nenei jêje a. Secheẽ mumbayã sacua. ¡Jenyeseua ja jenyiese jê! Sã ñi aico nyeseua tuchi jendese no. ¡Eĩ jenyeseua tuchi jenyiese jê!

³⁵ Jenyeseua tuchi mose jenyiese, mbia ra ñee ja tuchi jeni. “Eĩ nguia Jesús chimbaaquiato quia re”, i ra mbia jêje, i que Jesús uchimbaaquiato je ra.

Pedro ra ñee ñooño serî, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra.

³⁷ Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra.

³⁸ Jesús que ñee ee ra. —“Semano sete nderese”, erechî nguiã seje. Co isa ra erecheẽ ñooño serî tres veces. “Jesús aicuayãte resẽ”, ere chooño nda serî ngaira cheẽ nonde, i que Jesús Pedro je ra.

14

Jesús rei ñeenda Dios icha

¹ Jesús que ñee uchimbaaquiato je ra. —Jêya eã eriquichî nguiã. Dios jêicua chõ ae. Se abe jêicua chõ ae.

² Ae Paba riqui, huee tuchua tubiriãte. Ũqui eande rae, eĩ nda acheẽ eãte rei jêje. Aso ra tucharã naã jêje.

³ Jenyucharã naa jare ra achube jendea cote, jendera bei serese cote. Jẽ nda jêingo bei serese pee cote, ae ra aico.

⁴ Ae ra aso, huee jêicuate resẽ. Ñeenda abe jêicuate resẽ, i que Jesús ee ra.

⁵ Tomás que ñee ee ra. —Ureicuayãte nyeresẽ. ¿Mangue ra ereso mangue re? Ñeenda ra ureicua eãte chi nde, i que Tomás Jesús je ra.

6 Jesús que ñee ee ra. —Ñeenda rei se. Ñee ñooñoã je rei se. Mbia mingo beisa rei se. Ae ra seicuayâte, ũquí nda ngaseã mbei Paba je.

7 Jê seicua mose, Paba abe jêicuate quia ã. Jê Paba jêicuate quia cote resê. Jemae ngue erese namo ndesê, i que Jesús ee ra.

8 Felipe que ñee ee cote ra. —Nderu eteacuquia rã ure je. Ũquí mii ño ureico nguiã ñee ndeje, i que Felipe ra.

9 Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayâte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje.

10 Co aico Paba rese co resê. Paba abe riqui serese co. ¿Ũquí ereicuayâte re? Ae aico ñee jêje nae, secheê ae eã ño ũquí nde. Paba riqui serese co. Ae abe riqui mbae raã naa serese co.

11 Secheê jêicua rã. Co aico Paba rese co. Paba abe riqui serese co. “Nyia”, jenyee eã mose secheê je, sechisaã je chõ “nyia” jenyee.

12 Tacheê nyecua jêje. Ae seicua quia nae, ũquí nda sechisaã saã saã se rã si cote. Ũquí nda mbae saã saã tuchi sesi. Co quia aso nguiã Paba rea se co.

13 “Mbae emondo ure je” i mose seje, amondo ra jêje. Jê seicua mose. Eĩ ae ra Paba quirãcuã ndeacuquia mbia je.

14 “Mbae emondo ure je”, i mose seje, amondo ra jêje. Jê seicua mose.

Espíritu Turã tamondo jêje, i Jesús

15 Jenyesequa mose serese, secheê jemumbayã ae.

16 Tacheê Paba je. “Espíritu Turã emondo sechimbaaquiato je”, ae ra Paba je. Espiritu Turã nda siqui bei jendese cote. Jêquiato tuchi ra ae cote.

17 Espiritu Turã nda ñee ñooñoã jêje, jembaaquiato quiatu. Ae ra siqui eã tuchi Dios quiatoã ndese. Espiritu Turã icuayâte quia ñe ne. Jê nguia jêicuate nguiã. Co Espiritu turã ndiqui jendese co. Siqui bei ra jendese.

18 Aso raque quia co. Esi cheecha rã nda jêingoã. Achube ra jembirõ.

19 Achitee aĩ oso a cote. Dios icuasa reã nda mae eẽ serese cote. Jê nguia nda jemae nguiã serese. Aquera si ra siqui bei nonde. Jê abe ra jêingo bei serĩ cote.

20 Espiritu Turã tu mose ra jêicuate cote. “Jesús riqui ngu rese co. ã ureico Jesús rese ã. Jesús riqui urerese co”, jenyee ra serĩ cote.

21 Ae secheê icua quia nae, ae secheê mumbayâte quia nae, ũquí nguia nyesequate nguiã serese. Paba nyesequate ũquí ndese. Se abe achesequate ũquí ndese. Tachecua ñimbucha ũquí ndese, i que Jesús uchimbaaquiato je ra.

22 Judas, i que echimbaaquiato mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erechecua ure je re? Mbia ja je nyecua rocoi, i que Judas ra.

23 Jesús que ñee ee ra. —Ae nyesequate quia serese, ũquí secheê mumbayâte quia ã. Paba abe ra nyesequate ũquí ndese. Paba ra siqui ũquí ndese. Se abe ra aico ũquí ndese.

24 Ae nyesequa eãte quia serese, ũquí secheê mumba mumbate quia ã. Secheê ae eã asenei senei nguiã jêje co. Paba cheê ño asenei senei nguiã jêje. Ae chõ sembu nguiã.

25 Seso nonde aico co renei nenei jêje a. Sereco mosebe jendese.

²⁶ Paba ra Espíritu Turã mondo jêje secheẽ ndui si. Jêquiato tuchi ra Espíritu Turã cote. Ae ra jembaaquiato tuchi mbae ja rĩĩ cote. Ae ra jemundua tuchi secheẽ ndese cote.

²⁷ Co aso quia co. Jêyayã eã taemingo a. Seicuasa reã na si eã taemingo. Uquĩ nguia eya eãte riqui nguiã. Sã seyate se no. Eĩ tae jembia mingo a. Jjêya bei chõ jê! jJêsiquicheã ño jê!

²⁸ Aso ra Paba rea cote. Aquere ra achube jembirõ. Uquĩ ndese que jêirandu resẽ. Jenyesequa mose serese, eĩ ndei ra jêyate secheẽ ndese. “Taso Paba rea”, i mose. Ae quiarei i tuchi sesi.

²⁹ Seso nonde aico ñee tuchi jêje a cote. “Ñee ñooñoã tuchi quia equia re”, jenyê tuchi ra seso mose cote. Huee ra jê seicua tuchi cote.

³⁰ A nda aicobe ñee ñee jêje chã. Diabolo quia tu nguiã co. Mbia icuã nderecua ru quia co. Ae quiarei equirãcuã neã jiri sesi.

³¹ Paba cheẽ ndui si taico. Mbia seiquia arondete raque. “Nyesequa tuchi quia equia ngu rese re”, i ra mbia seje cote. Paba cheẽ mumbayã mose. Jêhuã. Nyao, i que Jesús uchimbbaaquiato je ra.

15

Jesús rei ira i rã

¹ Jesús que ñeembe uchimbbaaquiato je ra. —Se rei ira i rã.

² Paba rei ira raarõsa rã. Ira rãquiã ndibisho ia eã mose, nyisia rae. Erãquiã ia mose, saarõ turã ndae. Mbeerera rera rae. Embitirõ sacuã. Ia tuchi sacuã cote.

³ Jê ngue secheẽ jêisi turã ndesẽ. Nyebe Paba jembitirõ secheẽ je resẽ.

⁴ Jêingo bei ñimbucha serese. Sã aico ñimbucha jendese no. Ira rãquiã ae ra ia eã. Siquiã mose ñimbucha hui rese. Eĩ jenyê ra jê. Mbae turã nda jêsaã eã jê ae. Siquiã mose ñimbucha serese.

⁵ Se rei ira i rã. Erãquiã na ndei jê. Jêingo mose ñimbucha serese, seico mose ñimbucha jendese, jêturã tuchi ra jêingo cote. Jê ae ra mbae turã jêsaã eã, siquiã mose ñimbucha serese.

⁶ Ae siquiã ñimbucha serese nae, uquĩ nda siqui ira rãquiã sia ji rã. Eiru mose ra mbia emunua nua. Eréi sacuã.

⁷ Jêingo bei mose serese, jeñee nda amumbayã. “Mbae embu ure je”, i mose, amondo ra jêje. Jêtesareĩã mose secheẽ si.

⁸ Jêingo turã mbei mose, mbia ra ñee turã turã mbei Paba rĩĩ. Jêingo turã mbei mose, “Jesús chimbbaaquiato tuchi quia eriqui re”, i ra mbia jeniĩ.

⁹ Sã Paba riqui nyesequa serese nae, eĩ ae si equia nyesequa jendese co. Jêingo bei ñimbucha serese. Eĩ nda achesequa bei jendese.

¹⁰ Paba cheẽ amumbayãte quia co. Nyebe Paba riqui nguiã nyesequate serese co. Jê secheẽ mumbayã mose, achesequa bei tuchi ra jendese.

¹¹ Aico ñee jembbaaquiato co. Jembia sacuã. Sã seyate se no, se rã si ra jêya.

¹² ã ndei secheẽ ã: jJenyesequa tuchi quia jenyiese jê! Sã aico nyesequa tuchi jendese no.

¹³ “Se tamano sequiatio ribishorõ”, i mose emo, aque quiarei nyesequa tuchite uquiato rese.

¹⁴ Sequiatio rei jê, secheẽ mumbayã mose.

¹⁵ “Serimba” aeã nda jêje cote. Ererecua quiato “sequiatio” i ãte nguiã ngũimba je. Ñee ja eãte ngũimba je. Sã eriqui ñee ja uquiato je no. Se quia

ñi Paba cheẽ asenei senei jate nguiã jêje. Nyebe “sequiato” tae jêje cote. “Serimba” i rocoĩ.

¹⁶ Jê ngue seirabo eã ndesẽ. Se quiatu ngue jaẽirabo nguiã. ¡Mbae turã ño jêsaã saã mbei quia seje jê! ¡Jenyisaã nda uachĩ jê! Jê ngue seicuate. Nyebe jê “mbae mo embu ure je”, i mose Paba je, mondo ra jêje.

¹⁷ Æ ndei secheẽ jêje ã: ¡Jenyeseua tuchi quia jenyiese jê!

Mbia ataque Jesús rimba ucuyã

¹⁸ Dios icuasa reã nda jêucuyãte cote. ¡Jêicua quiatu jê! “Eĩ ngue equia Jesús ucuyã nyii resẽ”, jenye ra cote.

¹⁹ Jaẽirabo que se ra. Nyebe jêingo nguiã Dios icuasa reã na eã. Nyebe eriqui nguiã jêucuyãte ã. Jê ùqui na mose, eĩ nda eriqui turãte rei jendese.

²⁰ Acheẽ ngue jêje nyii, ¡ùqui ndese jendua jê! ¡Jengasu ra jêsaã saãchĩ sesi jê! Mbia icuã mose seje, jêje abe ra eicuã. Mbia secheẽ mumbayã mose, jê abe cheẽ mumbayã ndae.

²¹ Serĩ nda Dios icuasa reã jeĩ jeĩ jêje. Dios icuayãte quiatu nguiã ã. Nyebe ra eicuã icuãte jêje.

²² Achu que mbia mbaaquiato quiato ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiato eã mose. “Ureicuã ureicuayãte quia ã”, i aronea ño emo cote re.

²³ Ae seucuyãte quia, Paba abe ucuyãte equia ã.

²⁴ Mbia mae sayã ngue atecuquia tuchi rei ee ra. Sechisaã nda mbia mo saã eã. Eĩ nda Dios mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuyã ño nguiã ã. Paba abe ucuyã ño nguiã ã.

²⁵ Mbia riqui seucuyãte ã. Sã embesa ji riqui ñee no: “Mbia seucuyãte. Se mbae icuã asaã eãte raque”, sã embesa ji riqui i no. Ûqui iquechĩ cote.

²⁶ Seso mose Paba rea, Espíritu Turã tamondo jêje. Jêquiatorã. Ae ra tu Paba si jêje. Ae ra ñee ñoñoã jêje. Ae ra jembaaquiato quiato turã serĩ.

²⁷ Nyii mosenda bei chõ jêingo nguiã serese. Nyebe ra jê abe mbia jembaaquiato quiato turã serĩ, i que Jesús ra.

16

¹ Jesús que ñee i i uchimbaaquiato je ra. —A aico ñee jêje a. Eĩ nda jêhui eã sesi, mbia icuã icuã mose jêje.

² Mbia ra jendiquisã quisã, jêso jêso mose mbia chumunuasa. “Æ ureico rei nguiã mbae turã naa naa Dios je ã”, i ra mbia jêiquia iquia mose.

³ Seicuyãte quia ñe ne. Paba abe icuayãte quiato nguiã ã. Nyebe ra eriqui mbae raã icuã icuã jêje.

⁴ Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ iquechĩ cote”, jenye ra cote.

Espíritu Turã nda jembaaquiato quiato, i Jesús

Acheẽ jeĩ eã ngue jêje ùqui cose resẽ. Aicote quiatu ngue jendese re.

⁵ Co quia asote nguiã Paba rea co cote. Ae sembu. “¿Manguete ra ereso manguere?” i eã ñochĩ jemo seje.

⁶ Se “taso” i mose jêje, jêya eãte chõ jêingochĩ nguiã ã.

⁷ Tacheẽ nyecua jêje. Coche aso nguiã jendechea co. Espíritu Turã nda ambu jêje. Jêquiatorã. Ae ra siqui jendese. Eĩ nda Espíritu Turã tuãte rei. Seso eã mose jêsi.

⁸ Espíritu Turã tu mose ra ñee ñee mbia je. “Mbia icuã ja chõ ñe ne. Jëingo turã Dios resa rae. Dios ra Jesús icuasa reã mbasi ja”, i ra Espíritu Turã ñee mbia mbaaquiату quiату.

⁹ “Jë nguia Jesús jëicuayãte nguiaã ã. Nyebe jëicuã ndiqui nguiaã”, i ra Espíritu Turã ñee mbia mbiirandu.

¹⁰ Aso ra Paba rea cote. Mbia ra mae eãte serese cote. Nyebe ra Espíritu Turã mbia mundua mbae turã ndese cote.

¹¹ “Dios ra diablo mondo tata cuasu. Nyebe ra mbia icuã abe mondo tata cuasu”, i ra Espíritu Turã ñee mbia mbiirandu.

¹² “Taembaaquiature jiri”, ae rei se. Jëicuayã jeite chõ ndae.

¹³ Espíritu Turã tu mose, ae ra jembaaquiату quiату turã mbae ja rese. Ñee ñooñoa tuchi rae. Ucheë ae ra esenei seneiã. Paba cheë ño esenei senei nguiaã. Mbae tu nonde ra Espíritu Turã jembiirandu erese.

¹⁴ Espíritu Turã nda jembaaquiату quiату secheë nii. Ûquĩ mose ra mbia ñee turã turã seriĩ cote.

¹⁵ Ae Paba senei senei nguia, ùquĩ asenei senei nguia se abe co. Nyebe ra Espíritu Turã jembaaquiату quiату secheë nii.

Jëya eande nyii ra jëya tuchi cote, i Jesús

¹⁶ Namó jiri ra jema eã serese cote. Aquere ra jemaembe serese cote. Aso ra Paba rea, i que Jesús uchimbaaquiату je ra.

¹⁷ Echimbaaquiату que ñee ñee nyue ra. —¿Mbae i Jesús quia re? “Namó jiri ra jema eã serese cote. Aquere ra jemaembe serese cote. Aso ra Paba rea”, i chõchĩ. ¿Mbae ùquĩ nde?

¹⁸ ¿Mbaerã eriqui “namó jiri” i re? ¿Mbae riĩ eriqui ñee nde? Nandeiranuã tuchichĩ, i que echimbaaquiату ñee nyue ra.

¹⁹ Jesús que jirandu erese ra. —“Ndecheë embiasa jiri ure je” ¿jenye sete seje re? “Namó jiri ra jema eã serese cote. Aquere ra jemaembe serese cote”, ae que jëje, ¿aque jëicuayãte re?

²⁰ Tacheë nyecua jëje. Namó jiri ra jenyeseo. Jëya eãte rae. Sequiatoã nda eya tuchi. Aquere ra jëya tuchi cote no. Jëya eande nyii.

²¹ “Serasichĩ nda cote re”, i ra esi ndua ndua áquẽ nyaacuquia seriĩ mose. Eyayã tuchi ae. Áquẽ nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiirĩ ndese cote.

²² Áquẽ ndasi rá ño jë nde. Jëya eãte namó. Setube mose jendea, jëya tuchi ra cote. Emo nda jembia eã eã cote.

²³ “Ndecheë embiasa jiri ure je”, jenye eã nda seje cote. Tacheë nyecua jëje. Jë seicuate. Nyebe jë “mbae mo embu ure je”, i mose Paba je, mondo ra jëje.

²⁴ “Mbae mo embu ure je. Jesús icuasa je”, jenye eã mbeite equia Paba je ã. Jeñee ee. Jeñee mose ee, mondo ra jëje. Jëya tuchi ra cote.

Jesús quirãcua tuchi ibi jenda si re

²⁵ Acheë tuchi rei que jëje ra. Secheë ngue ambiasa tuchiã jiri jëje ra. Emo mose jiri quia ra secheë ambiasa tuchi jëje cote. Paba riĩ.

²⁶ Aque mose ra jeñee Paba je. “Mbae embu rá ure je”, jenye ra Paba je seriĩ. Aque mose ra acheë eã ee jeni cote. Jë ae chõ nda jeñee ee cote.

²⁷ Paba sí nyesequa tuchite quia jendese co. Jenyeseuate quiату nguiaã serese ã. “Dios que Jesús mondo nande je resë”, jenye quiату nguiaã seje ã. Nyebe Paba riqui nguiaã nyesequa tuchi jendese.

²⁸ Paba si que achu íbii resẽ. Asobe ra ibi recha cote. Paba rea ra asobe íbatee cote, i que Jesús ñee uchĩmbaaquiatsu je ra.

²⁹ Echĩmbaaquiatsu que ñee ee ra. —Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote.

³⁰ Mbae ereicua ja tuchi quiatsu quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguia ndeicuate ã. “Paba si chõ erechu nguia co”, ure equia ndeje ã, i que echĩmbaaquiatsu ee ra.

³¹ Jesús que ñee ee cote ra. —Jẽ ngue seicuate rei nguia.

³² Seandu rã se. Namu jiri ra jeñĩmbuchao chao oso sesi. Jẽso ja ra serecha namo. Se ae eã nda aico. Paba riqui nguia serese co.

³³ Jẽ seicua mose, mbae ra jembia eã eã. Nyebe aico nguia jembirandu randu beite co. Mbia icuã icuã mbeite ra eriqui jẽje a íbii. ¡Jeñĩmbiracuã jiri quia jẽ! Se quia sequiracuã tuchi ibi jenda si re, i que Jesús ñee uchĩmbaaquiatsu je ra.

17

Sechĩmbaaquiatsu eteaquiatsu, i Jesús Dios je

¹ Jesús ñee jare uchĩmbaaquiatsu je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã eteaquua mbia je cote. Eĩ nda se abe ndeturã ateaquua mbia je.

² Nde chõ ngue semii mbia rerecurã, Paba. Mbia mingo bei sacua. Mbia que ereme seje, uqui mingo bei sacua. Se rei nderucucha.

³ Paba, nde mii ndei Dios tuchi ereico co. Se rei Jesucristo ndechĩmbu ibate si. Ae ndeicuate quia nae, se abe icua equia nae, uqui nda siqui bei.

⁴ Ndeturã ngue ateaquua mbia je ra. “Ã esaã íbii”, ere que seje, uqui ngue asaã ja cote ra.

⁵ Paba, seturã eteaquuiabe mbia je. Cose ndare rã. Mbae eã mosenda rã. Asobe ra siqui nderese. Msa ndeturã ereteaquua mbia je nae, seturã abe eteaquua mbia je.

⁶ Mbia que ereme seje, uqui ngue ambiirandu tuchi nderese ra. Nembae rei que nyii ra. Ereme seje cote ra. Ndecheẽ ngue emumbayã nda.

⁷ Nde chõ ngue sembaaquiatsu quiatsu nguia, Paba. Ndecheẽ ae chõ ã nde. Secheẽ eã ño ñe ne. Uqui ngue sechĩmbaaquiatsu icuate ra.

⁸ Eresenei senei ngue seje, uqui ngue asenei senei ja ee ra. Ndecheẽ ngue eisi ja turãte ra. “Paba si que Jesús ru ra. Paba que embu ra”, i equia nderiã ã.

⁹ Sechĩmbaaquiatsu eteaquiatsu, Paba. Seicua rea je eã ño aico nguia “eteaquiatsu” i ndeje. Ae ereme seje nae, uqui je chõ aico nguia “eteaquiatsu” i ndeje. Nderimbate quia ñe ne.

¹⁰ Ae nderimba nae, serimba chõ se abe re. Ae serimba nae, nderimba chõ uqui no nde. Serimba riqui ñee turã mbei seriã ã.

¹¹ Asobe ra ndeje, Paba. A ra aicoã íbii cote. Serimba quia ra chichõ íbii. Eteaquiatsu, Paba. Ae ereme seje, uqui eteaquiatsu ndequiracuã je. Mbae mii ndese ja chõ emundua ndua mingo. Sã nande nandendua ndua mbae mii ndese no nae.

¹² Ae ereme seje, uqui ngue ateaquiatsu quiatsu quia ndequiracuã je ra. Seico mose íbii. Emo ngue quiachã eate sesi ra. Aque mii nda quiachã. Embesa ji cheẽ ndui si ra aque mii quiachã. Huicua je. Emo ngue quiachãya cote ra.

¹³ Aso ra nderea cote. Seico beebe mose íbii, aico ñee ñee ndeje serimba ríi a. I nda eya quiatu chi a. Sã seyate se no.

¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã.

¹⁵ “Serimba erao ibi si”, ae eã ño nguiã ndeje co, Paba. “Eteaquiatu diablo si”, ae chõ nguiã ndeje co.

¹⁶ Se rã si rei serimba. Ibi jenda eã ndiqui ã.

¹⁷ Serimba emingo tuchi icúe nembraerã. Ndecheẽ je emingo icúe. Nde quia erecheẽ ñooño eãte nguiã.

¹⁸ Sã nde sembu mbia je no, eí ae si chõ nguiã serimba mondo mondo mbia mbaaquiato quiatu co.

¹⁹ Aico ñimondo tuchi ndeje co, Paba. Mano sacua serimba je. I nda serimba abe ñimondo tuchi ndeje.

²⁰ Æ nñi achõ eã aico ñee ndeje. “Eteaquiatu” i ndeje. Æ nda secheẽ senei senei emo je abe cote. Ñquí abe ra seicua cote. Serimbarã. Ae ra seicua icua nae, ñquí abe eteaquiato.

²¹ Mbae mñi ndese ja chõ ñquí emundua ndua mingo. Mbae mñi naanguia tuchi emingo nanderese, Paba. Sã ereico serese no nae. Sã aico nderese no nae. Eí nyere si ñquí mingo mbae mñi na. Eí nda mbia seicua rea ñee seríi. “Dios chĩmbu quia eriqui re”, i nda mbia ñee seríi ña. Seicuaa siqui mose mbae mñi ndese.

²² Ndeturã ngue ereme seje, eí ae que seturã mondo seicuaa je ra. Eí nda eriqui mbae mñi na. Sã nandeico mbae mñi na nande no, Paba.

²³ Nyebe aico nguiã seicuaa rese co. Nde ereico serese co no. Nyebe seicuaa riqui mbae mñi na co. Eí nda seicuaa rea ñee nderíi. “Dios quia Jesús mbu quia reaẽ. Dios quia nyesequa quia Jesús icuaa rese re. Jesús rese rã si nyesequa”, i nda mbia ñee nderíi ña.

²⁴ Paba, serimbarã ngue ereme seje. Ae ra aso, sã echoi serea siqui bei huee serese cote. Ndecheẽ turã andu sacua seríi huee. Erecheẽ turã mbeite seríi. Ibi eã mosenda bei chõ ereico nguiã nyesequa serese co.

²⁵ Ndeturã tuchi, Paba. Seicuaa rea ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chĩmbu”, i seje nderíi.

²⁶ Arerenei nenei tuchi que serimba je ra. Tarerenei nenei tuchibe ee. Eí nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

18

Mbia icuã ngaẽ Jesús ruruchoi

¹ Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchĩmbaaquiato rese ra. Iraqui turã mo ngue echoi ra.

² Jesús que oso oso beite quia huee ra. Iraqui re. Uchĩmbaaquiato rese. Nyebe Judas riqui nguiã hue icuate. —Jesús tateacuquia checuayã mbia je, i que Judas ra.

³ Nyebe Judas mbia ruruchoi nguiã huee Jesús isi sacua. Soldados que ecuruchoi ra. Policía jenda abe que ecuruchoi no nda. Sacerdotes rerequa chĩmondo rei policía. Fariseos chĩmondo abe no. Ñquí ja que nyoi ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no.

⁴ Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra.

⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra.

⁶ —Se chõ Jesús resẽ, i mose que mbia siri siri choi uquite quti ra. Ngoi ngoi chee que echoi ra.

⁷ —¿Aba rea jenyu quia co re? ibe que Jesús ñee ee ra. —Jesús rea urechu quia co, i que ra.

⁸ Jesús que ñeembe ee ra. —“Se chõ nyeresẽ”, ae que jêje. Serequia mose, sererao se ae. Sã seresenda chichõ, i que Jesús ee ra.

⁹ —Ae Paba mee seje serimbarã, ñqui mo quia châyãte sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote.

¹⁰ Simón Pedro que uchuuru siqui tiquise ra. Sacerdote rerecua rimba rese que tiquise rerequie requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia.

¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra.

¹² Soldados que Jesús isi cote ra. Soldados rerecua rese. Policía rese. Ñqui ja que Jesús isi ra. Nyucua que suruchoi ra.

¹³ Anás chuchua rane ngue eruruchoi ra. Anás ndiirĩ ngue Caifás ninisi ra. Caifás que sacerdote rerecua aque mose ra.

¹⁴ Caifás sí quia que ñee nyii ra. —Aque mii ño nda mano nguiã nande ja je chã, i que judíos je nyii ra.

Jesús aicuayãte, ichõ:ño Pedro

¹⁵ Mbia Jesús ruruchoi mose que Simón Pedro nyoĩ erui ra. Jesús chimbaaquiato nongue rese. Co mii ndese. Enongue que sacerdote rerecua icua ra. Nyebe ique oso nguiã Jesús rui. Sacerdote rerecua itaicuee.

¹⁶ Mbia que Pedro siquisã mii etaronda robei ra. Sacerdote chucua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguiã cote.

¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõ:ño ngue Pedro ee ra.

¹⁸ Nyiiseĩte mose que ra. Nyebe policía jenda tata mbucha nguiã. Sacerdote rimba rese. Ñqui ja que chi nyee ra. Pedro que chi nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiato re? ¿Mbae riĩ ereico mbia mbaaquiato quiato re? i que ererecua ra.

²⁰ Jesús que ñee ee ra. —Se que acheẽ ja mbia resa rae ra. Mbia chumunua nuãsa ja que aico mbia mbaaquiato quiato ra. Dios chuchúaa abe no. Acheẽ nyecuayã cuayã eã ngue se quia mbia ísaa ra.

²¹ ¿Mbaerã ereico ñee seje re? Secheẽ andusa je quia echeẽ. Sã ñqui ñee. Mbae riĩ acheẽ ee re. Ñqui ngue secheẽ ñandu ja quia ra, i que Jesús ererecua je ra.

²² Jesús cheẽ mose que policía jenda mo ucua eritii rese ra. —¿Mbaerã ereico ñee sacerdote rerecua je ñqui nde? i que policía mo ñee ucua Jesús rese ra.

²³ Jesús que ñee ee ra. —Secheẽ icuã mose quia echeẽ seje. Mbae icuã ñii aico ñee nde. Secheẽ turã mose chõ erecuachĩ nguiã serese, i que Jesús ee ra.

²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵ Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõiño ngue Pedro ee ra.

²⁶ Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraqi re Jesús rese reae, i que Pedro je ra.

²⁷ —Tei, ichõiño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policia jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchua je ra. I que nyaashĩ u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Eĩ nda oveja roo nandeuãte rei pascua mose, ique mose abae chuchua, i que ra.

²⁹ Nyebe Pilato si nguiã usẽ ñee ee. —¿Mbaerã jẽingo ñee Jesús je re? ¿Mbae icuã esaã nde? i que Pilato ra.

³⁰ Mbia que ñee ee ra. —Jesús que mbae icuã saã saãte ra. Eĩ nda uremondoãte rei ndeje. Mbae icuã naa naa eã mose, i que mbia Pilato je ra.

³¹ Pilato que ñee mbia je ra. —Jẽ ae Jesús jendao ae. Jẽ ae jẽingo erese ae. Jẽ ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ẽ. “Jẽiquia” ere chõ soldados je, i que mbia ñee Pilato je ra.

³² Jesús cheẽ iquechĩ cote. —Mbia ra sei quia sembucha ira rese, i rei nyii. Echeẽ iquechĩ cote.

³³ Pilato que ique si oso uchuchúaa ra. Ae “quiatuchu” i nguiã Jesús je. —¿Judíos rerecua tuchi nde re? i que Pilato Jesús je ra.

³⁴ Jesús que ñee ee ra. —¿Nde ae erecheẽ nguia seje a re? Emo ñee ndeje nyii reae, i que Jesús ee ra.

³⁵ Pilato que ñee ee ra. —Judío eã ño se resẽ. Judíos sí chõ ngue nemondo seje resẽ. Sacerdote rerecua abe no. ¿Mbae icuã eresaã nde? i que Pilato ra.

³⁶ Jesús que ñee ee ra. —Ererecua raque se. Ererecua eã ño se a íbii re. Eĩ nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra.

³⁷ —¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheẽ ñii nda. Ichõiñosa reã ñee ñii. Ichõiñosa reã ndesenda ra seandu ja, i que Jesús Pilato je ra.

³⁸ —¿Mbae ichõiñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbae icuã Jesús saã eãt e reae.

³⁹ Pascua mose bei que aico etarõ ji mbusẽ mondo bei jẽje ra. ¿Aba ra ambusẽ mondo jẽje namo nde? ¿Judíos rerecua ra ambusẽ mondo jẽje re? i que Pilato ñee mbia je Jesús rĩi nda.

⁴⁰ Mbia que ñee mombo mombo ja Pilato je ra. —Tei. Aque eã. Barrabás quia embusẽ imbu ure je, i ja que mbia ñee nda. Mbae mbuquiachãsa tuchi rei Barrabás.

19

¹ —Jesús jẽiruã nua, i que Pilato ra. Mbia que Jesús iruã nua cote ra.

² Nyu ritiméi uma ji que soldados mii Jesús ãquĩ ndese ra. Tiru ireĩ ngue emingue ee ra.

³ —Judíos rerecua tuchi chõ nde re, ichõĩno ngue soldados ucua ucua Jesús rese ra.

⁴ Pilato que usẽ si oso ñee mbia je ra. —Secheẽ jeñandu rã. Acheẽ ndei que Jesús je ra. Mbae icuã esaã eãte reae. Nyebe anosembe nguiã jẽje co, i que Pilato ra.

⁵ Jesús que econosẽ mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resẽ, i que Pilato Jesús ndeacuímbia je ra.

⁶ Sacerdote rerecua que chi ja huee ra. Policía jenda mo abe que chi huee ra. Ñquĩ ja que ñee mombo mombo Pilato je ra. —¡Embucha ira rese! ¡Embucha ira rese! i ja que ñee mombo mombo ee ra. Pilato que ñee ee ra. —Jẽ ño jembucha ira rese ae. Mbae icuã esaã eã arõte seje, i que Pilato mbia je ra.

⁷ Judíos que ñee Pilato je cote ra. —“Dios rucucha rei se”, ichĩ Jesús nguiã. Nyebe eiquia. Sã embesa ji riqui i no: “Ae Dios ririĩ saã saã nguia, aque jẽiquia”, i que embesa ji ra, i que judíos ñee Pilato je ra.

⁸ —Dios rucucha, i mose que Pilato siquiche tuchi cote ra.

⁹ Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeẽ mose ra.

¹⁰ Pilato que ñee si ee ra. —¿Mbaerã ereico ñee ãte secheẽ mose re? Arembuchacha arõte ira rese. Arembui abe arõte se. Se chĩ mbia rerecua, i que Pilato ñee Jesús je ra.

¹¹ Jesús que ñee Pilato je ra. —Dios nemii eã mose mbia rerecuarã, eĩ nda ereoco ãte rei serese. Ae semondo ndeje, ae quiarei eicuã tuchi ndesi, i que Jesús ee ra.

¹² Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¡Erembui chĩ nda jẽ! Nde embui mose, César quiatu eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasẽ tasẽ Pilato je ra.

¹³⁻¹⁴ Judíos cheẽ andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resẽ, i que Pilato mbia je ra.

¹⁵ Mbia que tasẽ tasẽ ee ra. —¡Eiquia rei! ¡Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Úrererecua mo eãte nyeresẽ. César mii ño nyeresẽ, i que sacerdote rerecua Pilato je ra.

¹⁶ Aque mose que Pilato Jesús mondo mbia je cote ra. —Jẽiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷ Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue je ra.

¹⁸ Huee que soldados Jesús mbucha ira rese ra. mbia nyeremo abe que embucha ira rese ra. Co mii Jesús ribisho quti. Enongue eribisho quti no. Jesús que emii eite re ra.

¹⁹ Pilato que letrado mbesa ra. JESUS DE NAZARET REI JUDIOS RERECUA, i que embesa ra. Embesa ji que emii ibate Jesús aqii nguiti ra.

²⁰ Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chi mbia cheẽ mbuae jaaja ra. Judío cheẽ. Griego cheẽ. Latín ñee.

²¹ Sacerdotes rerecua que ñee ja Pilato je ra. —“Judíos rerecua” erechi nguiã embesa. “Judíos rerecua raã ñooño” ere chõ embesa mii ae, i rei que judíos rerecua Pilato je ra.

²² —Ae ambesa, sã ùquĩ ñi ño, i que Pilato judíos rerecua je ra.

²³ Cuatro soldados que chi huee ra. Ûquĩ ngue Jesús mbucha ira rese ra. Ûquĩ ngue Jesús irao isirõ sirõ ja ra. Jesús irao mii ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra.

²⁴ Soldados que ñee nyue ra. —Aque ra nandechisia eã. Sita ñetẽ nandesu-rubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechi cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechi cote.

²⁵ Jesús mbuchasa ira rese que cuña mo chi ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ûquĩ ngue chi ja Jesús ji ra.

²⁶ Juan abe que chi Jesús si ji ra. Jesús mae mose usi rese que ñee ee ra. — Taĩ, aque quia nderiirina cote, i usi je. Juan nii eriqui ñee. Jesuubi tuchi quia ñi Juan nde.

²⁷ —Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimbirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote.

²⁹ Vinagre mo ngue chi mbae mo ye huee ra. Mbia que esponja monde vinagre ye ra. Mondo que Jesús churuu ra.

³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãquĩ ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ùquĩ chiã ira rese pascua mose huee, i que mbia ra. Pascua nonde que embucha ira rese ra. Mbia i coquiato mose pascua nonde. Mbia chumunuasa tuchi quiarei pascua. Sábado mose rei pascua. Nyebe mbia ñee nguiã Pilato je. — Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra.

³² Soldados que nyoi ira resenda tima ndiquio ra. Ae chi Jesús rereco chobei.

³³ Ngasẽ mose Jesús je, eraaquete que ee ra. Nyebe etima ndiquio eã nguiã.

³⁴ Soldado mo ngue Jesús cúa chiõ tiquise je ra. Eruqui que uchẽ nda. Eri abe que uchẽ nda.

³⁵ Nyebe aico nguiã ã mbesa mbesa a. Amae jee ngue erese re. Acheẽ ñoñoã se quia a. Eĩ nda jẽ abe “ae bei jẽ” jenyẽ Jesús riĩ.

³⁶ Embesa ji cheẽ ngue ique cote ra. Jesús tima ndiquio eã mose. —Etima nda mbia siquio eã, i que embesa ji nyii ra.

³⁷ —Ae embucha uquia ira rese nae, ũquiĩ nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchíangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã.

³⁹ Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushimbusa tubiriã tuchi reru ra. Eraaque mbaerã ndei aba mbushimbusa. Ira shimbu turã mbucú; ji. Mbae a mbucú; ji abe no.

⁴⁰ Ũquiĩ ja que Jesús rete querao cote ra. José. Nicodemo ndese. Aba mbushimbusa resebe que eraaque uma uma tiru je ra. Eĩ mbei que judíos quia mbia raaque je ra. Eati nonde.

⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii.

⁴² Huee que Jesús raaque nduruchoi nyati ra. —Cochite quia sábado ru nguiã nande je co, i que eati aichi chõ nda.

20

Jesús quera si

¹ Domingo mose que María Magdalena nyoi mae Jesús tãsa rese ra. Nyaasĩ nonde. Jesús atiquia nduruba ji que chi sita ra.

² Nyebe echoi nguiã uchã ñee Simón Pedro mbiirandu. Jesús chimbaaquiatu nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangue eno mangue reae, i que María Magdalena nda.

³ Nyebe Pedro si nguiã ea tiquia rea. Uquiato rese.

⁴ Nyoi ja que uchã nda. Enongue rane ngue Pedro chucuã oso ngasẽ nda.

⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda.

⁶ Aquere que Simón Pedro ngasẽ cote ra. Ae quiatu que ique oso sita imi ni nda. Ae abe que mae Jesús umanda achõ ndese cote ra.

⁷ Eãqui umanda rese abe que mae nda. Tiru ataque rese ja eã ngue eãqui umanda chi ra. Eacua ji que chi icúe ra.

⁸ Ae rane ngasẽ nguiã nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguiã re, i que eicua cote ra.

⁹ Ũquiĩ ngue embesa ji icuayãte ra. “Jesús ra quera si”, i que eicuayãte ra.

¹⁰ Nyebi si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra.

¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chi ngoi Jesús ãqui ndúa quti ra. Enongue ecuii rúa quti no.

¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangué chõ eriqui ererequia mangué, i que María ra.

¹⁴ Ucheẽ nduibe que mae ndei uquite quiti ra. I que Jesús uã ee ra. Icuá eãte que ra.

¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguiã María je. Nyebe María ñee nguiã ee. —¿Nde Jesús raaque ererao re? ¿Mangué erechono mangué re? Taso erea ae. Tarao ae, i que María ra.

¹⁶ Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembaaquiatusa, i ñee Jesús icua re.

¹⁷ Jesús que ñee María je ra. ¡Seisi jeichĩ nda re! ¡Aso ãte Paba rea resẽ! Eso rã ñee senongue je. “Jesús que ñee jêje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jêje ra”, ere rã senongue je, i que Jesús ñee María je ra.

Jesús nyecua uchĩmbaaquiatu je

¹⁸ María Magdalena que oso Jesús chĩmbaaquiatu mbiirandu ra. — Amaechĩ Jesús rese, i que ee ra. Jesús cheẽ ngue esenei ja ee ra.

¹⁹ Aque mose que domingo ra. Aque isa que Jesús chĩmbaaquiatu chĩ ñumunua nda. Etaronda matã ji que chĩ nda. Siquichete quia judíos si re. Jesús que oso ique uchĩmbaaquiatu mbuate ra. Eite re que esi ñee ee ra. —¡Jêya eãte jirichĩ nda jê! i que Jesús ñee ee ra.

²⁰ Aquere que Jesús o iõsa reacuquia ee ra. Ucuá iõsa abe no. Echĩmbaaquiatu ía tuchi que mae Jesús rese ra.

²¹ Jesús que ñee si ee ra. —¡Jêya eãte jirichĩ nda jê! Sã ñi Paba sembu no, eĩ tae si jemondo secheẽ nenei nenei sacua mbia je, i que Jesús uchĩmbaaquiatu je ra.

²² Jesús que uchĩmbaaquiatu ichu ñee nda. —Espíritu Turã ndu jêje a cote, i que eichu ra.

²³ —“Dios chõ jêicuã mbutiã nguiã jêsi co”, jenyé mose emo je, Dios ra ùquĩ icuã mbutiã esi cote. “Dios chõ jêicuã mbutiã eã nguiã jêsi co”, jenyé mose emo je, Dios ra ùquĩ icuã mbutiã eã esi, i que Jesús ra.

Tomás mae Jesús quera si rese

²⁴ Tomás oreãte que Jesús nyecua mose uchĩmbaaquiatu je ra. Jesús chĩmbaaquiatu raque Tomás. Eata, i que Tomás je ra.

²⁵ —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecúa iõsa rese, “nyia” aeã nda se, i que Tomás ñee nda.

²⁶ Jesús chĩmbaaquiatu que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —¡Jêya eãte jirichĩ nda jê! i que ee ra.

²⁷ Ñee ngue Tomás je cote ra. —¡Sã seo jê! Seo iõsa rese eco. Secúa iõsa rese abe eco ae. “Jesús quera si eãte” jere sichĩ nda jê! “Jesús que quera si ra”, ere chõ cote, i que Jesús ñee Tomás je ra.

²⁸ —Sererecua. Nde rei sembae Dios, i que Tomás Jesús icua cote ra.

29 Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. Ñquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jêje

30 Jesús que mbia mae sayã saã saã tuchi uchimbaaquiato je ra. Ñquĩ ambesa ja eã nguia a.

31 ã nguia ambesa ja quia a. Jê Jesús icua sacua. —Jesús rei Cristo. Jesús rei Dios rucucha, jenye nda chã. Ñquĩ icua mose ra jêingo bei.

21

Jesús nyecua siete uchimbaaquiato je

1 Aquere que Jesús nyecua si uchimbaaquiato je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra.

2 Echimbaaquiato que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo riiri abe que chi ra. Echimbaaquiato nongue abe que chi nyeremo no nda.

3 —Taso rá sira rea, i que Simón Pedro ra. —Ure abe ra ureso nderese, i que eataque ee ra. Nyoi ja rei que sira rea ra. Nyui ja que echoi canoa ye ra. Sira que embua mbua eãte aque isa ra.

4 Jesús que chĩ erimia ndese echimbaaquiato je ra. Jesús eã eriqui reĩ nguiã ee.

5 —¿Sira mo jembua re, ãquẽ? i que Jesús ñee mombo ee ra. —Tei, i que echimbaaquiato ee ra. Jesús icua rocoi.

6 —Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra.

7 Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huĩrao mingue asi oso ii ra. Jesús rea. Sira mbua mbua nonde quia huĩrao mbui nguiã nyii.

8 Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndiichã nda. Sira mbua mbuasa que ecuruchoi quia mbutiriri sira resebe ra.

9 Nguichi que canoa si ibi rĩ cote ra. I que tata u ee ra. Sira miĩ ngue chi tata rĩ ee ra. Mbichae abe que chi ra.

10 —Sira mo jendu rá. Ae jembua ramo, i que Jesús uchimbaaquiato je ra.

11 Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebẽ. Sira mbua mbuasa que soroãte enonosẽ mose ra. Sira cuasu achõte raque. Sira 153 raque.

12 —Jenyu quiaru cote, i que Jesús ee ra. —¿Aba nde re? i ãte que emo ñee ireĩ nguiã ee ra. Mbia que Jesús icua jate ra.

13 Jesús que oso tátaa cote ra. Mbichae que esirõ nda. Mbuchao chao que uchimbaaquiato je ra. Sira abe que embuchao chao ee ra.

14 Jesús que mano nyii ra. Quera si que ra. Nyecua nyecua que uchimbaaquiato je cote ra. Co rei tercera vez co.

Jesús ñee Pedro je

15 Quiaru jare que Jesús ñee Simón Pedro je ra. Jonas ndiirĩ ndei Simón Pedro. —Simón, ¿erechescua tuchi quia serese ã si re? i que Jesús Pedro je

ra. —Ae. Achesecua tuchite sequia nderese co resê. Seicuate se resê, i que Pedro ñee ee ra. —Oveja raarõsa rã eico no. Seicuasa embaaquiату quiatu quia secheê je no, i que Jesús Pedro je ra.

¹⁶—Simón, ¿erechesecuate quia serese re? i si que Jesús ñee Pedro je ra. Pedro que ñee ee ra. —Ae. Achesecua tuchite sequia nderese co resê. Seicuate se resê, i si que Pedro ñee ee ra. —Oveja raarõsa rã eico no. Seicuasa esaarõ turã nguia no, i que Jesús Pedro je ra.

¹⁷—Simón, ¿erechesecuate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesecua tuchite sequia nderese co resê, i que Pedro ñee Jesús je ra. —Oveja raarõsa rã eico no. Seicuasa esaarõ turã nguia no.

¹⁸Tacheê nyecua ndeje, Pedro. Ndeyasu mose que ereico ndeirao mingue oso ngata chooñi ndesose quiti ra. Nde ameí mose ra ndechiba ereira cote. Mbia ra ndecua cote. Ndeso sere ãsa quiti ra mbia nderuruchoí cote, i que Jesús Pedro je cote ra.

¹⁹—Eí nda mbia Pedro iquia, i chõ Jesús re. —Eí nda Pedro Dios quirãcuã ndeacuquia mbia je, i chõ Jesús re. —Eico serui, i que Jesús Pedro je cote ra.

Ae uchimbaaquiату rese Jesús nyesecua tuchi

²⁰Pedro que uba mae serese cote ra. Se rei Juan. Jesús nyesecua tuchi rei se. Se chõ ngue acoi huí quiaru Jesús jii aque isa resê. Se chõ ngue “¿Aba ra neme mbia icuã je re?” ae Jesús je resê.

²¹Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra.

²²Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra.

²³—Juan nda manoã mbeichí nde, i que Jesús icuasa Juan ñii cote ra. Jesús cheê abi chõchí. —Juan nda manoã, ire rocoí Jesús nyii. —Se cheê mose ra manoã, i chõ ndei ngue Jesús re. —Juan nda manoã, i ãte que Jesús ra.

Juan ñimbasa hui bei

²⁴Jesús chimbaaquiату chõ se re. Se chõ ã ambesa ja nguia. Amae jate que se quia Jesús chisaã ndese ra. Acheê ñooño eãte se quia ã mbesa mbesa co.

²⁵Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eí ndei ra papel mbesa ji mbia recua mbiitayã jate. Amén.

LOS HECHOS DE LOS APOSTOLES

Espíritu Turã nda tu, ¡Jesús

¹⁻² Ambesa que ndeje nyii, Teófilo. Arembiirandu ja que Jesús chiao rese. Eresco mose íbii. Jesús que mbia mbaaquiātu quiātu ereco mose íbii ra. Dios que equerao bei jiri ibate cote ra. Ũquí ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiātu quiātu ra. Siqui que Espíritu Turã ndese mbia mbaaquiātu quiātu ra. Eaquiātu que esecha oso ibate cote ra.

³ Manonde que eru si nyecua ũquí je ra. Oso nonde ibate. Ngueco que eteacuquia cuquia si ee ra. Cuarenta días que eriqui nyecua nyecua bei uchi mbaaquiātu je ra. Dios rese que eriqui embiirandu randu ra. Dios rei ererecua tuchi. Ae rĩ eriqui embiirandu randu.

⁴ Jesús oso nonde ibate que eriqui ñee ñee uchimbaaquiātu je ra. —¡Jēsochĩ nda sucha tubiriã si jê! ¡Jēsochĩ nda Jerusalén si jê! ¡Paba cheẽ nguire jengu Espíritu Turã ndaarõ aa jê! “Espíritu Turã tamondo jêje”, ¡ que Paba jêje ra. Aque rĩ ngue acheẽ jêje nyii resẽ, ¡ que Jesús ee ra.

⁵ —I je que Juan bautizar ¡ mbia je ra. Namó jiri ra Espíritu Turã ndu. Ae ra ¡que jeñiangui re. Eĩ nda Espíritu Turã bautizar ¡ jêje. I je eã cote. Espíritu Turã nda ¡que chõ jeñiangui re cote, ¡ que Jesús uchimbaaquiātu je ra.

Jesús oso ibate

⁶ Emo mose que Jesús chimbaaquiātu ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namo nda ure mo eremii urererecuarã nde? ¡ que mbia Jesús je ra.

⁷ Jesús que ñee ee ra. —Manose chõ ndae. Paba mii eicua. Mbia eicuayã. Jẽ nguia jêicuayãte nguiã no. Manosete chõ ndae.

⁸ ¡Co rese chõ jendua jê! Espíritu Turã nda tu jêje cote. Ae ra jembuquirãcuã. Ae ra jembucheẽ ñee seriĩ. Jẽ nda jẽingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangue chooñoa jenda ja je abe no. Ũquí ja je jẽingo serenei nenei, ¡ que Jesús ra.

⁹ Ñeende que Jesús si ibate cote ra. Uchimbaaquiātu resa rae que esi erecha ra. Ibeishĩ ngue embuchecuayã cote ra.

¹⁰ Echimbaaquiātu que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echi ra. Eiraoshĩ tuchi que ngaẽ ejii ra.

¹¹ Ibatenda que ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemae ngue u eso rese nae, eĩ si ra u íbii no, ¡ que ibatenda ee ra.

Dios que Matías irabo ra

¹² Jesús chimbaaquiātu que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi.

¹³ Ngasē ngue Jerusalén nda. Nyoï que uchuchúaa cote ra. ã ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo ririĩ. Jacobo, i ee. Simón el Cananista. Judas. Jacobo ririĩ ndei Judas.

¹⁴ Ũquí ja que ñmunua mbei bei quia ñee ñee Dios je ra. Ari abe no. Acuani abe no. María abe no. Jesús si rei María. Jesús nongue abe no. Ũquí ja que ñmunua mbei bei quia ñee ñee Dios je ra.

¹⁵ Emo jiri mose que Jesús icuasa ñmunua ja ra. Ciento veinte que ra. Pedro que uã ñee ee ra.

¹⁶ —Seandu rá se, Seresenda. ¡Sã embesa ji ñee ñooño eã ño jê! Cose que Espiritu Turã ñee Judas riĩ nda. David que embesa Espiritu Turã ñee nguire ra. Judas riĩ. Judas rei Jesús reacuquiasa mbia icuã je. Jesús rerao nonde iquia.

¹⁷ Jesús que Judas irabo rei nyii ra. Nanderesendacuã. Nyebe rei Judas nanderesenda nyii.

¹⁸ Judas que mbae isiquia isi icuã nda. Mbae isiquia je que ibi mo isi ra. Hue erco mose que mano nda. Ibate si eru ngoi mano. Uãquí nguiti que eru ngoi ra. Erie que oo ra. Echique mburiri.

¹⁹ Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguiã hue je. Ecoisa ibi je.

²⁰ ¶ ñi embesa ji Salmos nde:

Sã echuchua oreã mbei.

Sã mbia mo ndiquiã mbei equi re.

Sã eriquicharomba riqui Dios cheẽ nenei nenei cote,

i que embesa ji Judas riĩ nda.

²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiatsu quiatsu bei mose.

²² Juan mbia mbiirandu randu mosenda bei. Dios Jesús querao chee quia ibate. Ae siqui beite quia nanderese nae, ũquí mo nandeirabo nanderesendacuã. Jesús quera rese mbia mbiirandu randu sacua, Judas riquicharõ, i que Pedro ñee ee ra.

²³ Mbia nyeremo ngue etea cote ra. José Justo, i emo je. Barsabás, i abe ee no. Matías, i enongue je.

²⁴ Jesús chimbaaquiatsu que ñee Dios je cote ra. —Urererecua, aba chiã ereicuate quia co. ã nyeremo ndiqui ã. ¿Aba ndechiirabo re? ¿Aba ereirabo urembirõ sacua nde?

²⁵ ¿Aba eretea ndechimbaaquiatusubirã nde? ¿Aba eretea Judas riquicharõ nde? Ae hui quia ndecheẽ si. Ae oso quiachã ndesi cote. ¿Aba eretea eriquicharõ nde? i que Dios je ra.

²⁶ Sita que embaba mbaba o ye cote ra. —¿Aba Dios chiirabo re? i ñene. Eĩ ngue Matías irabo ra. Dios que Matías mingo Jesús chimbaaquiatsu rese cote ra. Mbia once mbirõ. Docerã. Doce que Jesús chimbaaquiatsu cote ra.

2

Espiritu Turã tu Jesús icuasa je

¹ Fiesta de Pentecostés mose que Jesús icuasa chi ja ñmunua nda. Hue miĩ ngue echi ja ñmunua nda.

² Ibei rieu que embuate ra. Ama ndieu raanguia. Tuchua mbieu tuchi Jesús icuasa je.

³ Tata rendi raanguia que tu nguichi eãquí ndes e ra. Jesús icuasa ãquí ja rese.

⁴ Espíritu Turã ngue igue tuchi hue jenda chiangui re ra. Igue ja que Jesús icuasa chiangui re ra. Mbia que echeẽ ata mo saã saã cote ra. Echeẽ uchianuã ngue esaã saã nda. Espíritu Turã nguia rei embucheẽ echeemo. Mbia cheẽ mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangue choofoa jenda ja chõ chi nguia huee. Ûqui ndei Dios cheẽ mumbasa reã judíos ataque rã si.

⁶ Ibei rieu andu mose que ùqui ngaẽ uchã nda. Nyuruira tuchi eandu. Jesús resenda mbia cheẽ mbuae saã saã ja chõchĩ nguia u. Espíritu Turã ño ngue embucheẽ nguia. Mbiamo ñee icuasa reã ndaque. Mbia que ucheẽ ñandu ñandu ja u ra. Jesús icuasa ñee mose. Nyebe que mbia chi nguia nyuruira eandu.

⁷ Mbia nyuruira ja eandu. —¿Mañi equia mbiamo ñee icua ja re? Galilea jenda achõ ño ndaque ã, i tuchi que mbia u nyuruira eandu ra.

⁸⁻¹¹ —¿Mañi equia nande ja cheẽ naa naa ã nde? Nandechẽ Jesús icuasa saã jaaja chõchĩ nguia ã. Partia jenda cheẽ esaã saã ñochĩ nguia ã. Media jenda cheẽ abe no. Elam jenda cheẽ abe no. Mesopotami a jenda cheẽ abe no. Judea jenda cheẽ abe no. Capadocia jenda cheẽ abe no. Ponto jenda cheẽ abe no. Asia jenda cheẽ abe no. Frigia jenda cheẽ abe no. Panfilia jenda cheẽ abe no. Egipto jenda cheẽ abe no. Libia jenda cheẽ abe no. (Cirene ndobei.) Roma jenda cheẽ abe no. (Roma jenda mo ndei judíos. Roma jenda ataque rei judíos eã.) Creta jenda cheẽ abe no. Arabia jenda cheẽ abe no. Jesús icuasa ùqui ñee saã saã ja chõchĩ nguia ã. Nandechẽ esaã saã ja chõchĩ nguia ã. Jesús icuasa riquichĩ nandechẽ naa naa tuchi Dios chiao turã nenei nenei ã, i ja que mbia ucheẽ andu jaaja mose.

¹² I jate que mbia u nyuruira eandu ra. Ndua ndua tuchi que u eandu ra. —Mañi equia ñee ã nde, i nyue. Jesús icuasa mbia cheẽ mbuae naa naa mose.

¹³ Emo emo ngue ñee icuã icuã Jesús icuasa je ra. —Quiacua chõ eriqui nguia ã, i raque Jesús icuasa rĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echi uã ñee mbia je ra. Tasẽ jiri ñee ee. —¿Seandu ja u jẽ! Tacheẽ jẽje, Jerusalén jenda. Judea jenda abe no.

¹⁵ ¿Quiacua rei Jesús icuasa riqui jẽje re? Quiacua eã ño ñene. Tenda que nyui ramote resẽ. Mbia quiacuasa eã ño huee tenda resẽ.

¹⁶ ã nĩ ngue Joel embesa mbesa cose ra. Dios cheẽ mbuchecuada que embesa ã nĩ nda. Eĩ ngue embesa ra:

¹⁷ “Mbae ua jiri mos e ra Espíritu Turã amondo mbia ja je”, i que Dios ra. “Jendiirĩ nda secheẽ mbuchecua mbia je.

Acuanĩdu ra serea rea tuchi cuu.

Amei abe ra serea rea cuu no.

¹⁸ Aque mose ra Espíritu Turã amondo serimba ja je.

Serimba ra secheẽ mbuchecua checua mbia je.

¹⁹ Mbia mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbia rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

21 “Ndeya eã ño serese, Sererecua”, i mose emo ñee Dios je, aque ra Dios sirõ eicuã si,
i que Joel embesa ra.

22 Israel jenda, jseandu rã! Nazaret jenda rĩ aico ñee ñee jėje a. Jesús rĩ. Dios que Jesús mbuquirãcuã tuchi ra. Nyebe que Jesús mbia mae sayã saã saã nda. Ũquĩ ndese que jema nda.

23 “Mbia icuã nda seriĩ iquia”, i que Dios Jesús mano nonde ra. Jē nguia Jesús jēiquia tuchi nguia cote. Jē nguia jemee nguia mbia icuã je. Eiquia nonde. Dios rane ngue jirandu Jesús rese ra. “Mbia icuã nda Jesús iquia”, i que Dios quia nyii ra.

24 Dios que Jesús mbuquera si ra. Jesús mano mbei aroneãte.

25 David que Jesús cheẽ senei cose ra. Ā ngue ñee nda:
Sererecua riqui sembui eã mbei co.
Eriqui bei serese co.

Mbae riqui sembusiquiche aroneãte co.

26 Nyebe seya tuchi te riqui co.

Nyebe aico ñee turãte Dios rĩ co.
Semano mose abe ra Dios hui eã mbei sesi.

27 Seingue ra eresechayã semana mose, Sererecua.

Serete abe ra erembuquera si mingo.

Ndechesequate aico co.

28 Semingosa tuchi rei nde.

Sereco mose nderese ra seya tuchi,
i que David Jesús cheẽ nenei cose ra.

29 Tacheẽ nyecua jėje, Seresenda. Nanderu David que mano cose resẽ.
Mbia que echati resẽ. Eatisa nandeicua ja quia co resẽ.

30 David rei Dios cheẽ mbuchecuasa. Dios que ñee ee ra. “Nderiĩ mo nda Cristo. Ae ra mbia rerecuarã tuchi. Nderiquicharõ nda mbia rerecuabi tuchi”, i que Dios David je cose ra. “Dios ñee ñooñoa tuchi chõ nguia”, i que David ra.

31 David que Dios cheẽ icuate quia ra. Nyebe que ñee Jesús rĩ nda. “Seingue ra eresechayã semana mose. Serete ra erembuquera si mingo”, nyebe David i nguia Jesús rĩ.

32 Dios que Jesús mbuquera si ra. Ũquĩ ureicua ja quia ã. Nyebe ureico nguia jembirandu randu ũquĩ ndese ã.

33 Dios que Jesús querao ibate nyiese ra. Dios jii eriqui pee cote. Dios que Espíritu Turã mee Jesús je cote ra. Ucheẽ nguire que emee ee ra. Jesús riqui Espíritu Turã mondo ure je co. Ā Espíritu Turã nyisaã jeñandu ñandu quia ã. Espíritu Turã ndiqui ã mbucheẽ mbia mo ñee ã.

34-35 David osoã ibate aque mose. Jesús rĩ ngue David embesa ra. Ā ngue embesa ra:

Dios que ñee sererecua je ra. “Ecoi sejii. Nde abe ra ererecua serese.

Ae ndeucuyãte quia nae, ũquĩ je ra ndequirãcuã ateacuquia tuchi.

Ndequirãcuã tuchi ra ũquĩ si”, i que Dios sererecua je ra,

i que David embesa mbesa ra.

36 Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguia, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiatu ja je.

³⁸ Pedro que echeẽ sibishorõ nda. —¡Jëicuã si jëhui rã jë! Sã bautizar ure jëje Jesucristo rii. Dios jëicuã mbutiã sacua. Aquere ra Dios Espiritu Turã mondo jëje.

³⁹ “Espiritu Turã nda amondo jëje. Jendiirĩ je abe ra amondo. Ishonda je abe ra amondo. Sechiirabo ja je ra Espiritu Turã amondo”, i que Dios ñee nande je ra, i que Pedro Dios cheẽ nenei nda.

⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ūqui si jëhui chõ. Jë abe jëguichayã sacua Dios si, i que Pedro mbia mbaaquiatu ra.

⁴¹ —¡Ae beite jë! i que mbia tubiriã Pedro cheẽ andu ra. Ūqui j e que bautizar i ra. Aque mose que mbia tres mil Jesús isi ra.

⁴² Ūqui abe que ñumunua nua nguia Jesús quiato ataque rese ra. Jesús chimbaaquiatu ñee ñee mose mbia je. Ñumunua nua ñee Dios je. Etura mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiatu que Dios mbuquirãcuã nda. Nyebe mbia mae sayã naa naa tuchi nguã.

⁴⁴ Jesús icuasa que ñumunua nua mbei quia ra. Abei tuchi que eriqui nyue ra.

⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã jë cote ra.

⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Dios rii ngue eriqui ñee turã turã nyue ra. Eya tuchi que eriqui Dios rese ra.

⁴⁷ Dios rii ngue eriqui ñee turã turã nda. Mbia ataque que ñee turã turã nguia Jesús icuasa rii nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyoĩ quia Dios chuchúaa ra. Juan ndese. Tenda nyesece mose. Hue tenda bei que mbia riqui ñee ñee Dios je ra.

² Huee que amei mo ngatayã ndiqui bei huee ra. Echaacuquia mosenda bei eiquieĩ icuã. Mbia que ecuruchoĩ choi bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mii mii mbei eiquesa jii ra. Ache ache i sacua mbia i que mose Dios chuchúaa.

³ Dios chuchúaa nda Pedro i que nguia Juan ndese chã. Ecuatayã ngue mae erese ache ache i ee ra.

⁴ Pedro que nguesa mbui reã mae erese ra. Juan abe. —¡Ure rese emae jë! i ecuatayã je.

⁵ Eandu mose que mae erese ra. —Mbae mo nda emee seje reae, i mae nguia erese.

⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuata. Ehuã na ngata. Nazaret jenda quirãcuã nembucherõ na, i que Pedro ee ra.

⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieĩ abe nyerõ eo isi ruibe.

⁸ Ecuatayā ngue juā asi cote ra. Ngata cuata que ra. Ique Dios chuchúaa ũquí ndese. Eya tuchi que ra. Oo oo tuchi que ra. Iaanee, i tuchi que equia Dios je ra.

⁹ Mbia que mae ja u ecuatayā ngata rese ra. Ñee turā mose Dios je que mbia nyiisaquia u echeē ndese ra.

¹⁰ Mbia que nyuruira u mae erese ra. Mbia que eicua ja ra. —Ecuatayā ño aque re. Ache ache i beite que equia Dios chuchúaa, ae chō co re, i que mbia nyuruira tuchi mae erese ra.

Pedro ñee oco judíos je

¹¹ Embucherō ji que Pedro chiba isi isi quia ra. Juan chiba abe no. Mbia que ngaē ucha mae erese ra. Nyuruira erea. Portal de Salomón, i eiquesa je. Huee que echi ra.

¹² Pedro que mae mbia chumunua ndese ra. Ñee ngue ee ra. —¿Mbaerā jēingo nyuruirate mae erese re, Israel jenda? ¿Mbaerā jēingo nyurui rate mae urerese re? Ure ae eā ño Ecuatayā urembucherō nguiā. Urequirācuā eā Ecuatayā mbucuata nguiā. Dios quiarei uquiracuā mee ee embucherō. Urecuata turā embucherō eā nguiā.

¹³ Dios rei nanderu rerecua bei. Abraham. Isaac. Jacob. Ũquí nderecua bei Dios. Dios ñee turā mbei nguiirī nīi. Jesús rīi. Ae que jemee icuā mbia je eiquia sacuā nda. “Jesús tambui”, i mose Pilato, ũquí mose que jēisi quiatu quiatu chōchī nguiā.

¹⁴ “Embui”, jenye eā ñochī ngue Jesús turā nīi nde. “Embui”, jenye chōchī ngue mbia iquiasa rīi nde.

¹⁵ Eī jenye chōchī ngue mbia mingosa iquia nguiā. Dios que embuquera si ra. Equera si rese que uremae nda. Ā ureico mbia mbiirandu randu equera rese ā.

¹⁶ Ā jengu mae Ecuatayā ndese ā. Jē Ecuatayā jēicuate resē. Jendesa rae que Dios embucherō nda. Ure Jesús ureicuate quia ā. Nyebe Ecuatayā mbuquirācuā nguiā.

¹⁷ Jēaquiātuā ño Jesús jēiquia nguiā, Seresenda. Jenderecua aquiātuā ño Jesús iquia nguiā no.

¹⁸ Dios quia que ucheē mbuchecuasa mbucheē cose ra. Cristo rīi embucheē. “Mbia icuā icuā nda Cristo je. Cristo mbasi mbasi rae”, i que mbuchecuasa cose ra. Ũquí ñee nguire quia Cristo mbasi mbasi nguiā cote.

¹⁹ ¡Jēicuā si jēhui chō jē! Jemba rā Dios icha cuti. Dios jēicuā mbutiā sacuā. Eī jenye mose ra Dios jembiate cote.

²⁰ Dios ra Jesucristo mbuquichi imbu cote. Ae que emīi jenderecua rā cos e ra.

²¹ Namō ño nda Jesús riquichō ibate. Dios mbae mbitirō ja mose ra eru cote. Eī ngue Dios cheē mbuchecuasa ñiinda ñee nda.

²² Nyebe Moisés ñee nguiā nanderu cose ndare je. “Dios ra nanderesenda mo isi. Dios cheē mbuchecua sacuā. ¡Ae cheē nda jemumba jirichī jē!

²³ Echeē mumbasa ra Dios mbuquiachā nyesi”, i que Moisés ñee nda.

²⁴ Dios cheē mbuchecuasa ja que mbia mbiirandu randu mbae rīi nda. Ae riqi nyecua namo ā cote. Samuel nane ngue mbia mbiirandu randu ā nīi nda. Samuel nduinda ja abe que embiirandu randu ā nīi no nda.

²⁵ Jēje chō Dios cheē mbuchecuasa ñee ñee nguiā. “Seturāte ra jendiirī ja je”, i que Dios ñee nanderu ñiinda je ra. Jēje abe Dios ñee. Ucheē nda embuchebe

eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra.

²⁶ Dios que nguiirĩ mondo ibii cote ra. Jê nane je que embu ra. Jembuturã sacua. Jêhui sacua jêicua si, i que Pedro judíos je ra.

4

Ererecua paama i ja Pedro je, Juan abe je

¹ Sacerdotes que ngaẽ cote ra. Pedro ñee mbei mose mbia je. Juan abe ñee mose ee. Dios chuchua raarõsa abe que tu erese huee ra. Saduceos mo abe que ngaẽ erese huee ra.

² Ūqui paama i ja Pedro je. Juan abe je. Mbiambaaquiату quiату mose chõ ngue paama i ra. —Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ūqui ndiqui nguiã paama i ee.

³ Nyebe eisi suruchoi nguiã policiaa. Eresaitõ ño emingue nguiã tarõ. —Isamami nguiã nda nandechandu nguiã, i que ererecua nyue ra.

⁴ Mbiambiriã Dios cheẽ ñandu erenei nenei mose. Eatate que Jesús icua ra. Jesús icuaa rei cinco mil hombres.

⁵ Isamami ngue mbiambiriã ñumunua nda. Judíos rerecua que ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. Ūqui ja que ñumunua Jerusalén nda.

⁶ Anás abe que chí erese ra. Ae rei sacerdote rerecua. Caifás abe que chí erese ra. Juan abe no. Alejandro abe no. Sacerdotes nducucha ja que chí ñimbaacua ra.

⁷ Pedro que emii mbia ite re ra. Juan ndese. Mbiambiriã ee cote. —¿Aba jembirãcua nde? ¿Aba jembirãcua nguiã ecuatayã mbucuata nonde re? i que ee ra.

⁸ Espiritu Turã ngue Pedro mbucheẽ cote ra. —Tacheẽ jêje, mbiambiriã rerecua. Tacheẽ jê abe je, Amei.

⁹ “Ecuatayã ndese urembiirandu rã”, jenyee chõ nguiã ure je ã. “¿Aba jembirãcua ecuatayã mbucherõ nonde re?” jenyee chõ nguiã ure je ã.

¹⁰ Tacheẽ nyecua jêje. Sã mbiambiriã ureandu ja. Sã Israel jenda ureandu ja. A ecuatayã embucherõ ji riqui jendesa rae a. Jesucristo quirãcua nguiarembucherõ. Aque sí quirãcua ño ñene. Ae jêiquia. Ae jembucha ira rese. Ae Dios mbuquera si. Aque quirãcua ño ñene. Nazaret jenda quirãcua.

¹¹ Ihuaẽ nandechirirõ na ño Jesús re. Sañi nandeico mae mae ihuae nandechirirõ ndese no. “Aque chõ ndei que eturã nda”, sañi nandeico erirõ i no. Eĩ nyee ra mbiambiriã Jesús ndichã i no. Mbiambiriã ra eisi tuchi nguerecuarã cote. Jesús momboi isi. Eisire rocoi nyii.

¹² Aba mo eã ndei nanderirõsa nandeicua si. Jesús ae nanderirõ nguiã nandeicua si. Dios aba mo abe mbu eã nguiã mbiambiriã rirõ sacua huicua si. Jesús ae ñene, i que Pedro ra.

¹³ Mbiambiriã rerecua nyuruira Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbiambiriã ataque rã ño ndaque, i que ererecua nyue ra. Pedro rii. Juan nii. —Jesús resenda quia eriqui reaẽ. Nyebe eriqui siquicheãte ñee nde, i nyue cote.

¹⁴ Hue que embucherõ ji riqui huee ra. Nyebe mbiambiriã rerecua ñee icua aroneate erii.

¹⁵ Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que ererecua nyue ra.

16 —¿Mañi nande ra Pedro je re? ¿Mañi nande ra Juan abe je re no? Pedro chimbucherō ndese mbia riqui jirandu randu jate ã. Jerusalén jenda riqui jirandu randu jate ã no. “Mbucherōã ngue ra”, nande aroneate.

17 Nandembusiquiche rã no. Ñee ñee siã nda equia Jesús rĩ ña. Mbia nda jiranua nguia mambi chã. Jesús rese chã. “¡Jesús cheẽ nda jēsenei senei sichĩ jê!” nande rã ee, i que ererecua nyue ra.

18 —Jenyu, i Pedro je cote. Juan abe je. —¡Mbia ra jembaaquiatuchĩ Jesús rĩ jê! ¡Jesús ra jēsenei seneichĩ mbia mo je jê! i rei que ee ra.

19 Pedro que echeẽ sibishorō nda. Juan ndese. —¿Aba cheẽ nguia ra aba mumbayã nguia re? ¿Jeñee nguiatu ra aba mumbayã nguia re? Dios cheẽ aba mumba aroneate. ¿I jêje re?

20 ¿Mañi nda aba umaesa reneĩ nde? ¿Mañi nda aba uchiandu abe reneĩ ne no? i que Pedro ee ra. Juan abe.

21 Ererecua ñee icuã Pedro je. Juan abe je. —Nandembusiquiche nandechesi, i raque. Hui chō ngue esi cote ra. Embasiã mondo cote. Ererecua ireĩte mbia tubirĩã si. Nyebe eiruã nuã eã nguia. Pedro ecuatayã mbucherō mose mbia ñee turã turã ño nguia Dios rĩ neaẽ. Nyebe ererecua ireĩte riqui nguia esi.

22 Ae Dios mbucherō nae, aque amei. Cuarenta años que ae ra.

Urembusiquicheã, i equiato Dios je

23 Mbia rerecua hui ja Pedro si. Juan abe si. Nyoĩ nguesenda mbiirandu ja mbia rerecua cheẽ ndese. Amei ñee ndese. Sacerdotes cheẽ ndese. Nguesenda mbiirandu ja.

24 Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no.

25 Sã David erembucheẽ nderimba cose no. Sã eĩ erembucheẽ no:

¿Mbaerã ño mbia pare pare i ja re?

¿Mbaerã mbia riqui ndua ndua chõõnote mbae mo ndese re?

26 Ibi jenda rerecua ja rei eicuã Dios je.

Mbia rerecua ja ñumunua icuã Dios je.

Ñumunua icuã ja eriirĩ abe je no. Cristo je, sã David i cose no.

27 Eĩ si tuchi mbia rerecua quia ñumunua icuã Jesús je co. Nderiirĩ turã je co. Herodes. Poncio Pilato. Judíos. Judíos eã abe no. Ñquĩ ja que siqui icuã icuã nguia Jesús je ra. Ndechiirabo raque Jesús.

28 Eĩ ere que ñee cose, eĩ si eicuã nguia ã namo.

29 Echiisaquia echeẽ icuã ndese, Urererecua. Nandembusiquiche, i tuchi equia ure rĩ ã. Urembusiquicheã na, Urererecua. Urembusiquicheã ndecheẽ nenei nenei sacua.

30 Ndequirãcuã embu ure je. Mbia rasi mbucherō cherō sacua. Mbia mae sayã naa naa sacua. Jesús rĩ. Nderiirĩ turã ñi, i que Pedro resenda ñee nyecha Dios je ra.

31 Ñeende Dios je que ibi nyere ee ra. Ñumunuasaa que ibi nyere mbia je ra. Espíritu Turã ngue ique tuchi echianguĩ re ra. Esiquicheãte que mbia mbiirandu randu Dios cheẽ ndese cote ra.

Jesús quiato abeichĩã eã

³² Hue rĩ ja Jesús icuasa ndua ndua checha. Eicuasa tubiriã. Ndua ndua ja. —Sembae ae chõ co re, i eã emo umbae je. —Nandembaerã ja chõ ã nde, i umbae ja je nyue.

³³ Jesús chi mbaaquiato que mbia mbiirandu randu tuchi Jesús quera resera. Jesús que uquirãcuã mee mee nguia uchimbaaquiato je ra. Dios que siqui tuchi erese ra.

³⁴⁻³⁵ Mbae tiã eã ngue eriqui Jesús icuasa mo je ra. Tuchuacha que vender i jaaja uchuchua je ra. Ibicha abe que vender i jaaja umbae ibi je no nda. Mbae isiquia que emee mee Jesús chimbaaquiato je cote ra. Jesús chimbaaquiato que emee mee mbaecha reã ja je cote ra. Nyebe mbae tiã eãte riqui nguia emo je. Jesús quiato mo je.

³⁶ Sã José no. Bernabé, i Jesús chimbaaquiato José je. Mbia mbiasa, i chõ nguia Bernabé i. Ae rei Chipre jenda. Levita mo ngue ae ra.

³⁷ Ae rei ibicha. Ibi umbae je que vender i ra. Mbae isiquia que emee Jesús chimbaaquiato je cote ra.

5

Ananías ñee ñooño

¹ Ananías, i que emo je ra. Safira, i que eninisi je ra. Ūqui ngue vender i ibi mo je ra.

² —Mbae isiquia ataque nandembuchimi nandembaerã, i nyue. Eataque que emee Jesús chimbaaquiato je cote ra. Eninisi abe que eicua ja ra.

³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheẽ ñooño Espíritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi nde?

⁴ ¿Mbaerã ño ere? Ibi rei nembae vender i nonde. Mbae isiquia abe rei nembae. Mbia je rocoĩ erecheẽ ñooño chĩ nde. Dios je chõ erecheẽ ñooño nguã, i que Pedro ra.

⁵ Ananías eandu mose que esi ngoi mano nda. Eandusa que siquiche ja ra.

⁶ Acuanĩndu mo ngue ngaẽ eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que ngu rese ra.

⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ūqui ja chõ nyeresẽ, ichõiño ngue eninisi Pedro je ra.

⁹ Pedro ñee ee cote. —¿Mbaerã ere? ¿Mbaerã jendua nduachĩ ūqui ndese re? Jeñe ñooño chĩ nguã Espíritu Turã je. Ae nderu curuchoi nyati nae, ūqui nyi nderaarõ arõ a. Eiquesa ji a. A ecuaẽ ndererao sacua a, i que Pedro ee ra.

¹⁰ Pedro cheẽ mose tuchi que esi ngoi mano nda. Ngu rã si. Pedro resa rae mano. Acuanĩndu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra.

¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcuã teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ūqui je ra. Jesús icuasa que ñumunua nua ja quia eiquesa ra. Portal de Salomón, i que eiquesa je ra.

¹³ Jesús icuasa rĩ ngue mbia ñee turã ja quia ra. Mbia ataque que siquichete ra. Nyebe ñumunua eã nguia erese.

¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no.

¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucu mose ra.

¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policíaa

¹⁷ Sacerdote rerecua que paama i ra. Saduceos mo abe que chi erese ra. Ñquĩ abe que paama i no nda.

¹⁸ Nyebe que Jesús chimbbaaquiato isi icuã nda. Tarõ ngue policíaa ra.

¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbbaaquiato que equerao itaicuee ra. Ñee nonde ee.

²⁰ —Dios chuchúaa jëso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiiirandu randu, i que ibatenda Pedro je ra. Juan abe je.

²¹ Jesús chimbbaaquiato eandu mose que echoi Dios chuchúaa ra. Mbia mbbaaquiato quiato que echoi ra. Isamamimbe cote. Isamamimbe echoi mbia mbbaaquiato. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñumunua ja u nyiese. Ñee ngue policíaa raarõsa je cote ra. —Jëso policíaa. Jesús chimbbaaquiato jendu rã ure je, i rei que ee ra.

²² Ecuasẽ mose policíaa que Jesús chimbbaaquiato oreã ño ee ra. Ae nyebi chõ ecuaẽ nguiã sacerdote rerecua mbiirandu. Ñee ee.

²³ —Puerta ãtã ngue chĩ ndei nguiã ure je. Soldados ngue chi rei nguiã itaicuee. Eraarõ ndaque. Ureequia rei ngue re. Eoreã ngue ra. Jesús chimbbaaquiato oreãte que ure je ra, i que ra.

²⁴ Sacerdote rerecua que nyuruira eandu ra. Dios chuchua raarõsa abe nyuruira eandu. —¿Mañi mañite equia re? i que u ñee ñee nyue ra.

²⁵ Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbbaaquiato quiato, i que embiiirandu ra.

²⁶ Eandu mose que Dios chuchua raarõsa nyoĩ erea ra. Nguesenda rese echoi erea. Curucuaẽ ja nguerecua je. Curucuaẽ turã. —Mbia tubiriã nda sita mombo mombochĩ nande je, i ñene. Nyebe eicuã eã ee.

²⁷ Jesús chimbbaaquiato que ecurucuaẽ mbia rerecua je ra. Sacerdote rerecua que ñee ee cote ra.

²⁸ —“¡Mbia ra jembiiirandu randuchĩ Jesús rese jë!” ure rei que jëje. Urecheẽ jemumba chõchĩ. Jerusalén jenda ja jembiiirandu randu chõchĩ nguiã. “Jesús ¡quiaa chõ ñquĩ nde”, ¡jenyechĩ nda ure rĩ jë! i que sacerdote rerecua Jesús chimbbaaquiato je ra.

²⁹ Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguiã. Mbia cheẽ nguia nda aba mumba jiri nguiã ña.

³⁰ Jë nguia Jesús jembucha nguiã ira rese. Eiquia sacua. Dios que embuquera si ra. Nanderu rerecua que embuquera si ra.

³¹ Dios que nguiĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacua eicuã si. Israel jenda mbui sacua huicua si. Dios eicuã mbutiã sacua esi.

³² Ūquĩ ndese que uremae ja ra. Nyebe ureico nguiã mbia mbiirandu randu ã. Espíritu Turã abe mae ja erese. Nyebe a e abe riqui nguiã mbia mbiirandu randu co. Dios quia Espíritu Turã mee mee nguiã ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguiã eiquia ja seríte.

³⁴ Fariseo mo abe que chĩ erese ra. Gamaliel, i que ee ra. Ae abe que ererecua ra. Mbía chũcua jat e que ae ra. Mbía mbaaquiātu quiatusa que ae ra. Dios cheẽ nenei neneisa que ae ra. Ae que juã ñee nda. —Jesús chĩmbaaquiātu jemondo mbiĩrĩ conosẽ itaicuee, i que ra.

³⁵ Ñee ngue ererecua uataque je cote ra. —Tacheẽ jẽje, Israel jenda. ¡Jendua tuchi jẽ! ¡Jẽocochĩ nda Jesús chĩmbaaquiātu rese jẽ!

³⁶ ¿Teudas si jẽtesarei re? ¿Jendua eãte quia erese re? Teudas quiātu ucuasu saã saã nguiã resẽ. Erimbarã tubiriãte chee. Cuatro cientos chee erimba. Mbía Teudas iquia chee. Teudas mano nyee. Erimba que saseĩ saseĩ ja chee. Erimba que ua ja ra.

³⁷ Aquere que Judas abe riqui ra. Galilea jenda. Censo mose. Mbía que siqui jate eruĩ no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda.

³⁸ Nyebe ã jẽteachõ. Jesús chĩmbaaquiātu jẽteachõ. Sã ae ae quia ua, Dios siquiã mose erese.

³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jẽ! Dios quirãcuã nguiã siqui rei erese. Dios je ra nandecuã abareãte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguiã cote. —Jenyu, i nguiã Jesús chĩmbaaquiātu je cote. Iruã nua cote. —¡Mbía je ra Jesús cheẽ jẽsenei senei sichĩ core jẽ! i rei que ee ra. Ererecua que hui esi cote ra.

⁴¹ Jesús chĩmbaaquiātu que nyoĩ mbía rerecua recha cote ra. Eyate que nyoĩ ra. —Jesús rĩ ño ureiruã nua nguiã, i que ra. Eya tuchi chõ ngue ra.

⁴² Mbía que embaaquiātu quiātu bei ra. Jesucristo rĩ mbía mbiirandu randu bei. Mbía chuchua que embuchesea sea quia mbía mbiirandu randu Jesús rĩ nda. Dios chuchúaa abe mbía mbiirandu randu.

6

Mbía siete irabo mbía mbuquiaru sacuã

¹ Jesús quiato tubiriãte que cote ra. Ae griego cheẽ saã nguiã, ũquĩ ngue paama i ra. Ae judío cheẽ saã nguiã, ũquĩ je que paama i ra. Jesús quiato ja raque. —Uresenda eru cheecha ja ngue jembuquiaru icuã icuã ñochĩ nguiã, i que griegos judíos je ra.

² Nyebe Jesús quiato rerecua mbía munua nguiã. Jesús quiato munua ja. Ñee sacua ee. —Ã ureico Dios cheẽ nenei nenei mbei mbía je ã. Urehui aronea tuchi quiarei Dios cheẽ si. Mbía urembuquiaru quiaru aroneate. Dios cheẽ nenei nenei ndocoĩ.

³ Nyebe Jesús quiato siete chõ jẽirabo. Mbía mbuquiaru sacua. Mbía chũcua siete chõ jẽirabo. Hombres aracua chõ jẽirabo. Espíritu Turã ndesenda tuchi chõ jẽirabo. Sã ũquĩ ño mbía mbuquiaru quiaru quia.

⁴ Ure quiātu ra urecheẽ mbei quia Dios je. Ure quiātu ra Dios cheẽ uresenei senei mbei quia mbía je, i que Jesús quiato rerecua ra.

⁵—Coche ñene, ¡jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espíritu Turã ndesenda tuchi. Felipe. Prócoro. Nicanor. Timón. Parmenas. Nocolás. Ũquí ja que eirabo ra. Nicolás ndei Antioquía jenda. Judío eã ngue ae ra.

⁶ Curuchoi ja que Jesús quiato rerecua je ra. Jesús quiato rerecua que o chono ñono ja ũquí ãquí arõ nda. Ũquí siete ãquí arõ. Ñee ngue Dios je cote ra.

⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã mbia mae sayã naa naa tuchi mbia je.

⁹ Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. Ũquí jate que paama i Esteban je ra.

¹⁰ Ũquí ngue Esteban ñee sobeishĩ aroneate quia ra. Espíritu Turã nguia Esteban mbaaracuate nguiã. Espíritu Turã nguia Esteban mbuch eẽ aquiatute nguiã. Nyebe ũquí ndiqui Esteban ñee ndibishorõ aroneate.

¹¹ Paama isa que mbae isiquia mee mbia mo je ra. Ñee ñooño nonde Esteban nii. —Esteban ngue ñee icuãte Moisés rĩĩ nda. Esteban ngue ñee icuãte Dios rĩĩ no nda, ichõĩño nonde Esteban nii.

¹² Ñee ñooño je que mbia mbũcuãte Esteban je ra. Amei abe mbũcuãte Esteban je no. Nyebe mbia Esteban isi suruchoi nguiã ererecua je.

¹³ Ñee ñooño je que ñee icuã si Esteban nii huee no nda. —¡Esteban ngue ñee icuã icuãte quia Dios chuchua rĩĩ nda jê! ¡Dios cheẽ nii abe que Esteban ndiqui ñee icuã icuãte ra jê! ichõĩño Esteban nii.

¹⁴ —¡Esteban ñee ngue urechandu ra jê! “Jesús ra Dios chuchua mbucoi. Moisés cheẽ nda Jesús mbutiã”, ¡i que Esteban nda jê! ¡ique ñee ñooño ererecua je ra.

¹⁵ Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ũquí mose.

7

Esteban ñee mbia je

¹ Sacerdote rerecua que ñee Esteban je cote ra. —¿Mbia ñee ñooño nguia nderĩĩ nde? i Esteban je.

² Esteban ngue ñee oco ee cote ra. —Tacheẽ jêje, Seresenda. Tacheẽ jêje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán.

³ Dios que ñee Abraham je ra. “Ibi mo nguia eso. Nderecua esecha. Nderesenda abe esecha ja. Ibi mo tateacuquia ndeje. Huee eso rã. Huee quia tereco”, i que Dios ee ra.

⁴ Abraham ngue oso nguecua recha ja ra. Ibi Caldea recha ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaẽ aa ra. A nandeico a. Aa que erurucuaẽ nda.

⁵ Dios que ibi mo mee eã Abraham je ra. Ibi boque ñetẽ mo mee eã tuchi ee. "Ibi tamondo nderiirĩ mbaerã. Ndetiã mose ra amee nderiirĩ je", i que Dios ee ra. Abraham nguiirĩ ndea eã mose qu e Dios ñee ee ra.

⁶ "Nderiirĩ nda siqui ja rei mbiamo ndese. Ndetiãmbaa. Mbiamo ndecuua ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã", i que Dios Abraham je ra.

⁷ "Nderiirĩ mbuquiei quieisa ra ambasi mbasi. Ñquĩ mos e ra nderiirĩ cuaẽ usẽ aa. Aa ra ñee ñee turã seje aa cote", i que Dios ra.

⁸ Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguiã circuncisión, i ñquĩ je. Dios cheẽ si embutesareia sacuañ ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, i que eririĩ je ra. Isaac cuasu mose que ae abenguiirĩ tea ra. Jacob, i que eririĩ je ra. Isaac abe que circuncisión saã nguiirĩ je no nda. Embutesareia sacuañ Dios cheẽ si. Jacob abe que nguiirĩ tea ecuasu mose ra. Ae abe que circuncisión saã nguiirĩ je no nda. Doce eririĩ. Ñquĩ ndei ndei cose.

⁹ José, i que Jacob ririĩ mo je ra. José nongue que paama i ja José je ra. Nyebe José mee nguiã mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra.

¹⁰ Mbia icuã mose José je, huee que Dios riqui eraarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguiã ee. Faraón, i Egipto jenda rerecua je. Ererecuabi tuchi que José riqui ra. Nyebe emingo nguiã ererecuarã. Egipto jenda rerecuarã. Nyebe emingo nguiã uchuchua jenda rerecuarã.

¹¹ Emo mose jiri que mbae tiã mbia je ra. Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra.

¹² Quiata a mbuae que Egíptoo ra. Jacob jirandu mose que nguiirĩ mondochoi erea ra. "Nandechiurã mo jëisi rã oso", i que emondochoi Egíptoo ra. Aque ramo tuchi que eririĩ nyoĩ Egíptoo ra. Jacob ndiirĩ ndei ndei ja.

¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyebe Faraón José nongue icua nguiã cote.

¹⁴ José que ngõngue mondochoi ngu rea cote ra. Jacob, i que eru je ra. "Nanderu jendu rã. Jeninisi abe jendu rã. Jendiirĩ abe jendu rã", i que José ee ra. Curucuaẽ ja que ra. Setenta y cinco que mbia ra.

¹⁵ Eĩ ngue Jacob oso siri Egíptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee.

¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que ndei quiangue no nda. Ae ibi Abraham isi quia Hanor ndiirĩ si nae, huee que equiangue no nda.

¹⁷ "Cuatro cientos años nda nderiirĩ nyi bei Egíptoo. Aquere Ibi Canaán tamee ee", i quia Dios Abraham je nyii reaẽ. Cuatro cientos años ua jiri mose que ndei tubiriãte cote ra.

¹⁸⁻¹⁹ Aque mose que emo Egipto jenda rerecua rã cote ra. Ae que jiranuã José rese ra. Nyebe ngue eriqui nguiã ndei mbiriirĩ. Eicuã tuchi que eriqui ndei je ra. "Jendiirĩ itãquieĩ jësecha chõ. Sã ae ae mano ja", i que ererecua ndei je ra.

²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarõ nyecuayã nda. Mbia

rerecua si. Eru abe siqui embutiarō nyecuayā. Eitāquieĩ mose.

²¹ Nguereco checuayā aroneate chee que ra. Nyebe ererecua ririĩ ngasē nguiā ee. Isi turā ngue ra. Mbutiarō ngue nguiirina nda. Nyucuaaque que ererecua ririĩ nda. Ae que Moisés itāquieĩ mbutiarō cote ra.

²² Nyebe Moisés mbaaquiātu tuchi nguiā Egipto jenda rā si. Earacua tuchi que ecuasu mose cote ra. ĩ tuchi que ra.

²³ Moisés que ndua tuchi uataque rese cote ra. “Taso rā israelitas rea”, i que cuarenta años mose cote ra.

²⁴ Oso que cote ra. Egipto jenda mo icuā icuā mose israelita mo je que Moisés si ngasē nda. Moisés que esiquisā nda. Iquia que ra. Egipto jenda iqvia que ra.

²⁵ Moisés que ñee uchiangui re ra. “Sere senda ra seisi turā. Seicuate rae. ‘Dios chimbu chō tu nguiā co. Urerirō sacua a si’, i ra seresenda serĩ”, i rei ngue Moisés uchiangui re re. Eresenda que eisā ñochĩ nguiā.

²⁶ Isamami nongue que israelitas mo icuā icuā nyue ra. “Tacheē turā ee. ĩ nda eturā si nyue”, i rei que Moisés ra. “¿Mbaerā jēicuā icuā ndiqui jenyue re? Nande ja chō nyeresē”, i que Moisés ee cote ra.

²⁷ Ae rane eicuā icuā ndiqui nyue nae, aque que ñee icuā Moisés je ra. Moisés maña mondo. “¿Aba nemingo ererecuarā nde? Urereachō ño ae”, i que ñee icuā Moisés je ra.

²⁸ “Ae ereiquia curi, ¿aque rā si ra seiquia re?” i que ñee icuā Moisés je ra.

²⁹ Ā andu mose que Moisés si uchā nda. Ibimo. Madián, i que ibimo je ra. Huee que eriqui arete ra. Nguiirĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirō ngue ibatenda mo nyecua ee ra. Angel que nyecua Moisés je ra. Ira ruri rendi ite re que nyecua ee ra.

³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra.

³² “Dios chō se re. Ndei rerecua chō se re. Abraham nderecua. Isaac abe rerecua no. Jacob abe rerecua no. Ūqui nderecua ja chō se re”, i que Dios ra. Moisés que titi titi i ra. Siquichete que mae ndocoĩ erese ra.

³³ Dios que ñeembe ee ra. “Ndeiyao esirō na. Seturā ño se re. Sésaa ndeiyao esirō.

³⁴ Serimba rese aico mae mae mbeite Egíptoo co. Mbia icuā tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirō sacua a. Tasirō eicuā si cote. Eso Egíptoo. Taremondo Egipto cote”, i que Dios Moisés je cote ra.

³⁵ Dios que Moisés mingo mbia rerecuarā cote ra. Mbia rirō sacua Egipto si. Mbae icuā si. Mbia que Moisés isi sereā nea nyii ra. “¿Aba nemingo urererecuarā nde?” i que mbia Moisé je nyii ra. Ūqui sí je que Dios Moisés mondo si ra. Ererecuarā. Dios que tata rendi ite renda mbucheē Moisés je ra.

³⁶ Moisés que mbia mae sayā saā saā nguia nandei je ra. Mbia mae sayā tubiriāte que esaā saā nguia ra. Moisés que mbia curuchoi Egipto si cote ra. Curuchoi que Ama Ireĩ ndasa ra. Moisés que mbia quereco bei turuquia rui ra. Cuarenta años. Mbia mae sayā tubi riāte que esaā saā nguia ra.

³⁷ Amei mose que Moisés ñee mbia je ra. “Dios ra jemo irabo ucheē mbuchecua sacua jēje. Seraanguia si ra eirabo. ¡Aque cheē nda jemumbachĩ jē!” i que Moisés israelitas je ra.

³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je.

³⁹ Nandei que Moisés cheẽ ñandu sereãte quia ra. Echeẽ mumba mumba. “Nyaso rei nyebi Egipto ae”, i que equia ra.

⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egipto chã. Moisés tiãte ure je cote. Ae urereru Egipto si. Maranguiti chõ esi urerecha”, i que mbia Aarón je ra.

⁴¹ Nyebe que Aarón ticuasú raanguia raã ee ra. Imagen. Nandei que mbae iquia iquia ticuasú raanguia je ra. Eroo que emiã ticuasú raanguia jii ra. Mendi que ee cote ra. Mbia ia tuchi que uchiao rese cote ra.

⁴² Ûquiã icuã tuchi que Dios je ra. Nyebe Dios hui nguiã nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ûquiã je chõ mbia riquichĩ ñee ñee. Ûquiã mose que Dios ucheẽ mbu cote ra. Dios cheẽ mbuchecuasa que Dios cheẽ senei senei mbia je ra. Co rei embesa ji co:

Israelitas, ¿aba je jẽingo mbae roo mendi mendi cose re?

Jẽingo mose turuquia cuarenta años mose.

¿Seje chõ jẽingo mbae roo mendi mendi cose re?

⁴³ Tei. Seje eã ñene.

Jenyiao je chõ jẽingo mbae roo mendi resẽ.

Tuchua ñetẽ jendasó raso bei chõchĩ.

Mbae aingue raanguia resebe. Moloc, i ee.

Aque je chõ jẽingochĩ nguiã ñee ñee.

Seje ñee ñee ndocõĩ.

Nyasi tata je abe jẽingochĩ nguiã ñee ñee.

Nyasi tata rei Refán mbae.

Mbae raanguia jenyiao je abete que jẽingo ñee ñee nda.

Nyebe ra jaemondo jembae ibi si.

Babilonia ndobei ra jaemondo.

Mbia rimbarã nda jaemondo,

i que Dios nandei je cose ra.

⁴⁴ Nandei que chi arete turúquiaa ra. Aque mos e que nandei riqui tuchia rurucuata bei cose ra. Mbae ire que tucharã cose ra. Aque tuchiaqui re que mbia riqui ndua ndua Dios rese ra. Dios que tuchia nyao uquia Moisés je ra. “¡Eĩ ere chõ eao jẽ!” i que Dios Moisés je ra. Dios cheẽ ndui si tuchi que Moisés eao ra.

⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chimee, hue ibi je que ngasẽ cote ra. Nandei que guerra saã saã hue jenda je ra. Dios que mbia mombo ja hue jenda ra. Aque mose que nandei riqui tuchia ruruchoi bei ra. Tuchua, i chõ nguiã mbae ire ao ji je. Aque tuchia que equereco bei quia ra. David abe mbia rerecua mose.

⁴⁶ Dios que siqui tuchi David rese ra. David que ñee ee ra. “Tuchia cuasu tasaã ndeje”, i rei ngue David Dios je re. Jacob nderecua rei Dios.

⁴⁷ David ndiirĩ nguiatu que tuchia saã Dios je ra. Salomón, i que eriri je ra.

⁴⁸ Mbia rã eã ndei Dios. Dios siquiã tuchi chõ nguiã tuchiaqui re. Mbia chiaoqui re. Dios cheẽ mbuchecuasa que Dios cheẽ saã nda:

⁴⁹ Se quia ererecua tuchi re.
Ibatenda rerecua abe rei se.
Ibi jenda rerecua abe rei se no.
¿Mañi nda mbia sechucharã ao re?
Equi re ra aicoã ndesê.

⁵⁰ Se quiatu que mbae achao ja resê,
i que Dios nandei je ra.

⁵¹ Jeñia icuã ñochĩ. Jêisayã ñochĩ. Espíritu Turã jêisiteã teã ñochĩ. Jendu rã si
chô Espíritu Turã jêisiteã teã ñochĩ.

⁵² Jendu icuã bei que eriqui Dios cheê mbuchecuaa ja je ra. Jendu que Dios
cheê mbuchecuaa iquia iquia bei quia ra. Ibatenda Turã nda tu, ae i quia
cose nae, ûquí abe que jendu iquia iquia quia cose resê. Ibatenda Turã tu
mose que jemeê ñochĩ nguiã mbia icuã je ra. Eiquia nonde que jemeê ñochĩ
nguiã mbia icuã je.

⁵³ Dios que ángeles mbu rei jêje ra. Ucheê nderu raque jêje. Jê echeê mumbayã
sacuã. Echeê ngue jemumba mumba bei chõchĩ nguiã, i que Esteban ñee oco
tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra. Esteban i quia serĩ.

⁵⁵ Espíritu Turã ngue siqui tuchi Esteban ndese ra. Esteban ngue mae tuchi
ibe rese mbia paama i mose ee ra. Dios Turã ndese que mae ibate ra. Jesús
rese abe que mae nda. Jesús que chí juã Dios ji ee ra.

⁵⁶ Esteban ngue ñee nda. —Jemae jê. Ibei nyiequia rese aĩ mae a. Huee mbia
rucucha ñi juã Dios ji huee. Huee Jesús ñi juã Dios ji huee, i que Esteban nda.

⁵⁷ Mbia que tasê tasê tuchi paama i ra. Huisacua que emitao ja Esteban ñee
sí ra. —Nandecua recua erese, i que o oe Esteban ndese ra.

⁵⁸ Mbia que Esteban curuchoi sucha tubiriã sí ra. Huee que sita mombo
mombo erese ra. Sita mombo mombosa que huirao mbui mbui acuanindu
mo je ra. —Esaarõ, i que ee ra. Saulo, i que eieirao raarõsa je ra.

⁵⁹ Mbia que sita mombo mombo Esteban ndese ra. Sita mombo mombo
mose que Esteban ñee Ibatenda je ra. —Aque aso quia ndeje aque, Sererecua
Jesús. Seisi cote, i que Esteban Ibatenda je ra.

⁶⁰ Ngoi que nguiã ndese cote ra. Tasê tasête que ñee mombo mombo ra.
—Sererecua, ã icuã ndaque seje. ¡Erembasi mbasichĩ nda huicuañi ñi jê! i que
Esteban Jesús je ra. Esteban ngue mano cote ra.

8

Saulo icuã Jesús quiato je

¹ —Coche rei mano, i que Saulo Esteban mano mose ra. Aque mose tuchi
que mbia icuã icuã tuchi Jesús quiato je cote ra. Jerusalén jenda. Jesús quiato
que nyoi ja ñimbuchao Judea rĩ nda. Samaria rĩ abe que echoi ñimbuchao ra.
Jesús chimbuaquiato achõ ngue chichõ Jerusalén nda.

² Mbia turã mo ngue Esteban nyati ra. Nyeseo tuchi que eati mose ra.

³ Saulo icuã tuchi que eriqui Jesús quiato je ra. —Jesús quiato tambutiã, i
tuchi que Saulo quia ra. Nyebe eriqui nguiã mbia chuchua mbuchesea seate.
Jesús quiato rea rea ererao sacua tarõ policiaa. Saulo icuã tuchi que eriqui
Jesús quiato je ra.

Samaria jenda Dios cheê ñandu

4 Ae uchã nyoï quia Jerusalén si nae, ùquĩ ngue nyoï mbia mbiirandu randu tuchi quia Jesús rĩ nda. Mbïa recua ja que eriqui nyoï nyoï mbïa mbiirandu randu Jesús rĩ nda.

5 Felipe que oso Samáriaa ra. Sucha tubiriã mo. Huee que eriqui mbïa mbiirandu randu Jesús rĩ no nda.

6 Dios que Felipe mbuquirãcuã nda. Mbïa mae sayã ngue esaã saã nda. Mbïa tubiriã nguẽ nyiisaquia tuchi quia echeẽ ndese ra.

7 Aba checuayã icuã ngue Felipe jea jea tuchi mbïa si ra. Aba checuayã icuã ngue tasẽ tasẽ nguia hui mose mbïa si ra. Felipe que mbïa cuatayã mbucuata ja quia ra. Mbïa umi sayã abe que embucherõ cherõ nguia ra.

8 Nyebe hue jenda ia tuchi sucha tubiriã jenda.

9 Huee sucha tubiriã ngue Simón ndiqui ra. Brujo que ae nyii ra. Ae que mbïa mbĩrĩ irĩ tuchi quia nyii ra. Mbïa Samaria jenda chiicua tuchi que ae ra.

10 Mbïa que nyiisaquia tuchi quia Simón ñee ndese cose ra. Mbïa rĩrĩ abe que nyiisaquia quia echeẽ ndese ra. —Dios embuquirãcuã tuchi quia co, i rei que mbïa Simón nĩ nda.

11 Simón ngue mbïa mbĩrĩ irĩ tuchi quia brujería je ra. Nyebe que mbïa riqui nyiisaquia tuchi eres e nyii ra.

12 Huee que Felipe Jesús renei nenei tuchi cote ra. —Dios ra mbïa rerecuarã tuchi, i que Felipe quia hue jenda je ra. Ùquĩ mose que mbïa Jesús icua icua tuchi ra. Bautizar i que mbïa atate je ra.

13 Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbïa mae sayã saã saã nguia ra. Simón ngue nyuruira tuchi quia mae erese ra.

14 —Samaria jenda riqui Dios cheẽ isi isi tuchi ã, i que mbïa Jerusalén jenda mbiirandu randu ra. Nyebe que Jerusalén jenda Pedro mondochoi Samáriaa ra. Juan abe mondo.

15 Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra.

16 Espiritu Turã iqueã mose hue jenda chiangui re que Pedro choi erea ra. Jesús rimbarã ño ngue mbïa bautizar i nguia ee nyii. Espiritu Turã iqueã ño nguia echiangui re nyii reaẽ.

17 Pedro que o chono Jesús quiato ãquĩ arõ nda. Juan ab e o chono earõ. Espiritu Turã ngue tu Jesús quiato je cote ra.

18 Simón ngue mae erese ra. O chono mose earõ. Espiritu Turã tu mose ee. Nyebe que mbae isiquia reacuquia Pedro je ra. Juan abe je.

19 Ñee ngue ee ra. —Sembaaquiato se abe. Ndequirãcuã embu seje. Sã se abe seo tachono ñono mbïa arõ. Sã se abe Espiritu Turã quirãcuã tamee mee mbïa je. Mbae isiquia tamee jẽje jẽquirãcuã ndibishorõ, i rei que Simón nda.

20 Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jẽ!

21 Ndeturã eã ñochĩ ndechiangui re. Nyebe ra Dios uquirãcuã mee eã ndeje.

22 ¡Ndeicuã si ehui rã jẽ! Echeẽ ñee Dios je. Sã Dios nendua icuã mbutiã ndesi.

23 ¡Sã ndeicuã tuchi riqui ndechiangui re jẽ! Ndeicuã aicuate quia co, i que Pedro ee ra.

24 Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. † nda aquiachãyã esi, i que Simón nda.

²⁵ Pedro que Dios cheẽ senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

²⁶ Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icõí Jerusalén icha. Gaza icha abe, i que ibatenda Felipe je ra.

²⁷ Felipe que oso Dios cheẽ nguire ra. Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaẽ. Oso quia equia Jerusalén ñee ñee sacua Dios je nyii reaẽ.

²⁸ Uba que u quia uchuchua quiti cote ra. Carro ye que eru quia cote ra. Isaías chimbesea rese que eru quia mae mae carro ye ra. Dios cheẽ.

²⁹ Espiritu Turã ngue ñee Felipe je ra. —Eso rã carro jii, i que ee ra.

³⁰ Felipe que oso ra. Oso que Etiopía jenda andu ra. Isaías chimbesea rese que esi quia maemae nda. Nyebe Felipe ñee ee. —¿Isaías chimbesea checuate eriqui ndeje re? i que Felipe ee ra.

³¹ —Tei. ¿Mañi ae ra eicua re? Aba mo eicuayãte seje resẽ. Echuĩ rã. Ecoi seji. Sembaaquiato rã se, i que carro yenda ee ra.

³² ã Isaías chimbesea rese que eriqui mae mae nda. ã ndei e ã: Nanderiquicharõsa rei oveja rã. Mbia que oveja querao eiquiãsaa ra. Mbia que ovejara nyisia sia ra. Oveja ñee ñeeã ee.

Eĩ ngue nanderiquicharõsa ñee ñeeã huĩquia mose ra.

³³ Nanderiquicharõsa turãte raque.

Mbia icua tuchi ee. Mbia eiquiachõ.

Emosenda icua tuchite ee.

Emosenda eiquia chee.

Nanderiquicharõsa siquiã ibi rĩ cote,

i qu e Isaías embesa ra. Embesa ji rese que Etiopía jenda riqui mae mae nda.

³⁴ Etiopía jenda que ñee Felipe je ra. —Embesa ji embuchecua seje. ¿Aba rĩĩ Isaías riqui embesa mbesa re? ¿Mbiamo nĩ eriqui embesa re? ¿Ngũĩĩ eriqui embesa re no? i que Felipe je ra.

³⁵ Felipe que embuchecua ee ra. Mbaaquiato tuchi que Jesús rĩĩ cote ra.

³⁶ Carro que ngasẽ ama moo cote ra. —iCo ama ñi co! ¿Aa ra bautizar ere seje re? i que Etiopía jenda Felipe je ra.

³⁷ —¿Jesús ereicua quia cote re? Jesús icua tuchi mose ra bautizar ae ndeje cote, i que Felipe ee ra. Etiopía jenda ñee ee cote. —Jesús aicuate quia co cote. Jesucristo rei Dios ndiirĩ. Aicua sequia co cote, i que ra.

³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra.

³⁹ Usẽ ngue ama si cote ra. Espiritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra.

⁴⁰ Felipe que ngasẽ Azótoo ra. Sucha tubiriã ngue embuchesea sea ra. Mbia mbiirandu randu tuchi Jesús cheẽ ndese. Ngasẽ nyee que Cesarea ra.

9

Saulo uba ramo Dios icha rui

¹ Saulo icuã mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra.

² —Papel embesa rã sechiraorã. Tarao Damáscoo. Judíos chumunua mose ereacuquia sacuaã ee. Jesús quiat o hue jenda taru taru Jerusalén. Ecuasa taru taru quia etarõ sacuaã policíaa. Mujeres abe taru. Hombres abe taru taru no, i rei que Saulo ñee icuã Jesús quiato rñ nda.

³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra.

⁴ Saulo que ngoi oso íbii ra. Echeẽ mo ngue echandu ra. —¿Mbaerã ndeicuãte riqui seje re? i que ibatenda ñee ee ra.

⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichĩ nguiã. Ndeicuã mose seje, nde sí chõ ereico ñimbasi co. Sã ticuasu riqui nambacua mbuti no. Sã eriqui hui mbaba ira racua echi no. Ũqui na tuchi quiarei nde, i que Jesús ee ra.

⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra.

⁷ Saulo resend a que siquiche tuchi ra. Echeẽ andu mose. Mbia mo ndese que maeã nda. Nyebe siquichete echeẽ andu.

⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo.

⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. —Ananías, i nda Dios eque re ra. —¿Mbae? i nda Ananías e e ra.

¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue.

¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ũqui sí esaã oso ee, i nda Dios Ananías je ra.

¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios.

¹⁴ A eru Jesús quiato isi ererao sacuaã a. Ũqui je chõ sacerdote rerecua embu nguiã a. Uretarõ ja sacuaã, i que Ananías Dios je ra. Esiquichete que Saulo si ra.

¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangué chooñoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no.

¹⁶ Saulo secheẽ nenei nenei mose ra mbia embasi mbasi tuchi. Mbia icuã icuã tuchi ra ee serĩ mambi. Ũqui ndese Saulo tambiiirandu, i que Dios ra.

¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacuaã ndechiangui re. Nemaie sacuaã abe sembu co no, i que Ananías Saulo je ra.

18 Aque mose tuchi que sira quiishĩ naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra.

19 Saulo que quiaru ñimbuquirãcuã cote ra. Itõ mocoĩ jiri que Jesús quiato rese huee ra. Damasco jenda rese itõ mocoĩ.

Saulo Dios cheẽ nenei namo

20 Saulo que oso oso quia Jesús renei nenei judíos chumunuásaa ra. —Jesús rei Dios ririĩ, i tuchi que equia mbia je ra.

21 Mbia que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacuaĩ nye. Co chõ Jesús quiato queraose rete quia sacerdote rerecua je nye. Ae Jesús quiato riqui quia namo co cote, i que mbia nyuruira Saulo rea ra.

22 Saulo quirãcuã tuchi que eriqui cote ra. Ererecua rã ño eriqui nguiã mbia mbaaquiato quiato Jesús rĩĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

23 Emo mose jiri que judío rerecua ñee nyue ra. —¡Saulo nandeiquia jẽ! i rei que ñee nyue ra.

24 Mbia mo ngue Saulo mbiirandu ra. —Nandeiquia, i nda mbia nderĩĩ nda. Hue echi nyiquitirõ nderese eiquésaa hue. Isa abe echi nyiquitirõ nderese hue, i que embiirandu ra.

25 Itondaru mose que Jesús quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

26 Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbia ra. Nyebe siquiche rei nguiã esi.

27 Bernabé miĩ ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damasco ra. Nandererecua Jesús que nyecua ee ñeenda cúaa ra. Jesús que ñee ee ra. Saulo que siqui Jesús rui cote ra. Saulo que siquicheã nguia Jesús renei nenei Damasco jenda je cote ra, i que Bernabé uataque je ra.

28 Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra.

29 Saulo siquicheã ngue eriqui Jesús renei nenei mbia je ra. Ae griego cheẽ saã saã nguia nae, ũqui je abe que erenei nenei nda. Ñee asi asi que Saulo je Jesús rĩĩ nda. Saulo abe que ñee tuchi ee Jesús rĩĩ nda. Nyebe mbia riqui nguiã “nandeiquia” i Saulo rĩĩ.

30 Jesús quiato que jirandu erese ra. Nyebe Saulo ruruchoi nguiã Cesarea. Mondo que echuchúaa sí cote ra. Tarso, i que Saulo chuchua je ra.

31 Aquere que mbia icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacuaĩ ja ra. Siqui i i tuchi Jesús rese. Espíritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea nõ nda.

³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, i que umi sayã je ra.

³⁴ Pedro que ñee ee ra. —¡Jesús riqui nembucherõ a jê! Ehuã na. Nderua abe enua, ique Pedro umi sayã je ra. Ûquĩ mose que nyerõ nda.

³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que eicua ja n o nda. Ngãmeĩ ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego cheẽ quicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra.

³⁷ Dorcas rasi que eiquia cote ra. Mbia que eraaque mbuchasu ra. Mii ngue equesa nongue ibatenda ye ra. Segundo piso.

³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacuã nda.

³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubirĩ a nyi nyeseo eraaque res e hue. Dor cas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chiao ra.

⁴⁰ Pedro que mbia mbusẽ ja mundo taicuee ra. Ngũĩã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguesa ira mae Pedro rese ra. Nyuruã ngue ngoi cote ra.

⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngaẽ ngue mae equera rese cote ra.

⁴² Mbia Jope jenda que jirandu tuchi erese ra. Nyebe que mbia tubiriã Jesús icua cote ra.

⁴³ Pedro que itõ mocoĩ hue ra. Sucha tubiriã. Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ùquĩ soldados. Cien ngue soldados ra. Cornelio, i que soldados rerecua je ra.

² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra.

³ Tenda nyeseco ramo mose que Cornelio ibatenda mo ndea cuu ra. Angel. Echecua tuchi que ee cuu ra. Ique que echuchúaa ee cuu ra. —Cornelio, i que ñee ee cuu ra.

⁴ Cornelio que mae quiatu tuchi erese ra. —¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mō mee mee mbeite mbaecha reã je co. Nyebe Dios ia tuchi riqui nguiã nderese co.

⁵ Huee que Simón Pedro mo ndiqui Jópee ra. Nderimba mo emondochoi erea. Ereru sacuã ñee ndeje.

6 Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacuañ ndeje, i que ibatenda Cornelio je cuu ra.

7 Dios chimondo ibatenda que oso Cornelio recha cote ra. Cornelio que ñumumba cote ra. Jenyu, i que ngũimba nyeremo je ra. Aque miĩ soldado je abe no. Ae rei Cornelio raarõsa. Ae que ndua ndua bei quia Dios rese ra.

8 Ũquĩ je que Cornelio uquereicuã nenei nenei ja ra. —Jẽso Pedro reru Jope si, i que ee cote ra.

9-10 Isamami ngue Cornelio rimba ngasẽ Jope rurubi cote ra. Aque mose que Pedro chi tuchia arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echiurã ngue uchi åte ra. Nyebe que uque u ra. Uchiurã naa mose. Equereicuã ngue cote ra.

11 Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja.

12 Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riinda ja. Mbei abe n o. Nguireĩ abe no. Mbae ibi riinda ja tuchi que chi tiru ye cuu ra.

13 Pedro que echeẽ mo ñandu cote ra. —Ehuã na, Pedro. Emo eiquia ndechiurã, i que ra.

14 —Tei, Sererecua. Urechiu eã ño ã ndesẽ. Å mo ngue ureu eã mbei quia ra. Mbaeiaie tuchi ure je judiõs ja je, i que Pedro ee ra.

15 Dios que ñeembe ee ra. —iSechimee ndechiurã nda ereisiteãchĩ jẽ! i que ra.

16 Eĩ si que tiru icoi ru tres veces ra. Mbae chumumba ra ja resebe. Tiru que oso bei ibate cote ra.

17 Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda.

18 —¿Simón Pedro riqui a re? i que ra.

19 Pedro qu e ndua ndua beite quia uquereicuã ndese ra. Nyebe Espiritu Turã ñee nguiã ee. —Mbia tres ngaẽ nguiã nderequia co.

20 Equichĩ. Eso rã erese. ¡Esiquicheã oso erese jẽ! Se chõ ngue ambu nderea resẽ, i que Dios Pedro je ra.

21 Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? i que Pedro ra.

22 —Cornelio quia urembu nguiã nderea co. Ae rei soldados rerecua turã. Judio chiucua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacuañ. Pedro cheẽ echandu rã”, i que ángel Cornelio je ra, i que Cornelio rimba Pedro je ra.

23 —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoĩ erese ra.

24 Isamami ngue ngasẽ Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguirĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacuañ, i nda nguesenda je nyii ra.

25 Pedro que ngasẽ oso Cornelio chuchúaa ra. Cornelio que oo erese ra. Aquere que ngoi nguiã ndese ñee ñee ee ra. Ibatenda Pedro riqui reĩ nguiã Cornelio je.

26 Pedro que ñee ee ra. —Ehuã na. Dios eã ño se re. Nderã si chõ se re. Mbia chõ se re, i que Pedro ra.

27 Ñee ñee ngue equia nyue cote ra. Nyoĩ que ique mbia tubiriãsa cote ra.

28 Pedro que ñee ũqui je ra. —Se rei judío. Judío siqui aronea ndaque mbiamo ndese. Judío ique aronea mbiamo nyuchúaa. Ũqui jêicua raque quia ã. Dios que ñee seje cuu ra. Dios que sembaaquiату cuu ra. “Mbiamo abe que eturâte riqui ra. Mbiamo ndese abe eico jiri”, i que Dios seje ra.

29 Nyebe achu jei nguiã ndecheê mose co. ¿Mbaerã “echu” ere seje re? i que Pedro Cornelio je ra.

30 Cornelio que ñee ee cote ra. —Hue tenda bei aico ñee ñee Dios je co. Tenda nyesece mose aico bei ñee ñee Dios je co. Se cheê mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda.

31 Ibatenda que ñee seje ra. “Cornelio, Dios ndecheê ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co.

32 Mbia mo emondo rã Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaẽ aa”, i que ángel seje ra.

33 Nyebe serimba amondo jei nderea. Coche erechu nguiã seje aa. Ndecheê andu sacua ño urecu nguiã aa. Dios cheê esenei na ure je cote. Ae Dios mondo ndeje, erenei sacua ure je, i que Cornelio Pedro je ra.

34 Pedro que ñee ee cote ra. —Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ.

35 Mbiamo abe ireĩ ireĩ chí nguiã Dios si re. Ibimo jenda re. Ũqui siqui turã ño nguiã Dios je reaẽ. Nyebe Dios abe eturã ndiqui ũqui je reaẽ. Judíos achõ eã ndaque.

36 Dios que ucheê turã mondo judíos je ra. Dios cheê turã ngue tu Jesucristo rĩ nda. Ae rei aba mbiasa. Jesucristo rei mbia rerecu tuchi.

37 Judío recua ja que Dios cheê turã ndiqui ã ndesê. Juan Bautista reco mose que Dios cheê ngasê judíos ja je ra. Juan Bautista que Dios cheê senei senei Galilea ra. Aque mose rane ngue Dios cheê ngasê judíos ja je cote ra. Ũqui jêicua tuchi quia ã ndesê.

38 Jesús siqui turã jêicua quia resê. Jesús Nazaret jenda siqui turã mbei. Dios que Jesús mbuquirãcuã Espiritu Turã je ra. Dios que siqui tuchi erese ra. Nyebe eriqui nguiã mbae turã naa naa. Nyebe eriqui nguiã aba checuayã icuã jea jea mbia si. Ũqui jêicua quia ã ndesê.

39 Jesús chimbaaquiату chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacua.

40-41 Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbia ja je embuchecuayã. Ure je achõ ngue embuchecua ra. Uchiirabo achõ je. Jesús renei nenei sacua ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra.

42 Jesús que uremondo mbia mbiirandu randu sacua ngũĩ nda. “Secheê turã jêsenei senei nguia mbia je. ‘Dios que Jesús mĩ nda. Mbia mano je icuã ndea sacua. Manoã je abe icuã ndea sacua. Jesús r a eicuã tea ja’, jenyje quia mbia mbiirandu randu”, i que Jesús ure je ra.

43 Dios cheê mbuchecuasa ja que embesa mbesa Jesús rĩ cose ra: “Dios turã nda eriqui Jesús icuasa je. Dios ra Jesús icuasa icuã mbutiã tiã esi”, i que Dios cheê mbuchecuasa ra, i que Pedro Cornelio je ra.

Espíritu Turã ique judíos eã chiangui re

⁴⁴ Pedro cheẽ mose que Espiritu Turã ndu ique eandusa chiangui re ra. Eandusa chiangui re ja ique.

⁴⁵ Pedro resenda judíos que nyuruira tuchi ra. —Judíos eã je abe chõ Dios riqui Espiritu Turã mondo mondo re, i que judíos Jesús quiato u nyuruira ra.

⁴⁶ Judíos eã ngue mbiamo ñee saã saã nda. Espiritu Turã ique mose echiangui re. Ñee turã ja Dios rĩ. Nyebe judíos ñee. —Ã ñiangui re abe Espiritu Turã iquechĩ. Judíos eã ndaque, i que eandu ra. Pedro que ñee nguesenda je cote ra.

⁴⁷ —Espiritu Turã ngue ique echiangui re cote ra. Nyebe bautizar tae ee i je cote. Emo nda seriquisãya, i que Pedro ra.

⁴⁸ Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. —Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chĩmbaaquiato que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheẽ isi isi ã, i que mbia ee ra.

² Pedro que oso Jerusalén cote ra. Huee que judíos ñee asi asi ee cote ra.

³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra.

⁴ Pedro que embiirandu tuchi cote ra.

⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoi mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja.

⁶ Mbae chumumbara tuchi que tu aque tiru ye cuu ra. Quiaa rĩnda ja. Mbei abe no. Nguireĩ abe no. Mbae ibi rĩnda ja tuchi que chi tiru ye cuu ra.

⁷ Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra.

⁸ “Tei, Sererecua. Urechũ eã ño ã ndesẽ. Ã mo ngue ureu eã mbei quia ra. Mbaeia tuchi ure je judíos ja je”, ae rei que ee ra.

⁹ Dios que ñeembe seje ra. “¡Sechĩmee ndechiurã nda ereisi teãchĩ jẽ!” i que seje ra.

¹⁰ Eĩ si que tiru icoi ru tres veces ra. Oso bei que ibate serecha cote ra.

¹¹ Aque mosete que Cornelio rimba ngasẽ seje ra. Seruruchoĩ sacua ngue euaẽ Cesarea si ra. Tres que ngaẽ seruruchoĩ sacua nda.

¹² “Eso rã erese. ¡Esiquicheã oso erese jẽ!” i que Espiritu Turã seje ra. Ã nanderenda seis que nyoĩ serese ra. Ureuasẽ ngue emondosa chuchua ra. Cornelio chuchua.

¹³ Cornelio que uquereicua senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea.

¹⁴ Ae ra ñee ñee nguia jẽje. Ndechuchua jenda je abe ra eriqui ñee ñee. Dios jendirõ sacua jẽicua si’, i que angel seje ra”, i que Cornelio seje ra.

¹⁵ Se ñee namo mose ee que Espiritu Turã nguichi ee ra. Ique que echiangui re ra. Ique que nandechiangui re nyii nae, eĩ si que ique Cornelio chiangui re cote ra. Cornelio chuchua jenda chiangui re abe.

¹⁶ Jesús cheẽ ndese que andua ndua cote ra. ã ndei echeẽ ã: “I je que Juan bautizar i rei mbia je ra. Espíritu Turã je bautizar tae jêje cote”, i que Jesús cose ra. Aque rese que andua ndua cote ra.

¹⁷ Nandẽ judíos achõ je eã ño Dios riqui nguiã Espíritu Turã mondo. Judí eã je abe chõ eriqui nguiã Espíritu Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra.

¹⁸ Mbia que Pedro cheẽ sobeishiãte ra. Ñee turã turã ngue Dios je cote ra. —Dios judío eã abe mbui mbui quiatu quia huicua si reaẽ. Judío eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹ Mbia icuã tuchi que eriqui Jesús quiato je cote ra. Esteban icua mosebe bei que mbia icuã ndiqui Jesús quiato je ra. Nyebe Jesús quiato choi nguiã uchã Jerusalén si. Emo nyo: Feníciaa. Emo nyo: Chipre no. Emo nyo: Antioquía no. Huee ja que echi Jesús cheẽ turã nenei nenei nda. Judíos achõ je que echi erenei nenei nda. Judío eã je erenei nenei eã.

²⁰ Chipre jenda rei emo. Cirene jenda rei emo no. Ûqui nguia que nyo: Antioquíaa ra. Ûqui nguiatu que Jesús cheẽ senei senei judío eã je ra.

²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra.

²² Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa.

²³ Bernabé que ngasẽ ñee Jesús quiato je ra. —Dios turã tuchi riqui nguiã jêje co. Aque rese seyate riqui co. ¡Jéngo tuchi nandererecua rese jé! ¡Jêhuichí nda esi jé! i tuchi que Bernabé quia mbia je ra.

²⁴ Bernabé turãt e que eriqui ra. Espíritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguiã Jesús isi isi.

²⁵ Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra.

²⁶ Huee que echi bei Jesús quiato mbaaquiato quiatu ra. Un año que echi huee ra. Mbia tubiriã mbaaquiato quiatu bei. Hue jenda je rane ngue “Cristianos” i Cristo quiato je ra.

²⁷ Aque mose que Dios cheẽ mbuchecua mo ngaẽ Antioquíaa ra. Ngaẽ ngue Jerusalén si ra.

²⁸ Emo ngue juã ñee mbia je ra. Agabo, i que ee ra. Espíritu Turã ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose.

²⁹ Nyebe Jesús quiato Antioquía jenda ñee ñee nyue. —Mbae mo nandemondo rá Jesús quiato Judea jenda je. Nandembae mbae mo nandemondo ee, i que nyue ra.

³⁰ Eĩ ngue umbae mondo mundo Judea jenda je ra. Mee mee ja que Saulo je ra. Bernabé abe je. Ûqui ngue ecuruchoi cote ra. Ae emee nguiã Jesús quiato rerecua je. Judea jenda.

12

Mbia Jacobo icua; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra.

² Ae que Jacobo ãqui ndoso ti quise je ra. Jacobo rei Juan nongue.

³ Judíos ia tuchi que Jacobo ãquĩ ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã.

⁴ Tarõ ngue miĩ mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacua. Fiesta ua mose r a amee ee, i rei que ererecua uchiangui re ra.

⁵ Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro riĩ ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacua. —Isamami nda amee mbia je, i rei que Herodes ra. Aque isa que Pedro uque u soldados joõ ñi nda. Ecua ji que uque u ra. Cadenã nyeremo je que ecua ino nda. Soldados nyeremo ngue uqueã u eraarõ nda.

⁷ Ibatenda mo ngue tu Pedro je isa ra. Angel. Nyaashĩ na tuchi que tuchia ra. Mbae resae ja. Ibatenda que oco Pedro rese ra. Emumba. —¡Ehuã asi jê! i que Pedro je ra. Ehuã mose que cadenas nyera eo si ra.

⁸ —Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese cote, i que Pedro je ra.

⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui rei nguiã ee.

¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra.

¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacua nde. Serirõ ño equia Herodes si re. Judíos ra seiQUIAYã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbã tubiriãte que chi ñumunua huee ra. Ñee ñee ngue u Dios je ra.

¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra.

¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra.

¹⁵ —Tei. Echeẽ ñooñoa na, i chõ ngue mbã Rode je ra. —Ae beite. Acheẽ ñooñoa ño jêje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbã nyucuaaque je ra.

¹⁶ Eiquesa que Pedro mbuu mbuu bei huĩ mbã je ra. Emo ngue oso cheete rei equia ee ra. Pedro que ique cote ra. Ñumunua je que nyuruirã tuchi mae erese ra.

¹⁷ Pedro que mbã mbuquiriri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. —Jacobo jembiiirandu ja rã serese. Jesús quiato ja jembiiirandu, i que Pedro ra. Pedro que oso mbã recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra.

¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que

ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echurã mondo monoa ee cote. Nyebe que ũquí nyoĩ ja Herodes chuchúaa ra. —¡Nandeturã mbei chõ ee jê! f nda nandechiurã mondobe nande je, i que nyue ra. Herodes resenda mo ngue ñee turã ee ra. Blasto, i que aque je ra. —Echeẽ turã turã Herodes je ure rĩ. f nda eturambe ure je, i que mbia Blasto je ra.

²¹ Emo mose jiri que Herodes huĩrao turã mingue ra. Ngoi que ngũenda icoi tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ũquí je cote ra.

²² Mbía abe que ñeete ee cote ra. —Dios chõ nde resẽ. Dios cheẽ na si nde. Mbía cheẽ na eã, i que mbía Herodes mbucuasú i i ra.

²³ —Dios eã ño se re, i eã mbei que Herodes mbía je ra. Ñee turã eã ngue equia Dios rĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosei que erie u ra. Eiquia nonde. Mano ngue cote ra.

²⁴ Jesús quiato que Jesús cheẽ senei senei tuchi quia ra. Mbía tubiriã ngue echandu chandu quia ra. Mbía tubiriã ngue Jesús icua icua quia cote ra.

²⁵ Bernabé que nyoĩ Jerusalén nda. Saulo rese. Mbae isiquia ruruchoĩ sacúã. Mbae isiquia que emee mee Jesús quiato hue jenda je cot e ra. Nyoĩ que Antioquíaa cote ra. Juan Marcos abe que ecuruchoĩ nyiese ra.

13

Espíritu Turã Bernabé mondo Dios cheẽ nenei nenei sacúã, Pablo rese

¹ Jesús quiato que ñumunua nua nguia Antioquíaa jenda ra. Mbía mbaaquiato quiatúsa abe que chi erese ra. Dios cheẽ mbuchecuaa mo abe que chi erese ra. Bernabé, i que emo je ra. Simón nondeĩ abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. Ũquí ja que mbía mbaaquiato quiatúsa ra.

² Emo mose que ũquí nyi ñumunua nda. Ñee ñee ngue u Dios je ra. Uchiu si que hui ra. Ndua ndua sacúã Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. Ũquí ngue airabo ra. Airabo que secheẽ nenei nenei sacúã nda, i que Espiritu Turã ñee ñumunua je je ra.

³ Mbía que ñee turã mbei Dios je ra. Quiaruã mbei que u ra. O que echono ñono Bernabé áquĩ ndese cote ra. Saulo áquĩ ndese abe no. Mondo que Dios cheẽ nenei nenei sacúã cote ra.

Pablo Dios cheẽ senei senei Chipree, Bernabé rese

⁴ Aquere que Espiritu Turã Bernabé curuchoĩ Selúciaa ra. Saulo rese. —Ama ndui nyao Chipre, i que ua canoa cuasu ye ra.

⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoĩ Dios cheẽ nenei nenei nda. Juan Marcos abe que siqui erese Dios cheẽ nenei nenei nda.

⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuaa rei se, ichõĩño mbei que equia mbía je ra.

⁷ Brujo que siqui ererecua rese ra. Sergio Paulo, i que ererecua je ra. Ererecua aquiatu tuchi que ra. —Jenyu, Dios cheë tachandu rã, i que ererecua Bernabé je ra. Saulo je abe no.

⁸ Brujo que Bernabé cheë siquisã nda. Pablo cheë abe riquisã. —I nda sererecua Jesús icuayã, i tuchi brujo ũqui ñee ndiquisã. Elimas, i abe que brujo je ra.

⁹ Espíritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra.

¹⁰ Ñee ngue ee ra. —Mbia mbiri irisa tuchi quiarei nde. Diablo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riquisã quisã Dios icha si re? ¿Manose ra erehui ũqui si re? i que Pablo ñee icuã ee ra.

¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeë mosebe que eresa uque tuchi ra. Mae eã mbae rese cote. —Jenyiba taisi. ¡Sembucuata turã na nguia jê! i tuchi eresayã nguia mbia je cote.

¹² Ererecua que echandu ja ra. Nyebe ngue Jesús icua nguia cote. Nyuruira tuchi que huï Jesús cheë andu ra.

Pablo que siqui Antioquíaa ra; Bernabé rese

¹³ Pablo que nyoï Pafos recha cote ra. Nguenda rese que echoi ama ndui ra. Ngasë ngue Perge de Panfília ra. Huee si que Juan Marcos si nyebi Jerusalén nda. Pablo recha. Bernabé abe recha.

¹⁴ Emo mose que echoi Perge si ra. Ngasë ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echí ngoi ra.

¹⁵ Judíos que leer i Dios cheë je ra. Moisés chimbesa je. Dios cheë mbucucuasa chimbesa je abe no. Aquere que judíos ñee Pablo je ra. Bernabé je abe no. —¿Mbia ra jembaaquiatu quiatu jê nde? i que ee ra.

¹⁶ Pablo que juã cote ra. O je que mbia mbuquiriri ra. Ñee ngue ee cote ra. —Seandu rã se, Israelitas. Seandu rã se, Dios quiato.

¹⁷ Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra.

¹⁸ Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia.

¹⁹ Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ũqui iquia ja nanderamei si ra. ũqui mbae ibi que Dios mee nanderamei je cote ra.

²⁰ Dios que jueces mii mii nanderamei nderecuarã cote ra. Jueces que emii mii nguia cuatro cientos cincuenta años nda. Aquere que Dios Samuel mii nanderamei nderecuarã nda.

²¹ Aquere que nanderamei ñee Dios je ra. “Rey mo nguia emii urererecuarã”, i que Dios je ra. Nyebe que Dios Saúl mii ererecuarã nda. Rey. Ae rei Cis riirĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda.

²² Cuarenta años ua mose que Dios Saúl mombo cote ra. Dios que David mii nanderamei ndere cuarã cote ra. Saúl rendaque re. David rei Isai riirĩ. Dios que ñee David je ra. “David sebi tuchi. Ae quia ra secheë mumba mumbayã”, i que Dios cose ra.

²³ David sí que Jesús ramei nda. Dios que Jesús mbu Israel jenda rirõ sacuaã huñcuã si ra. Ucheẽ nguire que Jesús mbu ra. Dios que ucheẽ mbuchebiã nda.

²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jëicuã si jëhui. Jemba Dios icha rui. f nda bautizar ae jêje”, i tuchi que Juan nguia mbia je ra.

²⁵ Umano nonde que Juan ñee mbia je ra. “Ae jësaarõ nguia nae, ae eã ño se re. Ae ra tu serui. Ae rei ererecua tuchi sesi. Se oco aronea eiyao rese”, i que Juan ñee Jesús rñ nda.

²⁶ Seresenda, Abraham ndiirĩ ndei jë. Jemo ndiqui Dios icua ã. Nande je quia Dios ucheẽ mondo nguia. Nanderirõ sacuaã nandeicuã si. Dios que Jesús mondo nande je ra.

²⁷ Jerusalén jenda que Jesús icuayãte ra. Ererecua ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábadose, eicuayã mbei. Dios cheẽ mbuchecuasa cheẽ nguire que Jesús iquia ra.

²⁸ “Jesús eiquia rá”, i tuchi que mbia quia Pilato je ra. Jesús icuã eã ndaque.

²⁹ Nyebe que Jesús mano ndei ra. Embesa ji cheẽ nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji ye ra.

³⁰ Jesús que quera si manonde cote ra. Dios que embuquera si ra.

³¹ Galilea jenda que siqui bei quia Jesús rese Jerusalén nae, ñquĩ ngue mae mae equera si rese cote ra. Mae mae mbei equia Jesús quera si rese cote. Ñquĩ ñee mbei quia Jesús rñ ã cote.

³² A ureico Dios cheẽ turã nenei nenei jêje a. Dios ñee ñee nguia nanderamei je nyii nae, ñquĩ uresenei senei nguia jêje a.

³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namo ngue arembuchecua mbia je ra”, i que Dios Jesús rñ cose ra. Eĩ ngue Salmo dos nda.

³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jêje. Seturã David je nyii nae, eĩ si ra seturãte jêje”, i que Dios ra. “Jesús tambuquera si jêje”, i ñene.

³⁵ Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra.

³⁶ David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbía que echati ngãmei jii rñ nda. Aquere que David roo soõ cote ra.

³⁷ Jesús roo quiatu que soõ eã nda. Dios que embuquera si resẽ. Nyebe ae roo soõ eã nguia.

³⁸ Seresenda, Jesús mñ ndiqui nandeicuã mbutiã sacuaã co. A ureico ñquĩ nenei nenei jêje a. Jëirandu sacuaã erese.

³⁹ Dios que ucheẽ senei senei nguia Moisés je nyii nae, aque cheẽ nguia r a aba icuã mbutiã eã. Jesús mñ ndiqui nandeicuã mbutiã sacuaã co. Nande Jesús icua mose.

⁴⁰ “Mbae icuã nda tuchĩ jêje”, i que Dios cheẽ mbuchecuasa ra. Jëtesa bei u jë. Sã Dios cheẽ mbuchecuasa io eã jêje. Eĩ ngue Dios cheẽ mbuchecuasa ra:

⁴¹ Co jë, mbae turã ucuayãsa.

Je nyuruira rae. Jemano ndae.

Mbía mae sayã nda asaã ndaque jêje.

Jêicua sereâte ra equia.

Mbia embuchecua raque jêje. Nyebe ra jemano, i que Dios cose ra, i que Pablo ra.

⁴² Pablo que usê nyoï echumunuasa si cote ra. —Jenyube rã sábadó nongue. Ũquĩ jêsenei seneimbe rã u ure je, i que mbia ee ra.

⁴³ Mbia que usê ja echumunuasa si cote ra. Judíos tubiriã ngue nyoï Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jêingo tuchi jê, i tuchi que equia ee ra.

⁴⁴ Sábado nongue mose que sucha tubiriã jenda ñumunua ja ra. Ñumunua nua ja Dios cheê andu.

⁴⁵ Judíos mo ngue chi mae mae mbia chumunua ndese ra. —Pablo cheê ño ehanduchi nguiã. Nandechêê andu rocoï, i que judíos ngueteã mbia rese Pablo si ra. Nyebe judíos ñee icuã icuã nguiã Pablo je.

⁴⁶ Pablo que siquicheã tuchi ñee judíos je ra. Bernabé rese. —Jê nane je ureico rei Dios cheê nenei nenei ã. Dios cheê nguire ureico rei nguiã erenei nenei jê nane je ã. Ibate jêingo bei sereã ñochĩ. Nyebe jêingo nguiã Dios cheê isiteã teã ã. Nyebe ureso nguiã erenei nenei judíos eã je co.

⁴⁷ ã ngue Dios ñee ure je cose ra: “Aremingo que secheê nenei nenei sacuã mbia ja je ra. Judíos eã ja je. Mbia ibi jenda ja je. Secheê isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheê ndese ra. Ñee turã turã ngue Dios cheê nã nda. Dios que mbia irabo ata ra. Emingo bei sacuã ibate. Ũquĩ ngue Jesús icua ja cote ra.

⁴⁹ Hue jenda ja que embucha mbucha quia Dios cheê nenei nenei nda.

⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chiicua mbuqueta tuchi que ra. Amei mbia chiicua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguiã hue si. Bernabé abe mombo no.

⁵¹ Nyoï nonde que hui tubi mbutomo tomo mbia je ra. —Jêicuã têicua, i ñe hue jenda je re. Aquere que echoi Iconio nda.

⁵² Jesús quiato ia tuchi que chi ra. Espíritu Turã ngue siqui tuchi quia erese ra.

14

Pablo que siqui Iconioo nda, Bernabé rese

¹ Pablo que ngasê Iconio nda. Bernabé rese. Judíos chumunuasa que echoi ra. Dios cheê ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda.

² Judíos ataque que Jesús cheê isiteã teã no nda. Ũquĩ ngue judíos eã mbiicuaã icuã Pablo je ra. Bernabé je abe no. Ñee icuã icuã tuchi eriĩ.

³ Pablo que chi arete huee ra. Bernabé abe no. Siquicheã tuchi que equia Dios cheê nenei nenei nda. Ebia tuchi Dios rese. Dios que embuquiracuã nda. Nyebe que eriqui mbia mae sayã naa naa nda. —Ichôïno eã ño equia re, i chee mbia Pablo cheê je. Bernabé cheê je abe no.

⁴ Mbia cuabê ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda.

⁵ Nyebe judíos icuã icuã Pablo je. Pablo resenda je abe no. Judíos eã abe eicuã icuã ee no. Mbia rerecua abe que eicuã icuã ee ra. —¡Pablo nandeiquia

jê! ;Bernabé abe nandei quia jê! ;Sita nande mombo mombo erese jê! ; rei que mbia ra.

⁶ Pablo que jirandu erese ra. Bernabé abe. Nyebe echoi uchã sucha tubiriã mo. Licaonia jenda. Listra, i sucha tubiriã mo je. Derbe, i emo je. Hue rurubi que echoi ra.

⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Listra ra. Huee que emo ngatayã ñi ee ra. Eitãquieĩ mosenda bei ei icuã. Nyebe ngatayã mbei.

⁹ Aque que Pablo cheẽ ñandu ra. —Sembucherõ arõ, i ndua uchiangui re. Pablo que eicua ra. Nyebe e mae nguiatu erese.

¹⁰ Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra.

¹¹ Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo rĩ ñee ñee. —Dios ngaẽ nguichi nande je mbia rã sí a, i rei que nyuruirã ra. Tasẽ tasẽ. Licaonia, i hue jenda cheẽ je.

¹² Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no.

¹³ Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticusasú nandei quia iquã rã Pablo je. Nandesei sei ee, i ja que mbia ra. —Pablo rei Dios rã sí. Bernabé rese. Nyebe ticuasú nandei quia iquã rã ee. Dios raanguia je, i rei que mbia ra.

¹⁴ Pablo que echandu ra. Bernabé rese. Nyebe huĩrao ndoro ndoro paama i ee. —Ureya eã jendese, i ñe ne. Ique que echoi mbia ite ite rĩ nda. Ñee asi asi mbia je.

¹⁵ —¿Mbaerã nda re, mbia? ¿Mbaerã nda ticuasú jêiquia ure je re? Mbia chõ ure re. Jê na si chõ ure resẽ. Dios eã ño ure resẽ. Nyebe urechu nguia Dios cheẽ turã nenei nenei jêje ã. ã mbae icuã jêsecha ja chõ. Dios quiarei ereco. ;Ae rui jêingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jêingo.

¹⁶ Dios que mbia teachõ cose ra. Mbia tesarei mose esi.

¹⁷ Dios que eturã saã saã mbei quia mbia je ra. Mbi a eicua sacua. Dios chõ ama mbuchaaqui bei nguia nande je. Ae quia mbae a mee mbei nguia nandechiurã. Dios chõ nandembia mbia bei nguia co, i que Pablo mbia je ra.

¹⁸ Eĩ ngue Pablo embiirandu Dios rese ra. Nyebe que mbia ticuasú iquã eã nyee ee ra.

¹⁹ Emo jiri mose que judíos ngaẽ huee ra. Antioquia si. Iconio si abe no. Ñquĩ ngue mbia mbiicua icuã Pablo je ra. Nyebe que mbia sita mombo mombo tuchi Pablo rese ra. Pablo manote reĩ nguia ee. Mbia que ecuruchoi mbutiriri pe jiri sucha tubiriã si.

²⁰ Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese.

²¹ Dios cheẽ turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístraa ra. Iconio abe. Antioquia abe. Huee sucha tubiriã ngue echoi nyebi ra.

²² Pablo que Jesús icuasa mbaaquiatsu quiatu hue jenda ra. Bernabé rese. —Jesús rese jéingo tuchi jé! Mbia ra nandembasi mbasi tuchi. Aquere ra Dios nandererecuara tuchi cote, i que Pablo mbia je ra. Bernabé rese.

²³ Amei mo ngue eirabo rabo mii ino huee ra. Jesús icuasa rerecuara no hue. Ñumunua je rerecuara jaaja. Aquere que hui uchiu si ra. Quiaruã. Ñee ñee ngue equia Dios je ra. Ñee ñee ee ererecu namonda rii. —Á jéingo Dios icuate ã. Sã Dios jendaarõ arõ, i que Pablo ererecuara je ra. Bernabé rese.

Pablo ngãembe Antioquiaa, Bernabé rese

²⁴ Nyoï que erecha cote ra. Pisidia, i equia ibi je, hue ríngue echoi ra. Ngasẽ ngue Panfilia no nda.

²⁵ Jesús cheẽ turã ngue esenei senei sucha tubiriã Perge jenda je ra. Aquere que echoi Atalia no nda.

²⁶ Hue si que echoi ama ndui ra. Nguique riita quitu que ecuaẽ tiba Antioquia cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. —Chã Dios turã jendeaquiatsu jẽso mose, i que ee nyii ra. Huee que tiba obeï cote ra.

²⁷ Ngasẽ mose Antioquiaa, Jesús icuasa que emunua nua cote ra. Mbae ja que esenei tuchi ee ra. —Dios que urereaquiatsu tuchi quia ra. Dios que urembucheẽ ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguiã Jesús icua cote, ure echeẽ nenei nenei mose, i que Pablo ra. Bernabé rese.

²⁸ Chi arete que Antioquiaa ra. Jesús icuasa ja rese echi huee.

15

Jesús quiato rerecu ñumunua ja

¹ Judea jenda mo ngue ngaẽ Antioquiaa ra. Ngaẽ ngue Jesús icuasa mbaaquiatsu quiatu icua nda. —Circuncisión jesaã saã ja. Moisés cheẽ nguire jesaã saã, i rei que Jesús icuasa je ra. Eracoï ire o ji je chõ eriqui nguiã circuncisión, i ñuqĩ je. —Ei jenyẽ eã mose ra jẽsoã ibate, i rei que ra.

² —Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee ñooño nguiã, i tuchi Judea jenda. Nyebe ñee tuchi nguiã nyue circuncisión nii. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ñuqĩ mondochoi ja. —Jẽso Jerusalén. Jeñee Jesús quiato rerecu je. “¿Circuncisión nda uresaã saã nde?” jenyẽ oso ee. Sã Jesús quiato rerecu ñee jẽje. Jenyu ñee ure je cote, i que ñee uchimondo je ra.

³ Jesús icuasa que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandu randu ra. —Judíos eã abe que Jesús isi isi quia cote ra. Judíos eã ngue hui hui quia huicua si cote ra, i que hue jenda mbiirandu randu ra. Jesús icuasa ia tuchi que eandu ra.

⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecu abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ûre echeẽ naa naa mose, i que embiirandu ra.

⁵ Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jesaã saã ee. Jeñee na ee. “Moisés cheẽ ndui jéingo bei”, jenyẽ chõ ee, i rei que Fariseos ee ra.

⁶ Nyebe Jesús quiato rerecua ñumunua ja aque rñi.

⁷ Ñee ñee tuchi nyue circuncisión ñi. Aquere que Pedro juã ñee nda. — Tacheẽ se, Seresenda. Dios que seirabo cose ra. Ucheẽ turã nenei nenei sacua judíos eã je. Ũqui Jesús icua sacua ñgue seirabo cose ra. Ũqui jëicuate quia ã.

⁸ Dios quia aba chiã icua jate nguiã co. Judíos eã je abe Dios Espiritu Turã mondo mondo cote. Nande achõ je eã emondo. Ũqui abe je emondo mundo Jesús icua mose no. “Judíos eã abe sequiatio”, i ñe Dios re.

⁹ Judíos eã Jesús icua mose, Dios ũqui ñia mbiasu cote. Nande rã si. Nyebe Dios riqui nguiã judíos eã je abe siqui turã. Nande rã si.

¹⁰ ¿Mbaerã jëingo Dios cheẽ abi abi chõ nde? Dios cheẽ jembeta mbeta chõchĩ nguia re. Judíos eã je chõ jëingochĩ embeta re. Embeta ji chĩ nda eãta tuchi aba je cot e re. Ũqui nanderu cose ndare saã aroneate.

¹¹ Dios turã nguia nandemingo bei nguiã ã. Dios turã nguia nandemingo bei nguiã ibate. Nande Jesucristo icua mose. Dios turã nguia judíos eã abe mingo bei nguiã ã no. Nande rã si no, i que Pedro ra.

¹² Pablo que mbae senei ja mbia je cote ra. Bernabé rese. Mbia tubiriã ñgue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. — Dios que urererao judíos eã je ra. Urembirãcua tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese.

¹³ Pablo cheẽ huire que Jacobo ñee cote ra. — Seandu rã se, Seresenda.

¹⁴ Pedro que ñee jjeje namo nda. Dios turãte que judíos eã je ra. Dios que ũqui mo irabo rabo ñguesendarã nda. Pedro que jembiiirandu erese namo nda.

¹⁵ Eĩ ñgue Dios cheẽ mbuchecua embesa cosete ra. Nyebe eriqui nguiã eĩ eĩ ã cote.

¹⁶ A ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echia mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote,

i que Dios ra.

¹⁸ Eĩ ñgue Dios ñee mbia mbiirandu cose ra, i que Jacobo ra.

¹⁹ — Judíos eã mo ñgue Dios icua icua quia cote ra. ¡Nandechẽ nandembetayã jiri ee jê!

²⁰ ¡Nandechẽ mii ño nandembesa mondo ee jê! Nandechẽ mumbayã sacua. “Mbia soo mondo mundo mose dios raanguia je, ¡aque soo ra jëuchĩ jê!” nande rã ee. “¡Jeninisi rese siqui rocoĩ nda jëingochĩ emo ndese jê! ¡Jendu rese siqui rocoĩ nda jëingochĩ emo ndes e jê!” nande chõ ee. “¡Eruqui resebe ra soo jëuchĩ jê! ¡Mbae ruqui ra jëuchĩ jê!” nande chõ ee. Ũqui mii nandembesa rã mondo ee. Nandechẽ mumbayã sacua.

²¹ Ũqui mii nande rã ee. Ũqui ño mbia ñandu ñandu mbei quia cose ndare bei. Mbia Moisés chimbasa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² — Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo mundo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ũqui ndei

Jesús quiato rerecua mo. Ñquĩ ngue emondo Antioquíaa ra. —Urecheẽ jêsenei senei Jesús icuasa hue jenda je, i que Jerusalén jenda ra.

²³ Jesús icuasa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuasa. A ureico embesa mbesa jêje a, Jesús icuasa. Judíos eã je. Antioquíaa jenda je. Siria jenda je. Cilicia jenda je. Saludos.

²⁴ Uresenda mo ngue nyoichĩ jembaaquiato icuã icuã nda. Ñquĩ ñee jemingo asi asite rei. “Circuncisión jêsaã saã”, i chõchĩ equia jêje reaẽ. “Moises cheẽ ndui jêingo bei”, i chõchĩ equia jêje re. Ñquĩ uremondo eã ñee jêje. Ae ae chõ nyoĩ nguiã ñee ñooño jêje.

²⁵ Nyebe ureico nguiã ñumunua a. Emo ngue ureirabo emondo sacuã jendea ra. Nyeremo uremondo quia aque. Pablo rese. Bernabé abe rese. Urequiatio tuchi que ñquĩ nda.

²⁶ Ñquĩ ireĩ ireĩ eã tuchi nyoĩ Jesucristo cheẽ nenei nenei. Mbia equia arondete raque. Siquicheã tuchi.

²⁷ Aque Judas uremondo quia jendea aque. Silas rese. Ñquĩ nda jembirandu ja. Ñquĩ nda urecheẽ senei senei jêje.

²⁸ Espíritu Turã ngue urembaaquiato ra. Nyebe ra urecheẽ tuchiã jêje. Echeẽ mumbayã sacuã. Ñ mii ño uremondo quia jêje aque.

²⁹ “Mbia soo mondo mose dios raanguia je, ¡aque soo ra jêuchĩ jê! ¡Eruqui resebe ra soo jêuchĩ jê! ¡Mbae ruqui ra jêuchĩ jê! ¡jeninisi rese siqui rocoĩ nda jêingochĩ emo ndese jê! ¡jendu rese siqui rocoĩ nda jêingochĩ emo ndese jê!” Coche ñquĩ jemumbayã nguiã. Aque mii ño urecheẽ urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra.

³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbasa isi mose.

³² Dios cheẽ mbuchecuasa rei Judas. Silas rese. Nyebe que ñquĩ Dios cheẽ nenei nenei tuchi Jesús icuasa je ra. Jesús icuasa mbaaquiato quiato tuchi.

³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda.

³⁴ Silas que siquichõ nda.

³⁵ Pablo abe que siquichõ Antioquíaa ra. Bernabé rese. Mbia que embaaquiato quiato quia ra. Dios cheẽ turã ngue esenei senei nguiã ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra.

³⁷ —Eno. Juan Marcos abe nanderao, i rei que Bernabé ra.

³⁸ —Tei. Ae que nanderecha Panfiliaa nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra.

³⁹ Ñee asi asi chee que nyue ra. Marcos riĩ. Nyebe que nyao nyesi ra. Bernabé que Marcos querao ra. Ama ndui que echoi Chípree ra.

⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiātu bei jêso mose, i ja que ee ra. Pablo que nyoĩ cote ra. Silas rese.

⁴¹ Siria rĩ ngue echoi ra. Cilicia rĩ abe no. Hue jenda Jesús icuasa mbaaquiātu quiātu que echoi ra.

16

Pablo resenda bei que Timoteo cote ra

¹ Pablo que nyoĩ Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra.

² Jesús icuasa hue jenda que Timoteo icua ja ra. Timoteo turãte, i ja que Jesús quiato quia ee ra.

³ —Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote.

⁴ Nyoĩ que sucha tubiriã mbuchesea sea cote ra. Jesús quiato rerecua cheẽ ngue esenei senei ja quia mbia je ra. Jerusalén jenda cheẽ. —¡Ûqui ñee nda jemumba mumbachĩ jê! i que Pablo nyoĩ quia ra.

⁵ Pablo que Jesús oseĩ uquia Jesús quiato je ra. Jesús icuasa tubiriã nia ngue esi quia cote ra.

Echu urembaaquiātu quiātu, i que Macedonia jenda Pablo je cuu ra

⁶ —Nyao Dios cheẽ nenei nenei Asia, i rei ngue re. Espíritu Turã ngue nya i ee ra. Nyebe echoi nguiã Frígíaa. Galáciaa abe.

⁷ Ngasẽ ngue Mísíaa ra. Nyao Bitinia, i rei ngue re. Espíritu Turã ngue nya i ee ra.

⁸ Misia que echucuaño nyoĩ ra. Ngasẽ nyee Troas.

⁹ Huee que Pablo Macedonia jenda mo ndea isa ra. Tea que cuu ra. Chĩnda juã ñee ñee Pablo je cuu ra. —¡Echu aa Macedóníaa jê! Echu urembaaquiātu quiātu, i nda Pablo je cuu ra.

¹⁰ Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheẽ nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹ Ama ndui que ureso Troas si ra. Erĩmbe que ureso iasa ra. Urecuasẽ nyee que oso Samotracia ra. Isamamĩ ngue ureso Neápolis cote ra.

¹² Hue si que ureso ibi rĩ nda. Urecuasẽ nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra.

¹³ Sábado mose que ureso ama nimíaa nda. Sucha tubiriã ndecha. Huee que judíos riqui ñumunua nua mbei ñee ñee Dios je ra. Ari que ngaẽ ngaẽ nguia huee ra. Acuanĩ mo ndese. Urecoi que Dios cheẽ nenei nenei ee ra.

¹⁴ Lidia, i que urecheẽ andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheẽ mbuchecua ee ra. Pablo cheẽ ngue eisi ra.

¹⁵ Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jêje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

16 Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je.

17 Nyucuaaque que tu Pablo rui ra. Tu ure ja rui. Ñee ngue urerĩ nda. —Ã ndei Dios rimba ã. Ibatenda rimba. A echi aba icuã mbutiása nenei nenei jêje a. A echi Jesús renei nenei jêje a, i bei que nyucuaaque quia urerĩ nda.

18 I bei que nyucuaaque quia urerĩ nda. Pablo que echeẽ nyosei chiã nyee ra. Uba que ñee aba checuayã icuã je cote ra. —Jesús riĩ aico ñee ndeje a. Esẽ nyucuaaque si, i que Pablo aba checuayã icuã je ra. Echeẽ mosebe que usẽ esĩ ra.

19 Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curuchoi que plaza ra.

20 Mondo que mbia rerecua je ra. —Ã ndei judíos ã. Mbia mbũcuã icuãte equia ñee ñee ã.

21 “Ure rã jêingo”, ichĩ nguiã nande je. Romanos ndaque nande. Ûquĩ nandesãã aronea tuchi quiarei, i que mbia nguerecua je ra.

22 Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jêiruã nua, i que ererecua ra.

23 Mbia que eiruã nua tuchi ra. Tarõ ngue cote ra. —Jësaarõ tuchi, i que ererecua eraarõsa je ra.

24 Echeende que etarõ tuchi cote ra. Ei abe que emumbi ino ira je ra.

25 Pablo que ñee ñee nguia Dios je itondiite mose ra. Silas rese. frasei rasei abe no. Etarõi que ehandu ja quia ra.

26 Aque mose que ibi titi titi i ra. Etarõsa abe que quiata quiata ja ra. Eiquesa abe que quiata ja ra. Eicuaa que nyera ja cadenas nda. Etarõ ji si que nyera ja ra.

27 Eraarõsa que ñumumba ra. Eiquesa eequia ji rese que mae nda. Etarõ ji uchã nei nguiã ee. Nyebe ñee nguiã. —Tachũquia, i que tiquise rirõ nda.

28 Pablo que tasẽ ee ra. —¿Mbaerã nda erechũquia re? ¡A urecu chõte a resẽ! i que Pablo ee ra.

29 —Tata eru, i que eraarõsa mbia mo je ra. Ique que Pablo rea cote ra. Titi titi i tuchi que ra. Ngoi que ngũã ndese Pablo je ra. Silas abe je.

30 Eraarõsa que ecuruchoi taicuee cote ra. Ñee ee. —Sã Dios serirõ seicuã si. ¿Mañi ae ra se re? Siqui bei sacuã Dios rese re, i que eraarõsa ra.

31 Pablo que ñee ee cote ra. Silas rese. —Jesucristo eicua. Ûquĩ mose ra Dios nderirõ ndeicuã si. Ûquĩ mose ra Dios ndechuchua jenda abe rirõ huũcuã si, i que Pablo ee ra.

32 Jesús cheẽ ngue esenei senei ee ra. Echuchua jenda je abe que erenei nenei nda.

33 Pablo iruã nua ji que eraarõsa irei irei ra. Silas iruã nua ji abe. Itondii mose raque. Bautizar i que eraarõsa je cote ra. Echuchua jenda ja je abe que bautizar i ra.

34 Eraarõsa que Pablo querao mbuquiaru uchuchúaa ra. Silas abe no. Ey a tuchi que ra. Echuchua jenda abe ia tuchi. —Nandeico Dios icua co cote, i ñene. Nyebe eya tuchi Dios rese.

35 Isamamimbe que ererecua ñee policia je ra. —Jëso Pablo mbusẽ cote. Silas abe jembusẽ, i que ee ra.

36 Eraarõsa que ñee Pablo je ra. —A policia cuaẽ a. Jembusẽ sacuã. Hui que jësi ra. Jëso turã cote, i rei que eraarõsa Pablo je ra.

³⁷ —Nya, i que Pablo ee ra. —¿Mbaerã ererecua ureirua ñooño nde? Mbiasaa. Mbae icuã naa mose rocoĩ. Romanos ndaque ur e abe. Uretarõ ñooño ngue ra. “Nandembusẽ checuayã”, i raque ure je co cote. Tei. Sã ũqui ngaẽ urembusẽ nyecua, i que Pablo ee ra.

³⁸ Pablo cheẽ ngue policia senei nguerecua je ra. “Romanos”, i mose que ererecua chiã cuaãcuã i ja ra.

³⁹ Ererecua que nyoĩ Pablo rea cote ra. Silas abe rea. —Ureicuã ñochĩ jêje. Ureicuã eã nda cote. Jêso a si cote, i que ererecua embusẽ turã mondo cote ra.

⁴⁰ Pablo que usẽ etarõsa si cote ra. Silas rese. Nyoĩ que Lidia chuchua ra. Hue que echĩ mbirĩ Jesús icuasa mundua ndua ra. Nyoĩ que hue si cote ra. Sucha tubiriã si.

17

Pablo que siqui Tesalónicaa ra

¹ Pablo que nyoĩ Antipolis rĩ nda. Apolonia ñĩ abe echoi. Silas rese. Hue si que echoi ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchua je.

² Pablo que oso hue sábadu mose ra. Querabe que eriqui oso oso bei judíos chumunuásaa ra. Tres sábadu que Pablo mbia mbaaquiату quiату huee ra.

³ Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jêje, ae rei Cristo. Ae jësaarõ arõ mbeite quia, aque rei Jesús, i que Pablo embaaquiату quiату ra.

⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei ũqui. Griego ninisi tubiriã abe que siqui Pablo rui ra. Mbia chiicua tuchi rei ũqui.

⁵ Judíos que ngueteãte quia mbia rese Pablo je ra. Mbia siqui mose Pablo rui. Ae Dios cheẽ andu sereãte quia, ũqui ngue ngueteãte quia mbia rese ra. Nyebe ngata chooño je munua nguiã. Ũqui ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbia icuã je, i rei que judíos ra.

⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbia mbicuã icuã ja aa. Pe jenda mbicuã icuã jare.

⁷ Jasón eisi turã ñochĩ nguia uchuchúaa a. Ũqui icuã ja que eriqui nandererecua je. César cheẽ emumba mumba bei chõchĩ nguiã ã. “Jesús quia ererecua tuchi César si re”, i chõchĩ Pablo, i que mbia paama i Pablo je ra.

⁸ Mbia атаque eandu mose que paama i ra. Ererecua abe que paama i ra.

⁹ Ererecua que mbae isiquia isi Jasón si ra. Jasón ndesenda si abe. —Uremeembe rá jêje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoi jei Berea ra. Silas rese. Aque isa mose bei. Ngasẽ ngue Berea ra. Nyoĩ que judíos chumunuasa cote ra.

11 Judíos Berea jenda que earacua ra. Tesalónica jenda si. Berea jenda quiatu que Dios cheẽ ñanduse rete ra. Berea jenda que embesa ji tea jei jei ra. —Ma Pablo ñee Dios cheẽ ndui si, i que nyue ra.

12 Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chiãcua rei griego s ninisi.

13 Pablo que Dios cheẽ senei senei Berea jenda je ra. Judíos Tesalónica jenda que jirandu ra. Jirandure que echoi Beréaa mbia mbiãcua icuã Pablo je ra.

14 Jesús icuasa que Pablo mundo ama ndisha quiti ra. Silas que siquichõ Beréaa ra. Timoteo rese.

15 Ae Pablo curuchoi, ùquĩ ngue tiba esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

16 Pablo que siqui Silas raarõ arõ Atenas nda. Timoteo abe raarõ arõ. Dios abareã tubiriã ngue huee ra. Ûquĩ ndese quiatu que mbia riqui oo tuchi ra. Pablo que mae icuã ùquĩ ndese ra. Pablo que paama ite mbia rese mae nda. Mbia Dios abareã nderequia requia mose.

17 Nyebe Pablo oso oso bei nguã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra.

18 Epicúreos resenda mo ngue ngaẽ ñee tuchi Pablo je ra. Estoicos resenda mo abe que ngaẽ ñee Pablo je ra. —¿Mbae ichõte Pablo quia nande je re? Echebe rete eriqui reae, i que emo emo nda. —Dios mo nii eriqui ñee ñee nande je reae, i que emo emo nda. Pablo ñee ñee mose Jesús rĩ. Pablo Jesús quera renei nenei mose.

19 Mbia que Pablo curuchoi ibi ato mo cote ra. Huee que ererecua riqui ñumunua nua mbei ra. Ñee ngue Pablo je cote ra. —¿Mbae rĩ ereico ñee ure je re? Embuchecua ure je.

20 Æ ngue urechanuate quia ra. Ndecheẽ embuchecua ure je. ¿Mbae ere quia re? i que mbia Pablo je ra.

21 Atenas jenda mingo uquia reã mbae mo ndese. Ae siqui Atenas jenda rese, ùquĩ abe mingo uquia reã mbae mo ndese. Echeemo andu andu bei. Echeemo ndese bei.

22 Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheẽ jêje, Atenas jenda. Dios ata rete rese jêingo reae.

23 Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenye que embesa mi nda. Ae je jêingo ñee ñee ùquĩ. Jemae sayã ndaque. Ae rĩ aico ñe e jêje co.

24 Co Dios que ibi chao ra. Mbae ao ja. Ae rei mbae rerecua. Ibi rĩnda rerecua. Ibei jenda abe rerecua. Dios siquã ño nguã tuchiaqui re mbia chiao.

25 —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingosa rei ae.

26 Mbia mĩ ngue Dios chao ra. Aque rei mbia i ja aque. Emo eã ño nandeico nguã ã. Nande ja chõ nandeico nguã ã. Dios rei nandeiosa. Nyebe Dios mbae rerecua ja. —Co ra nyacuquia co mose. Co ra mano co mose, i bei que Dios quia ra. Mbia recuarã ngue Dios mee mee mbia je ra.

27 Dios que mbia mingo ibi rĩ nda. fnda mbia Dios requia. fnda mbia Dios icua. Isho eãte Dios riqui a. Nande ja jii eriqui a.

²⁸ Dios riĩ ae nandeico nguiã. Erĩ ae nandeico nguiã ngata. Jemo abe que ñee nda. “Dios riirĩ ño nandeico ja nguiã ã”, i que jemo nda.

²⁹ Ae bei chõ nandeico nguiã ã. Dios riirĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je.

³⁰ Dios que mbia icuã teachõ cose ra. Mbía aquiatuã mose. Namõ ño Dios riqui nguiã ñee mbia je co. “Jẽhũ chõ jẽicuã si”, i Dios quia mbia jaje co.

³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jẽso tata cuasu”, i ra ee. “Jẽso ibate”, i ra emo je no. Manose chõ nda ñee. Dios mĩ ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibafe. Emo mondo tata cuasu no.

³² —Jesucristo que quera si manonde ra, i que Pablo ee ra. Mbía que icua icua chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndechẽ urechandu, i que eataque ra.

³³ Pablo que oso mbia recha cote ra.

³⁴ Emo emo ngue siqui erui ra. Ae Jesús cheẽ isi turã, ùquĩ ngue siqui bei erui ra. Dionisio, i que ùquĩ mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndecha cote ra. Ngasẽ ngue sucha tubiriã mo cote ra. Corintõ, i que hue je ra.

² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je ra. Ùquĩ ngue ngaẽ namo Italia si ra. Italia recha ramo. Claudio judíos mombo ja mose Roma si. Pablo que oso Aquila chuchua ra.

³ Pablo que tuchia saã saã nguia mbae ire je ra. Eĩ ngue Aquila no nda. Tuchia raã naa mbei mbae ire je. Nyebe Pablo siquichõ nguiã erese. Quiẽ quie erese.

⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. — Jesús rei Cristo. Ae jẽsaarõ arõ mbei e quia, aque rei Jesús, i tuchi que Pablo ee ra.

⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huĩrao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jẽ nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¡Dios cheẽ ngue asenei tuchi rei jẽje ra jẽ! Nyebe taendecha. Judíos eã je Dios cheẽ tasenei senei cote, i que Pablo huĩrao mbaaba aba ee ra.

⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra.

⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbía tubiriã ngue Jesús icua cote ra. Bautizar i que cote ra.

⁹ Itondaru mo ngue Pablo Jesús rea ra. Ñee ngue Pablo je cuu ra. — Eresiquichechĩ nda mbia si jẽ. Secheẽ esenei senei mbei. Erehuichĩ nda esi jẽ.

¹⁰ Co aico nderea quiatu co. Mbae icuã nda ï eã ndeje. Secheẽ esenei senei mbei. A jenda ra seicua ja jiri cote, i que Jesús Pablo je cuu ra.

¹¹ Pablo que siqui arete Corinto ra. Un año ndobeichõ jiri que eriqui huee ra. Mbia mbaaquiato quiatu bei Dios rñí.

¹² Galión ngue Acayo jenda rerecua ra. Aque mose que judíos ñimbiãcuã tuchi Pablo je ra. Oo que erese ra. Curuchoi que nguerecua je ra.

¹³ Judíos que ñee ererecua je ra.

—Pablo que mbia mbaaquiato icuã icuã nguia ra. Dios rñí. Nandererecua cheẽ ndui eã, i que judíos ra.

¹⁴ Pablo nda ñee nguia ña. Ererecua Galión nane nguia ñee nguia esi. Ñee judíos je. —Mbae icuã ndese que Pablo riqui ate. Eí nguia nda jeñee achandu nguia ña.

¹⁵ Mbae icuã ngue esaã eãte. Pablo cheẽ je chõ jëingo nguia paama i. Judíos cheẽ ñi ño jëingo nguia paama i Pablo je. Nyebe ra jeñee achaua. Jë ae jeñee turã jenyue ae, i que Galión judíos je ra.

¹⁶ Mombo ja que uchuchua si cote ra.

¹⁷ Sóstenes, i que judíos chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquía

¹⁸ Pablo que siqui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Such a tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, aque que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui.

¹⁹ Sucha tubiriã je que ngasẽ cote ra. Efeso, i que sucha tubiriã je ra. Aquila que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra.

²⁰ —Eico are jiri aa, i rei que judíos ee ra. Pablo que echeẽ mumba bei oso ra.

²¹ —Taso Jerusalén. Mbia chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra.

²² Ngasẽ ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra.

²³ Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

²⁴ Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi.

²⁵ Apolos que Dios icha icuate ra. Mbia que embaaquiato quiatu turã tuchi quia ra. Mbia mbaaquiato turã Jesús rñí. Juan Bautista cheẽ achõ ngue eicua quia ra. Juan bautizar i mose mbia je.

²⁶ Apolos siquicheã tuchi que eriqui mbia mbaaquiato quiato ra. Judíos chumunuásaa. Aquil a que echandu ra. Priscila rese. Nyebe que ñiquí Apolos rerao mbaaquiato quiato tuchi ra. Dios icha que embuchecua tuchi ee ra.

²⁷ Apolos que osose Acáyaa ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jëisi turã, i ee. Apolos que ngasê cote ra. Ae Jesús icua quia, ùquĩ mbaaquiato quiatu tuchi.

²⁸ Apolos que judíos cheê síquisã tuchi ra. Judíos mbia mbaaquiato chooño mose. Jesús rĩĩ eã. Nyebe Apolos echeê ndiquisã. Dios cheê ngue esenei senei nguia ee ra. —Jesús rei Cristo. Ae jësaarõ arõ nguia, aque rei Jesús i tuchi que Dios cheê nenei ee ra.

19

Pablo que siqui Efésoo ra

¹ Sita ibate bate ite rĩ ngue Pablo si ra. Ngasê ngue Efeso cote ra. Apolos siqui mose Corinto. Jesús quiato mo je que Pablo ngasê Efésoo ra.

² Pablo que ñee ee ra. —Jê Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbia Pablo je ra.

³ Pablo que ñee ee ra. —¿Mbae rĩĩ bautizar i jêje re? i que ra. —Juan ñee nii ngue bautizar i ure je ra, i que Pablo je cote ra.

⁴ Pablo que ñee ee ra. —Juan ngue bautizar i mbia je ra. Mbia hui mose huñcuã si. “Ae ra tu serui, aque jëicua jê. Jesucristo chõ aque re”, i que Juan nda, i que Pablo ra.

⁵ Pablo cheê andu mose que bautizar i Jesús rĩĩ cote ra.

⁶ Pablo que o chono earõ nda. Espíritu Turã ngue ique echiangui re cote ra. Ucheemo ngue esaã saã nguia cotê ra. Dios cheê ngue embuchecua checua quia mbia je cote ra.

⁷ Doce que ùquĩ nda. Jesús quiato.

⁸ Pablo que oso oso quia judíos chumunuasa ra. Tres meses. Siquicheã tuchi que equia Dios cheê nenei nenei nda. —Ererecua tuchi quiarei Dios. Jesús jëicua rã, i que Pablo quia mbia je ra.

⁹ Emo emo ngue Pablo cheê ñandu sereã nda. Echeê mumba mumba. Jesús rĩĩ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato quiatu cote ra.

¹⁰ Dos años ngue Pablo riqui huee ra. Nyebe mbia Asia jenda jirandu ja nguia Jesús rese. Judíos jirandu ja erese. Judíos eã abe no.

¹¹ Pablo que mbae saã saã tuchi quia Dios quirãcuã je ra. Mbia mae sayã ngue esaã saã nguia ra.

¹² Mbia rasi mbucherõ sacua ngue mbia riqui tiru mbucha mbucha Pablo rese ra. Ûquĩ tiru que ecuruchoi choi quia mbia rasi je cote ra. Ûquĩ tiru ruruchoi mose, mbia rasi que nyerõ nyerõ nguia cote ra. Aba checuayã icuã abe que usê usê nguia mbia chiã si cote ra.

¹³ Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusê aquiature que ure ra, i que equia ra. —Jesús rĩĩ aba checuayã icuã nandembusê, i rei que nyue ra. Nyebe que ñee aba checuayã icuã mo je ra. —Jesús quirãcuã nii aico jembusê mbia si co. Ae Pablo senei senei nguia, i rei que judíos aba checuayã icuã je ra.

¹⁴ Sacerdote rerecua ririĩ abe que eĩ si ra. Siete eririĩ. Esceva, i que sacerdote rerecua je ra. Judío que ae ra. Ae ririĩ ngue eĩ si rei no nda.

15 Ñquĩ ngue ñee ndei aba checuayã icuã je ra. Aba checuayã icuã ngue echeẽ mumba ra. —Jesús aicua. Pablo abe aicua. ¿Aba chõ jẽ nde? Jaẽicuayãte se, i que aba checuayã icuã nda.

16 Aba checuayã nyireco que oo erese cote ra. Ucuu ucuu tuchi que ñquĩ ja rese cote ra. Ñquĩ siete rese. Aba checuayã icuã nyireco quirãcuã tuchi que esi ra. Aba checuayã nyireco que ñquĩ mbasi ja ra. Nyebe ñquĩ ndasi rasi uchã aba checuayã icuã si. Eirao eã ngu e nyoĩ uchã itaicuee rĩ nda.

17 Efeso, i que hue sucha tubiriã je ra. Hue jenda que jirandu ja erese ra. Judíos que jirandu ja erese ra. Judíos eã abe no. Nyebe hue jenda siquiche ja. Nyebe mbia ñee turã turã jate Jesús rĩ.

18 Jesús quiato mo ngue ngaẽ ngaẽ nguia ra. Eya eãte que huñcuã ndese ra. Nyebe huñcuã nenei nenei.

19 Mbia tubiriã ngue mbae icuã papel mbesa ji curucuaẽ nda. Libros de brujería. Munua ja que huee ra. Ñquĩ ngue esei sei mbia ja resaa cote ra. Mba e isiquia ata tuchi raque que ñquĩ libros isiquia ra. Cincuenta mil plata.

20 Mbia tubiriã ngue Dios cheẽ isi isi quia ra. Dios cheẽ irãtate que mbia tea quia cote ra.

21 Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra.

22 Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

23 Aque mose que mbia paama i tuchi Jesús rĩ nda.

24 Demetrio quia rei mbia mbñcuã icuã nyii. Dios mbuae chuchua que esaã saã nguia ra. Mbae rendi atã je que eriqui sucha ñetẽ naa naa nda. Sucha ñetẽ tubiriã ngue esaã saã nguia ra. Dios mbuae chuchuarã. Diana, i que Dios mbuae je ra. Demetrio que mbae isi tuchi quia sucha ñetẽ ndibishorõ nda. Eresenda tubiriãte que sucha ñetẽ naa naasa ra.

25 Nguesenda ja que emunua nda. Dios mbuae chuchua raãsa que emunua ja ra. Ñee ngue ee ra. —Mbae nandesi turãte rei nguia nandechiao ribishorõ ã.

26 Pablo riqui ñee ñee mbia je co. “Dios mbuae mbia chiao rei eicuãte”, i Pablo quia co. Mbia riqui echeẽ mumbayãte ã. A jendachõ eã ñene. Efeso mii eã ñene. Asia jenda abe eriqui echeẽ andu ã.

27 Ñquĩ icuãte nande je. Nandechiao ra mbia isi isiã ñochĩ cote re. Mbia ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererecuu tuchi que Diana. Mbia chñcuu tuchi que ae. Asia jenda chñcuu tuchi que ae. ¡Mbia ra hui chõchĩ esi jẽ! i que Demetrio ra.

28 Demetrio resenda echeẽ andu mose que paama ite ra. —¡Diana quirãcuãte jẽ! ¡Efeso jenda rerecuu quirãcuãte jẽ! i tuchi que mbia tasẽ tasẽ nda.

29 Hue jenda que paama i ja ra. Pare pare i tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ñquĩ nyeremo ngue ecuruchoi mbia chumunuãsa ra.

30 —Tai que se abe. Tacheẽ ñee mbia je, i rei que Pablo ra. Jesús quiato que Pablo siquisã nda.

31 Asia jenda rerecuu mo abe que ucheẽ mondo Pablo je ra. —¡Ereiquechĩ nda nde jẽ! i Pablo je. Pablo quiato que ñquĩ nda.

³² Mbia que pare pare i tuchi ra. Tasē tasē ja que ra. Hue rĩ ja mbia ndua eāte. Mbae mũ ndese ndua eā. Paama i chooño ja. Eaquiatuā ño ñumunua ñooño nguiā.

³³ Mbia mo ngue mbae senei senei ja Alejandro je ra. Judíos que Alejandro mua mbia ite re cote ra. —Echeē mbia ja je, i que ee ra. Alejandro que o mee mbia je ra. —¡Jēquiriri chō jē! i rei ngue ee re. —Mbia je tacheē. † nda paama iā judíos je, i rei ngue re.

³⁴ —Judío chō Alejandro riqui re, i ja que mbia ra. Nyebe mbia riqui tasē tasē mbeite re. Dos horas. —¡Diana quirācuāte jē! ¡Efeso jenda rerecua quirācuāte jē! i tuchi que mbia tasē tasē nda.

³⁵ Secretario rei ererecua mo. Aque que mbia cheē siquisā cote ra. Ñee ngue ee cote ra. —Tacheē jēje, Efeso jenda. Efeso jenda chō nande re. Diana ndei nandererecua. Nande rei Diana ndaarōsa. Diana naanguia ngue tu ibei si, aque raarōsa chō nande re. Diana chuchua raarōsa abe chō nande re. Mbia jirandu jate ũquí ndese.

³⁶ Emo eicuayā eāte. Nyebe jēquiriri chō jē. ¡Jēaquiatuā jēsaā saā eā ño jē!

³⁷ Ae jēisi seru nae, ũquí mbae mbuquiachā eāte dios mbuae chuchúaa. Ũquí ñee icuā icuā eāte dios mbuae rĩ. Dios mbuae jenderecua rĩ.

³⁸ Demetrio ñee icuāse mose emo nĩ, sā esí nandererecua chuchúaa. Demetrio resenda ñee icuāse mose emo nĩ, sā echoi nandererecua chuchúaa. Huee chō ererecua riqui nguiā mbia cheē andu. Sā echoi ja ererecua je. Sā ñee ñee ja nyue ererecua résaa. Mbae icuā nĩ.

³⁹ Mbae mo nĩ abe mose, jeñee mbia chumunua mose.

⁴⁰ Jesús quiato que nandeisi chooño chĩ nda. Nandechimbūcuā ñooño ño nguiā. Nandererecua ñee arōte nande je. Echeē nda nandesibishorō eā, i que secretario ra.

⁴¹ Aquere que hui mbia si ra. Mbia mbui que cote ra.

20

Pablo nyoĩ Macedóniaa, Gréciaa abe

¹ Mbia quiriri mose que Pablo Jesús quiato munua nda. Embaaquiato quiato jiri. —Co acua quia co, i que ee cote ra. Macedóniaa ngue echoi cote ra.

² Hue jenda sucha mbuchesea seate que echoi ra. Jesús quiato mundua ndua. Ngasē ngue Gréciaa cote ra.

³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuā ndese cote ra. —Nandeisi, i nda judíos quia Pablo rĩ nda. Nyebe Pablo ru nguiā nyebi si Macedonia.

⁴ Ā ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei ũquí. Gayo. Derbe jenda. Timoteo. Tíquico. Trófimo. Asia jenda rei ũquí.

⁵ Ũquí ja rane nguia nyoĩ nguiā ure si. Troas que echi nguiā ureraarō.

⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasē namo ngue Troas cote ra. Ae ureraarō arō nguia, ũquí ngue uresiiti cote ra. Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñumunua ja domingo mose cote ra. Mbichae sia sia nyue. Pablo que embaaquiato quiato quia ra. —Taso isamami, i que ra. Nyebe embaaquiato quiato itondiite mose chee.

⁸ Sucha ibátee que echi ñumunua nda. Eironguia ibate tuchi que ra. Ibate tuchi que echi ñumunua nda. Tata rendi tubiriã ngue etesae tuchi ra.

⁹ Mbia mo ngue chí ibate ra. Ventana tose. Etiarõ namo ngue ra. Eutico, i que ee ra. Uque que huĩ ngoi ibate ra. Pablo que ñee oco tuchi embeesi esi ra. Éque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ.

¹⁰ Pablo que nguichi u erea ra. Oo tuchi que erese ra. Quiaama ngue ra. —jÿesiquichehĩ nda jê! Manoãte, i que Pablo mbia je ra.

¹¹ Pablo que osoi nyui ra. Mbichae que echisia sia ra. U que ra. Mbia que embaaquiato quiatube ra. Eresaitõ ndabe chee. Oso que erecha cote ra.

¹² Ae ngoi nae, erasiã ño ngue mbia curuchoichĩ nguia. Mbia ia tuchi que ngoi je rese cote ra.

Pablo nyo: Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguia ama ndisha rui.

¹⁴ Ae urecuasẽ nguia Pablo je Asón cote. Pablo que oso ureresẽ am a ndisha rui cote ra. Canoa naanguia ye. Urecuasẽ ngue Mitilene cote ra.

¹⁵ Hue si que ureso ra. Isamami ngue ejoõ acua mo urechucuã cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogilioo ra. Huee que urequeneã urecua ra. Isamami ngue urecuasẽ Milétoo cote ra.

¹⁶ Pablo que quicoi asi Asia si ra. Nyebe uresoã Efésoo. —Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésoo ra. —Jenyu, i que amei je ra. Jesús quiato rerecua je.

¹⁸ Ũquí ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jëicuate raque.

¹⁹ Dios cheẽ ngue asenei senei turã tuchi quia jêje. Secuasú que asaã saã eãte quia jêje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra.

²⁰ Dios cheẽ ngue asenei senei mbeite quia jêje. Asiquicheã mbei que sequia erenei nenei jêje. Jembitirõ sacua. Jeñumunua nua mose. Jenyuchúaa ja abe que aico Dios cheẽ nenei nenei jêje.

²¹ Acheẽ tuchi que jêje. Judíos je. Judíos eã je ab e no. “jÿëicuã si jêhui rã! Jesucristo jëicua rã”, ae tuchi que sequia jêje.

²² Co aso quia Jerusalén co. Co Espiritu Turã sererao quia Jerusalén co. Mañi ño nda seje pee.

²³ Co mi ño aicua nguia. Espiritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espiritu Turã ngue sembiirandu ra.

²⁴ Sesiquicheãte ũquí si. Sã sei quia quiato. “Dios turã esenei senei mbei quia mbia je”, i que Jesús seje ra. Aque mi ndese chõ aico nguia ndu a co. Echeẽ mi ndese. †nda echeẽ amumba eã.

²⁵ Dios nandererecua que asenei senei tuchi jêje. Jemae eã mbei ra serese cote. Aicuate se quia co.

²⁶ Jemo siqui sereã mose Jesús rese, se eã ño cote re. Jẽ ño cote re. Jẽ ja je chõ ngue asenei senei ndesẽ.

²⁷ Dios cheẽ ngue asenei senei jate jẽje. Asiquicheã mbei que sequia erenei nenei jẽje. Dios cheẽ mo ngue atibo tibo eãte jẽje.

²⁸ ¡Jẽingo turã ño nyiese jẽ! ¡Jesús quiato abe jẽteaquiato quia jẽ! Espiritu Turã ngue ñee jẽje resẽ. “Jesús quiato rerecuarã jẽ”, i que Espiritu Turã jẽje resẽ. Jesús quiato jẽteaquiato quia jẽ. Ûquĩ ndibishorõ ngue Jesús nguquĩ mondo ra. Umano mose.

²⁹ Seso mose ra emo ngaẽ ñee ñooño jẽje. Tambĩrĩ irĩ, i ra jẽje. Eicuã ño Ûquĩ nde. Nyacua rã sí.

³⁰ Jendese ra emo ndiqui. Jesús quiato mbaaquiato icuã icuã. Jesús quiato mbĩrĩ irĩ. “Índa Jesús quiato siqui nanderese”, i ra Ûquĩ.

³¹ Jẽteaquiato jẽ. Jaembaaquiato quiato tuchi que se. Tres años. Jẽ ja que jaembaaquiato quiato. Acheseo tuchi que sequia jendese.

³² Aico jendecha Dios je a. Aico jendecha Dios turã je a. ¡Dios cheẽ turã jemumbayã mbei quia jẽ! Dios cheẽ nda jembuquirãcuã. Dios cheẽ nda jemingo tuchi Jesús quiato rese.

³³ Mbae isiquia que achosei chosei ãte quia mbia mbae aẽ. Mbia irao abe que achosei chiãte quia aẽ.

³⁴ Seicuate rei que equia aẽ. Se sí chõ aquiei quiei nguiã icua. Seresenda mbaerã abe que aquiei quiei quia aẽ.

³⁵ Jaembaaquiato quiato beite que se. “Jẽquiei quiei”, ae beite que sequia jẽje. “Mbaecha reã je mbae jemeerã mee”, ae que sequia jẽje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi ngũã ndese ra. Ñee ngue Dios je ra. Ûquĩ ndes e ja.

³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra.

³⁸ —Jemae iã nda serese cote, i que Pablo ee ra. Nyebe que eya eã tuchi ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyoĩ Jerusalén

¹ Urecuata que Ûquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue sí que ureso Pátaraa cote ra.

² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra.

³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbĩrĩ cote ra. Huee que canoa yenda jea jea ra.

⁴ Jesús quiato que urembĩrõ hue jenda ra. Siete días que ureico erese ra. Espiritu Turã ngue hue jenda mbucheẽ Pablo je ra. —¡Eresochĩ nda Jerusalén jẽ! i rei ngue Pablo je re.

⁵ Aquere que ureso cote ra. Jesús quiato que nyoĩ ja urerese ra. Ama nimia ndesẽ. Eresebe echoi urerese. Nguĩrĩ abe ruruchoi. Ama ndisha rimia ndes e que urecoi ja urenia ndese ra. Ñee ñee Dios je.

⁶ Urechiquiaama ama ja que cote ra. —Co urecua quia co, ure que ee ra. Canoa ye que ureso cote ra. Hue jenda que nyoĩ nyebi uchuchúaa cote ra.

⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ureitõ miĩ ngue erese ra.

⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbu quiarusu je ra. Aque chuchúaa que urecu ra.

⁹ Cuatro que Felipe rucucha ra. Eruã ja. Dios cheẽ nenei neneisa ja que ũquĩ nda.

¹⁰ Huee urecu are jiri mose que emo ndu ra. Judea si. Agabo, i que ee ra. Dios cheẽ nenei neneisa que ae abe ra.

¹¹ Ae que tu ure je ra. Pablo numbicuasa que eisi ra. O que echucua eye ra. Hui abe que echucua ra. Pablo numbicuasa je. Ñee ngue cote ra. —Espíritu Turã judíos ñee ndeje a. “I nda judíos ndecua pee Jerusalén. Nemeẽ nda judíos eã je cote”, i que Espíritu Turã nda, i que Agabo Pablo je ra.

¹² Ure eandu mose queurecheẽ Pablo je ra. Cesarea jenda abe que ñee ee ra. —¡Eresochĩ nda Jerusalén jẽ! ure ja rei ngue ee re.

¹³ Pablo que ñee ure je ra. —¿Mbaerã jẽingo nyeseo seo serese re? ¿Mbaerã jẽingo sembia eãte re? ¿Mbaete ere? Sã secua Jerusalén ae. Sã sei quia Jesús rĩĩ ae, i que Pablo ra.

¹⁴ Pablo que uresiquisã aroneate ra. Nyebe urecheẽ eã nguiã e e cote. —Sã Dios ae riqui ñee ñee ee no, ure chee que ra.

¹⁵ Ureico quiatu que cote ra. Ureso que Jerusalén cote ra.

¹⁶ Jesús quiato mo abe que nyoĩ urerese ra. Cesarea jenda. Chipre jenda mo ngue siquĩ Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

¹⁷ Jesús quiato ia tuchi que urecuasẽ mose Jerusalén nda. Ureisi turã ngue ra.

¹⁸ Isamami ngue Pablo si Jacobo rea ra. Ure abe que ureso erese ra. Huee que amei ja chi ra. Jesús quiato rerecua.

¹⁹ Pablo que ñee ee ra. Mba e renei nenei ja ee. —Dios que siqui tuchi serese ra. Se echeẽ nenei nenei mose judíos eã je, i que Pablo Jesús quiato rerecua je ra.

²⁰ Pablo cheẽ andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheẽ ndui si chõ nandeico jẽ!” i tuchi que ũquĩ nguia ra.

²¹ Ũquĩ ndiqui ñee icuã icuã nderĩĩ ũquĩ. “Pablo que judíos ataque mbui Moisés cheẽ si ra”, i equia nderĩĩ ũquĩ. “ ‘Coche rei Moisés cheẽ jemumba. ¡Circuncisión jẽsaãchĩ jendiirĩ je jẽ! ¡Judíos ataque chisaã saã nda jẽsaãchĩ jẽ!’ , i que Pablo quia judíos je ra”, i rei equia nderĩĩ ũquĩ.

²² ¿Mañi nande ra re? Jesús quiato ra ñumunua ja judíos. Jirandu mose ndereco mose a.

²³ ¡ĩ ere jẽ! Mbia cuatro que siqui urerese ra. Ũquĩ ngue ñee Dios je ra. “Å nda uresaã ndeje”, i que ũquĩ Dios je ra. Ũquĩ nda esaã ee cote.

24 Ñquĩ erao Dios chuchúaa. Ñquĩ na si esaã nde abe. Nembuturã sacuaã. Mbae isiquia emondo ee Dios chuchúaa. Queñi ua sia cote. Fere quiatu. Mbia ra jirandu jate nderese. “Pablo abe riqui Moisés cheẽ mumbayã tuchichĩ nande rã si”, i ra nderĩ cote.

25 Judíos eã je que nandechẽ Jesús quiato je. Nandechẽ mĩ ño ngue nandemondo ee. F nande chõ ngue ee. “Mbia soo mondo mondo mose dios mo je, ¡aque soo ra jẽuchĩ jẽ! ¡Eruqui resebe ra soo jẽuchĩ jẽ! ¡Mbae ruqui ra jẽuchĩ jẽ! ¡Jeninisi rese rocoĩ nda jẽingochĩ emo ndese jẽ! ¡Jendu rese rocoĩ nda jẽingochĩ emo ndes e jẽ!” nande que judíos eã je, i que Jesús quiato rerecua Pablo je ra.

Soldados rerecua Pablo isi

26 Pablo que ñquĩ cuatro querao cote ra. Dios chuchúaa que ererao ra. Isamami ngue Pablo ñimbitirõ nda. Ñquĩ cuatro rese. Oso que ñee Dios chuchua rerecua je cote ra. —Aque mose ra mbae mo ureiquia Dios je cote, i que Pablo ee ra.

27 Siete días que echi huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chĩ mose que judíos mae erese ra. Ñquĩ ngue mbia mbĩcuã Pablo je ra. Oo que Pablo rese ra. Isi que ra.

28 Tasẽ tasẽ ngue ñee mbia je ra. —¡Israel jenda! Jenyu rã urerese. Pablo nandei si rã. Ae quia oso oso beite nguiã ñee icuã icuã judíos rĩ. Moisés cheẽ ni i abe quia eriqui nguiã ñee icuã icuã mbeite. Dios chuchua rĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã Dios chuchúaa. Dios chuchua mbĩcuãte nyeresẽ, i que mbia paama i Pablo je ra.

29 Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguiã ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je.

30 Hue jenda que ñimbiãcuã tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra.

31 Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serĩte quia pee, i que oso ee ra.

32 Soldados rerecua que soldados munua nda. Oficiales abe no. Nyoĩ asi que mbia icuã ndea cote ra. Mbia que Pablo iruã nua eã cote ra. Soldados rese mae mose.

33 Ererecua que oso Pablo rea ra. Pablo isi que ra. —Echucua cadenas je, i que soldados je Pablo rĩ nda. Ererecua que ñee mbia je cote ra. —¿Aba co re? ¿Mbae icuã esaã jẽje re? i que mbia je ra.

34 Hue rĩ ja mbia ñee eã ee. Mbia que ñee ata ata ee ra. Tasẽ tasẽte que ñee ee ra. Ñee ñoño ererecua je. —¿Mbae ra aba icua jeñee nde? i chee que ererecua mbia je ra. —Pablo jenya mbirĩ na cuartel, i que ererecua soldados je ra.

35 Pablo ruruchoi que ra. Ngasẽ ngue eiquesa rurubi cote ra. Hue que mbia icuã icuã sí Pablo je no nda. Nyebe soldados ecuruchoi nguiã sui cote.

36 Mbia que tasẽ tasẽ ngaẽ nguiã erui ra. —¡Jẽiquia rei ae! i que mbia cuaẽ nguiã erui ra.

Pablo ñee mbia cuabẽ je

37 Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheẽ na, i que ererecua je ra.

³⁸ Ererecua que ñee Pablo je cote ra. —¿Griego cheẽ ereicuate nde re? Egipto jenda ereico reĩ seje. Ae eicuã icuã ndiqui gobierno je, ¿ũquĩ nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra.

³⁹ Pablo que ñee ee ra. —Tei. Judío chõ se re. Tarso jenda chõ se re. Sucha tubiriã tuchi que Tarso de Ciliciaa ra. Tacheẽ na mbia je, aechĩ nguiã ndeje, i que Pablo ererecua je ra.

⁴⁰ —Eno. Echeẽ ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheẽ ngue esaã mbia je ra.

22

¹ —Seataque, seandu rã. “Eicuã”, jenyechĩ nguiã seje. Nyebe tacheẽ jẽje, i que Pablo ra.

² Pablo judíos cheẽ naa mose, mbia que quiriri ja tuchi cote ra. Pablo que ñee mbei mbia je ra.

³ —Judío chõ se re. Társoo que achaacuquia ra. Tarso de Cilicia. Aa que atiarõ nda. Jerusalén ngue atiarõ nda. Gamaliel que sembaaquiatusa ra. Nanderamei ndui si que sembaaquiato quiatu ra. Eraã si. Dios cheẽ ngue amumba sereã tuchi ra. Sã jẽingo namo ã no.

⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarõ nda. Mbia ninisi abe que atarõ tarõ nguia ra.

⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarõ ña. Aa nda aru nguiã eiruã nua ña. Jenderecua ũquĩ icuate raque. Jeñee ee ae.

Aico uba Dios rese co cote, i Pablo

⁶ Acuasẽ nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra.

⁷ Tata rendi rese mae mose que acoi oso íbii ra. Echeẽ mo ngue achandu ra. “Saulo, Saulo. ¿Mbaerã ndeicuate riqui seje re?” i que seje ra.

⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuate riqui”, i que seje ra.

⁹ Seresenda que siquiche tuchi ra. Mae ndei ngue tata rese re. Echeẽ nguia echanuate nguiã.

¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasẽ oso cote. Damáscoo. Mbae riñnda acheẽ ja ndeje huee cote”, i que Jesús seje ra.

¹¹ Tata rendi que seresa mungue ra. Seresayã. Nyebe seresenda sererao nguiã seo rese. Damáscoo.

¹² Huee que emo ndiqu i ra. Ananías, i que ee ra. Moisé s cheẽ ngue emumbayã tuchi quia ra. Judíos hue jenda que ñee turã ja quia ee ra.

¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra.

¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ũquĩ icua sacua ngue Dios ndeisi cose ra. Jesús

turã ndese mae sacua ngue ndeisi cose ra. Jesús cheẽ andu sacua ngue ndeisi cose ra.

¹⁵ Dios cheẽ nda eresenei senei mbia ja je cote. Ae erchandú, ùqui nda eresenei senei mbia ja je cote. Ae rese eremae, ùqui nda eresenei senei mbia ja je cote.

¹⁶ ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicua mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra.

¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso ercha” i que Jesús seje ra.

¹⁹ Acheẽ ngue Jesús je ra. “Sererecua, a jenda que seicuate nyii ra. Seicuate que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra.

²⁰ Mbía Esteban iquia mose, seyate que ùqui mose ra. Huee que aico ra. Eiquiasa irao que asarõ nda”, ae que Jesús je cuu ra.

²¹ Jesús que ñee seje ra. “Eso. Taremondo isho. Secheẽ nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã ñee mose que mbia nyiibute cote ra. Pablo cheẽ andu sereã cote. —¡Pablo nandeiquia rei jê! I nda eriquiã cote, i que judíos tasê tasê nda.

²³ Mbía paama i ja Pablo je. Tasê tasê. Huirao mbaaba aba. Ibi tuba ara ara mombo mombo ibate.

²⁴ Soldados rerecua que ñee cote ra. —Pablo jendao matã. ¡Nandeiruã nua jê! I nda ñee, i que ererecua ra. —¿Mbaerã mbia ñee icuã icuã ndeje re? i Pablo je.

²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resê. Mbae icuã asaã eãte resê, i que ra.

²⁶ Capitán ngue oso ererecua mbiirandu cote ra. Pablo cheẽ nguire. —¡Ereiruã nuachĩ nda jê! Romano ño ae re, i que capitán nda.

²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra.

²⁸ Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra.

²⁹ Pablo iruã nua eã ngue cote ra. Mbía que hui esi cote ra. Mbía siquiche ja tuchi que cote ra. —Pablo nandechucuachĩ. Romano ño eriqui re, i que mbía cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰ —¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. Ùqui ererecua ñee sacua ee.

23

¹ Pablo que mae hui ererecua ja rese ra. Ñee ngue ee ra. —Seresenda, mbae turã ndese aico bei co. Namó abe. Nyebe sesiquicheã mbei riqui Dios si co, i que Pablo ra.

² Ananías, i sacerdote rerecua je. Aque que ñee Pablo ji jenda je ra. —Pablo churu rese jengua, i que ra.

³ Pablo que ñee ee cote ra. —Dios ra ucua nderese jẽ. Ndeturã eresaã ñooñoohĩ nguiã. “iMoisés cheẽ nda jemumbachĩ jẽ!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguiã serĩ. Moisés cheẽ mumba, i que Pablo ee ra.

⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emĩngo rei a resẽ, i que Pablo je ra.

⁵ Pablo que ñee ee ra. —Sacerdote rerecua eã eriqui reĩ nguiã seje. † nda acheẽ eãte eriĩ. Aicuayãte quia ñi se re. “Jenderecua riĩ jẽingochĩ nguiã ñee icuã”, i rei que Dios ñee nande je resẽ, i que Pablo ra.

⁶ Hue ri ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ũquĩ je chõ mbia riqui nguiã paama i seje. Ũquĩ je chõ ngue sereru nguiã jẽje, i que Pablo ererecua je ra.

⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda.

⁸ Saduceos que ñee nguiã ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siquĩ ã ndesẽ. Mbia aĩ abe siquĩ ã ndesẽ, i que fariseos ra. Nyebe ererecua ñee icuã icuã nguiã nyue.

⁹ Tasẽ tasẽ tuchi que nyue ra. Fariseos mo ngue juã ñee nda. Ũquĩ ndei embesasa. Ñee ngue Pablo riĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ũquĩ mose ra nandeico turã Dios je abe, i que fariseos ra.

¹⁰ Mbia que ñee e icuã icuã mbei chõchĩ nguiã nyue. Soldados rerecua ireĩte que eriqui ra. Mbia que Pablo iquia serĩte quia ee ra. Nyebe ñee soldados je. —Jẽso Pablo rea. Jendao rã jenyuchúaa, i que ererecua soldados je ra.

¹¹ Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandequia, i rei mbia

¹² Isamami ngue judíos ñee ja nyue ra. —iPablo nandequia jẽ! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra.

¹³ Ae Pablo iquia serĩte quia, ũquĩ cuabẽte que ra. Cuarenta que ra.

¹⁴ Ũquĩ ngue nyoi ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose.

¹⁵ “iPablo embu ure je!” jenze soldados rerecua je. “Pablo rese uremae na”, jenze soldados rerecua mbiirĩ irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

¹⁶ Pablo nongue riirĩ ngue jirandu erese ra. Aque que oso Pablo mbiirandu ra. Soldados chuchúaa. —iMbia ra nyiquitirõ tirõ nderese jẽ! iNdeiquiachĩ nda jẽ! i que Pablo je ra.

¹⁷ Nyebe Pablo ñee soldado mo je ra. —Senongue riirĩ erao ndererecua je. Ñee nda ndererecua je chã, i que Pablo ra.

18 Nyebe ererao nguiã nguerecua je. —Pablo que acuanĩndu mbu ra. Mbae i chõ nda ndeje, i nguerecua je.

19 Ererecua que acuanĩndu querao eo rese ra. Pe jiri que eñi ñee ee ra. —¿Mbae ere u ñee seje re? i que ererecua ra.

20 Acuanĩndu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra nembĩĩri i rĩ.

21 Ñee ñooño nda ndeje. ¡Echeẽ nda eremumbayãchĩ jê! Judíos cuabẽ nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanĩndu ererecua mbiirandu ra.

22 Soldados rerecua que ñee acuanĩndu je ra. —¡Equĩrii chõ oso! ¡Erecheẽchĩ nda emo je jê! i que ee ra.

Pablo mondo ererecua Félix je

23 Ererecua que ñee ererecua ataque mo je cote ra. —Sã soldados icoquiātu. Sã echoi Cesarea itondáruu. Sã doscientos choi ibi rĩ. Sã setenta choi ticuasú ato. Sã doscientos choi ira racuatirõ ji rerecua. Cesarea ra jêso itondaru, i que soldados rerecua ñee nda.

24 —¡Ticuasú jêisi mua Pablo rendacuã jê! ¡Pablo jendao turã nguia jê! Jendao turã ererecua Félix je, i que soldados rerecua ra.

25 Embesa ji que emondo Félix je ra. ¶ ngue carta mbesa ra:

26 —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde.

27 Co amondo quia ndeje co. Pablo, i equia ee. Judíos eisichĩ neaẽ. “Nandequia”, i rei ereaẽ. Se chõ ngue asiquisã nguiã. Romano ndei ae. Nyebe mbia asiquisã nguiã esi.

28 Judíos rerecua chumunua mose que Pablo arao ee ra. “¿Mbaerã mbia icuã e riqui Pablo je re?” ae rei ngue ñee ererecua je re.

29 “Pablo nandetarõ”, i rei que judíos quia ra. “Pablo nandequia”, i rei que judíos quia ra. Pablo siquiã ndaque mbae icuã ndese. Judíos cose ndare cheẽ nguire chõ ngue judíos paama i Pablo je ra.

30 Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguiã Pablo mondo ndeje aque. Ae eicuã icuãte riqui Pablo je, ùqui je que acheẽ nda. “Jêso quia ñee Félix je”, ae chõ ngue ee ra. Hasta luego. ¶ ngue carta mbesa ra.

31 Soldados que Pablo curuchoi isa ra. Nguerecua cheẽ nguire. Ngasẽ ngue Antipatris ra.

32 Soldados que nyoĩ ibi rĩ, ùqui ngue ngaẽ nyebi isamamĩ nda. Ae nyoĩ ticuasú ato, ùqui ngue nyoĩ bei ngasẽ Pablo ruruchoi ra.

33 Ngasẽ ngue Cesaréaa ra. Soldados rerecua chimbesa que emondo mbia rerecua je ra. Pablo abe que emondo mbia rerecua je ra.

34 Mbia rerecua que mae huĩ carta echimbesa rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra.

35 —Ae ñee icuã icuã nguia ndeje, ùqui ngasẽ mose ra ndecheẽ achandu ja, i que ererecua Pablo je ra. —Pablo jêteaquiātu tuchi Herodes chuchúaa, i que soldados je cote ra.

1 Cinco días mose que sacerdote rerecua ngasē Cesaréaa cote ra. Ananías, i equia sacerdote rerecua je. Ererecua ataque mo ngue ngasē erese ra. Tértulo abe que ngasē erese ra. Abogado rei Tértulo. Ngasē ngue ecuaē ñee ñooño Félix je ra. Pablo rií.

2 Soldados que Pablo curucuaē ererecua chumunua mose ra. Tértulo que ñee icuā tuchi Pablo rií cote ra. Ererecua nda embiicuañguiã Pablo riícharã ña. Ñee ngue ererecua je ra. —Ndeturâte eriqui ure je co, Urererecua. Ndeaquiatute eriqui ur e je co. Urembiate equia co.

3 Nyebe “iaanye” ure bei nguiã ndeje co, Félix.

4 Ureandu mbiñna. Urecheẽ oco eã nda ndeje nye.

5 Pablo quiarei siqui chooñoa judíos je. Judíos mbuchesea sea ja. Embiicuañ icuã uchue. Nazarenos, i que judíos ataque mo je ra. Ũqui nderecua rei Pablo.

6 Pablo que Dios chuchua mbiicuañ serite rei ra. Nyebe ureisi nguiã. Urerao rei que judíos rerecua chumunua mose ra.

7 Lisias tu chõchĩ soldados rurucuaē cote. Ureriquisã. Pablo rirõ icuã ureo si.

8 “Jeñee icuãse mose Pablo rií, jeñee ño oso Félix je”, i que Lisias ure je ra. Echeẽ Pablo je no. Ereirandu ra Pablo rese cote. Eicuã ndese, i rei que Tértulo Félix je ra.

9 —Ae beite, i ja judíos Tértulo cheẽ mose. Ñee icuã icuã ja Pablo rií.

Pablo ñee ererecua Félix je

10 Ererecua que ñoomee Pablo je cote ra. —Nde echeẽ seje cote, i chõ ñoomee nguiã ee. Pablo que ñee ee cote ra. —Urererecua ima nde. Ndeaquiatute. Nyebe sebite riqui nguiã secheẽ mose ndeje. ã ngue ñee ñooño nguia serĩ nda. Echeẽ tasibishorõ ndeje.

11 Namojiri que aso Jerusalén nda. Doce días. Acheẽ ñee ngue oso Dios je ra. Echeẽ ñee mbia je ae. Sã mbia nembiirandu ae. “Ae beite” i ra mbia ndeje.

12 Emo je que aico ñee icuã icuã eãte Dios chuchúaa ra. Mbia que ambucheẽ icuã eã nguia nyue ra. Judíos chumunuásaa que aico eã mbia mbiicuañ icuã nda. Mbiã chuchua ite re abe que aico eã mbiã mbiicuañ icuã no nda.

13 ã ñee ñooño ño nguiã serĩ. ã mae ãte seicuã mo ndese resẽ.

14 Aque miñ ndese chõ aico resẽ. Dios cheẽ yasu rui bei chõ aico nguiã co. Dios cheẽ yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheẽ icua co no. Co aico Dios cheẽ mbucheuasa chimbesa icua co no.

15 Co aico Dios icua ũqui na si co. Mbia raaque ra quera si no. Ũqui aicuate. Mbia icuã nda quera si. Mbia turã na si. Quera ja chõ ndae.

16 Nyebe aico Dios cheẽ ndui bei co. Nyebe sechiã cuaãcuã i eã Dios si. Mbia si abe.

17 Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee.

18 Achimbuturã ngue Dios chuchúaa ra. Mbia eãsa. Mbia ambicuañ eã. Judíos Asia jenda que mae serese ra. Dios chuchúaa.

19 Sã ũqui ngaẽ serenei ndeje. Seicuã mose, sã ũqui ngaẽ ñee ndeje.

20 Sã ã abe ñee ndeje. Seruruchoi rei que judíos rerecua chumunua mose ra. Mbae i ãte que seje ra. “Mbae icuã ngue ersaã nda”, i eã ngue ererecua seje ra.

21 “Mbia mano je ra quera si, ae chõ ndei nguiã co. Ûqui je chõ ngue sereru nguiã jêje”, ae que ererecua je ra. Ûqui i equia seje reae, i que Pablo Félix je ra. Félix rei ererecua.

22 —Emo mose ra acheẽ ndeje, i que Félix Pablo je ra. Félix jirandu tuchi rei Jesús chimbaaquiatu rese reae. —Sã soldados rerecua ru rã. Huee quia nda acheẽ nguiã cote. Mañi ño nda aba ndeje cote, i que ererecua Pablo je ra.

23 Félix que ñee capitán je cote ra. —Pablo jêteaquiato bei jê. Jêhui jêhui jiri esi. Sã equiato ngaẽ ngaẽ erea. Mbae mondo mondo ee, i que Félix ra.

24 Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheẽ tachandu rã. Jesucristo riĩ tachandu, i que Félix ra.

25 Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacua, i tuchi que Pablo Félix je ra. Félix chiã ngue cuaãcuã i Pablo cheẽ mose ra. Nyebe ñee Pablo je. —Eso cote. Serecochi mose ra acheembe ndeje, i que Félix Pablo je ra.

26 —Pablo ra mbae isiquia mondo chee seje. Se embui sacua, i rei que Félix ra. Nyebe Félix “echu” i i bei nguiã Pablo je.

27 Eĩ mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mñi nda. —I nda judíos paama iã seje, i que ra.

25

Pablo ñee ererecua Festo je

1 Festo que ngasẽ Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra.

2 Huee que sacerdote rerecua ñee icuã ja Pablo riĩ nda. Judíos rerecua abe ñee icuã ja Pablo riĩ. Festo je ñee ñee Pablo riĩ.

3 —Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa.

4 —Pablo tarõ ji ñi Cesarea pee. Aruã nda se. Namu jiri ra aso pee, i que Festo ra.

5 —Sã jenderecua abe nyoĩ serese Cesaréaa. ¿Mbae jenye quia Pablo je re? ¿Mbae icuã esaã nde? Nyao pee teñee seje, i que Festo ra.

6 Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rã. Echeẽ tachandu cote, i que mbia je cote ra.

7 Pablo que ique cote ra. Judíos Jerusalén jenda que ñee icuã icuã Pablo riĩ nda. Maende rocoĩ mbae icuã naa mose. Ñee ñooño eriĩ.

8 Pablo que ñee echeẽ mose ra. Judíos cheẽ ngue esibishorõ nda. —Mbae icuã mo asaã eãte resẽ. Judíos chimbesa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambũcuã eãte no ndesẽ, i que Pablo ra.

9 —¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —I nda judíos paama iã seje. Judíos tambia jiri, i que equia ndua ra.

¹⁰ Pablo que ñee ee ra. —Romanos nderecua raque jê. Aico raque jêsa a. Jê nguiatu jeñee seje. ã jêingo raque seicuate ã. Mbae icuã mo asaã eãte judíos je resê.

¹¹ Se mbae icuã naa tuchi mose, ¿seiquia se jê! Judíos ñee ñooño mose serñi, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra.

¹² Festo que ñee nyecuayã cuayã nguesenda je ra. Aqwere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

¹³ Aqwere que Agripa si Cesaréaa ra. Ererecua rei ae. Berenice rese que esi ra. Festo rea.

¹⁴ Huee que itõ mocoite ra. Festo que Agripa mbiirandu ja Pablo rñi nda. —A emo tarõ ji ñi a. Félix que etarõ mii nda.

¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo rñi.

¹⁶ Acheẽ ndei ngue ee re. “Tei. Mañi ae ra mbia mo iquiachõ nde. Mbia eicuã nenei eã mose seje. Ae ñee icuã nguia erñi, sã ñuqui ngaẽ ñee ee. Sã ñee nguia nyue sésaa”, ae que ee ra.

¹⁷ Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra.

¹⁸ Pablo ucuayãsa que juã ja rei cote ra. Ñee icuã tuchite reñi nda Pablo rñi seje. Pablo chisaã icuã mo ngue embuchecuayã ñochi nguia seje. “Mbia ra Pablo mbiicuã tuchichi nde”, aechi ngue se re.

¹⁹ “Judíos rã eã ño Pablo. Judío ndua rã eã ño Pablo riqui nguia ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús rñi nda. “ ‘Jesús que quera si manonde ra’, i que Pablo judíos je ra”, i que Festo Agripa je ra.

²⁰ —“¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia nandechẽ”, ae rei que ee ra.

²¹ “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite mii nguia, i que Festo Agripa je ra.

²² Agripa que ñee ee ra. —Se abe nda aque cheẽ achandu rã ña, i que Festo je ra. —Eno. Isamami nda echeẽ erechandu cote, i que Festo ra.

²³ Isamami ngue Agripa huiirao turã mingue ra. Berenice rese. Ererecua irao. Ererecua атаque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra.

²⁴ Festo que ñee cote ra. —Tacheẽ ndeje, Agripa. Jê abe je tacheẽ, mbia rerecua. A eriqui a cote. Pablo, i equia ee. Ae rñi judíos riqui ñee mbeite seje. “Eiquia”, i bei seje. Jerusalén jenda abe ñee mbei erñi. Cesarea jenda rã. “Sã mano”, i bei seje.

²⁵ ¿Mbae rñi nda aba eiquia re? Mbae icuã mo esaã eãte resê. Ae quiarei ñee. “Semondo rã ererecua tuchi je”, i que Pablo seje ra. Nyebe tamondo ee.

²⁶ ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguia jêje a. Ndeje chõ ngue aru nguia, Agripa. Echeẽ ee. † nda eicuã erembuchecua. † nda eicuã ambesa mondo ererecua tuchi je.

²⁷ ¿Ma nda aba etarōi mondochō nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

¹ Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra.

² —Secheẽse rete ndeje, Sererecua. Judíos que ñee icuã tuchi quia serĩ nda, Sererecua.

³ Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderoseĩ nguiatu rã secheẽ andu.

⁴ Judíos maesate raque se, señetẽ mosenda bei. Serecua quiti. Jerusalén abe.

⁵ Se rei fariseo. Setiarō namo mosendachō ndei fariseo se. Judíos seicuate raque. Fariseos achō ño ureramei ñee mumbayã mbei.

⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguiã ee. Ũquĩ nũ ño judíos riqui nguiã seucuayã ã. Ũquĩ nũ ño mbia riqui nguiã ñimbicua seje ã.

⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguiã echeẽ ndui si ã. “Mbia raaque ra Dios mbuquera si”, ae sequia se abe co. Ũquĩ je chō judíos icuã icuã ndiqui nguiã seje, Agripa.

⁸ ¿Jẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

⁹ Se abe que seicuã icuãse rete riqui Jesús quiato je cose ra. Nazaret jenda chō Jesús re.

¹⁰ Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguiã Jesús quiato tarō tarō mbeite cose. Sacerdote rerecua cheẽ nguire. Jesús quiato iquã iquã mose, “coche rei” ae que sequia ra.

¹¹ Jesús quiato que airuã nua tuchi quia ra. “I nda hui Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacua. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacua ee.

Aico uba Dios rese co cote, i Pablo

¹² Emo mose ngue aso rei nguiã Damascoo. Sacerdote rerecua semondo mose.

¹³ Tacheẽ tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resae. Tata rendi que ureresae tuchichĩ nguiã tenda si.

¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuãte riqui seje re? Nde sí chō erechimbasi mbasi nguiã aque. Ticuasua rã tuchi quiarei nde aba cheẽ mumba mose. Sã ticuasua riqui nambacua mbuti no. Sã eriqui hui mbaba ira racua echi no. Ũquĩ na tuchi quiarei nde”, i que seje ra.

¹⁵ “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra.

16 “Ehuã na. Aico nyecua ndeje a. Serenei nenei sacua mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ūqui abe teresenei senei mbia je.

17 Judíos eã je taremondo. Secheẽ nenei nenei sacua. Ūqui o taisi eicua icua mose ndeje. Judíos o abe taisi eicua icua mose ndeje no.

18 Taremondo judíos eã je. Terembaaquiato quiatu. ꞑ nda eriquiã mbae icua ndese. ꞑ nda eriqui mbae turã ndese. ꞑ nda eriquiã aba mbiĩĩ irĩsa rui. ꞑ nda eriqui Dios rui. ꞑ nda Dios icua. ꞑ nda eicua ambutiã esi. ꞑ nda Dios ūqui ngeu recoe umbaerã”, i que Jesús seje ra.

Pablo Dios cheẽ senei tuchi Agripa je

19 Ibatenda cheẽ ngue amumbayã nda, Agripa.

20 Dios cheẽ ngue asenei senei tuchi mbia je ra. Mbiam Damasco jenda je. Jerusalén jenda je abe no. Judea rurubinda je abe no. Judíos eã je abe no. “jẽicua si jẽhui chõ jẽ! Dios icha rui jẽingo. Jẽingo turã. ‘Dios icha rui eriqui’, i nda mbiam jẽje chã”, ae que ee ra. Embaaquiato quiatu.

21 Nyebe judíos seisi nguiã Dios chuchúaa. Nyebe eriqui nguiã “nandeiquia” i seje.

22 Dios que serea quiato bei quia ra. Namo abe. Nyebe aico echeẽ nenei nenei mbei mbiam ja je. Mbaecha je. Mbaecha reã je abe. Moisés cheẽ ndui si aico ñee ñee mbiam je co. Dios cheẽ mbuchecua rui si aico ñee ñee mbiam je co.

23 ꞑ ngue Dios cheẽ mbuchecua embesa cose ra: “Mbiam ra Cristo mbasi mbasi. Aquere ra mbiam eiquia. Ae rane nda quera si mbiam raaque si. Ae ra mbiam mbiirandu nguico mose uquera rĩ. Judíos mbiirandu. Judíos eã ab e mbii randu”, i que Dios cheẽ mbuchecua mbiam je cose ra, i que Pablo Agripa je ra.

24 Festo que ñee Pablo je cote ra. —Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra.

25 —Aquiachã eãte se resẽ, Festo. Acheẽ nyecuate raque jẽje. Dios cheẽ tuchi chõ asenei nguiã jẽje co.

26 A Agripa riqui raque a. Nandererecua tuchi. Echeẽ ee. Ae rĩ aico ñee jẽje, ūqui ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbiam je ra. Jesús mbae saã nyecuayã eã, i que Pablo ra.

27 —¿Dios cheẽ mbuchecua cheẽ ndebite re, Agripa? Ndebite que ra, i que Pablo ee ra.

28 —“Jesús quiato ra nde cote”, ¿erechĩ equia seje re? i que Agripa Pablo je ra.

29 Pablo que ñee ee ra. —Nde mii eã. Seandusa ja. A jengu ja a. Jesús quiatorã na jẽ, se rã si, aechĩ nguiã jẽje. Jengasa ra chi eã nguiã, se rã si, i que Pablo ra.

30 Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, ūqui abe que juã nda.

31 Nyoĩ que pe jiri cote ra. Ñee ñee nyue. —Pablo mbae icua saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que erecua nyue ra.

32 Agripa que ñee Festo je ra. —“Semondo rã ererecua tuchi je”, i chõchĩ Pablo. ꞑ nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quiti

¹—Pablo tamondo Italia, i que ererecua ra. —Jēisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ũqui soldados je ra. Emo abe que ecuruchoi isi ra. Se abe que aso erese ra. Lucas rei se.

² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quiti que urecuata ra. Sucha mbuchesea sea sacua hue jenda.

³ Isamami ngue urecuasē Sidón cote ra. Julio turâte que Pablo je ra. Ecuatasa que eriqui ra. Nyebe Pablo si uquiato rea. Equiatio que eteaquiato ra.

⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresichã nguiã. Eibichi que ureso quia cot e ra. —I nda quiririã nandembutiba eã, ure que ra. Chipre, i que ejoõ je ra.

⁵ Cilicia que urechucua cote ra. Panfilia abe que urechucua nda. Urecuasē ngue Mira cote ra. Licia, i que ibi je ra.

⁶ Huee que soldados rerecua canoa cuasu nongue tea ra. Alejandría jenda rei canoa. —Oso ra Itáliaa, i que ure je ra. —Aque ye jēingue, i que ure je ra. Ae ureso nguiã eye cote.

⁷ Ureitôte que oso quia ra. Ureque atate que ama ndisha rasa ra. Urecuasē nyee que Gnído ra. Quiririã mbeite que ureruba quiti ra. Nyebe ejoõ acua mo uresichã nguiã. Creta, i que ejoõ je ra. Salmón ngue urechucua nda.

⁸ Ejoõ acua que uremama jiri ra. Quiririã icua icua ngue ure je ra. Buenos Puertos que urecuasē cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoíte que huee ra. Quiririã tuchite chee que ra. Aba ireíte que quiririã cote ra. Amã mose. Nyebe que Pablo ñee mbia je ra.

¹⁰ —Nandecuata i i mose ra canoa ñiimi nande je. Mbae ra ñiimi ja canoa yenda. ¡Nande abe ra nandemanochĩ jē! i que Pablo ee ra.

¹¹ Soldados rerecua que Pablo cheẽ mumba ra. Canoanya cheẽ mumbayã. —Nyao rei, i que soldados rerecua ra.

¹² —Canoa ndua icuãte a. Quiririã aronea. Nyao rei a si. Ma nandecuasē ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuatasã jirichĩ cote, i que ureataque ra. Canoa que embucuata cote ra. Ejoõ acua ibi que ureso quia ra.

¹⁴ Urecuata ramo mose que quiririã icua tu ure je ra. Ejoõ acua quiti que eru ra. Noreste, i que aque quiririã je ra.

¹⁵ Quiririã ngue canoa mbucuatayã ureruba quiti ra. —Sã quiririã ae nanderuruchebi serao, ure chee que ra.

¹⁶ Ejoõ quitera quiti que ureso ra. Ejoõ ngue quiririã nyoote ure si ra. Clauda, i que ejoõ je ra. Canoa ñetē ngue urembuti serao quia ra. Canoa cuasu riita rese. Ejoõ quitera quiti que canoa ñetē urechuchã canoa cuasu je cote ra. Eusite raque.

¹⁷ Canoa ñetē ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiatachĩ nande je re, i que ra. Mbia

siquiche tuchi que ra. —¡Eriiri iri quiti ra nyaochĩ jẽ! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra.

¹⁸ Isamami abe que quiririã icuã icuã mbeite ra. Nyebe mbia mbae mombo mombo nguiã ii. Canoa yenda. Emumbebi sacua.

¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote.

²⁰ Ureitõ mocoĩ mocoĩ tuchi ama ndisha riite re. Itõ nguicoĩ bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichĩ nda ibi je re. Ama ndisha riite re ra nandemanochĩ nde, ure chee que ra.

²¹ Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. —Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. † nda canoa yenda nandemomboate ii. Mbae mbuquiachã nondechĩ.

²² ¡Jeñimbirãcuã ño jẽ! Nande mo nda mano eã. Canoa nda quiachã. Nande quiatu ra nandequiachã.

²³ Dios rimba rei se. Dios que ángel mo mbu ñee seje isa ra.

²⁴ “¡Eresiquichehĩ nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderĩ nda nderesenda mo manoã. Dios ra etequiatu ja,” i que ibatenda seje ra.

²⁵ Seresenda, ¡jeñimbirãcuã ño jẽ! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã.

²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoĩ mocoĩte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose.

²⁸ Ama ndiite que embuchecha ra. ¿Ecu tuchi ere? i que nyue ra. Treinta y seis metros. Pe jiri que embuchecha si no nda. Veintisiete metros cote.

²⁹ —¡Canoa nda cua ichĩ sita je jẽ! ¡Quiatachĩ nda jẽ! i que mbia nyue ra. Nyebe mbae usi mondo mondo nguiã ii canoa ndiquisã sacua. Mbae usi cuatro. Anclas, i que ũquĩ je ra. Ae ecuaa chi nguiã canoa ndese embutiba. —Quiatuchu, nyaashĩ, i tuchi que equia ra.

³⁰ —Nandechã nyecuayã, i que canoanya rimba ra. Nyebe canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembũĩ irĩ nda. —Nandechã nyecuayã, i chõ mbei que equia nyue ra.

³¹ Pablo que ñee soldados je ra. Ererecua abe je. —Ã chichõ eã mose canoa je, jeñimi ja rae. Ama nda jẽiquia, i que Pablo ra.

³² Ae soldados canoa ñetẽ sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jẽu jiri cote. Jeniãcuã mocoĩ mocoĩte que. Mbae mo ngue jẽuãte catorce días. Jengueãte que catorce días no.

³⁴ Mbae mo jẽu rã cote ae. † na jẽquirãcuã jiri. Mbae mo nda jeĩ eã jẽje. Jemo nda mano eã, i que Pablo ee ra.

³⁵ Aquere que Pablo mbichae sirõ nda. Iaaney, i que Dios je ra. Mbia resa rae. Nyisia que ra. U que cote ra.

³⁶ Pablo cheẽ ngue mbae oseĩ uquia mbia je ra. Mbia ja que mbae u cote ra.

³⁷ Urecuabete que canoa yenda ra. Doscientos setenta y seis que ure ra.

³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacua.

Canoa jaã

³⁹ Urechaashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoinda rese que uremae nda. Ama nimia turã. —Nyao nguichi huee. Eicoinda, i rei que ererecua ra.

⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoi que embuchesecobe quiririã je ra. Canoa ngue ngata ama nimia turã nguiti cote ra.

⁴¹ Iaãcuã eicoinda que canoa jaã nda. Eriquiraa eãsa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiiso ra. Quiata que ra.

⁴² Soldados que ñee cote ra. —Ã ecuasa riqui ã nae, iã nandeiquia ja jê! I nda echoi eã itã. Oso chee eã, i rei ngue soldados re.

⁴³ Soldados rerecua que Pablo iquia sereã nda. Nyebe ñee nguiã soldados je. —jEcuasa mo nda jêiquiachĩ jê! i que soldados je ra. Ererecua que ñe e mbia je cote ra. —Eita aquiatu jêso ii. Jêso usê ama nimia ndese.

⁴⁴ Eita aquiatuã, jêso mbebi ira rese, i que soldados rerecua ure je cote ra. Eĩ ure ja que usê ama nimia ndese cote ra.

28

Ngasê ejoõ ácuua Máltaa

¹ Uresê ja que ama nimia ndese ra. —Malta, i que a je ra. Ejoõ acua je, i que hue jenda ure je ra.

² Hue jenda turãte que ure je ra. Tata que emendi ure je ra. Urechee sacua. Tigüindiseite que eriqui ure je ra.

³ Pablo que nyea queru mbuchuuta ra. Nyea mbucha mose que mbei usê asi Pablo echĩ ra. Mbei que Pablo o shiu ra.

⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso chee que ama ndisha si no. A mbei riqui eshiu a no. Mano nda cote reae. Huiicuã mose, i rei que hue jenda nyue ra.

⁵ Pablo que mbei mbaba tátaa ra. Erasiã mbei que Pablo je ra.

⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra. Mbia que mae nguiatute rei u nguiã erese. Erasiã mbeite que ee ra. Nyebe mbia ucheẽ mbuchebi nguiã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererero que uchuchúaa ra. Urembuquiaru turãte que ra. —Jêitõ mocoĩ jiri, i que ure je ra. Tres días que ureitõ erese ra.

⁸ Publio ru rasite que ra. Eracuta que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote ra.

⁹ Aquere que mbia rasi ngaẽ ngaẽ ja Pablo je cote ra. Ejoõ jenda ja. Dios que embucherõ ja ra.

¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechurã.

Pablo ngasê Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra.

12 Siracusa, i que sucha tubiriã mo je ra. Huee que urecuasẽ nda. Huee que ureitõ mocoĩ nda. Tres días.

13 Hue si que ureso siquiibi cot e ra. Urecuasẽ ngue Regio ra. Huee que ureitõ nda. Isamamĩ ngue quiririã ureichu urequite quiti ra. Canoa maña turã. Co miĩ ngue ureque ama ndiite re ra. Urecuasẽ ngue Puteoli ra. Huee que urequichi bei canoa si cote ra.

14 Jesús quiato mo ngue uretea huee ra. —Jenguchõ na urerese, i que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ.

15 Jesús quiato que jirandu urerese cote ra. Roma jenda. Nyebe ecuã nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose.

16 Urecuasẽ ngue Roma cote ra. Sucha tubiriã tuchi que Roma nda. Soldados rerecua que ecuaa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, i que ee ra. Soldado miĩ ngue Pablo reaquiato bei quia ra.

Pablo Dios cheẽ senei senei Rõmaa

17 Urecuasẽ namo jiri mose que Pablo judíos rerecua munua j a ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose.

18 Romanos ngue ñee tuchi seje ra. “Nandehui esi”, i rei ngue serĩ cote re. “¿Mbaerã nda nandequia re? Mbae icuã mo ngue esaã eãte”, i que serĩ nda. 19 “¡Jẽhuichĩ nda esi jẽ!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheẽ icuã eã ndei judíos rĩ.

20 Nyebe “Jenyu. Tamae jendese. Tacheẽ jẽje”, ae que jẽje ra. Mbia mano je ra quera si, nande chõ ndaque equia co. Ũqui je chõ secuasa riqui nguiã co, i que Pablo judíos je ra.

21 Judíos rerecua que ñee Pablo je ra. —Jerusalén jenda que ucheẽ mbesa eãte imbu ure je ra. Ae ngaẽ ngaẽ nguia hue si, ũqui abe que ñee icuã eãte quia nderĩ nda.

22 Ndechẽ urechandu rã. Mangue chooño eã mbia ñee icuã icuã jeni. Jesús quiato rĩ. Nyebe echeẽ ure je, i que Roma jenda Pablo je ra.

23 —Aque mose ra urechu ndechẽ andu, i que judíos Pablo je ra. Aque mose que ecuã jate cote ra. Pablo chuchúaa. Isamamimbe. Pablo que embaaquiato quiato tuchi ra. Tenda mondo chee. Jesús rĩ ngue eriqui ñee ñee mbia je ra. Moisés chimbesa que esenei senei ee ra. Dios cheẽ mbucheuasa chimbesa abe que esenei senei ee ra. I nda mbia Jesús icua. —Dios quiarei ererecua tuchi, i tuchi que Pablo judíos je ra.

24 Emo emo ngue Jesús isi ra. Pablo cheẽ mose judíos je. Eataque que Pablo cheẽ isiteã teã nda. Ichõiño nei equia ee reaẽ.

25 Pablo cheẽ ndui ja eã ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isaías mbuchẽẽ turã nanderamei je cose ra. Eĩ ngue ñee nda:

26 Eso rã ñee judíos je: “Secheẽ nda jeñandu rei nguiã. Jeñandu eã naanguia rae. Jemae ndei nda erese re.

Jemae eã naanguia ra erese.

²⁷ Jeñia ãtãte.

Aba cheẽ mumba mumba.

Jendesa jemungue munguete.

Secheẽ jẽicua sereãte.

Jemba sereãte seicha rui.

Nyebe aico nguiã jembucheroãte”, i que Dios ra, ere ee,

i que Isaías chimbesa ra, i que Pablo ra.

²⁸ Pablo que ñee mbei ra. —Tacheẽ jẽje, judíos. Judíos eã je ra Dios cheẽ uresenei senei cote. Ñquĩ nguia ra eya tuchi erese. ¶ nda Dios erirõ eicuã si, i que Pablo ra.

²⁹ Pablo cheẽ nĩi ngue judíos choi guiã ñee icuã icuã nyue ra.

³⁰ Dos años ngue Pablo riqui huee ra. Roma. Mbae isiquia que emondo mondo tuchuacha je ra. Huee eico mose. Pablo iate que eriqui ra. Mbia nyoĩ nyoĩ mose erea.

³¹ Mbia mo ngue Pablo cheẽ siquisã eãte ra. Jesucristo rĩĩ ngue eriqui ñee ñee mbia je ra. —Dios ra mbia rerecua tuchi, i que equia mbia je ra. —¿Mbaerã ereico ñee Jesús rĩĩ nde? i eã ngue emo Pablo je ra.

LA CARTA DEL APOSTOL SAN PABLO A LOS ROMANOS

Pablo ucheẽ mbesa mondo Roma jenda je

¹ Co aico co mbesa jêje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icúe ra. Ucheẽ turã nenei nenei sacua.

² —Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra.

³ Dios cheẽ turã nandembiiranduchĩ Jesucristo riĩ cote. Dios riirĩ ndei Jesucristo. David riirina ngue tu íbii cote ra.

⁴ Jesucristo manonde, Espíritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espíritu Turã embuquera nguiã. Mbia mbiirandu randu sacua Dios riirĩ ndese.

⁵ Dios turãte que ure je ra. Jesucristo riĩ. Nyebe ureirabo mingo nguiã ucheẽ nenei nenei sacua. † nda mbia mangu chooñoa jenda abe Jesucristo icua. † nda mbia mangu chooñoa jenda abe Jesucristo cheẽ mumbayã no.

⁶ Sã jê Jesucristo cheẽ jemumbayãte no. Sã Dios jêirabo no. Jesucristo rimbarã.

⁷ Co ambesa mondo quia Rómaa jêje co. Dios chesecua tuchi chõ jê nde. Dios que jemingo icúe uquiatorã nda. Nanderu chõ Dios re. Nandererecua chõ Jesucristo re. Sã ùqui turã mbei riqui jêje. Sã ùqui ndiqui jembia tuchi.

Pablo oso sete raque Rómaa

⁸ —Jesús quiato tuchi chõ ùqui ndiqui re, i jate mbia quia jeniã. Mangu chooñoa jenda abe. Nyebe aico nguiã gracias i tuchi Dios je co.

⁹ Dios cheẽ asenei senei mbeite quia mbia je co. Eriirĩ niĩ. Dios resa rae aico embesa mbesa jêje a. Aico ñee mbeite Dios je jeniã co.

¹⁰ Aico ñee ñee mbeite Dios je co. † nda Dios semondo jendea. Semondose mose ra aso jendea.

¹¹ Seso sete raque jendea. Jembaaquiato quiato sacua Jesús riĩ. Jembirãcuã sacua Jesús riĩ.

¹² Seso sete jendea. Ñimbias sacua nyiese. Nandeico tuchi sacua Jesús rui. Nande Jesús nandeicuate resê.

¹³ Taso jendea, ae beite rei que se quia ra. Taembaaquiato quiato Jesús riĩ, ae rei se. Eĩ nda Jesús jêicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea.

¹⁴ Jesús cheẽ nenei nenei si ahuĩ aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiatuã abe je.

¹⁵ Nyebe aico nguiã icoquiature co, Jesús cheẽ nenei nenei sacua jêje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui rĩ. Aba rirõ sacua mbae icuã si. Judíos je rane ngue Jesús cheẽ quirãcuã nda. Judío eã je abe no.

¹⁷ Jesús cheẽ nandembiirandu quia ã. Nande Jesús icua mose, Dios ra nandeisi turã uquiatorã. Mbae turã mo nandesaã eãte raque.

Ae Jesús icua quia nae, Dios ra ũqui isi turã tuchi.

Ũqui nda siqui bei cote,
i ñi embesa ji re.

Mbia icuã tuchi Dios je

¹⁸ Ae siqui Dios rã eãte nae, ũqui nda Dios mbasi ja. Ae siqui icuãte quia nae, ũqui nda Ibatenda mbasi ja no. Ũqui nandeicuate quia nande co. Ichõĩnosa reã ñee andu sereãte quia ñene.

¹⁹ Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene.

²⁰ Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”, i aroneãte.

²¹ Jirandu tuchi rei que Dios rese resẽ. Ñee turãyã tuchi chõchĩ Dios rĩ. Gracias iã ñochĩ Dios je. Nyebe eriqui nguiã ndua icuã icuã mbei. Nyebe eriqui nguiã itongui rĩ mbei.

²² “Ureaquiature” ichõĩño ñochĩ equia ũqui. Eaquiature ño siqui nguiã ũqui.

²³ Hui tuchi que Dios si ra. Ae manoã mbeite quia, aque si. Sererecua i chõchĩ mbae ao ao ji je cote. Ae ra mano, ũqui je chõ eriquichĩ nguiã “sererecua”, i. Mbia raanguia je. Quiaa rĩnda je chõ eriquichĩ nguiã “sererecua” i. Ae mbebe quia. Ae uchã nguia. Ae nguata quia nguie rese. Ũqui je chõ eriquichĩ nguiã “sererecua” i.

²⁴ Nyebe Dios hui nguiã esi cote. Mbae icuã naa naa mbei sacua cote.

²⁵ Ñee ñooño tuchi Dios rĩ cote. “Nandererecua” i chõchĩ Dios chiao je cote. “Nandererecua” i rocoĩ Dios mĩ je. “Nandererecua” i bei chõ mbichĩ aba quia Dios mĩ je. Amén.

²⁶ Nyebe Dios erecha ja nguiã cote. Oco chooño sacua mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña nongue je. Siqui rocoĩ ngu rese.

²⁷ Hombre mo abe hombre nongue mo osei osei. —Seninisirã nde, i ñee ñee uchue si. Oco oco nyiese. Siqui rocoĩ ngũinisi rese. Icha tuchi Dios si. Nyebe Dios riqui nguiã embasi tuchi co cote.

²⁸ Dios rese jirandu sereã. Nyebe Dios hui nguiã esi. Siqui bei bei sacua ubi icuã ndese. Nyebe eĩ eĩ nguiã nyue mbae icuã ndese.

²⁹ Eicuã tuchi eriqui ũqui. Ico chooño tuchi equia cuña ndese ũqui. Ndua ndua icuã mbei tuchi equia ũqui. —Aque rã nda se chã, i beite equia emo mbae je ũqui. Mbia mbasi chooñote equia ũqui. Mbaecha ucuyã ñooño tuchi equia ũqui. Mbia iquia iquia chooño tuchi equia ũqui. Paama i chooñote equia uchue ũqui. Mbia mbirĩ irĩ ñote equia ũqui. Mbia ucuyã ñooño mbeite equia ũqui.

³⁰ Ñee ñooño mbeite equia mbia mo nĩ ũqui. Dios ucuyã tuchi equia ũqui. Ñee icuã icuã mbeite equia aba cheẽ ndibishorõ ũqui. Ucuasu raã naa ñooñote equia ũqui. “Se quiarei i tuchi”, i beite equia ũqui. Emo mbiacuã icuã mbeite equia ũqui. Ngu cheẽ mumba mumba chooñote equia ũqui. Usi cheẽ abe mumba mumba chooñote equia ũqui.

³¹ Eaquiātuã tuchite ùquĩ. Ucheẽ mumba mumbate ùquĩ. Emo je eturã eãte riqui ùquĩ. Emo icuã si eriqui tesareiate ùquĩ. Eya eã eãte riqui emo ndese ùquĩ.

³²—Ae ùquĩ saã saã nguia mbae icuã nae, ùquĩ nda amondo tata cuasu, i que Dios ra. Dios cheẽ icuare quiatu eriqui nguia mbae icuã naa i ite. —Sã emo abe mbae icuã naa naa nandechabe, i chee chee.

2

Dios mbia cuata tea ja

¹—Dios ra ùquĩ mbasi rã ña, erechĩ nda ùquĩ mbia icuã je. Nde i mose, nde abe ra nde icuã nyecua mbia je. —Seturãte aico co, jerechĩ nda jê! —Ùquĩ ndiqui mbae icuã naa naa ùquĩ, nde i mose, ùquĩ icuã sí chõ eresaã saã nguia nde abe aque.

²—Ae ùquĩ icuã saã saã nguia, ùquĩ tambasi, i mose Dios, Dios ra embasi chooño eã. Maende erese quia ra embasi.

³—Dios ra ùquĩ mbasi rã ña, erechĩ nguia huee. Eraã sí tuchi chõ ereicochĩ nguia ùquĩ sí raã naa aque. Nde abe ra Dios nembasi ùquĩ ndese resẽ.

⁴Dios ia eãte raque aba icuã ndese. Dios aba mbasi jei eã ndaque aba icuã mosebe. Ñimbirãcuãte aba icuã je. Coche ñene, ereã ñochĩ Dios chimbirãcuã mose ndeje. —Eyayã jé nda huiicuã ndese chã, i Dios quia nderĩ co. Nyebe eriqui nguia ñimbirãcuã nde icuã je.

⁵Ndechiã átã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguia aque re. Dios nembasi nonde. Dios mbia icuã mbasi ja mose ra nde abe mbasi.

⁶Aque mose ra Dios mbia mbuchao chao. Emo emo nda emondo tata cuásuu. Emo emo nda emingo bei no.

⁷Ae eturã mbeite riqui, ùquĩ nda Dios mingo bei. Nyoi sete quia Dios rea re. Siqui bei serete quia mbia mingo beisa rese re. Nyebe ra Dios emingo bei cote.

⁸Dios ra paama i tuchi mbia icuã je. Mbasi tuchi rae. Mbia mbicuãsa tuchi quia ùquĩ nde. Dios cheẽ mumbate quiatu nguia. Nyebe ra Dios embasi tuchi.

⁹Ae siqui mbae icuã ndese, ùquĩ ja ra Dios mbasi. Judíos icuã nane nda embasi. Judíos eã abe ra embasi no.

¹⁰Ae siqui mbae turã ndese, ùquĩ je ra Dios turã mbei. Judíos turã nane. Judíos eã abe cote. Mbia ra ùquĩ turã icua tuchi. Dios ra ùquĩ mbia tuchi.

¹¹Co quiatu, i eã nda Dios mbia mo mii je. Mbia mii ndese ra ebia eã. Mae turã ja chõ nda erese.

¹²Ae jirandu eãte Moisés chimbese rese nae, ùquĩ siqui icuã mose ra Dios embasi. Jirandu eãte raque Moisés chimbese rese. Ae Moisés chimbese icua nae, ùquĩ siqui icuã mose ra Dios embasi. Moisés chimbese cheẽ nguire ra Dios embasi.

¹³Ae Dios cheẽ ñandu chooño nguia nae, “taẽisi turã” iã nda Dios ùquĩ je. Ae Dios cheẽ mumbayã nguia nae, ùquĩ nguiatu ra Dios isi turã.

¹⁴Ae judíos eã nae, ùquĩ Moisés chimbese ñandu eã mbeite raque. Ùquĩ mo ae siqui turã turã mbei mbae turã ndese. —Mbae turã nandesã, ite eicua. Dios cheẽ andu eãte raque emo mose.

¹⁵Ae ae chõ mbae turã icua nguia. Mbae icuã abe icua. Mbae icuã naa mose, “eicuã asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no.

16 Aque mose ra Dios ñee Jesucristo je. Ae icuã mbia saã nyecuayã cuayã nguia nae, ùquĩ nda Jesucristo mbuchecua ja cote. Jesucristo ra mbia icuã mbasi mbae icuã nii cote.

Judíos Moisés cheẽ mumba mumba

17 —Judíos chõ ure re, jenyẽ equia ùquĩ. —Moisés chimbesa ra nandemingo bei, jenyẽ chõchĩ equia ùquĩ. —Dios quiarei ebia tuchi ure mii ndese, jenyẽ chõchĩ equia ùquĩ.

18 Ae Dios bite nae, ùquĩ jëicuate quia jë ùquĩ. —Moisés cheẽ ureicuate quia ã. Nyebe mbae turã ureicua jate quia ã, jenyẽ chõchĩ nguia ùquĩ.

19 —Ure mii ño ñeenda Dios icha ureicuachĩ, jenyẽ bei chõchĩ equia ùquĩ. —Itondaru jenda uretesaete, jenyẽ chõchĩ equia ùquĩ.

20 —Mbia aquiatuã urembaaquiato quiatu, jenyẽ chõchĩ nguia ùquĩ. —Mbia aracuayã urembaaquiato quiatu, jenyẽ chõchĩ nguia ùquĩ. Jë Moisés chimbesa jëicua aba reãte quia ùquĩ. —Moisés chimbesa ñee ñooño eãte, jenyẽ raque quia eicua ùquĩ.

21 Jëaracuayã mbia jembaaquiato quiatuchĩ nguia. ¿Mbaerã jeñimbaaquiato iã jë nyii re? —Mbae ra jembuquiachãchĩ, jenyẽ chõchĩ equia ùquĩ. Jë sí chõ mbae jembuquiachã nguia ùquĩ.

22 —Emo ninisi rese ra jëingochĩ, jenyẽ chõchĩ equia ùquĩ. Jë sí chõ jëingo nguia emo ninisi rese ùquĩ. —Ae je mbia riqui “Dios” i chooño nae, ùquĩ ndese ra jëingochĩ, jenyẽ chõchĩ equia ùquĩ. Dios abareã mbae jembuquiachã quiachã ñochĩ nguia ùquĩ.

23 —Dios cheẽ ureicua tuchi quia ure ã, jenyẽ chõchĩ equia ùquĩ. Jë sí echeẽ jemumbate quia ùquĩ. Nyebe mbia riqui nguia ñee turã eãte Dios rii ã.

24 Nyebe embesa ji cheẽ ndiqui nguia ique ã cote. Jë Dios cheẽ mumba mose, judíos eã ndiqui ñee icuã tuchi Dios rii ã.

25 Coche circuncisión jësaã saã nguia Dios je, jëingo bei mose Dios cheẽ ndese. Jëingo eã mose Dios cheẽ ndese, circuncisión naa eã naanguia chõ jëingo nguia ùquĩ.

26 Ae circuncisión saã eã nguia nae, ùquĩ siqui mose Dios cheẽ ndese, circuncisión naande raanguia chõ eriqui nguia ùquĩ.

27 Ae circuncisión saã eã nguia nae, ùquĩ siqui mose Dios cheẽ ndese, Dios ia tuchi chõ ùquĩ ndese re. Eyare rocoi jendese. Jë nguia Dios cheẽ jemumba mumbate nguia. Dios cheẽ jëicuate raque. Circuncisión jësaã saãte raque.

28 Ae judíos Dios cheẽ mumba mumba quia nae, judíos tuchi eã ño ùquĩ nde. Circuncisión naa naa ndaque. Ae circuncisión saã nguia nae, ùquĩ siquiã mose Espiritu Turã ndese, circuncisión turã eã ño ùquĩ nde.

29 Ae Dios isi tuchi quia uchiangui re, ùquĩ nguiarei judíos tuchi. Ae siqui Espiritu Turã ndese, circuncisión tuchi chõ ùquĩ cote re. Ùquĩ je ra mbia achõ ñee turã eã. Dios abe quia ra ñee turã ee.

3

1 ¿Mbaerã judiorã sete riqui mbia re? ¿Mbaerã circuncisión sete riqui mbia re?

2 Eturãte quia mbia je re. Judíos je quiatu ngue Dios ucheẽ mondo nguia. Mbiamo je eã.

3-4 Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbia hui hui raque esi. Mbia ñee ñooño ndaque. I ñi embesa ji re:

Ndecheẽ nda io tuchi mbia resa rae.

Mbia icuã mose ndeje, nde quia ra ere tuchi mbia si, i que embesa ji ra.

5 Jemo ngue ñee no nda: —Dios turãte riqui nandeicuã je co. Mbae icuã nandesaa saã mbei chõ nguia. Mbia mae sacua Dios turã ndese. Dios nandeicuã mbasi mose, Dios icuãte, i chõchĩ jemo. ¿Mañi nande ra ùqui ñee mose re?

6 Ichõiño tuchi chõ ùqui nde. Dios icuã aroneãte. Dios icuã mose, eĩ nda Dios mbia icuã mbasi aroneãte rei.

7 Jemo ngue ñee ño nda. —Nandechẽ ñooño ño nguia jẽ! Nandechẽ ñooño mose, mbia ra ñee turã Dios riĩ. “Ñee ñooñosa reã tuchi quia Dios riqui re,” i ra mbia Dios riĩ cote. Nyebe Dios riqui nguia nandembasi ãte nandechẽ ñooño mose, i chõchĩ jemo.

8 —Mbae icuã nandesaa saã ño. I nda Dios turã nyecua mbia je, i chõchĩ jemo. Urecheẽ ãte ure ùqui ndesẽ. Ae ñee nguia ùqui, ùqui nda Dios mbasi.

Mbia mo eturã eãte

9 Judíos chõ nande re. ¿Nandeturã nda eriqui reĩ mbia mo si re? Tei. Nandeturã eã ño esi re. Nandeicuã ja chõ ñene. Judíos eã icuã ja chõ ñene. Judíos icuã ja chõ eno nde.

10 I ñi embesa ji re:

Emo eturã eãte. Aque mi mo eã.

11 “Dios icha taicua”, iãte emo.

“Dios rese taico”, iãte emo.

12 Mbia que icha icha jate Dios si ra.

Eicuã jate que eriqui ra.

Emo mbae turã mo saã eãte.

Aque mi mo eã.

13 Ùqui quiarei mbia raaque tã tãsa rã.

Aba mbia eã.

Sã eriqui ñee icuã mbei.

Mbia mbiĩri irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

14 Echeẽ icuã achõ tuchi chõ ñene.

Mbia mbiĩcuãsa tuchi chõ echeẽ nde.

15 Mbia iquia chooño ño ñene.

16 Mangue chooñoa ño eriqui nguia mbae icuã naa naa.

Mbia mbiayã ñooño.

17 Ico chooñoa mbei mbia je.

18 Dios rese ndua eã tuchi,

i ñi embesa ji re.

19 Dios que Moisés chimbasa mee ja judíos je ra. Embesa ji mumbayã sacua.

Mbia huĩcuã icua ja sacua. —Dios cheẽ nandemumba tuchi chõ nguia re, i nda mbia ja chã.

20 Emo ñee aroneãte. —Embesa ji amumbayã mbeite quia co. Nyebe ra Dios seisi turã, i aroneãte emo. Dios que Moisés chimbasa mee mbia je ra. Mbia huĩcuã icua ja sacua.

Dios icuasa quia ra siqui bei

¹¹⁻²² Dios que Jesús turã teacuquia nande je cote ra. Ae que mano nandeicua ndiquicharõ sacua nda. Nande Jesús icua mose, Dios ra nandeisi turã cote. Eĩ ja chõ Dios mbia je re. Dios bia eã ño mbia mo mii ndese. —Jẽ Moisés chimbesa mumbayã mose, taẽisi turã, iãte Dios. —Jẽ Jesús icua mose, ùquĩ mose quiatu ra jaẽisi turã, ite Dios. Embesa ji ñiinda abe que ñee ñee Jesús rĩ nyii no nda.

²³ Nandeicua ja chõ ñene. —Aque eturãte, iã nda Dios nandemo je.

²⁴ Nandeicuaate raque. Dios quia eturãte nande je re. —Mbae mo jemondo jẽicua ndibishorõ, i ãte Dios. Jesucristo que mano nandeicua ndibishorõ ndesẽ. Nyebe Dios riqui nguiã mae turã nanderese co.

²⁵ Dios que Jesucristo mondo mbia je ra. Mano sacua mbia icua ndiquicharõ. —Jesús que mano seicua ndibishorõ nda, nande i mose, ùquĩ mose ra Dios nandemingo bei. Dios que mae ñooño mbia icua ndese nyii ra. —Seririĩ nguia ra mano nguiã eicua ndiquicharõ, i que ra. Echeẽ ngue ique cote ra. Dios uturã ndeacuquia mose que echeẽ ique cote ra.

²⁶ Dios riiriĩ ngue mano mbia icua ndiquicharõ nda. Mbia mae sacua Dios turã ndese. Dios turã mbeite. Mbia icua isi turã nonde. Mbia Jesús icua mose ra Dios mbia isi turã.

²⁷ Nande ae ra nandeicua nandembutiã eã. Dios ae quia nandeicua mbutiã nguiã, Jesús icua mose. Nyebe nandeco nguiã nandecuasu raã naa aroneãte. Moisés chimbesa que nandemumba mumbate quia resẽ.

²⁸ Mbia Jesús icua mose, aque mose quia ra Dios mbia isi turã. —Taẽisi turã, jẽ Moisés chimbesa mumbayã mose, iãte Dios nande je. —Jẽ Jesús icua mose, ùquĩ mose quiatu ra jaẽisi turã, ite Dios nande je.

²⁹ Judíos achõ nderecua eã ño Dios re. Judíos eã abe rerecua chõ ñene.

³⁰ Emo abe eãte Dios. Dios mii ño ñene. Ae Jesús icua quia nae, ùquĩ nda Dios isi turã ja. Judíos abe isi, Jesús icua mose. Judíos eã abe isi, Jesús icua mose no.

³¹ Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

4

Abraham abe Dios icua

¹ Nandendua mbiriĩ na Abraham ndese. Nandei ñiinda tuchi quia Abraham nde.

² Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã.

³ I ñi embesa ji re:

Abraham ngue Dios icua ra.
Nyebe Dios eisi turã nguiã,
i ñi embesa ji re.

⁴ Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re.

⁵ Dios chõ mbia icua isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque.

⁶ David abe que ñee nda: “Ae je Dios ñee, ‘ndeturâte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda.

⁷ Co rei David chimbese co:

Ae icuã Dios mbutiã nae, ùquĩ ia tuchi chõ ñene.

⁸ Ae icuã ndese Dios riqui mae ãte nae, eicuãte raque, Dios ra eisi turã.

Ûquĩ ia tuchi chõ ñene,

i ñi David chimbese re.

⁹ ¿Aba icuã ño nda Dios mbutiã ña? Embia sacuã ña. ¿Judíos icuã achõ nda embutiã nde? ¿Ae circuncisión saã nae, ùquĩ achõ icuã nda embutiã nde? Tei. Ûquĩ achõ eã ñene. Abraham Dios icua mose, aque mose tuchi chõ Dios eicuã mbutiã nguiã esi.

¹⁰ Abraham circuncisión naa eã mose chõ Dios eicuã mbutiã nguiã. Circuncisión naa nonde.

¹¹ Abraham Dios icua mose chõ ngue Dios eicuã mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. — Abraham ngue aisi turã nda, i ñe Dios re. Ae circuncisión saã eã nae, ùquĩ abe chõ “seru” i nguiã Abraham je, Jesús icua mose.

¹² Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ûquĩ nyiicua chõ Dios re. Sã Abraham nyiicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

¹³ Dios que ñee Abraham je cose ra. —Ibi tamondo ja ndeje nembraerã. Nderiiri mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je chõ tamondo, i que Dios Abraham ñi nda.

¹⁴ —Nandeico bei mose Moisés chimbese rui, aque mose ra Dios nandemingo bei, i chõchĩ judíos mo. Ûquĩ mose quiatu ra nandeico rei Jesús icua chooño. Ûquĩ mose quiatu ra Dios cheẽ ique ãte rei nande je.

¹⁵ —Ã jësaã saã, i mose Dios, emo echeẽ mumba mose, ùquĩ nda embasi. —Ã jësaã saã, iã mose, emo nda embasiã cote.

¹⁶ Dios turãte quia ñene. Nyebe eriqui nguiã mbae mondo chooño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã.

¹⁷ Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra,

i que embesa ji ra. Dios ra mbia mangue chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ùquĩ nyao no.

¹⁸ —Nderirina tamee ndeje. Eretiiri nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiiri aroneãte raque aba je.

¹⁹ Amei tuchite raque. Cien añote raque. Eninisi abe arite raque. Eninisi rie chuimate raque. —Dios ra seriirina mee seje ucheẽ nguire, i que Abraham

nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda.

²⁰ Abraham ngue “nducuaã” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei que equia Dios riĩ nda.

²¹ —Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda.

²² Nyebe Dios Abraham isi turã nguiã. —Abraham ndiqui seicua tuchite co, i que Dios ra.

²³⁻²⁴ Abraham mii je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mii je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que Jesús raaque mbuquera ra.

²⁵ Dios que Jesús mbu íbii nande je ra. Mano ngue nandeicua ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

5

Nande Jesús icua mose, Dios riqui nandehi turã

¹ ã nandeico Jesucristo icuate ã. Nyebe Dios riqui nguiã nandehi turãte cote. Nyebe Dios riqui nguiã nandehi cote.

² ã nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Ûqui ño nandesaarõ arõ nguiã ã.

³ Ûqui mii eã ño nandehi nguiã. Mbia icua icua ndaque ra nande je, ùqui mose abe chõ nda Dios nandehi no. Mbia icua icua mose nande je, Dios ra nandehi mbucoi turã. Nandeico tochi sacua.

⁴ Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesaarõ arõ na. Sã echeẽ ique rã nande je.

⁵ Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espiritu Turã mondo nguiã nande je. —Dios riqui nyeseicuate jendese co, i Espiritu Turã nguia nande je co.

⁶ Mbae turã ngue nandesaã aroneãte nandehue, aque mose que Cristo mano nande je ra. Nandeicua mbitirõ sacua.

⁷ Mbia mo mano aroneate emo ndibishorõ. Nande turã mose, aque mose abe ra emo mano aroneate nanderibishorõ. Etura tuchi mo ndibishorõ nguia emo mano sete raque reae.

⁸ Cristo quiatu que mano nanderibishorõ nandeicua tuchi mose ra. Nyebe nandeico nguiã ñee: —Dios riqui nyeseicua tuchite nanderese co, i.

⁹ Cristo mano mose que nandeicua mbitirõ cote ra. Ae ra nandemingo icúe Dios mbia icua mbasi mose.

¹⁰ Dios ririĩ ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequitorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichi nguiã nande je cote.

¹¹ Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mii nane ngue siqui nyii ra. Aque rane ngue mbae icua saã nande je ra. Nyebe mbia icua jate riqui nguiã cote. Nyebe Dios riqui nguiã ñee. —Mbia ra mano ja, i cote.

¹³ Mbia que mbae icuã saã saã ndei quia nyii ra. Moisés Dios cheê mbesa nonde. —Dios cheê ngue jemumbachĩ nda, i aroneãte que aque mose ra. Dios cheê mbuchecua iriãte quiatu ngue aque mose re.

¹⁴ Adán nane ngue Dios cheê mumba cose ra. Aque mose bei chõ ngue mbia mbae icuã naa naa nguiã cote. Nyebe mbia riqui nguiã mano mano ja huicua mose cote. Moisés que Dios cheê mbesa chee ra. Moisés embesa nonde que mbia mano mano ja huicua mose ra. Jesucristo rã eã tuchi chõ Adán nde.

¹⁵ Adán nane tuchi que mbae icuã saã nda. Jesucristo quiatu que mbia rirõ nguia mbae icuã si ra. Adán mbae icuã naa mose, aque mose bei que mbia mano mano cote ra. Jesucristo mbae turã naa mose, ae que mbia icuã mbitirõ tirõ cote ra. Dios turã nii. Jesús chisaã nguia rei Adán chisaã na eã tuchi.

¹⁶ Adán ae rane ngue mbae icuã saã cose ra. —Mbia ra mano mano ja cote, i que Dios cote ra. Adán icuã ndese maende. Ae Adán saã icuã nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguiã nandeisi turã, nandeicuã ndese mae ndocoĩ.

¹⁷ Adán ae que mbae icuã saã nyii ra. —Mbia ra mano mano ja cote, Adán mbae icuã naande, i que Dios cote ra. Jesucristo ae que mbae turã saã mbia je cote ra. Mbia icuã mbutiã sacua esi. Ae Jesús turã icua quia nae, ũqui nda Dios mingó turã mbei, ũqui icuã ndese mae ndocoĩ.

¹⁸ Adán ae que mbae icuã saã nyii ra. —Mbia ra mano mano ja cote, i que Dios cote ra. Adán icuã ndese maende. Aquere que Jesucristo mbae turã naa mbia je cote ra. Mano nguiatu ngue mbiã riquicharõ nde. Nyebe Dios riqui nguiã nandemingo bei co cote. Jesús riĩ ae ñene.

¹⁹ Adán Dios cheê mumba mose, mbia mbiã ja que ũqui cote ra. Jesucristo Dios cheê mumbayã mose chõ mbia tubiriã mbuturã nguiã no.

²⁰ Dios que ñee Moisés je ra. —Secheê embesa mbia je, i que ee ra. † nda mbia jirandu tuchi huicua ndese. Mbia icuã i i tuchi mose, eĩ ño Dios turã i i tuchi mbia je no nde.

²¹ Adán mbae icuã naa mose, mbia mbiã ja chõ ũqui nde. —Mbia ra mano mano cote, i que Dios cote ra. Jesucristo que mano nandeicuã ndiquicharõ cote ra. Aque mose que Dios uturã ndeacuia tuchi nande je cote ra. Nandembuturã sacua cote. Nandemingo bei sacua cote.

6

Nandeyasu chõ nandeico nguiã ã cote

¹ ¿Mañi nande ra cote re? ¿Mbae icuã nda nandesã i i re? ¿Dios turã i i sacua nande je re?

² Tei. Dios biãte ũqui. Jesús rese que nandemano ndesẽ. Nandemano ngue mbae icuã naa eã sacua ndesẽ. ¿Mañi nande ra mbae icuã naa naa si re?

³ ¿Jëiranuãte bautizar i rese re? —Jesús resenda tuchi chõ ũqui ndiqui re, i nda mbia bautizar ire nande je chã. Nande bautizar ire, nandemañonde raanguia chõ ũqui nde. Mbae icuã naa eã sacua cote.

⁴ ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

⁵ Nandeico Cristo rese ã. Nandemano mose Cristo rese, nandereco yasu chõ nandeico nguiã erese ã.

⁶ Cristo mbucha mose ira rese, nandeïcuã abe que Dios mbucha ira rese ra. Nande mbae ïcuã oseï chiã sacuã ño ùquĩ nde. Mbae ïcuã nimba nda nandeïco eã cote chã.

⁷ Mbia raaque quia mbae ïcuã saã aroneãte nguiã. Eï nande chõ nguiã mano mose Cristo rese ã. Mbae ïcuã naa aroneã.

⁸ Nandemano mose Cristo rese ira rese, nandemingo bei ra uchiese cote. Ae rã si.

⁹ Cristo que mano nda. Quera si que cote ra. Aquere ra mano siã cote.

¹⁰ Aque mii ngue Cristo mano mbia ïcuã je ra. Quera si que cote ra. Mano si eã ndae. Siqui bei equia Dios rese co.

¹¹ Jendaaque chõ jësaã saã mbae ïcuã je. Jenderecuarã eã mbae ïcuã cote. Jesucristo rese nandeïco tuchite ã cote. Mbae yasu rã ño nandeïco nguiã Jesucristo rese ã cote.

¹² Mbae ïcuã ndese ra jëingochĩ jenderecuarã jë! Jë mba e ïcuã oseï mose, jëteachõ ño jë!

¹³ Jendete ra jemee meechi mbae ïcuã je jë! Dios je quia jendete jemee. Mbae turã naa sacuã. Cristo rese que jemano ndesë. Jëyasu chõ ngue jëquera si Cristo rese resë.

¹⁴ Nandererecuarã eã nda mbae ïcuã cote. Moisés chimbessa rui eã ño nandeïco nguiã ã cote. Dios turã ndui ae chõ nandeïco nguiã ã cote.

Mbae turã nimba chõ nandeïco cote

¹⁵ Dios turã ae nandemingo nguiã. ¿Ûquĩ mose ra mbae ïcuã nandesã saã nde? Tei. Dios biãte ùquĩ.

¹⁶ Nande nandechimondo mose mbae ïcuã je, mbae ïcuã nda nandererecuarã cote. Mbae ïcuã nda nandeïquia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote.

¹⁷ Jëingo bei que mbae ïcuã ndese jenderecuarã nyii ra. Mbia Jesús cheë nenei nenei mose jëje, jëisi turã ño ngue cote ra. ã jëingo echeë mumbayã ã cote. Nyebe aïco nguiã gracias ïte Dios je co.

¹⁸ Dios que jendirõ mbae ïcuã si cote ra. Mbae ïcuã ndese ra jëingoã cote. Mbae turã ndese bei ra jëingo cote.

¹⁹ Secheë ambuchecua tuchi quia jëje co. Jë eïcua tuchi sacuã. Jendete que jemondo tuchi mbae ïcuã je nyii ra. Jë ngue jëingo i i tuchi mbae ïcuã ndese nyii ra. Jendete jemondo Dios je cote. Mbae turã naa i i sacuã cote.

²⁰ Mbae ïcuã mbaerã ño jëingo nguiã cose. Mbae turã ngue jësaã aroneãte quia aque mose ra.

²¹ Jëireïte mbae ïcuã naa naande cote. Jenyisaã saã mbae ïcuã ñiinda, ùquĩ ngue mbae turã mo mondo ãte jëje resë. Ae mbae ïcuã saã i ïte quia, ùquĩ nda mano.

²² Dios que jendirõ mbae ïcuã si cote ra. Dios rimba chõ jë cote re. Nyebe Dios jemingo nguiã icúe mbae ïcuã si. Nyebe ra Dios jemingo bei ïbate manonde cote.

²³ Ae mbae ïcuã saã saã nguia nae, ùquĩ nda Dios mbasi bei manonde. Ae Jesucristo icua quia nae, ùquĩ nguiatu ra Dios turã mingo bei. Mbae turã naa eã ndaque. Dios turãte quia ee re.

7

Eraaque rã ño nandeïco nguiã Moisés chimbessa je cote

¹ Sã jenderecua ibi jenda mo no. Echeë jemumba aroneate no. Jemano mose, jenderecuayã nda cote.

2 Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquĩã erese cote. Aque mose ramo nda ae ae riqui cote.

3 Ngu reco mose, siqui aroneãte emo ndese. Siqui mose emo ndese, Dios cheẽ mumba chõ ùquĩ nde. Eru mano mose, aque mose quiatu ra ngu mo ndea cote. Dios cheẽ mumba eã ño ùquĩ nde.

4 Eraaque rã ño jẽingo nguiã Moisés chimbesa je ùquĩ cote. Cristo quiatu que mano jeniã nda. Quera si que jeniã no nda. Cristo rese chõ jẽingo nguiã ùquĩ cote. Dios je mbae turã naa naa sacuaã ño jẽingo nguiã erese ùquĩ cote.

5 Nandeico mose mbae icuaã ndese nyii, mbae icuaã achõ ño ngue nandehosei chousei quia aque mose ra. Nandebi tuchi que Dio s cheẽ mumba mumba aque mose ra. Nyebe que nandeico mbae icuaã naa i i tuchi aque mose ra. Eĩ nda nandeicuaã nandeiquia rei aque mose. Espiritu Turã nandembiasu eã mose.

6 Eraaque rã ño nandeico nguiã Moisés chimbesa je ã cote. Moisés chimbesa rui eã ño nandeico nguiã ã cote. Dios cheẽ miã ndui chõ nandeico nguiã ã cote. Espiritu Turã nguiatu ngue nandembiasu nguiã. Espiritu Turã ño nandembaaquiatu nguiã ã cote. Moisés chimbesa achõ eã ño cote re.

7 —Moisés chimbesa icuaãte, ae ãte raque quia co. Moisés chimbesa quiatu que sembiirandu seicuaã ndese resẽ. —Eicuãte quia emo mbae osei osei riqui re, i que Moisés chimbesa ra. Eĩ nda seiranuãte rei ùquĩ ndese. Moisés chimbesa eande ndae. Moisés chimbesa ae ngue sembiirandu nguiã ùquĩ ndese. —Eicuãte ùquĩ, i seje.

8 Moisés chimbesa sembiirandure mbae icuaã ndese, mbae icuaã achousei i i tuchichĩ cote. —Mbae icuaã nda jesaã saãchĩ, i mose chõ mbae icuaã achousei i i tuchichĩ cote. Emo Moisés chimbesa icuayã mose, mbae icuaã abe ra eicuayã no.

9 Moisés chimbesa que aicuayãte quia nyii ra. Seturã aico reĩ aque mose. Moisés chimbesa que aicua cote ra. Eicua mose que echeẽ amumba i i tuchi cote ra. Ùquĩ mose que seicuaã aicua cote ra.

10 Mbia mingõ bei sacuaã ndaque Moisés chimbesa. Ae que semingo bei eã nda. Moisés chimbesa amumba mumba bei chõchĩ. Nyebe aico nguiã isho tuchi Dios si aque mose.

11 Seicuaã ño ngue sembiirĩ irĩ mbei quia nyii ra. Se Moisés chimbesa icua mose, seya eã tuchi que aque mose cote ra. Seicuaã nda seiquia chee, ae que se ra.

12 Moisés chimbesa turãte raque. Dios cheẽ ndaque.

13 Moisés chimbesa turãte. Ùquĩ je eã ngue Dios paama i seje ra. Seicuaã ae quiatu que Dios mbupaama i seje ra. Moisés chimbesa que sembiirandu tuchi seicuaã ndese ra. Se Moisés chimbesa turã icua mose, ùquĩ mose que seicuaã Dios mbupaama i seje ra. Nyebe Dios Moisés chimbesa mee nguiã nande je. Nandeicuaã mbuchecua tuchi sacuaã nande je.

Nandechianqui renda icuaã ño nandeisi isi nguiã

14 Moisés chimbesa turãte raque. Se ae seicuaã nde. Mbia chõ se re. Moisés chimbesa amumba mumba chõchĩ nguia co.

15 Mbae turã asaã mbite raque. Mbae icuaã asaã eã mbite raque. Mbae icuaã nguia seisi isite nguiã. Mbae turã uquia reã. ¿Mbaerã aico mbae turã naa eãte re?

16 Ae asaã sereãte quia nae, ùquĩ asaã mbeichĩ. Moisés chimbese turãt e raque. Aico echeẽ mumba mumba beichĩ.

17 Se ae chõ eã ño aico nguiã mbae icuã naa naa co. Sechiangui renda icuã nguiã “mbae icuã esaã saã”, ite nguiã seje co. Nyebe aico nguiã mbae turã mo naa eã mbeite co.

18 Seicuã tuchi chõchĩ se. Seturã mo eã tuchichĩ se. —Mbae turã tasaã, aete raque quia co. Aico mbae icuã naa naa mbei chõchĩ co.

19 Sebite raque mba e turã. ¿Mbaerã aico mbae turã naa eãte re? Sebiãte raque mbae icuã. ¿Mbaerã aico mbae icuã naa naa mbeite re?

20 Se ae eã mbae icuã asaã saã nguiã. Sechiangui renda icuã nguiã “mbae icuã esaã saã” ite nguiã seje. Sechiangui renda icuã ño seisi isi nguiã mbae turã si co.

21 “Mbae turã tasaã”, i mose se, mbae icuã ño seriquisã quisãchĩ nguiã co.

22 Sebite raque Dios cheẽ sechiangui re.

23 —Dios cheẽ ndese taico, ae rei nguiã sechiangui re co. Sechiangui renda icuã nguiã seriquisã quisãte nguiã. Nyebe aico nguiã mbae icuã naa i ite.

24-25 Dios cheẽ ndese aico sete raque. Sechiangui renda icuã nguiã semingo beite nguiã mbae icuã ndese. Seraaquete aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

8

Espíritu Turã ndiqui nandembui mbae icuã si

1 Ae Jesucristo icua quia nae, ùquĩ nda Dios mbasiã mbei.

2 Nande Jesucristo icua mose, Espíritu Turã nda nandechiã mbiasu. Espíritu Turã nda siqui nanderese, mbae icuã naa eã sacuã. Eĩ nda nandemano mbeite rei, mbae icuã naa naa mbei mose.

3 Moisés chimbese que nanderirõ aroneãte mbae icuã si ra. Echeẽ nguiatu ngue nandembuyã aroneãte nguiã. Mbiate quiatu ngue nande re. Nandequirãcuã nea. Díos que ndua nanderese ra. Nyebe nguiirĩ mondo nguiã nande je. Mbia rã ngue Jesús ru íbii ra. Mbia icuã jate raque. Ae mii ngue eicuã eã nda. Ae que mano nandeyã ndiquicharõ nda. Nyebe nanderereca eã ño mbae icuã cote re.

4 Jesús que mano nande je ra. Nyebe mbae icuã ñimbirãcuã eãte nande je cote. Nyebe Dios cheẽ nandembuyã arondete namo cote. Espíritu Turã ndui chõ nandeyã nguiã cote. Mbia icuã ndui eã ño nandeyã nguiã ã cote.

5 Ae siqui quia Espíritu Turã ndese nae, ùquĩ ño siqui nguiã Dios cheẽ ndui si. Ae siquiã nguiã Espíritu Turã ndese nae, ùquĩ ño siqui nguiã uchiangui renda icuã ndui si.

6 Ae siqui quia Espíritu Turã ndese, ùquĩ ia bei ra eriqui. Siqui bei rae. Ae siquiã nguiã Espíritu Turã ndese, ùquĩ nda siquiã. Mano ndae.

7 Nandechiangui renda icuã nguiã siqui icuã icuã mbeite nguiã Dios je. Nandechiangui renda icuã nguiãrei Dios cheẽ mumbayã aroneã.

8 Ae siqui bei quia uchiangui renda icuã ndui, ùquĩ siqui aroneãte Dios cheẽ ndui.

9 Eĩ jenyẽ eãte raque jẽ. Espíritu Turã ndui chõ jẽingo nguiã jẽ. Espíritu Turã nguiã siqui nguiã jeñiangui re. Espíritu Turã siquiã mose emo ñiangui re, Cristo rimba eã ño ùquĩ nde.

10 Jesucristo riqui jeñiangui re ùquĩ. Jendete ra mano ndaque mbae icuã je. Espíritu Turã nda jeãingue mingõ bei ibate. Díos quiatu ngue jẽisi turã nguiã.

11 Dios que Jesucristo raaque mbuquera ra. Eĩ si ra Dios nanderete raaque mbuquera Espíritu Turã quirãcuã je no. Eĩ si ra nanderete mbiasu, Espíritu Turã siqui mose nandechiangui re.

12 Nandechiangui renda icuã ndui nandeico aroneãte cote.

13 Nandechiangui renda icuã ndui nandeico mose, nandemano mbei ra equia. Espíritu Turã nandebi icuã mbutiã mose, nandemingo bei rae.

14 Ae je Espíritu Turã ndiqui ñee nae, “eĩ jenyee” i nae, Dios rimba chõ ùqui nde.

15 Nande Espíritu Turã isi mose, aque mose bei chõ Dios riirĩ nande cote re. Dios rimbachõ eã ño nande cote re. Dios riirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. —Paba, nande chõ nguiã e e co cote.

16 —Dios riirĩ tuchite jẽ, i chõ Espíritu Turã nguiã nandembiirandu tuchi. —Dios riirĩ tuchi rei nande re, nande chõ nguiã nande abe nandechiangui re co.

17 Dios riirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeico turã mbei erese ibate cote.

Mbae turã mbei jee ra nande je nandeico mose ibate

18 Mbía ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeico bei mose ibate.

19 Dios ra huicuaa mbuchecua ja aque mose. —Co rei seicuaa co. Co abe no. Co abe no, i ra Dios aque mose. Ùqui ño nandesaarõ arõ nguiã ã. Ae Dios chao mbae ja, ùqui abe riqui ùqui ndaarõ arõ ã.

20 Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que mbae mbicuaã ja Adán mbae icuã naa namo mose ra.

21 Eĩ mbei eã nda mbae. Mbae ra nimbitorõ ja cote. Ñimbiasu ra cote, Jesús tu mose ibii cote. Mbae ra manaõ cote. Mbae ra shi eã cote. Jesús quiato rese ra mbae nyicuabo ja aque mose cote.

22 Dios chiao ra nyicuabo ja aque mose. Dios chiao ia eãte quia namo nde. Æquẽ ndasi rá ño eriqui nguiã namo. Nyebe ra Dios uchiao mbiasu ja cote.

23 Dios que Espíritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchicuabo tuchi uchiao ja rese cote. Namõ ño nanderasi rasi re. Nandeya eãte abe no. Nandembuchicuabo mose, nanderete abe ra embiasu.

24 —Jendete tambiasu, i que Dios nanderirõ mose mbae icuã si ra. Ùqui ño nandesaarõ arõ nguiã ã. Nanderete yasu eãte namo. Nyebe nandeico nguiã eraarõ arõ ã.

25 —Jendete tambiasu, i que Dios nande je ra. Nyebe nandeico nguiã eraarõ arõ mingue ã.

26 Nandequirãcuã neate nande. Nyebe Espíritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechee ñdequia requia mose chõ nandeico nguiã iabu abu. Nandeiahu mose chõ Espíritu Turã ndiqui nguiã ñee turã Dios je nanderiã. Nandeuru ñee Dios je nandechiangui re.

27 Dios mbia chiã icua jate quia co. Espíritu Turã ñee mose Dios je nandeuru, Dios echeẽ icua chõ nguiã aque. Dios cheẽ ndui si chõ Espíritu Turã ndiqui nguiã ñee Dios je Dios icuaa riã.

²⁸ Ae nyesequa quia Dios rese, ũquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndua quiatu ngue erese nyii re.

²⁹ Ae res e Dios riqui nduate nyii nae, ũquĩ ngue Dios mingo icúe nyii ra. Jesucristo rã si embiasu sacua. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote.

³⁰ Dios que ndua nanderese nyii ra. Aquere que nandemingo icúe umbaerã cote ra. Nandeisi turã ngue cote ra. —Mbia tamumae turã ja jendese jëingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resẽ. Nyebe ra emo ñimbirãcuã eã nande je cote.

³² Dios que nguiirĩ mii mondo nande je ra. Mano sacua nandeicuã je. Eĩ nda mbae mondo ja nande je no. Sã nguiirĩ mondo nande ja je no.

³³ Dios chesequa tuchi chõ nande re. Emo ñee icuã aroneãte nande je. Dios quiatu ngue nandeisi turã nguiã.

³⁴ Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderiĩ Dios je hue cote. Nyebe emo ndiqui nguiã ñee icuã aroneãte nande je cote.

³⁵ Mbae mo Dios mbesarei aroneãte nandesĩ. Nyesequa beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nanderiãrao eã arondete raque. Mbia nandequia arondete raque. Ũquĩ ja ra Dios mbesarei eã tuchi nandesĩ.

³⁶ Mbia icuãte riqui nande je ã. Sã embesa ji riqui i no:

Nderiĩ ño mbia riqui nguiã ureiquia seri mbeite ã.

Oveja iquia iquia rã ño eriqui nguiã ure je ã,
i ñi embesa ji re.

³⁷ Mbia icuã icuãte raque nande je. Ñimbirãcuã eã mbei ra nande je. Jesucristo quia siqui nguiã nanderese co. Nyesequa beite quiatu nguiã nanderese co.

³⁸⁻³⁹ Dios nyesequa tuchite quiatu nguiã nanderese co. Dios hui aroneãte nandesĩ. Mbia nandequia iquia mose, aque mose abe Dios hui aroneãte nandesĩ. Mbae mo nda embui eã nandesĩ. Angeles. Aba checuayã icuã. Mbia rerequa. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chiao mo. Ũquĩ ja ra Dios mbui eã nandesĩ. Dios quia nyesequa tuchite nguiã nanderese Jesucristo rĩ co.

9

Dios que judíos mii icúe umbaerã tuchi ra

¹ Jesús icuasa chõ se resẽ. Aico ñee ñooño eãte co resẽ. Espiritu Turã abe riqui sembiirandu sechiangui re co resẽ.

² Seya eãte aico co. Seya eãte aico judíos rese co.

³ Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu, judíos mingo bei sacua Jesús rese. Eĩ ndei ra sesose rete tata cuasu judíos rendaque re. Seresenda tuchite quia ñene.

⁴ Israel ndei judíos i tuchi. Seriirĩ, i rei que Dios judíos je ra. Dios que uquirãcuã teacuquia rei judíos je ra. Dios que contrato saã ndei judíos je ra. Moisés chimbesa que judíos quereco rei ra. —Eĩ jenye chõ ñee seje, i rei que

Dios judíos mbaaquiату quiату ra. —Mbae turã nda asaã saã mbei quia jêje, i bei que Dios quia judíos je ra.

⁵ Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶ Dios turã tuchi raque judíos je. Judíos que siquiâte Dios rese cote ra. Dios quiatu que ucheë mbuchebiã ndei ee ra. Ûquĩ mo nguiatu que judíos tuchi eã nda. Siquiã tuchi que Dios rese ra.

⁷ Abraham ndiirĩ nyeremo ndei que ra. Ismael. Isaac. Ûquĩ nyeremo ngue eriirĩ ja rei ra. Dios que Isaac mii isi ra. —Abraham ndiirĩ, i eã ngue Dios Ismael riirĩ je ra. —Abraham riirĩ, i chõ ngue Dios Isaac ndiirĩ je ra. Isaac ndiirĩ jaje que Dios “judíos” i cote ra.

⁸ Abraham ndiirĩ nducucha que Dios isi turã ja eã ndese. Ae Dios cheë isi turã nguia, ùquĩ je chõ Dios riqui nguiã “seriirĩ” i.

⁹ Dios que ñee Abraham je ra. —Tenda nongue ra achu. Aque mose ra ãquẽ nacuĩ mo nyaacuquia neninisi Sara je, i que Dios Abraham je ra.

¹⁰ ãquẽ ngue tiarõ cote ra. Isaac, i que ee ra. Isaac que ngüinisi tea chee ra. Rebeca, i que eninisi je ra. Eata riru rerequia mose que Dios ñee ee ra.

¹¹⁻¹² —Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriirĩ mbae icuã naa nonde. Mbae turã abe naa nonde. —Co chõ faisí, i que Dios ra. —Co chõ taisí, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene.

¹³ Dios que ñee Rebeca riirĩ ñii nda. Ûquĩ nyeremo ñii: Jacob ndese chõ aio nguiã nyesecua.

Esau rese achesecua eãte, i que Dios ra, i que embesa ji ra.

¹⁴ ¿Mbaerã Dios riqui aque mii irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque.

¹⁵ Sã Dios ñee Moisés je nyii no: Seya eãse mose emo ndese, seya eãte erese. Setutãse mose emo je, seturãte ee, i que Dios Moisés je ra.

¹⁶ —Dios turã naa nda seje chã, i mose emo, ùquĩ je eã ño Dios turã ndiqui nguiã. Ae mbae turã saã saã ndei quia, ùquĩ je eã ño Dios turã ndiqui nguiã. Ae rese Dios ia eã ndiqui, ùquĩ je quiatu Dios turã ndiqui nguiã.

¹⁷ Sã faraón no. Egipto jenda rerecua. Dios que ñee ee ra. —Aremii ngue mbia rerecuarã nda. Sequirãcuã ndeacuquia sacuã mbia je. Mbia jirandu ja sacuã serese, i que Dios faraón je ra.

¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹ Jemo nda ñee seje reae. —Dios ae emo ñiã mātã mose, ¿mbaerã nda jeñee asi echiã ãtã je re? i ra jemo ñee seje reae.

²⁰ Dios cheë nandesobeishĩ aroneãte. Sã nandembaecua ñio ñee aroneãte uaosa je no. —¿Mbaerã seraã eĩ nde? i aroneãte ñio ñee uaosa je no.

²¹ Ñio aosa ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosa rã ño Dios re.

²² Ae icuã ñe icuã mbeite riqui Dios je nae, ùquĩ je Dios siqui mingue i ite co. Ûquĩ nda nyoi je tata cuasu. Ûquĩ Dios mbasi serĩte cote.

²³ Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandeao ucheseuarã nda. Nandeico sacua erese.

²⁴ Diobi chõ nande re. Dios que nandeirabo ra. Nandemo ndei judíos. Judíos eã abe abe. Dios chiirabo ja chõ nande re.

²⁵ Sã Oseas Dios cheẽ mbesa no:

Ae serimba eã nyii nae, ùquĩ nda serimbarã cote.

Ae rese mbia nyesequayã nyii, ùquĩ ndese ra achesequa tuchi se cote.

²⁶ “Seresenda eã ño jẽ nde”, i que Dios ñee ee nyii ra.

Hue jenda sí je ra Dios ñee cote.

“Seresenda chõ jẽ cote re”, i ra Dios si ñee ee cote,

i que Oseas Dios cheẽ mbesa ra.

²⁷ Eĩ ngue Isaías Dios cheẽ mbesa cose ra:

Judíos tubirĩa tuchite raque rae.

Siqui ja eã nda Dios rese.

Co mii mii ño nda siqui erese.

²⁸ Dios quia ra uquiatoã mbasi ja ibi jenda cote.

Mbasi jei ra cote, i que Isaías embesa ra.

²⁹ Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.

Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.

Gomorra jenda abe no,

i que Isaías embesa ra.

Judíos siqui sereã Jesús rese

³⁰ Tacheẽ nyecua jẽje. Ae judíos eã nae, ùquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echĩã mbitirõ cote ra.

³¹ Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheẽ ndese re.

³² —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã.

³³ Eĩ ngue embesa ji Dios cheẽ nda:

Serucucha que amii judíos rae ra.

Judíos ra eisiteã.

Judíos ra cuã i nyoi ee.

Ngoi ra echoi cuã i mose ee.

Sita rã ño serucucha ee re.

Ae serucucha icua quia nae, ùquĩ nguia ra ngoi eã nyoi.

“Dios rucucha aisi jirichĩ nguia no”, i eã nda Cristo icuasa mo ñee,

i que Dios cheẽ mbesa ji ra.

10

1 —Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co.

² Judíos siqui sete raque Dios cheẽ ndui. Ñeenda quia eicuayãte nguiã Dios icha.

³ —Dios ra nandechiã mbitirõ Jesucristo riĩ, i eã ñochĩ. Ae ae uchiã mbitirõse chõchĩ. Jesucristo icua sereã nea mbei chõchĩ. Nyebe Dios riqui nguiã echiã mbitirõ eã mbei.

⁴ Jesucristo tu nonde que judíos siquise tuchi Moisés chimbresa rese ra. Jesús que tu lbii cote ra. —Moisés chimbresa rui jëingo mose, taembitirõ turã, i ate que Jesús ra. —Seicua mose quiatu ra jaembitirõ, i que ra.

Sã mbia siqui ja serese, i Dios

⁵ —Emo mbae icuã mo saã eã mbei emo mose, ùquĩ nda Dios mingo bei, i rei que Moisés ra.

⁶⁻⁷ ã nandeico Jesús icuate ã. Nyebe ae riqui nguiã nandemingo bei i ite ã. Nyebe nandeico nguiã ñee ãte. —Aba quia ra oso Jesús reru ibate si nande je, i ate. —Aba quia ra oso mbia raaque rea, Jesús mbuquera sacuã, i ate nande mo.

⁸ ã ureico Jesucristo renei nenei mbia je ã. —Jë Jesucristo icua mose, jëingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jiite a. Echeẽ aba chiicua bite aba chiangui re, i ra Jesucristo icuasa ñee.

⁹ —Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechiangui re. Nde i mose, Dios ra nemingo bei.

¹⁰ Emo Jesucristo icua mose uchiangui re, Dios ra echiã mbitirõ. —Jesucristo aicua quia co, i mose, Dios ra esirõ mbae icuã si.

¹¹ —Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda.

¹² Dios quia mbia ja rerecua tuchi re. Judíos achõ ndeēcua eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee.

¹³ Sã embesa ji riqui i no:

“Paba, seicuã embitirõ”, i mose emo, Dios ra ùquĩ mingo bei tuchi, i que embesa ji ra.

¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese.

¹⁵ Dios mbia mo mondo eã mose echeẽ nenei nenei sacuã, echeẽ nenei nenei aroneãte. Sã embesa ji riqui ñee no. Eĩ si chõ ñene: Aba bite emo tu mose Dios cheẽ nenei nenei ure je.

Ureya tuchite erese, i que embesa ji cose ra.

¹⁶ Mbia miĩ miĩ ño siquichĩ Dios cheẽ turã ndese ùquĩ. Sã Isaías ñee no: Dios, mbia que urecheẽ ñandu sereãte ra, i que Isaías embesa ra.

¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangue chooño eã ngue echoi Dios cheẽ nenei nenei ndesẽ.

¹⁹ ¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no: Dios rei se. Judíos eã ndese taico turã.

Mbia aquiatuã taisi serimbarã. Judíos nda queteã tuchi serese chã, i que Moisés Dios cheẽ mbesa ra.

²⁰ Isaías abe que Dios cheẽ mbesa ra. ã ngue embesa ra:

Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra,

i que Isaías siquicheãte Dios cheẽ mbesa ra.

²¹ Isaías que ñee judíos je no nda:

Dios riqui ñee jêje co. “Jêingo serese”, ae beite raque se quia judíos je co.

Secheẽ mumba bei chõchĩ.

“Jêingo serese”, ae beite raque quia secheẽ mumbasa je co,

i que Dios ra, i que Isaías Dios cheẽ mbesa ra.

11

Dios ia eãte judíos rese

¹ Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re?

² —Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jêtesarei chõ Elías cheẽ si Dios je re? Elías que ñee icuãte judíos ataque rĩĩ a que mose ra.

³ —Dios, judíos que ndecheẽ nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos sei quia chee, i rei que Elías Dios je ra.

⁴ Dios que ñee Elías je cote ra. —Nde mĩĩ eã ño serimba re. Serimba tubiriãte nyesẽ. Siete mi l serimba que ngoi eãte nguiã ndese ñee ñee Baal naanguia je ra, i que Dios ñee Elías je cose ra.

⁵ Eĩ ño namo abe re. Judíos emo emo ño siqui nguiã Dios rese ã. Ûquĩ mĩĩ ño Dios chiirabo ùquĩ nde. Uturã je chõ Dios ùquĩ irabo nguiã.

⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eãte rei uturã je.

⁷ Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereãte que equia ra. Co mĩĩ ño ngue Dios irabo uquiatorã nda. Eataque que Jesucristo icua sereãte quia ra.

⁸ Sã embesa ji riqui ñee no:

Dios que embaaracua eã nda.

Nyebe mbae icua eãte nguiã, mae mose Dios chiao rese.

Nyebe Dios cheẽ icua eãte nguiã eandu mose no,

i que embesa ji cose ra. Eĩ mbei chõ namo abe re.

⁹ David abe que ucheẽ mbesa ra. Eĩ ngue embesa ra:

Sã eya chooño umbae tubiriã ndese.

“Nandeico turãte ã”, sã i, siqui icuã mose.

Sã Dios embua tuchi embasi mose.

¹⁰ Sã eresa nyiati ati bei.

Mae eã sacuã.

Sã mbae usi riqui eituquia bei,

i que David ñee nda.

¹¹ Judíos que Dios cheẽ secha rei ra. Uba je quia ra ecuaẽ Dios rese. Dios si judíos hui mose quiatu que judíos eã siqui arõte Dios rese cote ra. Dios judíos

eã mingo bei tuchi sacua cote. Judíos ra queteã tuchi chee Dios rese cote. Uba si sacua erese cote.

¹² Judíos que Dios cheẽ isiteã nda. Nyebe mbia judíos eã ja Dios cheẽ andu ja nguiã cote. Judíos Dios cheẽ mumba mose, Dios que uturã teacuquia ja mbia mangue chooñoa jenda ja je cote ra. Judíos uba si mose Dios rese, mbia mangue chooñoa jenda ra siqui tuchi Dios rese cote.

Judíos eã ño Dios cheẽ isi

¹³ Jêje judíos eã je aico Dios cheẽ nenei nenei a. —Judíos eã je eico secheẽ nenei nenei, i que Dios semondo ra. Nyebe aico nguiã Dios cheẽ nenei nenei sete.

¹⁴ Judío chõ se no nde. Sã jê jêingo Dios rese no jê. Sã judíos abe riqui Dios rese jê na si. Dios erirõ sacua mbae icua si.

¹⁵ Judíos Dios isiteã mose que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiatorã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si rã tuchi ra aque mose cote.

¹⁶ Sã mbia mo mbichae raã no. Mbichae ñinda uchi turã mose, eruinda abe ra uchi turã no. Mbichae ñinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eririã abe uba chee Dios rese no. Ei turã mose, erãquiã abe ra eturã no.

¹⁷ Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Ũquiã naquiã nendaque re chõ ngue Dios jemĩ nda. Jê judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jê.

¹⁸ Jjenguasu ra jêsaã saãchĩ judíos je jê! iDios jêisi turã mose jê! Erãquiã injertar i ji rã achõ ño jê nde. Erãquiã nda hui mingo eã. Ei quia nda erãquiã mingo nguiã. Erãquiã na ño jêingo nguiã jê.

¹⁹ —Olivo rãquiã ngue Dios chisia urembucha sacua ei rese, jjenyechĩ nda jenguasu raã naa jê!

²⁰ Dios que echisia sia Jesucristo icua sereã mose ra. Jê Jesucristo icua mose chõ ngue Dios jembucha olivo i rese ra. Jemingo bei sacua. Nyebe jêingo jenguasu raã naa eã. Jêireĩ ireĩ jiri quia Dios si.

²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jê abe Jesús icuayã mose.

²² iSã Dios turãte mbia siqui mose erui no jê! iSã mbia mbasi echeẽ mumba mose no jê! iSã eturãte jêje ño jê! iJêingo bei chõ Dios turã ndese jê! Jêingo eã mose Dios rui, Dios ra jemombo. Ira rãquiã sia ji mombo rã si.

²³ Judíos uba si mose Dios rese, Dios ra embucha si esiasa rese. Injertar i si ra ee. Dios mĩ ño eaquiatu ũquiã naa nde.

²⁴ Judíos eã ño jê nde. Olivos turã naquiã eã ño jê nde. Olivo mbuae rãquiã na ño jê nde. Dios ae que jembucha nguiã olivo i rese. Injertar i jêje. Ae Dios nyisia nyii nae, ũquiã nda Dios mbucha si uchisia rese.

Judíos abe ra siqui chee Jesús rese

²⁵ Tacheẽ nyecuayã na jêisaa. Mbia chiicuayã tasenei na jêje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã nguia siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote.

²⁶ Aque mose ra Dios judíos rirõ ja huiacuã si cote. Sã embesa ji riqui i no: Mbia mbuturãsa ra tu Sion si.

Ae ra Jacob ririĩ sirõ ja huĩcuã si. Judíos rirõ ja huĩcuã si.

²⁷ Aque mose ra judíos icuã ambutiã ja esi.

Secheẽ nda ique aque mose cote, i que Dios ra, i que embesa ji ra.

²⁸ Judíos yete tuchi chõ Jesús cheẽ turã ucuayã nguiã ùqui. Nyebe Dios uturã ndeacuquia nguiã jêje. Judíos eã je. Dios quia nyesequa beite nguiã judíos rese. Irabo que nyii ra. Eramei ja riĩ ño Dios judíos irabo nguiã.

²⁹ —Mbae mo tamee jêje, i mose Dios, mondo rae. Dios ra uchimondo sirombe eã. Dios ra huĩ eã mbei uchiirabo si.

³⁰ Jesucristo que jêicuayãte quia nyii ra. Judíos huĩ mose Dios si, Dios que uturã teacuquia jêje cote resẽ.

³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je.

³² Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —¿Mbaerã Dios ùqui naa nde? nande aroneate. Dios chisaã nandeicua aroneate quia ã.

³⁴ ¿Emo ndua ndua quia Dios rã nde? ¿Emo mose mbia riqui Dios mbaaquiato re?

³⁵ ¿Emo nane mbae mo mondo quia Dios je re? ¿Dios mbae mondo nonde re?

³⁶ Dios ae que mbae chao ja ra. Umbaerã ño echao ja nguiã mbae. Ae quia ecuasú jiri mbae ja si re. Nandechẽ turã mbei ra equia eriĩ. Amén.

12

Je sí chõ jeñimondo Dios je

¹ Dios ia eã mbeite riqui nanderese co. Nyebe jẽ sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite ùqui. Dios que mbae mondo tuchi nande je ra. Eĩ nande chõ ñimondo ee ae.

² ¡Jesús quiatoã na nda jẽingochĩ jê! —Nde rã si semundua ndua ramo, Paba, jenyẽ chõ nguia Dios je. Eĩ jenyẽ mose ra Dios ñeenda huĩcha teacuquia jêje. —Eĩ jenyẽ, eĩ jenyẽ chõ, i bei ra Dios quia jêje cote.

³ Dios turã ngue seirabo ucheẽ nenei nenei sacuaã jêje ra. Nyebe aico nguiã jembiiirandu randu co. —Se jiri quia mbia si re, jjenye tuchite chí na jê! ¡Endua ndua turã ño ndechue jê! Dios nembaaquiato tuchi mose, ebite quia nde re.

⁴⁻⁵ Mbae tubiriãte nanderete rese. Nanderesa. Nandeo. Nandeisa. Ùqui jate nanderete rese. Mbae miĩ nda siquiã nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiarei “ã nandesã”, i tuchi nyue. Eĩ si chõ Jesús icuasa nande re. Jesús rete ja chõ nande re. “Ã nandesã”, nandete equia nandechue ã. Mbae rese jaajate que Dios quiato mingó ra.

⁶ Dios turã tuchi que nande je ra. —Co rese eico nde. ã ndese eico nde, i Dios quia nandembuchao chao co. Ùqui naa sacuaã Dios riqui uquirãcuã mee mee nande je co. —Secheẽ esenei senei, i mose Dios emo je, sã aque echeẽ nenei nenei turã echeẽ ndui si.

⁷ —Mbae turã esaã saã mbia je, i mose Dios emo je, sã aque mbae turã naa naa mbei mbia je. —Mbia embaaquiato quiato, i mose Dios emo je, sã embaaquiato turã tuchi.

⁸ —Seosei uquia mbia je, i mose Dios emo je, sã aque Dios osei uquia turã tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteã eã tuchi mbae rese ee. Dios emo mii mose ererecuarã, sã ererecuã turã tuchi aque. —Mbaecha reã je mbae esaã saã, Dios i mose emo je, sã aque ia tuchi mbae turã naa naa mbaecha reã je.

⁹ ¡Jenyeseuca chooño chí nda jenyiese jê! ¡Mbae icuã si jenyicuasê cuasê tuchi quiatu jê! ¡Mbae turã ndese chõ jêingo tuchi jê!

¹⁰ ¡Jembi turã ño jenyiese jê! ¡Jenongue rã nguiatu jêingo turã tuchi jenyue jê! ¡Jeñee turã turã ño nguia emo nii jê! ¡Nderii nda erecheê turã turã chí jê!

¹¹ ¡Jeñimbutomo tomochí nda jê! ¡Jeñimbirãtã tuchi quiatu Dios je jê!

¹² Jesucristo cheê nda io chee nande je emo mose cote. Ûquí ño nandesaarõ arõ nguãã ã. Nyebe jêya tuchi quiatu siqui eraarõ arõ. Mbia jembsi mbasi mose, jenyecuachõ ño nguia ee. Jeñee ñee mbei quiatu quia Dios je.

¹³ Mbae eã mose Jesús quiato je, mbae mo jemondo ee. Mbia mo oso mose jenyuchúaa, ¡jêisi turã ño jê!

¹⁴ Mbia mo icuã icuã mose jêje, ¡jêturã ño ee jê! —Paba, mbae turã emondo rã ee. Ae icuãte riqui seje, ùquí je, jenyê chõ Dios je.

¹⁵ Ae eyate riqui, ùquí ndese chõ jêya jê abe. Ae nyeseo quia, ùquí je ndese abe jenyeseo no.

¹⁶ Hue rí ja chõ jêingo ndua turã. ¡Jenguasu ra jêsaã saã chí emo je jê! ¡Jêseteã ño jêingo jê! ¡Jêaquiatu ra jêsaã saã chí jê!

¹⁷ Mbia mo icuã icuã mose jêje, jenyecuachõ ño nguia ee. Mbae turã ño jêsaã nguia mbia resa rae.

¹⁸ ¡Jêingo turã ño mbia je jê! ¡I nda jêingo ubi turã jenyiese.

¹⁹ Mbia icuã mose jêje, ¡jeñee icuã chí nda erobeishí jê! Dios quia ra embasi nguã eicuã mose. Sã embesa ji riqui i no:

Se quia mbia tambasi eicuã mose, i que Dios ra,
i que embesa ji ra.

²⁰ Ae eicuãt e riqui jêje, ùquí jembuquiaru chõ eriãcuã mose. Ûquí jembiu chõ eisei mose. Eí jenyê mose ee, eireí te ra huícuã mose cote.

²¹ Mbia icuã mose jêje, ¡jeñee chí nda echeê ndibishorõ. Jêingo turã ño ee. Mbae turã nguia equirãcuã jiri mbae icuã si re. Mbae icuã mombo jiri.

13

Sã mbia riqui turã ererecuã ja je

¹ Mbia ja ererecuã cheê mumbayã nguiatu. Dios ae chõ ererecuã mii nguãã. Dios chimii ja chõ mbia rerecuã re.

² Ae mbia rerecuã cheê mumba quia, Dios cheê abe mumba chõ nguãã aque. Dios quia emii tare nguãã. Ae ererecuã cheê mumba mumba quia, ùquí nda mbae rasi saã cote.

³ Mbia turã mbusiquiche sacuã eã ño ererecuã re. Mbia icuã mbusiquiche sacuã nguia ñene. Nde ndeico turã mose, ererecuã ra nembusiquiche eã. Ndeico turã mose, ererecuã ra ñee turã mbei ndeje.

⁴ Dios ae chõ ererecuã mii nguãã. Nandereaquiatu turã sacuã. Nde mbae icuã naa mose, ndesiquiche jiri nda esi chã. Ndeicuã mose ra ndeirua nua arõte. Dios quiatu emii nguãã ererecuarã mbia icuã mbasi mbasi sacuã.

⁵ Ererecuã cheê nandemumbayã ño nguia. Nandembaasi asiã sacuã achõ eã ño ñene. Nandendua turã sacuã abe chõ ñene.

6—Impuestos jēisi isi mbia si, i que Dios ererecua mii nda. Nyebe nandeico nguiã impuestos mondo mundo turã ererecua je. Dio s cheẽ nguire chõ ererecua riqui nguiã eisi isi.

7 Jē deber i mose emo je, mbae jembuchebi jei chõ ee. Jē deber i mose impuestos, jemondo chõ ee. Ererecua je jēingo turã ño. Jeñee turã ño eriĩ.

Jenyesequa ja quia jenyiese

8 Emo mbae mondo mose jēje, jēingo are arete chĩ nguiã mbae mondo rocoĩ ee. Deber jenyechĩ nda emo je. ¡Jenyesequa ja quiatu quia jenyiese jē! Jenyesequa mose mbia rese, Moisés chimbasa ja jemumbayã ño nguiã ũquiĩ.

9 Ā ndei Moisés chimbasa ā:

Emo ninisi rese ra ereicochĩ.

Mbia mo nda ereiquiachĩ.

Mbae mo nda erembuquiachãchĩ.

Emo je ra erecheẽ ñooñochĩ.

Emo mbae ra erechousei choseichĩ,

i que Moisés chimbasa ra. Nandehesequa mose mbia rese, nandeico embesa ji cheẽ mumbayã ā. Ā ndei Jesucristo cheẽ ā: Sã ereico nyesequa nderete rese no, eĩ ere si chõ nyesequa emo ndese. Nde ā naa mose, Moisés chimbasa ja eremumbayã nguiã ā.

10 Ae nyesequa quia mbia rese, ũquiĩ nda mbae icuã saã eã mbei emo je. Emo nyesequa mose mbia rese, Dios cheẽ ndui si chõ eriqui nguiã mbae turã naa naa ũquiĩ.

11 Dios rese jēingo tuchi ũquiĩ. Nandemae jei ra Jesucristo rese cote. Nandechēẽ ngue equia nyii. —Nandemae je ra Jesucristo rese, nande que equia nyii. Namu nda nandemae erese cote. Aichite eñi tu a cote.

12 Itondaru rã ño mbae icuã ja namu nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icuã ndiquisã sacuã nandesii.

13 Nandeico turã ño Dios resa rae. ¡Mbia quiacua ra nandesichãchĩ jē! ¡Nandequiacuachĩ nda jē! ¡Emo ninisi rese ra nandeico icochĩ jē! ¡Mbae icuã nda nandechousei choseichĩ je! ¡Nandēicuã icuãchĩ nda emo mbiicuã icuã jē! ¡Emo mbae ra nandechousei choseichĩ jē!

14 Jeñimee tuchi quia Jesucristo je. Ae nda uquirãcuã mee tuchi jēje chã. Mbae icuã ndiquisã sacuã jēsi. Ae icuã mbia chosei chosei quia nae, ũquiĩ nda jēsãã saãchĩ jē Jesús resenda chõ jē ndesē.

14

Jeñee asiã mbei jenongue je

1 Jesús quiato mo Jesús icua tuchiã mose, jēisi turã ño. Jeñee asi asichĩ nda ee.

2 Emo emo mbae u ja. Emo emo soo u eã tuchi no. Ae soo u eãte quia nae, embaaquiatu tuchi iriã ño ũquiĩ nde.

3 Ae soo u guia nae, sã ũquiĩ ñee asiã mbei soocua reã je. Ae soo u eãte guia nae, sã ũquiĩ ñee asiã mbei soocua je no. Dios quiato ja chõ ñene.

4 Erecheẽ icuã aroneãte ererecua rimba mo je. Ae ae mbae saã nguiã nguerecua je. Dios ae nda ñee nguiã nguimba je. Mbae raã turã mose. Mbae raã icuã mose abe no. Dios quirãcuã ae nda nguimba mingo nguiã mbae turã ndese.

5 —Nyaashĩ mo ngue Dios irabo mbũicúe cose ra. Ũquĩ nyaashĩ mose nandechimbaacua rá, i Jesús quiato mo nguia co. Jesús quiato mo nguia ñee nguia: —Eĩ ja chõ nyaashĩ ndesẽ, i emo no. Sã Dios quiato ja ae riqui ndua ndua uchiangui re ae.

6 Dios quiato mo ñimbaacua mose aque nyaashĩ mose, Dios je chõ eriqui nguia ñimbaacua. Dios quiato mo mbae raã naa mose aque nyaashĩ mose, Jesús je chõ eriqui nguia mbae raã naa aque nyaashĩ mose. Ae soo u quia, Dios je chõ eriqui nguia soo u. Gracias, i que Dios je nyii ra. Ae soo u eã nguia, Dios je chõ eriqui nguia soo u eã no. Ae abe gracias i chõ nguia Dios je aque.

7—Sebi rese chõ taico bei, nande aroneãte. —Semanose mose quia tamano, nande aroneãte.

8 Dios ae chõ nandereco mingo nguia. “Emano”, i mose Dios nande je, nandeico nguia mano. Nandereco siqui mose, Dios rimbarã ño ñene. Nandemano mose, Dios rimbarã ño nda nandeico nguia no.

9 Cristo que mano nda. Quera si que ra. Mbia rerecuarã ngue quera si ra. Mbia reco rerecuarã. Mbia mano je rerecuarã abe no.

10 Nandechẽ icuã icuã aroneãte nanderesenda mo je. Emo mose quia ra Dios mae tuchi nanderese cote. Nandechiangui renda ra etea tuchi cote. Ae quia nda nandeicuã tea nguia. Nandeturã abe rea.

11 ã ndei embesa j i ã:

Dios ndei se. Se rei sereco bei.

Sésaa ra mbia chi ja ngoi nguia ndese.

Ñee jaaja ra seje cote.

“Dios tuchi chõ nde re”, i jaaja ra seje cote, i que Dios ra, i que embesa j i ra.

12 Nande ae ae ra mbae nandesenei senei Dios je aque mose. —ã ngue asaã saã nguia seico mose ñbi ra, nande ja ja ra ee cote.

Jenongue jembũcuã eã

13 Nyebe nandechẽ icuã eã nguia nanderesenda mo ñi. ¡Nandembia eãte chĩ nda jẽ! ¡Mbae icuã nda nandesã uquiachĩ ee jẽ!

14 Jesucristo que sembaaquiato ra. —Mbae turã ja chõ mbia chiurã nde, i que ra. —¡Co ra jẽuchĩ jẽ! iãte Dios mbae mo ñi. —Eicuãte co, i mose emo, sã ae mĩ eu eã. Ae eu mose, eicuãte ee.

15 —¡Co nandeu eã jẽ! Eicuãte, i mose nanderesenda mo ndeje, eu eã. Nde eu mose, erchesequa eã ño nguia nanderesenda rese aque. Nanderesenda je abe chõ ngue Jesucristo mano ndesẽ. ¿Mbaerã nda nanderesenda erembũcuã ndechuubi je re?

16 Ndechuubi turã ndaque ndeje. “Eicuãte” i mose nanderesenda mo, eu eã ae. Nde eu mose, mbia ra erembucheẽ icuã ndechue.

17 Dios chõ nandererequa cote re. Nyebe nandendua tuchi eã nguia nandechiurã ndese. Ae nandembei quia, ũquĩ abe rese. Dios rese quia nandendua. Ae chõ nandemingo nguia mbae turã ndese co. Ae chõ nandechiã mbucui nguia co. Espíritu turã ae nandembia mingo nguia co.

18 Eĩ nande mose Cristo je, Dios ia tuchi ra nanderese. Mbia abe ia ra nanderese.

19 Nandeico turã nda nandechue chã. Eĩ nande nda Jesús osei osei uquia nandechue chã.

20 —¡Aque soo ra nandechĩ jẽ! i mose Jesús quiato mo, jereuchĩ nda jẽ! Jesús quiato ra erembũcuã arõte nde eu mose. Mbae turã ja raque mbia chi. “Eicuãte”, i mose Jesús quiato mo, eu eã ae.

²¹ Soo Jesús quiato mb̃icuã mose, soo ra nandeu eã. Vino Jesús quiato mb̃icuã mose, vino nda nandembei eã. Mbae mo Jesús quiato mo mb̃icuã mose, nandeoco eã erese nande abe. Mbae mo Jesús quiato mo mb̃icha serĩ mose Dios icha si, ũquí ndese nandeicoã nande. Eĩ nda ichayã esi.

²² —So o icuã eã ño ñene, i mose Dios ndeje, echecuachõ ño nguia eu. Endua tuchi mbae mo naa nonde. Eicuã arõ mose ndeje, esaã eã. Eturã mose ndeje, echecuachõ ño eraã. Nde ũquí naa naa mose, ndeya tuchi rae.

²³ Nde ndeiranuã mose mbae mo ndese, esaã eã. —Eturãte ereae. Eicuãte ere no ae, nde i mose erisu isu, esaã eã ño. Ndeiranuã eraã ñooño mose, eicuãte ũquí. Ndechisu isu u mose soo, eicuãte ũquí. —Eicuãte ereae, nde i mose, ereicochĩ nguia eu.

15

Nandebi rese ra nandeicochĩ jẽ; nandenongue bi rese quia nandeico

¹ Nande mo Jesús icuat e quia co. Ae Jesús icua tuchiãte quia nae, ũquí je nandeico turã jiri ae. Nandembaaquiato quiato ae. Nandebi achõ ndese ra nandendua eã.

² Ae nandebite nande ae, ũquí ndese nandeicoã. Ae Jesús quiato nongue bite nae, ũquí ndese quia nandeico. Ũquí mose nandeico nanderesenda mbaaquiato tuchi Jesús rĩ co.

³ Cristo chee que siquĩã ubi rese ra. Sã embesa ji riqui ñee Cristo rĩ no: Paba, ae ndeucuayãte quia nae, ũquí ngue ñee icuã mbeite quia seje ra, i que Cristo ñee ngu je ra, i que embesa ji ra.

⁴ Dios cheẽ mbesa ji cose ndare chõ nandembaaquiatusa re. Nandemingo mingue sacua. Nandembirãcuã sacua Jesucristo rĩ. Nyebe nandeico nguia Jesucristo raarõ arõ minguetẽ ã.

⁵ Dios chõ nandemingo mingue nguia. Dios chõ nandembirãcuã nguia. Dios nda jemingo turã mbei nyiese Jesucristo cheẽ ndui si chã.

⁶ Ũquí mose ra jẽingo ñee turã mbei Dios je. Hue rĩ ja ra jẽingo ndua turã Dios rese. Dios quia Jesucristo ru re.

Dios iate judíos eã ndese

⁷ Sã Cristo nandei turã no, eĩ jenyẽ si chõ nguia nyiisi turã. Eĩ nda mbia ñee turã Dios rĩ.

⁸ —Eĩ tae tae, i que Dios judíos i ñiinda ja je cose ra. Nyebe Cristo ru nguia mbae turã naa naa judíos je cote. —Dios cheẽ iochĩ cote, i nda judíos chã.

⁹ Judíos eã abe mundua sacua Dios rese que Cristo ru ra. Dios turã ndese emundua sacua ño ngue eru nguia. Co rei David chimbesa co:

Paba, ndeturã tasenei senei judíos eã je.

Tairasei rasei abe ndeje,
i que David embesa ra.

¹⁰ Co rei embesa ji cheẽ mo co:

Judíos eã, jẽya chõ Dios rese.

Sã Dios rimba iate erese no, eĩ jenyẽ chõ jẽ abe jẽya erese,
i que embesa ji ñee nda.

¹¹ Co rei embesa ji cheẽ mo co no:

Sã mbia ibi jenda ja ñee turã ja Dios rĩ,
i que embesa ji ra.

¹² Isaías que co mbesa ra:

Isaí riirĩ nguia ra mbia judíos eã nderecuarã tuchi cote.

Mbia judíos eã nda “ichõĩñosa reã”, i tuchi ee,
i que Isaías embesa Jesús rĩ nda.

¹³ Ūquĩ jẽingo Dios icuate ũquĩ. Dios nda jembia tuchi mingo chã. Dios nda jẽnia mbucoi chã. Dios ae chõ “Cristo jẽsaarõ arõ”, i chõ nguĩã nandemingo mingue ã. Espíritu Turã ndiqu i nandembirãcuã tuchi ã. Nandembia mingo Cristo raarõ arõ ã.

¹⁴ Seyate aico jendese co, Seresenda. Jẽingo turãte quia jenyiese ũquĩ. Mbae jẽicua tuchite cote. Jẽ ae jẽingo nĩmbaaquiato quiato turã jenyue ũquĩ.

¹⁵ Aireĩ ireĩ ãte ã mbesa jẽje, Seresenda. Jẽtesareĩã sacua ã si. Dios turã ae ngue seirabo nguĩã. Mbia mbesarei eã sacua Jesús cheẽ si.

¹⁶ Dios que seirabo Jesucristo rimbarã nda. Ucheẽ nenei nenei sacua mbia judíos eã je. Mbia judíos eã secheẽ isi turã mose, Espíritu Turã nda emingo icúe Dios mbaerã cote. Ūquĩ mose ra Dios judíos eã isi turã cote.

¹⁷ Se Dios cheẽ nenei nenei mbia je, mbia que siqui tuchi erese secheẽ nguire ra. Nyebe ũquĩ ndiqui nguĩã sembia tuchi.

¹⁸ Jesucristo que sembirãcuã nda. Ucheẽ nenei nenei sacua judíos eã je. Nyebe judíos eã ndiqui nguĩã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo nĩ abe ra acheẽ iã cote. Jesucristo que sembirãcuã, ũquĩ mĩ ño aico nguĩã ñee jẽje a.

¹⁹ Espíritu Turã ngue uquirãcuã mee seje ra. Nyebe aico nguĩã mbia mae sayã naa naa tuchi mbia je. Ūquĩ mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangue chooñoa jenda je abe. Ilirico jenda je abe.

²⁰ —Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra.

²¹ Sã embesa ji riqui ñee no:

Ae jiranuãte quia Cristo rese, ũquĩ nda jirandu erese cote.

Ūquĩ nda eicua cote,
i que embesa ji ra.

Aso ra Rómaa, i Pablo

²² Ae mbia riqui Dios cheẽ nenei nenei eãte, huee quiato ngue aico nguĩã Dios cheẽ nenei nenei. Nyebe aico nguĩã osoãte jendea.

²³ Cose ndarechõ mbei chõ aico rei nguĩã “taso jendea”, i. A jenda mbia que Dios cheẽ ñandu tuchi cote ra. Nyebe taso jendea cote.

²⁴ Seso mose España nda aso jendea. Sembia jiri sacua jendese. Taico mbirĩ na jendese huee. Jẽ nda sembucuaata turã mondo hue si cote chã.

²⁵ Jerusalén nane nda aso. Ofrenda mo arao quia Jesús quiato je co.

²⁶ Jesús quiato Macedonia jenda que ofrenda munua nua nda. Jesús quiato Acaya jenda rese. —Jesús quiato mbaecha reã je mbae nandemondo rã Jerusalén jenda je, i que ñee nyue nyii ra. Ūquĩ ño arao nguĩã co.

²⁷ Coche ũquĩ ndiqui nguĩã mbae mondo judíos Jesús quiato je. Judíos rane nguia Dios cheẽ senei senei tare nguĩã judíos eã je. Nyebe ra judíos eã mbae mo mondo judíos Jerusalén jenda je cote.

²⁸ Nyebe ra ofrenda munua ji arao ee. Jesús quiato mbaecha reã je. Aquere ra aso España quitu cote. Aicha ra ñeenda cúa si mae jendese.

²⁹ Jesucristo ra semondo turã jendea. Ae ra nandembia ja uturã je.

³⁰ Seresenda, Jesucristo quiato quia jē nde. Espíritu Turā ño jembuchese-cua nguiã jenyiese ũqui. Nyebe jeñee tuchi quia Dios je serí. Nandechē ja tuchi quiatu ee serí.

³¹ —Paba, mbia icuã Judea jenda esiquisã Pablo si. Paba, ndequiatio Jerusalén jenda nda ofrenda isi turā Pablo si chã, jenyē chō Dios je.

³² Ũqui mose ra seya tuchi mae jendese cote, Dios “eno” i mose seje. Jendese seico mose ra sequenea aucua tuchi cote.

³³ Sã Dios riqui bei jendese. Sã eriqui jembia.

16

Pablo saludar i ja mbia je

¹ Febe jēisi turā ño. Jesús quiato chō aque cuña nde. Mbae turā esaã saã mbeite quia Jesús quiato Cencrea jenda je aque.

² Jēisi turā ño nguia Jesús rí. Sã Jesús quiato riqui nyiisi turā no, eí jenyē chō Febe isi turā no. Ae que mbae turā saã saã mbeite Jesús quiato je ra. Seje abe no. Nyebe jēturā ño jē abe ee.

³ Aquila je saludar jenyē rã seje. Eninisi Priscila je abe no. Serese que ũqui ndiqui Jesucristo cheē nenei nenei tuchi ra.

⁴ Mbia que equia serí serite rei quia serí nda. Siquicheã mbeite que equia ra. Nyebe aico nguiã gracias i tuchi ee. Se ae eã. Jesús quiato judíos eã abe riqui gracias i jate ee ã.

⁵ Ae Jesús quiato ñumunua nua nguia Aquila chuchua, ũqui je abe saludar jenyē. Epeneto je abe saludar jenyē. Sequiatio tuchite que aque ra. Ae rane nguē Cristo isi Acaya jenda ra.

⁶ María je abe saludar jenyē. Ae que mbae saã saã tuchi Dios je jēsa ra.

⁷ Andrónico je abe saludar jenyē. Junias je abe. Se sí chō ũqui nde. Serese que etarō ji riqui cárcel nda. Dios cheē nenei neneisa tuchi chō ũqui nde. Ũqui nane nguē Cristo icua sesí cose ra.

⁸ Amplias je abe saludar jenyē. Sequiatio tuchi chō Dios resenda aque re.

⁹ Urbano je abe saludar jenyē. Ae que Dios cheē senei senei nguia urerese ra. Sequiatio Estaquis je abe saludar jenyē.

¹⁰ Apeles je abe saludar jenyē. —Seicuasa tuchi Apeles riqui co, i que Dios Apeles rí nda. Aristóbulo chuchua jenda je saludar jenyē seje.

¹¹ Herodión je abe saludar jenyē. Se sí chō ae re. Narciso chuchua jenda, ae Jesús quiato nae, ũqui je saludar jenyē.

¹² Trifena je abe saludar jenyē seje. Trifosa je abe. Ũqui ndiqui mbae raã naa tuchi Dios je ũqui. Nandequiatio Pércida je abe saludar jenyē. Ae que mbae saã saã tuchi quia Dios je ra.

¹³ Rufo je abe saludar jenyē. Dios chiirabo tuchi chō ae re. Esi je abe saludar jenyē. Taí na tuchi que eriqui seje ra. Mbae que esaã ja tuchi quia seje ra.

¹⁴ Asíncrito je saludar jenyē seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ũqui ndese, ũqui je abe saludar jenyē.

¹⁵ Filólogo je abe saludar jenyē. Julia je abe. Nereo je abe. Enongue je abe. Olimpas je abe. Ae Jesús quiato riqui ũqui ndese, ũqui je abe saludar jenyē.

¹⁶ Jenyiquiaama ama saludar i nyue. Tuchuamo jenda ja Cristo quiato riqui saludar i jēje ã.

¹⁷ Huee emo ndiqui Jesús quiato mb̄cuã sete hue. Hue emo ndiqui “Jesús quiato tamb̄cha Jesús si”, ite hue. Jenȳcuasẽ ño nguia ũquĩ si. Jesús cheẽ ndui si eã ño eriqui nguia mb̄baaquiato quiato ũquĩ.

¹⁸—Ae Jesucristo bite, ũquĩ nandesaã saã, iã ño nguia ũquĩ. Ubi achõ ño esaã saã nguia ũquĩ. Echeẽ turã aba reã ño eriqui nguia mb̄ba je ũquĩ. Ae Jesucristo icua tuchi eãte quia nae, ũquĩ mb̄irĩ irĩ ño nguia ũquĩ. Jenȳcuasẽ tuchi chõ nguia ũquĩ si. Aba mb̄irĩ irĩsa tuchi chõ ũquĩ nde.

¹⁹ Jẽ ngue Dios cheẽ jemumbayãte ra. Mb̄ba que jirandu jate jendese ra. Nyebe seyate riqui nguia jendese co. Jẽingo bei nda equia mbae turã ndese chã. Mb̄ba nda jemb̄irĩ irĩ eã jiri quia mbae icua je chã.

²⁰ Dios quiarei aba mb̄iasa. Namo jiri ra ae Satanás ndiquisã mbei jẽsi cote. Sã Jesucristo riqui turã mbei jẽje.

²¹ Timoteo ucheẽ mondo quia saludar i jẽje aque. Siqui beite equia serese Dios cheẽ nenei nenei co. Lucio abe ucheẽ mondo quia saludar i jẽje aque. Jasón abe no. Sosipáter abe no. Se sí chõ ũquĩ nde.

²² Se abe secheẽ amondo quia saludar i jẽje aque. Tercio rei se. Se chõ aico nguia Pablo cheẽ mbesa mbesa jẽje co. Jesús icuasa ja chõ nande re.

²³ Gayo abe ucheẽ mondo quia saludar i jẽje aque. A aico rã echuchua uque a. Jesús quiato chumunua nuasa bei chõ a re. Gayo chuchua. Erast o abe ucheẽ mondo quia jẽje aque. Ae chõ tesorero sucha tubirĩa jenda je. Cuarto nandequiato abe ucheẽ mondo quia jẽje aque.

²⁴ Sã Jesucristo riqui jendeaquiato turã mbei. Amén.

Pablo ñee hui bei sacua cote

²⁵ Nandechẽ turã mbei chõ nguia Dios rĩ. Ae ra jembirãcuã tuchi mingo ucheẽ turã je. Echeẽ turã ngue asenei senei nguia Jesucristo rĩ nda. Aque cheẽ turã ngue mb̄ba icuayãte quia cose nyii ra. Dios que embuchecua eã mbei mbae ao ramo mosenda bei ra.

²⁶ Namo ño Dios ucheẽ turã mbuchecua nguia mb̄ba je cote. Jesucristo rĩ. Dios cheẽ nenei neneisa que echeẽ mbuchecua nande je cote ra. Mbesa que nande je ra. Dios que ñee seje ra. —Secheẽ turã esenei senei mbei quia mb̄ba jaje cote. Siqui sacua secheẽ ndese. Secheẽ mumbayã sacua, i que Dios seje cote ra.

²⁷ Dios m̄i nguiaerei siqui bei. Dios m̄i ño mae ja nguia mbae ja rese. Sã Jesucristo riqui mb̄ba mbucheẽ turã mbeite Dios rĩ. Amén.

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacua nda. Aico a mbesa jêje a. Nanderesenda Sóstenes ndese aico embesa jêje a.

² Aico a mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rîi ûqui. Dios riqui jemingo icue umbaerã ûqui. Sã Dios riqui mangue jenda choofoa mingo icue umbaerã no, eî si. Ñee mose Jesucristo je. Jesucristo rei ûqui abe rerecua no. Sã nandererecua nande no.

³ Sã Dios nanderu uturã mingo tuchi jendese. Sã Dios jembia bei mingo. Sã Jesucristo abe siqui jembia bei mingo.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rîi nda. Nyebe aico nguiã gracias i tuchi Dios je jenî co.

⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiato tuchi ucheẽ nenei nenei sacua mbia je. Jembaaracua tuchi que ucheẽ niî nda.

⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ûqui cote.

⁷ Nyebe Dios turã ndiqui nguiã hui âte jêsi co. Jembirãcuã mbeite equia querabe co. Ûqui jêingo Jesucristo raarõ arõ ûqui.

⁸ Dios ra jembirãcuã mbei mingo mbae ua ja chee. Mbia mo nda ñee icua eã jêje Jesucristo tu mose.

⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiatu ngue ñee nguiã jêje. —Taemingo bei seriirî ndese Jesucristo rese, i.

Jesús quiato nyao nyao chõchî nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ûqui. Hue rî ja chõ jêingo ndua ndua. Mbae miî ndese chõ jêingo.

¹¹ Mbia quiatu ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jenî nda.

¹² —Pablo mbae chõ se re, i chõchî jemo nguiã seriî ûqui. —Apolos mbae chõ se re, i chõchî jemo nguiã ûqui no. —Pedro mbae chõ se re, i chõchî jemo nguiã no. —Cristo mbae chõ se re, i jemo no.

¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rîi bautizar i jêje re no?

¹⁴ Se que bautizar ae eã jêje resẽ. Crispo miî je que bautizar ae ra. Gayo je abe.

¹⁵ —Pablo rîi ño ngue bautizar i nguiã seje, i aroneate jemo ñee seriî.

¹⁶ Estéfanas chuchua jenda abe que bautizar ae ra. Aquere que bautizar ae âte jemo je ra.

¹⁷ Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, i nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rîi

18 Ae ra nyoi tata cuásuu, ũquí ndei “ichõĩñosa” isa Dios cheẽ nenei neneisa rĩ. —Cristo que mano mbia riquicharõ nda, i mose ee, “ichõĩño ñene” i chõ nguia. Nande quiatu que Dios nanderirõ nandeicuã si ra. Nyebe Dios cheẽ turã ndiqui nguia uquirãcuã ndeacuquia nande je co.

19 ã ndei Dios cheẽ mbesa ji ã:

Ae “seaquiato tuchi” i quia, ũquí aquiato ra ambuquiachã esi.

Ae “searacua tuchi” i quia, ũquí aracua abe ra ambuquiachã esi no, i que Dios cheẽ mbesa ji ra.

20 Ae uquiato saã saã nguia, ibi jenda ja chõ ũquí nde. Ae ucheẽ aquiato saã saã nguia, ibi jenda ja chõ ũquí no nde. Eaquiatoãte ũquí, i chõ Dios nguia ũquí je.

21 Mbia ae ra Dios icuayã mbei uquiato ae je. Dios cheẽ ae je quia nda mbia Dios icua nguia emo Dios cheẽ nenei nenei mose ee. Ae Dios cheẽ isi nae, ũquí nda Dios sirõ eicuã si. Ichõĩño nguia, i raque mbia ataque Dios cheẽ ñi.

22 —Mbia mae sayã ndese nda uremae na ña, i bei que judíos quia ra. — Urechimbaaquiato tuchi rã, i bei que judíos eã nguia ñee nyue no nda.

23 Nande quiato Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. ũquí si judíos ireite riqui ã. Cristo renei nenei mose, judíos eã ndua eã tuchi chõ nguia erese ã.

24 Nande quiato nandebite riqui nguia Cristo renei nenei mose ã. Dios judíos mo irabo chõ nguia. Judíos eã mo abe irabo chõ nguia no. ũquí je chõ ngue Cristo Dios quirãcuã mee nguia. ũquí je chõ Cristo Dios aquiato mee nguia.

25 Dios aquiatoãte, i raque mbia mo ñee Jesús mano je rĩ. Dios quia aquiato tuchi jiri riqui nguia mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguia mbia si co.

26 Dios que jëirabo ja ra. Jëaquiato tuchi eã ndaque ee. Ererecua eã ndaque jë. Mbaecha eã ndaque jë. Dios ae chõ ngue jëirabo nguia. ũquí ndese jendua jiri.

27 Ae je mbia riqui “eaquiatoãte” i nae, ũquí ño ngue Dios irabo nguia. Ae ucuasu saã saã nguia nae, ũquí ireĩ ireĩ sacua esi.

28 Ae mbia ataque ucuayãte quia nae, ũquí ño ngue Dios irabo nguia. Ae ucuasu saã saã nguia nae, ũquí mbutiã sacua.

29 Nyebe nandeico nguia nandeaquiato raã naa aroneate Dios je ã. Nande mñ mo jiri jiriã.

30 Dios quiato que nandembucha Jesucristo rese ra. Ae quiato que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda.

31 Sã embesa ji riqui ñee ã no:

Ae Dios saã nande je nae, ũquí ñi nandechẽ turã.

A e nandesã nande ae nae, ũquí ñi nandechẽ turã eã, i que embesa ji ra.

2

Jesucristo mñ Pablo senei senei mbia je

1 Seresenda, seso mose jendea que Dios cheẽ asenei senei turã jëje huee resẽ. Seaquiato asaã saã eã ño nguia jëje Dios cheẽ nenei nenei.

² —Jesucristo m̄i ño tasenei senei jēje. Jesucristo mano nguia mbia icuã ndiquicharõ nae, ũquĩ m̄i ño tasenei senei jēje, ae chõ ngue oso nguia ñee jēje.

³ Seireite que seso mose ñee jēje nyii ra. Semburirite que aque mose ra.

⁴ Seaquiato que asaã saã eãte quia ra. Dios cheẽ ngue ambuchecua tuchi quia ñee ñee jēje ra. Espiritu Turã nguiatu que secheẽ mbirãcuã tuchi quia ñee ñee jēje ra. Nyebe mbia ñee nguia. —Dios cheẽ ño eriqui re, i nguia secheẽ mose.

⁵ Dios quirãcuã ae jemingo nguia Jesucristo rese ũquĩ. Mbia mo aquiato eã ño jemingo nguia Jesucristo rese ũquĩ.

Espiritu Turã ndiqui mbae icua jate nande je co

⁶ Ae seaquiato, ũquĩ ja chõ asenei senei mbei nguia Jesús quiato je co. Ae seaquiato nae, ibi jenda rã eã ño seaquiato riqui nguia co. Ae seaquiato nae, ibi jenda rerecua rã eã ño seaquiato riqui nguia co. Ũquĩ aquiato quia ra tiã jei.

⁷ Ae ureico ñee ñee nae, ũquĩ nguia mbia mbaaquiato jiri nguia. Dios cheẽte quia ñene. —Secheẽ nda ambuchecua je nguia mbia je. Mbia mingo bei sacua, i que Dios nyii mbae ao nonde ra. Dios que esenei eã nyii ra. Namõ ño embuchecua nguia nande je cote.

⁸ Mbia rerecua que Dios aquiato icua eãte ra. ¶ nda eriirĩ mbucha eãte rei ira rese.

⁹ Sã embesa ji riqui ñee ã no:

Dios ra mbae turã saã tuchi nande je. Uchesequa je.

Ae ra Dios saã nande je, ũquĩ ndese emo iranuate namo.

Emo mae ãte erese namo,
i que embesa ji ra.

¹⁰ Nande quia nandeico nguia irandu erese ã. Espiritu Turã quiato nandembiirandu nguia. Espiritu Turã nguia mbae icua jate nguia co. Dios chiao abe icua jate equia co.

¹¹ Ae rese emo ndiqui ndua, mbia mo ũquĩ ndua ndua icuayãte. Ae rese nandeico ndua, nande ae nandeicua nguia. Ae rese Dios riqui ndua, Espiritu Turã m̄i ño eicua nguia. Dios sí chõ Espiritu Turã nde.

¹² Dios que espíritu mbuae mo monoã nande je ra. Espiritu Turã ño ngue emondo nguia nande je. Ae Dios saã turã nguia nande je nae, ũquĩ ndese nandembiirandu sacua ño ngue Espiritu Turã mondo nguia nande je.

¹³ Ae Dios saã turã nguia ure je nae, ũquĩ uresenei senei nguia ã. ã ndese chõ ngue Espiritu Turã urembaquiato nguia. Mbia cheẽño eã ño ñene. Nyebe aico nguia Dios chisaã nenei Dios quiato je co.

¹⁴ Ae Jesucristo icua eãte, ũquĩ sí Espiritu Turã ñee icuayãte quia ã. Echeẽ mbarangiatuãte riqui ee ã. Nyebe eriqui nguia echeẽ isiãte.

¹⁵ Ae Jesucristo icuate nae, ũquĩ nguia mbae icua jate nguia ã. Ae eturãte nae, ae eicuãte nae, ũquĩ icua ja equia ã. ¿Mañi Jesús quiato quia re? i chõ mbia nguia Jesús quiato cheẽ icuayã ã.

¹⁶ Tarembaquiato, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguia Cristo ndua rã si ã. Dios resendate quia nandeico nguia ã.

3

Mbae m̄i na ño ureico nguia Dios cheẽ nenei nenei

1 Jesús resenda jëingo raque ùquĩ. Jëingo tuchiãte quiatu nguiã erese ùquĩ. Ae jembite riqui nae, ùquĩ mii ndese chõ jëingochĩ nguiã ùquĩ. Ae Cristo bite nae, ùquĩ ndese jëingoã ñochĩ nguiã ùquĩ. Nyebe jaembaaquiatsu tuchi aroneate equia co.

2 Mbia riiriã na ño jëingochĩ nguiã secheẽ andu mbirĩ mbirĩ cose. Querabe chõ jëingo nguiã secheẽ andu sereã ùquĩ. Nyebe jaembaaquiatsu quiatu tuchiã nguiã Jesús cheẽ ndese. Ae jembite riqui nae, ùquĩ ndese jëingo mose ra Dios cheẽ jëicuayã mbei.

3 Jëicuã icuãte quia jëingo nguiã jenyue ùquĩ. Jendua turã ja eãte equia ùquĩ. Jeñee turã turã eãte quiatu nguiã jenyue ùquĩ. Nyebe acheẽ nguiã jëje. —Ae Cristo bite nae, ùquĩ ndese jëingoã ñochĩ nguiã ùquĩ, ae chõ ndei nguiã jëje co.

4 —Se rei Pablo mbae, i chõchĩ jemo nguiã ñee ùquĩ. —Se rei Apolos mbae, i chõchĩ jemo no. Nyebe jëingo eã nguiã Cristo bi rese ùquĩ.

5 ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jëje que Jesús jëicua resẽ.

6 Mbae tiquia ji rã ño jë nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jembaaquiatsu quiatu nguiã cote. Dios quiarei ucheẽ mbusuri raanguia jeñiangui re.

7 Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã.

8 Ae echitiquia quia, ae i icherẽ cherẽ nguiã erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ.

9 Ure rei Dios cheẽ naa naasa. Sã chacocha no, eĩ si chõ Dios mbae jë nde. Sã tuchuacha no, eĩ si chõ Dios mbae jë nde.

10 Dios turã tuchi que seje ra. Seje quiatu ngue ucheẽ mee nguiã. Mbia mbaaquiatsu quiatu sacuaã. Tuchua ao aquiatsu rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã.

11 Tuchua i raanguia chõ Jesucristo riqui nguiã. Ae mii tuchi chõ tuchua i raanguia re.

12-13 Ae arõ tuchua mo nandesaã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ùquĩ je eraã mose, oquei eã nda Dios tata mbu mose. Irã je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja.

14 Nandechisaã siqui i i mose, Dios ra mbae turã mee nande je.

15 Nandechisaã oquei mose, nandembae ra quiachã nandesi. Nande quia ra nandequiachãya ndaque. Nandecuasẽ ndaque ra ibate Dios je. Nandechi quiatu ra nandeico cote.

16 ¿Jëtesarei chõ ere? Dios chuchua chõ nanderete riqui co resẽ. Dios riqui beite nandeye co. Espiritu Turã ndiqui beite nandeye co.

17 Emo Dios chuchua mbiçua mose, aque ra Dios mbutiã. Nande quia Dios chuchua re. Dios que uchuchua mii icúe umbaerã nda. Nanderete je sichõ nandeco nguiã ñee co. Dios chõ nandemingo nguiã icúe umbaerã co.

18 —Nandeaquiature, jenyechĩ nguiã jeñiangui re ùquĩ. Ae eaquiature ibi jenda achõ ndese, sã ùquĩ uaqiatsu raã naa eã. Siqui mingue mose ra Dios embaaquiatsu turã cote.

¹⁹ Ae eaquiatute ibi jenda achõ ndese, “eaquiatuã”, i chõ Dios nguiã ùquĩ je co. Sã embesa ji riqui ñee no:

Dios ra ùquĩ aquiatu mbutiã ño cote.

“Seaquiatu tuchite aico co”, i quiatuchĩ ngue nyii re, i que embesa ji ra.

²⁰ Sã embesa ji riqui ñee no:

Ae rese eaquiatu riqui ndua nae, ùquĩ Dios icua tuchite quia co.

Ndua ndua iru chõ nguiã, i que embesa ji ra.

²¹ Mbua aquiatu mo ndese ra jeñimbucha chooñochĩ jê! Dios quiatu que mbae mondo ja jêje ra.

²² Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingo mose, jêje chõ emingo. Dios mbia mingo eã mose, jêje chõ emingo eã. Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene.

²³ Cristo mbae chõ jê nde. Dios mbae chõ Cristo no nde.

4

Ureaquiatu tuchi Jesús chimbaaquiatu si, jenyechĩ nda jê

¹ —Cristo rimba ja chõ ùquĩ nde, jenye chõ serĩ. Apolos rĩ abe no. —Ae ambuchecua eã mbia je nyii, ùquĩ jembuchecua checua mbia je serĩ cote, i que Dios ure je ra.

² Dios rimba mose nande, Dios cheẽ nandemumbayã mbei chõ nguia.

³ —Serimba turã ño nde re, i ra Dios seje reae. Nducua. Aicuayãte se. —¿I se jêje re? ae ãte se quia jêje co. Ae ãte se quia emo je co no. Dios mii ño seicua nguiã.

⁴ Dios rimba turãte aico reae. Dios ae chõ seicua nguiã.

⁵ —Dios rimba turã ño aque re, jjenye jeichĩ nda emo nii jê! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiatu sacua ño aico nguiã ñee jêje co. Sechue si chõ aico nguiã ñee. Apolos rĩ abe chõ aico nguiã ñee. Dios rimba achõ ño ure re. Ure mii mo ndui jêingo bei aroneate. Dios rimba ja rui chõ jêingo. Eĩ jenye mose ra embesa ji jemumbayã.

⁷ ¿Mbaerã nda jêcuasu jêsaã saã nde? Ae jendeco jembaerã nae, Dios chimondo ja chõ ùquĩ nde. Jêaquiatu mose, Dios ae jembaaquiatu nguiã. —Se ae que sembae asaã saã nda, jjenyechĩ nda jêcuasu raã naa jê!

⁸ —Ureaquiatu tuchite cote, jenyechĩ ngue ñee nda. —Ureico Dios cheẽ icua jate co, jenyechĩ ngue ñee no nda. Ererecua tuchi jêsaã saãchĩ ureririrõ cote. Ererecua jêsaã ñooño na jê no. Se abe ra ererecua asaã saã ndei jê na ndeae.

⁹ Dios ucheẽ nenei neneisa quirirõ jiri ure reae. Mbua tarõ ji rã ño ureico uremano ndaarõ arõ ndeae. —¿Mañi ã nguia re? i tuchi mbia quia mae nguiatu urerese co. Angeles abe ñee nyee mae nguiatu urerese.

¹⁰ Ureico tuchi mose Cristo rese, “eaquiatuã”, jenye chõchĩ equia ure je ùquĩ. “Ureaquiatute ure”, jenye chõchĩ equia jê jêingo mose Cristo rese ùquĩ. Urequirãcuã neãte ure, jê jêquirãcuã mose. Mbua ureosei chiãte ure; jê nguia mbia jêoseite nguiã.

¹¹ Mbae eã mbeite urembae namo abe. Ureirãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icuã icuã mbeite ure je. Urechuchua eãte abe no.

¹² Mbae uresaã saã tuchite quia ureo je co. Mbia icuã icuã mbeite riqui ure je co. Urecheẽ turã turã mbeite equia ure ee ã, ùquĩ ñee icuã icuã mose ure je. Urechecua chõte equia ñimbirãcuã ee ã.

¹³ Urecheẽ mingue beite equia ùquĩ ñee icuã mose ure je ã. Mbae quia rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴ Jëireĩ ireĩ sacua eã ño aico nguiã ã mbesa jêje ã. Jemundua ndua sacua ño ñene. Seririĩte quia jê nde.

¹⁵ Jembaaquiātu quiatusa tubiriãte raque Cristo riĩ. Se miĩ tuchi chõ jendu re. Se rane nguiatu ngue echeẽ turã asenei senei nguiã jêje nyii. Se quiatu ngue Cristo aicua uquia nguiã jêje. Nyebe aico nguiã “seririĩ” i beite jêje co.

¹⁶ Nyebe jêingo se rã si.

¹⁷ Timoteo amondo quia jêje aque. Ae rei sechimbbaaquiātu tuchi. Nyebe “seririĩ” ae tuchi nguiã ee. Ae quiarei siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eĩ ngue Pablo quia Jesús quiato mbaaquiātu quiatu sucha mbuchesea sea mose ra, i ra Timoteo jêje seriiĩ.

¹⁸ Jemo ndiqui uaquiātu raã naa tuchichĩ ùquĩ. —Pablo ra tu eã mbei urerea, i chõchĩ jemo nguia seriiĩ ùquĩ.

¹⁹ Aso jei ra jendea, Dios eno i mose seje. Ae uaquiātu saã saã tuchi quia jemo nae, ùquĩ tatea cote. Mañi nda equia mbae raã ndeae. Echeẽ achõ achandu sereã.

²⁰ Dios rimba cheẽ achõ aroneate. Siqui eã mose Dios quirãcuã ndese.

²¹ Manyae ra jêje seso mose jendea reae. Acheẽ asi asi ra jêje reae. Aico mingue chõ nda jêje renoae. Jêhui mose jêicuã si, acheẽ asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jêataque jêtea chooño mbae icuã naa mose re? Ae Jesús quiato ãte nae, ùquĩ ño siqui ãte ngu ninisi rese. ¿Mbaerã Jesús quiato quiatu siqui ngu ninisi rese re?

² Jêturã jêsaã saã mbei chõchĩ nguiã jê ùquĩ. Jêya eã eã ño jêingochĩ ùquĩ ndese ùquĩ. Jëireĩ nguiã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishoto aico raque jêsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechiangui re co. Se siqui raanguia jendese.

⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose.

⁵ Ae siqui ngu ninisi rese nae, aque jemombo chõ jêsi. Jesús quiato si. Jemee ño Satanás je. † nda Satanás erete mbasi. † nda eaĩ siqui bei Jesucristo tu mose cote.

⁶ ¿Mbaerã jeingo jêturã naa naa mbae icuã ndea chooño nde? Levadura rã ño mbae icuã nde. “Levadura ñetê nda oso raque mbichae raã namo mose. Mbuchimatã ja rae”. ¿Ûquĩ jeñanuãte quia re?

⁷ Ae eicuãte nae, aque jemombo jêsi. I nda jê abe mbae icuã jêsaã eã. Dios que Jesucristo iquia nandecuã ndibishorõ nda. Sã mbia riqui oveja iquia iquia huicua ndibishorõ no.

⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandecuã nandesecha ja.

⁹ —Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jêje nyii.

¹⁰ Ae Jesús quiato ãte, ùquĩ nii eã ño ngue acheẽ nguiã jêje. Nandechẽ eã aroneate Jesús quiatoã je nandeico mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguiã nae, ae siqui Dios abareã ndese nae, ùquĩ je nandechẽ eã aroneate.

¹¹ Jesús quiato mo ùquĩ icuã naa mose, jemombo chõ jêsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequiã chooñoã mose. Quiacua mose. Mbae mbuquiachã mose. Jesús quiato ùquĩ naa naa mose, jêhui chõ esi. Jêquiaru jiri jiriã tuchi ùquĩ ndese.

¹² Jesús quiatoã nandeteaquiato aroneate. Ae Jesús quiato, ùquĩ nguiatu nandeteaquiato.

¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jêsi.

6

Jemo icuã icuã mose nyue, jê ae chõ jêingo

¹ Jemo icuã icuã mose nyue, jêsochĩ nguiã ñee Jesús quiatoã nderecua je. Jê ae chõ jemaẽ erese ae. Jêicua ae. Sã Dios quiato achõ ño ñee ùquĩ je. —¡Eĩ jenyẽ jê! i ùquĩ je.

² Dios quiato quia ra “¡eĩ jenyẽ jê!” i ja Dios quiatoã je emo mose. Jê nguiã ra “¡eĩ jenyẽ jê!” jenyẽ mbia ataque je emo mose. ¿Mbaerã jêingo “¡eĩ je nye jê!” ise reã mbae ñetê naa mose re?

³ Angeles je abe chee ra “¡eĩ jenyẽ jê!” nande. ¿Ûquĩ ndese jêiranuãte re? ã ibi jenda je “¡eĩ jenyẽ jê!” nande turã ja rã ae.

⁴ Jesús quiato chõ jê nde. Ibi jenda mo nii jemo icuã icuã mose nyue, jê ae chõ jemaẽ ùquĩ ndese. Jêsochĩ nguiã ñee Jesús quiatoã nderecua je. Dios quiato eãte quia ùquĩ nde.

⁵ Jesús quiato mo ñee icuã icuã mose nyue, ¿jemo jêaquiãtuãte ñee ee re? “¡Eĩ jenyẽ jê!” i ee re. Jê jêireĩ ireĩ sacua ño aico nguiã ñee jêje ùquĩ.

⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echĩã turã tuchi ãte quia ñene. Jeñimbirãcuã ño mbae icuã naa mose jêje. Jeñimbirãcuã ño jembae mbuquiachã mose no.

⁸ Jê abe mbae icuã jêsaã saã ñochĩ, ñimbirãcuã ndocoĩ. Jê abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbã rerecurã tuchi ra Dios cote. Aque mose ra mbã icuã siquiã tuchi Dios rese. Ae siqui emo ninisi rese nae. Ae siqui ngũinisã ndese nae. Ae ndua chooño nguiã Dios abareã ndese nae. Ae siqui quia nyiese ngũinisi raã naa nguesenda je nae. Ae mbae mbuquiachã quiachã nguiã nae. Ae abei chiãte

riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ũquí nda siquíã tuchi Dios rese. —Eicuã abe ra siqui bei Dios rese, jjenyechĩ nda ñimbĩĩĩ irĩ jê!

¹¹ Eĩ ngue jemo icuã cose ra. Dios ae jembitirõ nguĩã cote. Dios chõ jemĩ nguĩã icuẽ umbaerã cote. Espĩritu Turã ngue jẽisi turã Jesucristo rĩĩ cote ra.

Espĩritu Turã nyuchua chõ jendete re

¹² —Co rese ra ereicochĩ, i áte raque Dios quia seje mbae mo ñĩ. Dios biãte nande mbae raã ja chooño mose. Mbae mo sembũcuã serĩ mose, asaã eã mbei ra se.

¹³ Nandechiurã ndei nanderie ye sacuã. Nanderie rei nandechiu rirurã. Ũquí ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecua chõ Dios re.

¹⁴ Dios quirãcuã ño ngue Jesucristo raaque mbuquera nguĩã. Eĩ ño nda Dios quirãcuã nanderaaque mbuquera nguĩã nande abe no.

¹⁵ ¿Jẽiranuãte quia jendete rese re? Cristo nanderete mbucha quia uchiese co. Cristo rete chõ nandeco nguĩã co cote. Cristo rete nandembucha aroneate cuña icuã ndete mo ndese.

¹⁶ Emo siqui mose cuña icuã mo ndese, erete ucha chõ nguĩã nyiese aque. Erete nyeremo eã ño cote re. Ũquí ndete ja ra co mĩ cote, i que Dios cose ra.

¹⁷ Emo siqui mose Cristo rese, nguete mbucha chõ nguĩã erese ũquí cote. Erete mĩ na ño ũquí cote re.

¹⁸ Jjeninisiã ndese ra jẽingochĩ jê! Mbae icuã mo naa mose, ũquí nda nanderete mbũcuã yã jiri. Siqui mose ngũinisiã ndese, ũquí nguia ra nanderete mbũcuã tuchi cote.

¹⁹ Espĩritu Turã siqui chee jẽiangui re ũquí. Espĩritu Turã nyuchua chõ jendetẽ re. Dios mbae chõ jẽ nde. Jembae ae eã ño jendetẽ re.

²⁰ Eicuã nimba rei ngue jẽ nyii re. Dios quiatu ngue jẽisi nguĩã cote. Nguĩĩĩ ngue emondo jendibishorõ nda. Nyebe jẽingo jendetẽ mee Dios je. Jẽã abe jemee ee noae.

7

Pablo mbia mbaaquiato emo ngũinisi rerequia rĩĩ

¹ Jẽnee ngue jembesa mondo seje nyii nae, ũquí tasibishorõ jẽje cote. Coche emo siquíã nguĩã cuña mo ndese.

² Coche mbia ngũinisi ae rerequia nguĩã. Coche cuña ngu mĩ nderequia nguĩã no. Emo ndese siqui chooño eã sacuã ño ũquí nde.

³ Sã eru riqui turã ngũinisi rese. Sã eninisi abe riqui turã ngu rese. Nyao aroneate nyesi.

⁴ Eninisi rete chõ eru mbae cote re. Eru rete chõ eninisi mbae cote no nde.

⁵ Nya i aroneate eru ngũinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ũquí. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embũcuã arõte cote.

⁶ —Jeninisirã jendeco, ae áte quia jẽje co. —Jeninisibi mose, jendeco ae, ae chõ nguĩã jẽje co.

7—Sã Jesús quiato ja ninisiã ndiqui se rã si, ae rei que se ra. Dios cheẽ eã ño ùquĩ nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngūinisi quereco sete nguiã no.

8 Ae eninisiãte nae, ùquĩ je tacheẽ. Eru cheecha je abe tacheẽ no. Coche jëingo nguiã jendu eã. Coche jeninisiã ndiqui nguiã no. Se rã si.

9 Jëñimbirãcuãyã mose jendete je, jeninisirã mo jëtea ae. Jendurã mo jendeco noae. Mbia mo osei osei rocoĩ.

10 Ae ngu quereco nae, sã ùquĩ ngu rechayã mbei. Jesús cheẽ tuchi chõ ùquĩ nde. Secheẽ ae eã ño ùquĩ nde.

11 Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbuca si eã mose ngu rese. Sã eru abe ngūinisi rechayã mbei.

12 Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngūinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese.

13 Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngūinisi rese, sã eninisi siquichõ erese no.

14 Jesús quiato mose eru, eru ngūinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, ùquĩ ande.

15 Jesús quiato mo ninisi siquiã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquiã mose Jesús rese, “seninisi tasecha” i bei mose, sã eninisi ngu riquisã quisã eã no. Ùquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra.

16 Ae Jesús quiato nae, ùquĩ ngūinisi mingo arõte Jesús rese. Ae Jesús quiato cuña nae, ùquĩ ngu mingo arõte Jesús rese no.

17—Eĩ jenyẽ chõ nguia jẽ ae ae, i que Dios nandechiaorã mee mee nande je ra. Ùquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ùquĩ ño asenei senei nguiã Jesús quiato ishonda jaje abe.

18—Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã.

19 Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ùquĩ nguia Dios bite re.

20 Eĩ nande que equia Dios ñee namo mose nande je nyii, aque mosenda rã mbei chõ nandeico.

21 Mbia rimba mose nde, Dios “eico serui” i mose ndeje, eico chõ eruĩ. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae.

22—Eico serui, i mose Dios mbia rimba mo je, Dios embui chõ nguiã eicuã si cote. —Eico serui, i mose Dios emo ae siqui mose, Cristo rimba chõ aque cote re.

23 Jesucristo que mano jëje ra. Nyebe Jesucristo rimba ae chõ jëingo nguiã ùquĩ cote. Mbia rimba ae eã ño jëingo nguiã ùquĩ cote.

24 Dios que ñee nande je nyii, aque mosenda raanguia bei chõ nandeico Dios rese.

25 Nyucuaaque riĩ tacheẽ ndaque jëje cote. Dios que ñee ãte seje ùquĩ ñi nda. Se ae chõ tacheẽ jëje. Airandu que Dios ia eã mose serese ra. Nyebe aico nguiã ñee ñoño eã tuchi jëje co.

²⁶ Sã mbia ngũinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote.

²⁷ Neninisi mose, eico bei chõ erese erechayã mbei. Neninisiã mose, nde ae eico bei.

²⁸ Neninisirã ndea mose, eicuã eã ño ùquĩ no nde. Nyucuaaque ngurã mo ndea mose, eicuã eã ño ùquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jêje. —Jê ae jêingo jeninisiã, i jêje.

²⁹ Tacheẽ tuchi rã jêje, Seresenda. Mbae ra ua jei ja nande je cote. Ae ngũinisi quereco quia, sã ùquĩ ndiqui ngũinisi rerequia eã naanguia.

³⁰ Ae eya eãte riqui, sã ùquĩ ia tuchi raanguia riqui no. Ae eyate riqui, sã ùquĩ ia eãte raanguia riqui no. Ae mbae isi quia, sã ùquĩ ndiqui mbae isiã naanguia no.

³¹ ã nandeico rei nguiã ibiã ã. ¡Ibi jenda rese ra nandendua tuchichĩ jê! ¡ã ibi jenda ja ra ua ja chõ jê!

³² —Jeninisiã ño jêingo, ae que se ra. Jendua ndua eã jiri nda ibi jenda rese chã. Ae eninisiã, ùquĩ ndua ndua bei arõte Dios mi ndese. Ae Dios bite, ùquĩ esaã saã mbei arõte.

³³ Ae eninisi nae, ùquĩ ndua ndua bei arondete ibi jenda achõ ndese. Ae eninisi bite nae, ùquĩ esaã saã mbei arondete.

³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ùquĩ nda esaã saã mbei ee. Siqui tuchi ra Dios rese. Ae ngu quereco nae, ùquĩ ndua ndua bei arondete ibi jenda achõ ndese. Ae eru bite nae, ùquĩ esaã saã mbei arõte. Siqui rocoĩ Dios rese.

³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jêje cote. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eicuã eã ño nguiirĩ ndurã mee ee re.

³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ùquĩ abe.

³⁸ Ae nguiirĩ ndurã mo mee ee, eturã ño ùquĩ nde. Ae nguiirĩ ndurã mo mee eã ee, eturã tuchi chõ ùquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote.

⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ùquĩ ndeae. Espiritu Turã abe sembucheẽ nguia reae.

8

Ae soo mbia mondo rei dios abareã je nae

¹ —Mbia soo mondo mondo quia dios abareã je nae, ¿ùquĩ soo ra nandeu re? jenye que seje. Ùquĩ tasenei jêje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesecua mose mbia rese, Dios abe rese ra nyesecua bei.

² Seaquiatute se, i mose emo, eaquiatuã ño ùquĩ nde.

³ Emo nyesecua mose Dios rese, Dios ùquĩ icua chõ nguiã ùquĩ.

⁴ Mbia soo mondo mondo quia dios abareã je, ¿ùquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mi tuchi chõ Dios re.

⁵ Dios abareã nguia etubiriãte re. Ibi jenda. Ibei rinda abe no. Dios raanguia tubiriãte raque no.

⁶ Dios quia co mii tuchi nande je re. Ae quiarei nanderu tuchi. Ae mii ngue mbae chao ja tuchi ra. Ae mii ngue nandea umbaerã nda. Nandererecua mii tuchi chõ siqui nguia co no. Jesucristo, i equia ee. Ae que mbae chao ja tuchi Dios rese ra. Ae mii ño nandemingo nguia ã.

⁷ Dios quiato mo iranuate quia ùquĩ ndese ã. Siquiche beite quiatu nguia dios abareã si ùquĩ. Ae soo mbia mondo dios abareã je, ùquĩ mbaeiaie riqui reĩ nguia ee. — ùquĩ soo jẽu eã jẽ! i reĩ Dios nguia ee.

⁸ Ae nandeu quia nae, ùquĩ nda nandembuturã eã Dios je. Nandechiu mo nda nandembuturã eã mingo. Nandechiurã nandei si teã teã mose, ùquĩ nda nandembucua eã no.

⁹ — ùquĩ soo ra jẽuchi jẽ! iãte raque Dios nande je. Mbaeiaie eãte raque ùquĩ soo. Mbaeiaie nda eriqui reĩ Jesús quiato namonda je raẽ. Jẽ eu mose, ùquĩ abe ra eu chee. — Mbaeiaie au chõchĩ, i ra ñimbucua tuchi cote.

¹⁰ Jẽquiaru mose dios abareã chuchua, Jesús quiato namonda ra mae jendese. ùquĩ abe ra soo u chee, ae mbia mondo Dios abareã je. Maende jendese. Eicua ndaque eriqui reĩ nguia ee.

¹¹ Jẽ ndaque jẽirandu ùquĩ soo rese. Eicua eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenyẽ chõchĩ ùquĩ mbicha arõte Dios si. ùquĩ nii abe chõ ngue Jesucristo mano nguia.

¹² Soo mbaeiaie riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ùquĩ Cristo je.

¹³ Jesús quiato mo ambucua sereã tuchi chõ nguia se. Se soo u mose, ùquĩ Jesús quiato mo mbucua mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguia Jesucristo icua ùquĩ cote.

² Jesucristo cheẽ nenei neneisa eã ño co re, i arõte raque emo seje. Jẽ quiatu jeñee aroneate nguia ùquĩ seje. ùquĩ jẽingo seicua tuchite ùquĩ. Secheẽ nguire quiatu que Jesús jẽicua cote resẽ.

³ Eĩ ae chõ nguia ñee mbia ñee icua mose seje.

⁴ Se abe Jesús quiato sembuquiaru quiaru arondete raque.

⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús rii. Sã Pedro riqui ngüinisi rerao rao no. Jesús nongue abe no. Sã Jesús cheẽ nenei neneisa ja ngüinisi rerao rao no.

⁶ ¿Se mii ño nda Jesús quiato sembuquiaru aroneate reĩ jẽje re? Bernabé abe rese. Ure Jesús cheẽ nenei nenei mose.

⁷ Sã soldado siqui choõño eã comandante mbae mee eã mose ee. Sã emo ndiqui mbae tiquia choõñoa no. — Sechitiquia nda au chã, i chõ nguia. Sã emo ndiqui ticuasuarõ rãarõ ñooñoa no. — Equiandi nda ambei chã, i chõ nguia.

⁸ Secheẽ ae eã ño ùquĩ nde. Embesa ji chõ asenei nguia jẽje.

⁹ Co rei Moisés chimbesa co: Jẽ ticuasuarõ mbutuquieĩ quieĩ mose, echuru jemumbi eã.

Sã ae ae si quia mbae cua,

i que embesa ji ra. Ticuasú achõ je eã ngue Dios ñee nguiã.

¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã eti quia. Ae mbae a chiqui chiqui quia nae, “sechiqui tau”, i chõ nguiã eiqui iqui.

¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re?

¹² Mbae mo jemee mee nguia Jesús cheẽ nenei neneisa mo je ùqui. ¿Mbaerã jẽingo emee eã ure abe je quiatu re? —¿Mbae mo nandeisi teã eo si jẽ! ure que equia oso mose jendea ra. Dios si jembucha eã sacua ño ngue mbae mo ureisi teã nguiã jẽsi.

¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ùqui ndiqui ofrenda u u bei ae, i que Dios ñee cose ra.

¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguia nae, sã sequiatio ataque riqui mbae mee mee mbei ùqui je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jẽsi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jẽje co. Tamano ae, “mbae embu seje”, i rocoĩ jẽje.

¹⁶ Dios cheẽ nenei neneisa tuchi chõ se re. Ùqui nã seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje.

¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, ei nda Dios mbae mo mee ndei seje ucheẽ nenei nenei ndibishorõ. Dios rimbate quia se re.

¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ùqui ño sebi re. —Mbae mo embu seje Dios cheẽ nenei nenei ndibishorõ, ae ãte quia co. Ùqui nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua.

²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbese rui nae, ùqui ite re seico mose, Moisés chimbese asaã saã ño nguiã se abe. Ùqui Jesucristo icua sacua. —Moisés chimbese rui eico, i ãte raque Dios seje.

²¹ Ae siquiã nguia Moisés chimbese cheẽ ndui nae, ùqui ite re seico mose, se abe Moisés chimbese asaã saã eã ño nguiã cote. Ùqui Jesucristo icua sacua. Cristo mĩ ñee ño amumba mumbayã nguiã co.

²² Jesús quiato quirãcuã nea ite re seico mose, ùqui asaã saã ño nguiã se abe, sequirãcuã nea naa naa. Ùqui Jesucristo icua sacua. Ae ite re aico oso beite nae, ùqui na ño aico nguiã se abe. Ùqui Jesucristo icua sacua.

²³ Ùqui ja chõ asaã saã nguiã Dios cheẽ turã nã co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co mĩ ño nda premio isi. Aque rã tuchi chõ jẽingo Jesús rese. Premio isi sacua naanguia.

²⁵ Ae ra carrera saã saã nae, ùquĩ mbae icuã secha ja chõ nguĩ ùquĩ. Premio isi sacuã ño eriqui nguĩ mbae icuã naa eã. Premio nda ua jei raque. Ae Jesús mee arõte quia nande je premio nae, ùquĩ nguia ra ua eã mbei nandesi.

²⁶ Se aico chooñoa nguia Jesús rese co. Jesús rese aico turã tuchi chõ nguĩ se co.

²⁷ Mbae asaã saã ño nguĩ serete mbirãcuã co. Serete secheẽ mumbayã sacuã. Se premio ganar i sacuã ño aico nguĩ eraã naa co. Premio isiã sebiãte, se Dios cheẽ nenei nenei tuchire. Nyebe aico nguĩ siqui tuchi Jesús rese co.

10

Dios raanguia rese ra jëingochĩ jë

¹ ¡Jëtesareichĩ nda nandei ñiinda si jë! ¡Moisés mosenda si jë! ¡Ûquĩ ngue siqui ja rei ibeishĩ ndui ra jë! ¡Ûquĩ ngue nyoi ja rei Ama Ireĩ ndasa Dios ñee mose ee ra jë!

² —Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa mose ra.

³ Ae Dios mee ndei ee echurã nae, ùquĩ ngue mbia ja u u rei ra.

⁴ Ae Dios mee ndei ee embei sacuã nae, ùquĩ ngue mbia ja mbei mbei rei ra. I que tuutu quia sita si nae, ùquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ùquĩ mbia rese ra.

⁵ Ûquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguĩ turúquia.

⁶ Nandemundua sacuã ño ùquĩ nde. Mbae icuã osei osei eã sacuã nande chõ ùquĩ nde. Sã ùquĩ mbae icuã osei osei no.

⁷ Jëingochĩ nda dios abareã ndese. Sã ùquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jë nguia jëingo eã dios abareã ndese.

⁸ Ûquĩ nandei que siqui siqui ngüinisiã ndese no nda. Nyebe Dios eiquia iquia tuchi nguĩ. Veintitrés mil que mano aque nyaashĩ mose ra. ¡Mbae icuã nda nandesaã saãchĩ ùquĩ na jë!

⁹ —Ma Cristo roseĩte, nandechĩ nda mbae icuã naa jë. Sã nandei riqui “ma Dios roseĩte” i nyii no. Sã ñi ngue eriqui mbae icuã naa mbei cose no. Sã mbei tásie riqui eiquia iquia no. ¡Ûquĩ nandesaã saã eã tuchi chõ nguia nande jë!

¹⁰ ¡Jëñee icuã icuãchĩ nda Dios rĩ jë! Sã ùquĩ nandei ñee icuã icuã nguia Dios rĩ no. Nyebe ángel nandei ñiinda iquia iquia tuchi nguĩ.

¹¹ Eĩ si tuchi que nandei ñiinda quia nyii ra. Dios que embesa mii nandetsareĩ eã sacuã nda. Mbae ua ja serĩ mose chõ Dios riqui nguĩ nandembesareĩ eã co.

¹² —Sequirãcuã tuchi chõ se re, i mose emo, ¡sã aque riqui nyiicia tuchi quiatu jë! Mbae icuã jë nonde ee.

¹³ —¡Mbae icuã esaã jë! i mose diablo jëje, eĩ si chõ nguĩ ñee mbia ataque je. Jë mii je eã. Dios quia ra ucheẽ mbuchebiã mbei. Jendeaquiatu bei ra diablo ñee mose jëje. Jembirãcuã ndae. Jë “nya” i sacuã mbae icuã je.

¹⁴ Seresenda, ¡dios raanguia rese ra jëingochĩ jë!

¹⁵ Jëaracuate rei jë ndesẽ. Secheẽ ndese jemae quiatu. ¿Acheẽ ñooño se re? Acheẽ ñooño eã se reae. Jëtea quiatu.

16 Nande Santa Cena naa naa mose, Cristo ruqui mbei raanguia chō nandeico nguiã uva rique mbei mbei. —Cristo ruqui nandembitirō ja bei quia ã, i chō nguiã uva rique mbei mbei. Mbichae nandesiquio quio quia eu nonde nae, Cristo roo rã ño ũquĩ nde. —Cristo roo nandembitirō ja bei quia ã, i chō nguiã mbichae u u.

17 Nandetubiriãte raque Jesús quiato. Nande ja chō aque mbichae mii nandeu ja nguiã. Mbae mii na nguiatu nandeico nguiã nande ja ã.

18 Judíos rese chō jendua. Ũquĩ sacrificio raã naa mose, sacrificio eu chō nguiã ã. —Dios resete quia nandeico nguiã ã, i equia ã.

19 —Dios abareã mbae mo saã arondete, ae ãte raque quia co. Ae soo mbia mondo mundo quia dios abareã je, soo chō ndaque ũquĩ.

20 Mbía soo mundo mundo mose dios abareã je, Dios tuchi je eã ño eriqui nguiã emee mee. Aba checuayã icuã je chō eriqui nguiã emee mee. ¡Aba checuayã icuã ndese ra jëingo jiri jirichĩ jê!

21 Jê mbae mbei mose aba checuayã ndese, Jesús ruqui mbei raanguia jësaã aronea ño nguiã cote. Jëquiaru quiaru mose aba checuayã nyuchua, Santa Cena jesaã aronea ño nguiã cote.

22 ¿Mbaerã jëingo Jesucristo mbupaama ite re? ¿Jëquirãcuã tuchi chō eriqui esi jê nde?

Jesús quiato ataque rese quia jëingo ndua

23 —Ae soo mbia mee mee nguia dios abareã je nae, ũquĩ ndese ra jëocochĩ, i ãte raque Dios nande je. Dios biãte nande mbae raã ja chooño mose. Ũquĩ nii Dios ñee ãte raque nande je. Nande ae chō nandeicua. Mbae mo Jesús quiato mo mundua icuã mose, ũquĩ si nandehui chō.

24 —Nande ae nandeico Dios rese, jenyechĩ nda jê. —Mbía ja quiatu nandemingo erese, jenye quiatu.

25 Soo jëisichō ño nguia mbae vender ísaa. —¿Dios abareã je co soo jemondo nyii re? jjenye chí nda ñee ee jê! Jëiranua mose, mbaeiae eã ño soo jêje cote re. Jëisichō ño nguia jëiranua.

26 Jesucristo mbae chō ibi re. Mbae ibi jenda ja abe rei embae no. Ae Jesucristo chao ja nae, ũquĩ ndei nandehuirã ja.

27 —Nyao rã quiaru serese, i mose emo jêje, jëso chō quiaru erese jësose mose. Ae ra echara mundo jêje, jëuchō ño. —¿Co mbía mundo dios abareã je nyii re? jenyechĩ nda ee. Jëiranua mose, mbaeiae eã ño jêje cote re. Jëiranua ño jëquiaru.

28 —Co soo que mbía mundo dios abareã je ra, i mose emo jêje, jëu eã ño cote. Ae ñee jêje nae, aque mbícuã eã sacuã ño jëu eã. Aque soo jëu eã cote, jëirandu mose erese. Jê eu mose, Jesús quiato ra ndua icuã icuã cote.

29 Jendua icuã eã ndaque jê. Emo nguia ndua icuã arôte nguiã cote, jirandu mose jê eu rese. —¿Mbaerã nda aque soo au eã sebi mose re? i arôte jemo seje. —¿Mbaerã nda emo ñee amumbayã nde? i arôte jemo seje.

30 —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arôte jemo seje. —¿Mbaerã nda au eã eicuã eã mose re? i arôte jemo seje.

31 ã ndese chō jendua. Ae nandesaã saã nguia nae, Dios je chō nandesaã. Ae nandeu ndeu quia mbae nae, Dios je chō nandeu. Ae nandembei mbei quia mbae nae, Dios je chō nandembei no. Mbía ra ñee turã Dios je, nandeico turã mose.

³² ¡Mbia ra jemundua ata atate chí jê! —Ā icuã ereae, i mose emo jêje, ¡ũquĩ nda jêsaãchĩ jê! Jê eraã mose, ũquĩ nda ndua icuã Jesús rese cote. Judíos. Judíos eã abe. Jesús quiato abe. Ũquĩ ndua icuã arō Dios rese, jê eraã mose.

³³ —Se ae taico Dios rese, ae âte quia co. —Mbia ja quiatu tamingo erese, ae quia co. Dios mbia rirō sacuã eicuã si. Mbia siqui beĩ sacuã Dios rese.

11

¹ Se rã si chō jêingo. Sã aico Cristo rã si se no.

Eĩ jenyê chō nguia u ñumunua nua mose, i Pablo cuña je

² Acheẽ turãte quia jeniĩ co. Jendua beite quiatu quia serese. Acheẽ ngue jêje nyii, ũquĩ jemumbayã mbeite quia secheẽ ũquĩ.

³ Ae ra ambesa jêje namo, ¡ũquĩ jêicua tuchi quiatu jê! Cristo rei hombre ja rerecua. Hombre rei ngũinisi rerecua no. Sã Dios Cristo rerecua no.

⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chō siqui Dios cheẽ nenei nenei. Uãquĩ ati mose, aba ireĩte ũquĩ.

⁵ Mbia ñumunua mose, sã cuña mo ñee eã Dios je huiite suchayã. Sã cuña aãquĩ ati ji chō siqui Dios cheẽ nenei nenei. Cuña uãquĩ ati eã mose, aba ireĩte ũquĩ. Uãquĩ huĩ na ño eriquĩ nguia uãquĩ ati eã no.

⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no.

⁷ Hombre mo nguia uãquĩ chati aroneate nguia Dios cheẽ nenei nenei. Dios quiatu ngue hombre chao nguia umbaerã. Aquerê que cuña mo ao hombre mbaerã cote ra.

⁸ Cuña ndoquieĩ je eã ño ngue Dios hombre ao nguia. Hombre roquieĩ je quiatu ngue Dios cuña mo ao nguia.

⁹ Cuña chirecorã eã ño ngue Dios hombre ao nguia. Hombre chirecorã nguia ngue Dios cuña ao nguia.

¹⁰ Nyebe ra cuña uãquĩ ati quiatu. —Seru chō sererecua re, i chō nguia uãquĩ ati. Angeles quia maete nguia erese.

¹¹ Jesucristo quiato ja chō nande re. Hombre achō nda siqui turã eã cuña eã mose. Cuña achō nda siqui turã eã hombre eã mose no.

¹² Hombre roquieĩ je chō ngue Dios cuña ao rei nguia nyii. Cuña abe riqui tiirĩ irĩ hombre co cote. Dios chiao ja chō ñene. Cuña. Hombre abe.

¹³ Jê ae chō jendua mae erese. Eicuãte cuña aãquĩ ati iriã ñee Dios je.

¹⁴ Hombre a boco mo siqui mose, aba ireĩte ũquĩ. —Eicuãte ũquĩ, i ja tuchi mbiamo ñooñoa nguia ũquĩ je ã.

¹⁵ Cuña mo nguia ea boco siqui mose, ũquĩ nguia earōte re. Ea boco que Dios mee ee ra. Eãquĩ ati sacuã.

¹⁶ —Cuña a boco sebiã, i mose jemo, sã ndua chō Jesús quiato ataque rese. —Sã cuña a boco riquichō, i ja chō Jesús quiato nguia serese ũquĩ.

Jenyao chaochĩ nda Santa Cena u mose jê

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jeniĩ nda. Nyebe seya eãte riqui nguia jendese.

¹⁸ —Hue rĩ ja eã eriqui ndua ndua ñumunua nua mose ũquĩ, i que emo sembiirandu jeniĩ nda. —Ichõño eã ereae, ae sequia ndua ndua co.

¹⁹ Jeñimbuchao chao chõchĩ equia ũquĩ. Mbia Jesús quiato tuchi icua sacuã ño jeñimbuchao chao nguia.

20 Santa Cena naa naa mose, abei chiã tuchi chõ jëingo nguiã jenyue ùquĩ. Eĩ eã tuchi que Jesucristo nandembaaquiato ra.

21 —Se rane sembae tau ja, jenyue jaaja chõchĩ nguiã Santa Cena naa naa ùquĩ. Mbae mee ndocoi emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose.

22 Jëquiaru tuchi mose Santa Cena, jëingo icuã ño nguiã Jesús quiato ataque je ùquĩ. Mbaecha reã ireĩ ireĩ ño nguiã jësi ùquĩ. ¿Mañi ae ra ñee jëje re? Eicuãte ùquĩ ndesẽ. Jenyuchua ae ae rei jëquiaru sacuã ndesẽ.

Jesús quiaru mose uchimbaaquiato rese

23 Jesucristo ae sí que sembaaquiato ra. Ñ ngue asenei ndei jëje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda.

24 Gracias, i que ñee Dios je cote ra. Mbichae que esiquio uchimbaaquiato je cote ra. —¡Cojê! Jëu. Serete rá ño mbichae riquio ji co re. Jenii ño nda serete riquio ji cote. Co jëu mose, jendua ndua bei quia serese, i que Jesús mbichae mondo ee ra.

25 Quiaru jare que Jesús eyuquia rirõ cote ra. Ñee ngue uchimbaaquiato je cote ra. —Seruqui rá ño uva rique co re. Mbia icuã mbutiã sacuã tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra.

26 Jë co mbichae u mose, jë uva rique mbei mose, Santa Cena, i chõ nguiã ùquĩ je. Jë Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jësaã saã mbei quia Jesucristo tu mose chee.

Jendua tuchi Jesús rete rese Santa Cena u mose

27 Emo Santa Cena naa icuã icuã mose, ùquĩ siqui icuã icuã ño nguiã Jesucristo rete je ùquĩ. Ûquĩ siqui icuã icuã ño nguiã Jesucristo ruqui je ùquĩ no.

28 Nyebe nandendua ndua tuchi quiato quia Santa Cena naa nonde.

29 Emo Santa Cena naa icuã icuã mose, emo ndua eã mose Jesucristo rete rese, ùquĩ nda Dios mbasi.

30 Ûquĩ je chõ jendasi rasi bei riqui nguiã. Ûquĩ je chõ jëingo nguiã mano mano tuchi.

31 Nande ae nandereco nandecua jiri ae. Eĩ nda Dios nandembasiã cote.

32 Jesucristo nandembasi mose, nandemundua sacuã ño ùquĩ nde. Nandembitirõ sacuã ño cote re. Dios nandemombo eã sacuã tata cuasu chõ ùquĩ nde. Jesús quiatoã mombo mose tata cuasu.

33 Nyebe aico nguiã ñee nyecua jëje co. Jë Santa Cena naa naa mose, jeñumunua nua turã ño. Jëingo turã ño jenyue. Jenyisaarõ turã ja chõ Santa Cena u nonde.

34 Jemo niacuã siqui mose, sã quiaru uchuchua, Santa Cena naa nonde. Eĩ jenyue mose, Dios ra siqui turã jëje cote, jeñumunua nua mose. Sesu mose jendea ra secheẽ ataque asenei jëje cote.

12

Espíritu Turã ño nandechisaã saã sacuã mondo nguiã nande ae ae je

1 Espiritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. Ûquĩ ndese taembiirandu cote.

² Dios abareã ndese que jëingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheë andu aroneãte. Ũquĩ jëingo Jesucristo rese ũquĩ cote.

³ ã ndese jendua tuchi: —Jesús icuãte riqui Dios je co, i mose emo, echeë ae chõ ũquĩ nde. Espiritu Turã embucheë eã ño nguiã ũquĩ. —Jesús rei Dios tuchi, i mose emo, echeë ae eã ño ũquĩ nde. Espiritu Turã ño embucheë nguiã ũquĩ.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espiritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo.

⁷ Espiritu Turã uquirãcuã teacuquia chõ nguiã nande ae ae je co. Nandeico turã ja tuchi sacuã Dios rese.

⁸ Espiritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheë aracua bei quia, i chõ nguiã nandemo je. —Nde ra mbia erembaaquiato turã mbei quia, i chõ nguiã nandemo je no.

⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no.

¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheë nda eresenei senei tuchi quia mbia je nde, i chõ nguiã nandemo je co no. —Espiritu eicua icua bei quia nde. Eturã icua. Eicuã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheë chumbarã, i chõ nguiã nandemo je co no. —Mbia cheë mo eicua icua quia mbia je, i chõ nguiã nandemo je co no.

¹¹ Eĩ ño Espiritu Turã mii nguiã ucheë mbuchao chao nande je co. Nandechisaã saã sacuã mee mee nande ae ae je co. Eĩ ño Espiritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na.

¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espiritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã.

¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re.

¹⁶ Nandesa achõ ñee aroneate. —Eresa eã ñochĩ se. Nyebe erete resenda eã se re, i aroneate nandesa ñee. Nanderete resenda bei chõ nandesa re.

¹⁷ Nanderesa achõ mose nanderete resenda, i nda nandeico rei mbae anuate co. Nandesa achõ mose nanderete resenda, i nda nandeico rei mbae retõ ãte co.

¹⁸ Dios ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda.

¹⁹ Nanderete resenda mii mose, eĩ ndei ra nanderete eãte.

²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene.

21 —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquí nandei je no.

22 Ae nanderete resenda ñetê tuchi nae, ae nanderete resenda quirãcuã nea tuchi nae, ùquí nguiarei nandechireco tuchi.

23 Ae nanderete resenda aba ireíte nae, ùquí nandetea quiatu chõ nguiã. Nandechati turã ño nguiã.

24 Ae nanderete resenda checuate riqui nae, ùquí quiatu nandechatiã nguiã. Dios que nanderete resenda saã turã ja ra. Ae nanderete resenda aba ireíte nae, ùquí quiatu aba queteamba re.

25 Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese.

26 Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

27 ã ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã.

28 —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguiã nde, i chõ nguiã emo je no. —Mbia rasi embucherõ cherõ nguiã nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguiã nde, i chõ nguiã emo je no.

29 Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde.

30 Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde.

31 Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ùquí mo asaã saã se abe, nande quia ñee Dios je. Mbae turã tuchi mo tasenei na jêje.

13

Nandehesecua eã mose, Dios chirirõ ño nande re

1 Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no.

2 Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je.

3 Se nyesecua eã mose mbia rese, aico chooño mbei chõ nda se. Sembae ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

4 Ae nyesecuate quia mbia rese nae, ùquí nguiã siqui minguate nguiã mbia je ã. Ùquí nguiã eturãte riqui nguiã mbia je co. Ùquí nguiã mae icuã icuã eãte nguiã emo mbae rese ã. Ùquí nguiã “seaquiato tuchite se”, iãte nguiã co.

5 Ae nyesecua quia mbia rese nae, ùquí nguiã “se quiatu”, iãte nguiã mbae mo je. Ae aba ireíte nae, ùquí mo esaã saã eãte quia co. Ae nyesecua quia mbia rese nae, ùquí nguiã paama i jei jei eãte nguiã ã. Ùquí nguiã ndua icuã icuã eãte nguiã emo icuã mose ee ã.

⁶ Ae nyesequa quia mbia rese nae, ũquí nguia eya eãte riqui nguia, emo mbae icuã naa mose ã. Emo mbae turã naa mose quia eyate riqui nguia ã.

⁷ Ae nyesequa quia mbia rese nae, ũquí ñimbiracuã ño nguia mbae ja je ã. —Hchõ:ño nguia, iã ño nguia mbia cheẽ je. Siqui tochi chõ nguia.

⁸ Dios quiato ra nyesequa bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbaaquiatusa mo eã nda emo mose cote. Ũquí nda ua ja chee. Dios quiato quiatu ra nyesequa bei quia.

⁹⁻¹⁰ Mbae mii mii ño nandeicua icua nguia namo ã. Jesús tu mose quia ra mbae mii nandeicua eã cote. Dios cheẽ miite nandesenei senei nguia namo ã. Jesús tu mose quia ra mbae nandeicua ja cote.

¹¹ Señetẽ mose que aico ñee ñee mbia riri na nda. Mbia riri na ño ngue aico ndua ndua señetẽ mose ra. Mbae que aicua icua chõ nguia mbia riri na no nda. Secuasú mose que señetẽ mosenda asecha ja cote ra.

¹² Mbae cuu rese mae naanguia chõ nandeico nguia mae namo. Jesús tu mose quiatu ra mbae checua ja nande je cote. Mbae mii mii ño aicua icua nguia namo co. Jesús tu mose quia ra mbae aicua ja cote.

¹³ ã nandeico Dios icuate ã. ã nandeico Jesucristo ru raarõ arõ ã. ã nandeico nyesequa jate mbia rese ã. Nandehesecua mose quiarei, ũquí eturã tuchi mbae ja si.

14

Mbiamo cheẽ naa naa mose

¹ Jenyesequase tuchi quiatu quia mbia rese jẽ! Jeñee ño nguia Dios je. —Paba, ndequirãcuã emee na seje. Mbae raã naa sacua ndeje, jenyẽ bei chõ nguia Dios je. —Ndecheẽ asenei senei sete ndequirãcuã je, jenyẽ chõ nguia ee.

² Jesús quiato mo mbiamo cheẽ naa naa mose, mbia ra eicuayã jate. Dios mii ño nda eicua nguia. Dios mii je chõ eriqui nguia ñee. Uchue si chõ eriqui nguia ñee. Mbia quia echeẽ icuayãte nguia.

³ Ae Dios cheẽ senei senei nguia, ũquí nguia ñee nyecuate nguia mbia je. Ũquí nguia mbia mbaaracua turãte nguia Jesucristo rii. Ũquí nguia mbia mingo uquia tuchi nguia Jesucristo rese no. Ũquí nguia mbia mbia tuchi nguia Jesucristo rese no.

⁴ Ae mbiamo cheẽ saã saã nguia nae, mbia mingo uquia reã ño nguia Jesucristo rese. Ae ae umingo uquia nguia erese. Ae Dios cheẽ senei senei nguia nae, ũquí nguia Jesús quiato mingo uquiate nguia Jesús rese.

⁵ Mbiamo cheẽ nda jẽsaã aquiatu ja raquete seje chã. Dios cheẽ nenei nenei aquiatu mose, ũquí nguia eturã tuchi re. Ũquí nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiãsa mose Jesús quiato je, eturã ño ũquí no nde. Jesús quiato mingo uquia chõ nguia Jesús rese ũquí.

⁶ Se mbiamo cheẽ naa naa mose jẽje, ũquí nda jemingo uquia reãte Dios rese. Se ñee nyecua mose jẽje, ũquí nguia eturãte re. Ae rese Dios sembiirandu nae, ũquí nenei nenei mose jẽje, ũquí nguia eturãte re. Se Dios cheẽ mbuchecua tuchi mose jẽje, ũquí nguia eturãte no nde. Se Dios cheẽ icua icua tuchi mose jẽje, ũquí nguia eturãte no nde. Mbiamo cheẽ naa naa si.

⁷ Sã música no. Emo flauta mbuchee icuã icuã mose, mbia ra tonada icuayãte. Emo guitarra mbuchee icuã icuã mose, mbia ra tonada icuayã no.

8 Sã soldados no. Emo corneta mbucheẽ icuã icuã mose, soldados ra icoquiatuã.

9 Eĩ si chõ jẽ no nde. Jẽ mbiamo cheẽ naa naa mose, mbia ra jeñee icuayãte. Jẽ mbiamo cheẽ naa naa mose, mbia eãsa ñee ñee na ño ùquĩ nde.

10 Mbiam cheẽ ñumumarate eriqui rei. Ucheẽ ae raã naa mose, echecuate ee.

11 Emo ucheẽ naa naa mose seje, se eicuayã mose, mbiamo ño aico nguiã ee. Mbiamo ño ae riqui nguiã seje no.

12 Espíritu Turã quirãcuã jenyosei tuchi quia reae. Coche tuchi chõ ùquĩ nde. Jesús quiato mingo tuchi sacuã Jesús rese chõ equirãcuã jenyosei jẽ.

13 Nde mbiamo cheẽ naa naa mose Jesús quiato je, echeẽ na Dios je. —Paba, ndequirãcuã emee na seje. Secheẽ mbiãsa sacuã mbia je, ere chõ Dios je.

14 Se mbiamo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee.

15 Mbiamo cheẽ abe ra asaã saã ndaque Dios je. Secheẽ abe ra asaã saã ee no. Mbiam secheẽ icua ja sacuã. Mbiamo cheẽ abe ra asaã saã se irasei rasei mose. Secheẽ abe ra asaã saã se irasei rasei mose no.

16 Nde mbiamo cheẽ naa naa mose Dios je, mbia ra ndecheẽ icuayãte. Ae eaquiatuãte, ùquĩ nda ndecheẽ icuayãte. Nyebe eriqui nguiã ñee aroneate Dios je nderese. Nyebe nandechẽẽ sí chõ nandesaã Dios je.

17 Coche jẽingo nguiã ñee Dios je. Jeñee sí quia nda aba saã Dios je re. Jẽ mbiamo cheẽ naa naa mose ee, jendesenda quia nda jeñee icuayãte nguiã. Ùquĩ mose ra jendesenda jemingo uquia reãte Jesús rese.

18 Mbiamo cheẽ aicua tuchite raque quia jẽsi co. Gracias, aete raque quia Dios je ùquĩ ñi co.

19 Dios quiato ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiamo cheẽ nda asaã eã ee. Mbiamo cheẽ icuayãte quia ñene. Emo nda ñee oco raque ee, icuayãte rae.

20 Mbiam riirĩ naate ra jẽingochĩ, Seresenda. Jendua quiatu secheẽ ndese mbiam cuasu rã. Coche jẽingo nguiã mbiam riirĩ na mbae icuã naa ndocoĩ.

21 ã ndei Dios cheẽ mbesa ji ã:

Mbiamo tamondo rei secheẽ nenei nenei sacuã ã serimba je.

Secheẽ nda esenei senei ndei serimba je mbiamo cheẽ je.

Aquere ra serimba secheẽ mumba i i tuchi querabe, i que Dios ra, i que embesa ji ra.

22 Jemo mbiamo cheẽ naa naa mose, Jesús quiatoã mundua sacuã Dios rese chõ ùquĩ nde. Jẽ Dios cheẽ nenei nenei mose, Jesús quiato mundua sacuã ño Dios rese chõ ùquĩ no nde.

23 Jesús quiato ñumunua nua mose u, sã mbiamo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese.

24 Coche jẽingo nguiã Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra hu#cuã ndese. —Seicuã tuchi chõ aico se re, i ra jeñee andu nde.

25 Ae rese ndua ndua uchiangui renda icuã nae, Espíritu Turã ae ra ùquĩ mbuchecua checua nguiã ee. Nyebe ra ngoi nguiã ndese ñee turã Dios je. —Dios riqui tuchi jendese a, i ra ñee jẽje.

Mbae jẽsaã turã turã ja chõ nguia jeñumunua nua mose

26 —Eĩ jenye quiatu quia ñumunua Jesús riĩ, ae ra jẽje cote. Emo irasei rasei. Emo mbiam mbaaquiato quiato Jesús riĩ. Emo Dios cheẽ icua icua mbiam je

no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbia mingo ja sacua Dios rese chõ uqui nde.

²⁷ Mbiamo cheẽ jesaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa.

²⁸ Jemo echeemo mbiasa aquiataũ mose, mbiamo cheẽ nda jesaã saãchĩ, jeñumunua mose. Jeñumunua eã mose quiatu mbiamo cheẽ jesaã saã jẽ ae Dios je.

²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua uqui ñee ndese. Eĩ ngue ra, i sacua. Eĩ eã ngue ra, i sacua abe echeẽ icua mose no.

³⁰ Emo chí mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rá nyii.

³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacua. Mbia siqui tuchi sacua Dios rese.

³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chí mose Dios cheẽ nenei nenei.

³³ Jemo ñee mose jenongue cheẽ cúa, Dios biãte uqui. Jeñee turã mose nyuuru uru, uqui nguia Dios bite re. Eĩ ja chõ Dios quiato nguiã iglesia jenda ja.

³⁴ Jeñumunua nua mose Dios riĩ, cuña mo nda ñeechĩ. Eĩ si que Moisés chimbasa no nda. Sã cuña ndiqui mbia cheẽ mumbayã mbei.

³⁵ —Uqui embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatusa mose. Cuña mo ñee aroneate Jesús quiato chumunua nua ite re.

³⁶ —Ichõiño nguiã ¿jenye quia secheẽ mose re? Jẽ nane je eã ngue Dios ñee ndesẽ. Jẽ mi je eã ngue Dios ñee ndesẽ.

³⁷ Secheẽ ae eã ambesa nguiã jẽje co. Dios cheẽ ño ambesa nguiã jẽje. —Dios que uquiracua mee seje ra. Ucheẽ nenei nenei sacua, i mose jemo ñee, sã uqui nane ñee serĩ. —Dios cheẽ tuchi chõ Pablo senei senei nguiã, sã i serĩ.

³⁸ Uqui secheẽ isi sereã mose, jẽhui chõ esi. Sã eaqiataũ ae riqui.

³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose jechẽ nda jẽsiquisã quisachĩ jẽ!

⁴⁰ ¡Mbae jesaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo riĩ nae, uqui sí rese chõ aico nguiã jemundua ndua co. Uqui ngue jëisi turãte. Jëingo beite uqui ndese uqui.

² Uqui ndiqui jemingo beite uqui, jëtesareia mose secheẽ si. Uqui jëingo Jesucristo icua iruã uqui.

³ Ae Dios senei senei seje nae, uqui nane ngue asenei senei jẽje ra: Jesucristo que mano nandeicua ndiquicharõ. Embesa ji cheẽ nguire.

⁴ Mbia que echati rei. Tres días mose que quera si. Embesa ji cheẽ nguire.

⁵ Quera si mose que nyecua Pedro je. Aquere que nyecua uchimbaaquiato doce je cote.

⁶ Quinientos uquiato je que nyecua cote. Hue equiatio chí ja mose ñumunua. Ūquí tubiriãte ríqui ã. Emo emo ngue mano nda.

⁷ Nyecua que Jacobo abe je cote no. Aquere que nyecua uchimbaaquiatu jaje cote.

⁸ Nyecua nyecua jare mbia je que nyecua chee se abe je cote ra. Sã cuña ndiqui erã mo mbua no, ūquí na si chõ aico rei nguiã se co.

⁹ Se quia señetê jiri ríqui nguiã Jesús chimbaaquiatu ataque si co. —Jesús chimbaaquiatu chõ se re, ae eã jiri quia co. Seicua tuchi quiatu ngue Dios quiato je nyii re.

¹⁰ Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri ríqui nguiã Jesús rese echimbaaquiatu ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese.

¹¹ —Aba Dios cheê senei senei tuchite quia reae, ure ãte equia co. Ūquíã ñene. Uresenei senei ja chõ equia ã ndesê. Jê ngue urechisenei senei jêisi turãte quia resê.

Mbia raaque quera si mose

¹² —Cristo que quera si manonde ra, ure que equia erenei nenei jêje. Urecheê ngue jêisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re.

¹³ ¿Cristo raaque bei namo nde? —Mbia raaque ra querayã mbei, jenye mose, ¿mañi Cristo raaque quera re no?

¹⁴ Cristo raaque quera si eã mose, eĩ nda ureico rei echeê nenei nenei iru chõ. Eĩ nda Jesucristo jêicua iru chõ ndei.

¹⁵ Cristo raaque quera si eã mose, eĩ nda ureico rei ñee ñooño Dios rii mbia je. —Dios que Cristo mbuquera si ra, ure bei equia ã ndesê. Mbia raaque quera si eã mose, i nda Dios Jesucristo raaque mbuquera si eã ndei no.

¹⁶ Mbia raaque querayã mose, eĩ nda Cristo raaque quera eãte rei no.

¹⁷ Cristo raaque quera eã mose, eĩ nda jêingo rei Cristo icua iru no. Eĩ nda jêingo rei jêicua nderequia beite no.

¹⁸ Eĩ nda Cristo quiato quiachã mbei rei manonde no.

¹⁹ A mii eã ño Cristo ríqui nguiã nanderese. Nandemanonde abe ra eriqui bei nanderese no. A mii mose, eĩ nda nandeya eã tuchite ríqui rei mbia mo si no.

²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no.

²¹ Adán mii nane ngue mano huiicua je cose ra. Nyebe nandeico nguiã mano mano mbei cote. Eĩ si chõ Cristo mii quera si nguiã cote. Nyebe ra uquiato mbuquera si ja cote.

²² Sã nandeico mano mano ja Adán ndui ã no, eĩ si ra Cristo nandembuquera quera no.

²³ Dios que Cristo rane mbuquera nandesi ra. Cristo tube mose, uquiato raaque ra embuquera ja cote.

²⁴ Cristo tube mose ra mbae ibi jenda ua ja cote. Mbia mo nda siquiã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote.

²⁵ Ererecurã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecurã.

26 Mbia mano mano mose, Cristo biâte ũquĩ. Ũquĩ abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii.

27 Dios que mbae mee ja Cristo je ra. Cristo mbae rerecua ja tuchi sacuã. —Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo.

28 Dios mbae mee ja mose Cristo je, Cristo ra ñimee Dios je cote no. Eriirite quia ñene. Eĩ nda Dios mbia rerecua ja tuchi cote.

29 Emo emo ño bautizar i nguiã eraaque rĩ ũquĩ. Eraaque quera si eã mose ¿mbaerã ũquĩ ndiqui bautizar i eraaque rĩ nde?

30 Mbia raaque quera eã mose, eĩ nda ureico rei Dios cheẽ nenei nenei âte mbia je co. Eĩ nda mbia riqui rei ureiquia serĩ serĩ âte.

31 Mbia “taiquia” i bei beite quia seje ã. Acheẽ ñooño eãte jẽje. Sã seyate riqui jendese co no.

32 Nyacua rã tuchi que Efeso jenda riqui seje ra. Ũquĩ ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeico rei ñee. —Mbae nandembei chooño. Mbae nandeu chooño. Mano mbei cote, i.

33 —Eĩ jenye quiatu ¡ichĩ nda mbia jembĩrĩ irĩ jẽ! Jeingo mose mbia icuã ndese, jembĩcuã icuã nda jẽ abe cote.

34 Jendua quiatu. Mbae turã nguiau jẽsaã saã nguia. Mbae icuã jẽsaã eã nguiau quia. Jemo emo ndiqui Dios icuayãte ũquĩ. Aba ireĩ tuchi quiareĩ ũquĩ.

Jesús quiato rete yasu ja ra cote

35 Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae.

36 Ndua eã ño nguiã ũquĩ. Sã nandeico mbae eĩ tiquia no. Mbae eĩ nda soõ suri sacuã cote. Eĩ si chõ nda nanderete soõ nandemano mose. Nanderete yasu sacuã cote.

37 Sã nandeico mbae eĩ tiquia no. Ei ra nandechitiquiayã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote.

38 —I ño nda ndei, i chõ Dios nguiã mbae eĩ jaje.

39 Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa rĩnda rete no nde. Ae mbebe quia, erete ae chõ ũquĩ no nde. Sira ae erete mo no nde.

40 Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re.

41 Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

42 Eĩ si chõ mbia raaque quera je re. Ae mbia raaque nandechitiquia quia nae, ũquĩ ndei soõ je ũquĩ. Ae ra quera si nae, ũquĩ nda soõ eã mbei cote. Manoa mbei ra eno.

43 Ae nandechitiquia quia nae, eraaque tuchi chõ ũquĩ nde. Ae ra quera si nae, enininya tuchi chõ ũquĩ cote re. Etiquia mose, equirãcuã nea tuchi chõ aqe mose re. Equera si mose, equirãcuã tuchi chõ aqe mose cote re.

44 ã nanderete nandereco ã nae, erete achõ ño ũquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ũquĩ nda manoa no.

⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque.

⁴⁶ ã nanderete nandereco ã nae, mano mano mbei arõte. Ûqui nane nandereco nanderete ã. Aquere quiatu ra nanderetemo nandereco cote. Manoa mbei sacua cote.

⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re.

⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ùqui cote.

⁴⁹ Ae Dios chao ibi je nyii nae, Adán i equia ee nae, aque rã si chõ nandeco nguiã nande abe namo ã. Aquere ra nandeco ibatenda rete rã cote.

⁵⁰ Nanderoo achõ ño nanderete re. Nanderuqui abe no. Ûqui oso aroneate ibate Dios récuua. Ae mano nguia soõ nae, ùqui nyo aroneate Dios récuua. Ae mbia riqi manoa mbeite nae, huee nanderoo oso aroneate.

⁵¹ Ae rese mbia riqi jiranuate nae, ùqui tasenei na jêje. Nandemano ja eã ndae. Nandechicabo ja chõ ndae.

⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose rã nandechicabo bei nandẽ abe cote.

⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote.

⁵⁴ Nanderete nyiicabo mose, ùqui mose ra embesa ji cheẽ io cote: “Nandemano ngue ua tuchi cote ra”, i ñi embesa ji re.

⁵⁵ Nanderasi ra nandequiayã cote. Ibicua ra nanderaarõ cote.

⁵⁶ Nandecua ño nandemano mbu quia nguiã nande je co. Moisés chimbesa chõ nandecua mbuchecua nguiã nande je co.

⁵⁷ Dios ra nandemano siquisã mbei nandesi cote Jesucristo riã. Nyebe nandeco nguiã gracias i tuchi Dios je ã cote.

⁵⁸ Seresenda ¡jeñimbirãcuã tuchi quiatu quia jê! ¡Jesucristo rese jêingo bei quiatu quia jê! ¡Echeẽ jêsenei senei mbei tuchi quiatu quia jê! Ae jêsaã saã nguia Jesucristo rese nae, jêsaã iru iruã ño nguiã ùqui.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ùqui tasenei jêje. Acheẽ ngue Jesús quiato je ra. Galacia jenda je ra. Eraã si chõ jêingo ae.

² Domingo mose bei jêingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi miite quia, sã aque co mi jiri rerecúe ofrendarã ae. Ûqui jemunua ño seso nonde jendea ae. Eĩ mose ra ofrendarã jêsaã eã seico mose jendese cote.

³ Secuasẽ mose huee, jeñimondo sacua mo jêirabo ño, ofrenda rerao sacua. Cartas nandemondo ùqui oo. Ofrenda rese. Ûqui nda amondo Jerusalén ña. Ofrenda rerao sacua hue jenda Jesús quiato je.

⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jêje cote.

⁶ Aico arete jiri ra jendese huee reae. Ama mose bei ra aico jendese huee reae. Eĩ jenye nda sembucuaata turã mondo cote, seso mose mbaranguiti.

⁷ Amaeño sereãte jendese secua mose. Aico arese rete jendese huee, Dios eno i mose seje.

⁸ Efeso taico are rã nyii. Fiesta de Pentecostés mose.

⁹ Dios cheẽ asenei senei arõ tuchite mbia je a. Mbia seanduse rete. Emo emo icuã icuãte riqui Dios cheẽ nenei nenei mose seje ã no.

¹⁰ Timoteo ngasẽ mose jẽje ijẽisi turã ño jẽ! ¡Sã eireĩ nguĩã tuchi jẽsi jẽ! Se rã si chõ eriqui bei nguĩã Dios cheẽ nenei nenei mbia je aque.

¹¹ ¡Nyebe jemo Timoteo isiteã eã jẽ! ¡Jembucuaata turã ño imbu seje jẽ! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. —Nde abe eso erea, ae rei que ee jeni nda. Oso sereã ngue namo nda. Osobi mose quia nda esi nguĩã jendea cote.

Pablo ñee huĩ bei

¹³ ¡Jendua tuchi quiatu quia jẽ! ¡Jesucristo jẽicua tuchi quiatu quia jẽ! ¡Jẽsiquicheã tuchi quiatu quia jẽ! ¡Jẽquirãcuã tuchi quiatu quia jẽ!

¹⁴ ¡Mbia rese jenyesequa tuchi quiatu quia mbae raã naa mose jẽ!

¹⁵ Seresenda, jẽingo Estéfanos chuchua jenda icua jate ũquĩ. ũquĩ nane tuchi ngue Jesús icua Acaya jenda nyii nae. ũquĩ ndiqui mbae mondo mundo bei Jesús quiato je ũquĩ. ũquĩ ndiqui mbae raã naa mbei Jesús quiato je ũquĩ.

¹⁶ ũquĩ na si chõ jẽingo. ũquĩ ñee nda jemumbachĩ. Ae Dios cheẽ senei senei nguia nae ¡ũquĩ ñee nda jemumbachĩ jẽ!

¹⁷ Seya tuchi Estéfanos ngaẽ mose serea. Fortunato abe. Acaico abe. ũquĩ ngue sembia tuchi ngaẽ jẽingoã mose a ra. Ae jẽsaã aroneate quia seje nae, ũquĩ ño ngue esaã ngaẽ seje a ra.

¹⁸ ũquĩ ngue sechiã mbucoite Dios rese ra. Jeñia abe mbucoite ereae. Gracias jenyeb bei ũquĩ je.

¹⁹ Jesús quiato Asia jenda ja chõ saludos mondo quia jẽje aque. Aquila abe saludos mondo quia jẽje aque. Priscila abe. Ae Jesús quiato ñumunua nua nguia ũquĩ nyuchua nae, ũquĩ ja abe saludos mondo quia jẽje Jesucristo rĩĩ aque.

²⁰ Jesús quiato a jenda ja saludos mondo quia jẽje aque. Jenyiquiaama ama ja quiatu quia Jesús rĩĩ.

²¹ Seo je tuchi co saludo ambesa mondo quia jẽje aque. Pablo tuchi chõ se re.

²² Emo nyesequayã mose Jesucristo rese, sã Dios embasi. Echu, Jesucristo.

²³ Jesucristo turã nda siqui jendese chã.

²⁴ Achesequa ja chõ nguĩã jendese Jesucristo rĩĩ co. Amén.

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

¹ Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jêje aque. Jesús quiato Corinto jenda ja je. Acaya jenda ja je abe no.

² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co.

⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacua abe chõ ñene. Mbae icuã tu mose ee.

⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo riã. Cristo riqui urembia tuchi ure abe ùqui mose co.

⁶ Ure mbae rasi raã mose, jêje chõ ñene. Ure mbae rasi raã mose nyii, jêingo sacua Dios rese chõ ñene. Ì nda jêya bei riqui mbae rasi raã mose. Dios ureya eã mbuquiachã mose, jêya eã mbuquiachã sacua abe chõ ñene. Eĩ nda jêmbirãcuã tuchi mbae rasi raã mose. Sã ureico mbae rasi raã ure no.

⁷ —Mbae icuã tu mose ee, ñmbirãcuã turã nda Dios riã, ure beite equia jeniã. Mbae icuã tu mose jêje, Dios ra jêya eã mbuquiachã jesi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. Ûqui ndese taembiirandu. Mbia que urecuayãte quia ra. Aete ureico ñmbirãcuã eã. —Mbae icuã nda hui eã mbeichĩ nandesĩ re, ure rei que equia ra.

⁹ —Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacua ño ngue ùqui nde. —Nande ae eã ñene, ure i sacua ño ñene. Sã Dios ae riqui mbia raaque mbuquera uquirãcuã je no.

¹⁰ Mbae icuã ureiquia serĩ nguia nae, ùqui si que Dios ae urerirõ nda. Ûqui si eriqui urerirõ ndirõ mbeiã. Ûqui si ra eriqui urerirõ mbei no. Ûqui ureicuate quiaã.

¹¹ Jê abe jeñee Dios je urerĩ no. Mbia tubiriã ñee mose Dios je urerĩ, Dios ra ùqui ñee ñandu. Dios ra uturã mondo tuchi ure je. Ûqui nda gracias i tuchi Dios je urerĩ cote.

Pablo oso jei eã Corinto

¹² Ure que mbia mo urembĩrĩ irĩãte quia ra. Jê abe mbĩrĩ irĩã no. Dios resendatẽ que ureico jêje ra. Ureyate mbae turã naa naa mose jêje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiato ae eã ngue ra.

¹³ Ae urembesa mondo quia jêje nyii, ùqui jêicuate raque quia ùqui. Urechimbesa checuate raque. Urechimbesa nda jêicua ja tuchi rã seje chã.

¹⁴ Jê seicua jiri raque quia ùqui. Jêya tuchi rã nda urerese Jesucristo tu mose chã. Sã ureyate riqui jendeseã no.

15 Sã jêyate riqui serese co no. Ûquí aicuate quia se abe co. Nyebe acheẽ ndei nguiã sechiangui re nyii. —Tasobe rã erea. †nda eyabe jiri sesobe mose erea, ae rei que se nyii ra.

16 —Seso mose Macedonia, taicha bei oso jendea, ae rei que se ra. —Obei abe nda aichabe erea chã. †nda mbae mo mee seje sembu bei sacua Judea, ae rei que se no nda.

17 Se ndua mose ùquí ndese, ¿eicuate ùquí nde? ¿Acheẽ ñooño ño se quia ùquí nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ùquí saã nguiã.

18 Sã Dios ñee ñooñoa no. Eĩ ure quia ure abe urecheẽ mbuchebiã jêje ã.

19 Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jêje resẽ. Timoteo rese. Silvano abe rese no.

20 —Mbae turã nda asaã jêje, i tuchi rei que Dios quia nande je nyii ra. Jesús rĩ ño eriqui nguiã ùquí naa naa nande je ã cote. Jesús rĩ ño nandeico nguiã Amén i Dios je ã cote.

21 Dios ae chõ nandembirãcuã mingo nguiã Cristo rese co. Nandemingo icúe umbaerã.

22 Dios que nandesisirõ umbaerã nda. Umbae marca que emii naanguia nanderese ra. Espíritu Turã ngue emondo nandechiangui re ra. Nanderereco quiatu sacua umbaerã.

23 Aso eã equia jendea nae, jêireĩ ngũĩã sacua ño asoã nguiã jendea aque mose. Seso sereã ae eã ngue eno nde. Acheẽ ñooño eã ño nguiã jêje co. Dios riqui sechiã icuate co.

24 —Jenderecuarã nda se, ae ãte quia co. —Co rese chõ jêingo ndua, ae aroneate quia jêje co. Taembia chõ Jesús rese. Ûquí mii ño asaã nguiã jêje. Jê ae chõ jeñimbirãcuã nguia Jesús icua ùquí.

2

1—Aso si eã nda ñee asi asi jêje jembia eã, ae que se ra.

2 Seso mose jembia eã, aba quia ra sembia se cote. Jê ño sembia quia resẽ.

3 Nyebe ambesa mondo jêje nyii resẽ. Jê mbae mbitirõ sacua seso nonde jendea. Seso sereãte que oso mae jêicua ndese ra. Sembia eã sacua. Jê nguia nda sembia nguiã ña. —Seya mose ra jêya jê abe, ae que se ra.

4 Ae ambesa mondo jêje nyii nae, ùquí mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguiã jêje. —Pablo ndua tuchichĩ nanderese, i sacua ño ngue ambesa mondo nguiã jêje.

Ae mbae icua saã nguia nyii nae, aque jêisi turã ño cote, i Pablo

5 Ae siqui ngu ninisi rese nyii nae, sembia eã tuchi chõ aque re. Se mii eã ngue sembia eã nda. Jemo abe abe mbia eã ngue ra.

6 Mbae rasi que esaã tuchi huicua nii cote ra. Jê emombo mose nyii. Jêisi turã ño cote.

7 Aque icua si jêtesarei chõ cote. Jêturã ño ee cote. Jembia jiri. †nda eya eã embicha eã Dios si.

8 Jenyesequa tuchi chõ nguia erese jê. Jêturã sí chõ ee jê.

9 —Ma secheẽ mumba eã, ae que embesa mondo jêje nyii ra.

10 Jêtesarei mose aque icua si, se abe atesarei chõ nguiã esi co. Jenii ño aico nguiã tesarei esi co. Cristo resa rae chõ aico nguiã tesarei esi.

11 Nandetesarei mose emo icuã si, Satanás siquiã sacuã nanderese chõ ñene. Sã Satanás ndiqui aba mbeiri iri mbeite no.

Sechiã ngue ngoi eã mbei Troas ra, i ñi Pablo re

12 Secuasẽ mose Troas Cristo cheẽ nenei nenei sacuã, Cristo que mbia mbuchiisaquia tuchi rei secheẽ andu ra.

13 Tito oreãte que seje huee ra. Nyebe sechiã ngoi eã mbeite nguiã. Nyebe “co acua quia co” ae nguiã hue jenda je. Macedõniaa ngue aso cote ra.

Dios uremingo turã mbeite quia Cristo rã co

14 Aico gracias i beite Dios je co. Ae chõ uremingo turã mbeite nguiã Cristo rã co. Ae chõ urembiracuã nguiã mbae icuã si co. Ae chõ ucheẽ senei senei uquia nguiã ure je mangue jenda choõnoa je co. Aba mbushimbusa rã tuchi chõ echeẽ nde. Sã aba mbushimbusa riqui mbae mbushimbu turã jate no.

15 Cristo riqui urechiangui re co. Nyebe ureico nguiã aba mbushimbusa rãte Dios je ã. Ure Dios cheẽ nenei nenei mose, emo emo ño echeẽ isi nguiã. Siqui bei sacuã. Emo emo ño echeẽ isiã nguiã no. Nyo: sacuã tata cuasu.

16 Ae ra nyo: tata cuasu nae, mbae shimbu icuã naanguia chõ Dios cheẽ ndiqui nguiã ee. Ae ra siqui bei quia nae, aba mbushimbusa turã naanguia chõ Dios cheẽ ndiqui nguiã ee. ¿Aba chõ eaquiato Dios cheẽ nenei nenei ña?

17 Ae Dios cheẽ senei senei ñoõno nguia nae, ñquã na eã ño ureico nguiã Dios cheẽ nenei nenei ure ã. —Mbae mo jembu rã ure je, ureã tuchi chõ nguiã Dios cheẽ nenei nenei mose jẽje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguiã ure. Ureico mingue chõ nguiã erenei nenei ure ã. Dios chõ ngue ureirabo nguiã ure. Cristo quiato chõ ure re. Dios résaã chõ ureico nguiã echeẽ nenei nenei ã.

3

Jesús cheẽ yasu nandereco quia ã cote

1 ¿Urecuasú uresaã saã si rei nguia jẽje ã nde? Tei. Jenyicua ja chõ ure resẽ. ¿Emo nda ureturã senei mbesa mondo jẽje re? ¿Emo nda jeturã senei mbesa imbu ure je re no? Tei. Nandechicua ja chõ equia ã ndesẽ.

2 Aico jenderequia beite sechiangui re co. Embesa ji rese mae na ño mbia riqui nguiã mae jendese ã.

3 Urechimbaaquiato chõ jẽ ndesẽ. Cristo chimbese rã ño jẽingo nguiã. Tinta je eã ngue jembesa ra. Espiritu Turã je chõ ngue jembesa nguiã. Sita eã ngue Cristo mbesa nguiã. Jẽña ño ngue embesa nguiã.

4 Cristo chõ ã icua nguiã seje. Dios résaã chõ aico nguiã ñee jẽje ã.

5 Sequiracuã ae je ra mbae aicuyã. Dios chõ uquiracuã mee nguiã seje mbae icua sacuã.

6 Dios chõ uquiracuã mee nguiã seje, ucheẽ yasu renei nenei sacuã. —Embese ji cheẽ jemumbayã mose ra jaemingo bei, i ãte Dios quia nande je ã. Espiritu Turã ae chõ aba mingo bei nguiã. —Embese ji cheẽ tamumbayã mbei chõ nguia seico bei sacuã, i mose emo, aque ra siqui bei eã. Espiritu Turã ae nandemingo beisa re.

7 Sita mbesa ji Moisés quereco quia nae, mbae nininya tuchi que eriqui aque mose ra. Mbia mae sayã tuchi que Moisés ruba riqui ra. Moisés ruba nininyate quiato ngue eriqui nguiã ee. Enininya que uque uquete oso quia cote ra. Moisés chimbese mbia mingo bei aroneate. —Mbia siqui icuã mose, mbia ra mano, i que Moisés chimbese mbia mbiirandu ra.

⁸ Mbae nininyate raque aque mose. Ae Jesús cheẽ yasu nandereco namo ã nae, ùquĩ nguiarei enininya tuchi Moisés chimbesa si.

⁹ Moisés chimbesa quiatu que mbia mbiirandu tuchi huicua ndese ra. Jesús cheẽ yasu quiarei nandembiirandu nandeicua mbitirõ ndese. Jesús cheẽ yasu quiarei enininya tuchi Moisés chimbesa si.

¹⁰ Moisés chimbesa quiarei enininya eã jiri Jesús cheẽ yasu si. Jesús cheẽ yasu quiarei i tuchi Moisés chimbesa si.

¹¹ Moisés chimbesa que siqui bei sacua eã nda. Jesús cheẽ yasu quia siqui bei sacua nde. Nyebe Jesús cheẽ yasu enininya tuchi Moisés chimbesa si re.

¹² Jesús cheẽ yasu ra siqui bei. Ùquĩ nandeicuate quia ã. Nyebe ureico nguiã ñee tuchi jêje ã. Mbae mbuchecua tuchi jêje.

¹³ Moisés rã eã ño ureico nguiã ure ã. Moisés que nguba chatite quia aque mose ra. —Í nda judíos mae eã seruba nininya que rese, i.

¹⁴ Judíos que Moisés chimbesa icuayãte quia ra. Namó abe eicuayãte. Emo leer i mose Moisés chimbesa je judíos je, icuayã mbeite. Ae siqui Cristo rese nae, ùquĩ mĩ ño Moisés chimbesa icua nguiã.

¹⁵ Namó abe judíos Moisés chimbesa icuayãte quia ã. Emo leer i mose ee, echecuayã mbeite riqui ee ã.

¹⁶ Emo uba mose Jesús rese, Moisés chimbesa abe ra echecuate ee cote.

¹⁷ Jesús si rei Espíritu Turã. Nandeico mose Espíritu Turã ndese, ae chõ nandembui mingó nguiã Moisés chimbesa si ã.

¹⁸ Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espíritu Turã abe siqui i i chõ nguiã nanderese. Nyebe nandeico i i nguiã Cristo rã ã.

4

¹ Dios turãte eriqui ure je co. —Jesús cheẽ yasu jêsenei senei mbei mbia je, i Dios quia ure je co. Nyebe ureico nguiã ñimondocho ãte echeẽ nenei nenei mbia je ã.

² Mbae icua asaã saã nyecuayã eãte quia co. Ae aba ireĩte riqui nae, ùquĩ asaã saã eãte quia co no. Mbiambirĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui si tuchi chõ aico nguiã erenei nenei co. Dios résaa chõ aico nguiã erenei nenei co. Secheẽ ñoñoa mbia icuate raque quia uchiangui re ùquĩ.

³ Ae asenei senei mbeite quia Jesús rĩ nae, echecuayã eã ño ùquĩ nde. Ae ra nyoĩ tata cuasu nae, ùquĩ mĩ je chõ echecuayã nde.

⁴ Jesús icua eãte quiatu nguiã. Nyebe aba checuayã nderecua riqui nguiã embaaracuayã Cristo cheẽ turã ñi co. Nyebe eriqui nguiã Cristo nininya icuayãte co. Dios rã tuchi rei Cristo.

⁵ Se mbia mbaaquiato quiatu mose, serĩ eã ño aico nguiã ñee ee. Jesucristo rĩ ño ñene. Ae rei mbia rerecuarã tuchi. Jenimba rã ño aico nguiã Jesús rĩ se co.

⁶ Dios que nyaashĩ saã nyii ra. Itondaru beire nyii. Ae sí que nandembaaquiato quiatu Jesucristo rĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã si.

Dios ae rese aico co, i ñi Pablo re

⁷ Ure ae urenininya eãte raque. Tuchu achõ na ño ureico nguiã Jesucristo nininya siquã mose urerese. Dios ae chõ uquirãcuã mee nguiã ure je co.

⁸ Mbae icuã tã i bei beite raque ure je. Urechimondocho eã mbei rae. Mbae aba mbecoteã chĩchĩte raque. Urehui eã mbei ra Jesús si.

⁹ Mbia siqui icuã icuãte raque ure je. Dios quia hui ãte nguiã uresi co. Mbia ureririrõte raque. Urembui eã mbei quia nda Dios si re.

¹⁰ Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacuã Jesús quirãcuã ndese chõ ùquĩ nde. Ae quera si nae, aque quirãcuã ndese mae sacuã ño ùquĩ nde.

¹¹ Ureico raque ure ã. Mbia ureiquia serĩ serĩ mbeite quia Jesús rĩ ã. Jesús quirãcuã siqui sacuã urerete quirãcuã nea ndese chõ ùquĩ nde. Mbia mae sacuã Jesús quirãcuã ndese chõ ùquĩ nde.

¹² Uremano serĩ serĩte equia ã. Jẽingo turã sacuã Jesús rese chõ ùquĩ nde.

¹³ Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee.

¹⁴ Sã Dios quirãcuã Jesús raaque mbuquera no. Eĩ si ra Dios nandembuquera Jesús rĩ nande abe. Ae ra nandemingo turã ja ujii cote.

¹⁵ Seje mbae icuã icuã mose, jemingo turã sacuã ño ùquĩ nde. † nda Dios uturã mee mbia tubiriã je. † nda mbia tubiriã gracias i tuchi Dios je. Dios iate mbia ùquĩ naa mose.

¹⁶ Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangui re ã.

¹⁷ Ae rasi uresaã nguiã ã nae, ùquĩ ndasi ra ua jei chõ. Ûquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote.

¹⁸ Ae rese nandeico mae mbae nae, ùquĩ nda ua jei. Ae rese nandeico mae eãte nae, ùquĩ nguiã ra ua eã mbei. Nyebe ureico nguiã ndua mbae nandemae sayã ndese.

5

¹ Sã tuchua riqui shii jeite no jẽ. Eĩ si chõ nanderete no nde. Mano jei. Mbia serete iquia mose, tuchua ao ji mo ñi ibate seraarõ arõ pe. Dios chisaã ño hue re. Hue tuchua ra shii eã mbei. Mbia chisaã eã ño ñene.

² Tuchua mo na ndei nanderete. Shii jei. Co serete rerequia mose, aico jjabute co. Co aico oso sete sechuchua ibatenda rea co.

³ † nda serete yasu areco bei pee ibate.

⁴ Tuchua mo na ndei nanderete. Co serete rerequia mose, aico jjabute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote.

⁵ Ûquĩ je chõ ngue Dios sererecoquiato nguiã. Semingo turã mbei ra cote. Nyebe Espiritu Turã mondo nguiã seje. Sembiiirandu sacuã ùquĩ ndese. Dios Espiritu Turã mondo mose seje, umbae marca miã naanguia serese chõ ùquĩ nde.

⁶ Nyebe aico nguiã ñimondocho eãte co. ã nanderete rerequia bei mose, eĩ nda nandeso aroneate rei ibate siqui Jesús rese.

⁷ Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co.

⁸ Nyebe aico nguiã ñimondocho eãte co. Co serete ajae bite raque oso sacuã ibate siqui bei nonde Jesús rese.

⁹ Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no.

¹⁰ Cristo résaa ra nandecu ja emo mose. Ae nanderea sacua. Nandecua sacua. Ae mbae turã saã saã nguia siqui mose íbii nae, Cristo ra mbae turã mondo úquí je pee cote. Ae mbae icua saã saã nguia siqui mose íbii nae, úquí je ra Cristo mbae icua mondo

Dios ae nandemingo turã nguia uchiese Jesucristo ríi co

¹¹ Aba siquichesa tuchi cho Dios re, mbia siqui eã mose erese. Nyebe ureico nguia mbia mbuti mbuti tuchi co. Dios ríqui ureicuate co. Jé abe jéingo ureicuate úquí ndenoae.

¹² Á ureico urecuasu raã naa si áte raque ã. Jembia sacua ño ureico nguia ñee ureríi sí ã. Í nda jeñee aqiatu mbia icua ñee ndibishorõ. Ae uturã saã ñoõno nguia nae, úquí ñee ndibishorõ sacua ño ñene.

¹³ Urearacuayã mose, Dios cheẽ ndese siqui sacua ño ñene. Urearacua mose, jembaaqiatu sacua ño úquí no nde.

¹⁴ Sã Cristo nyesequa tuchite nanderese no. Ae chõ sembuti mbuti nguia co no. Cristo que mano nande ja je ra. Nyebe nande abe nandemano ja nguia erese.

¹⁵ Cristo que mano nande ja je ra. Ae nandebite ríqui nae, úquí ndese nandeco eã sacua ño Cristo mano nguia. Ae Cristo bite ríqui nae, úquí ndese nandeco sacua nguia ngue Cristo mano nguia. Nande je que Cristo mano nda. Nande je que Cristo quera si no nda.

¹⁶ Jesús quiatoã na eã ño ureico nguia mae mbia rese ã. Urechesequa chõ nguia mbia rese ã cote. Urechesequa eãte raque Cristo rese nyii.

¹⁷ Emo ñimbucha mose Cristo rese, mbia yasu rá ño úquí cote re. Ae esaã saã nguia mbae icua nyii nae, úquí si que hui ja cote ra. Mbae yasu ja chõ ee cote re.

¹⁸ Dios ae úquí saã ja nguia nande je co. Dios ae nandemingo turã nguia uchiese Jesucristo ríi co. —Mbia emingo mingo bei serese sequia torã jẽ, i que Dios seje ra.

¹⁹ —Sã mbia sequitorã ja, i que Dios Cristo ríi nda. Úquí je chõ ngue Cristo mano nguia. Mbia icua mbutiã sacua esi chõ ngue Cristo mano nguia. —Mbia emingo mingo bei serese sequitorã jẽ, i que Dios seje ra.

²⁰ Cristo chõ sembucheẽ nguia co. Secheẽ ae eã ñene. Dios ñee na jẽje chõ aico nguia ñee jẽje co: Dios quiatorã ño jéingo jẽ.

²¹ Mbae icua ño ngue Cristo saã eãte rei ra. Dios que mbae icua naasa saã tuchi ee ra. Dios nandemingo turã mbei sacua ño úquí nde. Sã Dios nandemingo turã mbei nandeco mose Cristo rese no.

6

¹ Dios resenda chõ ureico nguia Dios cheẽ nenei nenei ã. Dios turã jëisi choõnoa ño nguia jẽ. Jëisi tuchi quiatu jẽ.

² Eí ngue embesa ji hui Dios cheẽ nda:

“Jeñee mose seje, jeñee ngue achandu ra.

Aendirõ ngue mbae icua si ra”, i que Dios mbi a je cose ra,

i ñi embesa ji re. Namõ ño Dios ríqui nguia aba cheẽ anduse co. Namõ ño Dios ríqui nguia mbia rirõse eicuã si co no.

³ Á ureico mbia mo mbírí rí eãt e ã. Í nda mbia urecheẽ andu turã Jesús ríi.

⁴ Mbae ursaã turã sete quia ure ã. —Dios rimba turã ño úquí nde, i nonde mbia ure ríi. Nyebe ureico nguia ñimbirãcuã tuchi mbia icua mose ure je ã. Mbae tiã mose abe ure je.

⁵ Ureiruã nua ngue equia ra. Uretarõ tarõ mbei que equia ra. Urerecoteã mbei que eriqui ra. Ureque reã tuchi que equia ra. Uteriãcuã tuchi que eriqui no nda.

⁶ Ūquĩ icuã eĩ eĩ mose ure je, ureico turãte que equia ra. Ure que Dios ureicuate quia ra. Urechimbirãcuãte que equia ra. Ureico turãte que equia mbia je no nda. Espíritu Turã ngue siqui tuchi urerese no nda. Urechesequa chooñoa ngue equia mbia rese no nda.

⁷ Dios cheẽ ichoñosa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ũqui mĩ ño urereaquiato bei nguã co.

⁸ Emo emo mose mbia riqui ñee turã urerĩ ã. Emo emo mose mbia ñee icuã urerĩ no. —Aba mbĩrĩ irĩsa, i tuchi que mbia quia ure je emo emo mose no nda. —¡Ae bei jẽ! i tuchi que equia urecheẽ je emo emo mose no nda.

⁹ Mbia riqui urerirõ ndirõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no.

¹⁰ Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubirã tuchi re.

¹¹ Urecheẽ nyecuate que jẽje ra. Urecheẽ ngue jembĩrĩ iriã tuchi quia ra, Corinto jenda. Ureico nyesequa tuchi jendese a.

¹² Ure que urechao eã jẽsi ra. Jẽ nguĩatu ngue jenyao nguã ure si.

¹³ Sã mbia mo ndiqui ñee nguĩrĩ je no. Eĩ ae chõ nguã ñee jẽje. Jendu rã ño aico nguã jẽje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chõ jendete re

¹⁴ Dios quiatoã ndese ra jeñimbuchachĩ jẽ. Dios quiatoã na eã ño jẽ nde. Sã mbae turã ndiqui mbae icuã mbiroã no. Sã nyaashĩ ndiqui itondaru mbiroã no.

¹⁵ Sã Cristo riquiã Satanás ndese no. Eĩ si chõ Cristo quiato siqui aroneate nguã Cristo quiatoã ndese no.

¹⁶ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ũquĩ. Sã Dios ñee ã no:

Erete ye ra aico. Ererecuarã nda se.

Mbia ra siqui serui,

sã i Dios no.

¹⁷ Dios cheẽ ño ã no nde:

Jẽhui chõ mbae icuã si. Icuẽ jẽingo.

Mbae icuã ndese ra jẽocochĩ.

Jaẽisi turã nda se chã.

¹⁸ Jendurã nda se chã.

Seriirina nda jẽ ña.

Sequirãcuãte se,

i que Dios cheẽ mbesa ji ra.

7

¹ Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirõ mbei. Cochee chõ nandeico Dios je. Nandereco nandemee tuchi ee.

Seyate aico jendese co cote, i ñi Pablo re

² Ureisi turã ño jê. Mbae icuã mo ngue uresaã ãte jemo je ra jê. Ureico que equia jembirĩ irĩ ãte ra jê.

³ Jêicuã i sacuã eã ño aico nguiã ñee jêje. Achesequa tuchite quia jendese co. Semano mose chee. Sã ñi acheê jêje nyii no.

⁴ Seyate aico jendese co. Secheẽ nda emumbayã, aete se quia jenĩ co. Mbia icuã icuã mose seje, seyate aico jendese co.

⁵ Urechu que aa Macedôniaa, aque mose bei que urerecteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra.

⁶ Dios que sechiã mbocoi Tito ngasẽ mose cote ra. Sã Dios riqui uquiato mbia beite eya eã mose no.

⁷ Tito mĩ ndese eã ño seya re. Seya tuchi que sembiirandu mose jendese no nda. Jê nane ngue jeñee Tito mbirãcuã nda. Aquere que Tito ru sembirãcuã cote ra. —Hue echĩ ndua tuchite nderese huee, i que u ñee seje ra. Nyebe seya tuchite riqui nguiã jendese. Jêtesarei eãte quia equia sesi reãẽ.

⁸ Ae ambesa mondo jêje nyii nae, ùquĩ ngue jembia eãte rei ra. Erea ramo mose. —Amondo jirichĩ nguia, ae rei que se quia nyii ra. —Amondo jirichĩ nguia, ae ãte se quia co cote.

⁹ Seyate aico jendese co cote. Jêya eã ñi eã ño ñene. Jeñĩmbitirõ nguiatu ngue re. Maende sechimbese rese. Sechimbese jembia eã mose jêicuã ndese, Dios rese que jendua cote ra. Sechimbese chõ jemingo turã nguiã cote.

¹⁰ Emo ia eã ñooño mose huĩcuã ndese, ùquĩ nda nyoĩ tata cuasu. Emo ia eã tuchi mose huĩcuã ndese, hui ra huĩcuã si cote. Dios ra emingo bei cote. —Ahuĩ jirichĩ nguia seicuã si, iã tuchi rae.

¹¹ Sechimbese oso mose jêje, jêya eã tuchi que jêicuã ndese ra. Nyebe Dios ia tuchi riqui nguiã jendese. Jendua tuchi que ra. —Mbae icuã ngue uresaã eãte resẽ, jenyẽ eãte que ra. Mbae icuã ndese que jemaẽ sereã tuchi cote ra. Jêireĩ ireĩte que equia mbae icuã si ra. Jemaẽ sete que equia serese ra. Ae siqui ngu ninisi rese nae, aque que jemombo cote ra. Mbae que jêsaã turã jate ra. Eicuãte i aroneate que emo nguia jêje ra.

¹² Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jê ja je chõ ngue ambesa mondo nguiã. —Pablo riqui nyesequa tuchichĩ nanderese, i ja nonde chõ ngue ambesa mondo nguiã.

¹³ Nyebe ureya tuchi riqui nguiã jendese co cote. Jê ngue Tito abe jembia cote ra. Jê hui mose mbae icuã si. Seirandu mose ùquĩ ndese que seya tuchi se abe cote ra.

¹⁴ Sã ñi aico jêturã nenei nenei Tito je nyii no. Eĩ jenyẽ si tuchi equia siqui turãte ùquĩ. Nyebe seireĩ nguiãte riqui nguiã ñee jenĩ ùquĩ. Acheẽ ñooñoa ngue jêturã ñi Tito je ra. Sã aico ñee ñooñoa emo mose jêje no.

¹⁵ Tito riqui nyesequa i ite jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jêingo ee ra. Jêisi turãte quiatu que equia ra.

¹⁶ —Ùquĩ nda siqui tuchi Dios rese, ae tuchi se quia jenĩ co. Co seyate aico jendese co.

8

Jembae jemeẽ jiri quia Dios je

¹ Jesús quiato Macedonia jenda tasenei jêje cote, Seresenda. Hue jenda ja iglesias. Dios turã tuchi que eriqui ùquĩ ja je ra.

² Mbia icuâte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je.

³ Umbae que emee tuchi ra. Embae tubiriã eã ndaque. Abei tuchi quiatu ngue re. Emae ngue erese ra.

⁴ —Ure abe ra urembae uremee tuchi Jesús quiato je, i tuchi que seje ra.

⁵ Mbaechõ eã ngue emee Dios je ra. Nguete rane ngue emee ee ra. Ure je abe que nguenco mee nda. Mbae turã naa naa mbei sacua ure je Dios rii. Aquere que umbae mee tuchi Jesús quiato je cote ra.

⁶ Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. —Tamunua nua ja, sã i no.

⁷ Sã jëingo Dios icua tuchi no. Sã jëingo Dios cheë icua jate no. Sã jëaquiatute mbia mbaaquiato no. Sã jëingo sete riqui Dios cheë ndese no. Sã jëingo nyesequate serese no. Nyebe jembae jemee tuchi quiato ofrendarã cote.

⁸ —Secheë nguire quiato jembae jemondo Dios je, ae âte se quia co. Jë ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no.

⁹ Nandererequa tuchi chõ Jesucristo re. Jesucristo turã jëicuate quia ùqui. Mbaecha tuchi rei que ae ereco mose ibate ra. Mbaecha reã ngue esaã tuchi u ibii nande je ra. Erii ño Dios riqui nguiã mbae mondo tuchi nande je. Ae mbaecha reã naa mose u ibii.

¹⁰ Tacheë tuchi rã jëje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jë nane ngue “ofrenda nandemondo” jenyee Macedonia jenda si ra. Cosete que jeñee ñee. Jemondo turã cote.

¹¹ Ae ra jemondo nae, ùqui ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mii mose, co mii jemondo ee.

¹² Nande mbae mo meese mose, Diobi tuchi chõ ùqui nde. —Mbae tubiriã embu seje, iã nda Dios mbaecha reã je.

¹³ —Jembae jemondo ja tuchi mbaecha reã je, ae âte quia jëje co.

¹⁴ Sã jembae nyiabiã jiri mbaecha reã mbae rese. Sã jembae tubiriã namo no. Eme sacua ùqui je. Emo mose ra ùqui mbae tubiriãte no. Emondo sacua jëje jembae eã mose no. Ùqui mose ra jembae nyiabiã jiri ja cote.

¹⁵ Sã embesa ji riqui ñee no:

Ae mbae tubiriãte nae, embae rire eãte que ra.

Ae embae miite nae, embae que ua eãte ra,
i que embesa ji ra.

Tito ra nyoi jendea, i Pablo

¹⁶ Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguiã gracias ite Dios je co.

¹⁷ Tito si quia jendea aque. Secheë nguire achõ eã esi nguiã jendea aque. Ae abe que ndua jendese ra.

¹⁸ Tito rese Jesús quiato mo amondo quia jendea aque. Jesús quiato ñee turã jate quia aque rii aque. Jesús cheë nguiatu esenei senei mbeite nguiã aque.

¹⁹ Jesús quiato que aque irabo ra. Oso sacuã serese. Ofrenda munua nua sacuã serese. Sã ureico ofrenda munua nua Dios mbia sacuã no. Mbia “abe!” i sacuã jêje.

²⁰ Ae que siqui beite urerese ofrenda isi isi mose ra. Mbia ñee icuã eã sacuã ure rîi. “Ofrenda que embuquiachã nda”, i eã sacuã mbia urerîi.

²¹ Mbae uresaã turãse rete quia ã. Dios ia tuchi sacuã ure rese. Mbia abe ñee icuã eã sacuã ure rîi.

²² Ureresenda mo abe uremondo quia ũquí ndese aque. Ae quiarei mbae raã naase bei Dios je. Oso sete equia jendea co.

²³ Tito rei seresenda tuchi. Siqui bei que equia serese Dios cheẽ nenei nenei mose ra. Ae nyoï quia jendea Tito rese nae, iglesias chõ emondo nguiã jendea ũquí. Cristo quiato tuchi chõ ũquí nde.

²⁴ Ũquí jêisi turã ja chõ jê. Sã urecheẽ ee jeni nyii no. —Jêisi turã ndae. Nyesecua tuchi ra jendese, ure que ee nyii ra. Nyebe jêisi turã ño. Eĩ nda iglesias jenda ja abe “eturã” i jeni.

9

Jembae ofrenda jemunua ja rã emondo sacuã mbaecha reã je

¹ Aete aico embesa eã jêje ofrenda rîi. —Ae ae chõ nda mbae mo mondo nguiã Jesús quiato je, se ñee mose rocoï ee, ae que se ra.

² Jê ae chõ mbae jemondose nguiã Jesús quiato mbaecha reã je ũquí. Jeni ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ũquí, ae se quia Macedonia jenda je jeni co. Nyebe ũquí abe riqui nguiã mbae mee sete ee cote. Jirandure jendese.

³ Aque mbia amondo quia jendea aque. Jê icoquiato sacuã. Mbae jemondo sacuã Jesús quiato mbaecha reã je. Ureireite ra jê ofrenda mondo eã mose se ñeende jeni nyii.

⁴ Seso mose jendea, Macedonia jenda mo abe ra nyoï serese reae. Jê ofrenda munua eã mbei mose, ureireite ra urecuasẽ mose hue.

⁵ Nyebe ã nane amondo nguiã jendea aque. Jembae ofrenda munua ja sacuã. Ae rîi jeñee ndei tenda nongue mose. —Ofrenda jemunua na, ae bei sereãte se. Jê ae chõ ofrenda jemunua nua, jenyesequa mose mbia rese.

⁶ Jendua rã ã ndese: Ae mbae mii jiri chitiquia quia, aque ra mbae a ucua mii jiri. Ae mbae chitiquia tuchi quia, aque quia ra mbae a ucua tuchi.

⁷ Mbae ata nandemondose mose nandechiangui re, mbae ata nandemondo chõ. Mbae mii nandemondose mose nandechiangui re, mbae mii nandemondo chõ. —Mbae amondo jirichĩ, nande mose nandechiangui re, eicuãte ũquí. Ae eyate riqui umbae mee mose emo je nae, Dios bite ũquí.

⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacuã nandes. Mbae nandemondo mondo bei sacuã Dios quiato mbaecha reã je.

⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.
Echisaã turã si ra mbia tesareï eã mbei,
i que embesa ji ra.

¹⁰ Dios chõ mbae eĩ mondo nguiã nande je etiquia sacuã. Dios chõ mbae mondo nguiã nandechiurã no. Dios chõ “jabei chõ jê jê!” i nguiã nande je. Dios chõ mbae mee nguiã nande je emondo sacuã mbia mo je.

11 Dios ra mbae mondo tuchi jêje. Eĩ nda jê mbae jemondo tuchi ofrendarã. Se jeñimee ofrenda mondo mose mbaecha reã je, gracias i tuchi ra Dios je cote.

12 Nande mbae mo mondo mose Jesús quiato mbaecha reã je, quiaru turã jiri ra equia cote. Ûquiño eã nda esaã nguia. Gracias i abe ra Dios je.

13 Jê mbae mo mee mose Jesús quiato mbaecha reã je, mbaecha reã nda ñee turã Dios je jeni cote. —Cristo cheẽ emumbayã tuchi quia ã, i ra jeni cote. —Eriqui mbae mee tuchichĩ mbia ja je, i ra ñee turã jeni cote.

14 Mbaecha reã nda ñee tuchi jeni Dios je cote. Dios jendeaquiato sacua. Mbaecha reã nda ndua tuchite jendese cote. Jê mbae mondore ee nyii.

15 Dios quiatu que mbae turã tuchi mondo nande je ra. Nyebe nandeico nguiã gracias i ee.

10

Mbia mbaaquiato sacua ño Dios semĩ nguiã

1 Se rei Pablo. Tacheẽ nyecua jêje. Nandeico mingue chõ nguia Cristo rã si jê. Cochee chõ nandeico Cristo rã si jê. —Cochee chõ Pablo riqui nguiã siqui mose nanderese. Siqui eã mose nanderese, ucuasu esaã saã ño nguiã aque, jenye chõchĩ equia serĩ ùqui.

2 Mbae jesaã turã turã ja chõ nguia. I nda acheẽ asi asiã jêje seso mose jendea. Emo emo ñee icua ño nguiã serĩ. —Dios je eã ño Pablo riqui nguiã mbae raã naa, i serĩ. Ûquí je quiatu acheẽ asi asi arõte nguiã.

3 Mbia chõ ndaque se. Mbia quirãcuã je eã ño aico nguiã mbae raã naa co. Dios quirãcuã je chõ aico nguiã mbae raã co.

4 Sequirãcuã je eã ño aico nguiã mbae raã. Dios quirãcuã je chõ ñene. Nyebe aico nguiã mbia icua ndiquisã quisã co. Mbia icua quirã cuãteraque.

5 Ae mbia mundua icua icua nguia Dios rĩ nae, ùqui asiquisã quisã ño nguiã co. Mbia amundua turã ja quia Cristo rĩ co. Cristo cheẽ mumbayã sacua cote.

6 Jê nane Dios cheẽ jemumbayã na jê. Aquere ra Dios cheẽ mumbasa amombo ja cote.

7 Mbia chiangui renda rese jemaẽ ate. Earonda rese chõ jẽingo nguiã mae. —Cristo mbae chõ se re, i mose emo, ae mĩ eã ño Cristo mbae re. Se abe chõ ñene.

8 Se ecuasu raã naa mose, seireĩ ngũiate. Dios quiatu ngue semĩ nguiã ererecuarã. Jembaaquiato turã sacua ño ngue Dios semĩ nguiã ererecuarã. Jembĩcuã sacua eã ño ñene.

9 Jaembusiquiche sereãte sechĩmbesa je.

10 Mbia ñee icuate raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia serĩ ùqui. —Siqui mose nanderese, ererecua raã naa aquiatuãte cote, i jemo nguia serĩ ùqui.

11 Ae ñee nguia ùqui nae, ùqui je tacheẽ. Co secheẽ asi asi ambesa mondo quia jêje aque nae, anyae sí ra ñee asi asite seso mose jendea huee. Secheẽ mbesa ji ra achabiã seso mose jendea huee.

12 Ae ñee mbeite quia uturã ñi, ùqui na eã ño se re. —Aque rã si chõ aico nguiã se co, i beite equia ùqui. —Seturãte aico aque si co, i beite equia ùqui no. Ûquí ñee mose ùqui, earacuayãte riqui ùqui.

13 Seturã nda asaã saã eã. Dios ae chõ “hue eso, pe eso”, i nguiã seje co. Ae chõ ngue semondo nguiã jendea.

14 Se rane ngue Dios semondo jêje Cristo cheẽ nenei nenei sacuã nda. Nyebe hue jenda ja sembaerã, se embaaquiato sacuã Dios cheẽ ndese. Ae Dios riqui “hue eso” i âte seje nae, huee ra asoã.

15 –Sechimbaaquiato chõ ùquĩ nde, ae aronea tuchi te quia emo ñimbaaquiato je co. Jê Cristo icua i i tuchi mose, jendobeinda quia ra ambaaquiato i i tuchi oso cote reae.

16 Seso sete jendobei Cristo cheẽ nenei nenei hue jenda je. Sechimbaaquiato ae aroneate emo ñimbaaquiato je.

17 Emo ñee turãse mose mbae mo nã, sã Dios rĩĩ nguiatu ñee turã.

18 Ae uturã saã saã nguia nae, Dios biãte ùquĩ. Ae rĩĩ nguiatu Dios riqui ñee turãte nae, ùquĩ nguiatu Diobi tuchi re.

11

Mbia mbaaquiato icuã icuãsa rese ra jẽingochĩ

1 Jẽĩmbirãcuã jiri se ñee mose jêje jê. Seturã tasaã saã jiri ñee jêje.

2 Aqueteãte jendese jê. Dios mbaerã jê, ae que se ra jê. Sã acuanĩ mo ndiqui siqui eã mbei ngu mo ndese no. Sã mbia emee acuanĩndu mo je cote no. Eĩ tae si chõ jemee Cristo je. Cristo mĩ mbaerã nda jê cote chã.

3 Sã mbei Eva mbĩrĩ irĩ cose no. Eĩ jenyete si arõte jê ndeae. Eĩ si arõ mbia jembiãcha Cristo icua si. Jemundua icuaãte chõ nda reae. Cristo mĩ ndese chõ jẽingo jê. Sã acuanĩ ndiqui ngu mĩ ndese no.

4 ¿Mbaerã jenyiisaquia turã mbia jembaaquiato icuã icuã mose re? Mbia Jesús abareã nenei nenei mose jêje re. Mbia Espĩritu Turã abareã abe renei nenei mose jêje re. Mbia Jesús cheẽ turã abareã nenei nenei mose jêje re no. Se que ùquĩ asenei senei âte quia jêje resê.

5 Ùquĩ ñee ndese que jenyiisaquia, ¿mbaerã nda jenyiisaquia eã secheẽ abe rese re? Se quia Jesús cheẽ aicua tuchi quia ùquĩ si co resê.

6 Secheẽ turã eãt e raque. Seaquiature quia aico nguiã Dios cheẽ ndese co. Jẽingo seicuate ùquĩ ndesê.

7 –Mbae jemondo seje, ae âte que se quia Dios cheẽ nenei nenei mose jêje ra. ¿Eicuãte ùquĩ nde? Aico minguate que se quia jêje ra. Jẽingo turã sacuã Cristo rese. ¿Eicuãte ùquĩ nde no?

8 Seico mose jendese jembaaquiato quiato mose, mbae mo ngue jemee âte quia seje ra. Jesús quiato ishonda quiato que mbae mo mee mee nguia seje ra, se siqui mose jendese.

9 Seico mose jendese que mbae jemondo eãte seje resê. Sembae eã mose que “mbae embu seje” ae âte jêje resê. Jesús quiato que ngaẽ Macedonia si nae, ùquĩ nguiatu que mbae mee tuchi sembae eã mose resê. “Mbae embu seje” ae eã mbei ra jêje.

10 Cristo riqui sechiangui re co. Ùquĩ aicuate. Sebite “mbae embu seje” iã mose se jêje. “Acaya jenda que mbae mee tuchi ndeje ra”, i aroneate emo seje jeni.

11 ¿Mbaerã ño mbae aisiã jêsi chã? Achesequa eãte quia jendese reae. Tei. Ùquĩ eã ñene. Achesequate rei jendese resê.

12 Mbia ñee eã sacuã nda mbae aisiã mbei jêsi resê. Ae Jesús abareã senei senei nguia nae, ùquĩ ñee eã sacuã. “Pablo rã sí chõ ure re” ùquĩ i eã sacuã.

13 Cristo cheẽ nenei neneisa turã eã ño ùquĩ nde. Mbia mbĩrĩ irĩsa chõ ùquĩ nde. Cristo cheẽ nenei neneisa raã ñoõño ño nguiã ùquĩ.

14 Satanás na sí chõ ùquĩ ndiqui nguiã ùquĩ. Satanás uturã saã saã ño nguiã. Angel turã naa naa ño nguiã no.

15 Ae siqui Satanás ndui nae, ùquĩ nda uturã saã ñooño Satanás na sí. Nyebe ra Dios ùquĩ mbutiã tuchi emo mose.

Pablo mbae rasi saã tuchi

16 “Earacuayã” jenyechĩ nda seje jẽ. “Earacuayã” jenye raque seje, seandu rã se. Secuasus tasaã saã mbĩri na jẽje.

17 Ae aico ñee jẽje namo nae, Dios cheẽ eã ño ùquĩ nde. Earacuayã na ño aico nguiã ñee jẽje. Secuasus asaã saã ño nguiã ñee jẽje co.

18 Sã mbia riqui ucuasu raã naa jate no. Eĩ tae rã se abe secuasus raã naa jẽje.

19 Jẽaquiatute reĩ jẽ ndeae. Jẽingo ñimbirãcuãte eaquiatus je ùquĩ. Seaquiatus je abe jẽimbirãcuã ño.

20 Ae icuã icuã mbeite riqui jẽje nae, ùquĩ je jẽingo ñimbirãcuã mbeite ùquĩ. Jembuquiei quiei chooño mose. Jembae mbutiã chooño mose abe no. Ucuasu raã naa mose abe no. Ucuã mose jẽsiba rese abe no. Ùquĩ je jẽingo ñimbirãcuãte ùquĩ.

21 Se quiatus que ùquĩ asaã saã eãte quia jẽje ra. Aico mingue chõchĩ jẽje. Acheẽ asi asi eã ñochĩ jẽje. Emo ucuasu raã naa mose, se quia secuasus asaã saã mbite nguiã esi. Earacuayã na ño aico nguiã ñee se co.

22 ¿Hebreos ùquĩ nde? Se abe chõ ñene. ¿Israelitas ùquĩ nde? Se abe chõ ñene. ¿Abraham nducucha riiĩ ùquĩ nde? Se abe chõ eno nde.

23 ¿Cristo rimba chõ ùquĩ nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seiruã nua tuchi nguiã esi. Se quiatus ngue mbia sematã matã tuchi nguiã esi. Se quiatus ngue mbia seiquia serĩ serĩ tuchi nguiã.

24 Judíos que seiruã nua mbeĩ quia ra. Treinta y nueve azotes beĩ que eriqui seiruã nua nda. Emo mose treinta y nueve no. Emo mose eĩ sí no. Cinco veces chee.

25 Ira que euru uru serese tres veces ra. Emo mose que sei sei sita je ra. Tres veces que barco ñĩmi ama ndiite re seje ra. Emo mose que aitõ ama ndiite re barco eã nda. Abebi chõ ngue sequia ra. Nyaashĩ miĩ abe que amumba quia mbebi ra. Barco ñĩmi mose seje.

26 Acuata tuchi que sequia ra. Mbae icuã ngue seiquia arõ arõ tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbua mbae mbuquiachãsa que seiquia arõ arõ tuchi quia no nda. Seresenda abe que seiquia arõ tuchi no nda. Judíos eã abe que seiquia arõte no nda. Jesús quiatus chooño abe que seiquia arõte no nda.

27 Serisirõ ngue nyichuarõ arõ tuchi quia ra. Aqueã mocoĩ mocoĩ tuchi que se quia no nda. Seriãcuã mocoĩ mocoĩ tuchi que eriqui ra. Seiseĩ abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda.

28 Ùquĩ miĩ eã ngue ra. Jesús quiatus rese abe que aico ndua ndua ra. Sã iglesia jenda ja ja siqui tuchi Jesús rese, abe beite sequia ndua co.

29 Jesús quiatus mo mbae rasi raã mose, se abe seya eã ndasite riqui erese co. Emo icuã icuã mose Jesús quiatus mo je, se abe paama i rasite aico co.

30 Sequirãcuã ndese eã nda seya riqui nguiã. Sequirãcuã nea ndese chõ nda seya riqui nguiã.

³¹ Acheẽ ñooño eãte quia co. Dios quia secheẽ icuate nguĩã. Jesucristo ru chõ Dios re. Sã mbia riqui ñee turã mbei erĩ.

³² Aretas resenda que serequia rei Damáscoo ra. Seiquia sacua. Ae que alcalde ra. Ae que mbia mondo rei eiquesa raarõ nda. Setarõ nda eña nde.

³³ Hue rĩ ngue asoã mbei ra. Mbia que sembuquichi imbu irairu ye ra. Ventana ni. Eĩ ae que oso chee mbia icua si ra.

12

Pablo ibatenda tea cuu

¹ Secuasus asaã saã ñochĩ nguia co. Ae rese Dios semumae mae mbeite cuu nae, ùqui nguiatu tasenei jėje.

²⁻³ Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achõ ere no ae. Aicuayãte se. Dios ae eicua nguĩã.

⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ùqui nda ereseneichi mbia je, i que Dios seje ra.

⁵ Ibatenda cheẽ andure secuasus asaã saã arondete raque se. Sequirãcuã je ra secuasus asaã saã eã. Sequirãcuã nea ndese chõ seya riqui nguĩã. Sequirãcuã nea mose quia Dios uquirãcuã mee tuchi nguĩã seje cote.

⁶ Secuasus ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacua. Secuasus ra asaã saã eãte jėje. Jẽ ae chõ nda jemae nguĩã serese seicua nonde. Jẽ ae chõ nda secheẽ jeñandu nguĩã seicua no.

⁷ Ae rese Dios semumae cuu nae, ùqui eturã tuchite seje. Ùqui ndese maende que aico secuasus raã naa arõte raque ra. Nyebe Dios nyu raanguia mondo nguĩã sequi rĩ. Satanás sembecoteã sacua. Dios semingo tochi sacua.

⁸ —Nyus raanguia esiqui sesi, ae tuchi rei que Cristo je tres veces ra.

⁹ Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguĩã ndeje co. Ndequirãcuã nea mose quiatu sequirãcuã amee tuchi nguĩã ndeje, i que Cristo seje ra. Nyebe seyate riqui nguĩã sequirãcuã nea ndese co cote. Ùqui mose quia Cristo riqui nguĩã uquirãcuã mee tuchi seje co.

¹⁰ Nyebe seyate riqui nguĩã sequirãcuã nea mose. Mbia ñee icua mose abe. Mbia icua icua mose seje abe. Mbae eã mose seje abe no. Se mbae icua irara mose Cristo rĩ abe no. Ùqui ja mose seyate riqui co. Cristo quiatu uquirãcuã mee tuchite nguĩã seje, sequirãcuã nea mose.

Jeñia jembitorõ se oso nonde jendea, i Pablo

¹¹ Sebiãte raque se sí ñee turã mose serĩ. Jẽ nguiatu jeñee turã mbite raque serĩ, mbia ñee icua mose seje. Ae rui jẽingo nae, ùqui equiatu ãte riqui sesi ùqui. Seaquiatu eã ndaque se abe. Ae rui jẽingo nae, Jesús cheẽ mbuchecuaa chooño ño ùqui nde.

¹² Dios cheẽ mbuchecuaa tuchi chõ se re. Seico mose jendese. Aico mingüete que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra.

¹³ Aico turãte que sequia jėje ra. Sã aico turãte iglesias ataque jenda je no. Eĩ si. Jẽ mĩ je chõ ngue “mbae jembu seje” ae eã nguĩã. ¿Ùqui eicuãte jėje re? “Mbae jembu seje”, iã mose jėje.

¹⁴ Aico icoquiatu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jėje. Mbae achosei chiãte jembae. Jesús rese jẽingo mose, ùqui mĩ ño achosei nguĩã. Jendu rã ño aico nguĩã jėje.

Sã mbia ririñ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiirí je no.

¹⁵ Sembae amondo ja bite raque jëingo sacuaã Cristo rui. Sereco abe amondo bite raque jëingo sacuaã Cristo rui. Sechesequa tuchi mose jendese, ¿mbaerã jëingo nyesequa eãte serese jë nde?

¹⁶ “Mbae jembu seje”, ae ãte que sequia jëje. Ûquí jëicuate raque. ¿Mbaerã nguia jëingo ñee ñooño nde? “Pablo que nandembirí irí nda”, ¿mbaerã jenyere?

¹⁷ ¿Mbaerã jeñee ùquí nde? Ae amondo jëje jembaaquiatu sacuaã nae, ùquí abe que jembirí irí eãte resë. Ûquí ngue jembae isiãte sembaerã ndesë.

¹⁸ Tito que amondo jendea nanderesenda rese resë. Ae abe que jembae isiãte resë. Se rã sí chõ ngue eriqui jëje resë.

¹⁹ Achiquisã eãte sequia jësi co resë. Dios résaã chõ aico nguiaã ñee jëje. Cristo rii ño aico nguiaã ñee jëje. Se mbae mo naa mose jëje, jëingo tuchi sacuaã Cristo rese chõ ñene.

²⁰ Seso mose jendea, sembia eã arõte. Ae sebite se, ùquí jësaã eã arõte seje. Ae jembite nae, ùquí asaã eã arõte se abe jëje. Jeñee icuaã icuaã nda jenyue serésaã reae. Jëingo icuaã icuaã ja ra jenyue reae. Jenongue mbae ra jenyosei chosei jë sí chõ ndeae. Jenguasa ra jësaã ñooño sésaã reae.

²¹ Seso mose jendea ra Dios sembia eã tuchi se mae mose jëicuaã ndese reae. Seireite ra jëicuaã ndese mae mose. Jëicuaã cose ndare si jëhui eã mbei chõchí namo nyee. Ae jeninisiã nae, ùquí ndese jëingo bei chõchí ùquí. Ae jendu eã nae, ùquí ndese abe jëingo bei chõchí ùquí no. Mbae aba ireingua rese jëingo bei chõchí ùquí.

13

Hui bei Pablo saludar i mbia je

¹ Aso quia jendea aque cote. Co rei tres veces co cote. Emo miñ sembiirandu mose mbae icuaã ndese, achanduchõ nda se. Emo nyeremo ñee mose, aque mose quiatu ra echeë achandu cote.

² Ae eicuaã saã saã nguia nyii nae, sã aico ñee asi asite ee nyii no. Ûquí sí je chõ aico nguiaã ã mbesa ã. Huñicuaã ndecha eã mose ra achimbirãcuã eã ee cote. Jë ja je chõ aico nguiaã ñee ùquí. Seico mose raanguia jendese.

³ —¿Ma Cristo quirãcuã ndiqui Pablo rese ma nde? jenyee equia nyii nae. Cristo quirãcuã ndese ra jemaee secheë asi mose quiatu jëje cote. Cristo que mbae saã ja tuchi jëje uquirãcuã je ra.

⁴ Cristo mbia mbucha quia ira rese iquia nyii nae, aque mose que equirãcuã neate rei ra. Dios quirãcuã nguia emingo bei nguiaã co cote. Sã Cristo quirãcuã nea ndei nyii no. Eĩ ño urequirãcuã nea ure namo nde. Ureico rei nguiaã erese co. Ae chõ uremingo nguiaã Dios quirãcuã je co. Ae quirãcuã je ra ureico jembaaquiatu quiatu.

⁵ Jë ae chõ jendua. —¿Cristo aicua quia sechiangui re re? jenyee ja ja chõ jeñiangui re. Jemaee nguia jenyiese sí. Jë Cristo icua chooñoa mose, Cristo riqui jeñiangui re ùquí. ¿Ùquí ndese jëingo iranuate re?

⁶ Ure quia Cristo ureicua chooñoa nguiaã ã. Ûquí ndese nda jëirandu rã seje chã.

⁷ Urecheë tuchi quia Dios je jeniã ã. Jë mbae icuaã naa eã sacuaã. Mbia ndua turã sacuaã eã ure rii ño ureico nguiaã ñee Dios je jeniã ã. Jë mbae icuaã naa eã sacuaã ño ñene. Mbia ra ñee icuaã ndaque ure je.

⁸ Mbae icuã mo nandesã aroneate Dios cheẽ ndobeishĩ. Mbae turã nguiatu nandesã Dios cheẽ mose. Dios cheẽ nguia ichõĩño eã nde.

⁹ Coche mbia riqui nguiã ñee icuã icuã ure je. Jẽ nguia jẽingo bei Cristo quirãcuã ndese. Jẽ nda Cristo jẽicua tuchi rã seje chã.

¹⁰ Secheẽ asi asi ambesa quia seso nonde jendea a. Se ñee asi eã sacua seico mose jendese. Dios quiatu ngue uquirãcuã mee nguiã seje. Jembãcuã sacua eã ño ngue Dios uquirãcuã mee nguiã seje. Jemingo tuchi sacua Cristo rese chõ ñene.

¹¹ Aico hui secheẽ mbesa mbesa si a cote, Seresenda. Jesucristo jẽicua tuchi quia. Jẽya bei tuchi jẽingo erese. Jẽingo turã mbei chõ nguia jenyiese. Ñquĩ mose ra Dios siqui tuchi jendese. Ae ra jemingo turã mbei jenyiese.

¹² Saludar jenye turã mbei quiatu quia jenyue.

¹³ Jesús quiato a jenda saludos mondo quia jẽje aque.

¹⁴ Sã Jesucristo turã ndiqui bei jendese. Sã Dios riqui nyesecua tuchi jendese. Sã Espiritu Turã ndiqui bei jendese no. Amén.

LA CARTA DEL APOSTOL SAN PABLO A LOS GÁLATAS

Ilo ucheẽ mbesa mondo Galacia jenda je

¹ Pablo chõ se re. Jesucristo chiirabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheẽ nenei nenei sacuã. Ae sí que Jesucristo raaque mbuquera ra.

² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese.

⁴ Ae quiato ngue mano nguiã nandecuã ndibishorõ. Nandembui sacuã mbae icuã si. Ae icuã ndese nandeco mae mae nae, ùquĩ si. Nanderu cheẽ nguire chõ ngue Jesucristo mano nguiã nande je.

⁵ Sã mbia riqui ñee turã mbei Dios je. Amén.

Cristo mii mbia rirõsa huicua si

⁶ ¿Mbaerã jẽingo hui hui jei Dios si ùquĩ nde? Ae sí chõ ngue “jẽingo Cristo turã ndese” i jêje resẽ. ¿Mbaerã jẽingo Cristo cheẽ abi abi re? Síqui emo ñee ndese re.

⁷ Nyeremo eã ño Cristo icha ñeenda re. Uturã mii je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. —Nandechisaã turã je ra Cristo nandemingo bei, i chõchĩ mbia nguiã jêje ùquĩ.

⁸ Acheẽ se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios ùquĩ mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel ibatenda abe mbasi rae, ùquĩ ñee mose.

⁹ Acheẽ namo ngue jêje, ùquĩ taseneimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios ùquĩ mbasi tuchi. Ae acheẽ jêje nyii nae, ùquĩ abi tuchi chõ eriqui nguiã ñee ùquĩ.

¹⁰ “Sã mbia riqui turã seje”, ae áte quia co. “Dios ae chõ nda seisi turã nguiã”, ae chõ nguiã co. “Sã mbia riqui turã seje”, se i bei mose, eĩ nda Cristo rimba eãte rei se.

Cristo chimbaaquiatu chee que Pablo ra

¹¹ Tacheẽ nyecua jêje, Seresenda. Dios icha asenei nguia jêje nae, secheẽ ae eã ño ùquĩ nde. Mbia cheẽ ae eã ño eno nde. Dios cheẽ ae chõ ñene.

¹² Mbia mo ngue esenei eãte seje ra. Jesucristo mii ño ngue esenei nguiã seje.

¹³ Jẽirandu que equia serese cose resẽ. Jesús icuayã mose se nyii. Seico mose judíos ramei ñee ndui. Síqui rocoĩ Jesús cheẽ ndui. Seicuã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra.

¹⁴ Moisés cheẽ ndui que aico tuchi rei sembuchechaa ja si ra. Seramei ñee ndui que aico tuchi rei quia mbia ja si ra.

¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra.

¹⁶ Dios que nguiirĩ teacuquia seje cote ra. Se Dios riirĩ nenei nenei sacuaã judíos eã je. “¿Mañi ae ra se re?” ae eã ngue oso ñee mbia mo je ra. Dios nguiirĩ ndeacuquia mose seje.

¹⁷ Jerusalén abe que asoã no nda. “¿Mañi ae ra se re?” ae eã ngue oso hue jenda Jesús chĩmbaaquiato ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Huee que aico erese quince días ra.

¹⁹ Jacobo abe rese que amae huee ra. Jesús nongue que ae ra. Ūquĩ mii ndese que amae Jesús chĩmbaaquiato ra.

²⁰ Acheẽ ñooñoa tuchi chõ nguiã ã mbesa jẽje a. Dios secheẽ ñandute quia co.

²¹ Jerusalén ngue asecha oso Siria cote ra. Cilicia abe no.

²² Jesús quiato Judea jenda que seicuayã mbeite quia aque mose ra.

²³ Jirandu randuchõ ño ngue equia serese ra. “Ae icuaã icuaã ndiqui Jesús quiato je nyii nae, aque riqui Jesús renei nenei co cote. Mbia Jesús icua sacuaã”, i que equia jirandu randu serese ra.

²⁴ Nyebe eyate riqui nguiã serese cote. Ñee turã turã Dios je.

2

Cristo chĩmbaaquiato ataque Pablo isi turã

¹ Catorce años mose ramo ngue asobe Jerusalén cote ra. Bernabé rese. Tito abe que arao serese ra.

² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ūquĩ ñii ngue acheẽ ja Jesús quiato rerecua je ra. Ūquĩ secheẽ icua sacuaã. Ūquĩ sembaaquiato sacuaã se Dios cheẽ abi mose.

³ “Circuncisión nandesaã na Tito je”, i ãte que Jesús quiato rerecua quia ra. Judío eã ndaque Tito.

⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icuaã naa naa sacuaã ndaque. “Sã circuncisión naa naa Moisés cheẽ ndui”, i rei que equia urerĩ nda. Ebiã tuchi que eriqui ureico mose Cristo mii ndese ra. “Sã eriqui judíos ramei ñee ndui bei”, i chõ ngue equia ra.

⁵ Ūquĩ ñee ngue uresiquiã tuchi quia ra. Jẽingo bei sacuaã Dios cheẽ turã mii ndese. “Jesucristo turã ae nandemingo bei nguiã co”, jenyẽ sacuaã. Jẽingo rocoĩ judíos rerecua cheẽ ndui.

⁶ Dios quiato rerecua que sembaaquiato quiato eãte mbae mo ñii nda. “Ã abe esenei senei nguia judíos eã je”, i ãte que ererecua seje ra. Dios quiato rerecua tuchi ūquĩ ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja.

⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. —Sã Dios Pedro mondo judíos je no jẽ. Dios cheẽ nenei nenei sacuaã no. Eĩ si chõ Dios Pablo mondo quia judíos eã je re. Dios cheẽ nenei nenei sacuaã ee re, i que ererecua ñee nyue ra.

⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echeẽ nenei nenei sacuaã ee. Dios ūquĩ mingo bei nonde.

⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jëingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra.

¹⁰ —Mbaecha reã je chõ jëingo mbae mondo mondo, i mii ño ngue ure je ra. Ûqui ño asaã saã mbei rei nguiã co.

Pablo ñee asi Pedro je Antioquíaa

¹¹ Pedro tu mose Antioquíaa, acheẽ asite que ee ra. Mbae icuã nguiatu que esaã huee ra.

¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireite que judíos si ra. Nyebe nyicuasẽ nguiã judíos eã si cote. Ucuasu raã naa esi cote. Judíos abe raque Jesús quiato.

¹³ Nyebe Jesús quiato judíos abe nyicuasẽ nguiã judíos eã si cote. Pedro rui sí. Ucuasu raã naa judíos eã si cote. Bernabé abe chee que nyicuasẽ judíos eã si cote ra. Pedro rui si no.

¹⁴ Dios cheẽ ndui si eã ño ngue Pedro riqui nguiã. Judíos nguesenda rese. Nyicuasẽ mose judíos eã si. Nyebe acheẽ asi nguiã Pedro je mbiásaa. —Nde Jesucristo icua mose, erehui que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jëingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icuã na eã ndaque nande.

¹⁶ Emo mii siqui turãyã mbeite quia Moisés cheẽ ndui si co. Dios emingo bei sacuã. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguiã Jesucristo icua ã. Dios nandemingo bei sacuã. Moisés cheẽ ndui si nandeico eã ndaque, ae que ee ra.

¹⁷ “Cristo que mano nandeicuã nii nda”, nande bei equia ã. ¿Ûqui ño nandembiicuã nguia re? Tei. Cristo riqui nandembiicuã eã mbei co. Cristo quiatu nandembiirandu quia nandeicuã ndese co resẽ.

¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte Ûqui cote.

¹⁹ Moisés cheẽ ngue aicuate rei ra. Ûqui ngue seicuã mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicuã mbutiã cote ra. Seico bei nonde cote.

²⁰ Cristo mano mose, se abe que amano erese ra. Se ae aicoã nguiã co cote. Cristo riqui sechiangui re co cote. Equiracuã je chõ aico nguiã mbae rãã naa co. Dios riirĩ aicuate quia co. Ae chõ ngue nyesecua tuchi nguiã serese. Ae chõ ngue mano nguiã seicuã nii.

²¹ Dios turã aisiteã teã eãte quia co. Moisés cheẽ mumbayã mose eã ño Dios riqui nguiã aba icuã mbutiã. Ûquinde rae, Jesús manoño.

3

Moisés chimbasa aba mingo bei aronea

¹ ¿Mbaerã jëaquiutuã tuchi riqui re, Galacia jenda? ¿Aba jembaaquiatu icuã tuchi quia Cristo riĩ nde? Cristo mano ngue asenei tuchi rei jëje resẽ. Jëisi turãte rei que equia nyii. ¿Mbaerã jëingo hui serĩ serĩte esi cote re?

² Moisés cheë mumbayã mose eã ño Espíritu Turã ique nguiã jeñiangui re. Jê Jesucristo icua mose chõ ngue re. Se Jesucristo renei mose jêje chõ ngue re.

³ ¿Mbaerã jêaquiatuâte riqui re? Moisés chimbese que jêicuã mbutiã eã ndesê. ¿Mbaerã jêingo siqui beite erese re? Siqui rocoi Jesucristo mii ndese.

⁴ Mbae rasi que jêsaã tuchi quia Jesucristo rii nyii resê. Jêhui eã ño esi jê. I nda ae rasi jêsaã nguia nyii nae, ùquĩ iru eã.

⁵ ¿Mbaerã Dios Espíritu Turã mondo jêje chã? ¿Mbaerã ño Dios mbia mae sayã naa naa jêje chã? ¿Moisés cheë jemumbayãte quiatu quia ee re? Tei. Ûquĩ eã ñene. Jê nguia Jesucristo jêicuate nguiã ùquĩ.

⁶ Sã Abraham no. Abraham ngue Dios icuate quia ra. Nyebe Dios Abraham isi turã nguiã.

⁷ Nyebe Dios riqui nguiã “Abraham nducucha” i huicuaa je co.

⁸ “Judíos eã abe ra Dios riiri icua. Ûquĩ abe ra Dios mingo bei”, i que embesa ji cose ra. “Nderii nda aico turã mbia ja je”, i que Dios Abraham je ra”, i que embesa ji ra.

⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ùquĩ je abe chõ Dios turã ndiqui nguiã Abraham ndese.

¹⁰ Sã emo ndiqui ñee no. “Moisés cheë ndui taico bei Dios semingo bei nonde”, sã emo ndiqui i no. Ûquĩ nda nyoĩ chõ tata cuasu. Sã embesa ji riqui ñee no. “Emo embesa ji cheë mumba mbiiri mose, echeë mumba tuchi raanguia chõ ùquĩ nde”, i que embesa ji ra.

¹¹ Dios ra ñee jiri jiriã emo nii. “Co que embesa ji cheë mumbayã mbei quia ra. Nyebe taisi turã”, i eã nda Dios emo je. Ae je Dios riqui “co taisi turã”, i nae, Dios icuate quiatu nguiã ee ùquĩ. Nyebe ra ùquĩ ndeco siqui bei.

¹² “Dios cheë mumba eã mbei mose quia ra Dios nandemingo bei”, i mose emo, Dios icuayã ño nguiã ùquĩ.

¹³ Cristo que nandembui Moisés cheë si cote ra. Nande Moisés cheë mumba mose, ùquĩ nda nandemombo eã tata cuasu cote. Cristo quiatu ngue mbae rasi aba ireingua saã tuchi nguiã nande je. Sã embesa ji riqui ñee no. “Aba ireingua tuchi mae mose embucheseco ji ira resenda rese”, i que embesa ji cose ra. Jesús mbucha nonde ira rese.

¹⁴ Dios turã sacua judíos eã je chõ ngue Jesús mbae rasi aba ireingua saã tuchi nguiã. Dios judíos eã mingo bei sacua ño ngue re. Sã Dios turãte riqui Abraham je nyii no nae. Eĩ si sacua Dios turã judíos eã je chõ ngue eno nde.

Dios contrato saã Abraham je

¹⁵ Sã mbia mo ndiqui contrato raã emo je no. Sã firmar i embesa mii no. “Eĩ nguiatu”, i aroneate emo ee cote. Embesa jite quia cote re.

¹⁶ Eĩ si que Dios contrato raã Abraham je no nda. Abraham ndiiri je abe no. “Abraham ndiiri ja je”, i eã ngue embesa ji ra. “Abraham ndiiri je”, i chõ ngue ñee nguiã aque mii je. Cristo rii ño ngue ñee nguiã.

¹⁷ Tacheë nyecua tuchi rá jêje. Dios que contrato saã Abraham je cose ra. —Mbae tasaã ndeje. Nderiiri je abe no, i que Dios Abraham je cose ra. Mbesa que aque mose ra. Aquere que Moisés ucheë mbesa cote ra. Aquere tuchi 430 años ua mose cote. Moisés cheë ngue contrato mbutiã aroneate ra. Dios cheëte quiatu ngue contrato re.

¹⁸ Dios que ñee Abraham je cose ra. —Mbae tasaãño ndeje. Nde mbae mo naa ndocoi seje, i que Dios ñee Abraham je cose ra. —Nde Moisés cheë

mumbayã mose quiatu mbae tasaã ndeje, iã ngue Dios ee ra. —Nde mbae mo naa ndocoĩ, i chõ ngue ee ra.

¹⁹ ¿Mbaerã ño nda Moisés chimbese cheẽ nandechandu chã? Mbia huĩcuã icua sacua ño Moisés chimbese re. Cristo tu mose chõ ngue Moisés chimbese cheẽ ua nguiã. Sã Dios contrato naa Abraham ndiirĩ je nyii no. Cristo je chõ eriqui nguiã “Abraham ndiirĩ” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbia echeẽ mumbayã nonde.

²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui rocoĩ

²¹ Ae contrato Dios saã Abraham je nae, Moisés chimbese uquĩ mbutiã aroneate quia co. Moisés chimbese aba mingo bei arõ mose, eĩ nda Jesucristo manoate rei. Moisés chimbese aba mingo bei aroneate. Nandechiã abe mbitirõ aroneate no.

²² “Mbia icuã ja chõ ñene”, i que embese ji ra. Nyebe nandemo mbae mo turã naa aroneate siqui bei sacua. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoĩ Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, uquĩ ño ngue nandesaarõ arõ nguia ra.

²⁴ Mbia mbaaquiatusa rã ño Moisés chimbese re. Mbia mbiirandu que Cristo rese ra. Mbia siqui nonde Cristo mi ndese tu mose cote. Cristo icua nonde. Dios Cristo icuasa isi turã mbei nonde cote.

²⁵ Nandeico Cristo icua ã cote. Nyebe ra nandeicoã Moisés cheẽ ndui cote.

²⁶ Nandeico Jesucristo icua jate ã. Nyebe Dios riirĩ ja chõ nande re.

²⁷ Nandembucha ji nandeico mose Cristo riĩ, Cristo rã sí chõ nandeico nguiã ã cote.

²⁸ Nande Jesucristo icua ja mose, nyiabiã ja chõ nandeico nguiã ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque mi na tuchi chõ nda nandeico ja nguiã Cristo rese cote.

²⁹ Cristo icuasa chõ jëingo nguiã uquĩ. Nyebe Abraham ndiirĩ abe chõ jëingo nguiã uquĩ no. Ae turã nda Dios saã Abraham ndiirĩ je nae, jëje chõ nda eraã nguiã.

4

¹ Sã mbaecha rirĩ mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque.

² Ae rese eriqui ndua nae, uquĩ ndese eriqui aroneate. Uraarõsa nduasa achõ ndese chõ nda eriqui. Ucuasu mose ramo ño nda eriqui ndua ae ae cote. “Co tasaã”, i cote.

³ Eĩ sí chõ nande nyii re. Mbia riirĩ na si. Jesús tu nonde. Mbia cheẽ achõ ndui chõ ngue nandeico nyii ra. Jesús tu nonde.

⁴ Dios que “coche ñene” i cote ra. Uquĩ mose que nguiirĩ mondo mbia je ibii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose ibii ra.

⁵ Ae que tu nandembui bei Moisés cheẽ si cote ra. Dios nandererequia sacua nguiirĩ na cote.

⁶ Dios riirĩ ño nande cote re. Nyebe Dios Espírиту Turã mondo nguiã nandechiangui re cote. Nyebe nandeico nguiã Paba i tuchi Dios je namo cote.

⁷ Dios riiri tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jẽicuayãte quia nyii ra. Dios abareã ndese chõ ngue jẽingo aque mose ra.

⁹ Ũquĩ jẽingo Dios icuate ũquĩ cote. Dios abe riqui jẽicuate co cote. ¿Mbaerã nguiã jẽingo hui serĩte esi cote re? ¿Mbaerã nda jẽingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneãte nande je resẽ.

¹⁰ “Co tenda mbae mo nandesã Dios je Dios nandeisi turã sacuã”, jenyẽ chõchĩ nguiã ũquĩ. “Co nyasi mbae mo nandesã Dios je Dios nandeisi turã sacuã”, jenyẽ chõchĩ nguiã ũquĩ no. Eicuã tuchi chõ ũquĩ nde.

¹¹ Jaembaaquiatu quiatu iru chõ se reae.

¹² Se rã ño jẽingo ae. Sã aico eãte Moisés chimbesa cheẽ ndui sí co no. Sã jẽ abe jẽingo eãte erui nyii no. Sã jẽicuã eãte emo mose seje no.

¹³ Se Jesucristo renei namo mose jẽje, serasite quiatu ngue se aque mose re. Ũquĩ jẽicuate quia ũquĩ.

¹⁴ Mbae rasi que asaã tuchite rei aque mose ra. Serasi que jẽucuayã eãte quia aque mose ra. Serasi que jẽisiteã eãte quia aque mose no nda. Angeles que jẽsaã ño seisi turã aque mose ra. Jesucristo que jẽsaã ño seisi turã aque mose ra.

¹⁵ Seisi turã tuchi que se aque mose ra. Jendesa que jemondo bite quia seje aque mose ra. ¿Mbaerã jẽingo secheẽ isi sereãte cote re?

¹⁶ Dios cheẽ ngue asenei turã tuchi quia jẽje. ¿Ũquĩ je chõ jẽingo seucuayãte cote re?

¹⁷ Ae riqui jembaaquiatu icuã icuãte ũquĩ nae, ũquĩ siqui sete raque jendese ũquĩ. Mbae turã nii eã ño ñene. Jembãcha sacuã ure sí chõ ñene. Jẽingo sacuã ũquĩ achõ ndese chõ ñene.

¹⁸ Coche rei ũquĩ siqui jendese Dios cheẽ nenei nenei turã mose jẽje. Sã eriqui jembaaquiatu turã turã mbei. Seicoã mose abe jendese.

¹⁹ ¿Mbaerã jẽingo sembia eã tuchi ũquĩ nde? Jẽhui serĩ serĩ mose Dios turã si. Sã ãquẽ ndasi riqui cuña je no. Eĩ ño seya eã ndasi nguiã jendese co. Jẽingo sacuã Cristo rã sí.

²⁰ ¿Mañi ae ra se quia jẽje re? Aico rã nda jendese chã. Se ñee tuchi nonde jẽje. Secheẽ mbesa rocoĩ mondo jẽje.

Sã Abraham ndiirĩ nyeremo no

²¹ ¿Mbaerã jẽingo ñee nde? “Moisés cheẽ nandemumbayã, Dios nandemingo bei sacuã”, ¿mbaerã jẽingo i re? Moisés cheẽ jẽicuayãte quia reae.

²² Moisés chimbesa chõ nandembirandu nguiã Abraham rese co. Abraham ndiirĩ nyeremo ndei que ra. Co mii ngue eninisite riirĩ nda. Sara, i que eninisite je ra. Agar, i que erimba je ra. Aque abe que Abraham nbiirĩ ndei ra. Nyebe Abraham ndiirĩ nyeremo ndei nguiã.

²³ Mbia rã si chõ ngue erimba tiirĩ ee ra. Dios ñeende ee nyii quiatu que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ũquĩ io sacuã ño eninisite tiirĩ cote ra.

²⁴ Nandemundua sacuã ño ũquĩ nde. Contrato rã si chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã

si chõ ùquĩ nde. Ae siqui bei quia ùquĩ contrato rui nae, mbia rimbachõ na ño ùquĩ nde.

²⁵ Sinaí rã si chõ Agar re. Arabia jenda chõ Sinaí re. Jerusalén na si chõ Sinaí re. Ae siqui quia Jerusalén nae, erimba rã si chõ ùquĩ nde. Erimba rã si chõ judíos ja no nde. Jesucristo icua rocoĩ.

²⁶ Jerusalén mo ño chí nguiã ibate pe no. Ae mbia hue jenda nae, mbia rimba mo eã ño ùquĩ nde. Hue jenda chõ nande abe no nde.

²⁷ Sã embesa ji riqui ñee no:

Ndeya chõ eico, tiirĩ je.

Ndeya chõ eico, ãquẽ ndasi raãsa eã.

Nderiirĩ nda eretea tuchi cote.

Eru chirirõ nguia ra tiirĩ tuchi eru rerecua si cote,

i que embesa ji ra.

²⁸ Dios riirĩ tuchi chõ nande re. “Seriirĩ tuchi ra ùquĩ”, ã i Dios nanderĩ nyii no. Sã ñee Isaac nĩ nyii no.

²⁹ Sã Dios ñee Abraham je nyii no. “Nderiirina tamondo ndeje Isaac”, sã i ee no. Sã Isaac nyaacuquia Espíritu Turã nĩ no. Sã Agar riirĩ icuã icuã Isaac je cote no. Eĩ si chõ namo no nde. Ae siqui tuchi judíos cheẽ ndui nae, ùquĩ icuã icuã ndiqui namo nande je ã no.

³⁰ ¿Mañi ño embesa ji cheẽ ña? “Erimba emombo chõ. Eriirĩ ndese. Eninisite riirĩ na eã ño erimba riirĩ nde. Erimba riirĩ siqui aroneate eninisite riirĩ ndese”, i que embesa ji ra. Eĩ si chõ ae siqui tuchi quia judíos cheẽ ndui nae. Siqui aroneate Jesús quiatorã.

³¹ Erimba riirĩ na eã tuchi chõ nande re. Eninisite riirĩ na tuchi chõ nande re. Nande Jesús icua mose.

5

Cristo nandembui Moisés chimbese si cote

¹ Cristo que nandembui Moisés chimbese si cote ra. “Moisés chimbese cheẽ nda semingo bei”, jenyechĩ nda jẽ. Ae ra i ùquĩ, mbia rimba rã ño ùquĩ nde.

² Tacheẽ nyecua tuchi rã jẽje. Circuncisión nda jẽsaachĩ. Moisés chimbese cheẽ ndui ra jẽngochĩ cote jẽ. Cristo mĩ ndese chõ jẽingo cote. Jẽ circuncisión naa mose, jẽingo turã eã ño nguiã Cristo rui ùquĩ cote.

³ “Moisés chimbese cheẽ tamumbayã mbei”, i raanguia chõ circuncisión nde.

⁴ “Dios ra seisi turã seico bei mose Moisés cheẽ ndui” i mose jemo, Dios chẽẽ abi tuchi chõ ùquĩ nde. Dios turã si nyĩcuasẽ tuchi chõ ùquĩ nde.

⁵ Espíritu Turã ndiqui nanderese co. Nande Jesucristo nandẽcuate quia ã. Nyebe ra Dios nandesi turã Jesucristo mĩ nĩ.

⁶ Nandẽico mose Jesucristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ùquĩ nguia eturã tuchi re. Nandehesecua mose mbia rese, ùquĩ nguia eturã tuchi no nde.

⁷ Jẽingo turãte rei que equia nyii. ¿Aba jembui Cristo cheẽ si cote re?

⁸ Dios eã ño ngue jembui nguiã esi. Dios chõ ngue “jenyu” i nguiã jẽje.

⁹ Sã levadura riqui no. Eñetẽ mondo mose mbichae ye, mbuquiche ja rae.

¹⁰ Dios ra jendeaquiatu bei. Mbia mo jembũcha eã sacua esi. Ae jembũcha serĩte quia esi nae, ùquĩ nda Dios mbasi. Ererecua raque ra emo.

11 “Circuncisión jêsaã na”, ae âte quia mbia mo je co. “Circuncisión jêsaã na”, se i mose, eĩ nda judíos icuã icuã eãte rei seje. Eĩ nda judíos paama i âte rei seje Cristo mano nenei nenei mose mbia je.

12 Ae “circuncisión jêsaã na”, i quia jêje nae, ũquí nda nguete chisia tuchi rã jendecha chã.

13 Jesucristo que jembui Moisés cheẽ si ra, Seresenda. Ae icuã jenyosei chosei quia nae, ũquí ndese ra jêingochi cote jê. Jêingo turã nguiatu quia jenyue. Jenyesequa tuchi quiatu quia jenyiese.

14 Dios cheẽ ja tuchi chõ ã nde: “Sã ereico nyesequa ndechiese no. Eĩ ere si chõ nyesequa emo ndese”, i que Dios cheẽ nda. Nandechesequa mose mbia rese, Dios cheẽ nandemumbayã tuchi chõ nguiã ũquí.

15 Paama jenyechi nda jenyue jê. Jenyishi u shiuchi nda eno jê. ũquí naa naa mose ra jêhui ja ja chee Cristo si.

Ae icuã nandehosei chosei quia nae, ũquí si nandehui

16 Tacheẽ nyecua tuchi jêje. Espiritu Turã ñee ndui bei jêingo. Ae icuã jenyosei chosei quia nae, ũquí ndese nda jêingoã cote chã.

17 Ae mbae icuã nandehosei chosei quia nae, Espiritu Turã quiatoã tuchi chõ ũquí nde. ũquí quiatoã tuchi chõ Espiritu Turã no nde. Ae nandehosei chosei quia, nyebe ra ũquí nandesaã eã.

18 Jêingo mose Espiritu Turã ndui, “Moisés cheẽ nda nandemingo bei” jenyee ã nda cote.

19 Ae siqui quia ubi icuã ndese nae, mbae icuã esaã ata atate quia ã. Siqui siqui chõ nguiã ngũmisiã ndese. Cuña abe siqui siqui chõ nguiã ngu eã ndese no. Siqui chooño mbia rese.

20 Dios abareã ndese siqui chooño. Brujería abe rese siqui chooño. Mbia ucuãya cuãya. Siqui icuã icuã nyue. Mae icuã icuã emo ndese. Paama i jei jei emo je. Abei chiã. Mbia mbuqueta queta.

21 “I áchi sembae”, i mbia mbae osei osei. Mbia iquia. Quiacua. Siqui chooño mbae ja rese. Ae ã icuã ñumumbara saã saã mbeite quia nae, ũquí nderecuarã eã mbei ra Dios.

Espiritu Turã ño aba mingo nguiã mbae turã ndese

22 Ae siqui quia Espiritu Turã ndese nae, Espiritu Turã ño emingo nguiã mbae turã ndese ã. Nyesequa chõ nguiã mbia rese. Eya chõ eriqui nguiã. Quicoi coi eã ño nguiã. Siqui tochi chõ nguiã. Siqui turã ño nguiã. Ucheẽ mbuchebi chebiã ño nguiã.

23 Eseteã ño eriqui nguiã. Ae ae chõ nyiteaquiatu nguiã mbae icuã si. Nande ũquí naa naa mose, emo ñee aroneãte nande je cote.

24 Sã Cristo mano nyii no. Eĩ si chõ Cristo quiato undua icuã mbutiã nguiã no. Cristo mano nyabe.

25 Sã Espiritu Turã ndiqui nandereco mingo turã co no. Eĩ nande sí siqui turã erui jê. Ae nandererequia turã bei nonde mbae turã ndese.

26 Nandecuasu ra nandesaã saãchi jê. Nandecuã techi nda nandehue jê. “Aque rã eãchi se”, nandechi nda mae icuã icuã nandenongue rese jê.

6

Jendua chõ nguiã nyiese mbae mo naa jenongue je

1 Emo mbae icuã naase i i mose, “Dios rui eico” jenyee chõ ee. Ae jemo siqui tuchi quia Dios rese, ũquí mo ñee ee. Embucuata turã sí nonde Dios rese.

Jeñee mingue mingue chõ nguia ee. “Mbae icuã tâ i arõte se abe je”, jenze chõ nguia ndua jê abe.

² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ùquĩ nde.

³ “Seaquiature rei ñene”, i mose eaquiaturã mo, ae sí chõ ñĩmbĩĩrĩ irĩ nguia aque.

⁴ Ae ra eresaã mbae mo nae, esaã turã mbei chõ nguia. Ûquĩ mose ra ndeya quiátu tuchi ndechisaã ndese. Mae ndocoĩ emo nyisaã ndese.

⁵ Nande ae ae nandechimbirãcuã nguia tú nandeya eã ndasi ae ae je.

⁶ Emo siqui mose jembaaquiaturã quiaturã Cristo rĩ, mbae ja quia jemondo mondo quia ee.

⁷ Erechimbĩĩrĩ irĩchĩ nda ndechue si jê. Dios abe erembĩĩrĩ irĩ aroneate. Ae ra erchitiquia mbae mo nae, ùquĩ sí chõ nda ereucua.

⁸ Ae siqui quia ubi achõ ndese nae, ùquĩ nda ua chee. Ae siqui Espiritu Turã ndui nae, ùquĩ nda Espiritu Turã mingo bei.

⁹ Nandechimondocho eã ño nguia mbae turã naa naa mbei jê. Nandehui eã mbei chõ nguia esi jê. Ûquĩ mose ra Dios mbae mee tuchi jee nande je cote.

¹⁰ Mbae turã nandesã saã mbei chõ nguia mbia je. Jesús quiaturã je quia mbae turã nandesã saã tuchi jiri.

Pablo hui bei saludar i mbia je

¹¹ Seo ae je chõ co ambesa mondo nguia jêje aque. Sã letras cuasute.

¹² Ae “circuncisión jesaã”, i quia jêje nae, siqui turã sacua mbia rese chõ ùquĩ nde. Siqui turã ndocoĩ Cristo rese. “Cristo ae ra aba mingo bei” i serea. Siquichete quiaturã mbia si re.

¹³ Ae circuncisión saã nguia nae, ùquĩ abe riqui eã Moisés cheẽ ndui ùquĩ. “I nda mbia riqui urerui”, i chõ nguia “circuncisión jesaã” i jêje ùquĩ. Ucuasu ra esaã saã jê circuncisión naa mose. Eyate ra jendese cote, jêingo mose erese.

¹⁴ Jesucristo mii ndese chõ nda seya se. Ae mano ira rese. Ae mii nii nda acheẽ ñee mbia je. Mbaemo ndese abe eã nda seya se. Jesucristo mano mose ira rese, se abe que amano mbae icuã si ra. Mbae icuã abe que mano sesi no nda.

¹⁵ Nandeico mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandechiã mbiasu mose, ùquĩ nguia turã tuchi re.

¹⁶ Ae siqui quia Jesucristo mii ndese nae, sã Dios turã ndiqui bei ùquĩ ndese. Sã Dios riqui embia bei. Sã Dios turã ndiqui bei ngũimba ja je.

¹⁷ Secheẽ nda jēsibishorõchĩ namo jê. Emo mose abe jê. “Pablo eaquiaturã”, sã emo i eã cote. Sã mbae rasi airara rara beite quia Cristo rĩ co no. Sã seiruã nuasa cherõ areco serete rese co no jê. Jesucristo rĩ ño ùquĩ nde.

¹⁸ Sã Jesucristo turã ndiqui bei jendese, Seresenda. Amén.

LA CARTA DEL APOSTOL SAN PABLO A LOS EFESIOS

Pablo embesa Jesús quiato Efeso jenda je

¹ Se rei Pablo. Dios que seirabo ra. Jesucristo chimbaaquiatu sacuã. Co ambesa mondo quia jêje aque. Jesús icuasa je. Efeso jenda je.

² Sã Dios riqui uturã ndeacuquia bei jêje. Jesucristo abe no. Sã ũquĩ ndiqui jembia bei.

Cristo mbae turã saã ja nande je

³ Nandechẽ turã mbei chõ nguia Dios riĩ. Jesucristo ru riĩ. Jesucristo rese chõ nandẽico nguiaã ã cote. Ibatenda chõ nandẽico nguiaã ã cote. Nyebe Dios riqui nguiaã mbae turã naa jate nande je co.

⁴ Dios que nandẽirabo nyii ra. Cristo riĩ. Mbae ao ja nonde. Nyesequa tuchi que nandẽrese ra. Nyebe nandẽicuã mbutiã ja nguiaã nandesi. Nandẽico turã sacuã enonde.

⁵ Dios que nandẽirabo tuchi coose ra. Mbae ao nonde. —Jesucristo riĩ nda seriirina jẽ, i que nande je nandẽicuã mose ra.

⁶ Nandechẽ mbei sacuã Dios turã niĩ. Uturã je chõ nandẽisi nguiaã Jesucristo riĩ.

⁷ Jesucristo miĩ ngue mano nanderirõ sacuã mbae icuã si ra. Ae riĩ ño Dios nandẽicuã mbutiã nguiaã nande si cote. Dios turãte quia nande je re.

⁸ Dios que uturã teacuquia ja nande je ra. Nyebe eriqui nguiaã mbae icua jate nande je.

⁹ —Seriirĩ nda amondo mbia je íbii. Ae ra mbia mangue chooñoa jenda mingo ja serese cote, i que Dios cose ra. Ũquĩ ngue eteacuquia nande je cote ra. Nãde eicua sacuã.

¹⁰ Dios icuquiatu mose ra mbae mbuchicuabo ja cote. Nandemunua ja ra ino Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ũquĩ niĩ ño ngue Dios nandẽirabo nguiaã cose. Mbae tiã mose que Dios nandẽirabo nyii ra. Ae sí mbae turã naa naa sacuã nande je. Dios cheẽ nguire mbae riqui nyecua bei ã.

¹² Urecheẽ turã mbei sacuã Dios riĩ ño ngue ureirabo nguiaã. Ure rane ngue Cristo ureicua nyii ra.

¹³ Jẽ abe que Cristo jẽicua chee cote ra. Jẽ echeẽ turã andu mose. —Cristo ra jendirõ jẽicuã si, i mose jêje. Jẽ Cristo icua mose que Espiritu Turã Cristo mbae marca miĩ jendese ra. —Espiritu Turã tamondo Cristo icuasa je, i Dios quia nyii nae, aque sí que Cristo mbae marca miĩ jendese cote ra.

¹⁴ Espiritu Turã ndiqui nandechiangui re co. Nyebe nandẽico nguiaã ñee. — Dios ra mbae mee ja nande je ucheẽ nguire, i. Dios que nandẽisi Jesús ruqui ribishorõ nda. Nandemingo bei ra erese cote. Ũquĩ niĩ ño Espiritu Turã Cristo mbae marca miĩ nguiaã nandẽrese. Nandechẽ turã mbei sacuã Dios riĩ ño ngue ũquĩ nde.

Sã Dios jembiirandu uquirãcuã ndese, i Pablo

¹⁵ Airandu que jendese ra. Jesús jẽicua tuchite quia ũquĩ. Jenyesequa tuchite equia Dios quiato ja rese ũquĩ.

¹⁶ Nyebe aico nguiã ñee hui ãte Dios je. Gracias, i bei ee jeniã.

¹⁷ —Paba, ndequiatio embaaquiato tuchi Cristo riã. Cristo eicua uquia tuchi ee, ae beite se quia Dios turã je jeniã co.

¹⁸ Acheẽ mbeite quia Dios je jeniã co. —Paba, ae turã nda eresaã je ndequiatio je nae, ùqui ndese embiirandu jiri namo. Ae turã nda eremeje je ee nae, ùqui ndese abe embiirandu.

¹⁹ Ndequirãcuã ndese abe embiirandu, ae beite quia Dios je jeniã co. Dios quirãcuã nda ua eã mbei. Equirãcuã ndiqui Jesús quiatio chiangui re ja ã.

²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi miã ujji ra.

²¹ Dios que Jesús miã mbae rerecuarã ja ra. Ae quia rei i tuchi ererecua mo si. Gobierno mo ab e si. Ae quia rei ecuasu tuchi ibi jenda ja si. Ibatenda abe mo si.

²² —Mbae ja rerecua tuchi rei Jesús, i que Dios ra. —Sequiatio rerecua ja chõ ae re, i que Dios ra.

²³ Dios quiatio rei Jesús rete rã. Jesús riqui uquiatio chiangui re co. Manguiti eriqui eã aroneate. Mbae aosa ja chõ ae re.

2

Uturã niã Dios aba rirõ aba icuã si

¹ Dios que ngueco mondo jêje cote ra. Jêicuã niã ño ngue jêingo nguiã eraaque rã nyii.

² Mbia ataque rã tuchi que jêingo aque mose ra. Mbae icuã naa naa ndesechi. Satanás ñee ndui beite que jêingo nyii ra. Equirãcuãte que eriqui jêje ra. Ae siqui ãte quia Dios rese nae, ùqui ño Satanás ñee mumbayã nguiã ã.

³ Eĩ nande que equia cose nyii ra. Ae nandebite riqui mbae icuã nyii nae, ùqui ndesechõ ño ngue nandeico ra. Ae rese nandeico ndua beite mbae icuã nyii nae, ùqui ndesechõ ño ngue nandeico nyii ra. Mbia ataque rã sí chõ ngue nandeico mbae icuã naa naa nda. Dios nda nandembasi nguiã nandeicuã niã ña.

⁴ Eyayãte quiatu ngue eriqui rei nguiã nanderese. Nyesecua tuchite quiatu que equia nanderese ra.

⁵ Eraaque raãte raque nande nandeicuã niã nyii. Nyebe ngueco turã mondo nguiã nande je Cristo raaque mbuquera si mose. Dios turã ae chõ jendirõ nguiã jêicuã si.

⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra.

⁷ Dios turã tuchi riqui nande je Jesucristo riã co. I nda mbia jirandu randu Dios chisaã turã ndese emo mose. Ibátee nandeico mose abe no.

⁸ Jê ngue Jesús jêicua ra. Nyebe que Dios jendirõ jêicuã si ra. Uturã niã ño ngue jendirõ nguiã jêicuã si. Jê ae jeñimbucha aroneate Jesús rese. Dios ae ngue jembucha nguiã erese.

⁹ Nandechisaã turã niã eã ño Dios nandembucha nguiã Jesús rese. Nyebe nandemo ndiqui uturã naa naa aroneate.

¹⁰ Dios ae que nandea ra. —Se emingo mose Jesucristo rese, aque mose quia ra mbae turã naa naa cote, i que Dios nanderiã cose ra.

Cristo miã ño mbia mingo turã turã nguiã nyiese

11 Dios rese que jëingo ãte nyii ra. Ûquí si jêtesareia ño. Judíos eã ño ngue jê ndesê. Nyebe judíos jendirirõ nguiã. Circuncisión ngue jësaã eãte judíos rã ndesê.

12 Jëingo eãte que Cristo rese nyii resê. Jëingo turã eãte que equia Dios rimba je resê. Dios cheê si que jëingo ishote resê. —Dios ra mbae turã saã nande je, jenyê ãte que equia ndua aque mose resê.

13 Jesucristo mbae chõ jê cote re. Ishote jëingo raque Dios si cose. Dios que jembucha tuchi uchiese Jesucristo mano nñi nda.

14 Cristo mñi ño nandemingo turã nguiã nyiese ã. Ae mñi ño judíos mingo turã nguiã judíos eã ndese co. Ae mñi ño judíos eã mingo turã nguiã judíos rese co no. Ûquí ngue siqui icuãte quia nyue Cristo icuayã mose nyii ra. Mbia mñi na ño eriqui nguiã siqui turã nyue ã cote.

15 Umano mose que Jesús judíos mbui mondo Moisés cheê si cote ra. Ae Moisés ñee, judíos echeê mumba eã sacua nae, ùquí si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ûquí siqui mose Jesús rese, co mñi na ño eriqui nguiã ã cote. Mbia mñi mbiasu ji rã ño eriqui nguiã ã cote.

16 Ûquí icuã icuã mose nyue que Cristo mano ùquí icuã ndiquicharõ nda. Ûquí mingo turã ja nonde Dios rese. Siqui turã mose Dios rese, siqui turã nda nyue cote.

17 Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese.

18 Cristo que mano nande ja je ra. Judíos je. Judíos eã je abe no. Nyebe Espiritu Turã mñi nandemingo ja nguiã nyiese ã. Dios nandesichã ja arõte qui a ã cote.

19 Mbiamo eã ño jê Dios je cote re. ã jëingo isho eãte Dios si ã cote. Dios riiri tuchi chõ jê cote re. Cristo resenda ataque rã sí chõ jëingo nguiã ã cote.

20 Tuchua raã ji mo na ndei jê. Jesús chimbaaquiato rei tuchua i rã. Dios cheê mbuchecua cose ndare abe rei tuchu a i rã no. Jesucristo rei ùquí i tuchi.

21 Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã.

22 Espiritu Turã ño jemingo nguiã Dios rese jê abe ùquí. Nyebe jê abe jëingo Dios chucharã ùquí. Dios riqui jeñiangui re ùquí.

3

Judíos eã abe ra siqui Dios rese, i Pablo

1 Se rei Pablo. Jesucristo rimba. A setarõ ji ñi jeni a. Jê judíos eã nñi. —Judíos eã abe riqui Dios rimba ã, ae beite que se quia jeni nda. Nyebe setarõ ji ñi nguiã a.

2 —Judíos eã je chõ seturã esenei senei nde, i que Dios seje ra. Ûquí ndese beite aico co. Jëirandu equia serese reae.

3 —Judíos eã abe ra siqui serese. Secheê turã esenei senei ee, i tuchi que Dios sembaaquiato ra. Ûquí ngue asenei jua chõ jêje ra, se embesa mose jêje nyii.

4 Sechimbese rese jemaie mose ra jeñee cote. —Pablo Dios cheê icua tuchi chõ nguia judíos eã nñi nde, jenyê ra cote.

5 —Judíos eã abe ra siqui serese judíos rã si tuchi, i eã ngue Dios mbia mo je cose ra. Namõ ño mbia jirandu nguiã ùquí ndese. Namõ ño Espiritu Turã

Jesús chimbaaquiato mbiirandu nguiã ùqui ndese. Dios cheẽ mbuchecuada abe mbiirandu ùqui ndese.

⁶ Æ ndei Dios cheẽ mbuchecua ramo ji ã: Judíos eã abe ra siqui Dios rese judíos rã si tuchi cote. Mbia rete mii na nda eriqui ja cote. —Mbae turã tasaã jêje Jesucristo rii, i mose Dios, judíos achõ je eã ño eriqui nguiã ñee. Judíos eã abe je chõ ñene.

⁷ —Ûqui secheẽ esenei senei mbei quia mbia je, i que Dios seje ra. Mbae turã mo asaã eã ndaque Dios je nyii. Uquirãcuã abe que emee seje ùqui naa sacuaã nda.

⁸ Dios turã tuchite que seje ra. Se mbae raande rocoi ee nyii. Nyebe ñee nguiã seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ùqui esenei senei judíos eã je, i que seje ra.

⁹ —Ae turã nda asaã judíos eã je nae, ùqui ndese mbia embiirandu ja cote, i que Dios seje ra. Dios quiarei ndua ndua ùqui nyii. Mbae ao ja nonde nyii.

¹⁰ Mbaerã ño Dios mbia mbiirandu ùqui ndese cote chã. Mbia jirandu sacuaã Dios aquiato rese chõ ñene. Dios judíos eã mingo turã mose judíos rese, mbia ra nyuruira tuchi mae Dios quirãcuã ndese. Ibatenda abe ra nyuruira tuchi mae erese no.

¹¹ Dios ndua ndua ùqui nyii. —Mbia chumumbarate riqui raque ã. Emo emo nda ambucha nyiese Cristo mano mose, i que Dios cose ra. Ûqui ngue esaã Jesucristo rii cote ra.

¹² Nandeico Jesucristo icuate ã cote. Nyebe nandeico nguiã siquicheãte ñee Dios je ã cote.

¹³ Ae mbae rasi asaã nguia cárcel co nae, jeni ño ñene. Seyate se mbae rasi raã mose jeni. Jê abe jeñimbã chõ nguia serese.

Cristo nyesecua tuchi uquiato rese

¹⁴ Judíos eã abe chõ Dios mingo nguiã uchiese. Nyebe aico nguiã gracias i bei Dios je co.

¹⁵ Æ nandechumumbarate riqui íbii ã nae, ùqui ndu ja chõ Dios re. Ibatenda abe ra chõ ae no nde.

¹⁶ Dios mbae saã ja arõte nande je. Ebite mbae raã mose nande je. Nyebe aico nguiã ñee ee jeni a. —Paba, Espiritu Turã emondo tuchi echiangui re. Embuquirãcuã sacuaã, ae chõ nguiã ee a.

¹⁷ —Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia Dios je jeni co.

¹⁸⁻¹⁹ Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiato quia ùqui ndese. Sã Cristo quiato riqui ndua ja ùqui ndese. Sã Dios riqui tuchi jeñiangui re.

²⁰ Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ùqui abe chee esaã arõte quia nande je co.

²¹ Sã Jesucristo quiato riqui ñee turã mbei Dios je Jesucristo rii. Mbae ua ja mose chee. Eĩ si ra equiato quia ñee turã mbei erii. Amén.

4

Hue rã ja chõ Espiritu Turã ndiqui nguiã Jesús quiato mundua

¹ Setarõ ji aĩ Jesús rii a. Secheẽ amondo quia jêje aque. Jêingo turã ño nguia Cristo rã si. Dios chiirabote quia jê nde.

² Jēseteã ño jēingo. Jēingo tochi chõ nguia. Jendoseĩ nguia tu chõ nguia jenyue. Jenyeseua chõ nguia jenyiese.

³ —Hue rĩ ja chõ nandeico ndua jē, jenyue chõ nguia jenyue. Sã Espiritu Turã ndiqui jemundua hue rĩ ja.

⁴ Jesús rete mĩ na ño nande re. Espiritu Turã mĩ ño siqui nguiã nandechiangui re co no. Jesús mĩ na nda nande ja nandeico.

⁵ Ae mĩ ño nanderereua ja re. Ae mĩ ndese chõ nandeico ja nguiã ã. Aque mĩ ñi ño ngue bautizar i nguiã nande je no.

⁶ Dios mĩ ño nanderu ja re. Ae mĩ ño nandemingo nguiã mbae rese. Ae mĩ ño siqui nguiã nandeite re co no.

⁷ Dios que nandehisaã ae aerã mee nande je ra. Cristo que uturã mee mee nande je ra. Ae ra nandesã saã, ũquí naa turã sacuaã.

⁸ Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra,

i que embesa ji ra.

⁹ Jesús que siqui ibátee nyii ra. Aquere que eru nguichi íbii cote ra.

¹⁰ Ae sí que oso nyui ibei robei cote ra. Mbae rerecuarã ja sacuaã ngue ae cote ra.

¹¹ Ae que mbia chisaã ae aerã mee ee ra. —Apóstoles ra jē, i que emo emo je ra. —Secheẽ embuchecua checua quia mbia je, i que emo emo je ra. —Mbia sequiatoã je secheẽ turã esenei senei mbei serĩ, i que emo emo je ra. —Mbia serimba etequiatu bei, i que emo emo je ra. —Mbia embaequiatu quiatu bei quia, i que emo emo je no nda.

¹² Eĩ ngue Dios uquiato mbaaracua racua ja uchisaã ae aerã ndese ra. Ũquí mose ra Jesús quiato Jesús oseĩ i tuchi cote.

¹³ Ũquí mose ra nandendua ja Jesucristo rese hue rĩ ja. Ũquí mose ra Jesucristo nandeicua i tuchi. Jesucristo rã nda nandeico chee ũquí mose.

¹⁴ Ũquí mose ra nandeico ñimbirãcuã tuchi Cristo rese. “Tambĩĩrĩ irĩ Cristo rĩ” i mose emo nande je, nandeicoã nda ũquí ndese. Nandendua ata ata eã nda Cristo rĩ. Ae mĩ ndese chõ nda nandeico bei. Mbia rĩĩrĩ na nda nandeico ndua ata ata eã.

¹⁵ Ũquí mose ra nandecheseẽ ñooño eã. Mbia ra nandembĩĩrĩ irĩã. Nandecheseua ja ra equia mbia rese. Cristo rã sí chõ nda nandeico turã. Dios quiato rerecua tuchite quia ae re. Sã nandẽquí nanderete rerecua no.

¹⁶ Sã nanderete riqui ñimbirãcuã ja no. Eĩ sí chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja ra.

Ae icuã jesaã saã nguia nyii nae, ũquí jesaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jēingochĩ cote jē. Ndua chooño ño nguiã mbae rese ũquí.

¹⁸ Eãquí ãtã ño ũquí nde. Dios cheẽ andu sereã nea je chõ ũquí nde. Nyebe Dios riqui nguiã ngueco mee eã tuchi ũquí je.

¹⁹ Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese.

²⁰ Ũquí ngue Cristo jembaequiatu quiatu eã jē nda.

²¹ Jēirandu que Jesús rese resẽ. Ae sí chõ ngue jembaequiatu resẽ. Jembaequiatu que ucheẽ turã ñi nda.

22 Jeñiangui renda icuã si jêhui chõ. Aba mb̃icuãsa tuchi chõ ùquĩ nde. Aba mb̃irĩ irĩ ño ùquĩ nde.

23 Jendua ndua jembiasu chõ ae. Ae rese jêingo ndua icuã icuã nyii nae, ùquĩ si jêtesarei chõ cote ae.

24 Jeñimbiasu chõ nguia ae. Ûquĩ mose ra jêingo Dios rã si. Jêingo turã tuchi ra equia ee.

25 Jeñee ñooño eã ná nguia jendesenda mo je cote ae. Nyiesenda ja chõ nande cote re.

26 Jê paama i mose, paama jenyete turã ño nguia. Paama jenyete ocoã ño nguia. Tenda oso nonde ti jenyete.

27 Jê paama i oco mose, diablo ra jemb̃icuãte cote.

28 Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote. Sã eriqui mbae mondo mondo mbaecha reã je cote.

29 Jenyuru jendecochõ ño nguia ñee ndocoĩ mbae icuã nii jê. Mbae turã nii ño jêingo ñee mbia je jê. Emundua ndua sacua Dios rese.

30 Espiritu Turã nda jembia eã eãchĩ jê jê. Ae chõ ngue Cristo mbae marca m̃i nguã jendese. Nyebe jêingo nguã ñee. —Cristo ra nandembiasu erã si, i.

31 Paama jenyechĩ nda emo nii. —Ī ãchĩ se, jenyechĩ nda emo nii jê. Jêtasẽ tasẽchĩ nda emo je. Jeñee icuã icuãchĩ nda emo nii.

32 Jêturã ño jêingo jenyue. Jêseteã ño jêingo jenyue. Jendesenda icuã icuã mose jêje, jêtesarei chõ eicuã si. Sã Dios jêicuã mbutiã jê Cristo rĩ nyii no.

5

Dios quiato siqui bei mbae turã ndese

1 Dios ririĩ tuchi chõ jêingo nguã ã. Nyesequa tuchi equia jendese co. Erã si chõ jêingo.

2 Jenyesequa tuchi quia mbia rese. Sã Cristo riqui nyesequa tuchite nanderese no. Sã mano nandeicuã ndiquicharõ oveja rã no. Emano mose que Dios ia tuchi erese ra.

3 Cristo mbae chõ jê cote re. Nyebe jêingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ùquĩ.

4 Jenyuru jendecochõ ño nguia ñee ndocoĩ mbae icuã nii. Mbae icuã aba irenguia rĩ jeñee eã. Eicuãte ñee mose ùquĩ. Gracias jenyete quiatu quia Dios je.

5 Emo siqui mose ngünisiã ndese, aque ra siqui eã Cristo rese, Cristo siqui mose ererequa. Ae mbae icuã saã saã mbeite quia nae. Ae emo mbae chosei chosei quia nae, ùquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ùquĩ no nde.

6 Ae ùquĩ saã saã nguia mbae icuã nae, ùquĩ je ra Dios mbae rasi raanguia tuchi. “Ichõño ñene” ichĩ nda emo jemb̃irĩ irĩ jê.

7 Ae ùquĩ saã saã nguia mbae icuã nae, ùquĩ ndese ra jêingochĩ jê.

8 Itondaruqui re rã ngue jêingo cose ra. Nyaáshĩ ño jêingo nguã Jesús rese ã cote. Nyebe jêingo turã.

9 Ae siqui nyaáshĩ nae, ùquĩ siqui turã ño nguã ã. Ñee ñooño eã ño nguã emo je ã. Siqui ãte equia mbae icuã mo ndese ã.

10 Ae Dios bite riqui nae, ùquĩ ndese chõ jêingo ñimbaaquiato quiatu.

11 Ae itondaruqui r̃inda saã saã nguia mbae icuã nae, ùquĩ nda jêsaã saãchĩ erese jê. Echiao icuã nii ño jeñee ee emundua jê.

12 Ae ũquí saã nyecuayã cuayã nguia mbae icuã nae, aba ireĩte ñee ũquí nã.

13 Jẽ ũquí nyiao icuã mbuchecua mose ee, ndua ndua ra erese cote. Emo emo siquí arõte Cristo rese cote. Itondarوقي riinda recha mbae icuã.

14 Sã embesa ji riqi ñee no:

Ae uque saã saã nguia nae, sã ũquí ñumumba.

Ae siquí quia eraaque rã nae, sã ũquí quera si.

Ũquí mose ra Cristo uturã ndeacuquia ee,
i que embesa ji ra.

15 Cochee tuchi chõ jẽingo Dios rese. Mbia aquiatuã na nda jẽingochĩ. Mbia aquiatu rã nguia tu jẽingo.

16 Ae Dios bite riqi nae, ũquí ndese chõ jẽingo ñimbecoteã. Mbae icuã icuãte eriqui ã cote.

17 Jẽaquiutuã eã ño jẽingo Dios rese. Ae Dios bite riqi nae, ũquí ndese chõ jẽingo ñimbaaquiutu quiatu.

18 Jẽquiacua quiacuachĩ nda equia jẽ. Jẽquiacua mose mbae icuã jẽsaã saã ja arondete. Espĩritu Turã nguia tu jemingo tuchi jẽñiangui re.

19 Cristo rĩ jẽñee turã tuchi quiatu quia jenyue. Jẽirasei rasei tuchi quiatu quia Dios je. Hĩmnos. Salmos. Jẽya chõ jẽingo irasei rasei Dios je.

20 Dios rei nanderu. Ae chõ mbae ja mee mee nguia nande je co. Nyebe "gracias" jenyee bei quiatu quia ee Jesucristo rĩ.

Jẽingo turã ja chõ nguia jenyuchua jenda ja je

21 Jenongue cheẽ jemumbayã ño nguia. Cristobi tuchi chõ ũquí nde.

22 Sã cuña ngu cheẽ mumbayã. Sã eriqui Dios cheẽ mumbayãte no.

23 Eru quia rei ngũnisi rerecua. Sã Cristo uquiato rerecua no. Cristo quiato rei Cristo rete rã. Cristo quiatu ngue esirõ nguia eicuã si.

24 Sã Cristo quiato riqi echeẽ mumbayãte no. Eĩ si chõ cuña nguia ngu cheẽ mumbayã mbei.

25 Sã eru riqi nyesecua tuchi ngũnisi rese. Sã Cristo nyesecua tuchi uquiato rese no. Sã mano nyee eriquicharõ no.

26 Uquiato no sacua icúe chõ ũquí nde. Irei que i je ra. Ucheẽ je abe que eirei no nda.

27 Cristo uquiato mbuturã turã ja quia co. Mbae icuã ndese emingo uquia reãte. Nyebe eyate riqi nguia erese co.

28 Sã Cristo riqi nyesecua tuchi uquiato rese no. Eĩ si chõ mbia quia nyesecua ngũnisi rese. Sã emo ndiqui ngueteãte nguete rese no. Emo ngueteã mose ngũnisi rese, nguete rese ngueteã naanguia chõ ũquí nde.

29 Emo nda nguete ucuayã eã. Nguete ra equereco turã. Teaquiutu turã nda equia. Eĩ si Cristo quia uquiato rerequia turã co no.

30 Cristo rete rã si chõ equiuto re. Nande abe chõ Cristo rete rã no nde.

31 Dios que ñee nyii ra. Emo ngũnisirã ndea mose, sã nyao usi si. Ngu si abe no. Sã ngũnisi mĩ ndese chõ eriqui. Co mĩ siquí rã ño eriqui nguia nyiese cote.

32 Mbaranguiutuãte raque ũquí icua. Nyeremo siquí mose co mĩ na. Cristo rĩ ño eriqui nguia ñee. Equiuto rĩ abe no.

33 Jẽje abe chõ eriqui nguia ñee. Jẽ nyesecua tuchi sacua jeninisi rese. Sã jẽingo nyesecuate jendete rese no. Sã cuña abe riqi ngu cheẽ mumbayã mbei.

6

1 Mbia riirī, jendu cheē jemumbayā ño nguia. Jēsi cheē abe.

2-3 Ā ngue Dios ñee cose ra: “Jēingo turā ño nguia jēsi je jē. Jendu je abe. Jēingo turā mbei ra equia ũquĩ mose. Jendeco ra jēingo arete íbii,” i que Dios mbia je cose ra.

4 Eru je tacheē cote. Esi abe je. Jeñee icuā icuā tuchi tē chĩ nda jendiirī je jē. Paama i chee ra jēje. Jembaaquiātu turā turā quiātu quia. Jemingo turā quiātu quia Dios rese.

5 Mbia rimba je tacheē cote. Jenderecua cheē jemumbayā ño nguia. Cochee chō jēingo ee. Jēingo turā ño nguia jenderecua je. Cristo bite ũquĩ.

6 Jenderecua mae eā mose jendese, ũquĩ mose abe chō jēingo embae raā naa turā ee. Mbae jēsaā turā ja quiātu quia Dios cheē ndui si. Cristo rimbate quia jē nde.

7 Jēya chō jēingo mbae raā naa mose jenderecua je. Dios je chō jēingo nguiā eraā ũquĩ. Jenderecua ibi jenda mii je eā ño ñene.

8 Dios ra mbae turā mee jēje emo mose jenyiao turā ndibishorō. Jēingo mose mbia rimba. Mbia rimba eā jēingo mose ra re no ae.

9 Mbia rerecua je tacheē cote. Jēingo turā ño nguia jē abe jenimba je. — Tareirua nua, jenyechĩ nda embĩrĩ irĩ jē. Jē abe chō jenderecua no nde. Jesucristo rei jenderecua. Jenimba abe rerecua. Eĩ ja chō mbia Dios je re. Mbia mii ndese ra eriqui turā eā.

Soldados rā si chō jēingo nyiquisā mbae icuā si

10 Hui bei nonde ā tacheē jēje. Dios quia rei equirācuā tuchi. Dios quirācuā je chō jēingo nguiā ñimbirācuā.

11 Sā soldado riqui armadura mingue no. Ũquĩ ndei nyiquisā sacua ũquĩ. Eĩ jenyje si chō nguia siqui tuchi Dios rese nyiquisā Satanás si.

12 Ae icuā icuā ndiqui nande je Jesús rii nae, mbia eā ño ũquĩ nde. Satanás ño ũquĩ nde. Satanás nimba abe no. Aba checuayā icuā abe no. Mbae icuā nderecua ja chō ũquĩ nde. Equirācuā tuchi riqui ũquĩ.

13 Jēingo tuchi Dios rese ũquĩ icuā si nyiquisā sacua. Jēquirācuā jēingo tuchi sacua. Jēquirācuā mbei quia jēingo, Satanás jembūcuā eā sacua.

14-17 Jēquirācuā tuchi chō jēingo. Sā soldado riqui icoquiātu armadura mingue no. Eĩ jenyje si chō nguia icoquiātu diablo jembūcuā eā sacua. Sā soldado riqui ngūmbi cuasa mingue no. Huiisia rinda abe mingue nyiquisā sacua no. Sā soldado riqui huiyao mingue icoquiātu no. Sā escudo abe rerequia oo no. Nyiquisā sacua emo uu mombo mose ee. Sā huiite sucha ātā abe mingue uāquĩ ndiquisā sacua no. Sā tiquise abe rerequia no. Soldado rā si chō jēingo icoquiātu nyiquisā sacua diablo si. Jeñee ñooño eā ño nguia. Jēingo turā mbei chō nguia. Jēingoquiātu bei quia Dios cheē turā nenei nenei mbia je. Dios jēicua tuchi quiātu quia. Dios icua tuchi mose ra diablo tā i eā jēje. Dios quirācuā ndese quia jēingo tuchi mbae icuā naa eā sacua. Dios cheē jēicua tuchi quiātu quia. Ũquĩ mose ra Espiritu Turā siqui tuchi jendese.

18 Jeñee mbei quiātu quia Dios je. Sā Espiritu Turā jembucheē turā mbei quia ee. —Mbae embu seje. Ā embu seje, jenyje bei quiātu quia Dios je. Dios quiātu ja rii ño jēingo ñee Dios je. Dios siqui turā sacua erese.

19 Serii abe quia jēingo ñee mbei Dios je. Sembucheē turā sacua, se echeē nenei nenei mose mbia je. Ae rese mbia riqui jiranuate Cristo rii nae, ũquĩ asenei senei nguia mbia je co.

²⁰ Dios que semondo ucheẽ turã nenei nenei sacuaã nda. Uũquiã nã ño setarõ ji aĩ nguiã a. Jeñee mbei quiatu quia Dios je seriĩ. Se ireĩ ireĩ eã sacuaã. Se echeẽ turã nenei nenei mbei sacuaã mbia je.

Pablo ñee hui bei

²¹ Ti quico si quia jendea aque. Ae ra mbae senei ja jẽje jembiiirandu seriĩ. Ae que mbae saã turã mbeite quia serese ra. Dios rimba turã tuchi chõ ae re.

²² Nyebe amondo nguiã jendea aque. Jembiiirandu ja sacuaã urerese. Jembia tuchi sacuaã Cristo rese abe.

²³ Jesús quiato chõ jẽ abe, se rã si re. Sã Paba ibatenda riqui jembia bei tuchi. Sã eriqui jembuchesecua tuchi mbia rese. Sã Jesucristo icua uquia tuchi jẽje.

²⁴ Ae nyesecua tuchi quia Jesucristo rese nae, sã Dios turã siqui tuchi uũquiã ndese. Amén.

LA CARTA DEL APOSTOL SAN PABLO A LOS FILIPENSES

Pablo tarō ji ucheē mbesa mondo Jesús quiato je

¹ Pablo chō se re. Timoteo rese. Jesucristo rimba chō ure re. A ureico ā mbesa jēje a. Felipos jenda Jesucristo quiato ja je a. Jesús quiato rerecua je abe ureico ā mbesa a. Diáconos je abe no.

² Sã Paba Ibatenda turã ndiqui jendese. Sã jembia mingo. Sã Jesucristo abe jembia mingo no.

Pablo ñee Dios je Jesús quiato rñ

³ Sendua ndua mose jendese, seya beite aico jendese co. Gracias ae beite sequia Dios je jeni co.

⁴ Se ñee ñee mose Dios je jeni, seyate riqui co.

⁵ Se Jesucristo cheē nenei namo mosenda bei chō jēingo nguiã ndua bei serese co. Nyebe jēingo nguiã mbae mondo mondo bei seje co. Nyebe seya tuchi riqui nguiã jendese co.

⁶ Dios que ucheē mingue jeñiangui re, ae si ra siqui bei jendese jembitorō tirō. Jesucristo tu chee. Ae bei. Siqui bei ra jendese. Aicuate se quia co.

⁷ Coche aico nguiã ndua ndua eĩ jendese cco. Achesequa tuchite quiatu nguiã jendese. Jē ngue jēingo beite quia serese ra. Jendua ndua beite que equia serese ra. Mbae mondo mondo bei seje. Mbia icuã icuã mose seje. Se mbia cheē ndiquisã quisã mose Jesús cheē si. Mbia setarō tarō mose. Ūqui mose abe que jēingo beite serese ra. Dios turã ndese que nandeico mae mae mbeite ra.

⁸ Dios resa aico ñee co. Jesucristo rã si aico nyesequa tuchite jendese co.

⁹ Aico ñee mbeite Paba je jeni co. —Paba, ūqui embuchesequa i i tuchi mbia ja rese. Ndeaquiato emondo i i tuchi ee, ae beite quia Paba je jeni co.

¹⁰ Eĩ nda mbae turã jēcua. Eĩ nda jēingo bei mbae turã ndese. Eĩ nda Jesucristo ñee asiã jēje tu mose.

¹¹ Eĩ nda Jesucristo jemingo bei mbae turã ndese. Eĩ nda mbae turã jēsaã saã ja Dios je.

Cristo mñ nñ ño aico nguiã se co, i Pablo

¹² Ā tasenei jēje. Mbae icuã ngue jeĩ jeĩ mbeite quia seje, ūqui ngue Jesús cheē mbutiba eã mbei ra. Ūqui jeĩ jeĩ mose seje, mbia que jirandu tuchite quia Jesucristo rese cote ra.

¹³ A setarō ji ñi cárcel a. —Cristo rñ ño etarō ji ñi nguiã hue, i jate mbia quia serñ ūqui. Mbia rerecua chuchua jenda ja. Tuchuamo jenda ja abe.

¹⁴ Jesús quiato jirandu mose setarō ji rese, esiquicheate riqui Dios cheē nenei nenei ūqui cote. Jesús quiato ja riqui Dios cheē nenei nenei tuchi ūqui cote. —Dios riqui tuchi urerese co, i equia ūqui cote. Maende setarō ji rese.

¹⁵ Emo emo ndiqui Cristo renei ñooño ūqui. Ndua icuã icuã ño nguiã ūqui. Mae icuã icuã ño nguiã serese ūqui. Emo emo ndiqui Cristo renei turã tuchi ūqui no.

¹⁶ Ae Cristo senei ñooño nguia nae, ūqui icuãte riqui seje ã. —Sã Pablo tarō ji ñiño, i equia serñ ã. Cristo renei ñooño ã. Emo ndese ndua eã. Nyiese chō riqui nguiã ndua.

17 Ae Cristo senei turã nguia nae, ùquĩ ndua chõ nguia emo ndese. — Jesucristo cheẽ nã ño Pablo tarõ ji ñi nguia hue, i equia ndua serese ùquĩ.

18 Seyate emo Cristo renei turã mose. Seyate emo Cristo renei ñooño mose no. Cristo rĩ nguiatu eriqui nguia ñee. Tachimbia tuchi chõ nguia ùquĩ Cristo renei nenei mose.

19 Jëndese abe seyate aico co. Ûquĩ jëingo ñee Dios je serĩ ùquĩ. Espiritu Turã ndiqui serese a no. Ae Jesucristo mbu seje. Nyebe Dios riqui nguia setarõ ji reaquiату tuchi a. Nyebe seya tuchi riqui nguia a.

20 Sesiquiteã tuchi ra se reae. Seireĩ ngüia mbei nda eriqui Cristo cheẽ nenei nenei ña. Cristo bi achõ ndese taico bei setarõ ji. Mbia nda seiquia rei nguia, se taico bei Cristo rese. Mbia nda sembusẽ ndei nguia no, ùquĩ mose abe taico bei erese no. Eĩ ja chõ seje re. Eturã ja chõ seje no nde.

21 Cristo mui nã ño aico nguia se co. Semano mose, eturã tuchi quiarei ùquĩ seje cote.

22 Dios semingobe mose, ae si je chõ aico nguia mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se.

23 Ma ño sebi jiri. Semano sete raque oso sacua Cristo rese. Ûquĩ nda eturã jiri seje.

24 Se seicobe mose íbii, ùquĩ nda eturã jiri jëje reae.

25 Ûquĩ aicuate se. Seicobe mose, ùquĩ nda eturã jiri jëje reae. Nyebe ra Dios semingobe jiri jendese. Se Cristo icua uquia sacua jëje. Se jembiaabe jiri sacua Cristo rese.

26 Anyae ra oso jendea. Aque mose nda jëya tuchi Jesucristo rese chã.

27 Ae uresenei senei nguia Cristo rĩ nae, ùquĩ andure chõ jëingo turã. Airandu turã nda se quia jendese chã. Eĩ nda mbia ñee seje chã. —Hue rĩ ja chõ eriqui ndua turã nye. Huee echĩ mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese.

28 ¡Tiri jenyechĩ nda Jesús ucuâyãsa si jë! Jësiquiteã mose, Dios ra ùquĩ mundua tata cuasu rese cote. “Huee ra asochĩ nde”, i chee rae. “Jesús icuasa ra Dios mingo bei”, i ra ùquĩ jeni cote, jësiquiteã mose esi.

29 Jë Cristo jëicuate quia ùquĩ cote. Ûquĩ muiño eã. —Jëñimbirãcuã abe quiatu quia serĩ, mbia icua icua mose jëje, i Cristo quia jëje co.

30 Sã mbia icua icua riqui seje no. Eĩ si chõ mbia icua icua ndiqui nguia jëje ùquĩ. Nande jaje bei chõ ñene. Jemae ndei que equia serese cose resẽ. Se mbia icua ndiquisã quisã mose. Ûquĩ sí rese chõ jëingo nguia jirandu randu serese namo no.

2

Cristo seteã tuchi que tu ra

1 Jesucristo jembu turãte quia co. Cristo nyesecua mose jendese, jëyate riqui ùquĩ. Espiritu Turã abe riqui jendese ùquĩ. Jendua turãte equia emo ndese ùquĩ.

2 Nyebe aico nguia ñee jëje. Seyate aico raque jendese co. ¡Secheẽ jemumbayã tuchi quiatu quia jë! ¡Sembia tuchi quiatu se jë! ¡Jendua ata atachĩ nda jë! ¡Hue rĩ ja chõ jëingo ndua jë! ¡Hue rĩ ja chõ jëingo nyesecua nyiese no jë!

3 ¡Abei chiãte ra jëingochĩ jë! ¡Jenguasu ra jësã saãchĩ! ¡Jëseteã ño jëingo! — Nde chõchĩ ndeturã sesi, ¡jenye chõ jenyue!

4 “Se chõ jê” jjenyechĩ nda jê! Emo mbaerã abe rese quia nandeico ndua.

5 Sã Jesucristo riqui ndua eãte uchiese no. Erã si chõ nandeico ndua nande abe jê.

6 Dios rã si rei que Jesucristo ra. Ñimbuseteã tuchi que u íbii ra. Ererecua rã eã ngue eru íbii ra. —Dios rã si chõ taico bei se, iã ngue u íbii ra.

7 Mbia rerecua tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã.

8 Mbia mo na ño ngue ae ra. Ibii eico mose cote. Mbia rerecua que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireĩte mano ira rese.

9 Nyebe Dios riqui nguiã Jesucristo mbuchecua beite co cote. Mbia rerecuarã tuchi Dios Jesucristo mingo co cote.

10 Mbia ra ngoi ja chee ngũĩã ndese Jesucristo je ñee. Ae siqui ja íbii. Ae siqui ja ibátee no. Ae siqui ja ibiqui rĩ. Ũquĩ ja ra ñee turã Jesucristo je.

11 —Jesucristo rei mbia rerecua ja, i chee ra ũquĩ ja ñee. Ũquĩ mose ra Dios ia tuchi cote.

Secheẽ jêisi chooño eẽ ño nguiã, i Pablo

12 Secheẽ ngue jemumbayãte quia seico mose jendese. Ishote aico jêsi co. Secheẽ jemumbayã tuchi quiatu quia isho seico mose abe. Cochee jiri quiatu jêingo Dios je. Jêingo bei tuchi quia erese. Jenderao chee ra ibate mbae icuã si.

13 Dios quirãcuã ndiqui jeñiangui re ũquĩ. Dios quia mbae turã nyosei uquia nguiã jêje. Dios mii ño jemingo nguiã ubi rese.

14 Mbae turã jêsaã turã ja chõ. Ñee icuã icuã ndocoĩ. Teã teã ndocoĩ.

15 Eĩ nda mbia mo ñee icuã icuã eã jêje. Eĩ nda jêicuã eã emo je. Dios ririĩ ño jê nde. Sã nyasitata riqui mbae resae jate itondáruu no. Eĩ ño jê nde. Nyasitata rã si chõ jê nde. Mbia icuã ndesae ja.

16 Jêingo mbia mingo beisa renei nenei tuchi mbia je ũquĩ. Nyebe ra seya tuchi jendese Cristo tu mose. Secheẽ jêisi chooño eã ño nguiã. Jaembaaquiatu chooño eã ngue Cristo rĩ nda.

17 Secheẽ nguire jêingo Dios icuate ũquĩ cote. Secheẽ nguire jendete jemee tuchi mose Dios je, seya tuchite ra jendese cote. Mbia nda sei quia rei nguiã Jesucristo rĩ, seya bei ra aico jendese, jendete jemee tuchi mose Dios je.

18 Jeñimbia chõ nguia serese. Sã seyate aico co no.

Timoteo tamondo jêje Epafrodito rese, i Pablo

19 Jesús eno i mose, Timoteo tamondo rã jendea. Eĩ nda seya jirandu mose jendese.

20 Timoteo rã si ãte emo ndua tuchi jendese.

21 Umbaerã achõ ndese chõ eataque riqui nguiã ndua ndua. —Ã tasaã saã mbei Jesucristo je, i ãte equia ũquĩ.

22 Sã eririĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei mose serese. Siqui turã mbeite que equia serese ra. Ũquĩ jêicuate quia ũquĩ.

23 Nyebe ra Timoteo amondo jendea. ã tatea rã nyii. Mbia ra setarõ ji mii mbei a reae. Sembusẽ nda re no ae. Ũquĩ tatea rã nyii. Ũquĩ ndeare ra Timoteo amondo jendea.

²⁴ Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

²⁵ Epafrodito abe tamondobe jẽje. Ae jemondo seje nyii seraarõ sacua nae. Seresenda turãte riqui seje co. Dios cheẽ nenei nenei serese. Senongue rã tuchi eriqui seje co.

²⁶ Mae sete equia jendese co cote. —Mbia jiranduchĩ serasi rese re, i equia jeni co. Nyebe eya eã ndiqui nguiã nduate jendese cote.

²⁷ Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no.

²⁸ Nyebe Epafrodito amondo nguiã jẽje aque. Jembia sacua erasiã ndese cote. Seya eã nda sasẽ jiri jemaẽ mose erese cote.

²⁹ Nanderesenda tuchi chõ ae Jesucristo rese re. Ngasẽ mose pee, jẽya chõ erese. Jẽisi turã ño. Eraanguia rese jẽingo turã mbei Jesús quiato.

³⁰ Jesucristo rĩ ngue mano serĩ serĩte ra. Jesucristo cheẽ nenei nenei mose. Siquiche ãte que equia ra. —Amanochĩ nda se re, i ãte que equia ra. Sereaquiato turã tuchi que equia ra. Ishote quiato ngue jẽingo nguiã jẽ. Sereaquiato aronea.

3

Cristo mi ndese aico cote, i Pablo

¹ jẽya bei chõ jẽingo Jesucristo rese jẽ! Ae asenei senei nguia jẽje nyii nae, ùquĩ sí tasenei senei jẽje. Sebite secheẽ nenei nenei sí jẽje. Jendua bei sacua erese.

² Ae siqui nyacua raãte nae, ùquĩ si jenyiicuasẽ ño nguia. Eicuãte riqui ùquĩ. Aba rete sia choõño ño ùquĩ nde. Mbia mbaaquiato turã ndocoĩ.

³ Circuncisión ño nande re. Nandechiangui re chõ nandeico nguiã Dios rerequia nande ã. Nande chõ nandeya riqui nguiã Jesucristo rese ã. —Mbia circuncisión naa mose, aque mose quia ra Dios emingo bei cote, i chõchĩ emo hue jenda nguiã ùquĩ. Nandequiato jiriã tuchi chõ ùquĩ nde.

⁴ —Dios ra semingo bei, mbae turã naa naa mose, ae rei que se quia nyii ra. —Seturã nĩ nda Dios semingo bei, i chõchĩ emo. Seturã tuchi raque eriqui ùquĩ si.

⁵ Sechacuquia mose, ocho días mose que circuncisión naa seje ra. Israelita chõ se re. Benjamín ndiirĩ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés chimbesa que amumbayã nguia ra.

⁶ Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia serĩ nda.

⁷ Ùquĩ nĩ ngue aico secuasua raã naa tuchi cose ra. Jesús icuayã mose se. Mbae eã tuchi chõ ùquĩ seje cote re. Cristo rese quiato aico nguiã co cote.

⁸ Mbae mo ndese aico queteã eãte co cote. Aico ndua eãte mbae mo ndese co cote. Jesucristo mi aicuate quia co cote. Ùquĩ eturãte mbae ja si seje cote. Jesucristo rĩ aico hui jate mbae si co cote. Iti rã ño mbae ja riqui nguiã seje cote. Seico bei sacua Cristo rese.

⁹ Cristo rese tuchi chõ aico nguiã co cote. Aico bei rei que Moisés chimbesa rui nyii ra. Ùquĩ nĩ eã ño Dios seisi turã nguiã. Se Jesucristo icua mose, ùquĩ

mose quiatu ngue Dios seisi turã nguiã. Ae Jesucristo icua quia nae, ùquĩ Dios isi turã ño nguiã.

¹⁰ Cristo aicuase tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandeicua ndiquicharõ no. Eĩ ae rã nda mano mbae icuã si chã.

¹¹ Eĩ mose ra Dios seraque mbuquera si mingo bei cote.

Cristo mii ndese aico ndua co cote, i Pablo

¹² Mbae quia asaã ja eãte rei nguiã. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacua ae rã si ra. Jesucristo turã na tuchi aicoã ndaque namo co. Nyebe aico nguiã siqui tuchi erui co. Seico sacua tuchi chee ae rã si cote.

¹³ Ae ra Dios mee seje, ùquĩ asiiti ja eãte. Ae eĩ eĩ seje cose, ùquĩ si aico tesareite co. Ae ra Dios mee seje, ùquĩ nda asiiti. Ûquĩ mii ndese chõ aico nguiã ndua co cote.

¹⁴ Ae siqui tuchi quia Jesucristo rese, ùquĩ je quia ra Dios premio mee. Nyebe aico tuchi nguiã erese co. Premio isi sacua.

¹⁵ ¡Eĩ nande ja tuchi quiatu quia siqui Jesucristo rese jê! Nande eicua tuchi mose. Jendua ja eã mose hue rĩ, Dios ra ñee jêje. —Ã ndese chõ jêingo, i ra jêje.

¹⁶ Ae nandesiiti nae, ùquĩ ndese bei chõ nandeico. Ae rĩ Dios nandembaequiatu quiatu nyii nae, ùquĩ ndese bei chõ nandeico.

¹⁷ Serui bei jêingo, Seresenda. Ureico bei Jesucristo rui ã. Sã mbia siqui bei urerui.

¹⁸ Mbia tubiriã ndiqui Cristo ucuãyãte ã. Ûquĩ ae rei que se quia jêje nyii resê. Aba mbucheseo serĩ. “Cristo que mano mbia riquicharõ nda”, ùquĩ andu sereãte.

¹⁹ Ûquĩ nda nyoi ja tata cuásuu. Ubi rese achõ ño ùquĩ ndiqui nguiã. Eireĩ nguiãte. Eya chõ eriquichĩ nguiã huicua ndese. Ibi jenda achõ ndese chõ eriquichĩ nguiã ndua.

²⁰ Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. Å nandeico eraarõ arõ ã namo.

²¹ Jesucristo tu mose nande je íbii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

4

Jêya bei chõ jêingo Cristo rese

¹ Sechesequa, andua tuchite quia jendese a. Amaese tuchi se quia jendese a. Seya tuchite aico jendese a no. ¡Jêingo turã tuchi chõ Jesucristo rese jê!

² Evodia je tacheẽ. Síntique abe je tacheẽ. ¿Mbaerã jêingo siqui icuãte nyue re? Jêingo turã ño jenyue ae. Jesús quiato chõ jê ndesê.

³ Nde abe je tacheẽ, Seresenda. Ûquĩ cuña emingo turã nyiese. Eteaquiatu bei quia. Ûquĩ ngue siqui bei serese Jesús cheñ nenei mose ra. Clemente rese abe no. Eataque rese abe no. Dios que ùquĩ mbae nombre mii mii libro umbae rese ra. —Ûquĩ nda siqui bei serese, i que ra.

⁴ Jeñimbia bei Jesucristo rese. ¡Jeñimbia tuchi jê!

⁵ Sã mbia mae ja jêturã ndese. Jê abei rese. Achite Jesucristo ñi tu a.

⁶ Pari pari jenyechĩ nda mbae mo je. Jeñee ja quiatu Dios je. —Mbae mo embu ure je, jenye chõ nguia ee. Gracias jenyechõ nguia ee.

⁷ Ũquí mose ra Dios jembia tuchi. —Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembia bei mingo no.

Mbae turã ndese chõ jẽingo ndua

⁸ Hui bei nonde ã abe tambesa jẽje. ¡Mbae icuã ndese ra jenduachĩ jẽ! Mbae turã ndese chõ jẽingo ndua. Ae riĩ nandeico ñee turãte, ũquí ndese chõ jẽingo ndua. Ichõ:ñosa reã ndese chõ jẽingo ndua. Ae Dios bite nae, ũquí ndese chõ jẽingo ndua. Mbae quishĩ ndese chõ jẽingo ndua. Ae rese mbia turã ndiqui mae sete, ũquí ndese chõ jẽingo ndua.

⁹ Ae asenei senei nguia jẽje nyii, ũquí ndese chõ jẽingo jẽ. Ae eraã ndese jẽingo mae mae seje nae, ũquí ño jẽsaã saã mbei quia. Ũquí naa naa mose, Dios ra siquijendese. Jembia bei ra equia.

Jesús quiato ofrendas mondo Pablo je

¹⁰ Jendua ramombe equia serese ũquí. Dios sembia tuchite quia ũquí ndese co. Jêtesareĩ eãte rei que equia sesi nyii ra. Mbae que jemondo aroneate quia seje nyii ra.

¹¹ —Mbae ãte seje. Mbae mo embu seje, ae ãte se quia jẽje co. Sembae eã mose, seyate ũquí mose. Sembae ñetẽ mose, seyate ũquí mose no. Ũquí je que achimbaaquiatu se ra.

¹² Sembae eã mose, seyate ũquí mose se. Sembae tubiriã mose, seyate ũquí mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no.

¹³ Cristo que uquirãcuã mee seje ra. Equirãcuã je mbae asaã ja arondete.

¹⁴ Coche ngue mbae jemondo nguia seje. Sembae eã mose. Seyate raque sembae eã mose.

¹⁵ Jẽ ae chõ ngue mbae jemondo mondo bei nguia seje. Se Jesús cheẽ nenei namo mose bei chõ ngue mbae jemondo mondo nguia seje. Iglesia mo abe que mbae mee ãte seje ra. Jẽ ae chõ ngue re. Filipos jenda ja. Se Jesús cheẽ nenei nenei namo mose jẽje, aque mose bei chõ ngue mbae jemondo mondo seje. Seso ramo mose Macedonia si.

¹⁶ Sã ñi mbae mo jemondo mondo seje Tesalónica seico mose no. Mbae eã mose seje.

¹⁷ —Mbae mo jemondochõ seje, ae ãte quia jẽje a. Dios je chõ jẽingo nguia emondo ũquí. Dios ra mbae mondo tuchi jẽje eribishorõ. Ũquí ndese quiatu seya riqui nguia.

¹⁸ Ae jemondo seje namo Epafrodito rese nae, ũquí ngue aisi ja ra. Dios bite jeñimondo. Ofrenda turã tuchi que ũquí Dios je ra. Mbaete rei sembae cote re.

¹⁹ Jesucristo resenda chõ jẽ nde. Ae emoate jẽje nae, ũquí nda Dios mee ja jẽje. Dios quia mbae quereco ja nguia. Equirãcuãte quia ñene.

²⁰ Sã mbia ñee turã mbei Dios riĩ. Nanderu riĩ. Amén.

Hui bei chõ ã cote re

²¹ Jesucristo quiato je saludar jenyechõ ja seje. Ae Jesús quiato riqui serese nae, ũquí ucheẽ mondo quia saludar i jẽje aque.

²² Jesús quiato a jenda ja ucheẽ mondo quia saludar i jẽje aque. César chuchua jenda abe ucheẽ mondo quia jẽje aque. Ae siqui quia Jesús rese, ãqui.

²³ Sã Jesucristo turã tuchi riqui jẽ ja je. Amén.

LA CARTA DEL APOSTOL SAN PABLO A LOS COLOSENSES

Pablo embesa mbesa Colosas jenda je

¹ Pablo chõ se re. Dios chiirabo chõ se re. Jesucristo que seirabo mingo ucheẽ nenei nenei sacuã nda. Timoteo rese aico ã mbesa mbesa jêje a. Nanderesenda Timoteo.

² Dios rimba Colosas jenda je chõ aico nguiã co mbesa mbesa a. Cristo icuaa hue jenda ja je. Ae Cristo icua tuchi quia nae, ùqui ja je. Sã Dios turã ndiqui bei jendese. Sã eriqui jembia bei. Sã Jesucristo abe riqui bei jendese.

Pablo ñee Dios je Jesús quiato rã

³ Nandererecua tuchi rei Jesucristo. Dios rei eru. Ureico beite ñee Dios je jeniã. Gracias ure beite equia jeniã.

⁴ Ureirandu turãte quiatu ngue jendese re. Jesucristo jêicuate quiatu nguiã ure je ùqui. Jenyesequa tuchi quiatu nguiã Dios quiato rese ùqui.

⁵ —Cristo rese ra nandeico je ibate, jenyete quiarei equia eicua ùqui. Ùqui ndese que jêirandu tuchite nyii ra. Jesucristo cheẽ nenei nenei namo mose jêje nyii.

⁶ Jesucristo quiato echeẽ senei senei mbeite quia mangue choõnoa jenda ja je ã. Nyebe Jesús quiato riqui nguiã ñimbeta i i tuchi ã. Sã nandeico mbae a ucua ucua no, eĩ si chõ ñene. Sã eriqui Jesucristo cheẽ nenei nenei jêje nyii no. Sã Jesucristo cheẽ jeña mbitirõ eandu ramo mose no.

⁷ Epafras abe que jembaaquiato quiatu Cristo rã nda. Cristo resenda tuchi chõ ae re. Ae chõ Cristo cheẽ senei senei turã nguiã co. Nanderesenda tuchi chõ ae re.

⁸ Ae que sembiirandu turãte jendese ra. Espiritu Turã ndiqui tuchi jendese ùqui. Nyebe jêingo nguiã nyesequa turãte mbia rese ùqui.

⁹ Ureirandu mose jendese ùqui ndese, aque mose bei chõ ureico nguiã ñee Dios je jeniã. Dios jemingo bei sacuã ubi rese. Ucheẽ abe rese. Dios uaqiату mee sacuã jêje.

¹⁰ Jêingo turã sacuã Dios mbia. Jêingo turã sacuã mbae turã ja rese. Jê Dios icua i i tuchi sacuã.

¹¹ Dios jembirãcuã tuchi sacuã uaqiату je. Jeñimbirãcuã tuchi sacuã mbae rasi je. I nda jêingo tochi tuchi mbae ja je. Ùqui mose ra jêyate no.

¹² Ureico gracias i tuchi Dios je ã. Ae quiatu ngue nandembuchiabõ nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote.

¹³ Mbae icuã nguiatu que nanderereco quia itondáruu nyii ra. Dios que nandembu ùqui si cote ra. Nguirĩ ndese que nandemingo cote ra.

¹⁴ Dios ririĩ ngue nandesisirõ umbaerã mbei ra. Mano ngue nanderiquicharõ nda. Nandeicuã ngue embutiã mbei nyesi ra.

Cristo que mano nandemingo turã sacuã Dios rese ra

¹⁵ Mbã mae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbã je cote ra.

¹⁶ Dios ae que mbae chao eã nda. Nguirĩ ndese quiatu ngue mbae ja ao nguiã. Mbae ibatenda ao ja. Mbae ibi rãnda abe ao ja no. Ae rese nandeico mae ã nae, ùqui ja que Dios chao nguiriĩ ndese ra. Ae rese nandeico mae

aroneate nae, ũquí abe que echao nguiirĩ ndese no nda. Mbia rerecua ja abe no. Aba checuayã ja abe no. Ũquí ja que Cristo chao ngu rese ra. Cristo mbaerã ño ũquí ja re.

¹⁷ Mbae ao ja nonde Cristo riqui rei nyii. Erĩ ño mbae riqui ja nguiã ã cote.

¹⁸ Dios quiato rerecua ja chõ Cristo riqui nguiã co. Sã nandeãquí nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua j a tuchi.

¹⁹ —Se rã sí tuchi Cristo jê, i que Dios ra.

²⁰ Cristo mano mose, nandemingo turã sacua Dios rese chõ ñene. Nande mi mingo turã sacua eã ño ñene. Mbae ja mingo turã sacua Dios rese chõ Cristo mano nguiã. Mbae ja ibi rãnda. Mbae ibei rãnda ja abe no.

²¹ Ishote que jêingo Dios si nyii ra. Mbae icua naa naa mose. Ũquí mose que jêingo Dios ucuayãte ra. Jendua ndua icuãte que equia erĩ nda. Namu nguia eriqui nguiã jemingo turãte uchiese ũquí.

²² Cristo quiatu ngue mano nguiã jeni. Mbia rete raanguia rerequia mose. Mbae rasi que esaã tuchi umano mose ra. Jeni ño ngue mbae rasi raã nguiã. Jêicua mbutiã sacua. Jemingo turã sacua icue Dios mbaerã.

²³ Nyebe jeñimbratã jiri quia Jesús icha rui. Jeñimondocho eã mbei quiatu quia jê. Jêhu eã ño Jesús cheẽ turã si jê. Jesús cheẽ turã ngue jeñandu tuchi quia. Mangu choõoa jenda ja que echandu ra. Se abe asenei senei tuchi quia Dios cheẽ nguire co. Pablo chõ se re.

Dios que seirabo ra, i Pablo

²⁴ Se mbae rasi raã mose jêje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã mose Cristo quiato je.

²⁵ Dios que seirabo uquiato mbaaquiato quiatu ja sacua nda. Iglesia jenda ja. Dios cheẽ mbuchecua ja tuchi sacua jêje.

²⁶⁻²⁷ Dios que seirabo judíos eã mbaaquiato quiatu sacua nda. Ae Dios mbuchecua eã mbei judíos je nyii nae, aico ũquí mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae mi ño aba mingo arõ nguiã Dios rese co. Ũquí ño Dios mbuchecua ramo nguiã uquiato je co.

²⁸ Cristo mi ni ño aico nguiã ñee mbia je co. Mbiaambutu mbuti chõ nguiã Cristo icha rui co. Seaquiato je chõ aico nguiã mbia mbaaquiato quiato Cristo rĩ co. I nda Jesús quiato ja riqui siqui i i tuchi erese.

²⁹ Nyebe serecoteã tuchite riqui nguiã ũquí ndese co. Dios quia sembirãcuã mbeite nguiã co. Mbia mbuti mbuti sacua Cristo icha rui.

2

¹ Co secheẽ jeñandu rã. Andua ndua tuchite se quia nimbecoteã jendese co. Acheẽ tuchite se quia Dios je jeni co. Laodicea jenda ni abe no. Ae mae ãte quia serese Jesús quiato nae, ũquí ni abe no. Mbia mbaaquiato icua icuãsa riqui jembu serite Cristo si ũquí.

² Jê ja rĩ aico ñee Dios je co. Jêingo i i sacua Dios rese jeñiangui re. Jenyesequa ja sacua jenyiese. Jendua ja sacua hue rĩ si. Jêaquiato tuchi sacua Cristo rĩ. I nda Cristo jêcua tuchi cote.

³ Cristo mi tuchi chõ aba mbaaracua nguiã co. Ae mi tuchi chõ aba mbaaquiato nguiã Dios rese co.

4 Mbia jembĩrĩ irĩ eã sacua ño aico nguiã ñee jêje co. Mbia cheẽ turã abareãte raque. Jesús cheẽ ndui eãte quia ñene.

5 Aico ndua ndua tuchi jendese co. Siqui rocoĩ jendese. Ae rese airandu jendese nae, sembia tuchi chõ ùqui nde. Jẽingo turã mose jenyiese. Jẽ Cristo icua i i tuchi mose. Nyebe seya bei tuchi riqui nguiã jendese co.

6 Sã Jesucristo jẽisi nyii no, eĩ jenye si chõ nguia siqui bei erese.

7 Sã ira riqui ngao mondo tuchi ibiqui rĩ no. Nĩmbirãcuã tuchi sacua. Eĩ jenye si chõ nguia jẽ abe jẽ. Jeĩmbirãcuã ño nguia Cristo rui. Cristo jẽicua tuchi quiatu quia. Secheẽ ñĩnda rui sí. Gracias jenye bei chõ nguia Dios je.

Dios que jembiasu Cristo rĩ cote ra

8 Mbia ra jembĩrĩ irĩchĩ jembĩcha nonde Cristo si jẽ. Ûqui ñee turã arõte raque. Ñee iru iru chõ nguia ùqui. Nĩmbucha eãte equia Cristo rese ùqui. Mbia cheẽ achõ ño echeẽ nde.

9 Dios rã si tuchi rei Cristo. Mbia rete raãte raaque Cristo rete.

10 Ûqui jẽingo nĩmbucha Cristo rese ùqui. Cristo rã sí tuchi rei nande cote. Cristo quiarei ererecua tuchi mbia rerecua ja si.

11 Cristo que jembui jenyiosei osei icua si cote ra. Jemingo que icue Dios mbaerã cote ra.

12 Ûqui jẽingo Dios quirãcuã icuate ùqui. Sã mbia Jesús raaque ati rei no. Eĩ si chõ jẽ Jesús icua mose re. Jendaaque ati rã si chõ jẽ Jesús icua mose re. Sã Dios Jesús mbuquera si uquirãcuã je no. Eĩ si chõ jẽ Jesús icua mose re. Jembuquera si rã ño jẽ Jesús icua mose re. Dios chõ Jesús icua uquia nguiã jêje.

13 Isho que jẽingo rei Dios si cose ra. Jenyiosei osei icua ndese siqui bei mose. Jẽ jẽicua nderequia bei mose. Dios que ngueco mee jêje cote ra. Jẽ Cristo icua mose. Dios que jẽicua mbutiã cote ra.

14 Ae icua nandesã saã nguia Dios je nae, Dios que ùqui mbutiã nandesã ra. Ae cheẽ nandemumba mumba quia mbia nae, ùqui ñee ngue Dios mbutiã nandesã cote ra. Dios nandeicua mbucha raanguia Cristo rese chõ ñene. Cristo chĩ mose cruz rese.

15 Cristo mano mose que aba checuayã nderecua quirãcuã mbutiã nda. Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

Mbia chisã saã ndese ra jẽingochĩ jẽ

16 Sã emo jendiquisã quisã eã mbei mbaeiae mo si. Jẽ mbaeiae u sereã mose, jẽu eã ño. Jẽ euse mose, jẽu chõ. Jẽ jẽingose mose mbae mo ndese sãbado mose, jẽingo chõ erese. Jẽ jẽingose mose mbae mo ndese nyasi yasu mose, jẽingo chõ erese. Jẽingo sereã mose erese, jẽingoã erese.

17 Cristo siqui nonde ibii chõ ngue ùqui ja nyii re. Mbia Cristo ru raarõ sacua ño ngue ùqui nyii re. Cristo tu mose que ùqui quiachã ja cote ra.

18 Mbia jembĩrĩ irĩchĩ jembĩcha nonde Cristo si jẽ. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguiã eaquiato rocoĩ. Ndua turã eã ño nguiã Dios rese ùqui. Unduasa rese achõ ño eriqui nguiã ucuasu raã naa ùqui. Ûqui nda jembĩchachĩ Cristo si jẽ.

19 Nĩmbucha eã ño nguia Cristo rese ùqui. Ererecua raque Cristo. Sã nandeãqui ndiqui nanderete mingõ turã ja no. Eĩ si chõ Cristo uquiato mingõ turã ja nguia nyiese ã. Nyebe Cristo quiato riqui nguiã Cristo icua i ite ã. Dios chõ Cristo icua uquia i i nguia ee.

²⁰ Cristo mano mose que jē abe jemano erese resē. Mbia chisaã saã ima si que jēhui turā ndesē. ¿Mbaerā nda ũquĩ ñee ndui si jēingo si cote re?

²¹ Sã ũquĩ ndiqui ñee no: “Jēocochĩ nda ã ndese. Ā nda jēuchĩ no. Ũquĩ nda jēisichĩ jēo je no”, sã eriqui i no. ¿Mbaerā jēingo ũquĩ ñee mumbayāte re?

²² Mbia cheē achō ño ũquĩ ndesē. Dios cheē eã ño ũquĩ ndesē. Nandechiurā ño mbae ja resē.

²³ Ũquĩ ñee turā arōte raque. Eturā arōte raque mbia mbaeiae uã mose. Mbia mbaeiae uã mose, eaquiātu arōte raque. Siqui mingue arōte raque. Ũquĩ nda aba chioseĩ oseĩ icuã mbutiã eã. Ũquĩ nda aba mingo eã Dios miĩ ndese.

3

Jendua chã mbae ibatenda rese

¹ Dios que jendaaque mbuquera si Cristo rese resē. Nyebe jēingo mbae ibatenda oseĩ. Mbae ibi jenda oseĩ rocoĩ. Cristo quia chĩ nguiã ngoi ibate ngu jii hue.

² Jendua quiātu quia mbae ibatenda rese. Mbae ibi jenda rese ndua rocoĩ.

³ Jemano ngue Cristo rese resē. Dios que jembucha Cristo rese resē. Nyebe Dios riqui nguiã jendeco rerecoquiātu jēje co.

⁴ Dios chō nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare rã eã ño jēingo nguiã ã cote

⁵ Ae icuã jendeco quia jeñiangui re nae, ũquĩ icuã jēquiti chō jenyiesi. Jenyioseĩ oseĩ icuã jēquiti chō jenyiesi. Jēingochĩ nda jeninisiã mo ndese. Jendu eã ndese ra jēingochĩ no. “Aque rese nda aico rã ña”, jenyechĩ nda emo niĩ jē. Mbae icuã mo ndese ra jendua ndua jirichĩ jē. Emo mbae ra jenyoseĩ choseichĩ jē. Dios abareã ndese siqui raanguia chō ũquĩ nde.

⁶ Ā icuã ja riĩ nda Dios mbia mbasi. Ae echeē mumba mumbate quia.

⁷ Jē abe que ã icuã jesaã saã tuchi quia nyii ra. Cristo icuayã mose.

⁸ Ā icuã jējea ja chō jenyesi cote. Jē paama i. Jēicuã icuã nyue. Jeñee nyecua nyecua emo niĩ. Jenyuru icuã. Ā jējea ja chō jenyesi.

⁹ Jeñee ñooñochĩ nda jendesenda je jē. Jē mbae oseĩ oseĩ icuã ñiinda que jembuquiachã jenyesi resē. Jenyisaã saã ima jesaã eãte quia ũquĩ cote resē.

¹⁰ Jeñimbiasu ji chō jēingo nguiã ũquĩ. Nyebe Cristo riqui nguiã jembaaquiātu tuchi Dios riĩ ũquĩ. Jēingo turā sacuã Dios rã si.

¹¹ Cristo quia rei mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae eaquiātuãte raque. Mbia rimba raque. Mbia rimba eã ndaque. Ũquĩ ja Cristo mbuchiabi abiã tuchi. Ũquĩ ja chiangui re Cristo riquise rete. Cristo siqui mose nandechiangui re, ũquĩ nguiã rei eturā tuchi mbae ja si.

¹² Co Dios riqui nyesequa tuchi jendesenda co. Dios que jēirabo mingo icúe umbaerā nda. Nyebe jēingo nguiã siqui turāte. Jēya eã ño jēingo mbia rese. Jēseteã ño jēingo mbia rese. Jēingo tochi chō nguiã. Jendoseĩ nguiātu chō jēingo.

¹³ Jeñimbirãcuã ño nguiã jendesenda rese. Jētesarei chō nguiã jendesenda icuã icuã mose jēje. Sã Cristo tesarei jēicuã si no.

¹⁴ Jenyesequa tuchi quiātu quia mbia rese jē. Dios cheē tuchi chō ã nde. Jenyesequa tuchi mose mbia rese, mbae turā ja rese chō nda jēingo tuchi cote.

15 Jeñimbia bei chõ nguia Dios rese. ƒ nda jemingo turã mbei jenyue. Ûquiñ nñi ño Dios jemingo nguiã icúe umbaerã. Jesús rete mñi na ño Dios jemingo nguiã ùquiñ. “Coche ñene” jenyue bei chõ nguia Dios je.

16 Sã Cristo cheẽ ndiqui tuchi jeñiangui re. Jëaquiatu tuchi nda jëingo chã. Jenongue jembaaquiatu quiatu chõ nguia. Jenongue jembuti mbuti quiatu quia Cristo cuti. Jëirasei rasei tuchi quiatu quia Dios je. Himnos. Salmos. Jëya chõ jëingo irasei rasei Dios je.

17 Jë mbae raã mose, Jesús rñi ño jësaã. Ae jëingo ñee nae, Jesús rñi ño jeñee. Gracias jenyue bei chõ nguia Dios je Jesús rñi.

Ae jësaã nguia nae, jësaã ño Cristo je

18 Tacheẽ mbia ninisi je. Jendu cheẽ jemumbayã ño nguia. Diosbi tuchi chõ ùquiñ nde.

19 Eru, jenyesequa tuchi quiatu quia jeninisi rese. Jëingo tochi chõ nguia ee.

20 Mbia ririñ, jendu cheẽ jemumbayã mbei chõ nguia. Jësi cheẽ abe no. Diosbi tuchi chõ ùquiñ nde.

21 Jendiiriñ nda jembupaama ichi jenyue jë. ƒ nda ñimondocho eã.

22 Tacheẽ erimba je cote. Jenderequa cheẽ jemumbayã mbei quiatu quia. Emae eã mose abe quiatu echeẽ jemumba eã. Jëseteã jësaã ñooñoa nguiatu quia ee. Dios je quiatu jëingo mbae raã turã ja. Ae quia mae mbeite nguiã jendese co.

23 Jë mbae raã mose, jësaã turã ño nguia. Mbia je eã ño jëingo nguiã mbae raã. Dios je chõ jëingo nguiã eraã.

24 Dios ra mbae turã mee jëje jenyisaã turã ndibishorõ. Cristo je chõ jëingo nguiã mbae ao ao ùquiñ. Jenderequa tuchi chõ ae re.

25 Ae mbae icuã saã nguia nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñooñoa no.

4

1 Mbia rerequa je tacheẽ cote. Jenimba jembuquie; quie; chooño eã ño nguia. Mbae jësaã turã jiri quiatu quia jenimba je. Jë abe jenderequa riqui Dios co no.

2 Jeñee ñee mbei quiatu quia Dios je. Jëtesa tesa bei quiatu quia Dios rese. Gracias jenyue bei quiatu quia ee.

3 Jeñee ñee mbei quiatu quia Dios je ure rñi. ƒ nda Dios riqui sembuheẽ ñee mbei tuchi mbia je Cristo rñi. Ae rese mbia riqui jiranuate Cristo rese nae, ùquiñ asenei senei sete mbia je. Nyebe setarõ ji aĩ nguiã a.

4 —Paba, sã Pablo Jesucristo mbuchecua checua tuchi quia mbia je, jenyue bei quiatu quia Dios je.

5 Jeñimbaaracua chõ nguia siqui turã Jesús quiatoã je. Ae Dios bite nae, ùquiñ ndese chõ jëingo ñimbecoteã.

6 Sã embiquesa riqui mbae mbñise no. Eĩ jenyue si chõ nguia ñee turã mbia je. ƒ nda jëaquiature ñee Jesús quiatoã ñee ndibishorõ.

Pablo ñee hui bei

7 Tiquico si quia jendea aque. Ae ra mbae senei ja jëje jembiiirandu seriñ. Ae que mbae saã turã mbeite quia serese ra. Dios rimba turã tuchi chõ ae re.

8 Nyebe amondo nguiã jendea aque. Jembiiirandu ja sacua serese. Jembia tuchi sacua Cristo rese abe.

⁹ Onésimo abe si quia erese aque. Hue jenda sí chõ ae re. Jesús quiato tuchi chõ ae abe re. Ûquĩ nyeremo nda jembiirandu tuchi a jenda ja rese.

¹⁰ Aristarco tarõ ji ñi serese a. Ae abe saludos mondo quia jêje aque. Marcos abe saludos mondo quia jêje aque. Bernabé nongue riirĩ ño ae re. Ae oso mose jendea, jêisi turã ño secheẽ nguire. Acheẽ ngue jêje eriĩ nyii.

¹¹ Jesús Justo abe saludos mondo quia jêje aque no. Ûquĩ mñi judíos que siqui tuchi quia serese Dios cheẽ nenei nenei nda. Ûquĩ ngue sembiate quia mbae raã turã mose serese ra.

¹² Epafras abe saludos mondo quia jêje aque no. Cristo rimba rei ae no. Jendesenda sí chõ ae no nde. Ae ñee mbeite quia Dios je jenñi co. Jêingo irãtã sacua Dios rui. Ae Dios bite riqui nae, ùquĩ ndese jêingo tuchi sacua.

¹³ Epafras riqui nyesecua tuchite jendese co. Aicuate se quia co. Laodicea jenda rese abe eriqui nyesecua tuchite co. Hierápolis jenda rese abe no.

¹⁴ Lucas abe saludos mondo quia jêje aque no. Aba rasi rea reasa rei ae. Médico rei ae. Jesús chesecua tuchi chõ ae re. Demas abe saludos mondo quia jêje aque no.

¹⁵ Jesús quiato Laodicea jenda je saludar jenye rã ure je. Ninfas je abe saludar jenye. Ae ñumunua nua nguia Ninfas chuchua Jesús quiato nae, ùquĩ abe je saludar jenye rã ure je.

¹⁶ Ae ambesa mbesa quia a nae, emondo nonde jêje a nae, ã je leer jenye ja rã. Aquere jemondo rã Jesús quiato Laodicea jenda je. Ûquĩ abe leer i sacua ee. Ae carta ambesa Laodicea jenda je nae, jê abe leer jenye ee no.

¹⁷ Jeñee na Arquipo je. —Ae je Jesús ñee nae, “co esaã seje” i ndeje nae, ùquĩ esaã turã ja chõ, jenye Arquipo je.

¹⁸ Hui bei sacua co ambesa mbesa quia seo ae je co. Pablo chõ se re. Jendua serese setarõ ji rese. Sã Dios riqui turã tuchi jêje. Amén.

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

¹ Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús rñ. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ùquĩ turã ndiqui bei jêje. Sã ùquĩ ndiqui jembia bei.

Jesús jêicuate quia ùquĩ

² Gracias, ure bei quia Dios je jeniã ã. Jê ja rñ. Ure ñee mose Dios je, jeniã ño ureico nguiã ñee ñee ee ã.

³ Jesús jêicuate quia ùquĩ. Nyebe jêingo beite nguiã mbae turã ndese ùquĩ. Jenyesequate quia Jesús rese ùquĩ. Nyebe jêingo nguiã Dios cheẽ nenei nenei mbei mbia je ùquĩ. Jesús nyebi sí mose, ùquĩ ño jêsaarõ arõ u nguiã hue. Jeñimbirãcuã tuchi equia eraarõ arõ ùquĩ.

⁴ Seresenda, Dios riqui nyesequa tuchi jendese co. Dios que jêirabo umbaerã nda.

⁵ Dios cheẽ turã ngue uresenei senei nguia jêje ra. Urecheẽ achõ je eã. Espiritu Turã abe que jembaaquiato quiatu ra. —Ichõiño eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. Ùquĩ ndese que jêingo mae nda.

⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbia icuã icuã mose jêje que Espiritu Turã ndiqui tuchi jendese ra. Jembia tuchi sacua.

⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no.

⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbia que jirandu ja quia jendese ra. —Dios icuasa rei ùquĩ, i equia jeniã ùquĩ. ¿Mbaerã nda Dios cheẽ asenei ee re? Jembiirandu turã ngue eno.

⁹ Ùquĩ nguia ñee turãte nguiã jeniã ùquĩ. —Tesalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jeniã ùquĩ.

¹⁰ —Tesalónica jenda chi Jesús raarõ arõ huee. “Tu ra nyebi ibate si”, i u huee, i equia jeniã ùquĩ. Jesús rei Dios reco riirĩ. Dios que Jesús raaque mbuquera si ra. Jesús ra nanderiquisã mbae rasi si. Dios mbia icuã mbasi mose.

2

Dios cheẽ uresenei tuchi jêje

¹ Ureso chooño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea.

² Ureso que Filipos nyii ra. Hue jenda que mbia icuãte riqui ure je ra. Ureirua nua ngue ra. Ùquĩ jêicuate quia ùquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbia icuã tuchi raque ure je.

³ Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembĩĩrĩ irĩ eã.

⁴—Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacuã. Mbia mbia sacuã eã ño ureico nguãĩ Dios cheẽ nenei nenei jêje. Dios mbia sacuã ño ñene. Dios riqui mae mbeite urechiangui renda rese co.

⁵ Urecuasú que uresaã saã eãte quia jêje ra. Urecheẽ ñooño eãte que equia jêje ra. Jembĩĩrĩ irĩ eãt e que ureico quia ra. —Sã mbia mbae mo mee mee ure je, ure eãte que equia jembĩĩrĩ irĩ nda. Dios riqui maete urerese co.

⁶—Jenderecuarã nda ure cote jê! ure eãte que equia jêje ra. Ure eãte que equia mbia mo abe je ra. Cristo chimondo raque ure, echeẽ nenei nenei sacuã jêje.

⁷ Ureico turã ngue equia jêje ra. Sã esi mo ndiqui nguĩrĩ nderequia turã, eĩ ure chõ ngue equia jêje ra.

⁸ Urechesequa tuchi que equia jendese ra. Nyebe Dios cheẽ achõ eã uremee nguã jêje. Mbae ja uremeese rete raque jêje.

⁹ Urechisaã saã ndese que jẽingo mae tuchite ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguã. Nyaashĩ mose achõ eã ngue ureico mbae raa naa nda. Itondaru mose ab e que ra. † nda je mbae jemondoã ure je. Ure Dios cheẽ nenei nenei mose jêje.

¹⁰ Jesús icuasa chõ jê cote re. Urecuata turãte que equia jêje ra. Jemae ngue equia urerese ra. Dios abe que mae nguia urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ.

¹¹ Jendurã ngue ureico jêje resẽ. Sã emo ndiqui nguĩrĩ mundua turã no. Sã emo ndiqui nguĩrĩ mbucuata turã no. Eĩ si chõ ure re. Jemundua ndua. Jembucuata turã nonde.

¹² Urecheẽ tuchi que equia jêje. —Dios quiato chõ jê cote re. Nyebe jẽingo nguãĩ Dios mbia beite cote. Dios que jẽirabo ra. Dios ra jenderecuata tuchi cote. Dios ra uturã mee jêje, ure beite que equia jêje ra.

¹³ Gracias, ure bei equia Dios je jeniũ a. Dios cheẽ nguĩatu ngue jẽisi turãte nguã. Ure Dios cheẽ nenei nenei mose jêje, jẽisi turã ngue ra. Mbia cheẽ na eã ngue Dios cheẽ jêje ra. Dios cheẽ ngue jembuturã nda. Jê eisi mose. Gracias ure que Dios je, jê echeẽ isi mose ra.

¹⁴ Sã judíos icuã icuã Jesús quiato Judea jenda je no. Eĩ si chõchĩ mbia icuã icuã jêje no, Seresenda. Jê ji jenda chõ eicuã icuã ndiqui nguã jêje Jesús rĩ ùquí.

¹⁵ Judíos sí que Jesús iquia nandererecuata ra. Sã Dios cheẽ mbuchecuasa iquia nyii no, eĩ sí que Jesús iquia no nda. Ure abe mombo no. Judíos icuã tuchi que ùquí nda. ã eicuãte riqui Dios je ã. Mbia abe je eicuãte riqui ã no. Mbia ja je.

¹⁶—¿Mbaerã nda jẽso Dios cheẽ nenei nenei Judíos eã je re? i que equia ure je ra. Ure riquisã quisã ndei que equia ra. Dios cheẽ ngue uresenei mbei bei chõ judíos eã je ra. Dios erirõ sacuã eicuã si. Judíos que urecheẽ siquisã quisã ño nguia ra. Judíos que huĩcuã saã i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jenda

¹⁷ Seresenda, ishote urecu jẽsi a. Nyebe ureya eãte riqui nguã jendese ã. Uremaese rete quia jendese ã. Urendua beite quia jendese ã.

¹⁸ Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisã quisã ño nguia ra.

¹⁹⁻²⁰ Jesucristo ra tu si nyebi nanderea. Seya tuchi aico eraarõ arõ a. Jẽ nguia uremombia mbia beite nguia ùquĩ. Jẽchi Jesús quiato. Nyebe ra ureya jendese Jesús tube mose. Ure Jesús cheẽ nenei nenei mose que jẽisi turã nda. Nyebe ra Jesús ia tuchi urerese eru mose.

3

¹ —Tairandu tuchi rã erese, ure tuchi que equia jeni# nda. Urendua ndua tuchi que equia jendese ra. Nyebe ure ae ureico nguia Atenas.

² Nyebe que Timoteo amondo rei nguia jendea. Jirandu sacua jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneia que ae ra. Ae que uremondo jendea jemundua ndua sacua Jesús rese ra.

³ Timoteo que amondo jendea ra. ¶ nda jẽhui eã Dios cheẽ si mbia icua mose jẽje. Mbia icua tuchi que eriqui jẽje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguia nande je.

⁴ Ureico que equia jendese nyii, aque mose que ureico rei ñee jẽje resẽ. — Mbia icua tuchi ra eriqui nande je, ure rei que equia jẽje nyii resẽ. ¡Sã ngasẽ cote jẽ! ¡sã mbia icua icua nande je cote jẽ!

⁵ Nyebe seiranduse beite riqui nguia jendese. Nyebe Timoteo amondo rei nguia jendea. Ureirandu sacua. —¡Quiatu Jesús quiato rea jẽ! Siqui bei rei equia Jesús rui reae. Aba mbiirĩ irĩsa embiicua eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jẽsi cote ra. Ñee turãte que u jeni# nda. —Hue que echi Dios icua tuchi ra. Hue que echi nyesecua tuchi Dios rese ra. Nande abe rese que echi nduate huee ra. Eyayãte eriqui rei nanderese, i que Timoteo u urembiirandu jeni# nda. Ure abe ureyayãte riqui jendese ã.

⁷ —Hue que echi Dios icua tuchi ra, i mose que ureya tuchi ra. Mbia icuãte raque ure je. Seresenda, jẽ urembiate quia ùquĩ.

⁸ Ureya tuchite jendese, jẽingo bei mose nandererecua rese.

⁹ Dios urembia tuchite quia jendese co. Nyebe ureico nguia gracias i ee co.

¹⁰ Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbia rea, ure bei que equia Dios je jeni# nda. ¶ nda jembaaquiatu ji jẽingo tuchi Dios rese.

¹¹ Dios rei nanderu. Jesucristo rei nandererecua. Ùquĩ je ureico ñee tuchi ã. Urererao sacua jendea.

¹² Sã nandererecua jembuchesequa tuchi jenyiese. Mbia ja rese. Sã ureico nyesecua tuchi jendese no. Eĩ jenye si chõ nguia nyesecua mbia rese jẽ abe no.

¹³ ¶ nda Cristo uquirãcuã mee jẽje. ¶ nda Cristo jemingo icúe umbaerã tuchi. ¶ nda jemingo turã mbei Dios rese. Jesucristo tu mose chee ibate si. Mbia ra ñee icua aroneate jeni# cote. Ñee icua aroneate ra Dios je jeni#. Jesucristo tu mose ra Dios mae jeturã ndese. Jesucristo ra tube uquiato ja rese.

4

¹ Seresenda, tacheẽ tuchi jêje. Jesús cheẽ ngue uresenei senei tuchi quia jêje ra. Ûquí ndui chõ jêingo turã ndei nguiã ùquí. Jêingo i i tuchi quiatu erui jê. ¶nda Dios ia tuchi jendese. Secheẽ ae eã ño ã nde. Jesucristo cheẽ ño ñene.

² Nandererecua tuchi chõ Jesús re. Ae chõ urembucheẽ nguiã jêje. Ae cheẽ si jêingo tesarei âte ùquí.

³ Dios jemingo sete quia icúe umbaerã co. ¡Emo ninisi rese ra jêingochĩ jê! ¡Eru eã mo ndese abe ra jêingochĩ jê!

⁴ ¡Jeninisi ae rese chõ jêingo! Jeninisi jendeco turã ño nguia.

⁵ Dios icuasa reã ño mbia ninisi oseĩ oseĩ nguiã ùquí. ¡Eĩ jenyechĩ nda jê jê!

⁶ ¡Jenongue ra jembĩrĩ irĩchĩ eninisi rese jê! Ûquí naa naa mose ra Dios jembasi tuchi. Nyebe urecheẽ nguiã jêje nyii.

⁷ —Jêingo turã icúe sembaerã, i que Dios nande je ra jê. —Jêingo icuã icuã, iã equia nande je co.

⁸ ¡Urecheẽ jêisi turã ño nguia jê! Jê urecheẽ isiã mose, eĩ jenyechõ nguiã Dios ucuayã. Urecheẽ achõ eã ño uresenei senei nguiã jêje. Dios cheẽ ño ñene. Dios sí que Espíritu Turã mondo nande je ra.

⁹ —Jenyesequa jenyiese, aeã nda jêje cote. ¿Mbaerã nda acheẽ jêje re? Dios que ñee jêje no. Nyebe jêingo nguiã nyesequa jenongue rese ùquí cote.

¹⁰ Macedonia jenda rese jêingo nyesequa ùquí. Jesús quiato rese. Jenyesequa i i tuchi jiri erese jê.

¹¹ ¡Jêingo turã ño nguia jê! ¡Jeñĩmbecoteã ño nguia jembae rese jê! ¡Jêquieĩ quieĩ bei equia jê! Ûquí ngue urecheẽ jêje nyii resẽ.

¹² Ûquí naa mose ra Jesús icuasa reã ñee turã turã jêje. Ûquí naa mose ra mbae tiã eã jêje no.

Jesús ra tu nyebi íbii

¹³ Mbia raaque rese taembiirandu rã. ¶nda jêyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, i eã ño Jesús icuasa reã nguiã mbia raaque je ùquí.

¹⁴ Jesús que mano ndei nguiã nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaẽ. Ûquí nandeicuate quia ã.

¹⁵ Nandererecua Jesús cheẽ uresenei senei nguia jêje ã. Jesús ra tube íbii. Aque mose ra mano je rane nyoĩ erea. Ae nandereco nandeico ã nae, ùquí abe ra nyoĩ erui cote.

¹⁶ Cristo ra tu nguichi ibei si. Ererecua rã nda eru ñee mbia je. Angel nderecua ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ûquí nane nda quera si.

¹⁷ Aquere ra nandereco rerao ùquí ndese cote. Ibeishĩ ni nda nandererao ja. Huẽ ra nandemae tuchi Cristo rese cote. Nandeico bei ra erese cote.

¹⁸ ã ndei Dios cheẽ ã. Jeñĩmundua ndua bei quia erese. ¶nda jêya tuchi erese.

5

Jêquiche je na Jesús ru chã

¹ —Aque mose ra Jesús ru, ae eã nda jêje, Seresenda.

² Isa chõ mbae mbuquiachãsa riqui nguiã tu. Mbia ndua eã mose ra eru. Eĩ si ra Jesús u, mbia ndua eã mose erese.

³—Ureico turãt e quia ã ndesê, i ra mbia. Ajee tuchi ra Jesús ru aque mose. Mbia mbutiã nonde cote. Sã nanĩmbae rasi riqui tu ajee no nae, eĩ si tuchi ra Jesús u ajee. Emo nda oso chee eã.

⁴Jẽ nguia jẽingo ãte nguiã itondaru ũqui, Seresenda. Jẽaquiutuã eã ño jẽ nde. Jẽ nguia ra Jesús jembua eã u. Mbae mbuquiachãsa rã eã nda eru jẽje.

⁵Nyaashĩ na ño jẽingo nguiã jẽ ja ũqui. Itondaru rã eã ño nandeico nguiã nande ã.

⁶Nyebe nandechumumba rã mbei chõ nandeico nguiã tesa. Mbia ataque quiarei uque bei.

⁷Ae uque quia, ũqui ño uque nguiã itondaru. Ae quiacua quiacua quia, ũqui ño quiacua nguiã itondaru.

⁸Nyaashĩ jenda chõ nande re. Nyebe nandechimbaaracua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ũqui nandeicuate quia ã. Nyebe ra mbae icuã ocoã nanderese.

⁹Nandembasi sacua eã ngue Dios nandeirabo ra. Nanderirõ sacua eicua si chõ ngue nandeirabo nguia. Jesucristo riĩ nda nanderirõ eicua si. Jesucristo rei nandererecua.

¹⁰Ae que mano nande je ra. Nandeico sacua erese. Tu ra nandererao siqui sacua erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene.

¹¹Ã ndei Dios cheẽ ã. Jẽ ño jeñimundua ndua nguiã erese ũqui. ¡Ũqui jesaã saã mbei quia jẽ!

Pablo embaaquiatu

¹²Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguiã. Jembaaquiatu quiatuchĩ equia ũqui.

¹³Nyebe jẽingo turã ño nguia ee. Jenyesecua tuchi quia erese. Jembaaquiatu quiatu sacua ño ũqui nde. ¡jẽingo turã ño nguia jenyue!

¹⁴Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ũqui jemingobe erese. Ae equirãcuã neate, ũqui jembirãcuã. Jẽingo mingue chõ nguia mbia ja je.

¹⁵Mbia icuã mose jẽje ¡jẽicua eã ño ee jẽ! ¡jẽingo turã ño jenyue jẽ! ¡jẽingo turã ño mbia ja je no jẽ!

¹⁶Jẽya bei jẽingo.

¹⁷¡Jẽnee ñee mbei quia Dios je jẽ!

¹⁸Gracias, jenyue quia Dios je mbae ja riĩ. Ebi tuchi quiarei ũqui. Jesucristo icuasa chõ jẽ nde.

¹⁹Espíritu Turã nda jẽsiquisãchĩ jẽ.

²⁰Dios cheẽ mbuchecuasa cheẽ jeñandu turã ño nguia jẽ.

²¹—Ma ñee ñooñoa, jenyue tuchi quiatu eicua jẽ. Ñee ñooño eã mose, erui jẽingo.

²²¡Mbae icuã ja rese ra jẽingochĩ jẽ!

²³Aba mombiasa chõ Dios riqui nguiã co. Sã ae si jemingo icuẽ umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jeni cote.

²⁴Ũqui nda Dios saã ja jẽje. Ae quiarei ichõĩnosa reã tuchi.

Pablo ñee hui bei

²⁵ Jeñee mbei quia Dios je ureriĩ, Seresenda.

²⁶ Mbia nanderesenda jẽquiaam a ama ja ure je hue jenda.

²⁷ ã sechimbesa jẽsenei ja rã nandenongue hue jenda je. —Jẽsenei na, i Cristo quia jẽje co.

²⁸ Jesucristo rei nandererecua. Sã ae riqui siqui turã mbei jendese. Amén.

SEGUNDA CARTA DEL APOSTOL SAN PABLO A LOS TESALONICENSES

Pablo chimbesa

¹ Pablo rei se. Silas riqui serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguia Jesús je ùquĩ. Jesucristo icuasa chõ jêingo nguia ùquĩ. Dios rei nanderu. Jesucristo rei nandererecua.

² Sã ùquĩ turã ndiqui jêje. Sã ùquĩ ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã ã. Coche ureico nguia ñee Dios je jeniã. Jê nguia jêingo nguia Dios icua tuchite ùquĩ. Jê nguia jêingo nguia nyesecua tuchite jenyiese ùquĩ.

⁴ Nyebe ureico nguia ñee turãt e jeniã ã. Ae ñumunua nua nguia Dios je, ùquĩ ja urembiirandu turã nguia jendese ã. Jêingo minguete quia mbia icuã je ùquĩ. Jêingo Dios icua tuchite ùquĩ. Mbã icuãte riqui raque jêje. Mbã icuã mose jêje, jê jêturãte riqui ee ùquĩ.

⁵ Sã Dios turã tuchi riqui no jê. Sã mbã mbuchechea turã no. Ae ra ñimbirãcuãte quia mbã icuã icuã mose Jesús rĩĩ ee nae, ùquĩ je ra mbae turã mondo. Mbae ra emondo mbã chisãã turã ndibishorõ. Mbã chisãã icuã abe ribishorõ no.

⁶ Ae jembasi mbasi quia nae, Dios ra ùquĩ mbasi tuchi cote.

⁷ Jesucristo ra tu ibate si. I ra eu quia nyecua. Angel cuabẽ ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbã icuã icuã eã nande je cote.

⁸ Jesús tu mose ra Dios icuasa reã mbasi mbasi cote. Echeẽ turã mumba mumbasa ra embasi Dios cheẽ turã Jesucristo rĩĩ.

⁹ Jesús ra ucheẽ mumba mumbasa mbasi tuchi. Jesús ra emombo isho. Echeẽ mumba mumbasa ra siquã mbei Dios rese cote. Dios quirãcuã ndese abe ra eriquã no.

¹⁰ Ùquĩ nda Jesús saã ucheẽ mumba mumbasa je tu mose. Echiirabo quia ra ñee turã turã mbei erĩĩ eru mose. Eicuasa ra ñee turã turã mbei erĩĩ eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose.

¹¹ Nyebe ureico nguia ñee ñee mbei Dios je jeniã ã. Ae Dios bite nae, i nda ùquĩ jêsaã saã mbei quia. Ùquĩ je que Dios “jenyu” i jêje ra. Mbae turã jêsaã saãse rete quia ùquĩ. Sã Dios uquirãcuã mee jêje. Mbae turã naa naa nonde cote. Jesús icuasa chõ jengu nguia huee.

¹² Jê mbae turã naa naa mose, mbã ra ñee turã turã Jesucristo rĩĩ. Jê abe rĩĩ nda Jesucristo mbã mbucheẽ turã turã. Dios quia eturãte riqui nguia nande je. Jesucristo abe eturãte nande je. Ae rei nandererecua.

2

Dios ucuãiyãsa

¹ Jesucristo rei nandererecua. Ae ra tu nandemunua mbucha uchiese. Ùquĩ ño asenei senei nguia jêje.

2 —“Co Jesús ru quia co”, i que Pablo ra, ichõĩño nda mbia serĩ jêje. Jeñanduchõ ño ùquĩ mose. —Co Jesús ru quia co, ae eã se quia embesa jêje a. Mbia mo nda ñee ñooño jêje. —Jesús ra tu cote. Dios que sembiirandu ra, ichõĩño nda jêje. Ûquĩ jeñanduchõ ño.

3 ¡Mbia ra ñee ñooñocheĩ jembĩrĩ irĩ jê! Jesús rane nda tuã nguĩã. Mbia rane nda hui hui Dios si. Dios ucuãyãsa rane nda tu Jesús si. —Emo mose aque tambutã, i que Dios aque rĩ nda.

4 Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbia mbĩrĩ irĩ. —Se rei Dios, ichõĩño nda huĩ mbia mbĩrĩ irĩ.

5 Seico mose jendese que asenei ja jêje ra. ¿Jêtesareĩã ndei equia secheẽ si re?

6 Dios ucuãyãsa ra tu emo mose. Eriquisã ji ae riqui nguĩã aque. Eriquisã iriã mose ra eru. Eriquisãsa jêicua quia ùquĩ.

7 Mbia Dios cheẽ mumba tuchi quia ã cote. Dios ucuãyãsa ra tuchõ eã. Eriquisãsa iriã mose quia ra eru cote.

8 Nyecua tuchi ra u mbia je cote. Jesús ra tu erĩcharã cote. Jesús nininya tuchi ra tu. Aque mose ra Dios ucuãyãsa iquã.

9 Satanás nda uquirãcuã mondo Dios ucuãyãsa je. Dios ucuãyãsa mbuquirãcuã sacuã. Mbae icuã chumumbara tuchi ra equeru. Ñee ñooño nda u mbia je. Mbia mae sayã nda esaã saã u mbia mbĩrĩ irĩ sacuã.

10 Dios ucuãyãsa icuã tuchi ra Jesús quiatoã je. Jesús quiatoã mbĩrĩ irĩ tuchi ra u. Jesús quiatoã nyesequa eã nguã Dios rese resẽ. Nyebe ra Dios ùquĩ ndiroã eicuã si. Dios ra uquiatoã mbutiã tuchi.

11 Dios rese eriqui nyesequa eãte ã. Nyebe Dios aba mbĩrĩ irĩsa mondo nguã ee. Nyebe eriqui nguã “ae beite”, i aba mbĩrĩ irĩsa je.

12 Nyebe ra Dios ñee tuchi Jesús icuasa reã je. Ae mbae icuã saã sete quia, ùquĩ je. —Jêso tata cuásuu, i ra Dios ee.

Dios chiirabo rei jê

13 Seresenda, Jesubite jêingo ùquĩ. Gracias, ure bei quia Dios je jenĩ a. Dios que jêirabo cose nyi ra. Jendirõ sacuã jêicuã si. Espíritu Turã jemingo sacuã icúe. Jê ichõĩñosa reã jêicua sacuã. Ûquĩ je chõ ngue Dios jêirabo nguã.

14 Jesús cheẽ ngue uresenei senei nguã jêje huee ra. Aque mose que Dios “jenyu” i jêje ra. Jembuquirãcuã sacuã Jesucristo quirãcuã je.

15 Seresenda, ¡jêhui jêhuichĩ nda esi jê! ¡Urecheẽ ndui jêingo bei jê! ¡Urechimbasa abe rui jêingo jê!

16 Dios rei nanderu. Ae quia rei eturã tuchi nande je. Ae quia rei nyesequa tuchi nanderese. Ae quia rei nandemombia mbiãsa. Nandeya tuchi nandeico Jesús raarõ arõ ã. Tube ra nyebi uquiato rea.

17 Sa Jesucristo riqui jemombia mbia bei. Dios abe no. Sã ùquĩ ndiqui tuchi jendese. Jêhui eã sacuã echeẽ si. ¶ nda jeñee turã mbei quia querabe. ¶ nda jêingo bei mbae turã ndese querabe.

3

Jeñee Dios je

1 Seresenda, jeñee mbei quia Dios je ure rĩ. ¶ nda isho ishonda Dios cheẽ andu ja. ¶ nda eandu chooño eã. ¶ nda eisi turã jê na si.

² ¶ Nda Dios mbia icuã ndiquisã ure si. Mbia mii mii ño Dios icua nguiã ã. Mbia ja eã.

³ Nandererecua ñee ñooño eã nguiã co. Uquirãcuã nda emee jêje ucheê nguire. Mbae icuã nda esiquisã jêsi.

⁴ Urecheê ndui si chõ jêingo nguiã ùqui. Ae uresenei senei nguia jêje, ùqui ndese ra Dios jemingo tuchi. Ùqui ño aicua nguiã ã.

⁵ ¡Sã nandererecua siqui tuchi jendese jê! Jêirandu sacuã Dios nyesecua rese nanderese. Jê abe jêingo mingue sacuã Jesucristo rã si.

jJêtomeite ra jêingochĩ jê!

⁶ Jesucristo cheê tuchi chõ ã nde, Seresenda. Jesús quiato mo tomei mose, jêhui chõ esi. Jesús quiato siqui sereã mose mbae mo ndese, jêhui chõ esi no. Jesús cheê tuchi chõ ã nde.

⁷ Ure rã si chõ jêingo. Uretomei ngue uresaã saã eãte quia jêje ra.

⁸ Jê mo ngue urembuquiaru chooño eãte quia resê. Mbae mo ño ngue uremondo mondo quia urechiurã ndibishorõ ndesê. Urequeiei quiei beite que equia resê. Itondaru mose abe. Jê mbae mondochõ eã sacuã ure je.

⁹ –Mbae mo embu se, ureã mbei que equia jêje resê. Eturete raque ùqui. Urequeiei quiei chõ ngue equia urembaerã ndesê. Jembaaquiату sacuã. Ure rã si jêingo sacuã quiei quiei.

¹⁰ Ureico mose jendese que jaembiirandu rei resê. Ae quiei quiei sereãte quia, ùqui nda quiaruã.

¹¹ Ureirandu que jendese ra. Jêataque nda quiei quiei eã tuchi quia ra. Siqui chooñose tuchi nda equia ra. Uchuru mondo chooño ñee emo je.

¹² Sã ùqui ae riqui quiei quiei uchirã ao sacuã. Jesucristo cheê tuchi chõ ã nde. Nandererecua tuchi chõ a e re.

¹³ Seresenda, jmbae turã ndese chõ jêingo bei jê! jJêhuichĩ nda esi jê!

¹⁴ A urecu urecheê mbesa mbesa emondo sacuã jêje a. Jê mo urecheê mumba mumba mose, ùqui ndese jemaie tuchi. Jêhui chõ ùqui si. ¶ Nda ireĩ ireĩ jiri urecheê mumbare.

¹⁵ ¡Ùqui nda jêucuyã cuâyachĩ jê! ¡Jêñee turã ño equia ee jê! ¡Jembaaquiату quiату turã ño jê! Jendesenda chõ ñene. Urecheê mumba mumbate raque.

Hui bei

¹⁶ Cristo rei aba mombiasa. ¡Sã ae riqui jemombia bei jê! Jêingo mose jenyuchúaa. Jengatásaa abe no. ¡Sã eriqui bei jendese jê!

¹⁷ Pablo rei se. Se ae chõ ã ambesa nguiã hui bei a. Sechimbesa ae chõ ã nde. Sechimbesa jêicuate quia ùqui ndesê. Sembae letras. Se bei que ambesa quia hui bei ra.

¹⁸ Sã Jesucristo turã ndiqui bei jê ja je.

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu, Jesucristo chimondo. Dios abe chimondo. Dios ae nanderirō nguiā nandeicua si. Jesucristo chō nandesaarō arō nguiā ã.

² Aico ã mbesa ndeje a, Timoteo. Secheē nguire chō ereico nguiā Jesús icua aqae. Nyebe aico nguiā seriirī i ndeje co. Dios rei nanderu. Jesucristo rei nandererecua. Sã ũquĩ turã mbei riqui ndeje. Sã ũquĩ ia eã mbei riqui nderese. Sã ũquĩ nembia tuchi.

Emo ndiqui mbia mbaaquiatu icuã icuã ã, i Pablo

³ Sã acheē ndeje seso mose Macedonia no. “Efeso eico” ae que ndeje, huee bei chō eico. Ae ñee ñooño nguia mbia mbaaquiatu icuã icuã hue nae, ũquĩ ñee embutiba.

⁴ ũquĩ siqui bei quia mbia cheē ima nenei nenei mbia je ũquĩ. ũquĩ siqui bei quia amei cose ndare nenei nenei mbia je ũquĩ no. ũquĩ ñee embutiba. ũquĩ ñee icuã icuãte quia ũquĩ. ũquĩ ñee ño mbia mbaicua icuã nguiã nyue. ũquĩ ñee nda aba mbaaquiatuã Dios rñi. ũquĩ mose Dios icua aroneate.

⁵ Sã hue jenda turã mbei riqui Dios je jē. Sã hue jenda riqui ndua turã mbei jē. Sã hue jenda riqui Dios icua tuchi jē. Nyesequa tuchi nda nyese cote chã.

⁶ Mbia hue jend a mo ndiqui tesarei Dios cheē si ũquĩ. Dios cheē abi abi. Ñee ñooño mbei equia nyue ũquĩ.

⁷ Moisés cheē ndese mbia tambaaquiatu, i raque equia ũquĩ. Moisés cheē icua rocoĩ. Eaquiatu rocoĩ. Echeeño ño ñene.

⁸ Dios que Moisés mbucheē turã mbia je ra. Mbia icuã je que embucheē nda. Mbiã mundua sacua huicua ndese.

⁹ Mbia turã je eã ngue Dios Moisés mbucheē nguiã. Mbia turã je eã ngue Dios ley mñi nguiã. Dios cheē mumbasa je chō ngue emñi nguiã. Mbia icuã je. Dios quiatōa je. Mbia teã teã je. Usi ucuâyasa je. Ngu abe ucuâyasa je. Mbia iquiasa je.

¹⁰ Ucheē mumbasa je chō ngue Dios ley mñi nguiã. Ae siqui quia emo ninisi rese, ũquĩ je. Ae eninisirã saã saã nguia nguesenda mo je, ũquĩ je. Mbia rirōsa je abe no. Ñeeñoofosa je abe no. Ae eicua icuãte riqui Dios cheē turã je, ũquĩ je abe no. ũquĩ ja je chō ngue Dios ley mñi nguiã.

¹¹ Dios que ñee ucheē turã nñi seje ra. —Secheē esenei senei mbia je, i que Dios seje ra.

Dios que uturã teacuquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirãcua nda. Ae que semondo ucheē nenei nenei sacua mbia je ra.

¹³ Seicua tuchi raque ee nyii. Acheē icuã icuã ndei que se quia ee nyii ra. Equiato je abe que seicua icuã ndiqui nyii ra. Se Jesús icuayã mose. Seaquiatuã mose. Nyebe Dios ia eãte riqui nguiã serese. Nyebe Dios seicua mbutiã nguiã sesi cote.

¹⁴ Uturã ngue etacuquia seje ra. Nguiirī ngue embuchecua seje ra. Nyebe aico nguiã Jesucristo icua co cote. Nyebe aico nguiã nyesequa Jesucristo rese co cote.

¹⁵ Jesucristo que tu íbii ra. Mbia icuã mbitirõ sacuã. Emingo bei nonde. Ichõíñoa tuchi chõ ã nde. Sã mbia “ae beite” i ja ã je. Seicuãte raque se quiatu mbia ja si.

¹⁶ Dios ia eãte que eriqui serese ra. Eroseĩ nguiatu tuchi que eriqui seje ra. Nyebe mbia riqui nguiã jirandu ja Dios roseĩ nguiatu rese. Sã Dios semingo bei se abe, i chee ra emo abe ñee ñee. Dios roseĩ nguiatu rese jirandu mose.

¹⁷ Sã mbia riqui ñee turã mbei Dios je. Ae mii ño mbia rerecua tuchi re. Ae mii ño siqui bei tuchi nguiã co. Ae mii ño ererecua nandemae sayã nde. Ae mii ño mbae icua tuchi nguiã. Amén.

¹⁸ Timoteo, seriirĩ na tuchi chõ nde re. Dios cheẽ mbuchecuaa que sembiirandu nderese nyii ra. Nyebe aico nguiã ñee tuchi ndeje ũquí ñee na si. Mbae icuã esiquisã quisã mbei chõ nguia Jesús quiato si jẽ.

¹⁹ Dios eicua tuchi quia jẽ. Erendua ata atate chí nda jẽ. Mbae turã ndese chõ eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote.

²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacuã. Ñee icuã icuã eã sacuã Dios rĩĩ.

2

Sã mbia ñee turã ja Dios je, i Pablo

¹ ã tacheẽ Jesús quiato ja je: Mbia ja rĩĩ jẽingo bei ñee Dios je. ¶ nda Dios uturã mee mbia je. Gracias jenyee bei quia Dios je mbia ja rĩĩ.

² Ae ererecua nae, ũquí ja rĩĩ abe jẽingo ñee mbei Dios je. Dios uturã mee sacuã ee. Ũquí mose ra nandeico turã ja cote. Ũquí mose ra nandeya bei nandeico cote. Ũquí mose ra nandeico tuchi Dios rese cote.

³ Ũquí mose ra Dios abe ia tuchi nanderese. Eicuã si mbia rirõsa chõ ae re.

⁴ Dios mbia rirõ ja sete quia eicuã si co. Dios mbia mbaaquiato quiato sete quia co no.

⁵ Dios mii ño siqui nguiã co. Mbia que icha icha jate esi ra. Jesucristo mii ño siqui nguiã mbite re co. Mbia mbucha sacuã Dios rese. Mbia sí chõ ae re.

⁶ Jesucristo que mano mbia icuã ndiquicharõ sacuã nda. Ũquí ndese que Dios mbia mbiirandu cote ra.

⁷ Ũquí nii ngue Dios seirabo ra. Semondo que judíos eã je embaaquiato quiatu sacuã nda. Ũquí Dios icua sacuã ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue.

⁹ Sã cuña abe riqui siqui mingue. Sã eriqui ndua tuchi eã jiri huĩrao rese. Uachu rĩĩnda hui rese abe. Ua rese abe no. Lujo rese abe no.

¹⁰ Sã eriqui quiatu ndua Dios rese. Sã eriqui mbae turã naa naa mbia je.

¹¹ Sã cuña quirirĩ chõ nguia mbia ñumunua mose. Sã eriqui nyiisaquia turã. Sã eriqui mingue.

¹² Mbia ñumunua nua mose, cuña mbia mbaaquiato quiato aroneate. Sã cuña mo ererecua raã naa eã ngu je. Sã eriqui chõ nguia quirirĩ.

¹³ Adán nane nguiatu ngue Dios chao nguiã. Aquere quiatu ngue Eva ao nguiã cote.

¹⁴ Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icuã saã nyii ra.

¹ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesequa mose mbia rese.

3

Sã Jesús quiato rerequa siqui turã

¹ Acheẽ ñooño eã ño se re. Jesús quiato reaquiato sacua ño taico se, i mose emo, eturãte ùqui.

² Sã Jesús quiato rerequa riqui siqui turã mbei. Mbia ñee eã sacua ee. Sã ngũinisi mi ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiato quiato aracua.

³ Sã eriqui quiacuayã. Sã eicua icua eã mbei riqui emo je. Sã eriqui oo tuchiã mbae isiquia rese. Sã eriqui ico mingue.

⁴ Sã eriqui mbia uchuchua jenda rerequia turã. Sã eriqui nguiirĩ mbaaquiato quiato turã. Aba cheẽ mumbayã sacua. I nda eriirĩ eĩ ñooño eã mbia je.

⁵ Nguiirĩ ndea chooño mose, Dios quiato reaquiato turã aroneate.

⁶ Ae Jesús icua ramote nae, Jesús quiato rerequa aroneate ùqui. Ùqui mose ucuasu raã naa arõte. Eicua arõte cote. Sã Satanás abe ucuasu raã naa ñimbicua nonde no.

⁷ Sã Jesús quiato rerequa riqui siqui turã mbei Jesús quiatoã abe je. I nda diablo embiirĩ irĩ eã embicua. I nda Jesús quiatoã ñee turã mbei eriĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese.

⁹ Sã diáconos siqui eã tuchi mbae icua mo ndese. Sã Dios mi ndese quiato eriqui bei. Sã Dios icua tuchi.

¹⁰ Ae ra diácono nae, sã mbia mae na nguiatu erese nyii. Eturã mose mbia je, sã diácono ae cote.

¹¹ Sã diácono ninisi abe riqui siqui turã mbia je. Sã mbia mbucheẽ ñee eã emo ni. Sã eriqui quiacuayã. Sã eriqui ucheẽ mbuchebiã mbae raã nonde.

¹² Sã diácono ngũinisi mi ño nderequia. Sã eriqui nguiirĩ nderequia turã. Uchuchua jenda ja abe no.

¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacua mbia je.

Ae Dios saã nande je, ùqui aba icua ja aroneate raque

¹⁴ Seso jeise rete raque nderea. Seso eã moi ño aico nguiã co mbesa ndeje a.

¹⁵ Nde Jesús quiato rerecuarã irabo aquiato sacua ño aico nguiã ã mbesa ndeje a. Iglesia jenda rerequa irabo sacua. Dios reco mbae rei iglesia. Iglesia quia rei Dios cheẽ nderequia tuchi mbia ja je.

¹⁶ Ae Dios saã nguia nande je nae, ùqui aba icua ja aroneate raque:

Dios que tu mbiarã ibii ra. Jesús, i equia ee.

“Eturã tuchi” i que Espíritu Turã eriĩ nda.

Angeles abe que mae erese ra.

Ae Jesús quiato nae, ùqui ngue esenei senei mbia ataque je ra.

Mbia mangue chooñoa jenda ja que eicua ra.

Aquere que Dios equeraobe ibate cote ra.

4

Mbia ra hui hui Dios cheē si

¹ Espiritu Turā ndiqui ñee co: Mbae ua ja nonde ra mbia hui hui tuchi Dios si. Aba mbiirĩ irĩsa rese ra mbia riqui tuchi. Ũquĩ nda mbia mbaaquiātu icuã icuã aba checuayã icuã na.

² Ae uturã saã saã nguia nae, ũquĩ ndui rui ra mbia riqui. Ae ñee ñooño nguia nae, ũquĩ ndui rui ra mbia riqui no. Ũquĩ siqui beite mbae icuã ndese ũquĩ. Nyebe eriqui nguia mbae turã icuayãte chee cote.

³ Ũquĩ nda mbia mbaaquiātu icuã icuã. Jeninisirã nda jendecoã. Jendurã abe ra jendecoã no, i ra equia ñee mbia je. —Mbae ra jēu chooñochĩ jē, i ra equia mbia mbaaquiātu icuã icuã. Dios mbae chao ja raque mbia chiurã. — Sã sequiātu mbae ja u, gracias ire seje, i que Dios ra.

⁴ Dios chiao mbae turã ja. Mbae nandeisi teã teã eã ño nguia echiao. Mbae nandeu turã ja chō nguia. Gracias nande bei chō nguia Dios je.

⁵ Dios cheē nguire mbae turã ja riqui nandechiurã ã. Nande “gracias” i mose Dios je, mbae turã ja chō eriqui nguia nande je.

Jesús quiato rerecua turã

⁶ ã secheē esenei senei mbei quia Dios quiato je, Timoteo. Nde mbia mbaaquiātu turã turã mose. Dios rimba turã tuchi ra nde cote. Jesús cheē ndui ra ereico tuchi cote. Dios ra ereicua tuchi cote. Sã ereico beite erese co no.

⁷ Mbia cheē ñooño je cheē ndese ra erechiisaquiachĩ jē. Echimbirãcuã tuchi quiātu quia siqui Dios rese jē.

⁸ Nanderete quirãcuã mose, eturãte raque. Nandeico mose Jesús rese, ũquĩ nguia tu eturã tuchi nanderete quirãcuã si re. Aachō eã nandeico Jesús rese. Ibate abe quiātu nandeico erese.

⁹ Acheē ñooño eã ño se re. Sã mbia “ae beite” i ja secheē je. Dios cheē ño ñene.

¹⁰ Dios cheē ñii ño ureico nguia quicoi coi ã. Dios cheē ñii ño ureico nguia ñimbirãcuã mbae ja rese ã. Dios reco quiātu ureicuate nguia ã. Ae que mano mbia ja je ra. Ae eicuate quia nae, ũquĩ nda emingo bei.

¹¹ ã esenei senei mbei quia mbia je. Mbia Dios cheē mumbayã sacuã.

¹² Sã mbia ndecheē andu turã. Amei eã ndaque nde. Mbae turã esaã saã nguia Jesús quiato resaa. Ũquĩ siqui turã sacuã nde rã si. Echeē turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia. Mbae icuã ndese ra eremae mae jirichĩ.

¹³ Mbia embaaquiātu quiātu bei quia seso mose chee nderea. Dios cheē esenei senei mbei quia leer i ee.

¹⁴ Jesús quiato rerecua o chono mose ndearō, aque mose que Dios nembaaracua tuchi ra. — ã esaã, i que ndeje ra. Ũquĩ si ra eretesareichĩ.

¹⁵ Ũquĩ ndese eico bei. Endua ndua bei quia erese. Ũquĩ mose ra Dios ereicua i i tuchi. Mbia ra jirandu ja nderese.

¹⁶ Emae ño nguia nde ae ndechiese. Echicuasẽ cuasẽ ño nguia mbae icuã si. Ae eresenei senei nguia mbia je Dios cheē nae, ũquĩ emumbayã ño nguia nde abe. Ũquĩ mose ra Dios nemingo turã tuchi. Ndecheē andusa abe ra emingo turã tuchi.

5

Jesús quiato siqui turã sacuã

¹ Erecehē ɪcuā ɪcuāchĩ nda amei je nde embaaquiātu quiātu mose jē. Amei embaaquiātu turā turā ño nguia jē. Nderu esaā ño nguia siqui turā ee. Ndenongue rā ño eico mbia yasu je no.

² Ndesi esaā ño nguia ari je jē. Ndenongue esaā ño nguia ubichō nyu-cuaaque rese jē. Endua ɪcuā ɪcuā eā ño nguia erĩ jē.

³ Eru cheecha mo mbae eā mose, sã Jesús quiato riqui mbae mo mee mee ee.

⁴ Eriirĩ tiarō mose, sã aque chō mbae mee mee mbei quia usi je. Eriirĩ nducucha mose, sã aque chō mbae mee mee ee no. Ngu abe je. Umumbebosa je. Ũquĩ Dios bite.

⁵ Sã eru cheecha mo ae riqui no. Sã embae eāte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee.

⁶ Ae ebite nae, ũquĩ ndese achō eru cheecha mo siqui mose, eicuāte ũquĩ. Eraaque rā ño aque riqui nguia. Eresco siqui raque.

⁷ Ā esenei senei nguia mbia Jesús quiato hue jenda je. † nda mbia ñee ɪcuā eā erĩ.

⁸ Emo ndua eā mose usi rese, ngu abe rese, eicuāte ũquĩ. Mbae mee mee eā mose ee, eicuāte ũquĩ. Ũquĩ siqui āte quia Dios rese ũquĩ. Eicuā tuchi chō ũquĩ Dios quiatoā si re.

⁹ Ari eru cheecha je inscribir jenye rā mámbii. Ae sesenta años eāte nae, ũquĩ je inscribir jenye eā. Ae eru ata nyii nae, ũquĩ je inscribir jenye eā no. Ae eru mii nyii nae, ũquĩ mii je chō inscribir jenye.

¹⁰ Ae ari turā aba chūcuate nae, ũquĩ achō je chō inscribir jenye. Ae ari nguiirĩ mbutiarō turā mbeite quia nae. Ae ari mbia isi turāte quia uchuchúaa nae. Ae ari mbae turā saā saā mbeite quia Jesús quiato je nae. Ae ari erasi teaquiātu turā mbeite quia nae. Ae ari siqui beite quia mbae turā ndese nae. Ũquĩ ari je chō inscribir jenye.

¹¹ Eru cheecha ari eā mose, ũquĩ je inscribir jenye eā. Ũquĩ nyao arondete Cristo si. Ae ebite, ũquĩ achō ndese ndua mose. —Serurā mo tateabe, i ra cote.

¹² Ũquĩ mose ra Dios paama i ee. Ucheē mbuchebi chō nguia ngu rea mose cote.

¹³ Eru cheecha ari eā mose, siqui eā arōte mbae mo ndese. Tuchua embuchesea sea chooño arōte. Mbia mbucheē ñee ñooño arōte emo nii. Uchuru rerequia chooño eā arōte.

¹⁴ Nyebe aico nguia ñee eru cheecha, ae ari eāte, ũquĩ je. Sã ngurā mo ndea. Sã tiirĩ. Sã eriqui mbae turā naa naa mbei uchuchúaa. Ũquĩ mose ra Jesús quiatoā ñee eā ee cote.

¹⁵ Emo emo ngue nyao Dios si cote ra. Satanás ndese eriqui ã cote.

¹⁶ Sã Jesús quiato riqui mbae mee mee uchari eru cheecha je. Usi abe je eru cheecha mose. Iglesia mbae mee mee eā sacua ee. Ae eru cheecha eriiriāte nae, ũquĩ je quiātu iglesia mbae mee mee.

¹⁷ Jesús quiato rerecua mbae saā turā turā mbei mose, sã mbia ia tuchi riqui erese. Dios cheē nenei nenei turā mose, sã Jesús quiato riqui mbae mee mee mbei ee.

¹⁸ Sã embesa ji riqui ñee no: “Emo nimba ticuasú mbae usi raā mose, echuru ra jenyatichĩ mbae mo je jē. Sã ae ae si quia quiaru quiaru”, i que embesa ji ra. “Ae quiei quiei quia emo je nae, sã echa mbae isiquia mo mee ee”, i que embesa ji ra.

19 —Jesús quiato rerecua que mbae icuã saã nda, i mose emo, echeẽ nda jeñanduchi, ae mii ñee mose. Nyeremo ñee mose, ũqui ñee ñooñoa arõte cote.

20 Jesús quiato rerecua mo siqui siqui bei mose mbae icuã ndese, echeẽ asi asi ee Jesús quiato ataque résaa. I nda ũqui abe siquiche mbae icuã naa naa eã.

21 Eĩ ere chõ Jesús quiato rerecua je, siqui mose mbae icuã ndese. Ndequia-tote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no.

22 Jesús quiato rerecuarã nda eremii jeichĩ jẽ. Emae nguiatu turã na erese nyii. Emii jei mose, eicuã arõte emo mose. —Eremii jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

23 I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

24 Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemae ũqui nyisaã icuã ndese cote.

25 Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6

1 Ae Jesús quiato ererecua rimba mo nae, sã ũqui ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote.

2 Timoteo, mbia rimba embaaquiato quiatu quia. ã echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jẽsaã turã tuchi quiatu quia ee. Jẽingo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

3 ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiato quiatu mose ã abi, Dios cheẽ ndui eã ño ũqui ndiqui nguiã.

4 Ucuasu raã naa ño nguiã ũqui. Ñee tuchi beite equia ũqui. Eaquiatu rocoĩ. Mbia mbicuã icuãte equia ũqui. Mbia mbucheẽ icuã icuãte equia nyue ũqui. Mbia mumae icuã icuãte equia nyiese ũqui.

5 Ndua icuã icuã mbeite equia ñee turã ndocoĩ ũqui. Eicuã icuã mbeite riqui emo je ũqui. —Mbia ra mbae isiquia mee seje, se Dios cheẽ nenei nenei mose ee, i beite equia ũqui. Ũqui ndese eicoã tuchi, Timoteo.

6 Nandeico mose Dios rui, ae ae ra nandemba nandembae mii ndese.

7 Mbae mo ngue nanderuãte nandechaacquaia mose ra. Eĩ nande si ra nandemano mose mbae mo nderao eã no.

8 Nandechiurã nandereco mose, nanderao abe nandereco mose, nandeya chõ nandeico ũqui ndese.

9 Ae “mbaecha tuchi ra se” i bei quia ndua ndua, ũqui nda nimbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguiã. Echiosei oseĩ icuã nda equerao chee tata cuãsuu.

¹⁰ Ae ndua beite quia mbae isiquia rese, ũquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguiã hui Dios si ã. Nyebe eya eã ndasi tuchi riqui nguiã ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echesecua bei chõ nguia mbia rese. Eico mingue chõ nguia. Ndecuasú ra eresaã saãchi nguia jẽ.

¹² Echĩmbirãcuã tuchi quiatu quia Dios cheẽ ndese jẽ. Aba mingo beisa rese quia eico tuchi jẽ. Ae quia ngue ndeirabo nguiã nyii. Sã erecheẽ turãte mbia résaa nyii no. —Dios riqui semingo beite co, ere que equia nyii. Ũquĩ ndese bei chõ eico.

¹³ Dios ae chõ mbae mingo ja nguiã co. Erésaa tacheẽ ndeje. Jesucristo résaa abe tacheẽ ndeje. Sã Jesucristo siquicheã ñee Poncio Pilato je no.

¹⁴ Ae rĩi Dios ñee ndeje nae, ũquĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. † nda emo ñee eã ndeje.

¹⁵ Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo íbii mbia rea” i. Aque mose ra Jesucristo nyecua tuchi mbia je.

¹⁶ Dios mii nda manoa. Ae mii ño siqui bei nguiã nyaashĩ na co. Mbia mo nda esũchã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia erĩi. Sã eriqui ñee turã mbei equirãcuã nii. Amén.

¹⁷ Ae mbaechate nae, ũquĩ je echeẽ. Sã ucuasu raã naa eã. Sã eya siquíã umbae mii ndese. Embae ra ua emo mose. Sã Dios rese quiatu eya riqui. Ae mii ño mbae mee nguiã nande je.

¹⁸ Echeẽ mbaecha je. —Mbae turã jẽsaã saã mbei quia jembae je jẽ. Jẽingo turã jiri quia mbaecha reã je. Abei chiãte ra jẽingochĩ jẽ, ere mbaecha mbaaquiãtu quiãtu.

¹⁹ Ũquĩ naa naa mose ra Dios mbae mee tuchi ee ibate. Ũquĩ naa naa mose ra siquí turã tuchi no.

Pablo ñee hui bei Timoteo je

²⁰ Timoteo, ae rĩi Dios ñee ndeje, ũquĩ emumbayã mbei quia. Mbia ñee ñooño mose nyue, nde abe ra erecheẽchĩ. Ũquĩ ñee aba mundua turã eã ño nguiã. Uaquiãtu raã naasa chõ ũquĩ nde.

²¹ Dios cheẽ abi chõ eriqui nguiã ũquĩ naa naa ũuuuuu uuuquĩ. Dios icuasa reã ño ũquĩ nde. Sã Dios turã ndiqui bei ndeje. mén.

SEGUNDA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiato rei se. Dios que semondo mbia mbaaquiato quiatu sacua nda. —Jesucristo icuasa ra siqui bei, i sacua ngue Dios semondo mbia je ra.

² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriiri i ndeje co. Dios rei nanderu. Jesucristo rei nandererecua. Sã ùqui turã mbei riqui ndeje. Sã ùqui ia eã mbei riqui nderese. Sã ùqui nembia tuchi.

Pablo Dios osei uquia Timoteo je

³ Gracias, ae bei se quia nderĩ Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderĩ aico ñee mbeite Dios je co. Nyaashĩ mose. Isa abe.

⁴ Anduate quia nderese co. Achimbiate rã nda mae nderese chã. Erecheseote que nandechao ramo mose nandechesi ra.

⁵ Ereico Dios icua tuchite aque. Ndesi rã si Eunice. Ndechari abe rã si Loida. Ùqui ngue Dios icua tuchite quia ra. Eĩ ere si quia Dios icua tuchite nde abe aque.

⁶ Nyebe aico nguiã ñee ndeje a. Seo achono nguia ndearõ nae, aque mose que Dios nembraarua tuchi ra. Ndearua eico bei Dios cheẽ ndese. Dios cheẽ nenei nenei mbia je.

⁷ Dios siquiã nguiã nandembu siquiche mbia si ã. Dios nandembirãcuãte quia ã. Dios nandembuchesequate quia mbia rese ã no. Dios nandembaaracuate quia ã no.

⁸ Dios quirãcuã ndese eico bei. Ùqui mose ra ereireĩ ireĩ eã Jesús renei nenei mbia je. Ùqui mose ra ereireĩ ireĩ eã setarõ ji si. A setarõ ji ñi Jesús rĩi a. Mbia icuã icuã mose ndeje Jesús rĩi, echimbirãcuã ño. Dios ra nembirãcuã. Sã sembirãcuã no.

⁹ Dios quiatu ngue nanderirõ nguiã nandeicuã si. Dios que nandembuturã mingo icúe umbaerã nda. Nandeturã je eã ngue nandemingo nguiã icúe umbaerã. Nduate quiatu nguiã nanderese. Mbae ao ja nonde que nduate nanderese ra. Jesucristo rĩi ño ngue Dios riqui nguiã nyesequa nanderese.

¹⁰ Nyebe Jesucristo mondo nguiã nanderirõ sacua nandeicuã si. Nyebe nandeico nguiã ñee: —Dios nyesequate nanderese, i cote. Jesucristo que nandembusiquicheã u nandemano si ra. Ae riqui nandemingo bei co. Ae riqui ucheẽ isiquia mingo bei co. Jesucristo tu mose que nandembiirandu ja ùqui ndese ra.

¹¹ Ucheẽ turã nenei nenei sacua ngue Dios seirabo ra. Semondo que mbia mbaaquiato quiatu ra. Mbia mangue choõõa jenda ja mbaaquiato quiatu.

¹² Ùqui je chõ mbia riqui nguiã mbae rasi raanguquia tuchi seje co. Aireĩ ireĩ eãte quia Dios si co. Dios aicuate quia co. Sereco que amee tuchi ee ra. Ae ra sereco teaquiato bei seje. Jesucristo tube chee mose.

¹³ Arembaaquiato turãte que se, ùqui ndui eico bei. Dios eicua bei quia Jesucristo rĩi. Mbia rese echesequa bei quia Jesucristo rĩi.

¹⁴ Ae riĩ Dios ñee ndeje nae, nembraacua equia nae, ũquí ndese eico tuchi. Espíritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. Ũquí ngue hui ja sesi ra.

¹⁶ Onesiforo quiatu que tuutu quia serea sembia ra. Ireĩ ireĩ eãte que equia setarõ ji si ra. Sã Dios turã mbeite riqui ee. Echuchua jenda ja abe je.

¹⁷ Tu mose aa Rómaa que serequia tuchi ra. Ngasẽ nyee que seje ra.

¹⁸ Efeso seico mose abe que eriqui tuchite serese ra. Serese que eriqui Dios cheẽ nenei nenei nda. ã ereicuate quia aque. Sã Dios mbae turã tuchi mondo ee Jesús tu mose.

2

Mbae esaã saã tuchi quia Jesús je, i Pablo Timoteo je

¹ Seririĩ naate nde, Timoteo. Jesucristo quirãcuã ndese eico ñimbucha tuchi.

² Arembaaquiātu quiatu que se mbia résaã, ũquí esenei senei tuchi quia mbia je. Mbia ndua je secheẽ esenei senei. Ũquí nda esenei senei emo je no ña.

³ Mbae rasi tu mose ndeje, echimbirãcuã ño. Soldado rã ño eico ñimbirãcuã. Jesús rimba turã ño eico.

⁴ Jesús rimba chõ nde re. Echeẽ emumbayã mbei chõ nguia. Mbae mo ndese ra erendua nduachĩ. Ndererecua mi ndese endua bei.

⁵ Sã deporte no. Emo nda ganar i eã, nguerecua cheẽ mumba mose.

⁶ Sã emo ndiqui quiei quiei tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je.

⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. Ũquí asenei senei nguia mbia je co.

⁹ Ũquí je chõ mbia riqui nguia mbae rasi raanguquia tuchi seje ã. Ũquí niĩ ño setarõ mi nguia a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re.

¹⁰ Coche mbia icuã ndiqui nguia seje. † nda Dios chiirabo Dios cheẽ isi bei cote. † nda Dios emingo bei cote. † nda ũquí siqui bei ibate Jesucristo rese cote.

¹¹ Ñee ñooñoa tuchi chõ mbia cheẽ ã nde: Nandemano ngue Jesucristo rese ra. Nyebe ra nandeico bei erese cote.

¹² Cristo riĩ mbae rasi nandesaã saã mose, Cristo ra nandemi ererecuarã, ererecua tuchi mose ae.

“Cristo aicuayãte” nande i mose, Cristo abe ra ñee nande je.

“Se abe jaẽicuayãte” i ra nande je.

¹³ Nandechẽ iru raque ra nande, Dios quia ra ñee iru eã mbei.

Dios quia ra ucheẽ mbuchebi aroneate nande je, i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ ã ndese mbia hue jenda embaaquiātu quiatu tuchi. Diósaa embaaquiātu quiatu tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ũquí nde. Mbae turã si embui chõ ũquí no nde.

15 Equiei quiei tuchi chõ nguia Dios je jê. Fnda Dios “coche ñene” i ndeje. Sã emo ndiqui quiei quiei turâte nguerecua je no. Eireĩ nguiâte ra nguerecua si cote. Eĩ ere si chõ nguia Dios cheẽ nenei nenei mbia je. Dios cheẽ abi abiã.

16 Ae uchuru mondo chooñote quia nae, ùquĩ ndese eicoã. Ûquĩ ndiqui isho i ite Dios si ùquĩ.

17 Ûquĩ ñee mbuche i ite echoi quia qui. Sã mbae rasi riqui oso i ite no. Eĩ si chõ Himeneo nguiã ùquĩ. Fileto rese.

18 Ûquĩ ndiqui ñee Dios cheẽ abi abi tuchi ùquĩ. —Mbia rete raaque ra quera si eã, i chõ:ño mbei equia ùquĩ. Nyebe eriqui nguiã mbia mbui mbuite Dios si ùquĩ.

19 Sita cuasu mo na ndei Dios cheẽ. Embuquiata aronea. Aque ñi mbei chõ nda echi. Eĩ si chõ Dios cheẽ nande je no nde. Dios cheẽ ño ã nde: “Dios riqui ngũimba icua jate ã,” i que ra. Co abe rei Dios cheẽ co: “Ae ‘Dios rimba rei se’ i quia nae, sã ùquĩ ndiqui nyao ja mbae icuã si”, i que ra.

20 Sã mbae riru chumumarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacuã no. Emo emo mbae turã ndirurã no.

21 Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. Ûquĩ mose ra Jesús ia tuchi erese.

22 Ae icuã acuanindu chosei chosei quia nae, ùquĩ si ehui chõ jê. Eico turã ño Dios icha rui jê. Dios eicua tuchi chõ nguia jê. Echesequa tuchi chõ nguia mbia rese jê. Echĩmbia chõ nguia mbia rese jê. Eĩ ño Jesús quiato nguiã siqui turã nyese ã, echã quishĩ ja mose.

23 Mbia uchuru mondo chooño mose ñee nyue, nde abechĩ nda jê. Mbia mbicua sacua ño ùquĩ nde.

24 Dios rimba quia mbia mbicua aroneate re. Eaturã tuchite quia mbia ja je re. Mbia mbaaquiato quiatu turâte quia ñene. Siqui minguetê quia mbia je re.

25 Ae Dios cheẽ isi teã teã, ùquĩ nda embaaquiato quiatu mingue quia. Ûquĩ ñi nda ñee ñee Dios je. Dios emundua si sacua. Dios cheẽ isi turã sacua.

26 Fnda echoi oso chee uchã diablo si, ndua si mose Dios cheẽ ndese. Diablo quia eisite nguiã co. —Ã esaã jê, i beite diablo quia ee co.

3

Mbia ireĩ nguiâte ra mbae icuã naa i i

1 Jesús quiato ra mbae rasi saã tuchi Jesús tu serĩ mose. Ûquĩ eicua quiatu tuchi, Timoteo.

2 Umbae ae ae rese ra mbia ndua cote. Mbae isiquia mii ndese chõ nda mbia riqui ndua ndua cote. Mbia ra ucuas saã saã tuchi. Ñee icuã icuã mbei ra equia emo ñi. Mbia ra ngu cheẽ mumba mumba tuchi. Usi cheẽ abe no. Mbia ra gracias iã tuchi nyue aque mose. Siqui sereã tuchi ra Dios rese.

3 Mbia ia eã eã nda emo ndese. Nĩmbuturã sereã tuchi ra emo je. Emo nda embuqueta queta bei quia. Hui aroneãte ra mbae icuã si. Nyaba nyaba reã tuchi rae. Mbae turã nda eucuyã tuchi.

4 Mbia ra embucheẽ ñee ngõngue riĩ. Mbia ra mbae ñi ñooño. Mbia ra uaquiato saã ñooño. Ubi achõ ndese ra eriqui. Siqui rocoĩ Dios bi rese.

5 Dios quiato ra mbia saã ñooño. Dios quirãcuã icua rocoĩ. Ûquĩ mbia icuã si echao tuchi, Timoteo.

6 Ūquĩ mo ndiqui ique ique emo nyuchua ã. Cuña aquiatuã mbĩĩrĩ irĩ. Ae ndua ndua beite quia hũicua ndese cuña nae, ũquĩ mbĩĩrĩ irĩ. Ūquĩ cuña ndiqui uchioseĩ raã naa mbei mbae icua ũquĩ.

7 Ūquĩ cuña ndiqui “tachimbaaquiato” i beite raque ũquĩ. Nĩmbaquiato aroneate Dios cheẽ ndese.

8 Sã brujos Moisés cheẽ mumba no. Janes, i equia ee. Jambres abe no. Eĩ si chõ cuña mbĩĩrĩ irĩsa nguiã Dios cheẽ mumba mumba ũquĩ. Ndua aquiatuã je chõ ũquĩ nde. Ūquĩ ndiqui emo mingo aroneate Dios cheẽ ndese ũquĩ.

9 Mbia ra siqui eã ũquĩ ñee ndui cote. Mbia ra “eaquiataã” i chee erĩ. Sã “eaquiataã” i chee Moisés cheẽ mumbasa rĩ brujos no.

Jesús quiato ra mbae rasi saã, i Pablo

10 Ereico turãte que se rã si ra, Timoteo. Dios cheẽ ngue eresenei senei nguia se rã si ra. Ae asaã saã nguia Dios je nae, ũquĩ ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereĩcua tuchi se rã si. Ereico mingüete equia aque. Erechesequate equia mbia rese aque.

11 Ereico turãte que equia mbia icua icua mose ndeje ra. Sã mbia icuate riqui seje Antioquia no. Iconioo abe. Lístraa abe. Sã ñi aico mbae rasi raã tuchi huee no. Dios que sereaquiato ũquĩ si ra.

12 Ae siquise rete quia Jesucristo rese nae, ũquĩ nda mbae rasi saã tuchi. Mbia icua icua tuchi ra ee.

13 Ae icua icuate riqui Dios je nae, ũquĩ nguia ra eicua i tuchi cote. Ae mbia mbĩĩrĩ irĩ nguia nae, ũquĩ ngui a ra mbia mbĩĩrĩ i tuchi cote. Nĩmbĩĩrĩ i tuchi ra equia no.

14 Nde chõ eico tuchi Dios cheẽ ndese. Ae rese erchimbaaquiato nae, ũquĩ ndese eico tuchi. —Ichoĩñoa tuchi que ã nda, erete equia eicua aque. Nembraaquiatusa abe ereicuate quia aque.

15 Ndeñetẽ mosenda bei chõ ereico nguiã Dios cheẽ icua aque. Dios cheẽ nembaaracuate quia aque. Nyebe ereico Jesucristo icuate aque. Nyebe Dios nderirõ nguiã ndeicua si.

16 Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbia mbaaquiato. Dios cheẽ ngui a rei mbia icua mbuchecua ee. Dios cheẽ nguia rei “eĩ jenyẽ” i tuchi nande je. Dios cheẽ nguia rei aba mingo Dios bi rese.

17 ¶ nda Dios quiato siqui turã tuchi. ¶ nda equiatio mbae turã naa naa ja.

4

1 Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbia rese. Mbia reco rese. Mbia mano je rese abe. Ae nonde aico ñee ndeje a.

2 Dios cheẽ esenei senei tuchi quia mbia je, Timoteo. Mbia eanduse mose. Mbia eandu sereã mose abe no. Embaquiato quiato mingue bei chõ nguia. Embuti mbuti bei quiato quia Dios cuti. “Eĩ jenyẽ” ere bei quiato quia mbia je.

3 Namõ jiri quiato ra mbia Dios cheẽ turã andu sereã cote. Ubi achõ ndese chõ nda hũisa rerequia tuchi cote. Nyebe ra Dios cheẽ andu sereã. Ae mbia mbaaquiato icua icuate quia Dios cheẽ ndui eã nae, ũquĩ ndui chõ nda mbia riqui tuchi cote.

⁴ Nyiisaquia tuchi chõ nda equia mbia ñee ñooño je rese cote. Ñee ñooño eã je rese nyiisaquia rocoĩ.

⁵ Cochee chõ eico nde, Timoteo. Nderoseĩ nguiátu chõ eico mbia icuã icuã mose ndeje. Equieĩ quieĩ tuchi chõ nguia Dios je. Dios cheẽ esenei senei tuchi chõ nguia mbia je.

⁶ Achuruchate ucua quia co cote. Aico mano utate co cote.

⁷ Mbae que asaã saã tuchi quia Dios je ra. Ae je Dios riqui ñee seje nae, ñquĩ ngue asaã jate quia ee ra. Ahui eã mbeite que se quia esi ra.

⁸ Dios que sechiã mbuturã nda. Ūquinde que aico ngata turã nda. Nyebe eriqui nguiã premio nderecoquiato seje pe. Jesucristo tu mose ra Dios mae ja mbia rese cote. Aque mose quia ra premio mee seje cote. Se mii je eã ndae. Ae Jesucristo ru choseite quia nae, ñquĩ ja je abe ra premio mee.

Echu serea, i Pablo Timoteo je

⁹ Echu jei chõ serea, Timoteo.

¹⁰ Demas quiato ngue serecha nguiã. Ibi jenda achõ ndese chõ eriqui nguiã ndua. Ūbi mii ndese chõ eriqui nguiã ndua. Nyebe esi nguiã serecha Tesalónicaa. Crescente quiato que oso Galáciaa ra. Tito quiato que oso Dalmáciaa no nda.

¹¹ Lucas mii ño siqui nguiã serese co cote. Marcos abe eru bei seje. Ae nda quieĩ quieĩ jiri nguiã serese aa.

¹² Tiquico quiato que amondo Efésoo ra.

¹³ Ae asecha saco sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje.

¹⁴ Alejandro el herrero que mbae icuã saã saã tuchi quia seje ra. Dios ra mbae icuã mee ee eicuã ndibishorõ.

¹⁵ Echiteaquiato quia esi jẽ. Nande Dios cheẽ nenei nenei mose, ebiãte eriqui co.

¹⁶ Mbia sererao mose ererecua je, emo ngue nyaroã tuchi serese ra. Serecha ja chõ ngue ra. Dios nda paama i eã ee ñquĩ nii ña.

¹⁷ Jesús mii ngue serecha eã nda. Ae mii ngue sembirãcuã nda. Se echeẽ turã nenei nenei tuchi sacuã. Ae judíos eã nae, ñquĩ Jesús cheẽ turã andu tuchi sacuã. Nyebe Jesús sembuĩ mondo nguiã mbia icuã si.

¹⁸ Ae ra sereaquiato bei quia mbae icuã si. Sererao chee mose ibate nyiese. Sã mbia riqui ñee turã mbei erĩ. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda ja je abe.

²⁰ Erasto que siquichõ Coríntoo ra. Trófimo ndasi que asecha Milétoo ra.

²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato ja a jenda abe no.

²² Sã Jesucristo riqui bei nderese. Sã Dios turã ndiqui bei jendese. Amén.

CARTA DEL APOSTOL SAN PABLO A TITO

Pablo embesa mondo Tito je

¹ Pablo rei se. Dios rimba. Jesucristo chimbaaquiatu. Dios que semondo ñee ñee sacua uchiirabo je ra. Ũqui Dios icua tuchi sacua ngue semondo ra. Siqui turã sacua Dios rã si.

² —Sechiirabo ra amingo bei, i que Dios cose ra. Ñee ñooño eã ndae. Ũqui ndese embiirandu sacua ño ngue semondo nguiã.

³ Dios rei nanderirõsa mbae icua si. Ae que seirabo ucheẽ nenei nenei sacua mbia je ra. Eĩ ngue Dios ucheẽ mbuchecua mbia je cote ra.

⁴ Aico ã mbesa ndeje a, Tito. Ereico Jesús icuate se rã si aque. Nyebe aico nguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ũqui ia eã tuchi riqui ndere. Sã ũqui ndiqui nembia turã tuchi.

Sã Jesús quiato rerecua riqui turã

⁵ Ae nandesaã ja eã huee nae, ũqui esaã ja rã nguia nde huee. Amei mo eirabo rabo Jesús quiato rerecuarã. Mbia recua ja ja jenda. Secheende ndeje eirabo rabo ino huee. Nyebe arerecha nguiã huee Crétaa.

⁶ Amei turã ño eirabo rabo Jesús quiato rerecuarã. Eninisi mii nderecua chõ eirabo. Ae ririĩ Jesús icua quia nae, ũqui mii ño eirabo rabo. Ae eriirĩ seteate riqui nae, ũqui ño eirabo rabo. Ae eriirĩ teã eãte nae, ũqui ño eirabo rabo. Jesús quiato rerecuarã.

⁷ Jesús quiato rerecua quia Jesús quiato teaquiato quiato quia. Ũqui siqui icua aroneate. Ucuasu abe raã naa aroneate. Eroseĩ nguiã aroneate. Quiacua aroneate. O rerequia chooñoa aroneate. Mbia mo mbae osei osei aroneate no.

⁸ Mbia nyoi mose echuchúaa, isi turã ndae. Siqui turã ndae. Ndua ndua ra mbae aõ nonde. Siqui eã nda mbae icua ndese. Dios rã si chõ nda eriqui. Echiichati eã ndae. Jesús quiato rerecua ra eĩ mbei quia.

⁹ Sã eriqui bei Dios cheẽ ndese nandechẽ nguire. Ũqui mose ra ũqui abe mbia mbaaquiato quiato turã. Jesús osei uquia ee. Mbia icua ñee nda embutiba Dios si. Ũqui ño eirabo rabo Jesús quiato rerecuarã, Tito.

¹⁰ Mbia teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã.

¹¹ Ũqui nyuru esiquisã tuchi. Mbia mbaaquia tu icua icuate quiato nguiã ũqui. Eru mbirĩ irĩ. Eninisi abe mbirĩ irĩ. Eriirĩ ja abe no. —Mbia ra umbae mee mee nande je, i chõ nguiã ã.

¹² Hue jenda mo ngue ñee nda. —Ñee ñooño je chõ ure re, Creta jenda re. Ureicua mbei chõ ure re. Nyacua icua ña ño ure re. Uretomei ño ure re. Mbae mburireãsa chõ ure no nde, i que Creta jenda mo nda.

¹³ Ichõiñoa tuchi chõ ñene. Nyebe echeẽ asi tuchi ũqui je, Tito. † nda eriqui tuchi Jesús rese.

¹⁴ † nda eriqui eã judíos icua ñee ndese. Mbia tubiriã Dios cheẽ isi teã teãte quia ũqui. —Ũqui ñee nda jemumbayãchĩ jẽ, ere chõ mbia hue jenda je.

¹⁵ Echiã mbuturã ji je chõ mbae turã ja riqiui nguiã ã. Echiã mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicuã eã, i chõchĩ nguiã mbae icuã ndese siqui siqui.

¹⁶ —Dios ureicuate quia ã, ichõĩño equia ũqui. Echisaã nguia eicuãte re. Nyebe nandeico nguiã eicuate, Dios rese siquiã mose. Aba biã tuchi chõ ũqui nde. Aba cheẽ mumbasa. Siqui aroneate mbae turã mo ndese.

2

Mbia embaaquiату turã, i Pablo ñee Tito je

¹ Nde quia mbia embaaquiату quiату turã jẽ. Dios cheẽ ndui si embaaquiату quiату.

² Amei embaaquiату quiату. Enyere chõ ñee ee: —Jẽquiagua quiacuachĩ nda jẽ. Jengata turã mbei chõ nguia jẽ. Jẽaragua bei chõ nguia jẽ. Dios jẽicua tuchi chõ nguia jẽ. Jenyesequa tuchi quia mbia rese jẽ. Jẽingo tochi chõ nguia no jẽ, ere chõ amei mbaaquiату quiату, Tito.

³ Ari abe embaaquiату quiату. Enyere chõ ñee ee: —Jengata turã mbei quia Dios resa rae. Jeñee icuã icuã techĩ nda mbia mo ñi jẽ. Jẽquiagua quiacuachĩ nda jẽ. Mbae jẽsaã turã ño nguia mbia resa ráee jẽ, ere chõ ari mbaaquiату quiату, Tito.

⁴ Sã ari acuanĩ mbaaquiату quiату. † nda acuanĩ nyesequa jaaja ngu rese. † nda nyesequa jaaja nguĩrĩ abe rese.

⁵ † nda acuanĩ aragua ja ja. † nda ndua ndua ja mbae turã ndese. † nda uchuchua jenda abe mbuturã turã ño no. † nda eturã mbia je. † nda ngu cheẽ abe mumbayã no. Sã ari eĩ acuanĩ mbaaquiату quiату. Ũqui mose mbia ñee icuã icuã aroneate Dios cheẽ ñi.

⁶ Acuanĩndu abe embaaquiату quiату quia no. † nda earagua racua ja.

⁷ Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiату quiату, cohee chõ eico. Echimbirãtã tuchi chõ nguia.

⁸ Ndeico mose mbia mbaaquiату quiату, echeẽ turã turã ño nguia ee. † nda mbia ñee icuã eã ndecheẽ mose. † nda Dios cheẽ ndesenda reã ireĩ ireĩ ndecheẽ si. † nda ñee icuã eã jẽje.

⁹ Mbia rimba abe embaaquiату quiату. Enyere chõ ñee ee: —Jenderequa cheẽ nda jemumba mumba techĩ nguia jẽ. Echeẽ nguire jẽingo bei chõ mbae turã ndese jẽ. Jeñeechĩ nda echeẽ ndibishorõ jẽ.

¹⁰ Mbae mo nda jembuquia chãchĩ jẽ. Jẽseteã ño jẽingo mbae turã ndese jẽ. Eĩ jenye mose ra mbia ñee turã Dios cheẽ ñi, jenye chõ nguia mbia rimba je.

¹¹ Dios que uturã teacuquia mbia je cote ra. Mbia rirõ ja nonde mbae icuã si.

¹² Mbae ja rĩ Dios riqiui nandembaaquiату quiату co. Ae echosei chiãte quia nae, ũqui nandesecha ja sacuã. Ae icuã nandebite riqiui nae, ũqui ndecha ja sacuã no. Nandearagua sacuã abe no. Nandeico sacuã mbae turã ndese no. Nandendua bei sacuã Dios rese abe no. Eĩ nande bei quiату quia nande namo.

¹³ Jesucristo ra tu ñi ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si.

¹⁴ Ae que tu mano nande je ra. Nandeicuã ndibishorõ ngue mano nda. Nandechiã mbuquishĩ ngue u umbaerã nda. Nandeico tuchi sacuã mbae turã ndese.

¹ Enyere chō mbia mbaaquiātu quiātu, Tito. Ererecua rā ño eico embaaquiātu quiātu. Echeē asi asi jiri quia ee. Sã emo ndiqui ndecheē andu sereã nea eã.

3

Dios uturã teacuquia nande je

¹ Echeē mbia je, Tito. —Ererecua cheē nda jemumba mumba techĩ nguia jē. Ererecua cheē jeñandu quiātu quiātu quia jē. Jeñimbirātã tuchi quiātu mbae turã naa nonde jē.

² Jeñee icuã icuãchĩ nda emo nii jē. Jeñee icuã icuãchĩ nda jenyue jē. Jeseteã ño jéingo jē. Jenguasu ra jësaã saãchĩ emo je jē, ere chō mbia je, Tito.

³ Nandearacuayã techĩ nande abe nyii. Nandeteã teã techĩ equia nyii. Nandembĩrĩ irĩ ji raanguiate nandeicochĩ nyii. Ae nandechosei chosei quia mbae icuã nyii nae, ũquĩ achō ndesete nandeicochĩ nyii. Mbae icuã ndese nandeico techĩ nguia nyii. Mbã mbae nandechosei chosei techĩ nguia nyii. Mbã mae icuã icuã techĩ nguia nanderese nyii. Nande abe nandemae icuã icuã techĩ nguia nandechiese nyii no.

⁴ Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda.

⁵ Aque mose que nanderirō mbae icuã si ra. Eya eãte quiātu ngue eriqui nguia nanderese. Nyebe nanderirō nguia mbae icuã si. Nandeturã nii eã ngue re. Nandechiã ngue eirei mbiasu ra. Espiritu Turã je que nandechiã mbiasu ra.

⁶ Dios que Espiritu Turã mondo tuchi nande je ra. Jesucristo rĩ ngue emondo nande je ra. Jesucristo rei nanderirōsa tuchi nandecua si.

⁷ Dios que Espiritu Turã mondo nande je ra. Uturã je nandembitirō sacua. Nandemingo bei tuchi sacua no. —Nandemingo bei tuchi rae, sã nandeico i ã no.

⁸ I chōiñoa tuchi chō ã nde. ã esenei senei tuchi quia mbia je. ĩ nda mbia emumbayã. ĩ nda Dios icuasa siqui ja mbae turã ndese. Ae rĩ aico ñee jēje nae, sã mbã ũquĩ ñee mumbayã ja quiātu. Aba bite ũquĩ.

⁹ Mbã ñee asi asi je si ehui chō. Mbã ñee mbei mose ngãmei ndaaque rĩ, ũquĩ abe si ehui chō. Mbã ñee icuã icuã mose nyue, ũquĩ abe si ehui chō. Ae Dios senei senei nquia judíos je cose nae, ũquĩ nii mbã ñee icuã mose nyue, ũquĩ abe si ehui chō no. Aba biãte ũquĩ ñee. Aba mbaaquiātu ãte ũquĩ.

¹⁰ Emo Jesús quiātu mbuqueta queta mose embicuã nonde uchue, ũquĩ abe si ehui chō. Eicuãte ũquĩ, ere ee. Ndecheē andu eã mose, echeembe ee. Aquere ehui chō esi.

¹¹ Aba chiicuate ũquĩ icuã. ũquĩ siqui turã aroneate quia ũquĩ. Huicuã eicuate quia ũquĩ.

Pablo embesa hui bei

¹² Artemas nda amondo nderea reae. Ae oso eã mose, Tíquico ra amondo ndeje. ũquĩ mo ngasē mose huee, echu serea Nicápolis cote. Huee taico bei amã mose, ae que se ra.

¹³ Apolos embucua turã mondo. Zenas ndese. Zenas ndei embesasa. Jesús quiatote ũquĩ. Mbae mo emondo ee. ĩ nda echoi turã. ĩ nda mbae tiã eã ee.

¹⁴ Sã nanderesenda riqi mbae turã naa naa mbei ñimbaaquiatsu. Emo mbae ua mose, sã mbae mo mee mee ee. Ûqui naa naa mose, siqui turã ño nguiã ùqui cote.

¹⁵ Ae chi ja serese a nae, ùqui saludos mondo quia ndeje aque. Ae Jesús quiato nyesequate quia urerese hue jenda nae, ùqui je saludar ere ure je. Sã Dios turã ndiqui tuchi jẽ ja rese. Amén.

LA CARTA DEL APOSTOL SAN PABLO A FILEMÓN

Pablo embesa Filemón je

¹ Se rei Pablo. Setarõ ji aĩ a. Mbia que setarõ Jesucristo rĩĩ nda. Timoteo rese aico ã mbesa mbesa ndeje a, Filemón. Uresenda tuchi chõ nde re. Jesucristo rimba.

² Ae Jesús quiato ñumunua nua mbei quia ndechuchúaa nae, ũquí je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei urere se ra. Mbia icuã icuã mose ure je Jesús cheẽ nii.

³ Sã Dios riqui turã mbei jẽje. Sã jẽya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderĩĩ co.

⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra.

⁶ Aico ñee mbeite Dios je nderĩĩ co. Ae je ereico Jesús nenei nenei nae, ã nda ũquí abe Jesús icua tuchi nde rã si.

⁷ Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erchesei uquia quia Jesús quiato je ra.

Onésimo eisi turã, i Pablo ñee

⁸ Cristo chimbaaquiato aico raque co. Sã ererequa riqui ñee ngũimba je no. Uquí asaã arõte raque ndeje. Asaã eã nda se.

⁹ Tacheẽ mingue chõ ndeje. —Mbae esaã seje, tae turã ño ndeje. Ameite se cote. Setarõ ji aĩ Jesús rĩĩ a no. Se rei Pablo.

¹⁰ Mbae mo esaã Onésimo je. Seico mose aa cárcel que aico Onésimo mbaaquiato quiato Jesús rĩĩ nda. Jesús quiato riqui co cote. Seriiĩ tuchi rã ño eriqui nguiã co cote. Jesús icua mose co cote.

¹¹ Nderimbachõ ño ngue eriqui nguiã nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote.

¹² Aque amondo quia ndeje aque. Eisi turã mámbii. Sã ereico seisi turãte no. Uquí esaã si ee.

¹³ Amondo sereãte raque. Siquichõ ndei nda serese aa chã. Mbae mee mee sacuã setarõ ji je ndecutiã. A setarõ ji ñĩ Jesús cheẽ turã nĩĩ a.

¹⁴ Aisi eã nda mingo serese a, nde “eno” iã mose seje. “Eĩ ere chõ”, ae eã nda ndeje. Nde ae chõ eisi turã. Nde ae chõ echeẽ turã ee. Se ae ra arembucheẽ turã eã ee.

¹⁵ Uchã ndei que ndesi nyii ra. Siqui bei ra nderese cote reae.

¹⁶ Nderimbachõ eã nda cote. Ndequiato chõ nda cote. Nderesenda chõ nda cote. Co aico nyesequate erese co. Nde quiato ra erchesecua tuchi erese cote. Cristo resenda chõ siqui nguiã co cote. Nderese.

¹⁷ Ndequiato tuchi chõ se re. Sã ñĩ ereico seisi turã turãte no. Eĩ ere si chõ Onésimo isi turã se rã si.

¹⁸ Onésimo deber i mose ndeje, cobrar erchĩ nda ee. Seje quiato cobrar ere.

¹⁹ Pablo chõ se re. Seo je chõ aico nguiã co mbesa ndeje a. Onésimo deber i mose ndeje, asibishorõ nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacuaã. Nyebe deber ere tuchite raque seje.

²⁰ Nyebe Onésimo eisi turã na seje. I nda seya tuchi jiri nderese. Dios abe ra eyate nderese.

²¹—Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderiã co.

²² Seruacuã jendecoquiato ino mámbii. Dios ra sembusẽ mondo, jeñee mbei mose ee reae. Uquã mose ra aso jendea.

Pablo ñee hui bei

²³ Epafras saludos mondo quia ndeje aque. Ae tarõ ji ñi serese a. Jesucristo cheẽ ñii.

²⁴ Marcos abe saludos mondo quia ndeje aque. Aristarco abe. Demas abe no. Lucas abe no. ã ndiqui Dios cheẽ nenei nenei serese ã.

²⁵ Sã Jesucristo riqui uturã ndeacuquia bei jêje. Amén.

LA CARTA A LOS HEBREOS

Jesucristo mii ño Dios cheẽ mbuchecua nguiã

¹ Dios que ucheẽ mbiãsa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiãsa asa ee ra. Dios cheẽ mbuchecua checuasa atate que aque mose ra.

² Eĩ eã ño namo nde. Jesucristo mii ño Dios cheẽ mbuchecua checuã nguiã nande je co cote. Dios nguiĩrite mbucheẽ nande je cote. Ae mii ndese chõ ngue Dios ibi ao nyii ra. Dios que emii mbae ja rerecuarã nda.

³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingõ ja nguiã ucheẽ quirãcuã je co. Ae que mano nandẽicuã mbutiã sacua nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriĩ tuchi” i chõ Dios nguiã ee.

⁵ A ngue Dios ñee ãte ángeles mo je ra:

Seriĩ ño nde re.

Ndereco que amee ndeje ra,

i ãte que Dios ángeles mo je ra.

Nderu chõ se re.

Seriĩ ño nde re,

i ãte que Dios ángeles mo je ra.

⁶ Dios nguiĩri mbu mose ibii que ñee nda:

Sã ángeles riqui adorar i ja seriĩri je,

i que ra.

⁷ A ngue Dios ñee ángeles rii nda:

Quiriĩã tu asi rã tuchi chõ ángeles re.

Serimba chõ ángeles re.

Tata rendi rã tuchi,

i que Dios ñee ángeles rii nda.

⁸ Nguiĩri je quiatu que ñee ã nda:

Nde rei Dios. Ererecuarã mbei ra nde.

Ererecuã turã tuchi ereico nde co.

⁹ Mbae turã eresaã sete quia co.

Mbae icuã nguia erechõsei chiãte nguiã.

Nyebe Dios riqui nguiã nembia tuchi nderesenda mo si.

¹⁰ Nde que mbae erechao ja tuchi ibi jenda nyii ra.

Ndeo je que ibei erechao no nda.

¹¹ Uquiã nda ua ja chee.

Nde quia ra ereico bei.

Tiru ima na ja chee ra uquiã.

¹² Sã mbia riqui tiru ima mombo no.

Eyasu rerequia erendaque re.

Eĩ si ra ibi cote. Ibei abe no.

Nde quia ra eĩ mbei ereico.

Eremanoa mbei ra nde quiatu,

i que Dios ñee Jesucristo je ra.

¹³ A ngue Dios ñee ãte ángeles mo je ra:

Ecoi sejii. Nde abe ra ererecua serese.

Ae ndeucuãyãte quia nae, ùquĩ je ra ndequirãcuã ateacuquia tuchi.

Ndequirãcuã tuchi chee ra ùquĩ sí,

í ãte que Dios ángeles mo je ra. Jesús mii je que ñee ùquĩ nda.

¹⁴ Dios riirĩ eã ño ángeles re. Dios rimba chõ ñene. Ae ra Dios mingo bei, ùquĩ ndaarõ sacuã ño ngue Dios ángeles mii nguã.

2

Nandeichayã sacuã Dios icha si

¹ Ae nandechandu quia Dios cheẽ nae, ùquĩ ndese nandeico ndua tuchi. Í nda nandeichayã mbei Dios icha si.

² Ae riĩ ángeles riqui ñee mbia je cose nae, ñee ñooñoa tuchi chõ ñene. Ae ùquĩ ñee mumba nae, mbae rasi que esaã cote ra.

³ Jesucristo sí que ñee nda. —Mbia tamingo bei, í que ra. Mbia que echeẽ senei senei mbiãsa nande je cote ra. Nande echeẽ mumba mose ra mbae rasi nandesaã tuchi nande quiatu cote.

⁴ —Jesucristo ñee ñooñoa ño nguia re, í sacuã mbia que Dios mbia mae sayã naa naa nda. Milagros tubiriã. —Jesucristo ñee ñooñoa ño nguia re, í sacuã mbia que Dios Espíritu Turã mondo mbia je no nda. Ae je Dios Espíritu Turã mondo mondo sete nae, ùquĩ je chõ ngue Espíritu Turã mondo ra.

Mbia rã ngue Jesucristo ru nyii ra

⁵ Ae ra nandeso emo mose nae, hue jenda rerecua eã nda ángeles.

⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Ángeles que eremingo turã tuchi rei mbia si aque mose ra.

Ûquĩnde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda,

í embesa ji huĩ ñee a. —Mbae rerecuarã ja ra mbia, í mose Dios, mbae ja riĩ ño ñee nguã. Mbae mbia cheẽ mumbate raque quia ã.

⁹ Jesús mii ndese chõ nandeico nguã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” í nguã Jesús je. Emanonde que Dios emii mbia rerecuarã tuchi cote ra.

¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguã Jesús je cote. Mbia tubiriã mingo bei sacuã ño ùquĩ nde. Jesús mbae rasi raã mose, ererecua turã tuchi sacuã ño ùquĩ nde.

¹¹ Jesús que nandembitirõ uturã na sí ra. Nyebe eru riqui nguã nanderu ja co cote. Nyebe Jesús riqui nguã “senongue” í ireĩ nguã nande je.

¹² Sã Jesús cheẽ ñi embesa ji rese a no:

Paba ibatenda tasenei senongue je.

Senongue rese tairasei rasei ee,

í que Jesús cheẽ mbesa ji huĩ nda.

¹³ Dios taicua tuchi,

í abe que Jesús cheẽ huĩ nda.

A aico seriirĩ Dios chimondo rese a,

í abe que Jesús cheẽ huĩ nda.

14 Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua.

15 Ae siquiche beite quia umano si nae, mbae icua nimba raanguia chõ ùquĩ nde. Ûquĩ siquiche eã sacua ño ngue Jesús mano nguiã.

16 Angel sacua eã ngue Jesús ru ra. Mbiarã ño ngue eru nguiã. Judiorã ño ngue eru nguiã. Mbia mbitirõ sacua.

17 Nyebe Jesús ru nguiã mbiarã nande rã. Ñee turã sacua Dios je nande riĩ. Dios nandembasi eã sacua nandeicuã nii. Jesús siqui mose mbiarã ngue mano mbia icua nã nda. Mbia icua mbutiã sacua esi.

18 Mbae icua ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icua tã i mose nande je.

3

Jesús quia rei i tuchi Moisés si

1 Seresenda, Dios que jemii icue umbaerã tuchi ra. Nyebe aico nguiã ñee tuchi Jesucristo riĩ jêje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote.

2 Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no.

3 Jesús quia rei i tuchi Moisés si. Ae que Moisés chao ra. Sã emo ndiqui tuchia ao no. Tuchia aosa quia rei i tuchi tuchia uchiao si.

4 Mbia mo tuchia chao arondete raque. Dios mii nguia rei mbae ao ja tuchi.

5 Moisés que Dios cheẽ mumba eãte rei quia ra. Erimbachõ ño ngue ae ra. — Ñ nda Dios saã je mbia je, i chõ ngue Moisés quia ra.

6 Cristo quia rei i tuchi Moisés si. Ae quia rei Dios riirĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyoĩ Dios récuua

7 Jesús quia i tuchi re. Nyebe Espíritu Turã ndiqui nguiã ñee nande je ã: Dios cheẽ jeñandu rã namo.

8 Jeñia átãte ra jëingochi jë.

Sã cose ndare chiã átã mbeite riqui Dios cheẽ andu sereã turúquiaa eico mose no.

Ûquĩ icuãte que eriqui Dios je ra.

Dios que ñimbirãcuã ñote quia ee ra.

9 Dios que siqui minguet quia ùquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui minguet nande je”, i rei que mbia jenamei nguia cose ra.

10 Nyebe Dios paama i nguiã ñee ee.

“Siqui icua mbeite equia uchiangui re ã. Siqui sereãte equia seicha rui ã.

11 Aico paama ite ee co.

Uquenea nda eucua eã mbei nyoĩ serécuaa”, i tuchi que Dios erĩ nda, i que Espíritu Turã ñee embesa ji huĩ nda.

12 Cochee chõ jëingo, Seresenda. Jëicha eã sacua Dios reco si jeñiangui re. Dios jëicua bei sacua jeñiangui re no.

13 —Nandeico i i tuchi quiatu quia Dios rese, jenyje jenyje bei quiatu quia jenyue. Jendeco mose íbii. † nda mbae icuã jembüürí irí eã. † nda jêteã teã eã Dios cheê je no.

14 Sã nande Cristo nandeicua raque nyii no, eĩ nande bei chõ nguia eicua i i. Ûqui mose ra Cristo resenda tuchi nande cote.

15 Sã embesa ji riqui ñee ã no:

Dios cheê jeñandu rã namo.

Jeñia átãte ra jëingochí jë.

Sã cose ndare chiã átã mbeite riqui Dios cheẽ andu sereã turúquiaa eico mose no,

i que embesa ji ra.

16 ¿Aba chõ Dios cheẽ ñandu sereã eandure cose chã? Ae Moisés querao Egipto si nae, ùqui ño ngue resë.

17 ¿Aba je chõ Dios paama i cuarenta años cose chã? Ae mbae icuã saã saã nae, ùqui ño ngue resë. Nyebe mano mano nguia turúquiaa.

18 ¿Aba je chõ Dios ñee tuchi chã? —Jenguenea nda jëucuyã mbei oso serécuaa, i chã. Ae echeẽ mumba quia nae, ùqui je chõ ngue re.

19 Nyebe ngasë eã nguia Dios récuua. Dios icua eãte quiatu ngue re.

4

1 —Ae seicua quia nae, ùqui nda nyoí serécuaa, i chõte Dios quia nande je co. Nyebe nandeico cohee. Cohee jëingo eã mose, jemo jengasë eã arõte Dios récuua.

2 Nande abe je chõ Dios riqui nguia ñee co. —Ae seicua quia nae, ùqui nda nyoí serécuaa, i. Moisés reco mosenda achõ je eã ño ngue ñee nguia. Ûqui ngue Dios chandu iru chooño nda. Dios icua rocoí.

3 Ae Dios icua quia nae, ùqui achõ ño nda nyoí ngasë Dios récuua. Uquenea ucua sacua huee. Dios que ñee tuchi ucheẽ andu sereãsa je cose ra: Aico paama ite ee co.

Uqueneã nda eucua eã mbei nyoí serécuaa, i que ra. —Ma siqui serese, i bei rei que equia eraarõ arõ nda. Ibi ao mosenda bei.

4 Á mbesa ji que chí nda:

Dios mbae ao jare que uqueneã ucua séptimo día ra, i que embesa ji ra.

5 Á abe que chí embesa ji rese ra:

Uquenea nda eucua eã mbei nyoí serécuaa, i que embesa ji huí no nda.

6 Emo emo abe ra Dios icua. Siqui sacua érécuua. Ae Dios cheẽ ñandu nyii nae, ùqui ngue Dios icua eãte ra. Nyebe ngasë eãte nguia Dios récuua. Dios cheẽ nguia tu ngue emumbate nguia.

7 Nyebe Dios riqui nguia ñee nande je quiatu co. Nandeico sacua erese namo. Ûqui echeẽ mumbare nyii. Sã David Dios cheẽ mbesa no:

Dios cheê jeñandu rã namo.

Jeñia átãte ra jëingochí, i que Dios ra, i que David embesa ra.

8 Josué que mbia isrealitas mii aroneate Dios récuua ra. Uqueneã ucua sacua. † nda Dios ñee áte rei. —Taemingo serécuaa jenguenea ucua sacua, i áte rei.

9 Nyebe ra Dios quiato nyoí ngasë Dios récuua. Huee ra uqueneã ucua tuchi huee cote.

¹⁰ Ae ra ngasẽ Dios récuua nae, ùquĩ nda uqueneã ucua tuchi. Sã Dios uqueneã ucua tuchi mbae ao jare no.

¹¹ Nandechimbirãcuã tuchi oso nonde Dios récuua. Nandequenea ucua sacua. Ae Dios icuayãte quia cose nae, ùquĩ na nda nandeicochĩ nande mo namo jẽ.

¹² Dios cheẽ nguia rei ereco tuchi. Equirãcuã tuchi. Ique tuchi aba chiangui re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chiosei osei abe mbuchecua tuchi aba je no.

¹³ Mbae mo ndese Dios riqui jirandu eã eãte co. Mbae mo nandesã nyecuayã cuayã aroneate quia esi ã.

Jesús ñee turã mbei Dios je nande rĩ

¹⁴ Jesús rei Dios riirĩ tuchi. Sacerdote rerecua tuchi chõ eriqui nguia nande je co. Oso que ibate Dios rea ñee ñee sacua nanderĩ nda. Eriqui ñee ñee mbei Dios je nanderĩ co. Nyebe nandeico tuchi quiatu quia erese.

¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguia nyii. “Ma Jesús mbae icua naa” i nguia. Mbae icua ngue Jesús saã eã mbei chõ nda.

¹⁶ Nyebe nandesiquicheã nguia quia Dios riichã. Nyesecuate quiatu nguia nanderese co. Nandesiquicheã nguia quia ñee ñee ee. Eya eã sacua nanderese. Uquirãcuã mee sacua nande je, diablo tã i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguia mbia rĩ Dios je. Ae chõ mbae quishĩ ji mondo mondo nguia Dios je. Dios mbia chisaã saã icua mbutiã sacua esi.

² Sã sacerdote rerecua abe riqui mbia nande rã si no. Nyebe eriqui nguia siqui tochte mbia quirãcuã nea je. Mbia aquiatuã je abe. Mbia icha icha je abe no.

³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicua mbutiã sacua esi. Mbia chisaã icua abe mbutiã sacua esi no.

⁴ “Sacerdote rerecua se” i aroneate emo, Dios eirabo eã mose. Dios ae que sacerdote mii mii nda. Sã Aarón mii cose no.

⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emii nguia. Sã Dios cheẽ mbesa ji riqui ñee no:
Seriirĩ ño nde re.

Ndere co que amee ndeje ra,
sã Dios i ñe e ee no.

⁶ Sã embesa ji mo ndiqui ñee no:
Sacerdote bei rei nde.

Melquisedec na tuchi ereico nde co,
sã embesa ji riqui i no.

⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba serea mbeite quia ra.

⁸ Dios riirĩte raque Cristo. Mbae rasi que esaã tuchi ra. Ñimbaaquiato chõ ngue equia ùquĩ ndese Dios cheẽ mumbayã nda.

⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ùquĩ emingo bei quia co.

¹⁰ Dios quiatu ngue emii nguĩã sacerdote rerecuarã. Melquisedec na si no.

Jeñimbaaquiutuã mbei chõchĩ equia Cristo rese ã

¹¹ —Mbae tasenei tuchi Jesucristo riĩ jêje, ae rei que se ra. Jê nguia secheẽ jeñandu sereãte nguĩã. Nyebe aico nguĩã embiasa asa aroneate jêje co.

¹² Cosete que jêingo rei Jesús icua resẽ. ¿Mbaerã jêingo ñimbaaquiutuã mbeite re? † nguia nda jêingo nguĩã emo mbaaquiatu quiatu chã. Jêaquiutuã mbei chõchĩ. Dios cheẽ aba chiicua jêicuayã mbei chõchĩ. Áquẽ na ño jêingochĩ ã. Sã áquẽ ndiqui usi quiandi achõ mbei no. Soo quiatu eu aroneate nguĩã.

¹³ Áquẽ na jêingo bei mose, jêaquiutuãte siqui mbae turã ndese.

¹⁴ Ae ñimbaaquiatu quiatu tuchi quia Cristo riĩ nae, ùquĩ nguia rei mbae turã icua tuchi, mbae icuã icua rocoĩ. Mbia cuasu rã ño ùquĩ nde.

6

¹⁻² Ae rese jeñimbaaquiatu nyii nae, aba chiicuate ùquĩ. Ùquĩ miite rese jêingochĩ nguĩã. Mbae aba chiicuyã mo abe jêicua jiri Jesús riĩ ae. ã aba chiicua que asenei ja jêje nyii ra: —Jenyisaã mbae icuã si jêhui, ae que jêje nyii ra. —Dios jêicua, ae que jêje nyii no nda. Bautismo abe que asenei jêje nyii ra. —Jêo jeñono Jesús quiato arõ, ae que jêje nyii no nda. —Mbia raque ra quera si, ae que jêje nyii ra. —Mbia Dios quiatoã nda mbae rasi saã tuchi tata cuásuu, ae que jêje nyii no nda.

³ Ùquĩ aba chiicuate riqui ã ndesẽ. Aba chiicuyã tasenei jêje cote, Dios “eno” i mose.

⁴ Emo emo ngue siqui rei Dios quiatorã nyii ra. Dios chimee icua raque nyii. Espiritu Turã abe icua raque nyii no.

⁵ Dios cheẽ turã abe icua raque nyii. Dios quirãcuã abe icua raque nyii no.

⁶ Ùquĩ hui mose Dios si, uba si aroneate erese cote. Jesús mbucha si chõ nguĩã ira rese ùquĩ. Iquia iquia chõ nguĩã Jesús je mbia résaa ùquĩ.

⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote.

⁸ Ñui achõ suri mose huee, eicuãte ùquĩ. Eĩ si chõ mbia Dios cheẽ andu chooñosa no nde. Eicuãte ùquĩ. Ùquĩ nda Dios mombo chõ tata cuásuu.

Dios ra ucheẽ mbuchebiã mbei

⁹ Jenii aico nguĩã ñee eã, Seresenda. Dios cheẽ jeñandu chooño eã nguia jê ndeae. Jesús jêicuate quia ùquĩ. Nyebe jêingo tuchi quia erese ùquĩ ndeae.

¹⁰ Dios turãte eriqui co. Tesareiaã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ùquĩ.

¹¹ Eĩ jenje bei quiatu equia nyesecua bei emo ndese. † nda Dios mbae mee tuchi je jêje.

¹² Jeñimbirãtã mbei chõ nguia mbae raã jê. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguĩã ee. Eriqui beite mbae mee mee ee co.

13-14 Sã Dios ñee Abraham je cose no: —Taico turã mbei ndeje. Nderiirĩ nducucha tubiriã ndae, sã i Dios Abraham je no. Ûquĩ mose que Dios jurar i umbae nombre riĩ nda.

15 —Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eriirĩ mondo chee ee ucheẽ nguire cote ra.

16 Mbia jurar i mose, Dios riĩ ño eriqui nguia jurar i. —Ûquĩ nda asaã eã, i aroneate cote, jurar ire nyii.

17 —Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene.

18 Dios “mbae tasaã jêje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguia nanderaarõ turãte nandeso mose eriichã. —Taemingo bei, i mose Dios nande je, ucheẽ nda embuchebiã.

19 —Dios ra semingo bei ibate ucheẽ nguire, nande equia ã. Nande ùquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios riichã sacua no. Eĩ nande chõ nguia nande abe Dios riichã, nande eicua mose.

20 Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderiĩ pe. Sã sacerdote riqui ñee turã mbei Dios je mbia riĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

1 Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i eẽ ra.

2 Abraham ngue el décimo mee Melquisedec je ra. “Ererecua Turã” i chõ nguia “Melquisedec” i mose. “Mbia mingo turãsa nyiese” i abe chõ nguia “Melquisedec” i mose no. “Mbia siqui turã nyiese” i chõ nguia “Salem” i mose no.

3 Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguia Jesucristo rã mbei co. Sã Jesucristo riqui beite sacerdoterã co no.

4 Melquisedec quia rei i tuchi Abraham si. Abraham quiatu ngue el décimo mee nguia ee. Ae emee ee décimo sacua nda.

5 Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no.

6 Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra.

7 Ae bendecir i nae, aque quia rei i tuchi bendecir i ji si.

8 Ae mbia décimo isi isi quia uataque si ã nae, mbiachõ ño ùquĩ nde. Ûquĩ mano arondete. Melquisedec quiatu que mano eã mbei ra.

9 Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. Ûquĩ décimo isi isi raque nguesenda si.

10 Abraham ngue ũquí i ja ra. Eriiriã ndaque nyii, décimo mee mose Melquisedec je.

11 Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. Fnda Jesús tu áte rei. Ae quia ñi tu nguiã sacerdote bei nonde cote. Melquisedec na sí. Aarón na eã.

12 —Sacerdotes ra nyuuru uru eã ngõngue rendaque re cote, i que Dios aque mose cote ra. —Jesús mii nda siqui sacerdoterã mbei cote, i que Dios cote ra.

13-14 Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquiã ndaque sacerdoterã cose. —Ũquí mo sacerdoterã aroneate, i rei que Moisés nyii ra.

15 Sacerdotes cose ndare rã eã ño Dios Jesús mii nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei.

16 Moisés chimbasa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co.

17 Sã Dios ñee ee embesa ji rese no:

Nde quiatu ereico bei nguiã sacerdoterã mbei co.

Melquisedec na si,
sã Dios i ñee ee no.

18 —Sacerdotes ra nyuuru uru eã ngõngue rendaque re cote, i que Dios aque mose cote ra. Ũquí nguiatu ngue mbia mingo aroneate nguiã Dios rese.

19 Moisés chimbasa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote.

20-21 —Sacerdoterã nde, i mose emo je nyii, emo ngue jurar i áte quia ra. Dios Jesús mii mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”,

i que Dios cheẽ huĩ embesa ji rese ra.

22 Ae contrato Dios saã mbia je nyii nae, ũquí contrato que mbia mingo eã Dios rese ra. Ae contrato Dios saã Jesús riĩ namo nae, ũquí nguia rei eturã tuchi nande je namo cote.

23 Sacerdote ñiinda atate que eriqui nyii ra. Nyuuru uru que equia ngõngue mano mose ra.

24 Jesús quia siqui nguiã sacerdoterã mbei co cote. Emo nda chĩ eã mbei euru erendaque re emo mose cote.

25 Ae ra Dios siichã Jesús riĩ nae, ũquí nda Jesús mingo bei tuchi. Jesús quia siqui beite nguiã co, ñee turã sacua Dios je ũquí niĩ.

26 Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicuã aronea tuchi quia ra. Ae quia ibatenda rerecua tuchi riqui nguiã namo co.

27 Jesús quia rei sacerdote rerecua ataque rã eã tuchi. Ũquí nguiatu ticuasú quishĩ quishĩ mbeite nguiã sacrificio raã naa. Dios eicuã mbutiã sacua esi. Mbia abe icuã mbutiã sacua esi. Jesús quiatu ngue ticuasú mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacua. Mbia icuã mbutiã ja sacua ño ngue mano nguiã aque mose.

²⁸ Mbiachō ño ngue sacerdote rerecua ja ñiinda ra. Ũquí ngue mbae turā saã mbei aroneate quia ra. Dios quiatu que Jesús m̃i sacerdoterā mbei cote ra. Ae quia mbae icuā saã jiri jiriā tuchi nguiā.

8

Dios contrato yasu saã Jesús r̃i

¹ Ababi tuchi quia rei Jesús siqui mose sacerdoterā. Sacerdote turā tuchi quia rei ae nande je. Hue eñi ngoi Dios Ibatenda ribisho quti nande je huee.

² Hue eriqui mbae raã naa Dio s chuchua ibatēndaa huee. Dios ae chisaã tuchi chō hue tuchua re. Mbia mo nyisaã eã ño ñene. Nyebe Dios chuchua tuchi chō hue re.

³ Sacerdote rerecua ja chō sacrificio raã naa sacuañe. Nyebe Cristo abe sacrificio saã nguiā umano mose.

⁴ Ae sacrificio Cristo saã nae, ũquí nguiā eturā tuchi sacerdote chisaã si re. Cristo siqui mose íbii, eí nda sacerdote eãte rei ae. Moisés chimbessa cheñ ndui achō ño sacerdotes ibi jenda riqui nguiā sacrificio raã naa ã.

⁵ Ae sacerdotes ibi jenda saã saã nguiā mbae nae, ibei jenda rese aba mundua sacuañe ño ñene. Sã Dios ñee Moisés je Dios chuchua ao nonde no. —Ndeico mose ibi íbatee que sechuchua ibei jenda ateaquicia ndeje, ũquí na si chō sechucharã ibi jenda esaã, i que Dios ñee Moisés je ra.

⁶ Ae contrato Dios saã mbia je nyii nae, mbaranquiatae que ũquí nda. Ae contrato Dios saã nande je namo Jesús r̃i nae, eturā tuchi chō ũquí cote re. — ã tasaã jēje. ã abe tasaã jēje no, i tuchi Dios quia contrato namonda r̃i nande je co.

⁷ Contrato ñiinda mbia mingo bei mose Dios rese, i nda contrato yasu raã eãte rei nande je.

⁸ Dios ia eãte que eriqui mbia aque mosenda rese ra. Sã embessa ji riqui no: ã ño ngue Dios ñee nguiā: Contrato yasu ra asaã je Israel jenda je. Judá jenda je abe no.

⁹ Contrato asaã nguiā ũquí namei je nyii nae, ũquí contrato rã eã nda eyasu asaã cote.

Mbia arao quia Egipto si nae, ũquí mosenda rã eã nda contrato asaã je mbia namondo je.

Mbia cose ndare chō ngue contrato saã iru seje resē. Contrato raande que secheñ mumba mumba chō nda.

Nyebe ũquí asecha chō nguiā, i que Dios ra.

¹⁰ Ae contrato ra asaã je Israel jenda je, ã ndei e ã:

Secheñ nda am̃i tuchi eãquĩ ndese.

Secheñ nda amondo tuchi echiangui re.

Se ra ererecua turā tuchi ee.

Serimba tuchi ra ũquí.

¹¹ Seicua ja tuchi rae. Mbia cuasu ja.

Eñetē abe ja chee.

Seicua ja mose, ũquí mose emo uataque mbaaquiato quiato aroneate ser̃i cote.

Seicua ja tuchi quiato ra aque mose.

¹² ũquí icuā nda ambutiã ja esi.

Atesare; bei ra eicuã si,

i que Dios cheñ huí embessa ji rese ra.

13—Contrato yasu tasaã, i que Dios cote ra. Contrato ñiinda imate quiatu ngue ee re. Mbae ima nda ua ja cote.

9

Cristo rei sacerdote tuchi cote; sacerdotes ñiinda rã eã

1—Ei jenye jenye bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda riĩ ño eriqui nguiã ñee, “sechuchua” i mose.

2Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que huee cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chĩ huee no nda.

3Cortina mbucheseco ji que siqui tuchia ite rĩ nda. Aque quitera quti que cuarto nongue ñi nda. Lugar Santísimo, i que huee cuarto je ra.

4Huee que altar mo ñi oro ao ji ra. Mbae shimbu turã ndei sacuaã. Ira ao ji mbae riru mo abe que chĩ huee ra. Oro quti ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chitchoquia ruri abe que chĩ mbae riru imi ye no nda.

5Angeles raanguia ao ji que chĩ ibate mbae riru arõ nda. Querubines, i que ũquí je ra. Ujeo que embiitee u mbae riru arõ nda. Sacrificio renda rei mbae riru. Ũquí cuartos nyeremo jenda asenei ja aroneate jẽje namo.

6Aque mose que sacerdotes riqui ique ique bei cuarto eiquesa ji ra. Mbae raã naa sacuaã Dios je.

7Cuarto cortina quitera quitinda quiarei mbia mo ique aronea tuchi. Sacerdote rerecua mii ño ngue i que quia huee ra. Ique chiiibe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huĩque mose huee ra. Dios eicua mbutiã sacuaã. Mbia icua abe mbutiã sacuaã.

8Aque mose bei que mbia mo ndiqui ique aroneate Lugar Santísimo nda. Dios riichã tuchi sacuaã. Ũquí ndese Espiritu Turã ndiqui urembiirandute ã.

9Sacerdotes que ticuas u quia iquia tuchi rei quia que mose ra. Ũquí ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue ũquí nda. Ũquí nandeicuate quia ã cote.

10Contrato ñiinda que mbia mingo turã aroneate quia ra. Mbae riĩ achõ ño ngue eriqui nguiã ñee. Mbaeiae riĩ. Mbia chiu riĩ. Mbia chimbei riĩ. Mbia choita riĩ. Ũquí nã ja. Ũquí ñee ndui sí chõ ngue mbia riqui rei nguiã nyii. Cristo tu nonde.

11Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mii ño sacerdote namo cote re. Dios chuchua ibi jenda jje eriqui eã ndaque aa. Ibatenda ye chõ eriqui nguiã mbae raã naa nande je pe.

12Cristo quiatu ngue ticuas u ruqui sii sii eã u nguiã nande je. Chivo ruqui abe. Nguqui ae je chõ ngue nandeicua mbutiã nguiã. Mano mii ngue mbia ja je ra. Mbia mingo bei sacuaã cote.

13Ticuas u ruqui que mbia mbitirõ tirõ ndei quia sacerdote je ra. Chivo ruqui abe. Ticuas u ririĩ ndaque rei ji cusubu abe no.

14Cristo ruqui quia rei equirãcuã tuchi ũquí mbae ruqui si. Cristo ruqui mii nguia rei nandendua nduasa mbitirõ tuchi. Ae ruqui mii nguia rei nandemingo turã Dios reco rese. —Se ae tamano mbia icua mbitirõ sacuaã.

Mbia mbae turã naa naa sacua Dios je cote, i que Cristo mano nda. Mbae icua mo ngue esaã jiri jiriã tuchi ra. Espiritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo erichã tuchi sacua cote. Dios chiirabo siqui tuchi sacua erese Dios cheẽ nguire. Sã Dios ñee ee nyii no. —Jëngo bei ra serese, i ee no. Ae je Dios contrato saã ndei quia nyii nae, ùqui icua nã ngue Cristo mano nda.

¹⁶ Ae contrato Cristo saã nande je nae, testamento chõ ùqui nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote.

¹⁷ Testamento raãsa manoa mose, testamento chõñoño ño aque mose re.

¹⁸ Dios contrato ñiinda raã namo mose que ticuasú iquia quia mbia je ra.

¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara irei je. Ira rãquiã ñetẽ je abe no.

²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacua jëje, i que Moisés ñee mbia je erii rii cote ra.

²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda.

²² Contrato ñiinda mose, mbae ruqui achõ je chõ ngue Dios riqui nguiã mbia icua mbutiã esi. Dios que mbia icua mbutiã choõño eã nda. Mbae quishĩ mose bei quiatu ngue eriqui nguiã mbia icua mbutiã mbei esi.

Cristo m# aba icua mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitirõ sacua nda. Ibatenda quiatu que embitirõ eã mbae ruqui je ra. Cristo ruqui m# je quiatu que ra.

²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee.

²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano m# nda. Nguqui que eichusẽ tuchi nande je ra.

²⁶ Cristo que tu m# ibi ra. Mano m# sacua nande je. Nandeicua mbutiã sacua. Mbae ua serĩ mose que eru mano aa ra. Mano ny#bei ibei eã equia co.

²⁷ Sã mbia riqui mano m# no. Sã Dios riqui ecuata mee aquere no.

²⁸ Eĩ si que Cristo mano aque m# no nda. Mbia icua ja mbutiã sacua esi. Cristo ra tu si ibi emo mose. Aque mose ra manoa mbia icua ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, ùqui mingo bei sacua.

10

¹ Moisés chimbese que mbia mingo turã eã ndaque ra. Mbia mundua ndua sacua Dios ririã mano ndese chõ ngue re. Ticuasú mbia quishĩ ny#bei ibei rei quia nae, ùqui nduqui que mbia mingo turã eã no nda.

² Ũquĩ mbia chiã mbitirõ mbei mose, eĩ nda sacerdotes equishĩ nyĩbeĩ ibei ãte rei. Eĩ nda ticuasú mĩ quishĩ ndei mbia mbitirõ ja sacua. Eĩ nda mbia tesareĩ rei huĩcuã si.

³ Mbía ticuasú quishĩ nyĩbeĩ ibei mose, ũquĩ ngue embutesareĩate huĩcuã si ra. Munduate quiatu que huĩcuã ndese ra.

⁴ Ticuasú ruquí ra mbía icuã mbutiã eã mbei. Chivo ruquí abe no.

⁵ Cristo ruquí mĩ nguiatu mbía icuã mbutiã nguiã esi co. Sã Cristo ñee Dios je síqui mose íbii no:

Ticuasú ruquí mbía mbitirõ eã mbeite quia ndeje co.

Nyebe que serete ereme seje ra.

Se manó sacua mbía icuã nĩ.

⁶ Mbae raaque rei jí abe ndebiãte.

Ticuasú mbía quishĩ quishĩ nguiã huĩcuã nĩ nae, ũquĩ abe ndebiãte no.

⁷ Nyebe ngue acheẽ nguiã ndeje: “Ae ndebite nae, ũquĩ ndese seico sacua ño ngue achu nguiã.

Sã embesa jí ríqui ñee serĩ no, ũquĩ ñee nguire que achu ra”, ae que ndeje ra, í que Cristo ngu je ra.

⁸ Nyebe Dios biãte ríqui nguiã sacrificios. Mbía ticuasú quishĩ quishĩ mose huĩcuã nĩ. Mbae raaque rei jí abe ebiãte no. —Ũquĩ jẽsaã saã, í raque Moisés chimbesa huĩ.

⁹ —Ae ndebite nae, ũquĩ ndese seico sacua ño ngue achu nguiã, sã Cristo í Dios je no. Mbía mbuí sacua sacrificios raã naa sí chõ ngue eru nguiã. Sacrificio mĩ tuchi que esaã u mano mbía icuã nĩ nda. Cristo ruquí mĩ ño mbía icuã mbitirõ mbei nguiã co cote. Sacrificio raã í rocoĩ.

¹⁰ Ae Dios bite nae, ũquĩ ngue Jesucristo saã tuchi u ra. Mano mose mbía ja icuã nĩ. Mano mĩ tuchi que u ra. Nanderirõ mbei que nandeicuã sí cote ra.

¹¹ Sacerdotes ríqui beite raque Dios chuchua ã. Ticuasú equishĩ nyĩbeĩ ibeite raque quia mbía icuã mbutiã sacua ã. Ũquĩ nda mbía icuã mbutiã eã mbei.

¹² Jesucristo quiatu que mano mĩ aque mose bei ra. Mbía icuã ndiquicharõ sacua ño ngue re. Aquere eñĩ ngoi bei Dios ribisho quitĩ nande je hue.

¹³ Pe eñĩ ngoi beite Dios jíi pee. Ererecua tuchi ra Dios rese cote. Uquiracuã nda eteacuquia tuchi chee uquiatoã je cote.

¹⁴ Sacrificio mĩ ngue esaã nda. Aque mĩ sacrificio je que uquiato chiã mbitirõ ja bei ra.

¹⁵ Sã Espíritu Turã abe ríqui ñee ũquĩ no:

¹⁶ Ae contrato ra asaã je judíos je nae, ã ndei e ã:

Secheẽ nda amĩ tuchi echiangui re.

Secheẽ nda amĩ tuchi eãquĩ ndese no.

¹⁷ Atesareĩ bei ra eicuã sí,

í que Espíritu Turã nda.

¹⁸ Dios nandeicuã mbutiã mose, mbae mo nandequishĩ aroneate quia nandeicuã ndiquicharõ ã cote.

Dios nandesichã na

¹⁹ Nande abe quiatu Dios nandesichã tuchi quia cote, Seresenda. Sã sacerdote íque Lugar Santísimo no. Eĩ nande sí quiatu quia síquicheã íque Díosaa. Jesucristo ruquí rĩ nandeique Díosaa.

²⁰ Cristo rete rei cortina mbucheseco jí rã. Cristo rete mano mose, cortina abe que embuí ra. Nyebe nandeico íque arõte Dios rea Lugar Santísimo ã cote. Cose ndare rã eã tuchi chõ cote re.

²¹ Jesucristo mĩ ndei sacerdote tuchi nande je cote. Dios quiato ja je cote.

22 Diósaa ra nandesiquicheã ique oso cote. Nandechiã turã ño nandeico oso Dios rüchã. —Dios ra nandeisi turã, nande chõ nguia nandechiangui re. Cristo quiatu ngue nanderii rii nguã nguqui je nyii. Nandeicuã mbutiã sacuaã nande si. I turã je que nandeirei ra.

23 —Taemingo bei, i que Dios nande je ra. Ñeende ũqui nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, i.

24 Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesequa turã nguia quia nyiese. Mbae turã nandesaã quia bei quiatu quia nandenongue je.

25 Cristo quiato ñumunua nua mose, nandetesareia mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei quia quia bei quia nanderesenda je. Achite quiatu Cristo ñi nguã tu a.

26 —Mbae icuã tasaã, nande i i mose Jesucristo icuare, emo nda manoa nandeicuã ndiquicharõ cote.

27 Ũqui mose, mbae icuã nda nandesaã tuchi. Ũqui mose, nandeso chee ra tata cuásuu no. Huee ra Dios ucuãyãsa nyo ja.

28 Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbã que etiisu isu eã tuchi eiquia ra.

29 Dios riri ucuãyãsa quia ra mbae rasi saã tuchi ũqui si. Cristo ruqui ucuãyãsa abe no. Ae Espiritu Turã isiteã teãte quia nae, ũqui abe no. Cristo ruqui je quiatu ngue Dios ũqui mii ndei nguã icúe.

30 Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũmba je, erimba icuã mose ee, i abe que embesa ji huĩ nda.

31 Ae ra Dios mbasi eicuã ñi nae, mbasi tochi eã ndae. Aba mbusiquiche tuchi chõ ũqui nde.

32 Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jẽĩmbirãcuã mingue que equia aque mose ra. Ũqui ndese jendua jiri ae.

33 Mbã que ñee icuã icuã tuchite quia jemo je ra. Mbã que mbae rasi saanguquia tuchi quia jemo je no nda. Mbã tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra.

34 Jẽya eãte que eriqui mbã tarõ ji rese ra. Mbã jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei.

35 Dios jẽicua bei quiatu quia aque mosenda rã mbei. Ũqui mose ra Dios mbae turã tuchi mee jẽje.

36 Ae Dios bite nae, ũqui ndese bei chõ jẽingo. Ae mbae turã nda Dios mee jẽje nae, ũqui jẽsaarõ arõ mingue chõ nguia cote.

37 Achite Jesucristo ñi tu a.

38 Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra huĩ Dios si nae, Dios ia eã tuchi ra erese.

39 Nande quia ra nandehui eã mbei esi. Ae ra huĩ esi nae, ũqui nda Dios mbutiã. Nande quiatu Dios nandeicua tuchite nguã ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ùquĩ ña? Ae Dios icua nae, ùquĩ nda ñee. —Ucheẽ nguire ra Dios mbae mondo seje, i rae. —Ae asaarõ arõ nguia nae, ùquĩ nda emondo seje ucheẽ nguire no, i ra eno. Mae eã ndaque erese.

² Dios quiato cose ndare que Dios icua tuchi quia ra. Nyebe mbia riqui nguia jirandu jate erese.

³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae si ra. Nyebe Dios embae ofrenda isi turã nguia. —Co eturãte riqui seje co, nyebe Dios i nguia Abel nã. Nyebe mbia riqui nguia jirandu jate Abel rese.

⁵ Enoc que Dios icua ra. Nyebe Dios ererao nguia ibate emano mose rocoĩ. Mbã mbuate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc nã nyii reaẽ.

⁶ Emo Dios icua eã mose, ùquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios riichã mose, Dios turãte ra ee, sã i quiatu no. Aquere quiatu ra Dios eisi turã cote.

⁷ Noé que Dios icua ra. —Ama ndã uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguirĩ mingue sacua eye. Mbã ataque que Dios icua eãte quia ra. Noé mii ño ngue eicua quia ra. Nyebe Dios Noé isi turã nguia.

⁸ Abraham ngue Dios icua ra. Nyebe Dios cheẽ mumbayã nguia. Dios que ñee ee ra. —Eso rã a si. Ibi mo tamee ndeje mambii, i que Dios ee ra. Abraham ngue Dios cheẽ mumbayã oso ra. Ae quiiti esi nae, jirãnuate raque erese nyii.

⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguirĩ ndese. Isaac. Jacob abe no. Ûquĩ je abe que Dios ñee nda. —A ibi tamondo jẽ abe je, i.

¹⁰ Abraham quiatu que Dios icua tuchi quia ra. Nyebe ñee nguia. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra.

¹¹ Abraham ninisi abe que Dios icua ra. Sara, i equia ee. Nyebe que nguiriĩ ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra.

¹² Amei tuchi raque Abraham, Dios eriirina mee mose ee. Mbã tubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quishĩ tubiriãte riqui no.

¹³ Ûquĩ ngue mano ja Dios mbae mondo ja eã mose ee ra. Ae je “co tamondo jẽje” i Dios ee nae, ùquĩ ndurubi quia ño ngue mano nda. —Dios ra emondo ure je uremanonde, i que eyate quia ndua ndua ùquĩ ndese ra. Ûquĩ nguiatu que Dios icuate quia ra. —Nandeico mbirĩ ndaque equia íbii ã. Ibatenda chõ nande re, ite que equia eicua ra.

¹⁴ Emo ñee mose ùquĩ, siqui sete quiatu nguia Dios récuua.

¹⁵ Ûquĩ ndua ndua mose nguecua rese nda nyoi si nyebi re chã ae.

16 —Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ùquĩ ndecua turana quereco co.

17 —Ma Abraham secheẽ mumbayã, i que Dios Abraham nã nda. —Nderiirĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ mã nã.

18 —Isaac nda tiirĩ tuchi ndeje, i rei que Dios ee nyii ra.

19 —Isaac ngue Dios icua tuchite quia ra. —Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiirĩ iquia seri mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde.

20 Isaac que Dios icua ra. Nyebe ñee nguiã nguiirĩ je. —Dios ra mbae turã saã jêje, i que Jacob je ra. Esaú abe je.

21 Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jêje, i que ee ra. Uchitochoquia rese que nyeco rei nyibi ñee turã Dios je ra.

22 José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequiangue abe jendao a si, i que israelitas je ra.

23 Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe.

24 Moisé s abe que Dios icua quia aquere cote ra. Nyebe “Egipto jenda rerecua riirĩ nducucha eã se” i nguiã.

25 “Dios quiato rese taico se. Mbia icua icua ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icua ndese aba oote raque. Aba mbia mbirĩ ño ñene.

26 —Taico chõ Dios rimba rese. Mbia ra sembasi mbasi raque Cristo riĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra.

27 Moisés que Dios icua ra. Nyebe esi nguiã Egipto si. Siquiche ãte ererecua paama i si. Nimbirãcuã turã mbeite que equia ra. Dios rese mae naanguia. Emo mae aroneate raque Dios rese.

28 Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jêiquesa ja jêsii sii. † nda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

29 Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandeso iasa emombita, i rei que Egipto jenda abe ra. I que tuchõ eati eiquia ja ra.

30 Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee.

31 Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ùquĩ ndese. Rahab que Dios quiato isi turã nda. Mbuchemi ngue ererecua icua si ra.

32 ¿Aba riĩ abe ra aba ñee jêje re? Dios quiato tubiriãte quiatu ñene. Ûquĩ asenei ja aroneate jêje. Gedeón. Barac. Sansón. Jefté. David. Samuel. Dios

cheẽ mbuchecuasa ja rĩ.

³³ Ũquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que eteaquiату quiatu bei quia nyacua mbaba mose abe ee ra.

³⁴ Ũquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que eteaquiату quia ũquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacua.

³⁵ Cuaña abe que Dios icuate quia ra. Nyebe Dios eriiri ndaaque mbuquera sí nguiã ee. Emo emo abe que mbae rasi saãte quia Jesús rĩ nda. Hui sereãte quiatu que equia esi ra. —Sã sei quia rei. Dios ra sembuquera si nguiã. Serete mbuchiucuabo turã ndae, i que equia ra.

³⁶ Emo emo ngue ñimbirãcuã nguia mbia iquia iquia chooño mose ee ra. Mbia eiruã nua mose abe no. O cuaacia mose abe no. Utarõ tarõ mose abe no. Hui eã mbei chõ ngue Dios si ra.

³⁷ Emo emo ngue mbia iquia iquia rei sita je no nda. Tiquise je abe que eriqui rei equia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra.

³⁸ Ũquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ũquĩ ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee cote.

⁴⁰ Ũquĩ mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ũquĩ ndese.

12

Jesús mii ndese nandendua ndua

¹ Sã Dios icuasa tubiriãte cose no. Ũquĩ na ño nandeico nande abe Dios icua tuchi. Ae nandembuti mbuti quia Dios si nae, ũquĩ si nandehui. Ae mbae icuã aba mbuchishĩ arõte quia nae, ũquĩ si nandechiucuasẽ ño. Jesús mii ndui chõ nandeico ngata. Nandechimbirãcuã ño nguia siqui erese.

² Jesús mii ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireite raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chĩ nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondochõ eã ngue ra.

⁴ Jesús mii ngue mano mbae icuã ndiquisã quisã sacua mbia si ra. Jẽingo mose mbae icuã ndiquisã quisã, aba mo ngue jẽiquia eãte jẽ nguiatu ra.

⁵ ¿Embesa ji si jêtesarei chõ nde? —Seriirĩte quia jẽ nde, ite Dios quia jêje co. Sã embesa ji riqui ñee ã no:

Seriirĩ, Dios mbae rasi saanguquia mose ndeicuã nii, ereisiteã teächĩ nda jẽ. Dios ñee mose ndeje ndeicuã nii, echeẽ eisi turã ño.

⁶ Ae rese Dios nyesequa nae, mbae rasi ra esaanguquia ee eicuã mose.

Ae Dios isi nguiirina nae, ũquí je ra ñee eicuã ñi,
i que embesa ji huí ñee nda.

⁷ Dios “seriiri” i tuchi quia jêje co. Nyebe eriqui nguiã mbae rasi raanguquia jêje jêicuã mose co. Sã mbia ja riqui nguiiri iruã eicuã mose no.

⁸ Dios mbae rasi raanguquia eã mose jêje, eriiriã nguiatu rei jê.

⁹ Sã nanderu ibi jenda riqui nandeiruã nua nandeñetê mose no. Nandembaaquiatu sacuã. Sã nandeico echeê mumbayã cote no. Eĩ nande sí chõ Paba ibatenda je. Ae cheê nguiatu nandemumbayã tuchi. Ũquí mose ra nandereco siqui turã tuchi.

¹⁰ Sã nanderu ibi jenda riqui nandembaaquiatu jua raque no. Nandeico turã sacuã aa ibii. Dios quiatu nandembaaquiatu turã tuchi nguiã nanderu ibi jenda si co. Nandechiã mbitirõ sacuã ae rã si.

¹¹ Dios mbae rasi saanguquia mose nande je, nandehosei chiãte raque. Erasite quia ñene. Aquere quiatu ra nandechimbitirõ cote. Aque mose quiatu ra nandeya cotê.

Dios cheê nda jêisiteã teãchĩ jê

¹² Jêo tomei jembirãtã jiri ae. Jêtima abe jembirãtã jiri siqui sacuã Dios rese no ae. Jeñimondochoã jiri quia siqui Dios rese ae.

¹³ Jêingo tuchi quiatu quia erese. Ae ndua ata atate quia nae, i nda ũquí abe siqui tuchi chee erese chã.

¹⁴ Jêingo turã mbia ja rese. Dios rã si chõ jêingo. Dios rã si nandeicoã mose, nandemae eã mbei ra erese.

¹⁵ Jenyiteaquiatu turã ño nguia. I nda jemo Dios turã isiteã eã. Emo mbae icuã naa mose jêje, jêtesarei chõ esi. Jendua icuã icuãchĩ nda jenongue rĩ jê. Ũquí mose ra jeñimbiacuã jate.

¹⁶ Jeninisi ae rese chõ jêingo. Jemo nda siquichĩ emo ninisi rese jê. Dios mbae ra jêisiteã teãchĩ jê. Sã Esaú no. Aque que umbae herencia mondo ja chõ soo ñetê ndibishorõ nda.

¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeê mose ra. Nyebe Esaú nyeseo tuchi nguiã cote.

¹⁸ Dios turã tuchi riqui jêje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã i tuchi quia ee aque mose ra.

¹⁹ Trompeta que nyuihui ee no nda. Dios que ñee ee cote ra. Mbia que Dios cheê ñandu sereãte ra.

²⁰ Dios quiatu ngue ñee nguiã nyii: —Emo oco mose sita ibate rese, ũquí jêiquia. Mbae quiaa rinda abe oco mose erese, ũquí abe jêiquia no. Sita je jêiquia. Jeñio no ae, i quiatu que Dios ee nyii ra.

²¹ Aba mbusiquiche tuchi que mae mose ũquí ndese ra. —Aico titi titi i tuchi esi co, i chee que Moisés abe ra.

²² Eĩ jentye eã ño jê nde. Dios jembusiquiche ãte quia jê co. Dios recua jêsiichã tuchi quia jê ã. Dios reco chuchua. Jerusalén naanguia ibatenda jêsiichã tuchi quia jê ã. Angeles tubiriã abe jêsiichã tuchi quia ã no.

²³ Dios icuasa ñiinda abe jêsiichã nguia ã no. Ũquí mbae nombres mbesa ji chi ibate pe. Dios abe jêsiichã nguia ã no. Ae ra Jesús quiatoã icuã tea tea ja emo mose. Mbasi ja rae. Jesús quiato mano je abe chõ jêsiichã ichã nguia ã no. Ũquí ngue Dios mbuturã tuchi cote ra. Eicuã jiri jiriã tuchi chõ cote re.

²⁴ Jesús abe chee jēsichâte quia ã no. Ae ruqui rii ngue Dios contrato yasu raã nande je ra. Ae ruqui rii rii ji jēsichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jêje co. Echeẽ nda jêsiteã teãchĩ jê. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatendã riqui ñee nande je co. Ae cheẽ nandechandu sereã mose, mbae rasi ra esaanguquia tuchi nande je cote.

²⁶ Dios cheẽ mose que íbi nyere nyere aque mose coose ra. —Namo nda íbi ambuchere si no. Íbi mii ño eã nda ambuchere. Ibei abe ra ambuchere no. Aque mii nda ambuchere cote, i Dios quia co.

²⁷ —Aque mii nda mbae ambuchere ja, i Dios quia co. Aque mose ra mbae ua ja Dios chiaio. Ae ra siqui bei, ùquĩ achõ nda ua eã. Mbae ataque ra ua ja aque mose.

²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. Ûquĩ mose ra eya tuchi nanderese.

²⁹ Mbía Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jê. Nyiesenda chõ jê nde.

² Mbía ngaẽ mose jenyuchúaa, jêisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbía mo eriqui rei nguia ee.

³ Etarõ ji rese jêingo ndua. Mbae turã jêsaã saã ño nguia ee. Jêtarõ ji raanguia chõ jê abe erese re. Ae je mbía icuã icuã ndiqui nae, ùquĩ je jêingo turã ño. Sã jê abe jendete riqui no. Sã jê abe jêiruã nua arõte no.

⁴ Emo siqui mose ngüinisi rese, ùquĩ Dios bite. Sã emo ngüinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ùquĩ je. Ae ninisi áte riqui nae, siqui mose emo ndese, Dios ra paam a i tuchi ee no.

⁵ Mbae isiquia rese ra jendua nduachĩ jê. Jembae mii ndese chõ jêya. —Jaendechayã mbei ra se, i quiatu Dios nguia co.

⁶ Ae bei jê. Dios ra nanderechayã mbei. Nyebe nandeico nguia ñee:

Dios riqui beite serese co.

Mbía mo si ra asiquicheã,
nyebe nandeico nguia i ã.

⁷ Jenderequa rese jêingo ndua. Ûquĩ ño ngue Dios cheẽ senei senei jêje ra. Ûquĩ ndiqui Dios icuate ùquĩ. Eĩ jenyé Dios icua jê abe ùquĩ na si. Ûquĩ nguia siqui turãte nguia Dios rese ùquĩ.

⁸ Eĩ mbei chõ Jesucristo re. Cose mosenda bei. Namo abe chee. Eĩ mbei ra ae quia.

⁹ Mbía jembaaquiato ata ata mose, echeẽ si jêhui chõ. Mbía jembaaquiato choõno mose, echeẽ si jêhui chõ no. Ae je mbía riqui mbaeiaie i nande je nae, ùquĩ si nandehui mose, ùquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguia.

¹⁰ Jesús mii ngue mano nande je ra. Sacrificio rei ae mii nande je. Cose ndare rã eã namo cote re. Ticuasú ra mano eã nandeicuã mbutiã sacuí cote. Jesús ruqui mii ño nandeicuã mbutiã nguia co cote.

¹¹ Sacerdote rerecua riqi ticusu ruqui rerao rao Lugar Santísimo aque. Dios mbia icuã mbutiã sacuã esi. Isho jiri sucha cuasu si echoi quia ticusu roo rei rei aque.

¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacuã nguqui je ra.

¹³ Jesús que aba ireingua saã tuchi ra. Nande abe nandesiquicheã nguia tu quia aba ireingua raã erese.

¹⁴ Nanderecua ibi jenda ra ua chõ. Dios ra nanderecuarã mee nande je ibate. Ûqui nguia ra ua eã mbei.

¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqi ñee turã mbei erĩ.

¹⁶ Jẽingo turã ño nguia mbia je. Jembae jemee mee nguia emo je. Ûqui Dios bite.

¹⁷ Jẽingo turã jenderecua je. Echeẽ jemumbayã. Jenderecua riqi jendeaquiatu quiatu Dios je ùqui. —¿Jeteaquiatu turãte equia re? i chee ra Dios ee. Jenderecua cheẽ jemumbayã mose, eyate ra ùqui mose. Echeẽ jemumba mose, eya eãte ra jendese. Jẽ abe ra jẽya eãte no.

¹⁸ Jeñee mbei quia Dios je urerĩ. Ureico turã sete equia mbia ja je ã. Ureico ndua icuã icuã eãte emo ñiã ã no.

¹⁹ Jeñee tuchi quiatu quia serĩ Dios je. 1 nda Dios semondo jei jendea.

Echeẽ hui bei

²⁰ Dios ae aba mombia nguia. Dios ae que Jesús raaque mbuquera si ra. Jesús ruqui rĩ ngue Dios ucheẽ yasu mee nande je ra. Jesús ruqui rĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co.

²¹ Sã Dios riqi jembuquirãcuã tuchi. 1 nda jẽingo bei ae Dios bite ùqui ndese. Sã ae riqi tuchi nandechiangui re. Nandemingo tuchi sacuã ae ebite ùqui ndese. Jesucristo quiatote quiatu nande re. Sã mbia ñee turã mbei quiatu quia erĩ. Amén.

²² Seresenda, aico co mbesa juate jembiiirandu sacuã a. Secheẽ jemĩ tuchi rã jẽaquĩ ndese.

²³ Aico jembiiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea.

²⁴ Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque.

²⁵ Sã Dios siqui turã jẽ ja je. Amén.

LA CARTA DE SANTIAGO

Mbia icúe cúe jenda je Santiago ucheẽ mbesa mondo

¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mii ño aba mbaaquiato nguiã

² Mbae icuã tã i mose jêje, jêya bei chõ nguia, Seresenda.

³ —Ma Dios icua tuchite, i mose mbae mo tã i jêje, jêingo tuchi chõ nguia Dios rese ùqui mose. Jeñimbirãcuã aquiato sacuã.

⁴ Jeñimbirãcuã mbei chõ nguia Dios icua. I nda Dios riqui jembitorõ tirõ mbei jembuch#cuabo mingo. Ûqui mose ra jeturã tuchi cote.

⁵ Jêingo turã aquiatuã mose, jeñee ño Dios je. Jeñimbirãcuã aquiatuã mose, jeñee ño Dios je no. Ae ra jembaaquiato. Ae ñee nguia Dios je nae, ùqui ja je ra mbae mondo tuchi. Ñee asi asi eã nda ee no.

⁶ Jê ache i mose Dios je, “Dios quia ñene”, jenye tuchi quiato quia. —Dios ra emee ãte rei seje, i mose jemo, eicuãte ùqui. Ama ndebera rã ño ùqui nde. Sã quiariã ndiqui ama ndebera rerao turã eã no. Sã eriqui embuchebi chebite no.

⁷ Ama ndebera rã emo siqui mose, Dios ra mbae mee eã ùqui je.

⁸ Emo ndua ata ata mose, mbae mii mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aqae.

¹⁰ Sã Jesús quiato mbaecha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiato eya riqui. Embae ua mose, sã eya riqui ùqui mose abe no. Mbaecha mbae ra siqui bei eã. Sã quiata uti riqui soõ jeite no.

¹¹ Tenda rasi mose ee, quiata ra ñimama. Euti abe ra uqui. Eeturã eã mbei ra cote. Eĩ si ra mbaecha. Umbae tubiriã nyabe chõ nda mano.

Mbae icuã tã i mose nande je

¹² —Ã esaã icuã, i mose emo jêje, jêesaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesequa quia serese nae, ùqui nda amingo bei, i que Dios cose ra.

¹³ —Ã esaã icuã, i mose emo jêje, Dios eã ño ñee nguiã jêje ùqui. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee.

¹⁴ Aba chiangui renda icuã nguiarei mbae icuã osei uquia aba je. Dios eã ñene.

¹⁵ Emo mbae icuã osei mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶ —Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê.

¹⁷ Ae mbae turã tuutu beite quia nande je nae, Dios chimondo chõ ùqui nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no.

Nyasi abe no. Ũquĩ nguia nyiabi abi jiri nguã. Dios quiarei nyiabiã mbei emo mose. Eturã mbei tuchi eriqui co.

¹⁸ Sã Dios riqui seriirĩ i nande je no. Nande echeẽ icua mose nandechiangui re. —Jẽ nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nanderui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiatu quia jẽ. Jendua quiatu quia ñee nonde. Paama jenye jei jei techĩ nguã emo je.

²⁰ Ae Dios bite riqui mbae nae, ũquĩ nandesã aroneate nande paama i mose.

²¹ Ae Dios ucheẽ mondo quia jeñiangui re nae, ũquĩ jẽisi tuchi quiatu quia. Jẽingo mingue chõ nguia Dios cheẽ je jẽ. Aba mingue beisa chõ Dios cheẽ nde. Ae mbae icuã ndese mbia riqui nae, ũquĩ icuã tubiriãte eriqui raque. Ũquĩ si jẽhui tuchi. Mbae icuã ja si jẽhui tuchi.

²² Dios cheẽ nda jeñandu chooñocheẽ jẽ. Echeẽ jemumbayã tuchi quiatu jẽ. Emo Dios cheẽ andu chooño mose, ae sí chõ ñimbirĩ irĩ nguã aque.

²³⁻²⁴ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooñoosa re. Tesarei jei chõ nguã Dios cheẽ si. Echeẽ mumbayã ndocoĩ.

²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ũquĩ ndese ra Dios riqui tuchi echeẽ mumbayã mose. Ũquĩ Dios cheẽ ñandu chooñoate quiatu nguã. Echeẽ emumbayãte quiatu nguã.

²⁶ —Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ũquĩ nde. Ae sí chõ ñimbirĩ irĩ nguã ũquĩ.

²⁷ Ae Dios quiato chooñoa tuchi nae, ũquĩ ndiqui mbae turã naa naa ũquĩ. Ũquĩ ndiqui esi cheecha reaquiature ũquĩ. Ũquĩ ndiqui eru cheecha reaquiature ũquĩ no. Mbae eã mose eru cheecha mbae. Ũquĩ ndiqui ñimbicua icuã eãte mbae icuã mo je ũquĩ.

2

Mbia nandesi turã ja chõ nguia nyiabiã

¹ Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyiabiã.

² Sã mbaecha mo ndiqui ngasẽ jeñimunua mose jẽje no. Huiãro turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no.

³ Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no.

⁴ Eĩ jenye mose, jẽisi turã ja eã ño nguã ũquĩ. Jembuchiabi chõ nguã ũquĩ. Hue rĩ ja eã ño jẽingo nguã mbia cuata mee ũquĩ. Jendua turã eã ñochĩ nguã ũquĩ.

⁵ Secheẽ jeñandu rã, Seresenda. Mbia mbaecha reã ngue Dios irabo ra. Dios icua tuchi sacua. Ũquĩ ndese quiarei Dios o tuchi mbaecha mo si. —Ũquĩ nda siqui tuchi serese se ererecua tuchi mose, i que Dios ñee nyi ra.

⁶ Jẽ ngue mbia mbaecha reã jenguirirõ tuchi ra. Eicuã eãte ũquĩ ndiqui raque jẽje. Mbaecha quiatu eicuãte riqui nguã jẽje. Jembirĩ irĩ ño nguã. Jenderao rao chõ nguã ererecua je, jẽ mbae mo mee mee sacua ee.

7 Mbaecha chõ ñee icuã icuã nguã Cristo riĩ. Nandererecua chõ Cristo resẽ.

8 —Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ ũquĩ nde. Nande ũquĩ ñee mumbayã mose, nandeico turã ndae.

9 Nande mbia mo isi turã mose, emo isi icuã mose, eicuãte ũquĩ. Nande mbia isi chiabi abi mose, Dios cheẽ nandemumba chõ nguã ũquĩ.

10 Dios cheẽ tubiriãte raque nande je echeẽ mumbayã sacua. Nande echeẽ mii mo mumba mose, echeẽ ja mumba raanguia chõ ũquĩ nde. Echeẽ ataque mumbayã ndaque.

11 Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguã ũquĩ. Nandeicoã ndaque emo ninisi rese.

12 Dios cheẽ ngue nandembui mbae icuã si cote ra. Nandechesequa sacua mbia rese. Nyebe nandeico turã mbei chõ nguã mbia je. Dios quiatu ra nandecuata mee tuchi emo mose cote.

13 Ae eya eã eãte riqui emo ndese nae, ũquĩ ndese ra Dios ia eã eã nandecuata mee mose. Nandeya eã mose emo ndese, ũquĩ mose ra Dios nandembasiã.

Nande Dios icua mose, mbae turã abe nandesaã ño nguia

14 Sã emo ndiqui ñee no. —Dios aicuate quia co, i. Ũquĩ mbae turã naa eã mose, ũquĩ nda Dios sirõ eã mbae icuã si. Dios icua chooño ño ñene.

15 Sã Jesús quiato mbaecha reã mo ndiqui ngasẽ jẽje no. Sã eirao eã ndiqui no. Sã echiurã mo eã ndiqui no.

16 Sã jemo ndiqui ñeeño ee no. —Nde ae chõ ndechiurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoi ee. Jeñee iru chooño ño nguã ee ũquĩ.

17 Jẽingo turã eã mose emo je, Dios jẽicua chooño ño nguã ũquĩ. Jẽ Dios jẽicua mose, mbae turã jesaã jiri ae.

18 Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jẽicua mbae turã naa naa eã mose re? Se quiatu mbae turã asaã saã nguã co. Nyebe ra mbia “eriqui Jesús icuate co”, i serii.

19 —Dios mii ño siqui nguã co, jenye chõ nguã ũquĩ. Eturãte raque ũquĩ. Aba checuayã abe riqui ñee ndaque Dios mii nii co no. Siquichete esi ñee ndaque erii.

20 ¿Mbaerã jëracuayã tuchi riqui re? Emo mbae turã naa naa eã mose, Dios icua chooño ño nguã ũquĩ.

21 Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguã.

22 Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeico nguã ñee. “Abraham Dios icuate”, i.

23 Sã embesa ji riqui ñee no:

Abraham ngue Dios icua ra.

Nyebe que Dios eisi turã mbei ra,

i que embesa ji ra. Ũquĩ ngue ique tuchi cote ra. Nyebe “Dios Quiato” i nguã Abraham je.

²⁴ Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã.

²⁵ Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguiã.

²⁶ Sã nanderete no. Umi umi eã mose, “eraaque” i chõ mbia nguiã ùqui je. Ùqui na ño mbia mo ndiqui nguiã ã. Mbae turã naa eã. Nyebe nandeico nguiã “Dios icuayate” i ee ã.

3

Cochee chõ nandechuru nandereco

¹ —Mbia mbaaquiato quiatu sacuaã se, jjenye jaaja techĩ nda equia jẽ! Emo emo mui ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re.

² Dios cheẽ nandechabi chabi chõ nguiã nande ja ã. Emo uchuru rerequia turã mose, nguete ja abe rerequia turã ño nguiã ùqui.

³ Sã nandeico freno mui ticuasú churu rese no. Nandechẽẽ mumbayã sacuaã ño ùqui nde. Sã freno ñetẽ je chõ nandeico ticuasú rete rurucuata nandenduasa quti no. Ticuasú rete cuasute raque.

⁴ Sã lancha cuasute raque no. Sã quiririã quiricuãte riqui raque ee no. Ira ñetẽ je chõ echa riqui nguiã embucuata turã unduasa quti.

⁵ Eĩ ño nandechuru nguiã. Nandechuru mbae saã ata ata chõ nguiã. Eñetẽte raque. Sã tata ñetẽte raque no. Mbae ra esei ja tuchi oso quia.

⁶ Tata rã ño nandechuru re. Nandechuru quiarei mbae icuã ñumumbara raã uquia tuchi nande je. Nandechuru icuã na eãte nanderete resenda mo. Nandechuru chõ nanderete mbaicuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no.

⁷ Sã nandeico quiaa rinda mo mbuseteã arõte raque no. Ae mbebe quia nae, ùqui abe nande mbuseteã arõte raque. Mbei abe nandembuseteã arõte raque. Ae siqui ama ñi nae, ùqui abe nandembuseteã arõte raque no. Ùqui ja que mbia mbuseteã emo mose ra.

⁸ Nandechuru quiatu nandembuseteã aroneate nguiã. Nandechuru icuã nguiatu nandembuquiriri aroneate nguiã. Mbei tasi je rã tuchi chõ nandechuru riqui nguiã nande je ã.

⁹ Nandechuru je nandeico ñee turã ndaque nanderu Dios je. Nandechuru sí je chõ nandeico nguiã ñee icuã mbia Dios chiao je cote. Ae rã sí raque Dios mbia ao.

¹⁰ Nandechuru sí je nandeico ñee turã ndaque. Ñee icuã abe no. Ùqui Dios biãte, Seresenda.

¹¹ Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chí aroneate icua mui ye.

¹² Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeico i turã ndea eã i reẽ mbirõ no. Hue icua mui ye ra eñi ja eã. Eĩ si chõ nandechuru no nde. Nandechẽẽ ñumumbara mose, eicuãte ùqui.

Ae je Dios uaquiato mee nae

¹³ Jemo aquiato mose, sã eriqui mbae turã naa naa mbei. Sã eriqui tochi bei no.

14—Paama jenyechecuyã mose jenyue, jëaquiatu jësaã ñooño ño nguiã ùqui no. Jeñee ñooño ño nguiã ùqui. Dios cheë ndui eã tuchi chõ ùqui nde.

15 Eĩ jenyechecuyã mose jenyue, Dios rã eã ño jë nde. Dios quiatoã nyisaã na ño ùqui nde. Aba checuayã nyisaã na ño ùqui no nde.

16 Mbia ndua eã mose emo ndese, eicuãte ùqui. Mbia paama i checuayã mose nyue, eicuãte ùqui no. Ùqui mose ra mbia siqui turãya nyue. Mbae icuã icuã mbei ra ee.

17 Dios uaquiatu mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesã turã mbei quia cote. Nandendua ata ata eã nda cote. Nandechiã nyecuate ra eriqui mbia je cote.

18 Nande mbia nandemingo turã mose nyiese, nandechiã turã nda nandeico cote.

4

Ae mbae icuã quiatote nae, Dios quiatoã ño ùqui nde

1 ¿Mbaerã ño jëingo nyao nyao nyiese chã? ¿Mbaerã ño jëingo ico icuã icuãte nyue chã? Jeñiangui renda icuã ñi ño ñene. “Se chõ jë”, jenyechecuyã quiatu nguiã mbae icuã osei osei.

2 Jembae eã jenyosei choseichĩ nguiã ã. Jë ererequiayã mbei mose, mbia jëiquia arõ ñochĩ nguiã ã. Mbae jenyosei chosei chõchĩ nguiã ã. Nyebe jëicuã icuã mbeite riqui nguiã jenyue ã. “Embu seje”, jenyechecuyã quiatu nguiã Dios je. Nyebe jëingo nguiã eisiã.

3 “Embu seje”, jenyechecuyã mose Dios je, “embu seje” jenyechecuyã icuã icuã ño nguiã ee ã. Mbae mumba chooño sacuã ño jëingo nguiã “embu seje” i Dios je ã. Nyebe Dios riqui nguiã emee eã jëje.

4 Sã cuña mo ndiqui hui ngu si no. Eĩ jenyechecuyã si chõchĩ nguiã hui hui Dios si ã. Ae Dios biãte nae, jë ùqui osei osei mose, Dios quiato aronea ño jë cote re. ¿Mañi jenyechecuyã ùqui icuayãte re?

5 Sã embesa ji riqui ñee ñooño ãte no: Espiritu Turã Dios mee nguiã nandechiangui re nae, aque riqui ngueteãte nanderese co.

Nandeico sacuã Dios mi ndese, i que embesa ji ra.

6 Dios turã i ite riqui nande je co. Sã embesa ji riqui ñee no: Ae ucua saã saã nguiã nae, Dios riqui ùqui ndiquisãte co. Ae siqui tochte quia nae, ùqui je quiatu Dios turã i ite riqui nguiã co, i que embesa ji ra.

7 Jëingo tochi chõ nguiã Dios je. Aba checuayã jëisiquisã ño nguiã jenyesei. Ùqui mose ra uchã jësi cote.

8 Dios jësi chã tuchi quiatu quia. Ùqui mose ra Dios abe jendichã tuchi. Jëingo mose mbae icuã ndese, jëhui chõ esi. Jendua ata ata mose, jeñia jembitorõ ño.

9 ¿Mbaerã jëingo iquia iquia mbae icuã naa mose re? ¿Mbaerã jëyate riqui mbae icuã naa mose re no? Jenyeseo quiatu quia jëicuã ñi. Jëya eã nguiatu quia jëicuã ndese no ae.

10 Jëingo tochi chõ nguiã Cristo je. Aquere quia ra ae jëturã mbuchecua mbia je cote.

Nandechiã icuã eã emo ñi

11 Jeñee icuãchĩ nda emo ñi, Seresenda. Dios cheë mumba chõ ùqui nde. —Jenyeseo chõ nguiã jenyeseo, i que Dios ra. Jë Dios cheë mumba mose,

“Dios cheẽ icuã” i raanguia chõ ùquĩ nde. “Dios cheẽ icuã” jenyechĩ nda echeẽ mumbayã ndocoĩ jẽ.

¹² Dios ae chõ mbia cuata mee nguiã co. Dios miĩ ño ucheẽ mondo nguiã nande je. Nande echeẽ mumbayã sacuã. Dios ae chõ aba rirõ nguiã aba icuã si. Dios ae chõ nda aba mondo tata cuásuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³ Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacuã icua. Tenda nongue mose ra achube, i no. Ndua rane eã Dios rese.

¹⁴ Ûquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no.

¹⁵ —Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ùquĩ mose quiatu mbae tasaã, nande quiatu quia.

¹⁶ ¿Mbaerã jẽingo tesarei Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguiã ùquĩ. Eicuãte ùquĩ.

¹⁷ Ae mbae turã icuate quia nae, sã ùquĩ ndiqui mbae turã naa mbei. Mbae turã naa eã mose, eicuãte ùquĩ cote. Dios biãte ùquĩ cote.

5

Santiago ñee asi mbaecha je

¹ Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia.

² Jembae ra ua ja tuchi cote. Chicuaquiariĩ nda jẽirao ua tuchi.

³ Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguiã ndua. Dios rese ndua rocoĩ. Mbae isiquia jemunua nua tuchi chõ nguiã Dios jembasi sacuã ã cote.

⁴ Mbia que quiei quiei rei quia jẽje resẽ. Mbae que jemondo turã turãya nguia jembae ishao shaosa je resẽ. Ûquĩ Dios mbiirandu raanguia chõ nguiã jeni. Nyebe ra Dios jembasi uquirãcuã je.

⁵ Sã ticuas riqui quiaru bei ñimbuquira no. Eiquia nonde. Eĩ ño jẽ nde, mbaecha. Jembi rese chõ ngue jẽingo bei quia ra. Jẽquiaru chooño mbei que equia ra. Síqui rocoĩ Dios rese. Nyebe ra Dios jembasi cote.

⁶ Jẽ ngue mbia turã jembasi mbasi quia ra. Jẽ ngue mbia turã jẽiquia iquia quia no nda. Mbae icuã mo esaã eãte raque jẽje. Nyebe ra Dios paama i tuchi jẽje, mbaecha.

Jesucristo jẽsaarõ arõ mingue chõ nguia

⁷ Jesucristo ra tube íbii, Seresenda. Jẽsaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua ucua nonde.

⁸ Eĩ jenye chõ nguia Jesucristo raarõ arõ mingue jẽ abe. Jeñimbirãcuã ño nguia Jesucristo raarõ arõ. Achite eñi tu a cote.

⁹ Jeñee icuã icuãchĩ nda jenyue, Seresenda. Ûquĩ mose ra Dios jembasi. Namó jiri ra Dios mbia icuã mbasi.

¹⁰ Jeñimbirãcuã mingue chõ nguia. Sã Dios cheẽ mbuchecuasa mbia cose ndare no. Sã ñimbirãcuã mingue mbia icuã mose ee no.

¹¹ Ae ñimbirãcuã mingue quia nae, ùquĩ je chõ Dios turã ndiqui nguiã. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. Ûquĩ jëicuate quia ã. Eĩ si chõ Dios turã tuchi nguiã mbia je co.

¹² ã abe jeñandu tuchi. Jeñee ñooñochĩ nda jë. Jurar jenyechĩ nda emo mose jë. Ibatenda riĩ. Ibi jenda mo nũ abe no. Mbae ja mo nũ nda jurar jenye jirichĩ jë. Eno jenye mose, ùquĩ mũ mbei chõ jeñee. Tei jenye mose, ùquĩ mũ mbei chõ jeñee no. Eĩ jenye mose ra Dios ñee asiã jëje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no.

¹⁴ Jemo ndasi mose, sã “jenyu” i Jesús quiato rerecua je. Sã ùquĩ ñee Dios je erasi riĩ cote. Sã mbae quira mo quti erasi ãquĩ ndese Jesús riĩ.

¹⁵ —Jesús ra embucherõ, i mose uchiangui re ñee mose Jesús je, mbucherõ ndae. Erasi mbae icuã naa mose nyii, ùquĩ nda embutiã esi no.

¹⁶ —Mbae icuã ngue asaã eã nda, jenyechĩ nda jë. —Mbae icuã ngue asaã nda, jenye quiatu quia jenyue. Jeñee quiatu quia Dios je jenongue riĩ. Ûquĩ mose ra Dios jembucherõ. Emo turã mõ ñee tuchi mose Dios je, Dios ra mbae turã saã tuchi ee.

¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra.

¹⁸ Aquere que Elías ñee Dios je cote ra. Ama mbuchaaqui sacua cote. Aque mose que nyaaqui cote ra. Mbae que suri ja cote ra. Mbae ia ja chee no.

¹⁹ Emo icha mose Dios si, sã enongue embuchebibe mingo Dios rui sí.

²⁰ Nde mbia mo mbui mose huicuã si, eresiquisã quisã ño nguiã eso eã sacua tata cuásuu ùquĩ. Dios ra eicuã mbutiã esi cote.

PRIMERA CARTA DEL APOSTOL SAN PEDRO

Pedro ucheẽ mbesa mondo Jesús quiato ishonda jaaaja je

1 Pedro chõ se re. Jesucristo chimbaaquiato chõ se re. Aico ã mbesa jêje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jê ja je aico ã mbesa a.

2 Dios que jêirabo umbaerã nyii jeã mose ra. Espíritu Turã ngue jemii icúe Dios mbaerã cote ra. Jê echeẽ mumbayã sacua. Jesucristo ruqui jembitorõ sacua abe jêicuã si no. Sã Dios riqui turã i i tuchi jendese. Sã eriqui jembia i i tuchi no.

Dios ra mbae turã mee ja nande je

3 Nandechẽ turã mbei quia Dios rii. Jesu cristo rute quia ae re. Ae que eya eãte riqui nanderese ra. Nyebe nandeisi nguiã mbiasu nguiirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeico nguiã ñee ã. “Dios cheẽ nda io turã ja nande je”, i ã.

4 Dios ra nandemingo bei. Eriirite quia nande re. Nyebe ra mbae mee ja nande je nandeico mose ibate. Mbae icua ndese ra nandemae eã tuchi aque mose cote.

5 Jêingo Dios icuate ùqui. Nyebe ae riqui nguiã jendeaquiato tuchi uquirãcuã je co. Dios que mbae mbuquiche ja nande je ra. Nandererao sacua ibate. Mbae ua ja mose ra nandererao ja ibate cote. Co eriqui raã nguiã nandereaquiato co.

6 Nyebe jêyate riqui nguiã ùqui. Mbae rasi tu mbirĩ arõte raque jêje.

7 Sã mbia riqui oro mbuchi no. Equia rirõ sacua esi. Eĩ ño Dios nguiã jêje co no. Jê Dios icua tuchi sacua ño mbae rasi riqui re. Nyebe Dios jêicuã. Mbae rasi raã naa ndaque. Etura tuchi chõ ùqui oro si re. Oro quia ra ua emo mose. Jê nguia ra jêhua eã mbei Dios icua mose. Jesucristo tu mose nda Dios ñee turã tuchi jenii ña.

8 Jêingo nyesequate Jesucristo rese ùqui. Jemae eãte raque quia erese ùqui. Jêingo eicuate jeñiangui re ùqui. Jêya tuchite riqui erese ùqui.

9 Jêingo Jesucristo icuate ùqui. Nyebe ra Dios jêaĩ mingõ turã mbei cote.

10 Sã Dios cheẽ mbuchecuaasa ñee cose no. —Mbia ra mae jee Dios turã ndese, i que ñee nda. Nanderii ño ngue eriqui nguiã ñee. —Mañi nda Dios quia reae. Utura je ra mbia mingõ bei reae, i que Dios cheẽ mbuchecuaasa ndua ndua cose ra.

11 Espíritu Turã ngue siqui quia Dios cheẽ mbuchecuaasa chiangui re ra. Mbirandu randu que equia Cristo rii nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espíritu Turã Dios cheẽ mbuchecuaasa mbiirandu nyii ra. —Manosete ra ùqui ndeae. Aba rii eriqui “Cristo” i remi, i tuchi que Dios cheẽ mbuchecuaasa quia ndua ndua ra.

Dios que jemii icúe umbaerã nda

12 Dios que embiirandu ra. —Jê jêtiamba quiato ra Cristo mbae rasi saã mbia mingõ bei sacua. Jêtiamba quiato ra Cristo mbae rasi saã mbia namonda je. Mbia emo mosenda je, i que Dios ra. Nanderii ño ngue eriqui nguiã “namonda” i. Nyebe mbia riqui nguiã ùqui ja renei nenei jêje Cristo rii cote.

Espíritu Turã abe riqui erenei nenei jêje co cote. Angeles abe ùquĩ icua sete raque quia Cristo rĩ ùquĩ.

¹³ Jendua tuchi rã nguia mbae raã nonde. Jêtesa bei quiatu quia. Jesucristo tu mose, eturã tuchi ra ae jêje aque mose. Ûquĩ ndese quia jêingo bei tesa eraarõ.

¹⁴ Ae jenyosei chosei quia nyii nae, Dios icuayã mose nyii nae, ùquĩ ndese jêingo ndua eã cote. Dios cheẽ jemumba eã ño nguia cote.

¹⁵ Dios quiarei jemingo icúe umbaerã tuchi. Nyebe jêingo turã tuchi ae rã si.

¹⁶ Sã Dios cheẽ mbesa ji riqui no: —Jêturã ño jêingo se rã si, i ñi embesa ji re.

¹⁷ Ûquĩ jêingo “Paba” i Dios je ùquĩ. Nyebe jêingo ireĩ ireĩ jiri esi jêingo mose bii. Dios ra mae nandechiao ja ja rese. Emo chiao rese ra mae eã eã.

¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ùquĩ si cote ra. Dios que mbae isiquia mondo eã nanderirõ sacua nandeicua si ra. Oro que emondo eã no nda. Plata abe no.

¹⁹ Cristo ruqui quiatu ngue nanderirõ nguia nandeicua si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote ovêja turã ño icua no.

²⁰ —Cristo ra mano mbia icua ndiquicharõ, i que Dios nyii mbae ao nonde ra. Namõ ño ùquĩ io nguia jêje cote. Namõ ño Cristo mano nguia jêje cote.

²¹ Cristo chõ Dios icua uquia nguia jêje ùquĩ. Dios chõ ngue Cristo raaque mbuquera nguia. Dios chõ uquiracua mee nguia Cristo je. Nyebe jêingo nguia Dios icua ùquĩ cote. Nyebe jêingo nguia ñee. “Dios ra nandemingo bei ibate” i ùquĩ.

²² Dios cheẽ jêisi turã mingo ùquĩ cote. Nyebe jeñia mbitirõ nguia mbushĩ cote. Nyebe jêingo nguia nyesecua arõte mbia rese cote. Jenyesecua tuchi quiatu quia jenyese jê. Nandechiangui re chõ nandeco nyesecua tuchi mbia rese jê.

²³ Nyaacuquia si je raanguia chõ jê cote re. Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguia. Echeẽ nda ua eã bei. Siqui bei rae.

²⁴ Sã embesa ji riqui ñee no:

Quiata rã tuchi chõ mbia ja riqui nguia ã.

Sã quiata riqui mano jeite no.

Quiata uti rã ño mbia riqui nguia ã no.

Eturã mbirĩ ño chĩ ndaque nyii.

Aquere chõ ñimama cote. Mano cote.

²⁵ Dios cheẽ nguia ra ua eã mbei,

i que embesa ji ra. Dios cheẽ sí chõ ngue jeñandu nguia Jesucristo rĩ. Jemingo bei sacua.

2

Jêo tuchi chõ nguia Dios cheẽ ndese

¹ Nyebe jêhui mbae icua ja si. Jê nda mbia jembiirĩ irĩchĩ nguia jê. Jenguasu ra jêsãã saãchĩ. Emo mbae ra jenyosei choseichĩ nguia jê. Jeñee icua icuãchĩ nda equia emo ñi jê.

² Sã ãquẽ itãqueĩ ndiqui uchũ achã asite no. Eĩ jenyẽ bei chõ nguia oo Dios cheẽ ndese. Eĩ nda jẽquirãcuã tuchi riqui Dios rese. Sã ãquẽ quirãcuã ndiqui quiambure no.

³ Dios turã ngue jẽsaã ndei resẽ.

Sita turã na ño Cristo re

⁴ Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguã Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jẽsichã i tuchi quiatu quia jẽ.

⁵ Sita turã na ño jẽingo nguã jẽ abe ùquĩ. Sã Dios chuchua ao ji sita turã je no. Dios chuchua ao ji rã ño jẽ no nde. Jeñee turã mbei quiatu quia Dios je. Jẽ sí chõ jendete jemondo quia ee. Jẽingo bei quiatu quia icúe embaerã. Ùquĩ mose ra Dios jẽisi turã mbei Jesucristo riĩ cote.

⁶ Nyebe Dios cheẽ mbesa ji riqui nguã ñee:

Jesucristo ra amĩ Zión.

Tuchia i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo,

i que embesa ji ra.

⁷ Sã mbia mo tuchia ao sita turã je no. Ùquĩ sita turã na ño Jesucristo riqui nguã co. Ùquĩ jẽingo Jesucristo icuate ùquĩ. Nyebe jengueteamba tuchi ae riqui nguã co. Ae Jesucristo icua eãte quia nae, ùquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchia aosa quirirõ sita nae, aque quia ra tuchia i turã tuchi cote,

i que embesa ji ra.

⁸ Sã embesa ji riqui ñee no:

Sã sita riqui pãtã i emo cúi je no jẽ.

Embucoi no jẽ,

i que embesa ji ra. Eĩ si chõ nda mbia pãtã i raanguia Jesucristo cheẽ je.

Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹ Dios que jẽirabo umbaerã tuchi ra. Sacerdotes rã ño jẽingo nguã Dios je ùquĩ. Dios que jemingo icúe umbaerã nda. Jẽ mbia mbiirandu randu bei sacua Dios chiao turã ñũ. Ae quiatu que jendirõ itondaru si ra. Jẽingo sacua nyaashĩ Dios rese cote.

¹⁰ Mbia chĩmbutereãte que jẽ nyii ra. Dios quiato tuchi chõ namo jẽ cote re. Emo ngue ndua eãte quia jendese nyii ra. Dios quia ndua tuchi nguã jendese co cote.

Dios rimba chõ jẽ nde; nyebe jẽingo turã

¹¹ Achesequa tuchite quia jendese co. Isho ishote jẽingo jendecua si ùquĩ. Ae mbia chosei chosei quia mbae icua nae, ùquĩ ndese ra jemae maechĩ. Eicuaite riqui nandeaĩ je ùquĩ.

¹² Ae Dios icua eãte quia nae, ùquĩ ndesaa jẽingo turã ño nguia. Ùquĩ ndiqui ñee icua icuaite raque jeni ùquĩ. Jẽicua mose rocoĩ. Ùquĩ nda mae jee jeturã ndese. Ñee turã jee ra Dios riĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no.

¹⁴ Sã ererecua tuchi riqui mbia rerecuarã mi jaaja no. Mbia icuã mbasi mbasi sacuã. Mbia turã ndeaquiatu sacuã abe no. Uqui ñee abe jemumbayã ño nguia no.

¹⁵ Jẽingo turã ño nguia jẽ. Jẽingo turã mose ra mbia aquiatuã ñee icuã aroneate jẽje. Dios bite uqui.

¹⁶ Jesucristo que jembui mbae ja si cote ra. Jenderecua eãte raque mbae mo cote. —Mbae icuã tasaã. Sererecua eãte rei ñene, jenyechĩ ndae. Dios rimba chõ jẽingo.

¹⁷ Jẽingo turã ño nguia mbia ja je. Jenyescua chõ nguia jendesenda Jesús quiato rese. Jẽireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jẽingo ñimbirãcuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jẽ. Jẽireĩ ireĩ jiri quia esi jẽ. Jenderecua icuã mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguia jẽje co.

¹⁹ Mbia icuã icuã ñooño mose nande je, nanderoseĩ nguiatu chõ nandeico. Dios bite uqui. Dios rĩ nanderoseĩ nguiatu mose, ebite uqui.

²⁰ Mbae turã jẽsaã saã mbei chõ nguia. Mbia jẽiruã nua mose jẽturã ni, jendoseĩ nguiatu chõ jẽingo. Uqui mose ra Dios ia tuchi jendese. Mbae icuã mo nda jẽsaãchĩ. Jẽ mbae icuã naa mose, Dios biãte uqui. Mbia jẽirua nua mose jẽicuã ni, jendoseĩ nguiatu raque rae, Dios biãte uqui. Jẽicuã ni ño ñene.

²¹ Nyebe Dios “jẽingo serui”, i nguia nande je. Sã Cristo roseĩ nguiatu tuchi mbae rasi raã mose nande je no. Nande abe nanderoseĩ nguiatu sacuã eraã si.

²² Cristo que mbae icuã mo saã eã tuchi ra. Mbia mo ngue embiri iriã tuchi quia ra.

²³ Mbia ñee icuã mose Cristo je, ae que ñee icuã eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra.

²⁴ Jesús mano mose ira mbuchicundasa ji rese, nandeicuã ndiquicharõ ño ngue mano nguia. Eraaque rã nandeico sacuã mbae icuã je chõ ngue re. Nandeico sacuã mbae turã ndese chõ ngue re. Cristo mbae rasi raã mose, jembitorõ sacuã ño uqui nde.

²⁵ Ovejas quiachã je rã ño ngue jẽingo nguia nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguia jẽje co cote. Ae chõ jendeaquiatu nguia co.

3

Jendu cheẽ jemumbayã ño nguia, i cuña je

¹ Mbia ninisi je tacheẽ cote. Jendu cheẽ nda jemumbachĩ jẽ. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jẽingo turã mose ee. Jẽ Jesús cheẽ nenei neneinde rocoĩ ee. Jesús nda eicua cote chã.

² Jẽingo turã ndese ra jendu mae nyee. Echeẽ jemumbayã mose.

3 —Mbae je nda serete ambarõ na ña, jenyechĩ nda ndua ndua jẽ. Jẽo resenda rese. Jẽhui rese abe no. Tiru turã ndese abe no. Jẽa uma ji turã ndese abe no. Ũquí mĩ ndese chõ nda jẽingochĩ ndua beite jẽ.

4 Jeñiangui re quiatu jẽingo turã. Jẽingo tochi chõ nguia. † nda jẽturã ua eã mbei jẽsi. Ũquí nguiatu Dios bite re.

5 Sã cuña mo no. Dios quiato cose no. Ũquí nguiatu que eturãte riqui uchiangui re quiatu ra. Ngu cheẽ abe mumbayã no. Ndua rocoĩ nguete resenda umbarõsa rese.

6 Sã Sara Abraham ñee mumbayã no. Sererecua i ee. Jẽingo turã mose, Sara rã nda jẽ cote. Mbae mo si ra jẽsiquichechĩ cote jẽ.

Jẽingo turã ño nguia jeninisi je

7 Tacheẽ eninisi rerecua je cote. Jẽaquiato chõ jẽingo turã jeninisi je. Jeninisi jemingo turã. Jẽingo tochi chõ nguia ee. Jẽ nguia jeatã jiri esi re. Dios quia eturãte jẽ ja je re. Jeninisi rese. Dios que jendeco mingo nyiese ra. Jeninisi rese. Nyebe jẽingo nguia siqui turã jeninisi je. Ũquí mose ra Dios jeñee andu bei, jeñee mose ee.

Mbia icuã icuã mose jẽje jẽturã mose, jẽya chõ jẽingo

8 Jẽingo turã ja chõ nguia jenyue no. Jẽya eã jiri jẽingo jenyiese no. Hue rĩ ja chõ jẽingo ndua ja. Jenyesequa ja chõ nguia nyiese. Jẽseteã ño jẽingo nyue.

9 Mbia icuã mose jẽje, jẽicuãchĩ nda jẽ abe ee. Mbia ñee icuã mose jẽje, jeñee icuãchĩ nda jẽ abe ee. Jeñee turã nguiatu quia ee jẽ. Jẽingo serui, i chõ ngue Dios jẽje re. Dios ñee turã mbei sacuã jeni ño ngue re.

10 Sã embesa ji riqui ñee no:

Jẽingo turãse mose, jeñee icuã eã emo nĩ.

Jẽingo chooño sereã mose, jeñee ñooño eã emo je no.

11 Jenyicusã ño nguia mbae icuã si.

Mbae turã ño jẽsaã nguia.

Jẽturã ño nguia mbia ja je jẽ.

12 Ae siqui turã nguia nae, ũquí Dios teaquiato bei quia co.

Ũquí ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ũquí nde, i que embesa ji ra.

13 Jẽingo turã mose ¿mañi nda emo mbae icuã naa jẽje re?

14 Mbia icuã icuã mose jẽje mbae turã naa mose, jẽya tuchi chõ ũquí mose re. —Mbae icuã nda asaã ndeje jẽ, i mose jẽje, jẽsiquicheã ño esi.

15 Jesucristo jemingo tuchi chõ nguia jeñiangui re jenderecuarã. Emo ñee mose jẽje, jeñee aquiato chõ ee. —¿Mbaerã ereico Jesucristo rese re? i mose emo jẽje, jeñee aquiato chõ ee. Jẽingo mingue chõ ee.

16 Jẽingo turã mbei. Diosbi rese jẽingo bei. † nda jẽya bei riqui. † nda “mbae turã asaã eã ñochĩ”, jenyee eã. Ae ñee icuã icuã nguia jeni nae, ũquí nda ireĩ ireite quia ucheẽ icuã si cote. Ireĩ ireĩ nda jẽingo turã mose Cristo rese.

17 Mbae rasi jẽsaã mose jẽturã nĩ, ũquí nguiarei Diosbi tuchi. Mbae rasi jẽsaã mose jẽicuã nĩ, ũquí nguiarei Dios biã tuchi. Mbae icuã nĩte quia ñene.

18 Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nande icuã ndiquicharõ nda. Nandemingo sacuã Dios rese. Cristo rete que mano nda. Espiritu Turã ngue embuquera si ra.

19 Aque mose que Cristo si Dios cheẽ nenei nenei mbia aĩ tarõ ji je ra.

²⁰ Ũquĩ ngue Dios cheẽ mumba mumba quia nyii ra. Noé Dios cheẽ nenei nenei mose ee. Dios roseĩ nguiátu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia miite ique arca ye ra. Ocho que mbia ra. Siqui bei sacua ama ndicuasu mose.

²¹ Sã ama Noé mumbebi mingo no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios nandemingo bei cote. Bautismo tuchi chõ ũquĩ nde.

²² Jesucristo quera sire que esi ibate ra. Hue eriqui beite Dios jii hue cote. Mbae ja rerecua tuchi chõ ae cote re. Angeles rerecua. Ibatenda rerecua ja.

4

Mbae jësaã turã ja

¹ Sã Cristo mbae rasi saã tuchi siqui mose íbii no. Eĩ jenye si chõ nguia ñimbirãcuã nguiátu mbae rasi raã mose. Ae mbae rasi saã tuchi quia nae, ũquĩ nda mbae icuã saã eã mbei cote.

² Ae Dios bite nae, ũquĩ ndese ra eriqui bei cote. Ae echoseite quia nae, ũquĩ naa ndocoi.

³ Mbia ataque rã tuchi que nandeico nyii ra. Nandeicuã tuchite que eriqui nyii ra. Ae nandehosei quia nae, ũquĩ ndese achõ ño ngue nandeico nyii ra. Nandequiacua quiacua que equia nyii ra. Nandechimbusarei choõno mbei que equia nyii ra. Dios abareã ndese que nandeico ndua tuchi nyii ra. Huee chõ cote. Nandehui que ũquĩ ja si cote ra.

⁴ —¿Mbaerã jëingo bei eã mbae icuã naa naa urerese re? i nanderesenda ñiinda quia nande je ã. Nyebe eriqui nguiã ñee icuã icuãte nande je ã.

⁵ —¿Mbaerã ũquĩ jësaã nde? i chee ra Dios ũquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja.

⁶ Ae mano mbia nyii nae, ũquĩ je que Jesucristo Dios cheẽ nenei nenei nda. Eaĩ siqui turã sacua Dios rã si. Erete mano ndaque huicua je.

⁷ Achite mbae ñi ua ja a cote. Nyebe jëingo mbae turã naa naa ja bei. Nyebe jëingo ñee ñee mbei Dios je.

⁸ Jenyesequa tuchi quiatu quia jenyese. Ũquĩ mose ra jëtesarei jenongue icuã si.

⁹ Jenongue jëisi turã ño nguia nyoĩ mose jenyuchua. Jëya chõ jëingo eisi mose.

¹⁰ Dios que nandechisaã saana mee nande ae ae je ra. Ũquĩ jësaã turã turã ño nguia jëataque je. Dios uaquiatu mee mose jëje mbae mo naa sacua, ũquĩ jësaã turã turã ño nguia jëataque je.

¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quirãcuã ñii. Ae jësaã saã nguia mbae nae, Dios je chõ jësaã. f nda mbia ñee turã mbei Dios rĩ. Jesucristo rĩ abe no. Sã mbia ñee turã mbei Dios rĩ. Amén.

Mbae icuã tuutu mose jëje, jëya cho jëingo

¹² Mbae icuã tuutu mose jëje, “¿mbaerã eriqui seje re?” jenyechĩ nda nyuruiate, Seresenda. Eĩ mbei chõ mbae icuã nguiã tuutu Jesús quiato je.

¹³ Mbae icuã tuutu mose jëje, jëya chõ jëingo. “Cristo rã si chõ nandeico nguiã mbae rasi raã”, jenye chõ nguia ñimbria. Cristo nininya tu mose, aque mose abe nda jëya tuchi chã.

¹⁴ Mbia ñee icuã icuã mose jêje Cristo riĩ, coche ñene. Jêya chõ jêingo. Espíritu Turã ño jêichu ichu nguiã ùquĩ.

¹⁵ Mbia jembaasi asi chooño mose Cristo riĩ, jêya chõ jêingo. Jêicuã ñi mbia jembaasi asi mose, ùquĩ nguiatu aba ireĩte re. Jê mbia mo iquia mose. Jê mbae mo mbuquiachã mose. Jê mbia mo mbupaama i mose. Jê ùquĩ icuã mo naa mose, aba ireĩte ùquĩ.

¹⁶ Mbia jembaasi asi mose Cristo riĩ, jêireĩ ireĩchĩ nda ùquĩ mose. Cristo resendate quia jê nde. Nyebe jêya chõ jêingo.

¹⁷ Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandechisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Ùquĩ nguiatu ra embasi tuchi nandesĩ quiatu. Dios cheẽ turã nguiatu ngue eisiãchĩ nguiã.

¹⁸ Dios quiato riqui ñimbirãcuãyã arõ arõte mbae icuã tuutu bei mose ee ã. Dios quiatote raque. Dios quiatoã nguiatu ra ñimbirãcuãyã tuchi mbae icuã si. Dios ra emondo chee tata cuasu.

¹⁹ “Mbae rasi jêsaã”, i mose Dios nande je, nandesaã turã ño nguia ee. Mbae turã nandesaã i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

5

Jesús quiato jêteaquiato turã ño nguia

¹ Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote.

² Ae Jesús quiato siqui quia jendese nae, ùquĩ jêteaquiato turã nguia. Sã ovejas raarõsa riqui ovejas raarõ turã no. Eĩ jenyee chõ nguia Jesús quiato raarõ. Jêtea teã eã ño nguia mbia mbaaquiato quiatu. Jendua ndua eã ño nguia mbae isiquia rese.

³ Jêingo tochi chõ nguia Jesús quiato chimunua nua je. Mbiacha ra jêsaã saã techĩ ee jê. Jêingo turã ño nguia eresa rae. † nda jê na sí eriqui.

⁴ Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jêje premio. Ùquĩ nda ua eã mbei.

⁵ Acuanindu je tacheẽ cote. Amei ñee jemumbayã ño nguia jê. Jê ja jêataque cheẽ jemumbayã ño nguia jê. Jêingo tochi ja chõ nguia jenyue jê. Sã embesa ji riqui ñee no:

Ae ucuasu saã saã nguia nae, Dios biã tuchi chõ ùquĩ nde.

Ae siqui tochi quia nae, ùquĩ je quiatu ra Dios turã mbei riqui, i que embesa ji ra.

⁶ Jêingo tochi chõ nguia Dios je jê. Equirãcuã tuchi chõ ae re. Ae ra mbia mumae turã nyee jendese emo mose cote.

⁷ Jendua ndua ia eã si jêhui chõ. Jemee ño Dios je. Ae riqui ndua beite jendese co. Jendeaquiato beite quia co.

⁸ Jeñimbaaracua chõ nguia jê. Jêtesa bei chõ nguia jê. Aba checuayã nderecua riqui ngata beite co jê. “Mbia tambicuã icuã”, i beite equia co. Sã nyacua no. Sã nyacua risha riqui ureĩ mbocheite “mbae tau” i no.

⁹ Aba checuayã nderecua jêsisquisã ño nguia jenyese. Dios jêicuua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jê na si no.

¹⁰ Sã Dios turãte riqi nande je no. Mbae rasi ra jẽsaã ndaque nyii. Aquere ra Dios jembitirõ cote. Jembirãcuã tuchi cote. Dios sí chõ ngue ñee nguiã nande je. “Taemingo bei serese ibate Jesucristo rĩ”, i nguiã nande je.

¹¹ Dios quiarei equirãcuã mbei. Eturã mbei. Amén.

Pedro ñee hui bei sacua cote

¹² Co ambesa quia jẽje co. Jemingo i i sacua Dios rese. Jembaaquiato sacua Dios turã nã. Jẽingo bei chõ nguia erese. Co ambesa mondo quia jẽje aque. Silvano ndese aque. Jesús quiato turã tuchi chõ Silvano nde. Nanderesenda re.

¹³ Jesús quiato Babilonia jenda saludos mondo quia jẽje aque. Dios chiirabo chõ ã nde. Jẽ na si. Marcos abe saludos mondo quia jẽje aque no. Seriiĩ na ño aico nguiã ee co.

¹⁴ Saludar jenye turã turã ño jenyue mambi. Jenongue ritii abe jẽsiite ite chõ nguia mambi. Jesucristo quiato jate quia jẽ nde. Sã jẽya beite riqi. Amén.

SEGUNDA CARTA DEL APOSTOL SAN PEDRO

Pedro ucheẽ mbesa mondo Jesús quiato je

¹ Simón Pedro chõ se re. Jesucristo rimba chõ se re. Jesucristo chimbaaquiato chõ se re. Aico co mbesa mbesa jêje co. Ure rã si chõ jêingo nguiã Jesucristo icua ùqui. Nandebi tuchi Jesucristo icua mose. Dios turã tuchi nandemingo mose Jesucristo rese.

² Sã Dios turã ndiqui tuchi jendese. Sã Dios jembia tuchi mingo. Jesucristo jêicua i i tuchi bei oso quia.

Jeñimbaaquiato i i tuchi Dios rã

³ Jesucristo nandêicuate quia ã. Nyebe Dios riqui nguiã mbae raã ja tuchi nande je co. Nandemingo bei sacuaã. Nandêico sacuaã erã sí. Uquirãcuã je eriqui mbae raã ja tuchi nande je co. Uturã ngue emee nande je ra.

⁴ Dios que ucheẽ turã mee nande je ra: —Co tasaã jêje. ã tasaã jêje. Co abe, i tuchi que equia nande je ra. Ûqui ngue esaã ja nande je cote ra. Jesucristo rã si que nanderaã nda. Ae mbae icua mbia chosei chosei quia nae, ùqui si eriqui nanderiquisã quisã co.

⁵ Jêingo Dios icuate ùqui. Jêingo turã ño nguia jê. Jeñimbaaquiato i i tuchi quiato quia Dios rã jê.

⁶ Jendeco jêingo turã ño nguia i co jê. Jêingo mingue chõ nguia jê. Dios rã si chõ jêingo jê.

⁷ Jêingo turã ño nguia jenyue. Jenyesequa chõ nguia jenyese no.

⁸ Eĩ jenyê mose, eturãte ùqui. Eĩ jenyê i i tuchi chõ nguia jê. Ûqui mose ra Jesucristo jêicua chooño eã. Mbae ra jêsaã saã tuchi quia ee.

⁹ Eĩ jenyê eã mose, mbia resayã na ño jêingo nguiã ùqui. Eĩ jenyê eã mose, jêtesarei chõ ndei equia jeñia irei ji si ùqui. Jesús jêicuaã cose ndare mbutiã mose.

¹⁰ Ûqui jesaã saã tuchi chõ nguia jê. Jê ùqui naa mose, jê sí chõ nda jenyêicua quia. “Dios chiirabo chõ nande re”, jenyê tuchi ra equia. Jêhui eã mbei ra equia Dios si cote.

¹¹ Dios ra jêisi tuchi mingo Jesús récuua cote. Huee ra jêingo bei erese.

¹² Nyebe ra aico bei jemundua ndua ùqui ndese. Jêicuate raque. Jêingo turãte raque Dios cheẽ ndese.

¹³ Coche aico rei jemundua ndua ùqui ndese a. Sereco siqui mose a ra aico jemundua ndua bei ùqui ndese.

¹⁴ Jesucristo que ñee seje ra: —Ereico arete eã nda íbii, i que sembiirandu ra.

¹⁵ Taemundua ndua bei erese. I nda jêtesareiaã mbei esi semanonde abe.

Se sí amae Jesucristo rese, i Pedro

¹⁶ Jesucristo quirãcuã ngue uresenei senei tuchi quia jêje ra. —Jesucristo ra tube íbii, ure tuchi que equia jêje ra. Ichoiñosa reã ñeetuchi chõ ùqui nde. Mbia ñee ñooño je eã tuchi chõ ùqui nde. Se sí chõ ngue amae Jesucristo nininya rese ra.

¹⁷⁻¹⁸ Dios que unininya mee ee sita íbátee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriiir ño co re.

Sechesecua chõ co re. Seyate erese, i que Ibatenda ñee aque mose ra. Echeẽ ngue ahandu se abe ra.

¹⁹ Eĩ sí tuchi que Dios cheẽ mbuchecuasa chimbesa nyii ra. Echeẽ mbesa ji chooño eã ño ùquĩ nde. Jẽingo tuchi quia echeẽ mbesa ji rese. Mbae resaesa tuchi chõ echeẽ mbesa ji re. Sã tata rendi riqui itondaru resaete nyaashĩ nyee no. Jẽingo tuchi mose echeẽ mbesa ji rese, Cristo ra jendique tesae tuchi quia jẽje. Sã nyasitata riqui nanderesae no.

²⁰⁻²¹ Dios cheẽ mbuchecuasa mo ngue ñee ñooño eãte quia emo mose ra. Ucheẽ ae que embesa mbesa eãte quia ra. Espíritu Turã ño ngue embucheẽ nguia ra. Espíritu Turã ño ngue Dios cheẽ mbesa mbesa uquia quia ee ra.

2

Ae mbia mbĩrĩ irĩ nguia embaaquiату quiату mose

¹ Mbia mo ngue Dios cheẽ mbuchecuasa saã ñooñote quia cose ra. Espíritu Turã ae que embucheẽ eã nda. Eĩ sí ra emo jembĩrĩ irĩ ñooño name. Ñee ñooño nda equia Dios rĩ jẽje. Hui huite chõ nda equia Jesucristo si. Ae mano nguia erĩ. Nyebe ra Dios ùquĩ mbutiã asi.

² Mbia ra siqui tuchi mbae icuã ndese ùquĩ ñee nguire. Mbia ra siqui chooño ño cuña mo ndese ùquĩ ñee nguire. Nyebe ra mbia ñee icuã icuã Jesús cheẽ turã nii.

³ Ùquĩ nda mbae isiquia choosei osei tuchi chõ nguia jembae. Nyebe ra jembaaquiату icuã icuã. Dios que ñee ùquĩ nii coose ra. —Ùquĩ nda ambasi tuchi je, i que ra. Achite ùquĩ ñi a cote.

⁴ Angeles mbae icuã naa mose, ùquĩ nyee que Dios tiisu isu ãte quia ra. Ecuá ji que emombo tata cuásuu ra. Itondáruu que emombo ra. Siqui bei sacuã huee, Jesús tu chee mae eicuã ndese.

⁵ Mbia cose ndare abe que Dios tiisu isu ãte quia ra. Noé mosenda. Ùquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasu mbia iquia ja sacuã. Noé mii ngue Dios iquia eã nda. Mbia siete rese. Dios cheẽ nenei neneisate quiату ngue Noé nde.

⁶ Sodoma jenda abe que Dios tiisu isu ãte quia ra. Gomorra jenda abe no. Mbia icuã tuchite quiату ngue re. Nyebe Dios ùquĩ ndei ja nguia tata je. Echuchua ja resebe. —Eichĩ nda nande abe je re, nandeico eã mose erese, i sacuã mbia icuã.

⁷ Lot mii ngue Dios iquia eã nda. Eturãte quiату ngue eriqui nguia Dios je. Eya eãte que eriqui mbia hue jenda mbae icuã naa naa mose ra.

⁸ Mbia mbae icuã naa naa mbei mose que Lot ia eã mbeite riqui ra. Ae mii ño ngue echiã turã Dios je ra. Nyebe Dios ae mii iquia eã nguia.

⁹ Ae siqui beite quia Dios rese nae, Dios riqui ùquĩ ndeaquiату beite co. Mbae icuã jea je esi tã i mose ee. Ae mbae icuã saã nguia nae, ùquĩ nda Dios mbasi tuchi. Jesucristo ra tu chee mae eicuã ndese.

¹⁰ Ae siqui quia mbae icuã ndese ubi nae, ùquĩ nda Dios mbasi tuchi. Ae aba cheẽ mumba quia, ùquĩ abe ra Dios mbasi no. Ae eĩ ñooñote quia mbia je nae, ùquĩ. Ae ñee ñooñote quia mbae ibatenda je nae, ùquĩ abe no.

¹¹ Mbae ibatenda rĩ ngue ángeles ñee icuã eãte quia Dios je ra. Angeles quirãcuãte raque mbia si.

12 ã mbia quiarei mbae quiaa riinda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa riinda rã ño nda ã mano cote. Dios ra equia tuchi.

13 ã nda mbae rasi saã tuchi quia cote. Ubi icuã mii ndese chõ eriqui nguiã ndua ã. Jembiri iri ño nguiã ã. Quiaru chooño ño nguiã jendese ã. Jesús quiato raã ñooño jėje. Aba ireingua tuchi chõ ùqui nde.

14 Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña quia chooño je rese ã. Mbae oseĩ oseĩ jate equia ã. Dios ra embasi tuchi cote.

15 Ishote eriqui Dios si ã. Nyicuasẽ equia Dios si ã. Sã Balaam ndiqui nyicuasẽte esi no. Beor riiri. Sã mbae icuã naa mbae isiquia isi nonde no jē.

16 Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

17 Icuã iru rã ño ã mbia re. Sã quiririã ndiqui ibeishĩ mbucuatate no. Eĩ si chõ ã mbia re. Hue bei eã chĩ. Nyebe ra Dios emombo bei itondáruu.

18 Uchisaã mbae icuã nii ñee ñee ja mbia je. Ucuasu raã naate equia ã. Mbiambiri iri mbeite equia mbae icuã je ã. Ae hui ramo ndei mbae icuã si nae, ùqui abe mbiri irite equia mbae icuã je ã.

19 —Jéingo mose urerese, jéingo turã ndae, i bei rei equia mbia je ã. Mbae icuã nimba sí chõ ñee ñee nguiã ee ùqui. Ae rui nandeico quia nae, ùqui nimba quiatu nande re.

20 Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embiri iri mose ùquinde, eicuã tuchi ra cote. Mbae icuã nimba tuchi ra ae cote. Ñiinda si.

21 Dios quia nda ùqui icuayã mbei nyii re chã. Dios icuare quiatu ngue hui nguiã echeẽ si.

22 Siqui mbiri ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha no. Nyebi jei chõ u ucúẽ u cote. Sã teasu sócoi mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

3

Jesucristo ra tube

1 A aico segunda carta mbesa jėje a. Jemundua turã sacua ño ùqui nde. Ae acheẽ jėje nyii nae, ùqui ndese jemundua sacua ño aico nguiã ã mbesa jėje a.

2 Ae Dios quiato senei senei mbia je nyii nae, ùqui ndese jendua. Ae Jesús chimbaaquiato ñee mbia je nae, ùqui ñee jemumbayã ño.

3 ã ndese jendua: Jesucristo tu nonde ra mbia riqui quia chooño Dios je. Ñee icuã icuã nda equia Dios je. Ae ebite mbae icuã nae, ùqui achõ ndese chõ nda eriqui.

4 ùqui nda ñee jėje: —Sã Jesús tu ãte no jē. Sã ucheẽ mbuchebe chõ jē. Sã eĩ mbei chõ Dios chisaã ima jē, i ra ùqui ñee icuã icuã jėje.

5 Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra.

6 Aquere que Dios ama mbicuasú ra. Mbae quia ja nonde cote.

7 Dios riqui ibei rerecoquiato co. Ibi abe no. ã nandeico irõ erese ã nae, Dios ra emendi cote. Aquere mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ m̃i na ño mil años Dios je re. Mil años na ño nyaashĩ m̃i Dios je no nde.

⁹ —Jesús ra tu áte rei no. Ucheẽ embuchebe rei quia mambi, i raque emo emo nguia Jesús r̃iĩ ã. Ico mingüete equia mbia je pe. —Emo nda quiachã yã Dios si chã. Siqui ja nda erese chã, i equia eriisu isu pe no. Nyebe eriqui nguia tu jei eãte.

¹⁰ Mbia mbuate ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. Ũquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquieĩ tuchi. Mbae ja ra oquieĩ ibi jenda.

¹¹ Nyebe Dios nandesiichã tuchi quiatu quia. Dios rã si quiatu nandeico mbae turã ndese.

¹² Jesucristo ru jenyosei quiatu quia. Ae Dios bite nae, ũquĩ ndese quiatu jẽingo. † nda Jesucristo ru jei. Ũquĩ mose ra ibei oquieĩ ja. Nyasitata abe ra membe tata je.

¹³ Aquere ra Dios ibei mbiasu cote. Ibi abe ra embiasu ucheẽ nguire no. Ũquĩ ño nandesaarõ arõ nguia ã. Ũquĩ mose ra mbae turã achõ cote.

¹⁴ Nyebe jẽingo turã ño Dios rese. Mbae icuã je ra jeñimb̃icuãchĩ jẽ. Jeñimb̃icuã eã mose ra Dios iate jendese eru mose chã.

¹⁵ Dios siqui mingüete quia mbia je co. Mbia rirõ sacuã eicuã si chõ ũquĩ nde. Eĩ si chõ ngue Pablo abe embesa nguia jẽje no. Ae Dios ñee Pablo je nae, ũquĩ sí que Pablo mbesa jẽje ra. Nanderesenda tuchi chõ Pablo re. Nandehesecua chõ nguia erese ã.

¹⁶ Pablo carta mbesa mbesa bei mose, mbia mundua ndua sacuã ã ndese chõ ñene. Aba ch̃icuayãte raque Pablo chimbesa emo emo. Ae equiatuãte Dios rese nae, ũquĩ Pablo cheẽ nyabi chabi chõ nguia. Sã embesa ji ataque abi abi no. Nyebe ũquĩ sí chõ ñimb̃icuã icuã nguia ũquĩ.

¹⁷ Sechesecua, a aico jembiirandu jei a. Mbia icuã jembui eã sacuã Dios si. Mbia icuã nda jemb̃irĩ irĩchĩ jẽ. Jẽingoquiatu tuchi quiatu jẽ. Huee jẽingo turãte Dios rese namo hue.

¹⁸ Jesucristo rei nandererecua tuchi. Jẽicua i i tuchi quiatu jẽ. Jenyesequa i i tuchi quiatu erese jẽ. Ae que nanderirõ mbae icuã si ra. Etura mbeite que eriqui nande je ra. Sã mbia ñee turã mbei quia erĩ. Amén.

PRIMERA CARTA DEL APOSTOL SAN JUAN

Mbia mingosa

¹ Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheê ngue urechandu chandu bei quia ra. Uremae mae mbei que equia erese ra. Ureoco oco que equia erese no nda. Jesucristo, i equia ee. Dios cheê, i abe equia ee. Mbia mingosa, i abe equia ee no.

² Mbia mingosa que siqui ngu rese nyii ra. Tu que nyecua ure je íbii cote ra. Uremae ngue equia erese ra. Uresenei senei equia jêje ã.

³ Ae rese uremae nae, aque uresenei senei nguia jêje ã. Jê abe nda jêingo urerese chã. Sã ureico Dios rese ure no. Jesucristo abe rese.

⁴ Jêya tuchi sacua ño ureico nguia ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Ũqui si chõ uresaã saã nguia jembiiirandu sacua ã: Dios rei nyaashĩ na. Itondaru rã jiri jiriã tuchi chõ ae re.

⁶ “Dios resenda rei se” nandechĩ nda nandeico eã mose erui jê. Nande i mose, nandechê ñooño ño nguia ũqui. Nande i mose, mbia mbiĩrĩ irĩsa chõ nande re.

⁷ Dios rã nandeico mose nyaashĩ, nandeico turã ño nguia nandechiese ũqui. Dios rã nandeico mose nyaashĩ, Jesús ruqui nandeicua mbutiã ja quia nandesĩ ã no.

⁸ “Mbae icua asaã eãte rese” nande i mose, nandechimbiĩrĩ irĩ ño nguia ũqui. Nande i mose, ñee ñooñosa tuchi chõ nande re.

⁹ Nandeicua nandesenei mose Dios je, ae ra eturã nande je. Nandeicua nda embutiã ja nandesĩ ucheê nguire.

¹⁰ “Mbae icua asaã eãte resẽ” nande i mose, “Dios ñee ñooñosa” nandesã ño nguia ee. Nande i mose, Dios cheê iqueã ño nguia nandechiangui re ũqui.

2

Jesús ñee turã Dios je nanderĩ

¹ Mbae icua jêsaã eã sacua ño aico nguia co mbesa jêje co, seriirĩ. Jemo mbae icua naa mose, Jesucristo ra ñee turã Dios je aque riĩ. Eicua mbutiã sacua esi. Jesucristo quia rei eturã mbei.

² Jesucristo riĩ ño Dios nandeicua mbutiã nguia nandesĩ. Ae rei nandeicua ndibishoronda. Nande miĩ icua ndibishoronda eã ño ñene. Mbia ja icua ndibishoronda chõ ñene.

³ Nande Dios cheê mumba eã mose, “Dios aicuate quia co” nande ra nandechiangui re cote.

⁴ “Dios aicuate quia co” i mose emo, Dios cheê mumba mose, ñee ñooño je chõ ũqui nde.

⁵ Ae Dios cheê mumba eãte nae, ũqui nguia nyesequate nguia Dios rese ũqui.

⁶ Ae “aico tuchi Dios rese co” i quia nae, sã ũqui siqui tuchi quiatu quia Jesús rã.

Dios cheē yasu

⁷ Dios cheē yasu eā ño ambesa nguiã jêje co, Sechesecua. Dios cheē ñiinda sí chō ambesa mbesa nguiã jêje a. Jê echeē mumbayã sacua. Ae jeñandu nyii nae, ũqui.

⁸ Jêingo Jesucristo icuate ã cote. Nyebe eyasu raâte eriqui nguiã jêje. Jesucristo que nyesecua mbia rese ra. Jê abe jêingo nyesecua jenyiese ã cote. Itondaru eâte riqui jêje ã cote. Nyaashĩ ja chō jêje cote re.

⁹ Nyaashĩ aico co, i mose emo, nguesenda ucuãyã cuãyã mose, itondaru bei chō siqui nguiã ũqui je aque.

¹⁰ Ae nyesecuate quia nguesenda rese nae, ũqui ndiqui nyaashĩ mbei ũqui. Ũqui nda siqui icua eã.

¹¹ Ae nguesenda ucuãyãte quia nae, ũqui ndiqui itondaru bei ũqui. Itondaru eresa chati chō nguiã ũqui. Nyebe eriqui nguiã nguenco icuayãte ũqui.

¹² Jesucristo rĩ ngue Dios jêicuã mbutiã jêsi ra, Seriirĩ. Nyebe aico nguiã co mbesa mbesa jêje a.

¹³ Ae siqui beite quia nyii nae, aque jêicuate quia ũqui, Mbiaru. Nyebe aico nguiã co mbesa jêje a. Jêingo mbia mbiirĩ irĩsa riquisã quisã ũqui, Acuanindu. Nyebe aico nguiã co mbesa jêje a. Nanderu jêicuate quia ũqui, Echo. Nyebe aico nguiã co mbesa jêje a.

¹⁴ Ae siqui beite quia nyii nae, aque jêicuate quia ũqui, Mbiaru. Nyebe aico nguiã co mbesa jêje a. Jêirãtãte jêingo jeñiangui re ũqui, Acuanindu. Dios cheē ngue jêisi turãte jeñiangui re ra. Jêingo mbia mbiirĩ irĩsa riquisã quisãte ũqui. Nyebe aico nguiã co mbesa jêje a.

¹⁵ Jenyesequate chí nda mbae ibi jenda ja rese jê. Mbae ibi jenda ja rese jenyesequa mose, jenyesequa eâte ra Dios rese.

¹⁶ Ibi jenda icua ja chō ñene. Nanderesa mbae icua osei osei mose, eicuãte ũqui. Nanderete abe mbae icua osei osei mose, eicuãte ũqui no. Nandecuasu abe nandesaã saã mose, eicuãte ũqui no. Ibi jendachō ño ũqui nde.

¹⁷ Mbae icua nda ua ja ibi jenda. Ae mbia chosei chosei quia ibi jenda nae, ũqui abe ra ua no. Ae Dios cheē mumba eâte quia nae, ũqui nguiã ra siqui bei.

Cristo ucuãyãsa

¹⁸ Achite mbae ñi ua ja a, Seriirĩ. Cristo ucuãyãsa ra tu mbia mbiirĩ irĩ, i que jeñandu nyii, ngaē ngaête que cote ra. Nyebe ureico nguiã ñee, “mbae ra ua ja cote” i.

¹⁹ Cristo ucuãyãsa tubiriãte riqui ã. Nanderesenda rei que nyii ra. Nanderesenda choño ño ngue ra. Nanderesenda tuchi mose, ei nda hui ãte rei nandesĩ. Hui chō ngue echoi uresi ra. “Eresenda eã ño eriqui re” i sacua mbia.

²⁰ Jêje quiatu que Cristo Espiritu Turã mondo nguiã. Nyebe jêingo nguiã mbae icua jate ũqui.

²¹ Ae bei, jenze eã ño nguiã ichõñosa je ũqui. Dios quia ichõñosa reã tuchi re. Dios cheē jêicuate quia ũqui. Nyebe aico nguiã ã mbesa mbesa jêaquiatu je a. Eaquiata je eã aico nguiã ã mbesa mbesa a.

²² ¿Aba chō ichõñosa chã? “Dios chimondo eã ndei Jesús” ae i quia nae, ũqui ño ñene. Ae siqui sereãte quia Paba rui nae, Jesús abe rui nae, Cristo ucuãyãsa chō ũqui nde.

²³ Ae siqui sereãte quia Dios riirĩ ndui nae, Dios abe rui eriqui ãte ũqui. Ae Jesús isi turã nguiã nae, eru abe eisi turã ño nguiã no.

²⁴ Ae rese jëingo jirandu beite nyii nae, ùquĩ ndese jëingo bei. Ùquĩ ique tuchi mose jeñiangui re, jëingo bei ra Dios riirĩ ndese. Eru rese abe no.

²⁵ Taemingo bei, i que nande je ra.

²⁶ Ae jembĩrĩ irĩ serĩte quia nae, ùquĩ nii ño aico nguiã ã mbesa mbesa jëje. Jembĩirandu sacua.

²⁷ “¿Aba quiatu ra nandembaaquiату quiatu re?” jenyè aroneate quia ùquĩ. Espĩritu Turã ndiqui tuchi jeñiangui re jembaaquiату quiatu ùquĩ. Jesucristo que emondo jëje ra. Ae chõ jembaaquiату quiatu nguiã mbae ja riĩ ùquĩ. Ñee ñooñoa tuchi chõ ñene. Cristo rese jëingo bei, Espĩritu Turã ñee nguire.

²⁸ Seriiĩ, jëingo bei equia erese jë. Nandesiquicheã nda esi eru mose chã. Nandeireĩ nguiã nda eru mose no ña.

²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, eriiĩ ño ùquĩ nde.

3

Seriiĩ, i Dios nande je

¹ Dios que nyesecua tuchi te nanderese ra. Seriiĩ i tuchi que nande je ra. Nyebe mbia Dios quiatoã ndiqui nandeicua eãte ã. Dios abe icua eãte equia ã.

² Dios riirĩ ndei nande, Sechesequa. Dios ra nandebuturã tuchi core. Ùquĩ nandeicua eãte raque quia ã. Jesucristo tu mose, nandemae tuchi ra erese cote. Erã si ra nandeico tuchi cote.

³ “Jesucristo ra tu sembuturã” ae i icuate quia uchiangui re nae, ùquĩ ndiqui siqui turã tuchi ùquĩ. Jesucristo rã sí.

⁴ Mbae icua naa naasa rei Dios cheẽ mumbasa. Eicuãte Dios cheẽ mumba.

⁵ Jesucristo que tu mano nandeicua mbutiã nandesĩ ra. Mbae icua ngue esaã jiri jiriã tuchi quia ra. Ùquĩ jëicuate quia ã.

⁶ Ae siqui quia Jesucristo rese nae, ùquĩ nda mbae icua mo saã eã. Ae siqui quia mbae icua ndese, ùquĩ nguia eicua eãte nguiã.

⁷ Seriiĩ, emo nda jembĩrĩ irĩchĩ ñee ñooño jëje jë. Ae mbae turã saã saã nguia, eturã ño ùquĩ nde. Jesucristo rã sí chõ ùquĩ nde.

⁸ Ae mbae icua saã saã nguia, diablo rimba chõ ùquĩ nde. Diablo riqui mbae icua naa naa mbei co. Cose ndare bei. Diablo chiao mbuquiachã sacua ño ngue Dios riirĩ ndu ra.

⁹ Nande Dios riirĩ mose, mbae icua nandesã aroneate. Dios quiatu ngue nguico mee nguiã nande je. Nyebe nandeico nguiã mbae icua naa aroneate ã. Eriirĩte quia nande re.

¹⁰ Ae Dios riirĩ nae, ae Dios riirĩã no nae, ùquĩ abe aba chĩcuate. Emo nyesecua eã mose ngõngue rese, diablo riirĩ ño ùquĩ nde. Emo mbae turã naa naa eã mose, diablo riirĩ ño ùquĩ no nde.

Nandechesequa chõ nguia nandechiese

¹¹ Cose ndare bei que jëingo ã andu ra: nandechesequa bei chõ nguia nandechiese.

¹² Cain na nda jëingochĩ jë. Diablo resenda chõ ae re. Nyebe ngõngue iquia nguiã. ¿Mbaerã ño ngõngue iquia chã? Echisaã saã icuãte quiatu ngue eriqui nguiã. Enongue chisaã nguiatu ngue eturãte riqui nguiã.

¹³ Jesús quiatoã jëucuãyã mose, jenyuruirate chĩ nda mae erese jë.

14 Nanderaaque rã eã ño nandeico nguiã ã cote. Dios nandereco mingo tuchi quia co cote. Nandenongue rese nandeico nyesequa ã cote. Nyebe nandeico nguiã “nanderaaque rã eã ño nandeico nguiã ã cote,” i. Ae nyesequa eãte quia ngõngue rese, eraaque rã mbei tuchi chõ ùquĩ ndiqui nguiã ùquĩ.

15 Emo ngõngue ucuãyã mose, mbia iquiasa rã tuchi chõ ùquĩ nde. Dios ra aba iquiasa mingo bei eã.

16 Jesús que mano nande je ra. Nyebe nandeico nguiã “Jesús riqui nyesequate nanderese co” i. Eĩ nande quiatu quia nyesequa nandenongue rese. Nandeteã teã eã ño mano sacua nandenongue rĩi.

17 Nandeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesequa Dios rese uchiangui re?

18 “Aico nyesequate mbia rese co” nande chooñochĩ nda equia jẽ. Mbae turã quiatu nandesaã saã tuchi quia ee.

Nandeireĩ ireĩ eãte equia ñee Dios je ã

19 Nandehesecua mose mbia rese, Dios resendate quia nande re. Nandechiã ngoi turãte.

20 Nandechiangui renda nandemundua ndua mose nandeicuã ndese, Dios quia rei equirãcuã tuchi ùquĩ si. Ae quia mbae icua jate nguiã.

21 Nandechiangui renda nandemundua eã mose nandeicuã mo ndese, nandeireĩ ireĩ eãte quia ñee Dios je ã.

22 “Mbae mo embu seje” nande mose Dios je, mondo ra nande je. Echeñ nguia nandemumbayãte nguiã ã. Nyebe ra emondo nande je.

23 ã ndei Dios cheẽ ã, nande emumbayã sacua ã: “Serucucha jẽicua Jesucristo jẽ. Jenyesequa chõ jenyiese Jesucristo cheẽ nguire jẽ”, i Dios quia nande je co.

24 Nande echeẽ mumbayã mose, nandeico beite quia erese ã. Ae abe riqui beite nanderese co. Espiritu Turã Dios mondo quia nande je nae, aque chõ nandembiirandu nguiã ùquĩ ndese. —Dios riqui beite jeñiangui re co, i Espiritu Turã nguia nande je co.

4

Eĩ nande ra Dios quiato icuã; Dios quiatoã abe icua

1 —Aico Dios cheẽ nenei nenei co, i ja jate raque mbia quia ã. Ñee ñooñote quiatu nguiã ã. Ùquĩ ñee nda jëisi chooñochĩ nguia jẽ. —¿Ma Dios cheẽ nenei neneisa tuchi ma nde? jenyete tuchi rã eicua nyii.

2 “Jesucristo que tu ibate si mbiarã nda” i mose ùquĩ, Espiritu Turã ndiqui erese ùquĩ cote. Eĩ jenyete ra eicua.

3 “Jesucristo que tu mbiarã nda” i eã mose, Espiritu Turã siqui eã tuchi chõ nguiã erese. Cristo ucuãyãsa chõ ùquĩ nde. Se rei Cristo, ichõñi ño nguiã ã. Cristo ucuayãsa ra tu, i jeñandu quia nyii nae, aque riqui a cote.

4 Dios resenda rei jẽ, Seririĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheẽ senei ñooño nguia nae, jẽ quiatu que jẽquirãcuã tuchi ùquĩ si ra.

5 Dios quiatoã ño ùquĩ nde. Ibi jendachõ ño ùquĩ nde. Ibi jendachõ ñi ño eriqui nguiã ñee mbia je. Mbia ibi jenda achõ ño echeẽ ñandu nguiã.

6 Nande quiatu Dios resenda tuchi re. Ae Dios icua quia nae, ũqui ndiqui nandechē andu ũqui. Ae Dios icua eāte quia nae, ũqui nguiatu nandechē andu sereāte nguiā ũqui. Eī nande ra Dios quiato icua. Dios quiatoā abe icua.

Dios nyesecua tuchi mbia rese

7 Sechesecua, nandechesecua ja chō nandechiese jē. Dios chō nandembuchesecua nguiā nandechiese. Nandechesecua mose nandechiese, Dios riirī ño nande re. Ũqui mose chō nandeico nguiā Dios icua ā.

8 Nandechesecua eā mose nandechiese, ā nguiā nandeico nguiā Dios icua eāte ā. Dios quia siqui nguiā nyesecuate nanderese co.

9 Dios que nguiirī mī mbu íbii ra. Nandemingo bei tuchi sacua erī. Nyebe nandeico nguiā “Dios rīqui nyesecuate nanderese co” i.

10 Dios ae nyesecua aquiatute. Nande rane nguiā nandechesecua eāte nguiā erese. Ae rane nguiatu ngue nyesecua nguiā nanderese. Nyebe nguiirī mondo nguiā nandeicua ndiquicharō sacua.

11 Sechesecua, Dios nyesecua tuchite quia nanderese co resē. Nyebe nande abe quiatu nandechesecua nandechiese.

12 Nandechesecua mose nandechiese, Dios rīqui tuchi nandechiangui re co. Dios rīqui nandembuchesecua tuchi nandechiese co. Aba mo mae eā ndaque erese.

13 Ā nandeico tuchi Dios rese ā. Ae abe siqui tuchi quia nandechiangui re co. Espīritu Turā ngue Dios mondo nande je, ae chō nandembiirandu nguiā ũqui ndese co.

14 Dios que nguiirī mondo mbia rirō ja sacua huicua si ra. Uremae ngue erese ra. Ā ureico erenei nenei ja mbia je ā.

15 “Jesús rei Dio s riirī” nande i mose, Dios rīqui tuchi nandechiangui re co. Ũqui mose nande abe nandeico tuchi erese ā.

16 Dios rīqui nyesecua tuchite nanderese co. Ũqui nandeicua tuchi quia ā cote. Nandechesecua bei mose Dios rese, ā nandeico tuchi erese ā. Ae abe rīqui tuchi nandechiangui re co.

17 Nandeico mose Dios rese, ae rīqui nandembuchesecua uchiese co. Nandechesecua tuchi mose erese, nandeico siquicheāte esi ā. Nandesiquiche āte ra esi mbia icua mbasi mose. Nandembasi āte ra mbia chabe. Jesucristo raāte quiatu nandeico nguiā nande ā.

18 Nandesiquiche mose Dios si, nandechesecua tuchi āte quiatu nguiā erese nandechiangui re ā. Nandechesecua tuchi mose erese, nandesiquicheā nda esi. Nandesiquiche mose Dios si, nandesiquiche chō nda nandembasi.

19 Dios rane ngue nyesecua nanderese nyii ra. Nyebe nande abe nandeico nguiā nyesecua erese ā cote.

20 “Achesecua quia Dios rese co” i mose emo, ngōngue ucuāyā mose, ñee ñooño je chō ũqui nde. Nandechesecua eā mose nandenongue rese, Dios abe rese chō nandeico nguiā nyesecua eā no. Dios rese quia nandeico nguiā mae aroneate.

21 Ā i que ñee nande je ra: Ae nyesecua quia Dios rese nae, sã nyesecua ngōngue abe rese.

5

Jesús quiato “qui jē” i mbae icua je

1 “Dios chīmondo rei Jesús” nande i mose, Dios riirī ño nande re. Emo ndese nandechesecua mose, eriirī abe rese ra nandechesecua.

² Nandechesecua mose Dios rese, echeẽ nandemumba eã mose, Dios ririĩ ja rese abe chõ nandeico nguiã nyesecua ã.

³ Dios rese nandechesecua mose, echeẽ nandemumbayãte quia ã. Echeẽ mbaranguiatuã eãte riqui nande je co.

⁴ Dios ririĩ mose nande, ibi jenda icuã nandesiquisã quisã ño nguiã nandechesi ã. Nandeico Jesucristo icuate ã. Nyebe nandeico nguiã “qui jẽ” i mbae icuã ibi jenda je.

⁵ Jesús icuasa achõ nda “qui jẽ” i mbae icuã ibi jenda je. —Dios chimondo rei Jesús, i je ra “qui jẽ” i ibi jenda icuã je no.

Dios siqui ñee mbei Jesús quiato chiangui re

⁶ Jesucristo que tu íbii ra. I je que Juan bautizar i ee ra. Eruqui que uchẽ emano mose ra. Ũqui Espiritu Turã senei senei nguia nande je ã. Ae ñee ñoõno eãte quia co.

⁷⁻⁸ Tres riqui nandembiirandu randu Jesús rii ã. Espiritu Turã nane. I abe no. Jesús ruqui abe no. Ũqui ja riqui nandembiirandu randu Jesús rii ã. Hue rii ja chõ ũqui tres riqui nguiã ñee.

⁹ Eĩ sí que Dios ñee Jesús rii nande je ra. “Ae bei”, nande chõ nguia ee. Sã nandeico mbia cheẽ mo isi turã no. Dios cheẽ nguiatu nandesi turã tuchi.

¹⁰ Ae Dios ririĩ icua quia nae, ũqui je quia Dios riqui nguiã ñee mbei echiangui re Jesús rii. Ae “eno” i ãte quia Dios cheẽ je nae, “ichõiñosa chõ Dios cheẽ nde”, isa chõ ũqui nde. “Eno” i ãte quiatu nguiã Dios ñee mose Jesús rii.

¹¹ Dios nandemingo bei quia co. Nguiriĩ nii ño eriqui nguiã nandemingo bei co. Ũqui nii ño Dios riqui nguiã ñee nande je.

¹² Ae chiangui re Dios ririĩ ndiqui nae, ũqui nda Dios mingo bei. Ae chiangui re eriqui eãte nae, ũqui nguiatu ra emingo bei eã.

Juan embesa hui bei

¹³ A aico ã mbesa jẽje a. Dios ririĩ icuasa je a. “Dios ra semingo bei” jenyẽ sacua eicua jeñiangui re.

¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je.

¹⁵ Nande ache i mose ee ra nandeandu. “Aque embu seje”, i mose ra emondo nande je. Nandeico ũqui icuate ã.

¹⁶ Nandemae mose nandenongue rese mbae icuã naa naa mose, nandechẽ Dios je erii. Dios ra emingo turã cote. Aque mii mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erii”, ae ãte quia jẽje co. Ũqui nda quiachã mbei chõ.

¹⁷ Mbae icuã naa naa mose rei eicuã tuchi. Aque mii mbae icuã nguiarei mbia mbuquiachã mbei mondo tata cuásuu.

¹⁸ Dios ririĩ mose nande, nandeico ãte quia mbae icuã ndese ã. Jesús riqui nanderaarõ mbeite mbae icuã si co. Satanás nandembicuã eã sacua.

¹⁹ Nande rei Dios resenda. Ũqui nandecuate quia ã. Mbia ataque quiarei Satanás ndesenda tuchi. Eicuã ndesenda tuchi.

²⁰ Dios ririĩ ngue tu nandembaaquiatsu sacua Dios rii nda. Dios ichõiñosa reã nii. Ichõiñosa reã ño eririĩ abe no nde. Ae rese nandeico tuchit e quia ã. Aba mingo beisa chõ ae re.

²¹ Seririĩ, Dios aba reã ndese ra jẽingochi. Amén.

SEGUNDA CARTA DEL APOSTOL SAN JUAN

Achesequate jendese, i Juan

¹ Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderiirĩ je abe aico ã mbesa mbesa a. Co aico nyesequa tuchi jendese co. Dios rese quia jëingo tuchite nguiã ùquĩ. Nyebe Dios quiato riqui nguiã nyesequa jate jendese ùquĩ.

² Achesequa tuchite quia jendese co. Dios cheë nguiatu siqui beite quia nandechiangui re co.

³ Dios rei nanderu. Jesucristo rei eririĩ. Sã ùquĩ ndiqui turã jendese. Sã ùquĩ ia eã tuchi riqui jendese. Sã ùquĩ ndiqui jembia bei tuchi. Ùquĩ ndiqui nyesequa tuchi jendese ùquĩ. Ùquĩ ñee ñooño eã tuchi quia ùquĩ.

⁴ Nderiirĩ mo ngue chi tuchi Dios cheë ndese seje ra. Seya tuchi que ùquĩ mose ra.

⁵ Nandehesecua ja chõ nguia nandechiese. Dios cheë yasu eã ño ã nde. Dios cheë ñiinda bei chõ ñene.

⁶ Nandehesecua mose nandechiese, nandeco Dios cheë ndui sí ã. — Jenyesequa chõ jenyiese, i quiatu ngue Dios nande je re. Cose ndare bei chõ jëingo nguiã ùquĩ andu ã.

Aba mbiriĩ irisa

⁷ Mbia tubiriã ndiqui aba mbiriĩ irite ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ùquĩ je re. Aba mbiriĩ irisa, i abe que ùquĩ je ra.

⁸ Cochee chõ jëingo. Mbae jësaã iru iru eã sacua Dios je. Ùquĩ mose ra Dios jenyisaã sibishorõ turã tuchi jëje.

⁹ Emo icha mose Cristo cheë si, Dios resenda eã ño ùquĩ nde. Emo siqui bei mose Cristo cheë ndese, Dios resenda tuchi chõ ùquĩ nde. Cristo resenda abe no.

¹⁰ Emo mbia mbaaquiato quiatu mose Cristo cheë ndui si eã, ùquĩ jëisi turã eã ño nguia jenyuchúaa. Jeñee turã turã aroneate ee.

¹¹ Ae ñee turã nguia ee ùquĩ ñi nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jëje, ae rei que se ra. Ambesa oco sereãte mondo jëje. Tambuchecua tuchi chõ oso ñee jëje, ae que se ra. Nandeya tuchi sacua nandechiese.

¹³ Dios chiirabo tuchi chõ ndenongue re. Eriiriĩ ja saludos mondo quia ndeje aque. Amén.

TERCERA CARTA DEL APOSTOL SAN JUAN

Gayo turãte que eriqui Dios je ra

¹ Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co.

² Sechesequa, acheẽ mbeite quia Dios je nderiĩ co. Dios nemingo turã sacuaã. Nderete abe mingo turã sacuaã no. Sã ereico siqui tuchite Dios rese no.

³ Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. —Gayo riqui tuchi Dios rese aque, i que sembiirandu ra.

⁴ —Nderiirĩ nyi tuchi Dios rese pee, i mose seje, sembia beite equia co. Uĩqui nguiatu sembia tuchi nguiã mbae mo si co.

⁵ Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee.

⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que ecuaẽ ñee ure je ra. Mbae turã emondo mondo bei ee, embucuata turã sacuaã. Eĩ mose ra Dios ia tuchi nderese.

⁷ Jesús rĩ nguiatu uĩqui ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si.

⁸ Nyebe nande chõ mbae nandemee mee ee. Dios cheẽ nenei neneisate quia uĩqui nde.

Diótrfes ucuasu raã ñooño

⁹ Papel jua que ambesa rei mondo jeñumunua ji je ra. Diótrfes quiatu seosei chiãte nguiã. —Se mii ño ererecuarã, ite.

¹⁰ Huee seso mose ra Diótrfes icuaã asenei jẽ ja je. Ae icuaã esaã ure je nae, uĩqui. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no.

¹¹ Sechesequa, ereicochĩ nda eicuaã mo ndui. Eturã ndui chõ eico. Eturã nduinda quiarei Dios resenda. Ae siqui quia eicuaã ndui, uĩqui ndei Dios resenda eã.

Eturã tuchi, i Demetrio je

¹² Demetrio quiarei eturã tuchi. Co eriqui tuchi Dios rese co. Mbia ja abe ñee turãte quia erĩ uĩqui. Se abe acheẽ turãte quia erĩ co. Acheẽ ñooño ãte que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje.

¹⁴ Namu jiri ra amae nderese reae. Aque mose ra nandechẽ tuchi nandechue.

¹⁵ Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.

LA CARTA DEL APOSTOL SAN JUDAS

Judas embesa Dios chiirabo je

¹ Judas rei se. Jesucristo rimba. Jacobo nongue rei se. Ñ ambesa quia jêje a. Dios chiirabo je. Dios que jêirabo ino icúe umbaerã nda. Dios riqui nyesequa tuchi jendese co. Dios riqui jenderecoquiato bei Jesucristo mbaerã co.

² Sã Dios riqui ndua bei jendese. Sã eriqui jembia bei. Sã eriqui nyesequa bei jendese.

Ae Jesús quiato saã ñooño nguia

³ Jesucristo nandemingo beisa riñ ngue ambesa seese rei nguiã jejê. Ae mbia mbaa tambesa jêje. Jêingo eã nonde erese. Ûqui ñee icuã icuã mose Dios cheê nii, echeê jêisibishorô. —Dios cheê tuchi chõ ñene, jenye tuchi quiato quia Dios cheê ndiquisã quisã mbia icuã si. Dios quiato ngue ucheê mondo ja nguiã nguesenda ja je.

⁴ Dios quiato raã naasa mo ndiqui mbia mbaaquiato icuã icuãte ùqui. Ûqui siquiã tuchi chõ nguiã Dios rese ùqui. —Sã Dios riqui aba icuã mbutiã uturã je c o no jê. Nyebe mbae icuã nandesaã i i chõ jê, i chõchĩ nguiã ùqui. Jesucristo cheê ndui eã tuchi chõ ùqui nde. Nandererequa cheê ndui eã. Cosete que Dios ùqui mbicúe embasi sacuaã nda. Mbasi mbasi bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ngue judíos sirô ja rei nguiã Egipto si cose. Mbiam hue jenda icuã icuã mose ee. Ûquinde que siqui sereã Dios rese cote ra. Nyebe Dios eiquia nguiã.

⁶ Sã ángeles mo je Dios ñee ndei no jê. “Aa jêingo aa”, sã i rei ee no jê. Sã Dios cheê mumba chõ no jê. Sã Dios riqui etarô i nderequia itondaruqui re co no. Embasi mbasi bei sacuaã cote.

⁷ Sã Sodoma jenda no. Sã Gomorra jenda no. Sã ùqui ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Erui mo ndese abe no. Nyebe que Dios ùqui mombo tata cuásuu ra. Mbae rasi ra esaã mbei u huee cote. Mbiam mundua ndua sacuaã ño ùqui nde.

⁸ Ae Dios quiato saã saã nguia nae, ùqui ndiqui ndua icuã icuã mbei ùqui. Nyebe eriqui nguiã nguete mbicuaã ùqui. Aba cheê mumba. Ñee icuã ángeles ibatenda abe riñ no.

⁹ Sã Miguel ángel rerequa no. Sã ñee asi asi nyue diablo rese no. Moisés rete riñ. —Mbae icuã tasaã ndeje, i eã ngue diablo je ra. —Dios quiato ra mbae rasi saanguquia ndeje, i chõ ngue ñee diablo je ra.

¹⁰ Ae Dios quiato saã saã nguia nae, ùqui ndiqui ñee ñooño mbae uchicuaayã nii ã. Ae eicuate quia mbae nae, ùqui ndese siqui turã eã. Siqui chooño eã ùqui ndese. Nyebe ra Dios embasi tuchi cote. Quiaa riñda quia mbae icua jiri nguiã ùqui si.

¹¹ Aba mbia eã tuchi chõ ùqui nde. Caín na tuchi chõ eriqui nguiã mbae icuã naa naa ùqui. Balaam abe rã si chõ eriqui nguiã icha icha Dios si ùqui. Mbae isiquia achõ ndese siqui sacuaã. Aba cheê mumba mumba bei chõ nguiã Coré rã ùqui. Nyebe ra Dios mbae rasi saanguquia ee Coré rã si.

¹² Ae Jesús quiato saã saã nguia nae, aba ireingua tuchi chõ ùqui nde. Jeñumunua nua mose quiaru sacuaã nyese, ùqui ndiqui quiaru chooño ño ùqui.

Mbae abe mbei chooño. Ico chooñoa abe mbia mo je. Mbia reaquiatusa mo na eã. Nguete mii ño ũquí teaquiato nguiã ũquí. Sã ibei rondei riqui raque pã i mose no. Sã eriqui nyaaquiã no jê. Sã quiririã ndiqui ibei rondei rerao no jê. Ũquí na ño Dios quiato raã naasa riqui nguiã ã. Mbae iabae je rã abe chõ eriqui nguiã ã. Ira shii rã abe no. Ira riqui ji rã abe no.

13 Ama ndebera rã abe chõ ũquí ndiqui nguiã ũquí. Mbia mbaaquiato quiatu mose, i richoi rã ño ũquí nde. Sã nyasitata riqui oso ngũenda recha no. Eĩ si chõ ũquí nguiã ũquí. Nyebe ra mbae rasi raã tuchi itondaruqui re.

14 Enoc abe que ñee ũquí icuã nii nda. Adán ndiirĩ nducucha rei ae. Eĩ ngue ñee nda: “Dios ra tu ngũimba tubiriã ndese.

15 Mbia icuã mbasi ja ra eu. Ae icuã mbia saã saã nguia nae, ũquí ndese ra mae ja. ‘Mbae icuã asaã ãte resê’, i aroneate ra ũquí cote. Ae ñee icuã nguia Dios rii nae, Dios ra echeẽ icuã senei a e sí je cote. ‘Eĩ ere que equia ñee icuã serii nda’, i ra Dios ee. Echisaã icuã tuchi chõ ũquí nde’, i que Enoc ñee cose ra.

16 Echiichati tuchi chõ ũquí nde. Ñee icuã mbei equia emo nii ũquí. Ae rese eriqui sete nae, ũquí mii ndese chõ eriqui nguiã ndua ũquí. Ucuasu raã ñooño. Uchuru mondo chooño. Ñee turã abareã nea emo je. Mbiri iri ño nguiã ñee turã abareã nea ee.

Ã jêsaã saã, i Judas Jesús quiato je

17 Jê nguia rei Jesús quiato tuchi. Jesús chimbaaquiato cheẽ si jêtesarei eã. ã ndei echeẽ ã:

18 “Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ũquí mii ndese chõ nda eriqui nguiã ndua”, i que Jesús chimbaaquiato ñee cose ra.

19 Mbia mbuqueta quetasa tuchi chõ ũquí nde. Ae ebite mbae icuã nae, ũquí ndese achõ ño eriqui nguiã ndua. Espiritu Turã siqui ãte echiangui re.

20 Jê nguia jeñimbirãcuã tuchi quia Dios rui. Dios jêicua tuchi. Jeñee mbei Dios je. Sã Espiritu Turã ndiqui jembucheẽ mbei Dios je.

21 Jêingo bei quia Dios rese. I nda jeñee. —Nyesecua tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. Ũquí jêsaarõ mbei quia.

22 Ae Dios tiisu isu quia nae, ũquí jembuti mbuti quiatu quia Dios cuti.

23 Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jêingo tuchi quiatu quia Dios rese. Ũquí icuã uba eã sacua jendese.

Judas ñee turã Dios rii

24 Dios mii ño jendeaquiato bei nguiã jembucha eã sacua. Dios mii ño jeñiangui renda icuã mbuchicuabo nguiã jemingo sacua uchiese. Dios mii ño jembia bei nguiã no.

25 Dios mii ño mbae icua ja nguiã. Dios mii ño nandemingo bei nguiã Jesucristo rii no. Ae je ra mbia ñee turã mbei quia. Ae rei eturã tuchi. Ae rei ererecua tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS O REVELACIÓN A SAN JUAN

Jesucristo mbae mbuchecua

¹ Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacua ere se cote ra. Se jembiiirandu sacua ere se cote.

² Nyebe aico nguiã Dios cheẽ mbuchecua checua jêje co. Ae Jesucristo senei senei nguia seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co.

³ Ae ra mae mae nguia sechimbese rese nae, Dios turã tuchi ra eriqui ùquĩ je. Ae ra nyiisaquia turã sechimbese rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espiritu Turã abe riqui uturã ndeacuquia cuquia jêje. Ae chõ siqui nguiã mangue choõnoa ja co. Mbae raã naa Dios je.

⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equirãcuã tuchi mbia rerecua mo si. Ae riqui nyesecua tuchite nanderese co. Ae que nandembui nandeicuã si nguqui je ra.

⁶ Ae que nandemingo bei ngu res e erimbarã nda. Nande mbae raã naa sacua Dios je. Sã mbia riqui ñee turã turã mbei Jesucristo je. Ae ra ererecua bei. Amén.

⁷ Jesucristo ra tu ibei si. Mbia ra mae ja tuchi equichi rese. Mangue jenda choõnoa tuchi ra mae ja erese. Ae Jesús iquia nyii nae, ùquĩ abe ra mae erese no. Mbia ra siquichete nyeseo mae mose erese. Ae bei. Amén.

⁸ —Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equirãcuã mbeite riqui co. Ae chõ siqui bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbiirãcuã jate mbia icuã icuã mose nande je ã. Jesucristo rĩ. Ae sí chõ nandembiirãcuã nguiã co. Ae sí chõ nandererecua ja riqui nguiã co no. Ama ndisha joõ ngue mbia sereru aa ra. Aa semingo isho mbia si a. Se Dios cheẽ nenei nenei eã sacua. Mbia mbiirandu eã sacua Jesucristo rese. Patmos, i que a ejoõ acua je ra.

¹⁰ Aa sereco mose que Espiritu Turã mbae reacuquia seje cuu ra. Domingo mo mose. Emo ngue ñeemombo seje sequite quiti cuu ra. Echeẽ ngue serasate ra.

¹¹ —Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. —Ae ra eretea cuu nae, ùquĩ embesa papel rese. Ndechimbese emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. ùquĩ jenda ja je ndechimbese emondo, i que ñee seje cuu ra.

12 —¿Aba ñee nguia seje re? ae que uba mae nda. Siete candeleros oro ao ji rese que amae nda.

13 Ūquĩ ite re que mbia raanguia mo ñi juã nda. Dios ririĩ ño eriqui reaẽ. Huiãrao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra.

14 Eashĩ tuchi que ra. Tata rendi rã tuchi que eresa ra.

15 Ei nininyate que ra. Bronce rã. Ama ndieu rã ño ngue echeẽ nda.

16 Nyasitata siete que equereco oo ra. Uquiatocuti que ererequia ra. Espada que equereco uchúruu ra. Erimbe tuchi que ra. Erimbe chobei que ra. Erubã nininya tuchi que ra. Sã tenda nininyate riqui nandeite re mose no.

17 Semae mose erese que sesiquiche tuchi ra. Mbia raaque rã ngue aso ngoi ejii ra. Oco que serese oo uquiatocutinda je ra. Ñee ngue seje ra. — Eresiquichechĩ nguia sesi. Ae siqui beite quia querabe nae, ae chõ se re.

18 Seraaque rei que nyii ra. Aico bei querabe co cote. Mbia mingo beisa chõ se re. Secheẽ mose ra mbia mano. Secheẽ mose ra mbia riqui bei querabe no.

19 Ae rese eremae nae, ūquĩ embesa rã. Ae atecuquia cuquia quia ndeje namo nae, ūquĩ abe embesa no. Ae ra nyecua nyecua emo mose nae, ūquĩ nonde embesa jei rã.

20 Siete candeleros rese que eremae namo, siete iglesias rã ño ūquĩ nde. Siete nyasitata rese que eremae séoo, siete iglesias rerecua rã ño ūquĩ no nde. Jesús quiato rerecua rã ño ūquĩ nde, i que ñee seje ra.

2

Cristo ucheẽ mondo uquiato Efeso jenda je

1 Jesús que ñeembe seje ra. —Dios quiato rerecua Efeso jenda je ã embesa rã. ã embesa rã mondo ee: “Cristo que ñee jẽje ra. Ae siete nyasitata quereco oo nae, aque. Ae ngata quia siete candelero ite rĩ nae, aque sí chõ ñee nguia jẽje aque.

2 ã ngue Cristo ñee jẽje ra: ‘Jenyisaã turã aicuate quia co. ã jẽingo quiei quiei tuchite seje ã. Jeñimbirãcuã tuchite quia mbae icuã si ã. ã jẽingo jiri jiriãte mbia icuã ndese ã. Ae sequiatio rerecua saã ñooño nguia nae, jẽ ngue ūquĩ jẽisiã nda. “Ma Jesús quiatote”, jenyete turã tuchi que ra. “Ichõñiosa chõ ñene” jenyete chõ ngue erĩ nda.

3 Jeñimbirãcuã turãte que equia ra. Mbae rasi que jẽsaã nguia serĩ nda. Jẽquiei quiei tuchite que seje ra. Jẽhui eã mbeite equia sesi ã. Ūquĩ jẽsaã turã jate rei nguia ã.

4 ã nguia sembia eãte nguia ã. Jenyesequa eã jirichĩ equia serese jẽ nguia ã cote. Seicua ramo mose que jẽote serese nyii. Jenyesequate que equia serese nyii. Eĩ jenyete eã ñochĩ equia ã cote.

5 Jendua rã ūquĩ ndese ae. Jenyesequabe jiri serese ae. Jemba eã mose serese, jaembutiã nda u. Sequiatio eã nda jẽ cote, jemba eã mose serese.

6 ã abe sembiante quia jendese ã. Ae siqui quia Nicolás rese nae, ūquĩ nyisaã jẽcuayãtequia ūquĩ. Se abe aucuayãte quia co no. Ūquĩ nyisaã icuãte riqui ūquĩ.

7 Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ūquĩ jeñandu rã: Ae “qui jẽ” i beite quia Satanás quirãcuã je nae, ūquĩ nda amingo turã mbei ibate Dios rese’, i que Cristo jẽje ra”, ere chõ embesa mondo sequiatio Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. ã embesa rã mondo ee: “Cristo que ñee jêje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beit e co no. Aque sí chõ ñee nguiã jêje co.

⁹ ã ngue Cristo ñe e jêje ra: ‘Jenyisaã turã aicuate quia co. Mbia icuã icuãte riqui jêje serĩ ùqui. Mbaecha reãte jêingo ùqui. Dios quiatu siqui tuchite nguiã jendese co. Ae Dios chiirabo saã ñooño nguia nae, ùqui ndiqui ñee icuã mbeite jenĩ ùqui. Satanás chiirabochõ ño ùqui nde.

¹⁰ Ae ra jesaã saã mbae rasi nae, ùqui mo si ra jêsiquichechĩ jẽ. Satanás nda jemo tarõ mi. “Ma nyao Dios si”, i sacua ño ùqui nde. Diez días ra jêingo mbae rasi raã naa. Ùqui mose, jêingo bei Dios rese. Mbia ra jêiquia serĩ. Ùqui mose nda jaemingo bei Dios rese cote chã.

¹¹ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùqui jeñandu rã: Ae “qui jẽ” i beite quia Satanás quirãcuã je nae, ùqui nda Dios mundo eã tata cuásuu’, i que Cristo jêje ra”, ere chõ embesa mondo sequiatio Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. ã embesa rã mondo ee: “Cristo que ñee jêje ra. Ae espada rimbe chobei quereco nae, aque sí chõ ñee nguiã jêje co.

¹³ ã ngue Cristo ñee jêje ra: ‘Sucha tubiriã jendecua aicuate quia co. Mbia hue jenda siqui tuchite quia Satanás ndese ùqui. Jẽ ae chõ jêingo nguiã serese ùqui. Jêhui eãte equia sesi ùqui. Mbia icuã sequiatio iquia raque huee jendécuaa. Antipas, i rei ngue aque sequiatio je re.

¹⁴ ã nguiatu sembia eãte nguiã ã. Balaam na tuchi chõ jemo jemo ndiqui nguiã ùqui. Balaam nguiarei Balac mbaaquiato icuã icuã nyii. Balac Israel jenda mbiicua icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbia jembicuã icuã nguiã ùqui.

¹⁵ Ae siqui quia Nicolás rese nae, ùqui mo siqui chõchĩ nguiã jendese ùqui. Ùqui ñee aucuãyã tuchi quia co.

¹⁶ Jendua si rã jêicuã ndese. Nicolás resenda jemombo chõ. Jemombo eã mose ra achu icuãte ee. Co espada areco sechúruu co nae, aque ra areco reco tuchi erese.

¹⁷ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùqui jeñandu rã: Ae “qui jẽ” i beite quia Satanás quirãcuã je nae, ùqui nda amingo tuchi Dios cheẽ ndese. Dios cheẽ nda ùqui mingo bei. Ùqui je ra sitashĩ ñetẽ mo amee. Sita ñetẽ ndese ra nombre yasu ambesa mi. Emee sacua ee. Emo nda sechimbesa icuayãte nombre yasu. Ae je ra amee, ùqui achõ nda eicua’, i que Cristo jêje ra”, ere chõ embesa mondo sequiatio Pérgamo jenda je.

Cristo ucheẽ mondo uquiato Tiatira jenda je

¹⁸ Dios quiato rerecua Tiatira jenda je ã embesa rã. ã embesa rã mondo ee: “Dios rucucha que ñee jêje ra. Ae resa tata rendi saãte quia nae, aque. Ae i nininyate eriqui bronce rã nae, aque sí chõ ñee nguiã jêje co.

19 Ā ŋgue Cristo ñee jêje ra: ‘Jenyisaã turã aicuate quia co. Jenyesequate quia mbia rese ũquí. Mbae jêsaã saã turãte quia Dios je ũquí. Ũquí jêingo Dios icua tuchite ũquí. Jeñimbirãcuã turãte equia mbae icuã si ũquí no. Jenyisaã turã tuchite riqui cose ndare si ũquí.

20 Ā ŋguiatu sembia eãte ŋguiaã ã. Jezabel naanguia siqui chõchĩ ŋguiaã jendese ũquí. ¿Mbaerã aque cuña jêteachõ nde? Emombo rocoĩ jenyese. Dios cheẽ esenei senei ñooño ño ŋguiaã aque. Sequiatio mbaaquiato icuã icuã ño ŋguiaã aque. Sequiatio mingooño ño ŋguiaã cuña icuã ndese aque. Sequiatio mingooño ño ŋguiaã dios aba reã ndese aque no.

21 Jezabel naanguia que atiusu isu chõ nyii ra. “Sã ndua sí huicuaã ndese. Sã eriqui chooñoa mbia rese”, ae rei que se nyii ra. Hui eã mbei chõ equia ũquí si aque re.

22 Nyebe ra ambasi tuchi cote. Ae siqui siqui quia erese nae, ũquí abe ra mbae rasi saã tuchi cote, ndua si eã mose huicuaã ndese.

23 Ae siqui Jezabel icuã ndui nae, ũquí abe ra aiquia. Ũquí mose ra sequiatio jirandu ja sequirãcuã ndese. “Jesús mbia chiangui renda icua ja chõ ŋguia re. Mbia ndua ndua eicua ja chõ ŋguia re”, i ra sequiatio serĩ cote. Jêingo bei mose mbae icuã ndese, se abe ra mbae icuã amee jêje.

24 Ae siqui eã ŋguia Jezabel cheẽ ndui jemo nae, ũquí je chõ tacheẽ cote. Jê ŋguiatu que jeñimee ãte Satanás je ra. Nyebe ra acheẽ tuchiaã jêje. “Mbae mo ndese ra jêingochĩ jê”, ae eã nda jêje mbae mo nii cote.

25 Ae jêicuate quia serĩ nae, ũquí ndese jêingo bei querabe. Achu chee nda jêje chã.

26-27 Sã seru uquirãcuã me e seje no. Ae ra secheẽ mumbayã mbeite quia nae, ae ra “qui jê” i beite quia Satanás quirãcuã je nae, ũquí je ra sequirãcuã amee tuchi. Ũquí nda mbia rerecuarã cote. Ũquí nda mbia icuã mbasi mbasi tuchi quia cote. Sã emo ñio iquia iquia ira je no.

28 Nyasitata turã na nda aico ũquí je.

29 Jêisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquí jeñandu rã’, i que Cristo jêje ra”, ere chõ embesa mondo sequiatio Tiatira jenda je.

3

Cristo ucheẽ mondo uquiato Sardis jenda je

1 Dios quiato rerecuã Sardis jenda je ã embesa rã. Ā embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae rese Espiritu Turã ndiqui nae, aque. Ā ŋgue Cristo ñee jêje ra:

‘Jenyisaã aicuate quia co. Mbia raaque raãte chõ jêingochĩ ŋguiaã ũquí. Siqui eã Dios rese. Jêingo arõte raque equia Dios rese mbia je ũquí.

2 Secheẽ ndese jenyiisaquia rã. Jeñimbirãcuã ño ŋguia siqui i Dios rese. Jêhui serĩ serĩte chõchĩ ŋguiaã Dios si ũquí. Jenyisaã ndese aico mae maete co. Jenyisaã saã icuãte riqui Dios je ũquí.

3 Jendua jiri mbae rese ae. Ae rese jeñimbaaquiato nae, ũquí ndui jêingo tuchi jiri ae. Jêicuaã si jêhui tuchi jiri ae. Jê secheẽ mumba mose, jaembuate ra ngasẽ jêje. Jendua eã mose ra asochĩ jêje re. Sã mbae mbuquiachãsa riqui aba mbuate no.

4 Jemo mii mii mbae icuã saã saã eãte quia ũquí. Ũquí ño nda siqui bei serese. Eiraoshĩ nda amee ũquí je. Mbae icuã ndese quiatu que eriqui oco oco ãte ra.

⁵ Ae “qui jê” i beite quia Satanás quirãcuã je nae, ùqui ñda huiraoshĩ quereco quia serese. Ûqui ñda siqui bei serese ibate. Ûqui mbae nombres ra achusi eã mbei. “Ã ndei sequiato tuchi ã”, ae ra Paba je. Angeles abe je.

⁶ Jêisa mose, Espíritu Turã ñee jeñandu rá. Ae Espíritu Turã ndiqui ñee iglesias je nae, ùqui jeñandu rá, i que Cristo jêje ra”, ere chõ embesa mondo sequiato Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecua Filadelfia jenda je ã embesa rá. ã embesa rá mundo ee: “Cristo que ñee jêje ra. Ae ñee ñooño eãte quia querabe nae. Ae mbae icuã saã eã mbeite quia nae. Ae ererecua tuchi riqui David rá si nae. Cristo eiquesa mbaequiata mose, emo ematã aroneate. Cristo ematã mose, emo embaequiata aroneate no.

⁸ ã ngue Cristo ñee jêje ra. ‘Jenyisaã aicuate quia co. Jêquirãcuã miite jêingo raque ùqui. Seisi teã eãte que equia ra. Ûqui jêingo secheẽ mumbayãte ùqui. Nyebe que mbae ambaequiata mi eiquesa rá jêje ra. Jêingo tuchi sacuã serese. Emo nda ematã eã.

⁹ Judíos ñee ñooño je ra amumae turã nyee jendese. Ûqui ndiqui Dios chiirabo rá ñooñote ùqui. Ûqui eriqui tuchite Satanás rese ùqui. Ûqui ñda ñee turã nyee seje jeni. “Dios nyesequa tuchi chõ nguia ã ndese re. Judíos eã ndaque”, i chee ra jeni. Ngoi turã nyee ra jendese ñee seje.

¹⁰ Jeñimbirãcuã turãte equia secheẽ nguire ùqui. Nyebe ra jaendeaquiato turãte serequia. Mbia mangue chooñoa jenda mbae rasi rá ja mose ra jaendeaquiato tuchi serequia.

¹¹ Achu jei ra se. Ae jêicuate quia serĩ nae, ùqui ndese jêingo bei querabe. I nda emo jembui eã Cristo si.

¹² Ae “qui jê” i beite quia Satanás quirãcuã je nae, ùqui ñda amingo bei Dios récuua. Sembae marca ra ami tuchi ùqui ndese. “Dios quiato” i tuchi ra mbia quia ùqui je. “Dios recua jenda” i tuchi ra mbia quia ùqui je no. “Jerusalén yasu”, i chõ nguã Dios recua je ã. Jerusalén yasu ra nguichi u ibate si.

¹³ Jêisa mose, Espíritu Turã ñee jeñandu rá. Ae Espíritu Turã ndiqui ñee iglesias je nae, ùqui jeñandu rá, i que Cristo jêje ra”, ere chõ embesa mondo sequiato Filadelfia jenda je.

Cristo ucheẽ mondo uquiato Laodicea jenda je

¹⁴ Dios quiato rerecua Laodicea jenda je ã embesa rá. ã embesa rá mundo ee: “Cristo que ñee jêje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae.

¹⁵ ã ngue Cristo ñee jêje ra: ‘Jenyisaã aicuate quia co. Seya eãte aico jendese co. Jêhui tuchi ãte raque equia sesi ùqui. Jêingo tuchi eã ñochĩ equia serese ùqui no. Eĩ jenyete jenyete chõchĩ equia ùqui. I ribebe rá ño jêingochĩ ùqui.

¹⁶ Sã emo ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no.

¹⁷ “Ã ureico tuchite Dios rese ã”, jenyete chooño ñochĩ equia ñimbĩrĩ irĩ ùqui. Aba mbia eã tuchi chõ jêingo nguã ùqui. Mbaecha reã na ño jêingochĩ nguã Dios je ùqui. Eresayã na ño jêingochĩ nguã Dios je ùqui. Jêirao eã na ño jêingochĩ nguã Dios je ùqui no.

18 Jëingo chõ nguia serese ae. † nda oro turã naanguia amee jëje. † nda mbae amee tuchi jëje. † nda tirushĩ naanguia amee tuchi jëje. † nda jëireĩ nguia te jëirao eã si. † nda Dios cheẽ ambuchecua tuchi jëje.

19 Ae rese aico nyesequate nae, ũquĩ icuã icuã mose chõ aico nguia eiruã nua. Emundua si sacuã mbae turã ndese. Jëicuã si jëhui. Jendua sí Dios rese.

20 Aico jëiquesa mbuu mbuu a. Jemo seandu mose, huũiquesa mbuquiata mose seje, aique ra ee. Aico bei ra erese cote. Aquiaru quiaru ra se quia erese cote. ũquĩ abe ra quiaru quiaru quia serese cote no.

21 Ae “qui jë” i bei quia Satanás quirãcuã je nae, ũquĩ nda siqui bei serese se ererecua tuchi mose. ũquĩ abe ra amii mbia rerecuarã. Sã ñi aico “qui jë” i beite Satanás quirãcuã je nyii no. Sã ñi Paba semii mbia rerecuarã no.

22 Jëisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã, i que Cristo jëje ra”, ere chõ embesa mondo sequiato Laodicea jenda je, i que Cristo ñee seje ra.

4

Mbia ibatenda ñee turã ja Dios rñ

1 Aquere que amae ibate quiti ra. Eiquesa raanguia que nyeequia mii seje ibei ra. Ae ñeemombo sequite quiti serasate nyii nae, aque que ñee si seje cote ra. —Echu rã ibate. Mbae tateacuquia ndeje. Ae ra jei jei mbia je nae, ũquĩ tateacuquia rã ndeje, i que seje ra.

2 Aque mose tuchi que Espiritu Turã mbae teacuquia seje cuu ra. Dios rese que amae cuu ra. Huee que eñi ngoi trono tose ibate ra.

3 Enininya tuchi que seje ra. Sita rendi rã jaspe rã. Cornalina na abe no. Ibei asa que chí trono mama nda. Ibei asa nininya tuchite que chí nda. Esmeralda rã.

4 Veinticuatro tronos que chí Dios mama nda. Veinticuatro amei ngue chí tronos tose ja ja ra. Huũiraoshĩ ngue ecunui ja ja ra. Coronas oro ao ji que chí chí ja eãquĩ ndese ra.

5 Ama ngue sieu tuchi Dios mbae trónoo nda. Ama ngue ñee tuchi trónoo nda. Pirirã pirirã i tuchi que equia trónoo nda. Siete tata rendi que chí Dios ruba quiti ra. ũquĩ ndei Espiritu Turã na ũquĩ.

6 Ama ndisa raanguia que chí Dios ruba quiti no nda. Eibera tuchi que ra. Mbae reco cuatro que chí Dios mama nda. Eresa ata atate que ũquĩ nda. Eruba quiti que eresa ra. Equite quiti abe que eresa no nda.

7 Nyacua rã tuchi que ũquĩ mo nda. Ticuasu riirĩ na ngue enongue no nda. Mbia ruba rã ngue enongue no nda. Nguira risha rã ngue enongue no nda. Aque que mbebe quia ra.

8 Seis ja ja que ũquĩ jeo ra. Eresa ata ata tuchi que ejeo rese ra. ũquĩ cuatro que ñee turã mbeite quia Dios rñ nda. Isa abe que eriqui ñee turãte Dios rñ nda. Eĩ ngue equia ñe e nda:

Ndeturãte. Ndeturãte. Ndequirãcuãte ereico co, Dios.

Co ereico beite co.

Nyii que ereico beite no nda.

Mbae ua ja mose abe ra ereico beite no,

i que ũquĩ nguia ñee ñee Dios je ra.

9 ũquĩ ndeco cuatro que ñee turã mbeite quia Dios je ra. Ae siqui beite quia co, aque je.

10 Amei veinticuatro abe que ngoi ngoi quia ngũĩã ndese ra. Ñee turã turã Dios je. Umbae coronas que echono chono ja Dios jii ra.

11 Eĩ ngue equia ñee ñee Dios je ra:
Urererecua turãt e ereico co, Dios.
Nyebe ureico nguiã ñee turã mbeite ndeje ã.
Mbae que erechao jate nembraẽnda.
Erendua turãt e que mbae ao nonde nyii no nda,
i que ũquĩ nguia ñee turã turãte Dios je ra.

5

Emo libro equia aronea

1 Dios que libro quereco quia oo cuu ra. Uquiatocuti que enunui trono tose ra. Libro mbesa jĩ. Equitera quiti abe que embesa jii ra. Siete sellos je que ematã jii ra.

2 Angel quirãcuã mo ngue ñee nda. —¿Aba ra sellos ndoso libro equia re? i que ángel ñeemombo ra.

3 Mbia mo ngue sellos ndoso aroneate ra. Ibatenda. Ibi jenda. Ibiqiri rĩnda. Ũquĩ mo ngue sellos ndoso aroneate cuu ra. Nyebe mbia riqi nguĩã mae aroneate libro rese.

4 Nyebe que acheseo tuchi cuu ra. Mbia ja libro equia aronea mose. Mbia ja mae aronea mose erese.

5 Ũquĩ amei mo ngue ñee seje ra. —Erecheseochĩ nguĩã. Jesucristo ra libro equia. Ae quia equirãcuãte re. Ae quia Dios chiirabo rerecua tuchi re. David ririĩ tuchi chõ ae re. Ae quiatu que mbae rasi saã tuchi mbia icuã ndiquicharõ nda. Ae quia ra sellos ndoso. Ae quia ra libro equia, i que amei ñee seje cuu ra.

6 Jesucristo que chĩ huee cuu ra. Oveja iquia jii rã ngue eñi seje huee cuu ra. Siete que erambashĩ nda. Siete que eresa no nda. Siete eresa rei Espĩritu Turã. Sã Espĩritu Turã mae mbae ja rese no. Jesucristo que chĩ Dios ruba quiti ra. Mbae reco cuatro joõ ngue eñi nda. Amei abe joõ ngue eñi no nda.

7 Dios que libro mondo Jesucristo oo cote ra. Dios chĩ mose trono tose.

8 Jesucristo libro isi mose que ũquĩ mbae cuatro ngoi ngũĩã ndese ejii ra. Amei veinticuatro rese. Arpã que amei quereco reco ja ra. Mbae riru oro ao jii abe no. Incienso resebe. Incienso, i que mbae mbushimbusa oquiei mose ra. Dios quiato ñee mose Dios je, eĩ sí chõ incienso ee re.

9 Ũquĩ amei ngue irasei rasei canto yasu mo je ra. ã ño ngue irasei rasei nguĩã:

Nde que mbia ndeiquia ra.

Nde que mbia mangu chooñoa jenda ereisi Dios mbaerã nda.

Mbia cheemo ja ja eriqui nae, ũquĩ abe que ereisi ja Dios mbaerã no nda.

Mbia mbuae ja abe no.

Nyebe nde mii ño libro ereisi arõte nguĩã co.

Nde mii ño sellos erendoso arõte nguĩã co.

Libro rese mae sacua.

10 Nde que uremii Dios rimbarã nda.

Ure mbae raã naa sacua Dios je.

Mbia ibi jenda rerecuarã nda ureico cote,

i que amei irasei rasei Jesucristo je ra.

11 Angeles cheẽ ngue achandu cot e ra. Angeles que chi ũquĩ mama tuchi cuu ra. Dios mama. Mbae reco cuatro abe mama. Amei veinticuatro abe mama no. Angeles tubiriã tuchi que ra. Millones y millones tuchi que ángeles ra.

12 Ûquí ngue ñee nyecuate Jesucristo je re:
 Oveja ririĩ na ño ereico nguiã nde.
 Mbia que ndeiquia mbae icuã ndiquicharõ nda.
 Nyebe mbia riqui nguiã ñee turãte ndeje co cote.
 Nyebe mbia riqui nguiã ñee turãte nderĩ co cote no.
 Ndequirãcuã niĩ. Ndeaquiatu rĩĩ abe no,
 i que ángeles ñee turã Jesucristo je cuu ra.

13 Mbae que ñee turã jate quia Jesucristo rĩĩ cuu ra. Ibatenda ñee turã ja eriĩ.
 Ibi jenda abe no. Ibiqúi rĩinda abe no. Ama ndisha rĩinda abe no. Eĩ ngue
 ùquí nguia ñee turã jate Jesucristo je ra. Dios abe je:
 Jẽquirãcuã jẽingo beite ã.
 Mbia rerecua jẽingo beite ã no.
 Mbae jenyiao ra ñee turã mbeite quia jẽje,
 i que Dios chiao quia ñee jate ee cuu ra.

14 Ae beite, i que mbae reco cuatro ra. Amei veinticuatro abe que ngoi ja
 ngũĩã ndese ñee turã Dios je ra. Ae ereco siqui beite quia co, aque je.

6

Jesucristo sellos ndoso

1 Jesucristo que chĩ oveja ririĩ na cuu ra. Ae que sello mo ndoso libro si
 cote ra. Ae mbae reco cuatro chĩ nae, ùquí mo ngue ñee cote ra. —Echu, i que
 ñeemombo ra. Ama ndieu rã ngue echeẽ nda.

2 Caballo shĩ mo ndese que amae cote ra. Ae chĩ eátoo nae, nguira mo ngue
 ecunui oo ra. Corona abe que emo mee ee ra. Oso que guerra raã naa cote
 ra. Equirãcuãte que eriqui mbia mo si ra.

3 Jesucristo que segundo sello ndoso cote ra. Ae mbae reco cuatro chĩ nae,
 ùquí mo ngue ñee endoso mose cote ra. —Echu, i que ra.

4 Caballo nongue gue usẽ u seje cote ra. Era ireĩ tuchi que aque ra. Ae chĩ
 eátoo nae, aque je que emo espada cuasu mee nda. Aque que mbia mbĩcuã
 icuã jate nyue ra. Nyebe mbia riqui nguiã nyĩquia iquia.

5 Jesucristo que sello nongue ndoso cote ra. Tercer sello. Ae mbae reco
 cuatro chĩ nae, ùquí mo ngue ñee endoso mose cote ra. —Echu, i que ra.
 Caballo rondei que usẽ u seje cote ra. Ae chĩ eátoo nae, aque que balanza
 mo cunui oo ra. Mbae mbuchecha.

6 Emo ngue chĩ ùquí mbae reco cuatro ite re ra. Aque que ñee nda: —Mbia
 chiuu ra ua jiri. Un kilo de trigo rei una jornada. Três kilos quiata a rei una
 jornada no. Mbae quira quiatu ra ua eã. Vino ndese, i que ra.

7 Jesucristo que sello nongue ndoso cote ra. Cuarto sello. Ae mbae reco
 cuatro chĩ nae, ùquí mo ngue ñee nda: —Echu, i que ra.

8 Caballo nongue que usẽ u seje cote ra. Eracho que aque ra. Ae chĩ eátoo
 nae, ERAAQUE i que aque je ra. Emo ngue oso erui no nda. ERAAQUE TÃSA i
 que aque je no nda. Ûquí ngue mbia ibi jenda mbutiã tuchi la cuarta parte ra.
 Mbia iquia iquia tuchi que equia guerra je ra. Mbae rasi je. Eriãcuã je. Quia
 rĩinda icuã je abe no.

9 Jesucristo que sello nongue ndoso cote ra. Quinto sello. Mbae rese que
 amae altar qui re cote ra. Mbia chĩquia iquia aingue rese que amae nda. Ae
 mbia iquia iquia Dios cheẽ nĩ nyii nae, ùquí aingue rese que amae nda. Ûquí
 ñĩmbirãcuã tuchi chõ nguia mbae rasi je Jesucristo rĩĩ nyii reaẽ.

¹⁰ Ũquí ngue tasē tasē ñee Dios je ra: —Mbae eresaã turã jate quia nde co, Dios. Mbae ja rerecua chõ nde re. ¿Manosete ra urerichare erembasi re no, Dios? i que ñee ja Dios je ra.

¹¹ Dios que tirushĩ mee mee ũquí ja je cote ra. Ñee ngue ee cote ra: —Mbarandiri. Mbia icuã nda jêataque abe icua. Sã jêiquia nyii no. Ũquí sacuaã jêingo chombe jiri, i que Dios ñee e e ra.

¹² Jesucristo que sello nongue ndoso cote ra. Sexto sello. Ibi que nyere nyere tuchi aque mose cote ra. Tenda que ñimoo tuchi cote ra. Mbae ruqui rã tuchi que nyasi no nda.

¹³ Nyasitata que ngoi ngoi ngaẽ ibii cote ra. Sã ira a riqui uqui quiririã ñimbuqui no.

¹⁴ Ibei abe que ua cote ra. Sã emo ndiqui papel acua acua no. Sita ibate abe que siri siri ja nyesi ra. Ama ndisha joõ abe que echoi siri siri ja ra.

¹⁵ Mbia que ñimi ñimi ja ibicua ye ra. Sita imi ye abe. Mbia rerecua. Mbia rimba abe. Mbaecha abe. Soldados rerecua abe. Mbia que ñimi ñimi jate cuu ra. Esiquichete quia ñene.

¹⁶ Mbia siquiche mose que ñee ñee jate sita ibate je cuu ra: —Jenyu ngoi urearõ ureiquia. I nda Dios mbae rasi saanguquia eã ure je. I nda Jesucristo mbae rasi saanguquia eã ure je no.

¹⁷ Dios riqui mbae rasi raanguquia uquiato eã je co. Aba quia ra ñimbirãcuã ã je, i que mbia quia siquichete cuu ra.

7

Angeles Dios mbae marca mii mii mbia je

¹ Aquere que cuatro ángeles atea cuu ra. Emo ngue chĩ juã tenda chuisa quiti ra. Enongue que tenda sosa quiti no nda. Enongue que sur quiti no nda. Enongue que norte quiti no nda. Ũquí ngue quiririã isi tuchi quia ra. I chu eã sacuaã. Mangue jenda choõnoa quitinda abe ichu eã sacuaã. Ama ndisha quiti abe. I nda quiririã ira rãquiã mo ichu eã tuchi.

² Angel nongue mo ndese abe que amae no nda. Tenda chuisa quiti que eru quia ra. Dios mbae marca que equereco ra. Ñeemombo que ũquí ángeles cuatro je ra.

³ —Mbae rasi ra jemondo jeichĩ ibi je jẽ. Ama ndisha abe je. Ira abe je. Dios rimba ruba rese Dios mbae marca uremii mii na nyii, i que ñeemombo ángeles cuatro je ra.

⁴ Ciento cuarenta y cuatro mil ndese que Dios mbae marca mii nda. Judíos chumbarã ja que ra.

⁵ Judá riiĩ ndei doce mil.

Rubén ndiirĩ ndei doce mil.

Gad ndiirĩ ndei doce mil.

⁶ Aser riiĩ ndei doce mil.

Neftalí riiĩ ndei doce mil.

Manasés riiĩ ndei doce mil.

⁷ Simeón ndiirĩ ndei doce mil.

Leví riiĩ ndei doce mil.

Isacar ndiirĩ ndei doce mil.

⁸ Zabulón ndiirĩ ndei doce mil.

José riiĩ ndei doce mil.

Benjamín ndiirĩ ndei doce mil.

Ũquí ja rese que ángeles Dios mbae marca mii mii nda.

Mbia tubiriã iraoshĩ

⁹ Aquere que mbia cuabête atea cuu ra. Contar i ja aroneate que ee cuu ra. Ecuabête quiatu ngue re. Mbia chumumarate que ra. Mangue chooñoa jenda abe tubiriãte que ra. Echeê ñumumarate que ra. Dios ruba quti que ùqui chi jate juã nda. Cristo ruba quti abe no. Eiraoshĩ ja que chi ra. Sindo que equeru ja oo ra.

¹⁰ Ùqui ngue tasẽ tasẽte u ñee Dios je ra. Cristo abe je. ã i chõ ngue equia ñee nda:

Nde ae ereico nguiã mbia rirõ eicuã si co.

Nde ereico trono tose mbia rerecuarã co.

Jesucristo rese chõ ereico nguiã mbia rirõ ndirõ eicuã si co,

i que ùqui ja ñee Dios je ra.

¹¹ Angeles que ñumbui jate u Dios mama cuu ra. Mbae reco cuatro abe mama. Ae amei veinticuatro chi nae, ùqui abe mama no. Ùqui ángeles que ngoi jate ngũã ndese Dios ruba quti ra. Ngũã ndese que echi ñee turã jate Dio s je ra:

¹² Dios turã tuchite riqui mbia je co.

Sã mbia riqui ñee turã mbei eriĩ.

Dios aquiatu tuchite riqui co.

Sã mbia riqui “gracias” i bei ee.

Dios quirãcuã tuchite riqui co,

i jate que ñee turã Dios je ra.

¹³ Ùqui amei mo ngue ñee seje cote ra: —¿Aba ã nde? Ae eiraoshĩ chi a. ¿Ma si ecuaẽ a re no? i que ñee seje cuu ra.

¹⁴ —Ereicuate nde resẽ, Amei, ae que ee ra. Ae que eicua seje cote ra. —Ã ngue mbae rasi saã tuchi quia resẽ. Tiru irei ji rã ño ã ñia ndiqui nguiã ã cote. Jesucristo echiã mbitirõ nguqui je resẽ.

¹⁵ Nyebe eriqui beite nguiã Dios rese ã. Nyebe eriqui nguiã mbae raã naa mbei Dios je echuchúaa ã. Dios ra siqui bei erese. Teaquiatu bei ra mingo.

¹⁶ Ùqui nda ngũiãcuã irara eã mbei. Huisei abe ra eirara eã no. Tenda abe ra eiro eã. Huiriei abe ra eucuyã eã cote.

¹⁷ Jesucristo quia ra eteaquiatu bei mingo. Sã oveja raarõsa riqui oveja reaquiature no. Sã eriqui oveja rerao rao mbiu no. Eĩ si ra Jesucristo ùqui ndeaquiatu mingo. Dios ra echeseo mbutiba bei cote, i que amei ñee seje ra.

8*Mbae rei ji shimbu turã ndetashĩ ngasẽ oso Dios je*

¹ Jesucristo que sello nongue ndoso libro si cote ra. Séptimo sello. Mbae ibatenda que quiriri tuchi sello ndoso mose ra. Quiriri arête que ra. Media hora chee.

² Siete ángeles chi quia Dios ruba quti nae, ùqui ndese que amaembe cuu ra. Emo ngue trompeta mee ja ja ùqui je ra. Siete que trompetas ra.

³ Angel mo ngue tu incienso riru mo nderu ra. Oro ao ji. Tiba que uã altar jii ra. Emo ngue incienso tubiriã mondo ee cuu ra. Altar mo ngue chĩ oro ao ji ra. Aque arõ ngue ángel incienso ñono nda. Dios ruba quti. Ae Dios quiato ñee ñee nguia Dios je nae, ùqui ñee ngue ngasẽ nguia Dios je ra. Incienso rei jí shimbu turã ndese.

⁴ Incienso retashĩ ngue nyui oso quia ángel o si ra. Dios quiato cheẽ mbirõ ngue eriqui oso ngasẽ Dios je ra.

⁵ Angel que incienso riru mombisē tata reteĩ je ra. Altar jenda je. Ichusē ngue ibi quti cuu ra. Ama ngue sieu tuchi cote ra. Pirirā pirirā i tuchi que ra. Ibi abe que nyere cuu no nda.

Angeles trompetas mbucheẽ

⁶ Ae siete ángeles trompetas quereco nae, ũqui ngue icoquiato cote ra. Trompeta mbucheẽ sacua.

⁷ Emo ngue trompeta mbucheẽ cote ra. Iquitã ngue ngoi ngoi tuchi íbii cote ra. Tata abe que ngoi ngoi ra. I ireĩ tuchi que cote ra. Mbae ruqui rã. Ibi tercera parte que oquiei tuchi ra. Ira tercera parte abe que oquiei ra. Mbae ruri abe que oquiei ja no nda.

⁸ Segundo ángel que trompeta mbucheẽ cote no nda. Aque mose tuchi que mbae mo ndu ngoi ama ndisha ye ra. Ecuasu tuchi que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchi que cote ra. Mbae ruqui rã.

⁹ Ama ndisha rinda tercera parte que mano ja ra. Ae ngata quia ama ndisha rui barcos nae, ũqui tercera parte abe que ñimi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi íbii ra. Tata rendi rã ngue erendi ra. Ngoi que ama tercera parte ye ra. Eriecua tercera parte ye ja abe que ngoi no nda. I mbicua tuchi que ra.

¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Itei tuchi que cot e ra. Nyeb e mbia riqui nguiã mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuayãte tercera parte ra. Nyasi tercera parte abe. Nyasitata tercera parte abe no. Nyebe mbae checuayã tuchi riqui nguiã mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Ngaira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que ngaira risha ñee nda.

9

¹ Quinto ángel que trompeta mbucheẽ cote no nda. Aque mose que nyasitata mo ngoi u íbii seje cuu ra. Mbua raãte que aque nyasitata ra. Nyasitata que ibicua atiquia jea ra. Abismo, i que hue ibicua je ra.

² Equia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuayã jate que ra.

³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoĩ mangue chooñoa nda. Mbua i i tuchi que equia ra. Quiraẽ ndasi rã tuchi que eriqui mbia je ra.

⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri j a abe. Mbae ruri ja abe no. Quiata abe no. Mbua Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ũqui.

⁵ Ũqui je mbae rasi jẽsaanguia tuchi cinco meses. Jẽiquia eã ño, i que ñee tucu mbuae je ra. Quiraẽ ndasi rã tuchi que tucu rasi riqui mbia je ra.

⁶ Aque mose ra mbua “nandemano” i tuchi rei nguiã nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiātu guerra raã naa sacuã no. Corona naanguia que siqui tucu mbuae ãquĩ ndese ja ja ra. Oro ao ji ereae. Mbia ruba raãte que tucu mbuae ruba ra.

⁸ Cuña a raãte que ea ra. Nyacuareĩ naate que ereĩ nda.

⁹ Eishia ãtã tuchi que ra. Hierro rã. Mbia eiõ aronea. Guerra ndieu rã tuchi que ebebe mose ra.

¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbia mbasi mbasi que equia cinco meses ra.

¹¹ Angel icuã mo ngue tucu mbuae rerecua ra. Ae ibicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbia iquiãsa, i chõ nguiaẽ embae nombres je.

¹² Tucu mbuae que ua chee cote ra. Mbae rasi ñiinda chõ ùquĩ nde. Mbae rasi nyeremo tasenei jẽje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbae ra. Oro ao ji rei altar.

¹⁴ Ñee ngue ángel je ra. Ae trompeta mbucheẽ namo nae, aque je. — Cuatro ángeles embui rã mondo. Aecua jí chí Ama Eufrates nae, ùquĩ embui rã mondo, i que ee ra.

¹⁵ Cuatro ángeles que embui mundo cote ra. Aque mose sacuã ngue Dios ùquĩ nderecoquiātu ra. Ùquĩ ngue mbia iquia iquia tuchi tercera parte cuu ra.

¹⁶ Soldados tubirã tuchi que ùquĩ ángeles nimba cuu ra. Doscientos millones tuchi que ra, i que achandu ra.

¹⁷ Caballo átoo que soldados chí ja ra. Eishia riquisã ja ja que mbae ãtã ñi nda. Eishia aosa mbiitã jí que ra. Ereĩ. Erubi. Echo. Nyacua ãquĩ na ngue caballos seje cuu ra. Tata que emombo mombo ja quia uchuru rĩ nda. Tatashĩ abe. Azufre abe no.

¹⁸ Ùquĩ tres que mbae rasi tuchi ra. Tata. Tatashĩ. Azufre. Ae caballos mombo mombo quia uchuru rĩ nae, ùquĩ. Ùquĩ ngue mbia iquia iquia tuchi quia tercera partẽ ra.

¹⁹ Ngocoi je que eriqui mbia mbasi mbasi tuchi ra. Mbei tasi je rã tuchi que erocoi ra. Uchuru je abe que eriqui mbia mbasi mbasi tuchi ra.

²⁰⁻²¹ Nyebe mbia riqui nguiaã mano mano tuchi ùquĩ ndasi je. Mbia ataque quiātu que siqui beite quia hui#cuã ndese ra. Eicuã icuã mbei nyue. Ny#quia iquia. Brujería raã naa mbei. Siqui icuã icuã cuña mo ndese. Mbae mbuquiachã quiachã mbei. Uchisaã icuã si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Ùquĩ ja rese chõ ngue eriqui ra. Ùquĩ mae aroneate raque Dios abareã. Mbae andu aroneate raque. Ngata aroneate raque no.

10

Angel libro mo quereco

¹ Angel mo ngue nguichi ibei si seje cuu ra. Equirãcuãte que ra. Ibeishĩ ngue equeru hu#raorã nda. Ibei asa que chí eãquĩ mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no.

² Libro ñetẽ mo ngue equereco oo ra. Eequia ji que equereco ra. Utima ndibisho que em#i ama ndisha ye ra. Utima ndibisho que em#i ibii no nda.

³ Tasē tuchi que ra. Sã nyacua riqui curu curu no. Erasē mose que ama ñee siete veces ra.

⁴—Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, ũquí nda erembesachĩ. Eresenei seneichĩ nda emo je. Echeē emocoño ño, i que seje ra.

⁵ Ae ángel tima ndibisho chĩ ama ndisha ye nae, aque que oo uquiato-cutinda mee ibate quti ra.

⁶ Ñee ngue cote ra: —Dios que sembu ra. Ae siqu i beite quia co nae. Ae ibei chao nae. Ae ibi chao nae. Ae ama ndisha chao nae. Ae mbae chao ja tuchite nae. Aque que sembu co renei nenei sacua nda. Achite mbae ja ñi ua a cote.

⁷ Séptimo ángel nda nyuihuĩ cote. Trompeta mbucheē. Dios cheē ique ja mose r a nyuihuĩ cote. Ae Dios ñee uquiato ñiinda je nae, ũquí nda ique ja echeē cote. Mbia rerecuarã tuchi ra Jesús cote, i que ángel quirãcuã ñee seje cuu ra.

⁸ Ae cheē achandu ibatenda nyii nae, aque que ñeembe seje ra. —Eso rã libro ñetē isi. Ae tima chĩ ama ndisha ye nae, ae tima ndibisho chĩ ibii nae, aque si libro ñetē eisi rã. Eequia ji eisi, i que seje ra.

⁹ Ae aso nguiã ñee ángel je. —Libro ñetē emee na seje, ae que ee ra. Ae emee nguiã ñee seje cote. —Co libro ñetē jē. Eu ja. Irao raãte raque ra eachã namo mose. Etei tuchite quiatu ra nderie je cote, i que seje ra.

¹⁰ Angel que libro ñetē mee seje cote ra. Au que se ra. Eturã tuchi que sechuru je ra. Irao rã. Se eu tuchi mose quiatu que eteite serie je cote ra.

¹¹ Emo ngue ñee seje cote ra. —Dios cheē nda eresenei senei sí mbia ja je. “Co ra Dios saã. ã nda Dios saã no”, ere ra mbia je. Ishonda abe je. Mangu choñoa jenda abe je. Mbia cheē ñumumbara abe je. Mbia rerecu jate abe je, i que seje cuu ra.

11

Dios quiato nyeremo Dios cheē senei senei

¹ Dios que uu mo mondo séoo cuu ra. Ñee ngue seje ra. —Eso Dios chuchua mbuchecha checha. Altar abe embuchecha. Ae mbia chi huee ñee ñee Dios je nae, ũquí abe je contar ere rã.

² Itaicuee ra erembuchechachĩ jē. Patio ra erembuchechachĩ jē. Ũquí ngue amee mbia sequiatoã je ra. Sequiatoã nda irõ irõ Jerusalén ndese cuarenta y dos meses chee.

³ Sequiato nyeremo je ra sequirãcuã amee. Ũquí nda secheē senei senei tuchi quia mbia je 1,260 días chee. Tiru rondei ra ũquí queroco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato ja no. Uquiato nyeremo abe ra eteaquiato no.

⁵ Dios ra uquirãcuã mee ũquí nyeremo je. Emo embasi serĩ mose, tata ra embu embu uchuru si. Ucuãyãsa mbasi tuchi sacua. Eĩ nda mbia mano mano, ũquí Dios quiato nyeremo ucuãyã mose.

⁶ Ũquí Dios quiato nyeremo ama mbuchaaqui eã arõte, Dios cheē nenei nenei mbei mose mbia je. Mbae ruqui rã nda ama naa. Mbia ra embasi mbasi arõte uquirãcuã je. Ibi jend a mbasise mose, mbasi tuchi rae.

⁷ Ũquí Dios quiato nyeremo Dios cheē nenei nenei ja mose mbia ja je, icuã nda tu icuãte ee cote. Ibicua yenda. Icuã nda Dios quiato nyeremo iquia cote.

8-9 Emo ũquĩ Dios quiato raaque nyati aroneate. Erete tiquia iriã nda chichõ itaicuee rĩ. Mbia manguie choõñoa jenda abe tuchi r a mae ja eraaque rese. Tres días y medio chee rae. Jerusalén ndei ra ũquĩ. Ae mbia Jesucristo mbucha ira rese nae, huee. Hue jenda quiarei eicuã tuchi mbia. Sodoma jenda rã. Egipto jenda rã abe no.

10 Ae mbia siqui quia ibi rĩ nae, ũquĩ ia tuchi rae. Dios quiato nyeremo mano mose. —Ae nandechiao icuã siquisã quisã nguia nae, ũquĩ ngue mano cote ra, i r a eyate ñee nyue. Nyebe ra eriqui mbae mondo mondo tuchi nyue.

11 Dios quiato nyeremo ndaaque que chi tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbia que siquiche ja tuchi mae erese ra.

12 Ibatenda que ñee nyecua ũquĩ Dios quiato nyeremo je cote ra. —Jenyu aa quiatu ibate, i que Dios ñee ee ra. Nyoĩ que ibate ibei ye cuu ra. Eucuãyãsa que mae mbeite u echui rese ra.

13 Aque mose tuchi que ibi nyere icuã nda. Sucha tubiriã ndibisho que ngoi ngoi jate ra. Mbia tubiriãte que mano nda. Siete mil que mbia mano nda. Mbia ataque que siquichete ra. Ñee turã turãte que equia Dios ibatenda je cote ra.

14 Segundo mbae rasi chõ ã nde. Tercero quia tasenei jẽje cote.

Séptima trompeta mbucheẽ cote

15 Séptimo ángel que trompeta mbucheẽ cote no nda. Ũquĩ mose que mbia ñeemombo ja ja ibatenda ra. Eĩ ngue tasẽ tasẽ nda: Mbia mo ibi jenda mo nda siquíã ererecuarã cote. Dios ae chõ nda siqui ererecuarã cote. Nguirĩ ndese. Ae ae chõ nda siqui ererecuarã mbei cote, i que ibatenda tasẽ tasẽ cuu ra.

16 Ae amei veinticuatro siqui beite quia Dios jii nae, ũquĩ ngue ngoi ngũĩã ndese ñee Dios je cuu ra. Eĩ ño ngue ñee nguĩã:

17 Gracias ure tuchi quia ndeje co, Dios.

Ndequirãcuã mbae saã ja arõte quia co.

Ereico beite que equia nyii ra. Namõ abe no. Ereico beite ra eno.

Ereico ndequirãcuã naanguquiate mbia je co cote.

Ereico mbia rerecuarã tuchi co cote.

18 Mbia rerecua que paama ite ndeje ra.

Co mose ra ndequiatoã erembasi cote.

Ndequiatoã mano je abe ra erembasi cote.

Ndequiato abe ra erembuquera cote.

Mbae turã mee mee sacuã ee.

Ae ndecheẽ senei senei mbeite quia mbia je nae.

Ae ñee turã turã nguia ndeje nae.

Ndequiato cuasu je. Ndequiato ñetẽ je abe no.

Ndequiato ja je ra mbae turã eremee mee cote.

Ae mbia mbũcuã icuã nguia nae, ũquĩ nda erembutiã co mose cote,

i que veinticuatro amei ñee turã Dios je cuu ra.

19 Dios chuchua ibatenda iquesa que quiata seje cuu ra. Caja Dios chuchua jenda que nyecua seje cuu ra. Aque rei contrato riru Dios mbae aque. Aquere que ama pirirã pirirã i ra. Ama ngue sieute ra. Ama ngue ñeete ra. Ibi que nyere ra. Iquitã abe que ngoi ngoi chee ra.

12

Dragón icuã icuã cuña je

¹ Mbia mae sayã mo ndese que amae ibate cuu ra. Cuña nguasu tuchi mo ngue ra. Tenda que eirao ra. Nyasi que chí ei quiti ra. Corona ngue equereco uçquĩ ndese ra. Nyasitata doce que chí corona ndese ra.

² Nañimbae que cuña nda. Tasẽ tasẽ tuchi que equia nguiriĩ ndasi je ra.

³ Aquere que amae mbia mae sayã mo ndese ibate no nda. Dragón ireĩ mo ndese que amae nda. Siete que aque dragón ãquĩ cuu ra. Diez que erambashĩ nda. Corona ngue chí eãquĩ ja rese ra.

⁴ Dragón ngue nyasitata tubiriã siichã tuchi imbu íbii ngocoi je ra. Cuña ji que eñi eraarõ cote ra. –Sã nyaacuquia. Eriiriĩ tau, i que huĩ ejii ra.

⁵ Nyaacuquia que cote ra. Erãcoẽ ngue ra. Mbia ja rerecuarã tuchi ra aque. Emo ngue eriiriĩ isi ra. Querao que Dios je ibátee ra.

⁶ Cuña ngue uchã oso turuquia ñi nda. Dios echuchua saã ño nguia huee reaẽ. Huee que eriqui 1,260 días ra. Huee que emo ndiqui embuquiaru quiaru ra.

⁷ Amae ngue guerra rese ibate cuu ra. Dragón icuã icuãte que ángeles je ra. Miguel nimba ángeles abe que ucu ucu a dragón nimba ángeles rese no nda. Nyiiquia serĩ jate que cuu ra.

⁸ Dragón ngue ganar i aroneate umbae ángeles rese ra. Nyebe eriqui aroneate nguia ibate cote.

⁹ Dios que dragón mombo bei ibate si cote ra. Mbei ima ndei dragón. Diablo. Satanás, i abe que ee ra. Ae chõ mbia mangue chooñoa jenda mbiriĩ irĩ mbeite nguia co. Dios que ae mombo íbii cuu ra. Ngũimba rese.

¹⁰ Ibatenda ia tuchi que Dios emombo mose ra. Ibatenda mo ñee ngue achandu cuu ra: –Coche ñene. Dios riqui mbia rirõ mbei huicua si co cote. Namo tuchi mbia riqui mae Dios quirãcuã ndese co. Cristo riqui mbia rerecuã tuchi co cote. Dios quiatu que diablo mombo nguia. Ae Dios mbuqueta queta beite quia equiato riĩ nyii.

¹¹ Ũquiĩ Dios quiato que diablo siquisãte quia Jesús ruqui je ra. Jesús cheẽ je abe no. Ae ũquiĩ senei mbeite quia mbia je Jesús cheẽ nae, ũquiĩ je chõ eriqui nguia eriquisã quisã. Ũquiĩ Dios quiato que siquicheãte quia umano si ra. “Tamano ndei Dios je”, i jate que equia ra.

¹² Mbia ibatenda ia tuchite cote. Mbia ibi jenda quiatuchi eya eãte. Mbia ama ndisha yenda abe no. Diablo quiatu que nguichichĩ u nguia jẽje, ibi jenda. Paama i tuchite equia co. Achite quiatu Dios ñi nguia embasi a cote, i que ibatenda mo ñee cuu ra.

¹³ Dios dragón mombo mose íbii, dragón icuã icuã ngue cuña je cote ra. Ae eriiriĩ nacue nyaacuquia nae, aque cuña je que dragón icuã icuã cote ra.

¹⁴ Emo ngue mbae jeo nyeremo mondo cuña je ejeorã nda. Nguira risha jeo raanguia. Cuña mbebe sacua. Eso chee sacua turuquia ri. Ae Dios saã echucharã turúquiaa nyii nae, huee eso chee sacua diablo si. Mbei si. Emo embuquiaru sacua tres años y medio huee.

¹⁵ Mbei que i mombo tuchi uchuru ri nda. Iãcuana. Cuña iquia sacua ndaque chõ ũquiĩ iãcuã nde.

¹⁶ Ibi ia eãte que cuña ndese ra. Nyebe ibi nyiequia nguia i mocõ ja dragón nyuru jenda.

17-18 Nyebe dragón paama i tuchi nguiã cuña je. Eicuã icuã mbeite que eriqui cuña ndiirí ataque ja je cote ra. Ae Dios cheẽ mumba eãte quia nae, ũquí je chõ eriqui nguiã cuña ndiirí i. Ae siqui beite quia Jesús cheẽ ndui nae, ũquí je dragón icuã icuã mbeite riqui co.

13

Icuã nyeremo

1 Ama ndisha rimia ndese que aĩ juã cuu ra. Mbae mo ndese abe que amae huee ra. Icuã mo ngue usẽ u quia ama ndisha si seje cuu ra. Siete que eãquí nda. Diez que erambashĩ nda. Corona ngue chĩ erambashĩ ndese ja ra. Eãquí ndese que nombre mo mbesa ji ñi nda. Aque nombre icuãte que Dios je ra.

2 Nyacua risha rã ngue icuã nda. Oso i rã tuchi que ei ra. Echuru que nyacua churu rã nda. Dragón ngue uquirãcuã mee tuchi icuã je ra. — Erecuarã nde, i tuchi que dragón icuã je ra.

3 Icuã aqũ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbia mangu e chooñoa jenda nyuruira jate nguiã mae erese cote. Mbia que siqui jate eruĩ cote ra.

4 Mbia que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã turãte ra: —Co icuã turã na eãte mbia mo. Ae mii ño equirãcuã ndiqui nguiã mbia si co, i jate que mbia quia ee ra.

5 Icuã ngue ucuasu saã saã tuchi quia Dios je ra. —Dios tuchi chõ se re, i tuchi que equia mbia je ra. Dragón ngue emii mbia rereuarã cuarenta y dos meses ra.

6 Aque mose bei que eriqui ñee icuã icuã Dios rĩ nda. Echuchua rĩ abe no. Dios rimba ibatenda rĩ abe no.

7 Dragón ngue uquirãcuã mee tuchi icuã je ra. Icuã icuã icuãte que eriqui Dios quiato je cote ra. Dios quiato iquia iquia cheete que equia ra. Icuã ngue mbia mangu chooñoa jenda rerecua tuchi cote ra. Mbia cheemo abe rerecua tuchi que cote ra.

8 Mbia Dios quiatoã ja tuchi que siqui icuã ndese ra. Ae embae nombre mbesa iriãte riqui Jesús mbae libro rese nae, ũquí ngue siqui jate icuã ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde eriĩ.

9 Jẽisa mose, secheẽ jeñandu rã.

10 Dios mbae icua ja chõ nguiã, mbae tã i nonde equiato je. —Co sequiato ra mbia iquia tiquise je, i mose Dios, mbia ra equia tiquise je. —Co sequiato ra mbia tarõ, i mose Dios, mbia ra etarõ no. Sã Jesucristo rimba ñimbirãcuã ño. Sã Jesucristo icua tuchi. Icuã icuã icuã mose ee.

11 Aquere que amae icuã mo ndese no nda. Ibi si qu e co icuã ndu ra. Erambashĩ nyeremo ngue ra. Cordero nambashĩ na si que ra. Dragón ñee na si que echeẽ no nda.

12 Equirãcuã tuchi que ra. Icuã ñiinda rã sí. —Icuã ñiinda rimbarã ño jẽingo, i tuchi que equia mbia mingo ja icuã ñiinda rese ra. Ae aqũ sia ji nyerõ nguiã nae, aque.

13 Mbia mae sayã ngue esaã saã tuchi quia ra. Tata que embucoi ibei si mbia resa rae ra.

14 Mbia mae sayã ngue esaã saã tuchi icuã ñiinda rese eico mose ra. Eĩ ngue equia mbia mbĩrĩ irĩ tuchi ra. —Icuã ñiinda raanguia mo mbae mo jenyao jẽ, i que ñee mbia je ra. Mbia que echao ra. Ae aqũ sia ji tiquise je nae, ae nyerõ nguiã nae, aque raanguia que mbia chao ra.

¹⁵ Icuã ngue ereco mee mbae ao ji je ra. Mbucuata que ra. Mbucheẽ ngue ra. Mbia rã ngue eriqui cote ra. Ae ngoi sereãte quia ngũĩã ndese mbae ao ji résaa nae, mbae ao ji que ũquĩ iquia cote ra.

¹⁶ Icuã ngue umbae marca mii jate mbia rese ra. Mbia ruba rese. Mbia o rese equiatocutinda. Mbia riiĩ ndese. Mbia cuasu rese. Mbaecha rese. Mbaecha reã abe rese. Mbia rimba rese. Mbia rimba eã ndese abe no. Icuã ngue marcar i ja mbia ja je cuu ra.

¹⁷ Mbia mo marcar iriã mose, ũquĩ mbae mo isi aroneate. Mbae mo je vender i aroneate no. Icuã mbae marca nderequia eã mose. Icuã mbae número abe rerequia eã mose no.

¹⁸ Ae ndua tuchi eãte quia nae, ũquĩ nda ã icua eã. Ae mbae icuate quia nae, sã ũquĩ icuã mbae número icua. Mbia mo nii ño ñene. Embae número rei 666.

14

Mbia 144,000 irasei rasei Dios je

¹ Mbae mo ndese abe que amae cuu ra. Jesucristo que chi juã Ibi Ibate Sión seje cuu ra. Ae je eriqui Cordero i. Mbia cuabẽ tuchi que chi erese ra, 144-000 que mbia chi erese ra. Ũquĩ nduba rese ja ja que Jesucristo mbae nombre mbesa ji ñi nda. Dios mbae nombre mbesa ji abe no.

² Mbae rieu que achandu bei quia ibatenda ra. Tororomba ata ata rieu raãte que ra. Ama ndieu abe raãte que ra. Sã mbia tubiriãte riqui arpas mbucheẽ ñee no jẽ, ũquĩ naate que erieu riqui ra.

³ Ũquĩ mbia cuabẽte que irasei rasei quia Dios résaa ra. Mbae reco cuatro résaa abe no. Amei veiticuatro résaa abe que eriqui irasei rasei no nda. Eirasei rasei yasu que ra. Mbia mo ngue ñimbaaquiatu aroneate quia eirasei rasei yasu je ra. Mbia 144,000 achõ ño ngue ñimbaaquiatu aque irasei rasei yasu je ra. Dios ũquĩ sirõ nguiatu quia mbae icuã si reaẽ.

⁴ Ũquĩ ngue ñimb#cuã eãte quia mbae icuã je ra. Ñimb#cuã eã siqui cuña mo ndese no. Siqui turã mbei equia Jesucristo rese ũquĩ. Dios que esirõ mbei mbia ibi jenda si ra. Ofrenda turã na tuchi chõ ũquĩ Dios je re. Jesucristo abe je.

⁵ Ũquĩ nguiarei ñee ñooño eã tuchi ũquĩ. Ũquĩ turã tuchite eriqui Dios je ã.

Tres ángeles ñee mbia je

⁶ Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheẽ turã ua eã je que equereco quia ra. Erenei nenei sacuã mbia ja je. Mangu chooñoa jenda ja je. Mbia cheẽ ñumumbara abe ja je.

⁷ Aque ángel que ñee nda: —Jẽireĩ ireĩ jiri Dios si. Jẽnee turã turã jiri quia ee. Achite Dios ñi mae ja mbia rese a. Uquiatoã mbasi nonde. Dios quiatu ngue mbae chao ja nguiã. Ibei. Ibi. Ama ndisha. Ama ndicoĩ. Nyebe ra mbia ñee turã ee, i que ángel ñee cuu ra.

⁸ Ángel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachãte cote ra. Babilonia nda mbia mb#cuã eã cote. Mbia mb#cuã tuchichĩ equia nyii, i que aque ángel ñee cuu ra.

⁹ Ángel nongue abe rese que amae no nda. Ñee asite que ra: —Icuã ndese chõ nda jẽingochĩ jẽ. Icuã naanguia mbae ao ji rese abe chõ nda jẽingochĩ jẽ. Icuã mbae marca ra jem#chĩ jenduba rese jẽ. Jẽo abe rese ra jem#chĩ jẽ.

¹⁰ Emo emii mose, Dios ra paama i tuchi ee. Emo emii mose, Dios ra embasi tuchi. Dios ra ũqui mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no.

¹¹ Ũqui nda Dios mbasi bei. Mbae rasi ra eucua mbiri jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹² Dios quiato tuchi ra ũqui saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³ Ibatenda mo ngue ñee seje cuu ra: —Ã embesa rã: “Jesús quiato mo mano mose, eyate riqui co”, ere chõ mi embesa. Espíritu Turã ñee abe chõ ũqui nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ũqui si ra Dios tesareia mbei, i que ibatenda ñee seje ra.

Dios uquiatoã mbasi mose, mbae a riami ami na ño nda esaã ee

¹⁴ Ibeishĩ ndese que amae cuu cote ra. Emo ngue chi ngoi ibeishĩ tose ra. Jesucristo rã tuchi que ra. Corona ngue chi eãqui ndese oro ao ji ra. Tiquise raanguia rimbete que equereco oo ra. Quiata a ucua ucua sacuã.

¹⁵ Angel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate mangue chooñoa jenda ja, i que ee ra.

¹⁶ Ae chi ibeishĩ tose nae, aque que tiquise raanguia mee ibi quiti ra. Aque mose tuchi chõ ngue mbae a ibi jenda ishao ja tuchi cote ra.

¹⁷ Angel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacuã.

¹⁸ Angel mo ngue tu altar si cot e ra. Tata raarõsa altar jend a rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia je cote. Mangue chooñoa jenda ja eucua ucua. Equiche jate, i que ra.

¹⁹ Angel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchua mo nda. Eriami ami sacuã. Dios uquiatoã mbasi mose, mbae a riami ami na ño ũqui nde.

²⁰ Isho jiri que eriqui uvas riami ami sucha tubiriã si ra. Dios uquiatoã mbasi mose, uvas riami ami na ño ũqui nde. Eruqui riquiraa tuchi que ra. Caballo mbuchechea tuchi que eruqui riquiraa ra. Trescientos kilómetros tuchi que eruqui seje cuu ra.

15

Angeles mbae rasi siete quereco ja eriru ye

¹ Aba siquichesa mo ndese que amae ibei ri cuu ra. Mbia mbiirandu sacuã. Siete angeles rese que amae nda. Mbae rasi chumumbarate que ecurucuaẽ cuaẽ nguia ibii ra. Siete que mbae rasi ra. Mbae rasi tuchi. Ũqui siete mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquiã mbei icuã ndui Jesús quiato nae, ũqui ndese que amae no nda. Icuã naanguia rese abe siquiã. Icuã mbae número abe que equerecoã nda. Ũqui ndese que amae ama ndisha arõ nda. Arpas Dios mbae je que echi tocar i ra.

³ Ae Moisés irasei rasei nyii nae, ũquí sí je que echi irasei rasei ra. Ae mbia irasei rasei Jesús je nae, ũquí sí je que echi irasei rasei ra. ã ngue irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderĩ.

Nde mii ño ererecua tuchi re.

Mbia ra ngaẽ ja tuchi nderea. Ñee turã sacua ndeje.

Ndechiao turã ndese quiatu ngue mbia mae nguiã, i que mbia irasei rasei ama ndisha arõ cuu ra.

⁵ Aquere que mbae mo abe atea cuu ra. Dios chuchua ibatenda eiquesa que quiata seje cuu ra.

⁶ Siete ángeles mbae rasi queroco quia nae, ũquí ngue usẽ nyoĩ Dios chuchua si cote ra. Eiraoshĩ tuchi que nyoĩ usẽ nda. Oro que equereco huĩshia ati ra.

⁷ Ae rese ama e mbae reco cuatro nyii nae, ũquí m o ngue mbae riru mee ja ra ũquí ángeles siete je ra. Oro ao ji rei mbae riru. Mbae rasi mbisẽte que chi eriru ja ye ra. Dios mbia mbasi tuchi sacua.

⁸ Dios nininya tuchi que seje cuu ra. Equirãcuã tuchi que ra. Nyebe que tatashĩ Dios chuchua mboo ja tuchi ra. Mbia mo ngue ique aroneate rã huee ra. Ũquí ángeles mbae rasi icherẽ cherẽ ja eã mose.

16

Angeles mbae rasi icherẽ cherẽ ja

¹ Dios chuchua jenda mo ngue ñee asite ũquí ángeles je cuu ra. —Jẽso mbae rasi icherẽ cherẽ ibi jenda ja rese. Dios embasi sacua, i que ñee siete ángeles je ra.

² Angel ñiinda que oso umbae mbae riru yenda icherẽ ibii ja ra. Ae siqui quia icua ndese nae, ae ngoi coi quia nguiã ndese icua naanguia je nae, ũquí ire rasi rasi que cote ra. Mbae asi tubirãã ngue erese cote ra. Nyerõ aroneate que ra.

³ Segundo ángel que umbae mbae riru yenda icherẽ ama ndisha ja ye ra. Mbia raaque ruqui rã ngue ama ndisha cote ra. Ama ndisha rãnda que mano ja tuchi mbae cote ra.

⁴ Tercer ángel que umbae mbae riru yenda icherẽ ama ñi nda. Ama ndicoĩ ñi abe que eicherẽ no nda. Mbae ruqui rã tuchi que ama ja cote ra.

⁵ Angel ama ndaarõsa que ñee Dios je cuu ra. —Coche rei mbia icua erembasi. Dios turã tuchi chõ nde re. Ndeturã mbeite que eriqui ra.

⁶ Ũquí mbia icua nguiatu ngue ndequiato iquia iquiate nguiã nyii. Ndecheẽ nenei neneisa abe iquia iquia. Coche rei mbae rasi eresaanguquia ũquí je cote. Coche rei mbae ruqui eresaanguquia ee, i que ángel ñee turã Dios je ra.

⁷ Altar jenda mo abe que ñee Dios je cuu ra. —Ae bei. Coche mbia icua erembasi nguiã cote. Ndeturã mbeite chõ ereico nguiã nde, i que Dios je ra.

⁸ Cuarto ángel que umbae mbae riru yenda icherẽ tenda rese ra. Nyebe tenda riqui nguiã mbia rei ja ngacu je cote.

⁹ Tenda que mbia sei tuchi quia embasi ra. Ñquĩ mose abe que mbia riqui ñee turã eãte Dios je ra. Dios embasi raque. Mbia que uba eã mbei Dios rese ra. Ñee icuã icuã mbei chõ ngue equia eriñ nda.

¹⁰ Quinto ángel que umbae mbae riru yenda icherẽ icuã nenda rese ra. Itondaru tuchi que icuã nimba ja je mbia cote ra. Mbia que hueecõ shiu shiu tuchi quia mbae rasi mose ee ra.

¹¹ Ñquĩ mose abe que mbia uba eã Dios rese ra. Huiicuã ngue esecha eãte quia ra. Ñee icuã mbeite que equia Dios riñ nda. Ngasi rerequia mose abe que eriqui ñee icuã mbeite Dios riñ nda.

¹² Sexto ángel que umbae mbae riru yenda icherẽ Río Eufrates ye ra. Ama nguasu tuchi que aque ra. Aque ama ngu e iru cot e ra. Tenda chuisa quitinda soldados iasa sacuã.

¹³ Aba checuayã icuã tres rese que amae nda. Emo ngue tu usẽ dragón nyuru si ra. Enongue que tu usẽ icuã nyuru si ra. Enongue que tu usẽ Dios cheẽ nenei ñooñosa churu si no nda. Nyui rã tuchi que ñquĩ aba checuayã icuã nda.

¹⁴ Ñquĩ aba checuayã icuã ngue mbia mae sayã saã saã tuchi quia milagros ra. Ñee ja que mbia rerecua ja je ra. Ñmunua ja sacuã pelear i sacuã Dios rese.

¹⁵ Sã Jesús ñee no: “Mbia ndua eã mose serese ra achu. Jëtesa tesa bei equia serese jë. Jëngoquiato bei equia jë. † nda jëireñ ngüã sechu mose”, sã Jesús i no.

¹⁶ Aba checuayã icuã ngue mbia rerecua munua ja huee ra. Pelear i sacuã Dios rese. Armagedón, i que hebreo cheẽ hue je ra.

¹⁷ Séptimo ángel que umbae mbae riru yenda icherẽ quiririãsa ra. Aque mose que Dios ñeemombo uchuchua ibatenda si ra. —Mbae rasi icherẽ ji jate cote, i que Dios ñeemombo ra.

¹⁸ Ama ngue pirirã pirirã i tuchite cote ra. Ama ngue sieu tuchi quia no nda. Ibei que ñee tuchi quia ra. Ibi abe que nyere tuchi quia no nda. Emo mose rã eã tuchi que ra.

¹⁹ Sucha tubiriã Babilonia ngue obo obo nyibite riñ nda. Tres partes. Hue jenda tuchua que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiatu ngue tesareiatẽ ngüã Babilonia jenda chisaã icuã si. Nyebe eriqui ngüã paama i tuchi ee cote. Embasi mbasi uquirãcuã je cote.

²⁰ Islas abe que quiachã quiachã ja ama jenda ra. Ibi ibate abe que quiachamba chambã ja no nda.

²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ñquĩ iquitã nda. Iquitã ngue mbia iquia iquia tuchi quia ra. Nyebe mbia riqui ngüã ñee icuã icuã tuchi Dios riñ. Ñee turã ndocõ ee.

17

Cuña icuã mbae rasi saã tuchi

¹ Ae mbae riru quereco ángeles nae, ñquĩ mo ngue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuña siqui chooñote quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue.

² Mbia rerecua que siqui siqui jate quia erese ra. Mbia ataque abe no. Ae que mbia mbaicuã jate quia ra, i que ángel ñee seje cuu ra.

³ Angel que sererao turuquia rĩ cuu ra. Huee que amae cuña icuã ndese ra. Icuã ireĩ átoo que eñi nda. Embesa ji tubiriãte que chí icuã ndese ra. Nombres mbesa ji icuã tuchi que ũquí Dios je ra. Icuã áquĩ atate que ra. Siete que eáquĩ nda. Diez que erambashĩ no nda.

⁴ Mbia rerecua irao raãte que cuña icuã irao ra. Eirao ireĩ turãte que ra. Oro tubiriãte que equereco adorno nda. Perlas abe no. Sita ñetẽ aba queteamba abe no. Mbae riru abe que equereco oo ra. Oro ao ji. Huñicuã ngue equereco ja quia aque mbae riru ye cuu ra.

⁵ Embesa ji que chí eruba rese ra. Aba chiñcuayã tuchi que ra. ã i chõ ngue huĩ nguiã: “Babilonia ño co re. Sucha tubiriã icuã ño co re. Cuña icuã nderecua ja chõ co re. Mbae icuã nderecua ja chõ co re”, i chõ ngue embesa ji huĩ nguiã eruba rese.

⁶ Quiacuate quia cuña icuã ndiqui reaẽ. Jesús quiato uninya ruqui quia embei quia quiacua nonde reaẽ. Achuruira tuchi que mae erese cuu ra.

⁷ Angel que ñee seje cote ra. —¿Mbaerã ereico nyuruirate mae erese re? Tarembiirandu cuña icuã ndese. Ae átoo eñi nae, aque rese abe tarembiirandu. Ae siete eáquĩ ndiqui nae. Ae erambashĩ diez riqui nae.

⁸ Ae rese eremae icuã cuu nae, aque ngue siqui rei nguiã cose. Emoate namo cote. Siquibe rae. Usẽ nda ibicua si. Aque icuã quera si mose, Jesús quiatoã nda nyuruira tuchi mae erese. Ae embae nombre mbesa ji eãte Jesús mbae libro rese nae, ũquí. Icuã nda oso mbae rasi raã tuchi tata cuasu cote.

⁹ Earacua achõ nda ã secheẽ icua: Eáquĩ siete rã sí rei ibi ibate siete. Cuña icuã ñi ngoi ibi ibate siete tose hue.

¹⁰ Eáquĩ siete rã sí rei mbia rerecua siete no. Cinco que mano nda. Aque mñ ndiqui namo co. Emo mñ nda siqui emo mose cote. Aque ra siqui mbirĩ ño mbia rerecuarã.

¹¹ Ũquí siete mo ndei icuã ireĩ mo. Siqui que equia nyii ra. Emoate namo cote. Siqui i ra ũquí siete ua mose cote no. Mbia rerecua octavo ra ae cote. Ae ra oso bei tata cuasu aquere cote.

¹² Ae erambashĩ ndese eremae diez nae, mbia rerecua diez rã sí chõ ũquí nde. Mbia rerecua eã ño ũquí namo nde. Emo mose quia ra mbia rerecua cote. Ererecua mbirĩ ño ndae. Icuã ndese quiatu ra ererecua.

¹³ Hue rĩ sí tuchi ra ũquí ererecua ndua ndua. —Ererecuarã ño icuã jẽ, i ja ra ũquí ererecua. Uquirãcuã nda emee ja icuã je.

¹⁴ Ũquí nda pelear i ja Cristo rese cote. Cristo quia ra i tuchi ũquí ja si. Ae quia mbia rerecua tuchi re. Ae quia equirãcuã tuchi mbia mo si re. Ae siqui Cristo rese nae, Cristo chiirabo chõ ũquí nde. Eeturã tuchi chõ ũquí Cristo je re, i que ángel seje cuu ra.

¹⁵ Ñee si que seje ra. —Ae ama ndisha rese eremae mar nae, ae ji cuña icuã ñi ngoi nae, mbia chumumbara rã sí chõ ũquí nde. Mangue chooñoa jenda ja rã ño ũquí nde. Sucha tubiriã jenda ja rã ño ũquí nde.

¹⁶ Erambashĩ diez rese que eremae nae, mbia rerecua diez na sí chõ ũquí nde. Ũquí nda cuña icuã ucuãyaãte cote. Ũquí nda cuña icuã secha icuã cote. Erete checua ra esecha cote. Eroo ra eu. Erete ra esei tata je cote.

¹⁷ Dios que ñee nyii ra. —Mbia rerecua icuã tuchi ra cuña icuã je, i que Dios nyii ra. Echeẽ ndui sí ra eicuã icuã cuña icuã je cote. Dios que eicua nyii ra.

Hue rĩ sí ra ũquí ererecua diez ndua. Umbae ra emondo ja icuã je. Icuã mĩ nda mbia rerecuarã ja cote. Aque mose ra Dios cheẽ ique.

¹⁸ Cuña icuã ndese ereico mae nae, sucha tubiriã na si chõ aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

18

Babilonia jenda ra mbae rasi saã tuchi

¹ Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra.

² Angel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee cote ra. Aba checuayã icuã achõ ño chi nguã hue cote.

³ Hue sucha tubiriã Babilonia jenda que mbia mbũcuã jate quia ra. Mbua mbui mbui tuchi que equia Dios si ra. Ūbi icuã achõ ndese chõ ngue eriqui ndua tuchi ra. “Ūquí na nda se chã” i ja ja que equia mbae ja je ra, i que ángel ñee cuu ra.

⁴ Ibatenda mo ngue ñee cuu ra. —Ae serimba jemo nae, hue si jenyao. †nda hue jenda chisaã icuã jesaã eã jẽ abe. †nda mbae rasi jesaã eã jẽ, hue jenda mbae rasi raã mose.

⁵ Hue jenda que mbae icuã saã saã tuchite quia ra. Dios tesareiãte quia hue jenda icuã si co.

⁶ Hue jenda que mbia ataque mbasi mbasi tuchi quia ra. Ūquí sí ra mbae rasi saã tuchi cote. Dios ra mbae rasi saanguquia i i tuchi quia ee cote.

⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote.

⁸ Aque mose tuchi ra mbae icuã tu tuchi ũquí mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquie ja. Mbua ra mano ja. Dios quiatu ra mbae icuã saanguquia tuchi mbia je eicuã ñi cote. Dios quiarei eqquirãcuã tuchi, i que ángel ñee cuu ra.

⁹ Ae ererecua mbae icuã saã nguia Babilonia jenda rese nae, ũquí ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquie rese mae mose.

¹⁰ Isho chõ nda echi mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchite que jenyuchu a cote ra. Mbae rasi tu asi chõchi nguia jẽje ã, i ra maesa erese ñee ee.

¹¹ Comerciantes mangue chooñoa jenda ja abe ra eya eãte, Babilonia jenda mbae rasi raã mose. Nyeseo tuchi ra erese. Mbua quia nda embae isi eãte nguã cote. Nyebe ra eya eãte cote.

¹² ã je nda vender i nguã ña:

oro

plata

sita ñetẽ aba queteamba huirã

perlas

tiru turã tuchi

tiru ireĩ

tiru seda

ira simbu turã mo

marfil ao ji
 ira turã ao ji
 bronce ao ji
 hierro ao ji
 sitashĩ ao ji
 13 canela
 aba mbushĩmbusa
 perfumes
 tuchia mbusĩmbusa
 vino
 mbae quira
 mbae cui
 trigo
 ovejas
 caballos
 ira nambacua
 mbia nimba

Ūquĩ ja je nda vender i nguiã ee chã.

14 Mbia ra ñee Babilonia jenda je cote. —Ae mbae jenyoseite quia nae, ũquĩ mo nda tu ãte jẽje cote. Jembae tubiriãte riqui nyii nae, ũquĩ mo nda jendecoã cote, i ra mbia ee cote.

15 Ae ã mondo mondo quia vender i Babilonia jenda je nyii nae, ũquĩ abe ra chi mae isho erese no. Esiquichete ra chi mae mbae rasi raã ndese. Nyeseo ra erese.

16 Ñee nda Babilonia jenda je. —Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchiẽ jenyuchua cote. Jẽiraõ turã tubiriãt e rei ngue nyii re. Oro ao ji tubiriãte rei ngue adornos jembae nyii no nde.

17 Jembae ua asi chõchĩ jẽ mbae rasi raã mose, i ra ee. Ae comerciantes nyoĩ choi quia canoa ye nae, ae nyoĩ choi quia barco ye nae, ũquĩ nda chi isho mae Babilonia jenda mbae rasi raã ndese.

18 Babilonia sucha tubiriã oquieĩ mose ra ũquĩ nyi isho mae erese. —Sucha tubiriã tuchiẽ Babilonia. Babilonia na eãte emo, i ra nyeseo sucha tubiriã oquieĩ mose Babilonia jenda.

19 Ibi tuba ra emombo mombo uãquĩ ndese. Nyeseo tuchi rae. Sucha tubiriã oquieĩ mose Babilonia jenda. Ñeemombo mombo ra Babilonia jenda je. —Ureya eãte riqui jendese ã. Mbaechate que jẽingochĩ nyii ra. Ure abe que mbaechate ureico jeni nyii no nda. Mbae ua asi tuchi chõchĩ co mose cote, i ra ñee Babilonia jenda je.

20 Babilonia sucha tubiriã ua mose ra ibatenda iate cote. Jesús chĩmbaaquiato abe ra eya cote. Ae Dios cheẽ senei senei quia nae, ũquĩ abe ra eyate cote. Dios quia ra mbae rasi mondo tuchi Babilonia jenda je uquiato rĩ.

21 Angel quirãcuã mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. —Eĩ nda Dios sucha tubiriã Babilonia mombo. Sã sita amombo ama ndisha ye no. Sucha tubiriã eã mbei ra Babilonia cote.

22 Nyebe ra mbia música saã eã mbei huee cote. Mbia ra irasei rasei eã mbei huee cote no. Mbia ra nyuao eã mbei mbae rese huee cote. Mbia ra mbua tocho eã mbei huee cote no.

²³ Lamparina mo nda mbae tesae eã huĩ huee cote. Emo nda ngũinisirã isiã mbei huee cote. Mbia mbaecha hue jenda que aba chũcuate riqui nyii ra. Hue jenda que mbia ataque mbĩrĩ i rĩ jate rei quia brujeria je nyii no nda.

²⁴ Hue jenda que Dios quiato iquia iquia bei quia ra. Dios cheẽ mbuchecuaa que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19

¹ Aquere que mbia cheẽ tubiriãte achandu ibate cuu ra. Ñemombo mombo que ñee turã Dios je ra.

Dios turã tuchi te riqui mbia je co.

Dios ae riqui mbia rirõ eicuã si co.

Dios ae chõ equirãcuã ndiqui nguiã co.

² Ae siqui sereãte quia Dios rese nae, ñquĩ nda Dios mbasi.

Mae tuchi ra erese embasi nonde.

Sã Dios mbae rasi saanguquia cuña icuã je namo no.

Aque que siqui siqui jate quia mbia rese ra. Mbia mbĩcuã icuã ja.

Ae que Dios quiato iquia iquia quia no nda. Nyebe Dios embasi nguiã cote,

i que ibatenda cheẽ tubiriãte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquieĩ beite hue, i que ñee nda.

⁴ Aquere que veinticuatro amei ñee turãte Dios je cote ra. Mbae reco cuatro rese. Ngoi que ngũiã ndese Dios nonde ra. Dios chĩ mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra.

⁵ Emo ñee ngue achandu ibate ra. —Ae Dios quiato jẽ nae, jeñee turã ja erĩ. Ae Dios cheẽ jemumba eãte quia jẽ nae, jeñee turã ja erĩ no. Ae ecuas nae, ae eñetẽ nae, jeñee turã ja chõ nguia erĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iãcuã ndieu rã. Ama sieu rã. Mbia tubiriã ñee ño ndei ngue re. Ñ ño ngue mbia ñee nguiã:

Dios turã tuchi riqui mbia je co.

Equirãcuã tuchi te riqui co.

Ae riqui mbia rerecua tuchi co cote.

⁷ Nandechĩmbia tuchi quia erese jẽ.

Nandechẽ turã ño nguia erĩ jẽ.

Jesús ra uquiato isi bei cote.

Sã emo ndiqui ngũinisirã isi bei no.

Sã eninisi icoquiato ngurã ndaarõ arõ no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngũinisirã isi rã,

i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. —Co embesa rã: “Jesús ngũinisirã isi raanguia chõ nda esaã uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ñquĩ je”, ere embesa mi, i que ángel seje ra. —Dios cheẽ tuchi chõ ñquĩ nde, i que ángel seje ra.

¹⁰ Senia ndese que acoi rei ángel ndésaa ra. Adorar i sacua ee. Angel que ñee ño seje ra. —Adorar erechĩ nda seje jẽ. Dios rimba chõ se re. Nde rã sí. Ndequiato rã sí. Ae siqui tuchi quia Jesús rui nae, ñquĩ mo na ño se re.

Dios m̄i je chō adorar ere. Ae Dios cheē senei senei nguia mbia je nae, Jesús mbuchecua sacua mbia je chō ũqui nde, i que ángel seje ra.

Ae siqui caballoshī átoo

¹¹ Ibei que obo seje cuu ra. Caballoshī mo ndese que amae huee ra. Emo ngue chī éátoo ra. “Ñee ñooñosa reā” i que aque je ra. Ererecua turāte que ae ra. Ae que guerra saā saā nguia mbae turā ndiquisā quisā nda.

¹² Tata rā tuchi que eresa ra. Corona tubiriāte que eāqui ndese ra. Embae nombre mbesa ji que chī ndei ra. Mbia mo ngue embae nombre icua eāte quia ra.

¹³ Eirao mondo ji eruqui ye que equereco ra. “Dios cheē” i que embae nombre ra. Jesús chō eriqui reaē.

¹⁴ Ejército ibatenda que nyo i jate erui ra. Eiraoshī turā achōte que nyo i erui ra. Caballo átoo que echoi quia erui ra.

¹⁵ Ae rui ejército nyo i nae, aque que tiquise mo nguereco uchúruu ra. Ae teā teā nguia Dios je nae, ũqui mbasi sacua ño tiquise rerequia nguia uchúruu aque. Ae ra mbae rasi saanguquia tuchi Dios quiato eā je cote. Dios ra paama i tuchi mbia je aque mose. Mbia quia siqui sereāte nguia Dios quirācuā ndese.

¹⁶ Ae chī caballo átoo nae, aque irao rese que embesa ji ñi nda. Eu rese abe que embesa ji ñi nda. ERERECUA TUCHI i que embesa ji huī nda.

¹⁷ Angel mo ngue chī juā tenda re cuu ra. Urubu je que eñi ñeemombo mombo ra. Ae mbebe ja quia. —Jenyu ja quiaru. Dios ra jembuquiaru ja tuchi cote.

¹⁸ Mbia chumumbara roo ra jēu cote. Mbia rerecua roo. Soldados rerecua roo. Mbia quirācuā ndoo. Caballo roo abe no. Caballo ato jenda roo abe no. Mbia cuasu roo abe no. Mbia riirī ndoo abe no. Ae ererecua riqui nae, ũqui ndoo abe no. Ae ererecua eā ndiqui nae, ũqui ndoo abe no. Ũqui ndoo ra jēu ja cote, i que ángel urubu je ra.

¹⁹ Icuā ndese que amae cote ra. Mbia rerecua tubiriā ndese uquiato rese. Ejército tubiriāte que chī erese ra. Ũqui ñumunu a ño nguia eicuā icuā nonde Jesús je reaē. Ae siqui caballoshī átoo, aque je. Jesús rimba soldados je abe no.

²⁰ Jesús que icuā isi tarō nda. Dios cheē nenei ñooñosa abe no. Aque chō mbia mae sayā saā saā ño nguia icuā ndeco mose nyi reaē. Aque chō mbia mbirī irī nguia reaē. Ae mbia marca quereco quia icuā mbae nae, ũqui mbirī irī ño equia reaē. Ae adorar i quia icuā naanguia mbae ao ji je nae, ũqui mbirī irī ño equia reaē. Nyebe Jesús icuā mombo nguia tata cuásuu cote. Dios cheē nenei ñooñosa rese. Azufre rese eriqui sendi hue.

²¹ Jesús que icuā nimba iquia ja cote ra. Ae equereco quia tiquise uchúruu nae, aque je que equia ja cuu ra. Urubu ja que eroo u tuchi quia ra.

20

Dios ra Satanás tarō mi mil años

¹ Aquere que amae ángel mo ndese cuu ra. Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacua nda. Abismo i equia hue ibicua je.

² Angel que dragón isi nyucua ra. Satanás, i que equia dragón je ra. Mbei ima, i abe que equia ee ra. Diablo, i abe que equia ee no nda. Aque que ángel nyucua mil años cuu ra.

³ Angel que dragón mombo ibicua ye ra. Tarõ ngue llave je huee ibicua ye ra. Eiquesa que ematã nda. ƒnda dragón mbia manguue chooñoa jenda mbĩĩĩ irĩ si eã. Mil años ua mose, ángel nda embui mbĩĩĩ na mondo.

⁴ Jesús quiato iquia ji rese que amae nda. Ae ãquĩ mbia nyisia sia quia Jesús rĩĩ. Mbia rerecuarã tuchi que ùquĩ cuu ra. Siqui eãte quiatu ngue icuã ndese re. Icuã naanguia mbae ao ji je abe que eriqui adorar i ãte ra. Icuã mbae marca abe que equerecoãte quia nguba rese no nda. O abe rese. Ùquĩ ndaaque que quera si cuu ra. Cristo que emũ ererecuarã mil años nda.

⁵ Ùquĩ ndei mbia quera je rane ùquĩ. Mbia raaque ataque que quera eã aque mose ra. —Mil años ua mose ra Dios mbia ataque mbuquera cote, i que seje cuu ra.

⁶ Ae rane nda Dios mbuquera nyii nae, ùquĩ ia tuchi rae. Dios quiato tuchi chõ ùquĩ nde. Ùquĩ nda nyoĩ eã mbei tata cuasu. Siqui bei ra Dios rese. Cristo abe rese. Ererecuarã mbei ra eriqui Cristo rese mil años.

⁷ Mil años ua mose, Dios ra Satanás mbui sí mondo ibicua si.

⁸ Satanás nda mbia manguue chooñoa jenda mbĩĩĩ irĩ ja quia cote. Gog abe mbĩĩĩ irĩ. Magog abe mbĩĩĩ irĩ no. Dios quiatoã ja mbĩĩĩ irĩ. Etubiriã tuchite ùquĩ. Satanás nda ùquĩ munua nua ja quia. Guerra raã naa sacua Dios je.

⁹ Mbia tubiriã tuchi ra Satanás munua nua nguia ibi jenda ja cote. Ùquĩ nda Jesús quiato mama tuchi cote. Jerusalén ab e mama tuchi rae. (Dios nduasa tuchi chõ Jerusalén nde.) Dios ra tata mbu ibei si cote. Tata ra ùquĩ sei ja cote.

¹⁰ Diabolo quiatu nda mbia mbĩĩĩ irĩte nguia. Nyebe ra Dios emombo tata cuásuu cote. Ae eriqui icuã mombo. Ae eriqui icuã naanguia mbae ao ji abe mombo. Ùquĩ nda siqui bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashĩ mose. Isa abe chee. Usẽ eã mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chí ngoi trono tose ra. Trono cuasu tuchi que ra. Eshĩ ngue ra. Mbae que uchã ja Dios si aque mose ra. Ibi jenda. Ibei jenda abe no. —Tachimĩ Dios si, i rei que mbae ja ra.

¹² Amae ngue mbia raaque rese ra, ae mano ndei quia nyii. Mbia cuasu rese. Mbia riĩĩ abe rese. Chi ja que júã Dios resa rae cuu ra. Emo ngue libros ata equia ra. Libro nongue abe que eequia ra. Ae mbia ra siqui bei nae, ùquĩ mbae nombres que chí aque libro rese ra. Ae mbia saã saã nguia mbae nyii nae, ùquĩ mbesa mbesa ji qu e chí ùquĩ libros rese ra. Dios que mbia chisaã mbucheche checha cote ra. Embasi sacua.

¹³ Ae mbia mano ama ñi nae, ùquĩ ja que chí ra. Ae mbia mano íbii no nae, ùquĩ abe que chí ja no nda. Ae mano mano mangu e chooñoa jenda nae, ùquĩ abe que chí ja no nda. Dios que ùquĩ nyisaã mbucheche checha ja cuu ra. Embasi sacua.

¹⁴ Aquere ra mbia mano eã mbei cote. Dios quiatoã nda siqui bei tata cuásuu no.

¹⁵ Ae embae nombre mbesa iriãte aque libro rese nae, ùquĩ ngue Dios mombo ja tata cuásuu seje cuu ra.

¹ Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra.

² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbuturã ji jate que ra. Sã emo ninisirã quiche riqu i ngurã je no.

³ Ibatenda mo ngue ñee cuu ra: —Sã jẽ. Sã Dios riqui mbia mumbara co cote jẽ. Siqui bei ra equia erese. Mbia rerecua turãte ra eriqui ee. Erimbarã tuchi ra mbia cote.

⁴ Dios ra mbia mbia tuchi cote. Mbia mo nda manoã tuchi cote. Emo ndasíã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiyasu jate co jẽ, i que ra. —Ã secheẽ embesa ja rã. Ae rĩ aico ñee nae, ñquĩ nda asaã ja, i que ñee seje ra.

⁶ Ñeembe que seje ra: —Equiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo isei mose, i turã nda amondo ee. I mbia mingo beisa ra amondo ee. “Mbae embu i ribishorõ”, ae eã nda ee.

⁷ Ae “qui jẽ” i quia Satanás je nae, ñquĩ je ra mbae turã ja amondo. Ñquĩ nderecua tuchi ra se. Seriiĩ tuchi ra ñquĩ.

⁸ Ñ ja ra nyoĩ tata cuásuu: Esiquiche. Jesús icuasa reaẽ. Mbia nyaba chaba reaẽ. Mbia iguiasa. Ae siqui chooñote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. Ñquĩ ja ra nyoĩ tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ñquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra.

¹⁰ Aque ángel que sererao ibi ibátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Sucha cuasu.

¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra.

¹² Etaronda que sucha cuasu mama ja huĩ nda. Muralla, i que etaronda je ra. Eicoi tuchi que ra. Ibate tuchi que ra. Doce que eiquesa ra. Angel mĩ ngue chi eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chí jaaja eiquesa rese ra.

¹³ Eiquesa tres que chí tenda chuisa quiti ra. Tenda sosa quiti tres no. Norte quiti tres no. Sur quiti tres no.

¹⁴ Doce sita cuasu que chí muralla qui ñi nda. Etaronda irã. Doce apóstoles mbae nombres mbesa ji que chí ñquĩ sita rese ra.

¹⁵ Angel que uu mo nguereco oro ao ji ra. Dios recua mbuchechea sacua. Eiquesa abe mbuchechea sacua no. Etaronda abe mbuchechea sacua no.

¹⁶ Angel que Dios recua mbuchechea uu je ra. Cuadrado tuchi que Dios recua ra. Eoco que 2,200 kilómetros ra. Eicoi que 2,200 kilómetros no nda. Ibate quitinda abe que 2,200 kilómetros no nda.

¹⁷ Angel que muralla abe mbuchechea ra. Sesenta y cuatro metros que eicoi ra. Sã mbia riqui mbae mo mbuchechea no. Eĩ sí que ángel muralla mbuchechea no nda.

¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe.

¹⁹ Sita cuasu chi quia muralla irã nae, ũquĩ arõ ngue sita ñetẽ nininya chĩchi ja ra. Embarõsa chõ ngue ũquĩ nde. Jaspe mbitee ji rane ngue ra. Zafiro mbitee ji que chĩ jaspe arõ cote ra. Agata mbitee ji que chĩ cote ra. Esmeralda abe no.

²⁰ Onice. Cornalina. Cristólito. Berilo. Topacio. Crisoprasa. Jacinto. Amatista. Ũquĩ ja sita ñetẽ nininya que chi ja ja sita cuasu arõ nda.

²¹ Eiquesa riquisã jate que perla ao ji chi ra. Perla mii mii ja que chĩ eiquesa riquisã nda. Oro ao ji que calle mbite renda ra. Oro ao ji achõ ngue ra.

²² Dios chuchua templo mo eãte que huee ra. Mbia quiatu que ñee mbei quia Dios je mangue chooñoa nda. Jesucristo abe je.

²³ Tenda eãte abe que eriqui Dios récuua seje cuu ra. Nyasi eãte abe que seje cuu ra. Dios nininya ae chõ ngue mbae tesae ja quia ra. Jesucristo nininya abe no.

²⁴ Dios nininya ra uquiato tesae ja ino huee. Mangue chooñoa jenda ja. Mbia rerecua ra ñee turã turã ja Dios recua rĩ cote.

²⁵ Dios recua chiquesa tarõ iriã mbei rae. Itondaru eã mbei ra huee.

²⁶ Mbia mangue chooñoa jenda ja ra ñee turã turã Dios recua rĩ. Mbae turã ja ra chi huee.

²⁷ Mbia icuã nda iqueã mbei huee. Mbia mbĩrĩ irĩsa abe ra ique eã mbei huee no. Ae embae nombre mbesa ji Jesucristo mba e libro rese nae, ũquĩ achõ ño nda ique Dios récuua.

22

¹ Angel que ama mo abe teacuquia seje cuu no nda. Mbia mingo beisa que aque ama nda. Ama ndiibera tuchi que ra. Dios mbae que aque ama nda. Jesucristo mbae abe no. Sucha tubiriã ite rĩ ngue iãcuã iratã mo ñi nda.

² Ama nimia nguiti ja que ira ñi nda. Mbia mingo beisa que ũquĩ ira ra. Ũquĩ ngue ia beite quia doce veces en el año nda. Nyasi mbuchecha quiatu bei que eriqui ia ia bei ra. Ũquĩ iraro que mbia chumumbara mbucherõ cherõ tuchi quia ra.

³ Mbia rasi eã mbei ra huee cote. Dios ra siqui tuchi huee. Jesucristo rese. Cordero, i equia ee. Erimba ra ñee turã mbei quia ee huee.

⁴ Mae mae ja ra Dios ruba rese. Dios mbae nombre mbesa ji ra equereco nguba rese ja ja.

⁵ Itondaru eã mbei ra huee. Tenda aroneate huee. Tata abe aroneate huee no. Dios nininya ae chõ nda mbae tesae ja huĩ nguiã huee. Ererecua turã tuchi ra Dios quiato ja huee.

Achite Jesús ñi tu a cote

⁶ Angel que ñee seje ra: —Acheẽ ñooño eã ño nguiã co. Ae rĩ aico ñee nae, ũquĩ nda Dios saã ja. Sã Dios ucheẽ mbuchecuasa mondo mbia je cose no. Eĩ si que sembu namo no nda. Ae ra nyecua namo jiri nae, ũquĩ ndeacuquia sacua mbia je chõ ngue sembu nguiã.

⁷ “Se ra achu jei”, i que Jesús ra, i que ángel ñee seje ra. Ae ra ã mumba eã Dios cheẽ mbesa ji nae, ũquĩ ia tuchi rae.

⁸ Se rei Juan. Ñ ndese que amae nda. Ñ ngue achandu no nda. Aque ángel ã teacuquia quia seje nae, aque jii que acoi rei senia ndese ra. Adorar i sacua ee.

⁹ Ñee ngue seje ra. —¡Adorar erechĩ nda seje jê! Dios mii je chõ adorar ere. Dios rimba chõ se re. Nde rã sí. Ndequiato rã sí. Ae Dios cheẽ mbuchecua checua quia nae, ùquĩ na si. Ae ã mbesa ji mumba eãte quia nae, ùquĩ na sí, i que ángel ñee seje ra.

¹⁰ Angel que ñee si seje no nda: —Ae erembesa co libro nae, ùquĩ nda erembuchecua yã cuayãchĩ mbia si jê. Eteaquiato ee. Ae rĩ erembesa nae, achate eñi tu a cote.

¹¹ Sã mbia icuã mbae icuã naa naa ño na. Ae siqui quia mbae rondei rese nae, sã eriqui rã erese. Ae siqui quia mbae turã ndese nae, siqui i i tuchi ra mbae turã ndese. Ae siqui Dios rese nae, siqui i i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ùquĩ je ra mbae turã aru. Echisaã na sí.

¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echia irei ji Jesús ruqui je nae, ùquĩ ia bei ra eriqui. Eirao ituquia jí na ndei echia irei jí. Ùquĩ nda ique Dios récuua. Siqui turã mbei ra equia huee.

¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui choõnote quia cuña mo ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbirĩ irĩ nguia nae. Ùquĩ mo nda iqueã tuchi Dios récuua.

¹⁶ Jesús que ñee nda: —Angel serimba que amondo ra. ã nenei nenei sacua iglesias ja je. David i chõ se re. David nducucha chõ se no nde. Nyasitata nininya rã ño se re, i que Jesús ra.

¹⁷ Espiritu Turã ndiqui “quiatushu” i co. Jesús ninisirã abe riqui “quiatushu” i co no. Sã secheẽ andusa abe “quiatushu” i. Emo isei mose, sã ecuaẽ i mbei Jesús mbae. I mbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ã ñandu quia Dios cheẽ co libro resenda nae, ùquĩ je tacheẽ tuchi: Emo co libro resenda mbirõ mose emo ñee je, Dio s ra ùquĩ mbasi tuchi. Ae mbae rasi chi ja co libro rese a nae, ùquĩ nda esaã ja tuchi.

¹⁹ “Dios cheẽ eã ño co re”, i mose co libro resenda je, ùquĩ abe ra Dios mbasi tuchi. Ùquĩ nda Dios mingo bei eã nguécuaa.

²⁰ Jesucristo cheẽ ño ã nde: —Achu jei ra se, i equia co. Amén. Echu cote, Jesucristo.

²¹ Jesucristo rei nandererecua. Sã uturã mondo tuchi jêje. Amén.